


Gerotu Tokanchi
Gipiratkaluru



New Testament in Yine

Gerotu Tokanchi Gipiratkaluru

New Testament in Yine

copyright © 2008 Wycliffe Bible Translators, Inc.

Language: Yine

Translation by: Wycliffe Bible Translators, Inc.

Yine [pib], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Yine

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022
5c761e81-2ef6-5161-be9d-dbc456a2816b

Contents

Matiyo	1
Marko	51
Lokasu	81
Gwa	134
Yokanatkalune Kamrure	172
Romanone	221
1 Korintyone	243
2 Korintyone	264
Kalatane	278
Gigwisone	286
Wilipone	293
Kolosane	298
1 Tesalonikane	303
2 Tesalonikane	308
1 Timotiyo	311
2 Timotiyo	317
Tito	321
Wilimo	324
Gewreyone	325
Santiyako	343
1 Petro	349
2 Petro	355
1 Gwa	359
2 Gwa	365
3 Gwa	366
Gota	367
Gipgujetkaluru	369

Kiglerpotunanu Tokanchi Kpashiri Matiyo Yonatanru

Geso Kristo gitsrukateni giwaakaka

1 Tyenwa rushpakinri Geso Kristopirana. Tawiklopishni Geso, ga wa Gawraklopishni Tawi.

2 Gawra wugenetlu Gisaaka.

Gisaaka wugenetlu Gakowo.

Gakowo wugenetna Gota ga wa gimolene.

3 Gota Tamara wugenetyana Pare ga wa Sara.

Pare wugenetlu Gesromo.

Gesromo wugenetlu Gara.

4 Gara wugenetlu Gaminata.

Gaminata wugenetlu Naasoni.

Naasoni wugenetlu Salmo.

5 Salmo Racha wugenetyalu Poosi.

Poosi Rota wugenetyalu Gowe.

Gowe wugenetlu Gesi.

6 Gesi wugenetlu pogirchi Tawi.

Pogirchi Tawi, wa Goriyasu ganunronanni wugenetyalu Salomo.

7 Salomo wugenetlu Rowowa.

Rowowa wugenetlu Gawi.

Gawi wugenetlu Gasa.

8 Gasa wugenetlu Gosapata.

Gosapata wugenetlu Gora.

Gora wugenetlu Gosuya.

9 Gosuya wugenetlu Gowata.

Gowata wugenetlu Gacha.

Gacha wugenetlu Gesechi.

10 Gesechi wugenetlu Manasese.

Manasese wugenetlu Gamonu.

Gamonu wugenetlu Gosiyasu.

11 Gosiyasu wugenetna Gechoni

ga wa gimolene, gajriikakluggogne,
wa Wawilonya yintkana.

12 Gajrikapkalunenanu Wawilonya satokyatkana.

Gechoni wugenetlu Salatili.

Salatili wugenetlu Sorowawili.

13 Sorowawili wugenetlu Gawiyo.

Gawiyo wugenetlu Geliyachi.

Geliyachi wugenetlu Gasoro.

14 Gasoro wugenetlu Satose.

Satose wugenetlu Gachimi.

Gachimi wugenetlu Giliyo.

15 Giliyo wugenetlu Geleyasa.

Geleyasa wugenetlu Matana.

Matana wugenetlu Gakowo.

16 Gakowo wugenetlu Gosi,

Mariya gnuru.

Wala rushpakya Geso,
wa Kristo chinkaluru.

¹⁷ Giyagni wane pejnuklopisha gwashle, Gawrakluyakawa ga wa Tawiklupotunanuko, pamole gepkoxamkoje gwashlu. Tawikluyakawa ga wa Wawilonya yinriklupotunanuko pamole gepkoxamkoje gwashlu. Wa Wawilonya yinrikluyakawa ga wa Kristoklupotunanuko, pamole gepkoxamkoje gwashlu wane.

Geso Kristo gishpakinri

¹⁸ Wane rixa gishpaktea Geso Kristo. Wa runro Mariya, Gosi galuka gnunrotletinitkalo, mawakanuwalo, tetkatka kamshiro tixinritka Giwekkaluru Kpashiri chinanu.

¹⁹ Ga wa tganurupa Gosi, gi rixanu poyagkakachrini gi raluka pogitlepiranatlo, rushinika giknoklemtlo pochkeruko.

²⁰ Yanshinikanyeginatinri, Gitsrukaachitowreru gipgujewnayegitlu rupnawleya. Wane chinru, “Gosi, Tawiklopisha, gi pika gwaletanro pga-nunropa Mariya. Gi rixanu wala gwiyachri Giwekkaluru Kpashiri chinanni. ²¹ Tushpkawgenetanu toturu. Geso pgiwakatanru. Gi rixanu Wale gognetkakanna rayinerutene mukochireyna.”

²² Pejnuruko tye wane gixka poyagkakikolupa Gitsrukaachi tokanu, tokanchi geneklewatachriya. Wane china:

*23 Waneplo sato makloj mapnokatowa kamshiro pni.
Toturu tushpkawgenetanu.*

Rutakgiwakatanruna Gemanwuru.

Walenwa yokaakaluru: *Wixaymalu Goyakalu.*

²⁴ Yotunotinitka rumkanatinriya, wane rixatka Gitsrukaachi towreru tow-tapyawakatkalu. Rawatkalo ganunro. ²⁵ Gi wa retawalo tushpkawgenet-inpotunanuko muchinanu toturu. Giwakatlu Geso.

2

Kgimatkalerune gapokinri

¹ Wane rixa. Wetle Pokchi Gotechijne rushpakini Geso, wa pogirchi Giroreklu, kgimatkalerune tkachi gishpatyawaka sreta runyana. Gerosale rapokna. ² Wane chinna, “³Ginaklu wa Goteylene Pogire gishpakkachritka? Gi rixanu tkachi gishpatyawaka sreta wetyalo katagirite. Wuna wyoptsojityentapyaplu.”

³ Pogirchi Girore jemiranyegitinitkalu, kojwakanshinikanuta, pejnuruneko Gerosale gajeneymananuko. ⁴ Rapatna pejnuruneko tsrukakalune sasertotene ga wa yonchikgapine yinenu. Repomgana ginaka rushpakini Kristopa. ⁵ Wanna wane china, “Wetle, Gotechijne. Gi rixanu wane chinyongatka tokanchi geneklewatachriya:

⁶ *Ga wa pixa, Wetle Pokchi, Gotachijne,*

Galikakni gi wa mturpotyi,

Gota gitsrukatenet getanu,

Gi rixanu pixa yegi rushpkini Gitsrukaachi.

Wale girukotanna nayinerutene Gisrayiline.”

Kgimatkalerune yoptsojityegitatkalu

⁷ Giyagni Girore pochkeruko tomgana wa kgimatkalerune. Repomsapotutna tegipgujewnalgognetka katagiri. ⁸ Wetle yokanatna. Wane china, “Gajewa. Gepomsapotutanna wa mturu pirana. Wa gikshikiniplu ginkakapanno, gita koxa yoptsojityentapyaplu.”

⁹ Pogirchi yijnakotinitkana, yatkana. Waneklu katagiri wa tkachi gishpatywaka sreta retinrona, kosekananumtna, tapokinpotuko; mturu gwiyawaka ginaple tutuka. ¹⁰ Retinitkalona katagiri, rumuwatna. Rumuwpottna. ¹¹ Jiglokajimtatkana, retluna mturu runroyegi, Mariya. Yoptsojityegitatkaluna. Kotpukatkalona ponikowatinrina yegi. Ranikyegittatkaluna genekashlukaka: kori ga wa pgamlupagiri yochpiikalurupa, ga wa mirmunga. ¹² Yukanatkana rupnawleyna Girore yegi ma satokininitatkana, gichijnenya yatkana. Pagapoko yapamtatdkana.

Gigiptoya gasukletinrina

¹³ Yinitkana kgimatkalerune, Gitsrukaachi towreru gipgujewnagipnaye-gitlu Gosi. Wane chinru, "Palnanutka. Panikanutkalu mturu ga wa runro. Pasukanutka. Gigipto pyanutka. Wane pwanatanutka wane nchininpotukyi Gita. Gi rixanu Giroremka gjiganru mturu ruylatyaplu."

¹⁴ Yotunotinitka wale, goyechno ranikatkalu mturu ga wa runro. Gigipto yatkta. ¹⁵ Rupniniptutanuko Girore wane rawa, poyagkakikolupa Gitsrukaachi tokanu wa tokanchi geneklewatachriya. Wane china: *Gigipto ntomgiyu Noturu*.

Mturunni giylatikolu

¹⁶ Giyagni Girore getnawa gapnokatkaluru kgimatkaleruneya, rumtuw-napotuta. Ruylajixanna pejnurunniko mturunni Wetle gwachinni ga wa psolu sretako wale sreta gwachinni, gepi walapuyegirunni, wanepnute mturunpotni walegognepotuko rixa jemletyawakna kgimatkalerune. ¹⁷ Giyagni poyagkaatkta tokanchi geneklewatachri Geremiyta tokanu. Wane china:

¹⁸ *Ramachijne jemika tsru wamonchi:*

chiyaglu, saplewjekteru.

Rache twugenenni tuchiyagata.

Gi taluka gimnanuuukota,

gi rixanu maleshanatkana.

Nasare satokinrina

¹⁹ Ga wa rupnninatka Girorni, Gitsrukaachi towreru gipgujewnagipnayegitatnaklu Gosi Gigiptoya. ²⁰ Wane chinru, "Puyokanutka. Panikanutkalu mturu ga wa runro, ga wa Gisrayilinchijne pyanutka. Gi rixanu rupnanatkana mturu galuka giylaletachinni."

²¹ Giyagni yotunomtatka. Ranikatkalu mturu ga wa runro. Gisrayilichijne yatkta. ²² Giyagni Gosi yijnakyegitlu Garchelawo pogirewatnirritka Goteya, rurni Girorni kashriglutka, pika wane yaleta. Yokangipnatkatka. Kalilesreta yatkta. ²³ Wane yatkta. Pokchi rawatka, Nasare chinkaluru, poyagkakikolupa tokanchi geneklewatachri tokanu:
Nasare gajeru chinikolupa.

3

Gwa Katlewakleru ginkaklewatinri

¹ Walegognekaka runa Gwa Katlewakleru. Gotechijne yineru mwiyawakanu runkaklewaty. ² Wane china, "Genshinikanutanu, gi rixanu tengogne pogirewatyawaka gi gowukatka. ³ Gi rixanu tyenwa runkakyegitanru tokanchi geneklewatachri Gisayiya. Wane china:

Yineru mwiyawakanu pogimewaty tokanchi:

Galpokotanru Gitsrukaachi gatnugapote;

Mpotukatanru gigapkaka."

⁴ Kameyopixi kamrutikaluru rutaka Gwa. Pamta gipchiji rushrika. Ga wa tsetskaka nikjeta. Ga wa wrolga gosha gajero rura. ⁵ Giyagni yayegitluna Gerosale gajene, ga wa pejnruneko Gote gajene, ga wa pejnruneko Gortagapga gajene. ⁶ Gortagapga katikna waleya. Rupguitamukochiretnawana.

⁷ Gixo Gwariseyone ga wa Sariseyone retinitka Gwa katilewatyawaka ginachine, wane chinna, “Gimnu pixkalungi! ¿Katu yimakgi gasukyegityawaklu jgekanchipa? ⁸ Giyagni genshinikanuwlu kamrure gkamruretpotutanu. ⁹ Gi gkagwaka wane chinkakletinwa, ‘Waneywu wutsrukati Gawrani.’ Gi rixanu gita wane chingi, Goyakalu gimkata gipgujewnakakletanna Gawraklopishanemka tyekaka sotlukakaya. ¹⁰ Gagmunasko rapokatka gepchi. Pejnruko gagmuna kiglejiru mwanutu kayikalurupni. Xirnachri ruknookona.”

Satu Gwa pnute muchkonurutu

¹¹ Wane koxa china Gwa, “Gita galikakni katgi gonuya genshinikanutinri chinanu. Ga wa najxigi ginachri gita pnute muchkonurutu. Gi wa gita gimukluni nanikyaplu yoshmaklejixi. Wale katangi Giwekkaluru Kpashiriya ga wa xirnachriya. ¹² Ruplokapre kashicha. Powratpotutanru giylakaajetikowaka. Rapatjetanru trikneji rumretyawakaplu, ga wa yoxikanru gichicha xirniyawaka gike rixiniko muwnakatupa.”

Geso katka

¹³ Giyagni Kalile runyatka Geso. Gorta gapga Gwa yegi ya, wale katyaplu. ¹⁴ Seyni Gwa gaalipotutmaklu. Wane china, “Gita gimkata katkota Pixaya, ¿ga wa Pixa ginyegitno nkatyapyi?”

¹⁵ Giyagni rugita Geso. Wane chinru, “Puchichanno xani. Gi rixanu kigleru wane wixinri, psolpotuyako wpoaygaklewatinripa.” Waneklu rugitatkalu.

¹⁶ Giyagni rali katkoklunutka Geso, waneklu gonu rushpakyatka. Retlu tengogne gitpukachriga wa Giwekkaluru Goyakalunu gjirkachri motkoko pixka. Rapyegitifikalu. ¹⁷ Waneklu satu tokanchi tengognuya, wane china, “Tyenwa Noturu nushinikanru potu. Wale giglenshinikanutno.”

4

Geso yantaletka

¹ Giyagni yineru mwiyawakanu Giwekkaluru ganiklu Geso, yantaletikolupa tsru kamchiya. ² Geso, rali gogajirewatinitka gepkoxamkojmolegogne ga wa gepkoxamkojmoleyecho, wanepnute nachlu. ³ Rapyegitinitkalu kyantaletlewkleru, wane chinru, “Goyakalu Wgene pixinipa, wane pchinanru tye sotlukaka jimapro rixinwa.”

⁴ Seyni Wale gigita. Wane china, “Wane chinayongayegitkalurutkani: Gi wa niikalurupje ruwekyu yineru,

Seyni pejnruko tokanchi

Goyakalu chinyawaka.”

⁵ Giyagni tsru kamchi kpashiri pokchi raniklu. Kpashiwakaji gwachri tenoptaji potu rutaklu. ⁶ Wane chinru, “Goyakalu Wgene pixinipa, gewi pakaxikamtini. Gi rixanu wane chinayongayegitkalurutkani:

Gitowrene towutanu Pixa chinanu.

Kashichanyina gemyoyna,

gi pagogneko sotlu putspejxitinripa.”

⁷ Geso wane chinru, “Wanekoxa chinyongayegitkalurutkani: Gi pyantaletanru Gitsrukaachi Poyakalute.”

⁸ Magka tenolu potu ranikatnaklu tsru kamchi. Psolchijiko rekakgityalu pejnuruko pogirewatyawaakaka ga wa ruglenkaka. ⁹ Wane chinru, “Pejnu-ruko tyekaka nenekanyi pyoptsojityegitinipno.”

¹⁰ Giyagni Geso wane chinru, “Pyanutka, Satanasyo. Gi rixanu wane chinayongayegitkalurutkani:

Gitsrukaachi Poyakalute pyoptsojityegitanu.

Walepje pyonogyegitanu.”

¹¹ Giyagni tsru kamchi giknokamtatkalu. Goyakalutowrerune yayegit-atkalu. Rupxakatkaluna.

Geso yinuwaka kamrurewletinri

¹² Geso yijnakotatka Gwa samyookatka. Satokatka. Kalile yatka.

¹³ Ruknokamtatkalu Nasare. Kapernawo yatka. Wane rawatka, tsru wenuspawnaga gwachri pokchi, Sapolonosreta ga wa Neptalisreta,

¹⁴ poyagkakikolupa tokanchi geneklewatachri Gisayiya tokanu chinyawaka:

¹⁵ *Sapolonchijne ga wa Neptalchijne gajene,
tsru wengapo, Gorta wakanute,*

Kalile payinchijne,

¹⁶ *Yine mapshagawaka tuplattachine*

Retluna tsru pokamlalu.

Gipnalusreta,

gipnalchikle tuplattachine

pokamlalu gipgijewnayegitna.

¹⁷ Wanekluyakawa yinuwaka ginkaklewleta Geso. Wane china, “Gen-shinikanutanu, gi rixanu tengogne pogirewatyawaka gi gowukatkalu.”

Geso tomgana gepkoxamkoje chalugatachine

¹⁸ Kalile Wennespuwnaga yapanata Geso. Retna gepi moletkakachine: Simo, Petro giwakatletachri, ga wa repuru Gantirishi. Tsru wenu chaluganatna gi rixanu kshimagaklerunni. ¹⁹ Wane chinna, “Tekali. Gwagajxigitan. Yine gwapjetachine nixkakanutkagi.” ²⁰ Waneklu rutakamtatkaluna chalnekakna. Romkagitatkala.

²¹ Wane yapamtna. Wane retyana pimrine gepi moletkakachine, Sewereyo wgenene: Santiyako ga wa repuru Gwa. Kanawa rawanatna, rurumanu Sewereyo. Ramtanatluna chalnena. Wane tomgiyna. ²² Waneklu ruknokamtatkalona kanawa. Ga wa rurna ruknokamtna. Geso romkagitatkana.

Kalile yapamtinri Geso ginkaklewananumtachri

²³ Psoluko Kalile yapamta Geso. Runkaklewaklepjikakayna runkak-lewatya. Kiglerpotunaru Tokanchi runkakleta pogirewatyawakapirana. Pejnuruko yayixlu ga wa pejnuruko gagijewnalu Wale gituukakyana yine.

²⁴ Psoluko Suri poshalpiranamta. Ranikyegitluna pejnuruneko yayixachine, pnumnu gixa yayixletachine, salewnachine, ga wa kamchichachine, ga wa popukalerune, ga wa giktegachine. Rutuukakna. ²⁵ Gixoluru yineru gomkagitlu, Kalile gajene, ga wa Ntekapoli gajene, ga wa Gerosale gajene, ga wa Gota gajene, ga wa Gorta wakanute gajene.

Tokanchi magka ginkakletikaluru

¹ Gixolune yine reta. Magka kanika. Tuplata. Yayegitluna yimaklene.

Giglenshini kanyeglewlw

² Yinuwaka yanumsaleta. Runkaklewyegitna. Wane china:

³ Giglenshinkanyegitkalunni kwamonurune

Goyakalu munangachine,

gi rixanu wannani tengogne pogirewatyawaka.

⁴ Giglenshinkanyegitkalunni wamonuwatachine,

gi rixanu gimnanuukalunepni.

⁵ Giglenshinkanyegitkalunni mayogone,

gi rixanu wanna yoptotanru psolchijneko.

⁶ Giglenshinkanyegitkalunni nachgimane poyagkaklewuya,

ga wa gonunnagatewatachine poyagkaklewuya,

gi rixanu wannawa jinanurunepa.

⁷ Giglenshinkanyegitkalunni kgetwamonrerune

gi rixanu getwamonutkalunepni wanna.

⁸ Giglenshinkanyegitkalunni powragajirune,

gi rixanu wanna getanru Goyakalu.

⁹ Giglenshinkanyegitkalunni maluukakane gipoyikgayegkakachine,

gi rixanu wanna Goyakalu wgenene chinkona.

¹⁰ Giglenshinkanyegitkalunni kojwakjetkalune poyagkaklewlen chinanu,

gi rixanu wannanni tengogne pogirewatyawaka.

¹¹ “Giglenshinkanyegitkalungi yangingina, kojwakingina, psolpotuyako rektutetingina Gita chinanu, rayloklewashatinrina. ¹² Gimuwatanu.

Gimjikpotutanu, gi rixanu tsrupotupni gwenutikolupa tengogneya, gi rixanu wane rixa kojwaakotnina tokanchi geneklewatachinni muchinanu gwachinni gixaya.

Psolchijneko tuwne

¹³ “Gixni wa tye psolchijneko tuwnegi. Gi wa mro rixinikta tuwu, ¿klu tuwtka? Gike kigleyatkalu, seyni maleka ruknokanruna yineya rakatooko.

Pokamlalu psolchijneko chinanu

¹⁴ “Gixni wa pokamlalu tye psolchijneko pokamlachijnetachingi. Magka rogote gwachri pokchi gi rumkata yogimatkota. ¹⁵ Ga wa yineru gikoxa yochnipiklo katalo ga wa gimatumpuko rutaklo, seyni wa katalo kgapi tuttaako, pejnuruneko panchi gwachine tpokamlatyegitinripa. ¹⁶ Giyagni wane gixa pokamlatletanu yine getanuya, reta kamruretyapgina kigleru rixinri gkamrure, rumalwutypyapluna gixa Giru tengogne Gajeru.

Geso getyawaklu Tokanchi Yokanatkaluru

¹⁷ “Gi gkagwakanru wa nuninri nuknokapyaplu Tokanchi Yokanatkaluru, gi wa tokanchi geneklewatachine kirukateko. Gi wa nuna nuknokyaplu, seyni npoyagkakyaplu. ¹⁸ Gi rixanu galikakni wane nchingi, Nikawninpotunanuko tengogne ga wa tye chiji, gi pajina, gi satuna yotmokle nikawninri Tokanchi Yokanatkaluruya, pejnurpotunanuko ma mixkanuwpotunanuko.

¹⁹ Giyagni gi gixachrikokta kaspukiniplu satu tye yokanru mtserutu potu ga wa yimakna yine ma kamrutyayanpluna tye mtserutu potu yokanru, walepni mttru potu chinkona tengogne pogirewatyawakaya. Seyni gi gixachrikokta kamrulü ga wa wane rixa yimakletna yine, walepni wa tsru chinko tengogne pogirewatyawakaya. ²⁰ Gi rixanu wane nchingi, mpoyagkaklewle tsru ma mixkanupa yonchikgapine poyagkaklewle ga wa Gwariseyone poyagkaklewle pnute, gi gapokanuna tengogne pogirewatyawaka.”

Geso getyawaklu gmtuwakchi

²¹ Wane china, “Gixa yijnakotlu wa tsrunni wane chinikowaka, ‘Gi puylatanru yineru,’ ga wa ‘Girukokta giylatlu yineru rumkata giklukanuw-nayegjixkota.’ ²² Ga wa Gita wane chingi, girukokta gimtuwnayegitlu gimore maleshawaka rumkata giklukanuw-nayegjixkota. Girukokta wane chininri gimore, ‘Manshinikanutu,’ jemanshinikan-kakjetikowaka rumkata ganikletlu tsrukakalune. Girukokta wane chininri, ‘Seprolokachriyi,’ rumkata Gigena xirnachri yaleta.

²³ “Giyagni panikinri penekashle Goyakalu getanu, ga wa wane pushinkapinri puñole pwamontakinri, wane pixanu:

²⁴ Genekashjetikowaka kwa ginaple putkapanru penekashle. Gajewa. Muchinanu gapka pumatletapanutkalu pumole. Waneklu wane pyanutka. Putakanru penekashle.

²⁵ “Giyampotu pumatletanutkalu payegixjeru gatmugapo puyapinikopsh-inri, ma samyookanpakyi payegixjeru wa kgiklukanuw-nayegjixlewakleru yegi. Ga wa kgiklukanuw-nayegjixlewakleru ma samyookanpakyi gitow-eruru yegi, yoshmakjetikowaka pma yoshmakikotupa. ²⁶ Galikakni wane nchininyi, gi wane pushpakini pma wenutkanuwalo talipre mchataajpotu-nanuko.”

Geso getyawaklu gimopatlewlu

²⁷ Geso gomkagi wane chinretna, “Gixa yijnakotlu wa tsrunni chinikowaka: Gi pumopatlewatanu. ²⁸ Gita wane chingi, katukokta sato suxo getini, retsotanutinro, rumopatlewataatka walaya rajiya.

²⁹ “Giyagni wa potukleygale mukochirewkakinipyi, pkoshpakanru. Pu-knockanru pixyegiya. Gi rixanu kigleyyi pixinripa satupje pumane psojite pamginri, psolumaneko Gigena xirnachri pma muknokikotupa. ³⁰ Ga wa potuklemyo mukochirewkakinipyi pustakanru. Puknockanru pixyegiya. Gi rixanu kigleyyi pixinripa satupje pumane psojite pamginri, psolumaneko Gigena xirnachri pma mamginitipa.”

Geso getyawaklu giknokagnunrowlu

³¹ Wane chinna, “Girukokta giknokagnunrota, renekanro kiruka ma ga-nunrotyanpatkalo. ³² Ga wa Gita wane chingi: Girukokta giknokagnun-rota gapoklewlumigjeya, gimopatlewatachro rixkakanro. Ga wa girukokta gnunrotlo giknoakaluro, rumopatlewataatka.

Geso getyawaklu wale kawchinanu chinrekaka

³³ “Gijynakotatnaklu wa tsrunni wane chinikowaka: *Gi wa maleshawaka Goyakalu kawchinanu pchinanu.* Poyagkakanru Gitsrukaachi chinanu, wa pupiratanru Wale kawchinanu pchinre. ³⁴ Ga wa Gita wane chingi, giketso-taji Wale kawchinanu nchinanu: gi wa tengogne kawchinanuko, gi rixanu walenwa Goyakalu tuplapijere; ³⁵ gi wa chijiko, gi rixanu rutspanji-xgapreni; gi wa Gerosale kawchinanuko, gi rixanu tsru Pogirchi pokchini; ³⁶ gi pujiwu kawchinanuko, gi rixanu gi pumkata klatalu gixkakletlu pajiwutsapje, gi ksajiruko. ³⁷ Wane nchintokanutanu, gigi: ‘Gigi;’ gike: ‘Gike.’ Gi rixanu wanepnutetka mugletu ruyakatyatka wale.

Geso getyawaklu mugletu satkakyegitikolu

³⁸ “Gijynakotlu wane chinikowaka, *Ygalchi, ygalchi chinanu.* Ygichi, ygichi chinanu.’ ³⁹ Ga wa Gita wane chingi, gi psatkakyegitanru mu-gletu, seyni gi gixachrikokta giptagojityi potuklesretgoji, pasretgoji koxa puprotakgojyegitanru. ⁴⁰ Paluka jigyegletjeru kgiklukanuw-nayegjixlewakleru yegi, paluka gwamkaletjeru puchichankoxlu pumkaluchrata. ⁴¹ Gi gixachrikokta yakakinyi gepi kilometro waleyma pyinripa, gepkoxamkoje

kilometro pyanu waleyma. ⁴² Penekanru pagjitjeru. Girukokta galuka ganikleshatyayi, gi paalixanru.

Geso getyawaklu kamnixkaklu

⁴³ “Gyijnakpiranatlu wane chinikowaka, ‘Pushinikanru pumwastsitanru ga wa payegixanru pkamnixjeru.’ ⁴⁴ Ga wa Gita wane chingi, gishinikanna gkamnixjene. Gagjitanru ruglenshinikanyegitimkolupna gkamakpirjetjene. Kigle getle gixanna gayegixjene. Gagjigogneyegitanna gyenetjene ga wa gkojwakjene, ⁴⁵ tengogne Gajeru Giru wgenene gixinripa. Gi rixanu Wale gishpakaklu tkachite muglene chinanu ga wa kiglerune chinanu. Gina rixyegitna moyagkakachine ga wa mpoyagkaakane koxa. ⁴⁶ Gi rixanu gishinikinipna wa gishinikjene, ¿klu gimapnutko? ¿Gi ge waneko pixka rixna gjigawenutachine? ⁴⁷ Ga wa gimolenepje galukini, ¿klu gkamruta gixa pimrine pnute? ¿Gi ge waneko pixka rixkoxna payineko? ⁴⁸ Giyagni mmagatikanepgi, gixa Giru pixka tengogne Gajeru mmagatikatni.”

6

Poyagkaklewlu kamrutikolu

¹ Geso gomkagi wane chinretna, “Ggirukotinwa yine getanuya. Gi wa moyagkakachinepgi wanna getyapgi. Wane gixini, gi wa rapnutanungi Giru tengogne Gajeru.

Geso yimakle genekashlewlu piranaya

² “Giyagni petwamonrewle penekashlewatiniipa, gi wa pkowjixanu pixa penute, wa sanowashatachine pixka kowjixjetna ginkaklewakapjikakaya ga wa gatnugapkakaya, yine gimalwutypna. Galikakni wane nchingi rapnutatkana. ³ Wa petwamonrewle peneklewashatini, gi wa pkegnetes-retatemyo gimatantu wa potuklesretatemyo pkamrutinri, ⁴ wa yogimatikowaka penekashlewatiripa. Ga wa Puru, yogimatikowaka getyachri, pgujewaka rapnutinyi.

Geso yimakle gagjigogneru piranaya

⁵ “Wa gagjigognetini gi wa sanowashatachine pixka gixanu. Gi rixanu wanna galuka gagjigognereta tunwatachine ginkaklewakapjikakaya ga wa gipututsojriyakaka, wa yine getyapna. Galikakni wane nchingi, rapnutatkana. ⁶ Ga wa pixa gagjigognetini, pjiglokanu pugruko. Pushyatantu pupgyaptote. Pagjitanru Puru yogimatikowaka gwachri. Ga wa Puru yogimatikowaka getyachri pgujewaka rapnutinyi.

Gagjigogneru Gitsrukaachi yimakanru

⁷ “Gagjigognetini gi wa goyanumsaleshatachinepgi payine pixka. Gi rixanu wanna kagwaklu gixo tokanchiya yijnakotikolupna. ⁸ Gi wa wanna pixka gixanu gixa. Gi rixanu gixa Giru gimata kluneru gmagatya gma magjitanuwalu.

⁹ “Wane gixa gagjigogneretanu:
Wuru, tengogne Gajeru,
gipashichgiwakatkalurupyi.

¹⁰ Runanutka Pixa pogirewatyawaka.
Pixa galukyawaka wane gixkalurupni; tengogneko pixka rixko tyechijne.
¹¹ Penekanwu xawakni wnikanrupa tyegogne chinanupa.
¹² Pkaspukinwu wmukochire wixa pixka wkaspukyana pnu wixjene.
¹³ Gi wa yantaletikowakako putakanwu, seyni pushatkapanunwu galikaka mugletuya.

Kaspukyegkaklewlu

¹⁴ “Gi rixanu gixa kaspukinna yine pnu gixjene, Giru tengogne gajeru, kaspukinkoxgi gixa. ¹⁵ Seyni gma kaspukinna yine pnu gixjene, Giru koxa gi kaspukmukochiretanungi.”

Geso ginkakle gogajirewlu piranaya

¹⁶ Geso gomkagi wane chinretna, “Wa gogajirewatinipa gi wa sanowashat-achine pixka gixgojitanu wamonuwnagojitachine. Gi rixanu gektu rixgojitanawana wa yine getyapna gogajirewatachine gixyawakako. Galikakni wane nchingi rapnutkatkana. ¹⁷ Ga wa pixa gogajirewatinipa, ringi psagjiwutani, ga wa perkagojitanu. ¹⁸ Pma metikotupa yine yegi wa pogajirewatinri, seyni Puru yegi yogimatiwkawaka gwachri. Ga wa Puru yogimatiwkawaka getyachri pgujewaka rapnutinyi.

Geso ginkakna tengogne gajeru ponikolewlupirana

¹⁹ “Gi wa tye chiji mponikowatini, wa kochopa ga wa puchowlu gimtukywaka, ga wa kachowguru kotamgiyawaka, chowguwatiripa. ²⁰ Seyni tengogne mponikowatini galikaka, mumtuklewatikowaka gi wa kochopako, gi wa puchowluko, mkotamgikowakanu kachowguru, mchowguwatikowakanu. ²¹ Gi rixanu ginakaktaplu mponikowle wanekoxaplu gaji.

Wumane katalote

²² “Wumane katalote walenwa wuygale. Giyagni potukaygale pixinipa, psoluko pumane pokamlapa. ²³ Seyni puygale mugletu rixinipa, psoluko pumane mapshagalupni. Giyagni pokamlalu pumane gwachri mapshagalupni, iji pamapshagnunanuktalu!

Goyakalu ga wa ponikowlu

²⁴ “Gi satuna gimkata wayegrechri gixleta gepi gitsrukaachine yegi. Gi rixanu waka rayegixanru satu, satu rushinikanu. Waka satu rupxaletanu, satu reyikanu. Gi gimkata gipxaletletlu Goyakalu ga wa ponikowlu.

Kojwakanshinikanrewlu

²⁵ “Giyagni wane nchingi, gi gkojwakanshinikanutinwa giwekinriya, klu gnikanuna ga wa klu giranuna. Gi koxa gimaneya, klu gmakatanu. *¿Gi ge tsrupotni giwekinri niikaluru pnu, ga wa manchi gitaaikaluru pnu?* ²⁶ Getpotutanna tengogne yapachine koshichine mutaklewatkanni. Gi jir-gana. Gi rawluna wa gignantakjetikwakaya. Ga wa Giru tengogne Gajeru goglutanu. *¿Gi ge kiglepotgi gixa wanna pnu?* ²⁷ *¿Katu gixa gimkata yognikletlu giwekinriya pshinitsonuji gkojwakanshinkanrewleya?*

²⁸ *¿Klu koxa gkojwakanshinikanutnawa gmakatanruya? Getjetanru kag-wuru chiji gajeru, gi rixpoko tservunaleta. Gi kamrurewputota. Gi jiweta.* ²⁹ Seyni wane nchingi gi wa Salomoko psolu pogirewleyako makawata satu tyegwukaka pixka. ³⁰ Ga wa Goyakalu wane gixa makatletinri kshana xawakni gwachri, yechikawa xirnachri ruknookonatka, *¿gi ge wale pnu makatangi gixa?* Psotsotaji galixachingi. ³¹ Giyagni gi wa gkojwakanshinikanutinwa, wane nchininri, *¿Klu wnikanuna? ¿Klu wuranuna? ¿Klu wutakanuna?* ³² Gi rixanu payine pejnuruko tyekaka rujgana. Ga wa Giru tengogne Gajeru gimatlus tyekaka pejnuruko galukanru. ³³ Seyni muchinanu gapka gijganru Goyakalu pogirewatyawaka, ga wa Wale poy-agkaklewle. Pejnuruko tyekaka gyognikiko. ³⁴ Giyagni gi wa gkojwakanshinikanutinwa yechikawa chinanu. Gi rixanu waneplu kojwakanshinikanrewlu yechikawapa. Poyagotatka pagognekaka wa gektutu.”

Gi giklukanuwnayegjixlewatanu

¹ Geso gomkagi wane chinretna, “Gi wa ruklukanuwna nchinyegitanru satu, gma muklukanuwnayegjixikotupa. ² Gi rixanu gikta gixpoko giklukanuwnayegjixletna pimrine, waneko pixka gixa giklukanuwnayegjixkotanu gixa. Waneko pixka rixa: Wa yantapi gixa yantajetinri, walako gyantatiko.

³ “Ga wa waneko pixka rixatnaka. Wutakashatanru: Pixa getlu kapopejiru pumolegale gwachri, ga wa ¿puygaleko gwachri kaknalu gi peta? ⁴ Ga wa wane pchinanru pumole, ‘Gichikaka. Nwanruchi pugale gajeru kapopejiru.’ ⁵ Ga wa petanru pixako pugale gwachri kaknalu! ⁶ ¡Sanowashatachriyil Muchinanu gapka puknokanruchi kaknalu pugale gajeru. Waneklu petpotutanaklu puknokyaplu pumolegale gwachri kapopejiru.

⁶ “Gi wa kewene penekanru wa kpashiri. Gi giknokanru katajiroji perlaji gixanu kochine yegi, ma makatokyaupluna gjixiya, ma muprotkapyegityanupgi, ma suskatanupgi.

Gagjitanu. Gijganu. Giylaylagipgyaptotetanu.

⁷ “Gagjitanu ga wa geneeko. Gijganu ga wa gikshikanu. Giylaylagipgyaptotetanu, gkotpukyegitko. ⁸ Gi rixanu girukokta gagjita, yopto. Ga wa gijgachri ruksika. Ga wa giylaylagipgyaptotetachri kotpukyegitko.

⁹ “Ga wa gixa, ¿giru jeji wa gituru gagjitinri jimapro, renekanru sotlu? ¹⁰ Ga wa shima ragjitini, ¿gimmurge renekanru? ¹¹ Giyagni wa gixa muglenmakgi gimata genekawgenreta kigleru genekashle, pnutlu Giru tengogne Gajeru kiglerkaka renekanna ragjitjene. ¹² Giyagni pejnurkakago gixa galukanru wa yine wane gixyapgi, waneko pixkapotuko gixankoxna wanna. Gi rixanu tyenwa tokanchi yokanatkaluru ga wa tokanchi geneklewatachine tokanu.

Mtsergipgyaptotetu

¹³ “Gjiglokanu mtsergipgyaptotetu. Gi rixanu tsru gipgyaptoteru, tsrugapolu wa gamgikowakgapo. Gi gepikanna walegapo jiglokachinen. ¹⁴ Gi rixanu mtsergipgyaptotetu, mtsergapotni giweklugapo. Gi gixo gikshiklu.”

Kamrurna gimatina

¹⁵ Geso gomkagi wane chinretna, “Ggirukotinwa wannaya tokanchi geneklewatachine gixashatachine, ginyegitjene gowegane pixka gixamkatachine, seyni gitokoya kewetnane kmatsurune pixkalunni. ¹⁶ Kamrurna gimatina. ¿Kawshipirege jirgiylona gowaji? Ga wa ¿kawhisurerulege jirgiylona gikersagi? ¹⁷ Wane rixa pejnuruko kigleru gagmuna, kiglejiwlerni. Seyni wa gektutu gagmuna muglejiwlletni. ¹⁸ Gi rumkata kigleru gagmuna muglenjiwllet. Gi koxa rumkata mugletu gagmuna kiglejiwllet. ¹⁹ Pejnuruko gagmuna kiglejiru mwanutu kayikalurni. Xirnachri ruknooka. ²⁰ Giyagni kamrurna gimatina.

Gi pagogneko numatgi

²¹ “Gi pejnuruneko ‘Gitsrukaachi, Gitsrukaachi’ nchinjene gapokanru tengogne pogirewatyawaka. Seyni Nuru tengogne Gajeru gishinikanru kamrutchri, jiglokanru. ²² Walegognepa gi gepika wane chinanno, ‘Gitsrukaachi, Gitsrukaachi’ ¿gi ge tokanchi geneklewatachinwu Pixa giwakaya? ¿Gi ge pgiwakaya maleka wuknokna kamchine? ¿Gi ge pgiwaka wkamrutyalyu gixo giyaklukaka? ²³ Giyagni nunkakpotutanna, ‘Gi pagogneko numatgi. Knantu gyanutka Cityegiya, mukochri kamruklerungi.’

Sotlumta gogo kamrupjitachri

²⁴ “Giyagni girukokta yijnakotlu tye ntokanu, ga wa wane rixlu, jeji kshinikanuru pixkalutu, sotlumta gogo kamrupjitachri. ²⁵ Gina gjruka. Rapogata. Kannipgyalu gajpopokannipgyata. Yantamuchkonupjiltu wale panchi. Gi wa yawna, gi rixanu sotlumta gogo poyegitanruni. ²⁶ Giyagni girukokta yijnakotlu tye ntokanu, gi wane rixa, jeji manshinikanutu pixkalutu, ksatu gogo kamrupjitachri. ²⁷ Gina gjruka. Rapogata. Kannipgyalu gajpopokannipgyata. Yantamuchkonupjiltu wale panchi. Yawnamtana. Tsru yawnalnu rixana.”

²⁸ Wane rixa. Wa Geso tye tokanchi rali ginkakletinitka, wa gixolune yine giglajita runkakaklewleya. ²⁹ Gi rixanu tsru gitaaikaluru pixka rixa ginkaklewleta. Gi wanna yonchikgapine pixka rixa.

8

Geso gituukaklu gjirgitutachri

¹ Magka yopikyatka. Gixolune yine gomkagitlu. ² Wane satu gjirgitutachri yayegityalu. Yoptsojityegitlu. Wane chinru, “Gitsrukaachi, palukiniplu pumkata powratletanunno.”

³ Romyokyegitlu. Kamruklu. Wane china, “Naluklu powra pixinripa.”

Waneklu rujirgitle rutukyatka. ⁴ Geso wane chinru, “Petanu. Gike punkakanu. Seyni pyanu. Pekakgitinwa sasertote yegi. Penekanru genekashlu wa Moysisi yokanatanru. Walepni gipguitalewlu wanna chinanu.”

Ksolaloteru tseruwakle gituukaaka

⁵ Kapernawo rapokinitka, satu ksolaloteru ginyegitlu. Ragjitlu. ⁶ Wane china, “Gitsrukaachi, nopji ruklugana ntseruwakleni. Giktegachrina. Salewnachripotuna.”

⁷ Wane china, “Wane nyanu Gita. Nutuukakapanru.”

⁸ Ksolaloteru gigita. Wane china, “Gitsrukaachi, gi numukluyi wa nopji washrempuko papokinripa. Seyni wane pchinatokanushatanu. Ntseruwakle gitukanutka. ⁹ Gi rixanu gita koxa jejno tsru gitaaikalune rapukote gwachrino. Gita koxa solalone gitakika. Wane nchinru wa tye, ‘Pyanutka.’ Yatka. Satu wane nchina, ‘Punanu.’ Runa. Wane nchinru nwayegreru, ‘Pkamrutanru wa tye.’ Kamrutlu.”

¹⁰ Geso yijnakotinri, ruglajita. Wane chinna romkagijene: “Galikaka wane nchingi, gi satuna Gisrayiline yegi nukshikyalu tye pixkalutu galixlewlu. ¹¹ Wane nchingi, runanna gixo tkachi gishpatyawakasreta gajene ga wa tkachi gimxityawakasreta gajene. Tengogné pogirewatyawaka tuplatanna Gawrayma, Gisaaka, ga wa Gakowyma. ¹² Seyni wa pogirewatyawaka gwachinemka giknookalunenapni mapshagawaka maleka. Waneplu chiyaglu ga wa gashkaygitlu.”

¹³ Geso wane chinru ksolaloteru, “Pyanutka. Palixyawakpotuko pkamruttatka.”

Rutuukakatka tseruwakle wanekluyakawa.

Geso gituukaklo Petro gimajiro

¹⁴ Petropji ya Geso. Retlo Petro gimajiro. Tuklughanatana, tpachwatana.

¹⁵ Kamrukamyonotlo. Tupachwalgalatka. Tyotunomtatka. Wala gipxakatkalu.

¹⁶ Kayi rixinikta ranikyegitluna gixo kamchichachine. Maleka ruknokna kamchine tokanuya. Rutuukakna pejnuruneko yayixachine,

¹⁷ poyagkakikolupa tokanchi geneklewatachri Gisayiya tokanu. Wane china: *Waleko gwalu wugroklewle. Raniklu wyayixlekaka.*

Geso galuka gomkagletachine

¹⁸ Geso getna gixo yine Wale yegi. Yukanrewata wakanu yinripna. ¹⁹ Satu yonchikgapri gapyegitlu. Wane chinru, "Yimaklewatachri, nomkagitan yi ginakakokta pyinipa."

²⁰ Geso wane chinru, "Kewnechrone waneyna kapna. Ga wa koshichine tengogne yapachine waneyna rawyawakna. Ga wa Gita Yineru Wgenno maleshayno nutspanjiwutwyawaka."

²¹ Satu yimakleru wane chinru, "Gitsrukaachi puchichanno muchinanu gapkachi wane nyanu, nuruchi gipnini, ga wa nkapanamtanu."

²² Geso wane chinru, "Pomkagittano. Petashatanna gipnachine kapnale-tanna wannanunekni gipnachine."

Geso kochroklu tsru kannipgyalu

²³ Kanawa ruptekatka. Yimaklene gomkagitlu. ²⁴ Waneklu tsru yow-jereshpurga rixa tsru wenu. Wa kanawa tuygajetlo gishpurga. Seyni Wale gimkananumta. ²⁵ Yimaklene yayegitlu. Komyekluna. Wane chinruna, "Gitsrukaachi, pognetkakanwu! ¡Wamginripatka!"

²⁶ Wale wane chinna, "¿Klu chinanu pikachingi? Psotsotaji galixachingi." Giyagni yotunota. Chigetjetlu kannipgyalu ga wa tsru wenu. Tsru mayegix-galu rixatka.

²⁷ Giyagni jejine giglajita. Wane chinna, "¿Gi gixachri jejnige wa tye? Wa kannipgyalu ga wa tsru wenu yijnakotanru."

Gergesa gjajene kamchichachine

²⁸ Wakanu rapoka Gergesenonesreta. Yoptotapluna gepi kamchichachine, yomlechi yegi ginyachine. Kmatsurunpotni. Wane rixkalchinanna gike gimkata giknoglegapotlu walegapo. ²⁹ Wane sablewatyana. Wane chinna, "¿Gi rixwu wixa ga wa pixa, Geso, Goyakalu Wgene? ¿Punge gewi psaletpo-tutyapwu ma mapookanuwa gipapko?"

³⁰ Gowukako rawanatikna gixo kochine. Nikanatna. ³¹ Ga wa kamchine ragjiltluna. Wane chinruna, "Puknokinipwu, puchichanwu kochinemane wjiglokinripa."

³² Wane chinna Geso, "Gajewa."

Wanna gishpakamtatka. Kochine yegi yatkana. Waneklu pejnu-runniko gixolunni kochinni pagakaxikamtkalunenni gitawakapjita ru-jrukamtyanna. Tsru wenu rapokanna. Gonu rupniyanna. ³³ Kochi kogluklerune gasukamta. Pokchi yana. Runkaklewatna pejnurpiranako kamchichachineya. ³⁴ Giyagni pejnuruneko pokchi gjajene yayegitluna. Yoptotapluna Geso. Retluna. Ragjiltluna pnusretako yinripatka.

9

Geso gituukaklu giktegachri

¹ Kanawa ruptekatka Geso, koprugatatka. Gipokchi yatkana. ² Waneklu satu giktegachri ranikyegitluna, gijeko giklugachri. Geso geta galixletna wanna. Wane chinru giktegachri, "Kiglenshinikanupyi, Wiwi. Kaspu-kmukochiretkalurutkayi."

³ Wa pimrine yonchikgapine wane chinanshinikanutna, "Tyenwa mu-pashiregnuchi china."

⁴ Rumatanshinikanutinna Geso, wane chinna, "¿Klu chinau mugletu gyanshinikanuta gajiya? ⁵ Gi rixanu ¿girni wa myapretu wane chinikolu,

waka, ‘Kaspukmukochiretkalurutkayi,’ waka wane chinru, ‘Palnanutka. Pyanamtanutka?’⁶ Seyni wa gimatayaplu wa Gita Yineru Wgenno tyechijne gitaaikalurno kaspukmukochirelewatachripno” —giyagni wane chinru giktegachri, “Palnanutka. Pwanutkalu pujeko. Pyanutka pupji.”⁷ Giyagni wale palnatka. Gipji yatka.

⁸ Gixolune getanatlu. Pikna. Rumalwutluna Goyakalu, gi rixanu renekyana yine wane rixa gitakletikolupa.

Matiyo tomgaka

⁹ Wane yiyatka Geso. Retlu satu jeji, girukotlewatachine gjigawenjetikowaka tuplanatachri. Matiyo giwakni. Wane chinru, “Pomkagittanno.” Palnamtatka. Romkagittatku.

Geso ginnikna gjigawenutachine

¹⁰ Wane rixa. Panchi nikjetikowaka tuplanata. Wanena gi gepika gjigawenutachine ga wa kmukochirerune gapokachine. Tuplatna nikjetikowaka Gesoyma ga wa yimaklene. ¹¹ Gwariseyone getinna. Wane chinkanna yimakleni, “¿Klu chinanu gjigawenutachine ga wa kmukochirerune rumnika gyimakjeru?”¹² Yijnakotinitka Geso, wane china, “Wa gichkolune gi ralukluna kpinrewakleru, seyni wa yayixachinen galikaka.¹³ Gajewa. Gimatanutkalu klunerpiranni. Naluklu getwamonrewlu. Gi wa genekashlu giylatkaluru naluka.” Gi rixanu gi nuna ntomgiyapna poyakkakachine seyni kmukochirerune.”

Gepomgalu gogajirewlupiranaya

¹⁴ Giyagni Gwa yimaklene yayegitlu Geso. Wane chinruna, “¿Klu chinanu wixa ga wa Gwariseyone gixo kata gogajirewata; ga wa Pixa yimaklene gi gogajirewata?”

¹⁵ Geso wane chinna, “Gi rumkata wamonuwnaletna wa kashimyolu getachine wannayma rawinikopshini gnunrowatachri, wa xani pixka Gita gimwakopshinna nyimaklene. Seyni runanu pagogne wa gnunrowatachri konkolkunpatka wannayegiya. Waneklu rogañirewatanna wanna.

Yaglu wa gerotu yimaklewlupiranaya

¹⁶ “Gike gamatlu muchirkasamatkatuwa mkachritsole. Gi rixanu waleko ramle sama jiprojiklu mkachri. Pnute rixa giskakletanatka. ¹⁷ Gi koxa wa tsrutsleji nikchimtamapa rutakgatlona winga gerotga. Wane rixkoklunu tsapkaka gipshekgtata. Ga wa wingani tuyokgatana. Salewnanatka tsapni koxa. Seyni gerotmapa rutakgatlona gerotga winga. Gepiko gimretka.”

Gayro wgene ga wa Gesomkalu kamrukamkaptostsitachro

¹⁸ Runkakiniwana tyepirana, runyegitlu satu gitsrukaachi. Yoptsoji-tyegitlu. Wane chinru, “Nshichni gajerya tupnanawa. Seyni punanu. Putakamyogontapanro. Tuwekanu.”¹⁹ Palnamta Geso. Romkagimtu yimakleneyma.

²⁰ Wanero sato suxo pamole gepi walapu gigragalewatachro. Gitjimne tyan-pamtyalu, tkamrukamkaptostsitaplu.²¹ Gi rixanu wane china walananuko, “Nkamrukamkatyapjeplu nutukanu.”

²² Wa Geso giprotaka. Retanatlo. Wane chinro, “Kiglenshinikanupyi, Wiwi. Palixle gitskalakyi.” Wanekluyakawa tutskalga suxo.

²³ Geso gapokatkalu gitsrukaachipji. Retna tumlejitachine ga wa gixolune sejrewnachine.²⁴ Wane china, “Gixrikanu. Wa mturo gi wa tupna, seyni tumkanata.” Ruxpiranatluna.

²⁵ Wa gixolune maleka koshpaaka. Jiglokamtatka. Kamrukamyotlo. Tyotunotatka mturo. ²⁶ Pogitpiranamtatka psolchijneko walechijne.

Gepi maygalene gimrekgakaaka

²⁷ Wane yiyatnaka Geso. Romkagimtluna gepi maygalene. Saplewje-nanumtna. Wane chinna, “¡Petwamonutanunwu, Tawiklopisha!”

²⁸ Panchi rapokinitka, maygalene ginyegitlu. Ga wa Geso wane chinna, “¿Galixe numkata wane gixleta?”

Wane chinruna, “Gigi, Gitsrukaachi.”

²⁹ Giyagni kamrukaygaletatkana. Wane chinna, “Galixyawakpotuko gkamrutikotka.”

³⁰ Rumrekagatatkana. Ga wa Geso rujretpotutna. Wane chinna, “Ggirukot-inwa gike gimatanru.” ³¹ Seyni yatkana. Poshalpiranamtluna psolchijneko walechijne.

Geso getwamonutna yine

³² Yinitkana, satu jeji ranikyegitluna myanumatkatu, kamchichachrina.

³³ Maleka ruknoklu kamchi. Wa myanumanatkatu yanumsatatk. Gixolune giglajita. Wane chinna, “Gi pagogne Gisrayilichijne retika tye pixkalutu.”

³⁴ Seyni wa Gwariseyone wane china, “Kamchi gitsrukate giyakleya maleka ruknokna kamchine.”

³⁵ Papokchimnunanuka yapa Geso, tsru pokchikaka ga wa mtserutu pokchikaka. Runkaklelawaklepjikakna runkaklewananumtya. Runk-akletananumtlu Kiglerupotunaru Tokanchi pogirewatyawakapirana. Ru-tukakananumtlu pejnuruko yayixlukaka, ga wa pejnuruko gagijewakchi yinyegiya.

Gixlu jirgakalurupa

³⁶ Retna gixolune yine. Retwamonutna, gi rixanu kojwakan-shinikanutnawana. Giknookalurune gowegane pixka, girukotapratachri waneyamigene. ³⁷ Giyagni wane chinna yimaklene, “Galikakni gixlu jirgakalurupa. Seyni wa kamrurewaklerune gi gixna. ³⁸ Giyagni gagitanru jirgakalurupa Gitsrukate jirgalyegipa yokanatyapna kamrurewaklerune.”

10

Pamole gepi tsomitikolu

¹ Pamole gepi yimaklene tomga. Rutakna kamchine puchotlewatachine chinanu maleka ruknokyapna, pejnuruko yayixlukaka rutuukakinripna ga wa pejnuruko gagijewakchi

² Pamole gepi yokanatanune giwakna walenwa: muchinanu Simo wa Petro chinkaluru, ga wa repuru, Gantirishi, ga wa Santiyako, Sewereyo wgene ga wa repuru Gwa; ³ Wilipi ga wa Wartolo, Tomasu ga wa Matiyo gjigawenutachri, Santiyako, Galgweyo wgene, ga wa Tateyo. ⁴ Simo Kanani gajeru ga wa Gota Giskaryote samyokjerupa.

Pamole gepine kamrurepa

⁵ Geso yokanatatkana nyi pamole gepi. Wane china yokanretna, “Gi wa payingapoko gyanu. Gi wa Samaritane pokchiko gapokanu. ⁶ Seyni gowegane gamgachine yegi galikaka gyanu, Gisrayiliklopishane yegi. ⁷ Gyinipa ginkaklewananumtanu. Wane nchinanu, ‘Tengogne pogirewatyawaka gi gowukatka.’ ⁸ Gituukakananumtanna yayixachine. Gytunkakananumtanna gipnachine. Mpowratananumtanna gjirgitutachine. Maleka giknokanna kamchine. Genekashatkaluru gyoptota. Genekashlewatatu

koxa gixa. ⁹ Gi wa koriko ntapgatanu, gi wa sroschiko; gi wa sintawoko giskotatanu. ¹⁰ Gi tsapako yagaplu chinanu, gi gepimkaluko, gi yoshmakjixrechishpatako, gi wa kanojerchiko. Gi rixanu wa kamrurewakleru rumkata yoptoletlu nikanru.

¹¹ “Girukokta pokchi gapokanu tsru pokchi ga wa mturu pokchi, gepomlewatantu ginaklu kiglepiranyegirupji. Wane gwanu gyinpotunanuko. ¹² Wa panchi gapokinipa galukanna wane gajene. ¹³ Wa panchi gajene rumukane rixinrina, waneyapna gixa giglenunshinikanu. Seyni ma mumuklunu rixinrina giglenunshinikanu satokyegitangi. ¹⁴ Katukokta gi yoptotangi, gi yijnaktokanutangi, walepji gyinpatka ga wa wale pokchiya, giplokjiximtanu gistapjixipagi, rumatikolupna. ¹⁵ Galikakni wane nchingi wa gakotkalurupa Sotomachijne, Komorachijne gajenniya wale pokchi gajenni pnu te wa glikukanuwnalgognepatka.

Kojwawakchikaka

¹⁶ “Xawakni Gita yokanatgi gowegane pixkalungi kewetnanetskala. Giyagni galpokonshinikanutanu gimnune pixka, ga wa myokwirenepgi motkokone pixka.

¹⁷ “Ggirutinwa yineya. Gi rixanu samyokangina jemanshinikankakjetikowaka. Runkaklewawaklepjikakyna kochipjetingina.

¹⁸ Girukotlewatachine yegi ga wa pogirchine yegi ganiiko Gita chinanupa, gipgujtalelwu chiñanu wanna yegi ga wa payine yegi.

¹⁹ Wa nsamyookoklunupa gi wa gkojwakanshinkanutinwa gi nchinayanumsaletinripa. Gi rixanu waneklupapko geneeko wane nchinanrupa.

²⁰ Gi rixanu gi wa gixapni yanumsatachineepgi, seyni Giwekkaluru gixa Girunu gixa gitokote yanumsatini.

²¹ “Molchi samyokanru gimoleko rupninripa, ga wa girchi gituru. Ga wa wgenchime kamnixanna rurunna ruylatikolupna. ²² Gayegixkalunepgi pejnuruneyako Gita giwaka chinanu, seyni wa kashnantakanshinkanutachri yoptukyawakpotunanuko wale gognetkaako. ²³ Tye pokchiya kojwakingina gasukanu. Papokchi gyanu. Gi rixanu galikakni wane nchingi, gi gnikawna wane yaletanu papokchimnunanuka Gisrayilichijne nma munkanupachi Gita Yineru Wgenno.

²⁴ “Yimaklechi gi wa tsrunwa yimaklewatachri pnu te. Gi wa wayegrechriko, rutsrukate pnu te. ²⁵ Poyagotyalu yimaklechi wa yimakjeru pixka rixinripa, ga wa wayegrechri wa rutsrukate pixka rixinripa. Welsewo chinmakluna kapjiru pnutenapna gipji gajenepni.

Pikalurupa

²⁶ “Giyagni gi mpikanna. Gi rixanu maleshlu giyogimatkaluru gi wa mupgujetkotpakni. Maleshlu pocheruko mumatkotupa. ²⁷ Wane nchinayagi Gita mapshagawakaya, pokamlawakaya wane nchininri gixa. Gijnakpotuko gyijnakotinri, panchi gayiji ginkakletinri. ²⁸ Gi mpikanna manchi giylatachine seyni giweklu gi rumkata giylaletna. Seyni Wale galikaka mpikanu giweklu gimkata gamgakakletachri ga wa manchi Gigena xirnachriya. ²⁹ ¿Gi ge wa ganikajiproji chinanu rushankaka gepi koshichine? Ga wa gi satuna wanna chiji gjiruka gixa Giru mwaknu. ³⁰ Gijiwtsako pejnuruko yantatkurni. ³¹ Giyagni gi mpikanu. Kiglepotgi gixa gixo koshichine pnu te.

³² “Giyagni girukokta gipgujtatanno yineyegiya, Gita koxa gipgujtatantu Nuru tengogne Gajeru yegi. ³³ Girukokta ginutatanno yinyegiya, Gita koxa ginutatanru Nuru tengogne Gajeru yegi.

Gi wa gglewanshinikanrewlu, seyni yoglolewapi

³⁴ “Gi gkagwakanru nuninri wa tyechijne nutakyaplu kiglegwashle. Gi wa nuna kiglewashle nutakinripa seyni yoglolewapi. ³⁵ Gi rixanu nuna nkotspalatyapna:

Jeji wa ruru kamnixinripa,

Ga wa tshicho tunro tkamnixinripa,

Ga wa tomekanunro tgimajiro tkamnixinripa.

³⁶ Wa jeji kamnixjene, walepjji gajeneko kamnixanru.

³⁷ “Girukta gi wa galukpotutno ruru, runro pixka pnuute, gi wa rumukluno Gita. Girukta gi wa galukpotutno gituru, rushicho pixka pnuute, gi wa rumukluno Gita. ³⁸ Girukta gi gwanro koroshiteshkita, gi rawgajxigitanno, gi rumukluno Gita. ³⁹ Girukta gikshika giwekleta, ruwekinri ramginina. Girukta gamtakanru ruwekinri Gita chinanu, rukshika giwekletanu.

Gapnutikolkakapa

⁴⁰ “Gixa yoptotachri, Gita yoptota. Wa Gita yoptotachri nyokanatjeru yoptota. ⁴¹ Tokanchi geneklewatachri giwakaya tokanchi geneklewatachri yoptotachri, wale yoptotanru tokanchi geneklewatachri gapnutikolu. Poy-agkakachri giwakaya poyagkakachri yoptotachri, wale yoptotanru poy-agkakachri gapnutikolu. ⁴² Girukokta genekanru girapistonopje kachikle-galuu satu mturu wanna nyi mturune nyimakleru giwakaya, galikakni wane nchingi, gi wa ramga gapnutkotanu.”

11

Gwa Katlewakleruyokanatanune

¹ Wane rixa. Geso rali towutletatkana pamole gepi yimaklene, wane yi-yatka, papokchikaka wannanu yimaklewatinripa ga wa runkaklewatinripa.

² Yoshmakikowaka Gwa yijnakpiranyegityalu Kristo kamrure. Giyagni yokanatna yimaklene Gesyegi. ³ Wane chinruna, “¿Pixaklege ginachripi, waka wkagwakerge satu?”

⁴ Rugita Geso. Wane chinna, “Gajewa. Ginkakapanru Gwa gyijnakotan-rukakaya ga wa getanrukakaya. ⁵ Maygalenenanu getatka. Ga wa myanka-nenanu yanatka. Ga wa gjirgitunatachine powratkatka. Ga wa majnakone-nanu jemashatatka. Ga wa gipnachine yotunkaaka. Ga wa kwamonurune yegi runkakletika Kiglerpotunanu Tokanchi. ⁶ Giglenshinikanyegitkaluru mutspetkatu Gitaya.”

Geso gipgjutatanru Gwa Katlewaklerupirana

⁷ Yanananumtinna, Geso yinuwaka ginkakletna gixolune yine Gwapiroana, “¿Kluneru getapa yineru mwiyawakanuya? ¿Satu kapanrege kannipgyalyu kowshikanrurge? ⁸ Seyni ¿kluneru getapa? ¿Satu jeji popchimkalurege gitakachri? Gike. Pogirchinepji rawna popchimkalu gitakachine. ⁹ Seyni ¿klu chinanu wane gyapa? ¿Satu tokanchi geneklewatachirige getapinripa? Gigi, wane nchingi. Tokanchi geneklewatchri pnuute. ¹⁰ Gi rixanu walenwa yonpiranyegitkaluru:

Petanu. Gita yokanatlu notowreru pixa penute.

Wale galpokotanru patnugapote pixa penute.

¹¹ “Galikakni wane nchingi, gi wa rupgugewna satu suxo gishpakyachri, Gwa Katlewakleru pnuute tsru. Seyni wa mtserutu potu tengogne pogire-watyawakaya tsruni Gwa pnuute. ¹² Gwa Katlewaklerukluyakawa ga wa

xanigognenanu tengogne pogirewatyawaka muchkowyegitka. Muchkowatchine kashichlu. ¹³ Gi rixanu pejnuruneko tokanchi geneklewatachine ga wa tokanchi yokanatkaluru Gwaklupotunanuko runkakletpiranaluna. ¹⁴ Galuka yoptoletiniplu walenna Giliya wa ginachripa. ¹⁵ Girukokta kajnakopnapa wa yijnakotinripa, yijnakotanu.”

Mturune giputu tuplanatachine

¹⁶ Geso gomkagi wane chinretna, “Giru pixka nutakanna nyi gimuweekakgognenatachine? Mturune pixka, giputu tuplanatachine, rupxalunna tomsanatachine. ¹⁷ Wane chinna: Wtumlejyegitgi. Gi wa gansata gixa.

Wamonuwata gixa yegi. Gi wa nchiyagjeta gixa.

¹⁸ Gi rixanu runa Gwa. Gi wa nika. Gi wa rura. Wane chinna, ‘Kamchi waneylu.’ ¹⁹ Nuna Gita Yineru Wgenno, nikachrino ga wa girachrino. Wane chinna, ‘Getanru. Satu jeji tsru nikalu. Winga kgirakleru. Gijgawenutachine ga wa kmukochirerune gipxaalu.’

“Wa gimatkalelwu potukalu gekakgitka kamrureyea.”

Geso ginkakna pokchikaka gajene salewnalepapirana

²⁰ Giyagni Geso yinuwaka chigetjeretna pokchikaka gajene. Wale chinanu chigetjetna gi rixanu wanna getanmaklu gixo potu ruyaklewle kamruejyawaka. Ga wa retmakluna, gi waleko renshinikanutyana. Wane china chigetjeretyana, ²¹ “Gi waneni pixa Korasi pokchi! [Gi waneni pixa Wetsayta!] Gi rixanu Tiro pokchiniya ga wa Sito pokchiniya wanepmaklu guyaklewlukaka nkamrueyegityagi gixa, wannanimka muchikawako renshinikanutannimkana. Kawhistugalu mkachrimka rutakmanetinnimkawanna ga wa chichipagimka rutakmanetinnimkawana. ²² Ga wa wane nchingi, Tiro ga wa Sito pnu te salewnalenapgi gixapni giklukanuwnalugognepa. ²³ Ga wa pixa Kapernawo, tengognepotunanuko pixka putaaka. Ga wa gipnachine gwiyawakapotunanuko pixka putaaka. Gi rixanu wa Sotoma gajene yegi kamrutikomka guyaklewlux pixa yegi kamrueikaluru, xanigognenanumka rutukna. ²⁴ Ga wa wane nchingi wa gakotkaluru Sotomachijne gajenniya gixa pnu te wa giklukanuwnalugognepatka.”

Ginanu Gita yegi. Gita gapnankakanutkagi

²⁵ Walegogne Geso wane china, “Numalwutyi, Nuru, tengogne Gitsrukate ga wa chiji, tyepirankaka Pixa yogimatyana kgimatkalerune ga wa kanshinikanurune, ga wa mturune pekakgita. ²⁶ Gigi, Nuru, gi rixanu wane Pixa gitlerete getletlu.

²⁷ “Ptowruko samyokno Nuru. Gikena gimatlu Gituru, seyni Girchipje gimatlu. Gikena gimatkoxlux Girchi, seyni Giturupje ga wa girukokta raluka gekakgireta Gituru.

²⁸ “Ginanu Gita yegi, pejnurunekgi gama kamrurewletachingi, gitjatachingi. Gita gapnankakanutkagi. ²⁹ Gikamrurewatinno. Gimatinno. Gi rixanu mayogotno Gita. Mturu gixnachriwano najiya. Ga wa gikshikanru gapnanunshinikanutinripa. ³⁰ Gi rixanu myapretni gikamrurewatinipno. Ga wa nutjianru munotni.”

12

Gapnanutikalurugogne

¹ Walegognekaka sana yapanata Geso gapnanutikalurugogne. Yimaklene nachi. Yinuwaka sustakagwuremtluna gitaklugwu. Nikluna. ² Gwariseyone

getanata. Wane chinruna, “Petanna. Gapnanutikalurugogneko ginanshichkalurni kamrutna pyimaklene.”

³ Wale wane chinna, “*¿Gi ge getyongapiranyegitlu Tawi kamrutanru?* Wa nachichini wale ga wa waleymalune koxa. ⁴ Gi rixpoko jiglokletlu Goyakalupji. Niklu jimaprokaka gekakgitkaluru. Walenwa ginanshichkaluru wale nikyaplu, ga wa waleymalune koxa. Sasertotenepejepi nikanruni. ⁵ *¿Gi ge getyongatkoxlu Tokanchi Yukanatkaluruya wa gapnanutikalurugognekaka kpashiwakapji, sasertotene gimuteru pixka gixkaklu gapnanutikalurugogne?* Gi wale chinanu ruklukanuwnnanna. ⁶ Gita wane china, gewlu kpashiwakapji pnute tsru. ⁷ Gimka giklukanuwnnayegiixanna muklukanuwnakane, gimatinkama klunerni tyepirana: *Naluklu getwamonrewlu. Gi wa genekashlu giylatkaluru naluka.* ⁸ Gi rixanu gapnanutikalurugogne Gitsrukatzno Gita wa Yineru Wgenno.”

Giprigamyotachri

⁹ Wane yiyatka. Wanna ginkaklewawaklepji yatka. ¹⁰ Waneru satu jeji giprigamyotachri. Repomgaluna. Wane chinruna, “*¿Munanshichkotlege wa gapnanutikalurugogne pinitikolu?*” Wane chinna gepomgaletluna jigyegitapluna.

¹¹ Geso wane chinna, “*¿Giru jeji wane gixa yegi, sato gowega waneyalutu?* Walamka gjirukanu kapna gapnanutikalurugogneko. *¿Gi ge kashichanro ga wa koschekanro?* ¹² *¿Gi ge kiglepotlu yineru gowega pnute?* Giyagni munanshichkotni gapnanutikalurugogne kigleru kamruruya.” ¹³ Giyagni wane chinru jeji, “Pomyokanu.” Romyokatka. Ruglewamyotatka. Kigletkalu pasretako pixka.

¹⁴ Yatkana Gwariseyone. Jemanshinikankakyegitluna ruylatyapluna.

Gipxaklewatachri tsomitkaluru

¹⁵ Rumatinikta Geso, wane yiyatka. Gixolune yine gomkagimtlu. Pejnuruneko rutuukaka. ¹⁶ Rujretna ma pogijetyapluna, ¹⁷ poyagkakikolupa tokanchi geneklewatachri chinyawaka Gisaiya. Wane china:

¹⁸ Getanru nupxakjeru Gita tsomitanru.

Nushinikanru potu.

Wale gigletanshikanutno.

Giwekikaluru Gitanu nutakanru payineyegi runkakletinri gitakyagoklewlupiranra.

¹⁹ Gi wa yangalewatanu.

Gi wa saplewjetanu.

Gike yijnaktokutanru gatnugapoya.

²⁰ Wa katsluksu gischokachri gi wa sustonganu.

Wa yochpiikalurchopa gimoliinatachri

gi wa ruwakanu,

koshpakinpotuklu giklukanuwnnayegiixlu raalirewatinripa,

²¹ payine kagwaklewatinripa Wale giwakaya.

Geso yapkaklu panchi gajene kotspalanshinikankakachinepirana

²² Giyagni Wale yegi raniika satu kamchichachri. Walenwa maygaletu, myanumatkatu. Rutuukaklu. Giyagni wa maygaletu myanumatkatu yanumsatatka, retatka. ²³ Pejnuruneko gixolune giglajita. Wane chinna, “*¿Gi ge Tawiklopishakni wa Tye?*”

²⁴ Wa Gwariseyone yijnakotinri, wane chinna, “Wa Tye gi wa maleka giknokna kamchine, seyni Welsewoyapje chinanu, wa kamchine gitsrukate.”

²⁵ Geso gimatanshinikanutanna wanna. Wane chinna, “Pejnuruko pogirewatikowaka wa wane gajene kotspalanshinikankakmaka wannakakluko, giknookalurupni pogirewatikowaka. Pejnuruko pokchikaka ga wa panchikaka wa wane gajene kotspalanshinikankakmaka wannakakluko, gi rumkata gwagognereta. ²⁶ Satanasyokaklukmaka maleka giknoklu Satanasyo, walenanuko kotspalkakanshinikanutinmakwa. Giyagni Ɂgi rixpoko gwagogneretanu wale pogirewatyawaka? ²⁷ Ga wa Gita Welsewo chinanumka maleka nuknokanna kamchine, gwugenene Ɂkatu chinanu maleka ruknokna? Giyagni gwugenepni gixa gitakyagokachinepni. ²⁸ Wa Giweikaluru Goyakalunu chinanu Gita maleka giknokinna kamchine, galikakni gixyegitkalu Goyakalu pogirewatyawaka.

²⁹ “ɁGi rixpoko satu gimkata jiglokapijiretlu gichkolu, chowgutyaplu rej-nunkate, ma mostutkanuwalu wa gichkolu? Waneklu chowgutyalu gipji gajeru.

³⁰ “Gitasreta mwakatu, walenna nkamnixjeru. Gitayma mapatjetkatu, kotspalewata. ³¹ Giyagni wane nchingi, pejnuruko mukochri ga wa mupashiregnuchi kaspukalurupni yinyegiya. Seyni ginnakokta yine Giweikaluru mupashichkane, gi wa kaspukikna. ³² Girukokta gapatno Gita Yineru Wgenno kaspukikalurupni. Seyni girukokta gapatlu Giweikaluru Kpashiri gi wa kaspukiko, gi wa tyegogneyako, gi wa ginachripognekko.

Yineru gaji tsepowniyachri

³³ “Waka gagmuna kigleru rixa ga wa giji koxa kiglejiru, waka mugletu rixa gagmuna, ga wa giji koxa muglejitu. Gi rixanu gijiya rumatika gagmuna. ³⁴ Gimnu pixkalungi. ɁGi gixpoko gimkata yanumsaletlu kigleru, muglenekgi gixin? Gi rixanu klunerutka yineru gaji tsepowniyachri, wale yanumatya ginamaya. ³⁵ Kigleru yineru, raji ponikowle kigleru, kiglekakalu koshpakya. Mugletu yineru raji gixolewniyachri mugletu, mugletkaka koshpakya. ³⁶ Ga wa wane nchingi, pejnuruko tokanchi yanumsashatinrina yine, rugyegitanruna giklukanuwnalgognepa. ³⁷ Gi rixanu ptokanu chinanu muklukanuwnnakaotupyi, ga wa ptokanu chinanu koxa giklukanuwnnayegjixkalurupyi.”

Gimuweekakgognenatachine muglene gagjitu getkaluru

³⁸ Giyagni pimrine yonchikgapine ga wa Gwariseyone gigita. Wane chinna, “Yimaklewatachri, waluka getletlu pixa kamrutanru getkaluru.”

³⁹ Rugita Geso. Wane chinna, “Gimuweekakgognenatachine muglene, kgimopataklerunni ragjiltuna getkaluru, seyni getkaluru gi wa reneekona, seyni Gonasu tokanchi geneklewatachri getkalurutepje. ⁴⁰ Gi rixanu *tsro potu tsru wenu gajeronanwaka rawanata Gonasu mapgogne, mapyecho*, waneko pixka nixanu Gita Yineru Wgenno. Mapgogne, mapyecho chiji gitokote nwanatanu. ⁴¹ Giklukanuwnalgognepa jejinni, Niniwe gajenni, yotunotanu nyi gimuweekakgognenatachineyma. Wannani giklukanuwnnakanna nyi gimuweekakgognenatachine. Gi rixanu wannani genshinikanuta Gonasu ginkaklewle chinanu. Ga wa xani gewru Gonasu pnuterutu. ⁴² Giklukanuwnalgognepa tyotunotanu tkachi kegnetes-reta gajerni pogirewatachroni nyi gimuweekakgognenatachineyma. Tuklukanuwnnakanna, gi rixanu yoptukyawakchijiko tunya tyijnakotyaplu Salomo gimatkalewle. Ga wa getanru. Gewru Salomo pnuterutu.

Kamchi puchotlewatachri satoka

⁴³ “Kamchi puchotlewatachri yineru rushpakamtinika, pnumnu yanpanatatk, popriwaakaka. Rujgalu rapnanutyawakapa. Gi wa rukshiklu. ⁴⁴ Giyagni wane china, ‘Nsatokanutka nopji tuyakatyawaka.’ Wane rapokinikta rukshiklu malepjiru, saxritkaluru ga wa galpokotkaluru. ⁴⁵ Giyagni wane ya. Waleyma ranikna pimrine payokgipre kamchine wale pnuterune muglene. Jiglokna. Wane rawna. Ralipretka gektutu giknogatkalu tye jeji muchinanu pnu. Waneko pixka rixanna nyi gimuweekak-gognenatachne muglene.”

Geso ginro ga wa repurune

⁴⁶ Gixolune yine runkaklewyeginatiniwa, runro ga wa repurune maleka tunwatachne, raluka giynumsaletluna. ⁴⁷ Satu wane chinru, “Gewna punro ga wa pepurune, maleka tunwatachne. Raluka giynumsaletyina.”

⁴⁸ Rigitlu wane chinjeru. Wane chinru, “¿Katni wa nunro? ¿Katni wa nepurune?” ⁴⁹ Romyokyegitna yimaklene. Wane china, “Ga ga nyinwa nunro, ga wa nepurune. ⁵⁰ Gi rixanu girukokta kamrutlu tengogne Gajeru Nuru gishinikanru, walenna nepuru, ga wa nepuro, ga wa nunro.”

13

Yapkaklu kgitaklewaklerupirana

¹ Walegogne panchi rushpakamtya Geso. Tsru wenuspawnaga tuplata. ² Rapatyegitluna gixolune yine. Kanawa ruptekatka. Wane tuplata. Ga wa pejnuruneko gixolune yine wanga gwa. ³ Gi gepikapirana runkakna yapkakluya. Wane china, “Wane rixa. Wa kgitaklewakleru gitaklewatanu. ⁴ Kopalajitini pimriji gatnugapostsi gapokajita. Runna koshichine. Niklokajitluna. ⁵ Pimriji sotlu gwiyawaka gapokajita mwiyawakanu potu kajpa. Waneklumka rupchekni. Mpixnuwakapotni chiji. ⁶ Ga wa rushpakini tkachi jimanatkalu. Ma matskinu chinanu rupriganatka. ⁷ Pimriji kona yegi gapokajita. Tseruwna konkaka. Kapotanatkalu. ⁸ Pimriji kiglewaka chiji gapokajita. Wane jiwayta. Rawa satu satpachaji, satu patsrujirmoleji, satu mapmoleji. ⁹ Kajnakopnalu wa yijnakotinripa, yijnakotanu.”

Kluneru chinanni yapkaklukaka

¹⁰ Runyegitluna yimaklene. Wane chinruna, “¿Klu chinanu yapkaklu punkaklewyegityana?”

¹¹ Rugita Geso. Wane chinna, “Gi rixanu wa gixa geneeka gimatyapl giyogimanatkaluru tokanchi tengogne pogirewatyawakapirana, seyni wanna gi wa geneeka. ¹² Wa waneyalutu wanepnute reneecka. Waneyamigetu wane rixle konikona. ¹³ Giyagni yapkaklu nunkaklewyegityana, retinmakna ma metinitipna, yijnakotinmakna ma yijnakotinitipna, ma mumata jeminitipna. ¹⁴ Wane rixa poyagkakikolupa wannaya Gisayiya tokanchi geneklewatchri ginkakle. Wane china:

Gijnakopna gyijnakotini, gi gimata jemanru.

Getini getinmaka, gi gimatanru.

¹⁵ Gi rixanu shikowgajkaakana nyi yine.

Ga wa gijnakopnayna kyapreru yijnakotyana.

Ga wa rushyaygaletna ma giygalna metinitipna;

gi wa gijnakopnayna yijnakotinripna;

gi rajiyakna rumata jemyana; ma kashrijetikotupna,

nma mutuukakyunupna.

16 “Seyni giglenshinikanyegitkalurni giygale gi rixanu geta, ga wa gjinakopna gi rixanu gyijnakota. **17** Gi rixanu galikaka wane nchingi, wa tsru galuklu rixmakluna gixo tokanchi geneklewatachene ga wa poyakkachine. Raluka getletmalkluna wa gixa getanru. Gi retluna. Raluka yijnaklet-makluna wa gixa yijnakotanru. Gi wa yijnakotluna.

Kgitaklewakerupirana ginkakpokowakatka

18 “Giyagni gjemantu gixa kgitaklewakeru yapkaklepirana. **19** Girukokta yijnakotlu tokanchi pogirewatyawakapirana, ga wa gi rumata jemlu, runa mugletu. Kashichlu raji gitaakaluru. Walenwa gatnugapostis gitaaikaluru. **20** Ga wa sotlu gwiywakawa gitaakaluru, walenwa yijnakotlu tokanchi. Waneklu rumuwlepotuko yoptotlu. **21** Seyni gi katskiri. Pshintsonu gwachripa. Wa runini salewakchi ga wa kojyawakchi tokanchi chinanu, waneklu rutspekaaka. **22** Ga wa kona gwiyawaka gitaakaluru wale yijnakotlu tokanchi. Wa kojwakanshinikanrukaka tyegogneya, ga wa ponikowlu yokwire kapotlu tokanchi. Gi wa jiwanatanatka. **23** Wa kiglewaka chiji gitaakaluru walenwa yijnakotlu. Rumatjemlu tokanchi. Jiwata: satu, satupachaji; satu, patsrujiremoleji; satu, mapmoleji.”

Geso yapkakle triko ga wa triko pixkalutu kshanapirana

24 Satu yapkaklu runkakyana. Wane chinna, “Tengogne pogirewatyawaka satu jeji pixka rixa, kiglejiru gitakachri rusanate. **25** Seyni rumkakopshinna yine runa kamnixjeru. Rutkaplu triko pixkalutu kshana, triko ganikajite. Yatka. **26** Giyagni wa gitaakaluru gipchekinitka, kaji rixinitka, waneklu koxa rupgujewna triko pixkalutu kshana.

27 “Wayegrechne gapyegitlu kwangixleru. Wane chinruna, ‘Gitsrukaachi, ḡgi ge kiglejiru putaklu wa pusanate? Giyagni ḡginaka ruyakaty triko pixkalutu kshana?’

28 “Wale wane chinna, ‘Satu jeji nkamnixjeru wane gixlu.’

“Ga wa wayegrechne wane chinruna, ‘Giyagni ḡgi ge paluklu wa woplipchetapyaplu?’

29 “Wale wane china, ‘Gike. Wa goplipchetinri gma moplityakoxaplu triko. **30** Getasha tseruwnaletanru gepiko, jirgakoklunpotunanuko. Jirgakoklunpatka, wane nchinanna wa jirgachinepa, “Muchinangapka goplitanru triko pixkalutu kshana. Gostuptajetanru yoxikikolpatka. Ga wa triko gapatjetanu. Rumretikowakapji gitakanru.””

Yapkaklu mostasajipirana

31 Satu yapkaklu runkakatnakna. Wane chinna, “Tengogne pogirewatyawaka mostasaji pixka rixa. Satu jeji ganiklo. Rusanate rutaklo. **32** Walenwa galikaka ptowruko kajiruji mtserujitu potu. Seyni wa tseruwninitka walenwa tsru potu kshana gitaakaluru pnute. Gagmuna pixka rixa. Giyagni teno yapachine koshichine gina. Waleplu shalewatna.”

Geso yapkakle gisekachripirana

33 Satu yapkaklu runkakatnakna:
“Tengogne pogirewatyawaka gisekachri pixka rixa. Sato suxo gwalu. Gepmole masu yaglu trikopagi tyapjetlu, psoluko rusekinpotunanuko.”

Yapkaklukakaya runkakletinri Geso

34 Pejnuruko tyekaka yapkakluya Geso ginkakna yine. Wa yapkaklu migje gike runkakna, **35** wa poyakkakikolupa tokanchi geneklewatachri chinyawaka. Walenwa china:
Nyanumatanu yapkakluya.

*Rekamrutkoklunuyakawa tye psolchijneko
yogimanatkalurkaka nunkakletanu.*

Geso ginkakpokowakatu triko pixkalutu kshana yapkaku

³⁶ Giyagni rungatkana gixolune. Panchi yatka Geso. Yimaklene ginyegitlu. Wane chinruna, “Punkakpokowakatanwu wa sana gajeru triko pixkalutu kshana yapkaklupirana.”

³⁷ Rugita Geso. Wane china, “Wa kiglejiru gitakachri walekno Gita Yineru Wgenno. ³⁸ Sanni wa tye psolu chijiko. Ga wa kiglejirni wa pogirewatyawaka gajenni. Ga wa triko pixkalutu kshana walenwa muglene. ³⁹ Ga wa kamnixjeru walenwa tsru kamchi, triko pixkalutu kshana gitakachri. Wa jirgalni walenwa ralipregognepa. Ga wa jirgachinepa wannanwa Goyakalutowrerune.

⁴⁰ “Giyagni wa kshana triko pixkalutu wane rixa goplitkotanu. Yochipioktanu. Wane rixanu ralipregognepatka: ⁴¹ Gita wa Yineru Wgenno nyokanatanna notowrene, pogirewatyawaka rapatinrina pejnuruko gitspetkalurkaka. Ginanshichkaluru kamrutachine koxa rapatanna. ⁴² Wanna xirnachri giknooko. Waneplu chiyaglu ga wa gashkaygitlu. ⁴³ Giyagni moyagkakachine gatajiwnanu, tkachi pixka, Rurna pogirewatyawakaya. Kajnakopnalu wa yijnakotinripa yijnakotanu.

Geso ginkakna ponikowlu yogimatkalurupirana

⁴⁴ “Tengogne pogirewatyawaka ponikowlu pixka rixa sana yogimatkaluru. Satu jeji rukshikinitkalu, yogimatatnaklu. Rumuwle chinanu rushankaplu pejnuruko wane rixle. Ragjitanru wale sana.

Kwenuro potu perlaji

⁴⁵ “Wanepnutetnaka tengogne pogirewatyawaka kmarnewakleru pixka rixa, kigle katajiroji perlaji gjggachri. ⁴⁶ Rukshiklo sato kwenuro potu perlaji. Rushankaplu pejnuruko wane rixle. Ragjitatkalo.

Geso yapkakle chalupirana

⁴⁷ “Wanepnutetnaka tengogne pogirewatyawaka tsru chalu pixka rixa. Tsru wenu ruknokgatka. Rawlo pnumnu gixachro shima. ⁴⁸ Wa katsepo rixinitka chalu, wanga koshpatyatkalona. Tuplatna. Tsomitatakona kiglero. Kojita rutakna. Ga wa gektuto shima maleka ruknokanatkalona. ⁴⁹ Wane rixanu ralipregognepa. Rushpakkamtanna Goyakalutowrerune. Konanna muglene moyagkakachinetskalaya. ⁵⁰ Towrechime xirnachri giknokanunna. Waneplu chiyaglu ga wa gashkaygitlu.”

Geso yapkakle ponikolewlu gerotkaka ga wa kapokotkakapirana

⁵¹ Wane chinna Geso, “¿Gi ge gimata jemu wa tye pejnurukakakopirana?” Rugitluna, “Gigi.”

⁵² Wale wane chinna, “Giyagni pejnuruko yonchikagapri ginkaakaluru tengogne pogirewatyawakaya, satu jeji pixka rixa kapjiru. Ponikolewle koshpakyalu gerotkaka ga wa kapokotkaka.”

Nasare myoptotikotu Geso

⁵³ Wane rixa. Rali ginkakletinitkalu tyekaka yapkaku, wane yiyatka. ⁵⁴ Gichijne yatka. Wanna ginkaklewawaklepji runkakjetyana. Wane rixa. Wanna giglajita. Wane chinna, “¿Ginaka rawyalu tye gimatkalewlu ga wa tye giyaklukaka? ⁵⁵ ¿Gi ge kyosokolero wgenekni wa Tye? ¿Gi ge Mariya chinkaluroknai wa runro? ¿Ga wa repurune Santiyako ga wa Gosi, ga wa Simo, ga wa Gota chinkalune? ⁵⁶ ¿Gi ge pejnuroneko repurone wixa yegi?

¿Giyagni ginaka pguta rukshikyalu pejnuruko tyekaka gimatkalelwlu ga wa ruyaklelewle?"⁵⁷ Wale pupjetyana.

Seyni Geso wane china, "Maleshlu tokanchi geneklewatachri Goy-akalunni mkagwakpiratkotu ga wa gichijnepjeya, gipjiya."

⁵⁸ Gi wa gixo guyaklu kamruta waneya ma malixlena chinanna.

14

Gwa katlewakleru gipnale

¹ Walegognekaka Girore pasreta girukotlewatyachri yijnakpogiwletlu Geso. ² Wane chinna wayegrene, "Walenwa Gwa Katlewakleru. Gipnachinetksala yotunomtyatka. Giyagni kgiyaklewaklerni."

³⁻⁵ Gi rixanu Gwa giykolu Girore. Wane chinru, "Ginanchichkalurni pepuru gnuuro pwayegitinripa."

Wale chinanu raluka giylaletmaklu. Seyni yine pika wale, gi rixanu tokanchi geneklewatachri kagwakyaluna. Giyagni Girore kashichjixatkalu Gwa. Rostujxlu. Yoshmakjetikowaka rutakjixatkalu Giroryana, Wilipi repuru gnuuro, chinanu.

⁶ Meyiwlü kamrutka Girore poyagkakle walapute chinanu. Wanna ganikajite tansatya Giroryana nshicho. ⁷ Tmeyitlu Girore. Giyagni rupiratyalo Wale kawchinanu renekyaplo klunerukokta tagityaplu. ⁸ Wa wala jidgetkaluro tunroya. Wane china, "Penekanno gewiya satu kota-jipi Gwa Katlewaklerujiwu." ⁹ Giyagni wa pogirchi wamonuwata. Wa Wale kawchinanu chinre ga wa waleyma gwanatachine nikawakakwale renekjixatkalo. ¹⁰ Yukanrewatatkta. Rustaknoojixatkalu Gwa yoshmakjetikowakaya. ¹¹ Kotajipi ranikjiwutikatka. Makloji geneekatka. Tunro yegi taniklu.

¹² Rapokna Gwani yimaklene. Ranikmanetatkaluna. Kapnatatkaluna. Runkakpatkaluna Geso.

Pamyo waragkane geneka nikletka

¹³ Geso yijnakpiranyegitanatkalu, wane kanawa yiyatka. Yineru mwiyawakanu yatkana wanna mkoje. Wa gixolune jeminitka, pokchikaka ruyakatyatkana. Romkagitaluna. Chiji yapamtna. ¹⁴ Ruptekinitka Geso, retna gixolune yine. Retwamonutna. Rutuukakna yayixachine.

¹⁵ Wa kayi rixinitka yimaklene gapyegitlu. Wane chinna, "Gewni yineru mwiyawakanu. Wa kayitkani. Giyagni pyokanatanna gixolune pokchikaka yinripna, ragjityapluna nikanrupna."

¹⁶ Geso wane chinna, "Gi wa magatyana wane yinripna. Genekanna nikanrupna."

¹⁷ Wane chinruna, "Maleshaywu gewi, seyni pamyo jimapropje ga wa gepi shima."

¹⁸ Wale wane china, "Ganikyegitanno gewi."

¹⁹ Peklomta gogo tuplajixatkana gixolune yine. Rawlu pamyo jimapro ga wa gepi shima. Teno yigata. Ruglenshinikanyegitlu. Jiknajrotlu. Renekna yimaklene. Ga wa yimaklene geneksatna gixolune yine. ²⁰ Pejnuruneko nikatka. Jinanutkana. Koschekatkaluna gixetachri psojkaka, pamole gepi kojita katsepo. ²¹ Wa nikachte pamyo waragka jejine. Gi wa kyagna suxone. Gi wa mturuneko.

Tsrù wenumta yapamta Geso

²² Waneklu kanawa ratskojixatkana yimaklene, wakanu kosekinri-patkana, rungakopshinna yine. ²³ Rali gingaletinitkana gixolune yine,

magka kanika Walepjé, ragjigognetinripa. Kayi rixinítka wane rawanatatká Walepjé. ²⁴ Ganikajgatkalo kanawa. Rutwatjekakanro gishpurga, gi rixanu kannipgyalu satkakanro.

²⁵ Rumrereekastsitkani, Geso yayegitatkana. Tsrú wenumta yapananumta. ²⁶ Yimaklene getinri tsru wenumta yapananumtini, kowakanshinikanutna. Wane chinna, “¡Pagixanutkani!” Piklena saplewatna.

²⁷ Waneklu ruynumatatkana Geso. Wane chinna, “Kiglenshinikanupgi. Gitni. Gi wa mpikanu.”

Gonumta yapamta Petro

²⁸ Giyagni Petro gitilu. Wane chinru, “Gitsrukaachi, Pixá pixinipa ptom-ganno Pixá yegi nyinripa. Gonumta nyapamtanu.”

²⁹ Wale wane china, “Punanu.”

Kanawa ruptekamtya Petro. Gonumta yapamta, Geso yegi yinripa. ³⁰ Retinitkalu gichkonnipgyalu, pikana. Yinuwaka gimxiklemtanatka. Saplewatana. Wane china, “Gitsrukaachi, pognetkakanno.”

³¹ Waneklu Geso gomyokyegitlu. Kashichlu. Wane chinru, “Psotsotaji galixachriyi. ¿Klu chinanu maposhinikanukletyi?”

³² Kanawa ruptekinitkana, rutukannipgyamtatka. ³³ Giyagni kanawa gwanatachíne yoptsojityegitluna. Wane chinna, “Galikakpotunanni Pixni wa Goyakalu Wgenyi.”

Genesare gajene yayixachine rutuukaka Geso

³⁴ Koprugatinikana, Genesarechíjne rapokna. ³⁵ Yine gimatatkalu wane gajene. Yukanrewatna psolusretako walesreta. Yayixachíne pejnuruneko ranikyegitluna. ³⁶ Ragjtluna gimkaluptostsipje kamrukkinripna. Pejnuruneko kamrukjene wanna gitskalgalatka.

15

Wa merkamyonkane nikachine

¹ Giyagni Gwariseyone, yonchikgapine Gerosale giyakatyachíne gapyesitu Geso. Wane chinruna, ² “¿Klu chinanu pyimaklene giknoklu gitrukaachinni giykole? Gi rixanu gi rerkamyotna wa jimapro nikinna.”

³ Wale gititna. Wane chinna, “¿Klu chinanu koxa gixa giknoklu Goyakalu yokanatanru giykole chinanu? ⁴ Gi rixanu Goyakalu wane china, ‘Pkagwakpiratanru puru, punro’ ga wa ‘Girukta kamakpirjetlu ruru, runro walepni gipnanuna.’ ⁵ Ga wa gixa wane china, ‘Girukota wane chinru ruru ga wa runro, ‘Nenekashle gixanupmaka Goyakalu nenekekashatanutna, wa nenekekashle gixa gipxakikolupmaka.’ ⁶ Wane gixa giknoklejetlu Goyakalu yokanatanru gixa giykole chinanu. ⁷ Sanowashatachingi. Goyakalu tokanu kigle reneklewata Gisayiya gixapirana. Wane china:

⁸ Nyi yine gispuyna kagwakpiratnona
seyni rajyna wajra yanna Gitaya.

⁹ Magijeru yonogleyegitnona.

Runkakletluna yokenrekakna yine wa Goyakalu tokanu pixkalutu.”

Geso ginkakna wa yineru gaji gajeru puchotlewatachrikaka

¹⁰ Tomgana gixolune yine. Wane chinna, “Gyijnakotanu. Gimata jemanu.

¹¹ Gi wa ginama jiglokyachri puchotlu wa yineru. Seyni wa ginama gish-pakyachri, walenwa puchotlu yineru.”

¹² Giyagni yimaklene yayegitlu. Wane chinruna, “¿Gi ge pumata wa Gwariseyone ijynakotinri wa tye tokanchi jigekanuwatna?”

¹³ Seyni rugitna. Wane chinna, “Pejnuruko gitaakaluru ma mutakanutu Nuru tengogne Gajeru goplitkalurupni. ¹⁴ Getashatanna. Maygalenkakluko koseekakachinni. Wa maygaletu kosekinmaklu maygaletu kapna rumu-ruukkanna.”

¹⁵ Petro gigita. Wane china, “Punkakpokowakatanwu tye yapkaklu.”

¹⁶ Geso wane china, “¿Wane koxa gixge gixa mumatjemkangi? ¹⁷ ¿Gi ge gimata jema wa pejnuruko ginama jiglokyachri, ginanwaka ya? Rush-paka gichkajetyawaka. ¹⁸ Seyni wa ginama gishpakyachri raji ruyakaty. Walenwa puchotlu yineru. ¹⁹ Gi rixanu yineru gaji rushpakyamugletu shinikanchi, giylalewlu, gimopatlewlu, gapoklewlu, chowguchkaka, gixa-sha gipguitalewlu, mupashiregnuchi. ²⁰ Tyekakni wa puchotlu wa yineru. Ga wa meromyogkatu nikini gi wa puchotlu yineru.”

Kanani gajero galixlelewle

²¹ Wane yiayatka Geso. Tirosreta ga wa Sitosreta yatka. ²² Wanero sato suxo Kanani gajero, walesreta giyakatyachro. Tsaplewjeta. Wane china, “¡Gitsrukaachi, Tawiklopisha, petwamonutanunno! Nshichni kamchichachropotuna.”

²³ Seyni gi satu tokanchi rugityalo. Wa yimaklene yayegitlu. Ragjitluna. Wane chinruna, “Pyokanatanro, gi rixanu tsaplewjegajxigiyakatwu.”

²⁴ Wale gigita. Wane china, “Gi wa nyokanatka, seyni wa gowegane chinanupje gamgachine Gisrayiliklopishane.”

²⁵ Giyagni tapoka. Tyoptsojityegitlu. Wane chinru, “Gitsrukaachi, pupx-akanunno.”

²⁶ Rugita Wale. Wane china, “Gi kigleru wa kashichikolupa yine wgenene nikanru, kewe wgenene ruknokyegitkomka.”

²⁷ Wala wane china, “Gigi, Gitsrukaachi. Seyni wa kewene niklu rut-srukatna nikawakakwale gjirukyachripopeji.”

²⁸ Giyagni Geso gigita. Wane chinro, “¡Suxo, tsruni palixle! Wane pixikolupa palukyawaka.”

Wanekluyakawa tutukawgenetatka.

Gixolune gituukaakalune

²⁹ Wane yiayatka Geso. Kalile Wennespuwnaga yapa. Magka kanika. Wane tuplata. ³⁰ Rapyegitluna gixolune yine. Wannayama myankane, maygaleñe, myanumatkane, mast sine, ga wa pimrime gixo. Gesojixistsi rutaakana. Wale gituukakna. ³¹ Wane rixini ruglajitna gixolune yine, reta yanumletkana myanumatkane, ga wa mast sine kigletka, myankane yanatka, ga wa maygalene getatka. Rumalwutluna Gisrayiline Goyakalute.

Gepkoxamkoje waragkane geneka nikletka

³² Geso tomgana yimaklene. Wane chinna, “Netwamonutna gixolune yine, gi rixanu waneyatkana mapgogne Gitayma. Maleshayna nikanruna. Gi naluka yokanretna mniikane ma mujxipakgapotinitipna.”

³³ Yimaklene wane chinru, “¿Ginaka gawinri wixa wane pejnu niikaluru yineru mwiyawakanuya, wunanutyapna wane pejnu gixolune yine?”

³⁴ Geso wene china, “¿Gi pejnu jimapro waneygi?”

Wanna wane china, “Payokgipre ga wa psotsotaji kopaji.”

³⁵ Towutna wa gixolune yine tuplatinripna chiji. ³⁶ Kashichatkalu payokgipre jimapro ga wa shima. Poyagnutlu. Jiknajrotlu. Renekna yimaklene, ga wa yimaklene geneksatna gixolune yine. ³⁷ Pejnuruneko

nikatka. Jinanutkana. Ga wa gixetachripsojkaka koshchekna payokgipre kojita katsepo.³⁸ Wane nikyachine gepkoxamkoje waragka jejine. Gi wa kyagna suxone, gi wa mturuneko.³⁹ Rungatkana gixolune yine. Kanawa ruptekatka. Maktalasreta yatka.

16

Klu chinanu getkalurkaka

¹ Gwariseyone gapyegitlu ga wa Sariseyone rumlukanutyapluna. Ragjiltuna rekakgityapna getkaluru tengogne gajeru chinanu.

² Seyni Wale gigitna. Wane chinna, "Wa kayi rixinikta, wane nchina gixa, 'Kiglegogneru gi rixanu gasergogneru.'³ Ga wa goyechnokawa, 'Xawakni ginapni, nchina, 'gi rixanu gasergogneru ga wa kwamongognetaa rixa.' Sanowashatachingi. Gimata getgogneretlu tengogne ga wa *‘gi ge gimkata* gimata getletlu gipapko gimaxiklechi?⁴ Gimuweekakgognenatachine mugleni, kgimopatakleruneko gagijitu getkaluru, seyni getkaluru gi wa rekakgitkona seyni Gonasu tokanchi geneklewatchri getikalurutepje."⁵

Ruknokamtina. Yatka Geso.

Gisekachri Gwariseyonenu ga wa Sariseyonenu

⁵ Wakanu rapokininitkana yimaklene. Ramtaka ganikletluna jimapro. ⁶ Geso wane chinna, "Xako ggirukotinwa wa gisekachriya Gwariseyonenu ga wa Sariseyonenu."

⁷ Wannananuko gishinikanuwata. Wane chinna, "Gi rixanu gi waniklu jimapro."

⁸ Geso gimata. Wane china, "Klu chinanu gixnanuko gishinikanuwata wa jimapro gma manikiniti chinanu? Psotsotaaji galixachingi.⁹ *‘gi ge gimata* jemawa?¹⁰ *‘gi ge gishiniikoxlu* wa pamyo jimapro wa pamyo waragkane chinanu, ga wa gi pejnu kojita gkoschekyalu?¹¹ *‘gi ge gishiniikoxlu* wa payokgipre jimapro wa gepkoxamkoje waragkane chinanu, ga wa gi pejnu kojita gkoschekyalu?¹² *‘gi gixge gi gimata* jema gi wa jimapropiranni wane nchinyagi? Gimretinwa gisekachriya Gwariseyonenu ga wa Sariseyonenu." ¹² Giyagni rumata jemluna gi wane chinna wa gisekachriya jimapro chinanu rumretinwana, seyni wa Gwariseyone ginkaklewleya ga wa Sariseyonenu.

Petro gigujtale

¹³ Susari Wiliponusreta yinitka, Geso gepomgana yimaklene. Wane chinna, "Wa yine *‘katu* wane chinna wa Gita Yineru Wgenno nixinri?"

¹⁴ Wanna wane china, "Pimrine wane china, 'Gwa Katlewakleru.' Ga wa pimrine, 'Giliya.' Ga wa pimrine, 'Geremiya.' Waka satu tokanchi geneklewatchri kagwakyayina."

¹⁵ Wale wane china, "Ga wa gixa, *‘katu* wane chinno?"

¹⁶ Rugita Simo Petro. Wane china, "Pixni Kristoyi. Goyakalu giwekachri Wgenyi."

¹⁷ Giyagni rugita Geso. Wane chinru, "Giglenshinikanyegitkaluryi Simo, Gonasu wgenyi, gi rixanu gi wa kamaneru, gi wa kagragalu gekakgityi, seyni wa Nuru tengogne Gajeru gekakgityi.¹⁸ Seyni Gita koxa wane nchinyi, pixni Petroyi, ga wa tye tsru sotlu gogotemta nkamrutanru gapatjetikowaka Gitanu. Gi wa gipnachine gishyatikowaakaako gichkolu gapatjetichine pixka.¹⁹ Pixa nenekanru kotpukapi tengogne pogirewatwyawaka chinanu. Klunerukokta pixa gostutanru tyechijneya, tengogne koxa rostutiko. Klunerukokta pkaspuka tyechijneya, tengogne koxa kaspukiko."²⁰ Giyagni rujretna yimaklene gikena ma munkakinitipna wa Kristo rixinri.

Rupnale runkakagnaputa Geso

²¹ Wanekluyakawa Geso Kristo yinuwaka gekakgiretna yimaklene, rumkata Gerosale yaletinripa. Wane gixo salewninripa tsruneya, tsrukakalune sasertoteneya, ga wa yonchikgapineya; ruylatikolupa ga wa mapgogne rixinri yotunkakikolupa.

²² Petro ganiklu. Yinuwaka chigetjeretlu. Wane chinru, “Gitsrukaachi, kigle gwalepyi. Gike pixiniku wane pixanu.”

²³ Giyagni Wale giprotakyegitlu. Wane chinru Petro, “Najxigi pyanutka, Satanasyo. Nutspekapjermakyi. Gi pushiniklu wa Goyakalupirana, seyni wa yinepirana galikaka.”

Geso Gomkagitachri gimkata kamruretanrupa

²⁴ Giyagni Geso wane chinna yimaklene, “Katukokta galuka gwa gajxigletno raalixinwa walenanuko. Rawanro koroshishkitate. Romkagittanno. ²⁵ Gi rixanu girukokta galuka gishatkapletlu ruwekinri, ruwekinri ramginina. Girukokta gamtakanru ruwekinri Gita chinanu, rukshikanru ruwekinri. ²⁶ Gi rixanu Ɂklu gaprini wa yineru psolu chijkmaka wane rixletanu, seyni ruwekinri ramginina? Ga wa Ɂklu rupekotanru yineru ruwekinripa? ²⁷ Gi rixanu nunanu Gita wa Yineru Wgenno Nuru goyaknuyma, notowreruneyma. Waneklu satkaka rixpoko kamruretyawaka napnutinitkalu. ²⁸ Galikaka wane nchingi, pimrine gewi gwachine gi getumgañru gipnalu ma metkanuwalunachi Gita Yineru Wgenno ginachripatkano npogirewatyawakaya.”

17

Geso satuko kogetkogatka

¹ Patsrujirgogne giknoginitka, Geso ganikna Petro ga wa Santiyako, ga wa repuru Gwa. Satu magka tenolu ranikna wannapje. ² Wane wanna getanu satuko kogetkogatka. Yochiigojita tkachi pixka. Ga wa gimkalu klatpotlu pokamlalu pixka. ³ Moysisi ga wa Giliya gipgujewnayegitna ruynumsanatjene.

⁴ Rugita Petro. Wane chinru Geso, “Gitsrukaachi, kigleru gewi gawinri. Palukiniplu, wkamrutanru mapa gimajechri. Pixanupa satu, Moysisinupa satu, ga wa Giliyanupa satu.”

⁵ Wa yanumsanatinawa, satu kyachgapererumko katajiru chikletyegitna. Waneylu satu tokanchi kyachgapererumkoya wane chinachri, “Tyenwa Notur nushinikanru potu. Wale gigletanshinikanutno. Wale gyijnakotanu.”

⁶ Yijnakotinitkaluna yimaklene tye tokanchi, chiji rapokgojiten. Pikputna. ⁷ Geso yayegitna. Kamrukna. Wane chinna, “Gyotunotanutka. Gi wa mpikanu.” ⁸ Tunogitinitkana, gike retatkana. Gesopjetkani.

Giliya gapoklepa

⁹ Wa magka yopikinitkana, rujretna Geso. Wane china, “Gi satuna ginkakanu wa getanruya nma yotunotkanuwa Gita Yineru Wgenno gipnachinetskalaya.”

¹⁰ Yimaklene gepomgalu. Wane chinruna, “¿Gi chinkoxna wa yonchikgapine wa Giliya gingapkatanu?”

¹¹ Rugita Geso. Wane chinna, “Giliya galikakni rungapkatanu rugletyaplu ptowruko. ¹² Seyni wane nchingi, Giliya ginpatka. Gi rumatluna. Seyni wane rixluna klunerukokta ralukyawawka. Waneko pixka rixannona Gita Yineru Wgenno. Wannaya nsalewnanu.”

¹³ Wa yimaklene gimata jematkalu wa Gwa Katlewaklerupirana runkakletinri.

Geso gituuukaklu mturu popukaleru

¹⁴ Wa gixolune yegi rapokinitkana, runa satu jeji. Yoptsojityegitlu. ¹⁵ Wane china, “Gitsrukaachi, petwamonutanru noturni. Gi rixanu popukalerunni. Yayixachrinni. Gixo kata xirnachri yana. Gixo kata gonu yana. ¹⁶ Pyimaklenyegimka nanikniri. Gi rumkata gituukakletanruna.”

¹⁷ Rugita Geso. Wane china, “¡Ya nyi gimuweekakgognenatachne malixkane, mpotukane! ¿Gi pejnugognenanukta numwanutkagi? ¿Gi pejnugognenanukta nakotangi? Ganikyegitanno.” ¹⁸ Geso chigetjetlu kamchi. Rushpakamtatka kamchi waleya. Ga wa mturu gitukatka wanekluyakawa.

¹⁹ Giyagni yimaklene gapyegitlu Geso. Wannapje rixinrina, wane chinruna, “¿Klu chinanu wixa gi ginkakletlu maleka?”

²⁰ Geso wane chinna, “Gi rixanu psotsotaji galixa. Gi rixanu galikaka wane nchingi, waneysi gixkamka galixle mostasajipso pixka, wane nchinanru tye magka, ‘Wane pushpakinitka. Pnu pyanutka.’ Ga wa pnumka yanu. Gikenapmakni gma mumkatanutupmaka. ²¹ Wa tye pixkalutu gi gishpaka seyni gagjigognerupjeya ga wa gogajirewlupjeya.”

Geso ginkakletatnaklu rupnalepapirana

²² Kalile rapatanatinna, Geso wane chinna, “Samyookalurupno Gita wa Yineru Wgenno, yine kashichyapno. ²³ Ruylatannon. Mapgogne rixinri nyotunkaako.” Wanna wamonuwnapotutanna.

Girukotlewatachine gjigawenutikolu geneeka

²⁴ Kapernawo rapokatkana. Girukotlewatachine gjigawenutikolu geneeka ginyegitlu Petro. Wane chinruna, “¿Giyakjeru gi ge wenutanru wa girukotlewatachine gjigawenre?”

²⁵ Petro wane china, “Gigi.” Jiglokajimtini, Geso gapka yanumata. Wane china, “¿Gi pixka getle pixlu Simo? Tyechijne pogirene, ¿katu yoptotyalona sroschi marnewlu girukotikolu chinanu, ga wa satkaka yineru chinanu? ¿Gimolenyegiyna waka pnu gajenyegiya?”

²⁶ Petro wane china, “Pnu gajeneyegiya.” Geso wane chinru, “Giyagni gimatolene gishpaka. ²⁷ Seyni wma jigekeyapna, tsru wenu pyanu. Pkowchontapanu. Wa muchinanu gapka pkosetanropa, wala shima pkoschekanu. Pkochaknamatanro. Pukshikanro sroschiproji. Wala pwanu. Penekanna Gita chinanu ga wa pixa chinanu.”

18

¿Girni wa tsru potu?

¹ Waneklu yimaklene gapyetitlu Geso. Wane chinna, “Giyagni ¿girni wa tsru potu wa tengogne pogirewatyawakaya?”

² Tomgalu satu mturu. Wanna ganikajite rutaklu. ³ Wane china, “Galikaka wane nchingi, gma kashrijetkoklunupa, mturune pixka gma mixkanupa, gi gapokanuna tengogne pogirewatyawaka. ⁴ Giyagni girukokta mturu rixnawa tye mturu pixka, walepni wa tsrupotupa tengogne pogirewatyawakaya. ⁵ Girukta yoptotlu satu tye pixkalutu mturu Gita giwakaya, Gita yoptota.

Geso ginkakna mturune gitspeekakikolupirana

6 “Girukokta gitspekaklu wa satu wa nyi mturune wa nalixjene Gita, kiglemkalu waleya rushriknojitikolupa wa tsru sotlu ginripiya, tsru wenu ruknokikolupa.

Wa pumyo ga wa pujixi gitspekkakinipyi

7 “*Gi* waneni tye psolchijne gajeneko gitspekaklu chinanu! Gi rixanu galikakni waneplu gitspekaklu, seyni *gi* waneni wale jeji wale chinanu runa gitspeeru! **8** Giyagni wa pumyo ga wa pujixi gitspekkakinipyi pustakanru. Puknokanru pixyegiya. Kigleyyi mastsi ga wa yokmatachriyi puwekinri pjiglokinripa wanepnute gepimyo pixini ga wa gepjixi pixini, puknookona xirnachri yegi gike rixinu mnikawnakatu. **9** Wa puygale gitspekkakinipyi pkoshpakanru. Puknokanru pixyegiya. Kigleyyi wa puwekinri pjiglokinripa, paygalepjeya wanepnute gepiygale pixini puknookona Gigena xirnachri.

Geso yapkakle gowega gamganatachropirana

10 “Xako gi geyikanru satu nyi mturune, gi rixanu wane nchingi Goyakalutowerune tengogne gajene wanna chinanu psolgogneko retgojtluna Nuru tengogne Gajeru. **11** Gi rixanu nuna Gita Yineru Wgenno nognetkakapyaplu gamganatachri.

12 “*Gi* pixka getle gixlu gixa? Waneyapmkalu satu yineru satu pacha gowegane ga wa tamganmaka sato gowega, *gi* ge magka ruknokamtna wa mturujmole mturuji gowegane, ga wa rujgaplo wa gamgachro? **13** Wa rukshikinro, galikaka wane nchingi rumuwpotuta wala chinanu, wa mturujmole mturuji mamgakane pnute. **14** Wane rixa. Giru tengogne Gajeru gi raluklu wa satu nyi mturune gamginri.

Molchi mukochirewatachri

15 “Giyagni wa pumole mukochirewyegitinyi, pyayegitanru. Pekakgi giklukanuwnayegletanru gixapje gixiní, pixa ga wa wale. Wa yijnakotinipyi, pukshikmoletatka. **16** Ma yijnakotkamkayi satumka ga wa gepimka panikanu pixayma, wa gepi getachine ga wa mapa pejnuruko tokanchi poyegitko. **17** Wa ma yijnakotkanupna wanna, punkakanna gapatjetachine. Ga wa gapatjetachine gi yijnakotanu waneklu mjemkattu pixka ga wa gjigawenutachri pixka getletanru.

18 “Klunerukokta gixa gostutanru tyechijneya, tengogne koxa rostutiko. Klunerukokta gkaspuka tyechijneya, tengogne koxa kaspukiko.

19 “Galikakni wane nchinatnakgi, wa gepi gixa wanerutu nchinanshinikanutini tyechijneya, klunerukoktapirana gagjitini, Nuru tengogne Gajeru wane gixingi. **20** Gi rixanu ginakaktana gepi, mapa ngiwaka chinanu gapatachine, wanna ganikajitkoxno Gita.”

Gkaspukini payokgipremole kata payokgipre kata

21 Giyagni Petro yayegitlu. Wane chinru, “Gitsrukaachi, *gi* pejnu kata mukochirewyegitanno nomole, ga wa gita kaspukinri? Payokgipre katpotunannege nkaspukinri?”

22 Geso wane chinru, “Gi wane nchinyi wa payokgipre katpotunanuko, seyni payokgipremole payokgipre.

Gepi riwishkatachine

23 “Giyagni tengogne pogirewatayawa satu jeji pixka rixa, pogirchi. Raluka giglepokletlu wayegreneyma riwishkatna. **24** Yinuwaka giglepokletlu riwishkatna. Wale yegi raniika satu riwishkatachri. Gixo potu

waragkaproji riwishkatachri. ²⁵ Maleshaylu wenutyaplu. Giyagni git-srukaachi yokanatlu rushagkikolupa wale, ga wa ganunro, ga wa wugenene, ga wa pejnuruko wane rixle, wenutikolupa.

²⁶ “Giyagni yoptsojityegitlu wayegrechri. Wane chinru, ‘Gitsrukaachi, ma pognanutupyi gitaya. Nwenutanyi pejnuruko.’ ²⁷ Giyagni gitsrukaachi get-wamonutlu wayegrechri. Rushotatkalu. Kaspukyegitatkalu riwishkatyalu.

²⁸ “Yatka wale wayegrechri. Rukshiklu satu waleyma wayegrechri, wale riwishkatjeru, satu pachaproji riwishkatachri. Kashiplajitanru. Kachinekanru. Wane chinru, ‘Pwenutanutkano wa priwishkatyan.’

²⁹ “Giyagni wa rixje wayegrechri gjixistsi yoptsojityegitlu. Ragitlu. Wane chinru, ‘Ma pognanutupyi gitaya. Nwenutanyi pejnuruko.’

³⁰ “Maka wale gi galuklu. Seyni wane ya. Yoshmakikowaka rutaklu wenutinpotunanuklu riwishkatyalu. ³¹ Giyagni retinrina rixje wayegrechire, wamonuwnapoutna. Runkakapluna rutsrukata pejnuruko wane gixkaluruya.

³² “Giyagni repuklu rutsrukate. Wane chinru, ‘Mugletu wayegrechriyi. Pejnuruko wa tye priwishkate nkaspukyegityi gi rixanu pagitno. ³³ ¿Gi ge pumkatkoxlu pixa petwamonutyalu pixje wayegrechri, wa gita pixka wane nixa getwamonretyi pixa?’

³⁴ “Rutsrukate gimgtuwnayegitlu. Saletlewatachaine yegi samyoklu wenutinpotunanuklu pejnuruko riwishkanatanru.

³⁵ “Waneko pixka rixangi gixa Nuru tengogne Gajeru, gma kaspukiniplu satkaka gixa gajiya gimole mukochirewyegitingi.”

19

Gorta wakanute potu romkagtluna Geso wa gixolune

¹ Wane rixa, rali ginkakletinitka Geso tye tokanchikaka, Kalile yiayatka. Gotesreta, Gorta wakanute yatka. ² Romkagtluna gixolune yine. Wane rutuukakyana.

Geso ginkaklewle giknokagnunrowlupiranaya

³ Rapyegitluna Gwariseyone. Rumlukanutanruna. Wane chinruna, “¿Mu-nanshichkotlege wa yineru ruknokagnunrotini kluneru chinanukokta?”

⁴ Wale gigita. Wane china, “¿Gi ge getyongathu wa kgiyaklewakleru, yinuwakyawakpotunanuko jeji, suxo kamrutna? ⁵ Wane china, ‘Giyagni jeji rutspalitinitkana ruru ga wa runro. Rupxaletanrotkani ganunro. Wa gepinanna pamanepje rixanutkana.’ ⁶ Giyagni gi gepitkana, seyni pamanep-jetkana. Giyagni wa Goyakalu gapatanru ma mutspalkakinitipa wa yineru.”

⁷ Wane chinruna, “¿Gi rixkoxge Moysisi yokanrewata kiruka geneekaluropa ma ganunrotyanpatkalo, ruknokyaplo?”

⁸ Wane chinna, “Wa nshiknu gaji chinanu Moysisi gichichgi giknokagnun-rotinripa. Seyni wa yinuwakyawakpotunanuko gi wane rixa. ⁹ Gita wane china, girukokta giknokagnunrota gapoklewlmigjeya, sato ganunrotinit-naka, rumopatlewataatka. Girukokta gnunrotlo giknookaluro rumopatle-wataatka.”

¹⁰ Wane chinruna yimaklene, “Wane rixini jeji ganunro chinanu, gi wa kigleylu ganunrowatinri.”

¹¹ Giyagni Wale wane chinna, “Gi wa pejnuruneko gimkata yoptoletlu tye tokanchi, seyni wannapje wa geneekalunepje. ¹² Gi rixanu wanena mumkata gnunrowletkane runronanwakna rushpakinayakawna. Wanena

mumkata gnumrowletkane wa yine wane gixkakanune. Wanena mganun-rowashatkane tengogne pogirewatyawaka chinanu. Gimkata yoptoletachri yoptotanru.”

Geso giglenshini kanyegitna mturune

¹³ Giyagni Geso yegi raniikana mturune rutakamyogogotyapna, ga wa rajjigognetinripa. Ga wa yimaklene chigetjetna.

¹⁴ Ga wa Geso wane china, “Getashatanna mturune runyegitannonna. Gi gimaletanna. Wa wanna pixkalune wannanni wa Goyakalu pogirewatyawaka.” ¹⁵ Rutakamyogogotna. Wane yiyatka.

Wa makluji ponikolu

¹⁶ Wane rixa. Satu ginyegitu. Wane chinru, “Yimaklewatachri kigleru, ḡklu kigleru nkamrutantu nyoptotyaplu wa nuwekinri gike rixiniko mnikawnakatupa?”

¹⁷ Wane chinru, “Ⴄklu chinanu pepomgano kiglerupirana? Gi satuna waneru kigleru; satupjeru: Goyakalu. Wa paluka jiglokletinri giweklu, pkamrutantu yokenrukaka.”

¹⁸ Wane chinru, “ႤGirni?”

Geso wane chinru, “*Gi puylalewatanu. Gi pumopatlewatanu. Gi pchowguwatanu. Gi maleshawaka pupgutalewashatanu.*”

¹⁹ *Pkagwakpiratanru puru, punro. Pushinikanru pumole pixananuko pixka.*”

²⁰ Wane chinru makluji, “Pejnuruko tyekaka nkamrutatka nnaklutinyakawa. ḡKluneru wanepnute nmagatya?”

²¹ Wane chinru Geso, “Palukiniplu wa mmagatikatu pixinripa, pyanu. Pushankantu ptowruko wane pixle. Penekanna wa kwamonurune. Waneyapyi ponikowle tengogneyapa. Punanu. Pomkagittanno.”

²² Wale tokanchi yijnakotinitka, ralimta wamonuwatachri, wa waneyanru gixo wane rixle.

Kyowiklu ponikolelwu

²³ Giyagni Geso wane chinna yimaklene, “Galikaka wane nchingi, wa ponikolu kyaprepotlu tengogne pogirewatyawaka rapokinripa. ²⁴ Wane nchinatnakgi, myapretmakni kameyo tsapujripna tħiglokinripa, wa ponikolu pnute jiglokyaplu Goyakalu pogirewatyawaka.”

²⁵ Wa yimaklene yijnakotinru, ruglajpotutna. Wane chinruna, “Giyagni ḡkatni gimkata gognetkaakota?”

²⁶ Yopukgatna Geso. Wane chinna, “Wa yineya mumkatkotni wa tye, seyni Goyakalu pejnuruko gimkata.”

²⁷ Giyagni rugita Petro. Wane chinru, “Wixa giknokamtatkalu pejnuruko. Womkagittakayi. Giyagni ḡklu waneyapwu?”

²⁸ Geso wane chinna, “Galikaka wane nchina, wa ptowruko gerotewatinipa, wa noyaknu ntuplapijere ntuplatini Gita Yineru Wgenno, waneklu gixa koxa wa nomkagitengi pamole gepi tuplapije, pguru tuplapijerkaka, ntuplatantu. Pamole gepinerune Gisrayiline gitakyagokanu gixa. ²⁹ Pejnuruneko girukokta giknokamtatkalu panchi, yegwakane ga wa repurune, ga wa ruru, ga wa runro, ga wa ganunro, ga wa wugenene, ga wa gichijne Gita giwaka chinanu, yoptotanru satu pacha kata pnute. Wanepnute yoptotanru ruwekinri gike rixiniko mnikawnakatu. ³⁰ Seyni gixo muchichachine gapkatpotutanu. Gapkatpotutachine wannapni wa muchichachinepa.

20

Sana gowasha kamrurewatyachine

¹ “Gi rixanu wa tengogne pogirewatyawaka satu yineru pixka rixa, kwangixleru. Goyechnokawpotuko yayegitna rusanate rowashate kamrurewatachinepa, kamrurewjixyapna. ² Rupiratyana wale ga wa kamrurewatachinelma pamoleprojipni pagogne. Yukanatatkana rusanate rowashate.

³ “Tenotkalo tkachi yatnaka. Retna pimrine giputu tunwanatachine, wa mkamrurewatkane. ⁴ Wale wane chinna, ‘Gajewa. Gixa koxa nusanate gyanu. Nenekangi moyagotyawaka.’

⁵ “Giyagni wanna wane ya. Tumananu kwanjixleru rumepe yaletatnaka. Ga wa kayinwaka koxa yatnaka. Waneko pixka rixatnaka. ⁶ Rumxiikasti tkachi yatnaka. Rukshikna pimrine tunwanatachine, mkamrurewatkane. Wane chinna, ‘¿Klu chinanu gewi psolgogneko ntunwashgognenata?’

⁷ “Wane chinruna, ‘Gi rixanu gi satuna kamrurewjixwu.’

“Wane chinna, ‘Gajewa gixa koxa. Nusanate gyanu.’

⁸ “Wa kayi rixinitka kgisanateru wane chinru girukotlewjixanru, ‘Ptom-ganna kamrurewatachine. Pwenutanutkana kamrurna wenru. Gapkatatachine pyinuwaka wenutletanu, ga wa muchichachinpotonanuko.’

⁹ “Rapokna wa rumxiikastitka tkachi yinuwaka kamruretachine. Pamoleproj satkaka yoptota. ¹⁰ Rapookoxna muchi kamrurewletACHINE. Kagwya yoptoretluna wanna pnute. Ga wa wanna koxa satkaka pamoleproj yoptota. ¹¹ Rawatkalona. Kegemgayegitluna wa kgisanateru. ¹² Wane chinna, ‘Wa nyi gapkatatachine pshinitsonu kamrurewtapna. Ga wa wixako pixka pixna, wa gakota salewnaloggognenatachinwu ga wa gemeru.’

¹³ “Wa wale gigita. Wane chinru satu wannate, ‘Nomole, gi wa mpoy-agkaakotu nixyl. ¿Gi ge pupiratyano pamoleproj chinanu? ¹⁴ Ga ga pixanu pwanutka. Pyanutka. Naluka genekletkoxlu wa tye gapkatatachri pixako pixka. ¹⁵ ¿Gi ge munanshichkotni wa nkamrutanru wa nalukyawaka gita wa gitanuya? ¿Waka ksofanuygalegolyi gi rixanu kiglerno gita?’

¹⁶ “Wane rixanna muchichachine. Wannapni gapkatatachinpatka. Ga wa gapkatatachine, wannapni wa muchichachinpatka. Gi rixanu gixolunni wa tomgakalune, ga wa gi gixpotna wa tsomitkalune.”

Geso ginkakletlu rupnalepapirana

¹⁷ Gerosale kanikinpatka Geso, pamole gepi yimaklene kegnetetamnu-gapo ranikna. Wane chinna, ¹⁸ “Xani Gerosale wkanikanutka, ga wa Gita Yineru Wgenno samyookalurpatkano tsrukakalune sasertotene yegi, ga wa yonchikgapine yegi. Ruklukanuwnayegjixannona nupnirripa. ¹⁹ Payineko yegi samyokannonna yenetyapnona, kochipjetyapnona, koroshishkita rutakyapnona. Seyni mapgogne chininri nyotunkaako.”

Santiyako ga wa Gwa gagjire

²⁰ Giyagni tyayegitlu Sewereyo wgenene ginro twugeneneyma. Tyoptsoji-tyegitlu. Pagixanu tagitlu.

²¹ Wale wane chinro, “¿Klu paluka?”

Wala wane chinru, “Wane pchinanu tuplatinripna nyi gepi nwugenene satu potuklesretate ga wa satu pkegnetesretate pogirewatyawakaya.”

²² Wane chinna Geso, “Gi gimata wa gixa gagjitanru. ¿Gimkatge giiretyalo wa girapistono wa Gita girinro? ¿Gimkatge gkatletikolu wa katlu wa Gita katikolu?”

Wanna wane chinru, “Wumkatlu.”

²³ Wane chinna, “Wa girapistonu nurapre girini. Wa katlu wa Gita katikolu wale koxa gkatikolupa. Seyni wa tuplalu npotuklesretate, wa nkegnetesrete gi wa Gitanni nenekyaplu, ga wa wannanupni galpokyegitkalunepni Nuru chinanu.”

²⁴ Wa pamole yijnakotinri, rumtuwnana wa gepi moletkakachine chinanu. ²⁵ Geso tomgana. Wane chinna Wale, “Gimata wa tsrukakalune payineko yegi towutlewpotutna. Wanna gitsrukatene tsru gitaaka wanna chinanu. ²⁶ Seyni gi wane gixkakanu, seyni girukokta galuka tsru gixlet-nachriwa gixyegkakluko walepni wa gipxakjerupa. ²⁷ Girukokta gixyegkakluko galuka muchinanu gixletnawa, walepni gwayegrerupa. ²⁸ Gita pixka wa Yineru Wgenno gi nuna nupxakikolupa, seyni nupxaklewatinripa, nenekyaplu nuwekinri nwenutyaplu ruspakinripna gixolune yine.”

Gepi maygalene gimrekgakaakalune

²⁹ Geriko yamtyatkana. Gixolune yine gomkagitalu. ³⁰ Gepi maygalene gatnugapostsi tuplatachne, wa yijnakotinitkana wa Geso giknoginritka, wane china sapletna, “Gitsrukaachi, Tawiklopisha, petwamonutanunwu.”

³¹ Gixolune yine chigetjetna pochke rixinripna, seyni wanepnute sablew-jetna, “Gitsrukaachi Tawiklopisha, petwamonutanunwu.”

³² Wa Geso tunwata. Tomgana maygalene. Wane chinna, “¿Klu galukatka wa nixyapgi?”

³³ Wane chinruna, “Gitsrukaachi, Wumrekagatinripa.”

³⁴ Giyagni Geso getwamonutna. Kamrukaygaletna. Wanekluyakawa retatkana. Romkagitatkaluna.

21

Gerosale rapokinri gakaglokewatachri

¹ Kayegikatkaluna Gerosale. Wetpage yana, Goliwa Magkateya. Giyagni Geso yokanatna gepi yimaklene. ² Wale wane chinna, “Tujra pokchi wunaple gyanu. Wane gikshikinro mporo kwugenero tsatkaluro, twugeneyma. Gkoshipirokanro. Ganikyegitanno. ³ Girukokta wane chininipgi, ‘¿Klu chinanu gkoshipiroklo?’ Wane nchinanu, ‘Gitsrukaachi galukna. Waneklutka satkajixanna mporone.’”

⁴ Ptowruko wa tye wane gixkalurni wa poyagkakikolupa wa tokanchi genklewatachri chinyawaka. Wane china:

⁵ *Wane pchinanro Gerosale, wa Siyo nshicho,*
Petanru Pogire punyegitjeru.

Mayogotu, mporotji tuplatachri,
ga wa mporo wgeneti.

Walenna prachi kgitjiklero wgene.

⁶ Ga wa yimaklene wane ya. Wa Geso china towutyawakpotukna rixna. ⁷ Rawpatkalona wa mporo ga wa twugene. Sapowakatjitatkalona gimkaluyma. Wanna gogo tuplamta. ⁸ Gixolune yine potu gikwekamkata gatnugapoya. Pimrine gistiklu gagmunasurkaka. Rukwekluna gatnugapo ⁹ Gixolune kosekamtachne ga wa kaptomtachne sablewjenanumta. Wane chinananumtna:

“¡Wuya, Tawiklopisha!

¡Gimalwutkaluru ginachri Gitsrukaachi giwakaya!
¡Wuya tengognepotuya!”

¹⁰ Wa Gerosale rapokamtinitka, psolu pokchi gajeneko gemyeka. Wane chinna, “¿Katni wa tye?”

¹¹ Ga wa gixolune wane china, “Tyenwa Geso, Nasare Kalilesreta giyakatyachri, tokanchi geneklewatachri.”

Kpashiwakapji powratkaluru

¹² Geso jiglokamta kpashiwakapji Goyakalunu. Ruknokna pejnuruneko kgishanrewaklerunni gagijjetachinni kpashiwakapjiya. Yawnajkaklo kwalkaka gipekoseropiprojitchinny, motkoko gishanretachinni tuplapijere koxa. ¹³ Wane chinna, “Yonatkalurni:

Wa nopyji gagjigognewakapji chinkalurupni.

Ga wa gixa wane gixatkalu gitawakapna
kachowgurune gwiyawakapna.”

Kpashiwakapji runkaklewayta Geso

¹⁴ Giyagni kpashiwakapji runyegityaluna maygalene, ga wa myankane. Rutuukakna. ¹⁵ Tsrukakalune sasertotene ga wa yonchikgapine getlu giglajrukaka Wale kamrutanru. Ga wa mturune retna saplewjetachine kpashiwakapjiya, wane chinachine, “¡Wuya, Tawiklopisha!” Rumtuwnana.

¹⁶ Wane chinruna, “¿Gi ge pjemna wane chinyawakna?”

Geso wane china, “Gigi. ¿Gi ge pagogne getyongatlu: *Wa mturunenamaya ga wa gashichachinenamaya puglepotulu gimalwuru?*”

¹⁷ Ruknokamtna. Tsru pokchi ruyakaty. Wetaniya ya. Wane rawamta.

Gikermuna mwakato kamakpiratka

¹⁸ Goyechnokawpotuko tsru pokchi satokatka. Nachneru. ¹⁹ Retlo satopje gikera gatnugapostsi gwachro. Yayegitlo. Gike rukshikyal. Tosurepjeni. Wane chinro, “Gi pagogneko kajpatkayi.” Wanekluyakawa tuprigamatanatka gikerni.

²⁰ Yimaklene getlo. Ruglajitna. Wane chinna, “¡Ge! ¡Wanekluyakawa tuprigamatanatka gikerni!”

²¹ Rugita Geso. Wane chinna, “Galikakni wane nchingi, wa kalixlegi gixinipa, gi wa gnutanshinikanutini, gi wa tyepjeni wa gikerapirana wane gixanu, seyni koxa wa tye magka wane nchininiplu gixa, ‘Puxrikanu. Tsru wenu puknokinwa,’ wane rixanu. ²² Wa gagjigogenetinipa pejnuruko girukokta gagjita galixinri, gyoptotanru.”

Yoptopiiru Geso gitakikolupiranaya

²³ Wa kpashiwakapji yinitka, wa runkaklewanatini, rapyegitluna tsrukakalune sasertotene ga wa yine tsrutene. Wane chinruna, “¿Katu gitakyi tyeya?”

²⁴ Giyagni Geso gigitna. Wane chinna, “Gita koxa gepomgangi satu tokanchiya. Wa ginkakinipno Gita koxa ginkakangi klu nutakika tyekaka nkamrutinri. ²⁵ Wa Gwa katlewie ¿ginaka giyakatyachrini? ¿Tengogne waka yinyegiyakla?”

Giyagni wannananuko gishinikanuwata. Wane chinna, “Wane wchininipmaka: Tengogne giyakatyachrini, wane chinanunwu, ‘¿Klu chinanu koxa gi galixlu?’ ²⁶ Wa wane wchininipmaka: Yine yegi giyakatyachrini, gixolune yine wpikanuna. Gi rixanu pejnuruneko kagwaklu Gwa tokanchi geneklewatachri Goyakalunu rixinri.”

²⁷ Rugitluna Geso. Wane chinruna, “Gi wumata.”

Wale koxa wane chinna, “Gi Gitako ginkakangi klu nutakika tyekaka nkamrutinri.”

Geso yapkaklu gepi wugenrupirana

²⁸ “Seyni Ɂgi pixka getle gixlu gixa? Gepi wgenru satu jeji. Tsru gituru rapyegita. Wane chinru, ‘Wiwi, nusanate nowashate pyanu. Tyegogne wane pkamrurewatini.’

²⁹ “Wale gigita. Wane china, ‘Gi jmerno.’ Seyni gowukshini ren-shinikanuta. Wane yatka.

³⁰ “Gapkatatachri rapyegitatnaka. Waneko pixka chinatnaklu wale. Wale gigita. Wane china, ‘Gitapni, papa.’ Seyni gi wane ya.

³¹ “ɁGiru wa nyi gepi ruru gishinikanru kamruta?”

Wanna wane china, “Tsrus gituru.”

Geso wane chinna, “Galikakni wane nchingi wa gjiggawenutachinni, kapoklewaklerone gixa pnute jiglokanna Goyakalu pogirewatyawaka.

³² Gwa ginyegitgi poyagkaklewugapoya. Gi wa galixlu. Ga wa gjiggawenutachine ga wa kapoklewaklerone galixlu. Ga wa gixa getinri gi wa waneklu geshinikanuta wa galaxyapluna.”

Geso yapkakle kamrurewaklerune muglenepirana

³³ “Gyijnakotanru satu yapkaklu. Waneru satu jeji kgisanateru. Wale gitaku sana gowasha. Pirijeretjetlo. Tapgatyawakapa jitota. Tenopjiru kamruta. Renekamtina sana girukotachine. Pnu yatka wajra. ³⁴ Tjirgikolustsitka wayegrene yokanyegitna sana girukotachine yegi rawapyapluna sana gwiyachritka.

³⁵ “Ga wa sana girukotachine kashichna wayegrene. Satu kochipjetna, ga wa satu ruylatna, ga wa satu sotlujetna. ³⁶ Rumepe yokanretatnakna pimrine wayegrene muchichachine pnute. Waneko pixka rixkanna wannani. ³⁷ Gapkatatachri potu gituru yokanyegitna. Wane china, ‘Kagwakpiratanruna noturu.’ ³⁸ Wa sana girukotachine retinitkaluna gituru, wane chinkakna wannakakluko, ‘Tyewna yoptotachripa. Wuya. Wuylaganru. Waneyapwu wa yoptotanrupmaka.’

³⁹ “Kashichanruna. Gowasha ruknokyranruna. Wane ruylatyanruna.

⁴⁰ “Giyagni wa kgisanateru gininitka, Ɂgi rixanutkana wa wanna sana girukotachine?”

⁴¹ Wane chinruna, “Wa gektune ruylapotutanna. Pimrine girukotachine renekamtanutnaklu sana. Wanna genekanru sana gwiyachritka topapko gapokinitka.”

⁴² Geso wane chinna, “ɁGi ge pagogne getyongatlu wa Tokanchi Yonatkalluruwa?

Wa sotlu myoptotkotu kamrupjitachineya

Wale gitaaka yoptowaka gitsejita.

Gitsrukaachi chinanu kamrutka wa tye.

Rakaglajiygaletwu.

⁴³ “Giyagni wane nchingi, wa Goyakalu pogirewatyawaka konkalurupni gixyegiya. Panerune reneeko wa pogirewatyawaka kamrure kamrutachinepa. ⁴⁴ Katupnikta tye sotlu gitspetanuna rumlokpotutanuna, ramgapotutanuna. Ga wa tye sotlu gjirukgogotanrunapa ramgapotutanuna.”

Sasertotene ga wa Gwariseyone galuka kashretyalu Geso

⁴⁵ Wa tsrukakalune sasertotene ga wa Gwariseyone yijnakotinitkalu yap-kaklukaka Wale chinyawaka, rumatluna wannapirana china yanumsalet-inri. ⁴⁶ Rujgaluna gi rixpoko kashretyapluna, seyni gixolune yine pikna, gi rixanu tokanchi geneklewatachri kagwakyaluna.

22

Kashimyolu meyiwlü

¹ Rugita Geso. Yapkaklu runkakyatnakna. Wane china, ² “Tengogne pogirewatyawaka satu jeji pixka rixa pogirchi. Kashimyolu kamrutyalu gituru. ³ Wayegrene yokanata tomgiyapna chanixkalune kashimyolu yegi. Seyni gi raluka ginretna.

⁴ “Rumepe yokanretnakna pimrine wayegrene. Wane china, ‘Ginkakappa nanna chanixkalune, “¡Getanru xani! Ralixatka nnijitu nwakate jejine ga wa nuxowaakananu giylatkalunetka. Pejnuruko galpokotkalurutkani. Ginanu kashimyolu yegi.”

⁵ “Wanna gi jemu, seyni ralimtna. Satu rusanate ya. Ga wa satu marnewjetyawaka ya. ⁶ Pimrine kashwayegretanruna wale wayegrene. Rektutetkanna ga wa ruylatkanna. ⁷ Ga wa pogirchi yijnakotinri wa typiranra, jigekeanuwata. Yokanatna solalotene. Ruylajixanna wa nyi kgiyale-waklerunni. Yochpikpokchitanna.

⁸ “Giyagni wane chinna wayegrene, ‘Wa kashimyolu galikaka galpokotkalurni, seyni wa chanixkalune gi wa rumuklunina. ⁹ Giyagni gajewa. Rutspalgapotyawaka gyanu. Nchanixanna ginnakokta gikshikanune, kashimyolu yegi yinripna.’ ¹⁰ Yatkana wanna wayegrechne. Wa gatnugapkaka yana. Rapatjemtkana pejnuruneko rukshtikanunna mugleneymananuko ga wa kiglerune. Ga wa kashimyolu yegi yomitna nachnewatachine.

¹¹ “Jiglokamta pogirchi retyapna wa nachnewatachine. Wane retyalu satu jeji kashimyolu getachinemkalu mutaakatu. ¹² Wane chinru, ‘Nomole, ¿gi pixpoko jigloklemta gewi wa kashimyolu getachrimkalu mutaakaty?’

“Seyni wale pochke. ¹³ Giyagni pogirchi wane chinna wa kamrurewyegitjene, ‘Gostujixitanru, ga wa gostumyotanru. Maleka giknokaganru mapshagawaka.’ Waneplu chiyaglu ga wa gashkaygitlu.

¹⁴ “Gi rixanu gi gepikna chanixkalune, ga wa gi gixna tsomitkalune.”

Gepomgalu pogirchi wenutikolupiranaya

¹⁵ Giyagni wane yana Gwariseyone. Jemanshinikankakna wa kash-tokanutyapluna. ¹⁶ Yimaklenna yokanyegitluna Giroreyoneyma. Wane chinna, “Yimaklewatachri, wumatyi Pixni mayrokletu. Galikaka potu punkaklewata Goyakalu gatnugapotepirana. Gike pkagwakpirata, gi rixanu gi putakyagokna jejine. ¹⁷ Giyagni punkakanwu. ¿Gi pixka getle pixlu Pixa? ¿Wa munanshichkotnige Goteyone genekyaplu wenrukaka wa Pogirchi Susa waka gike?”

¹⁸ Seyni Geso gimatlü wanna muglenu. Wane china, “Sanowashatachingi, ¿klu chinanu gimlukanutno? ¹⁹ Gekagkitanno wa sroschiproj Susa wenu-tikolupa.”

Ranikyegitluna paproj. ²⁰ Wane chinna Wale, “¿Katunni wa tye yaglu ga wa toyonga?”

²¹ Wane chinruna, “Susa yagluni ga wa Susa yongani.”

Giyagni wane chinna, “Giyagni genekanru Susa Susanni, ga wa Goyakalu Goyakalunu.”

²² Yijnakotinitkaluna, ruglajitna. Kaspukamtatkaluna. Yatkana.

Gepomgalu gipnachine yotunrepapiranaya

²³ Walegogne rapyegitluna Sariseyone, wane chinachine maleshlu yotunrupa gipnachineya. Repomgaluna. ²⁴ Wane chinna, “Yimaklewatachri, Moysisi wane china: Mwugenethniko gipninina satu, wa repuru gwanro wale

gnunronanni, ruxolewnakakinripa giklopishapa yegwakluni chinanupa. ²⁵ Wixa yegi wanena payokgiprerune moletkakachine. Muchinanu tsru gnunrowata. Waleni gipnanuna muknokawgenetkatniko. Repuru gwatnaklo. ²⁶ Waneko pixka rixana gapkatatachrini, ga wa mapa rixinrini, ga wa payokgiprepotunanniko. ²⁷ Pejnurunniko gipnanatka. Tapkata gipukatanatka suxni. ²⁸ Giyagni wa yotunruklupe ḡigru gnunropni wa payokgiprenni gnunronanni? Gi rixanu pejnurunniko gnunronanni.”

²⁹ Giyagni rugita Geso. Wane chinna, “Gixa pupjeta gi rixanu gi gitmatlu wa tokanchi yonatkaluru gi wa Goyakalu giyaklewleko. ³⁰ Gi rixanu yotunruklupe gi wa jejineko gnunrowatanu. Gi wa suxoneko gnu-ruwatanu, seyni tengogne gajene Goyakalutowrerune pixka rixanutkana. ³¹ Wa yotunotachinepa gipnachinepirana, ḡigi ge getyongatlu wa tokanchi Goyakalu chinyawakgi? ³² ‘*Gitni wa Gawra Goyakalute, Gisaka koxa Goyakalute, ga wa Gakowo koxa Goyakalute.*’ Gi wa gipnachine Goyakalutni, seyni giwekachine Goyakalute.”

³³ Wa yijnakotinitkaluna gixolune yine, ruglajitna wa runkakyana.

Tsrū potu Yukanatkaluru Tokanchi

³⁴ Giyagni wa Gwariseyone yijnakotinri Wale kochrokna Sariseyone, rapatjetna wanna mkoje. ³⁵ Satu wannanyi yonchikgapine gepomgalu. Rumlukanutyaplu, repomgalu. Wane chinru, ³⁶ “Yimaklewatachri, ḡigurni wa tsru potu Yukanatkaluru Tokanchi pejnuruko pnute?”

³⁷ Rugitlu. Wane chinru, “Pushinikanru *Gitsrukaachi Poyakalute psolpotuyako pajiya, psolpotuyako punshinikanuya*, psolpotuyako pushinikanut-letanruya. ³⁸ Tyenwa tsru potu ga wa muchinanu yokanru. ³⁹ Ga wa gepi chininri tye pixka rixa: *Pushinikanru pumole pixnanuko pixka.* ⁴⁰ Wa tye gepi yokanru chinanni pejnuruko Tokanchi Yukanatkaluru ga wa tokanchi geneklewatachine chinyawaka.”

Kristo, Tawiklopisha

⁴¹ Rapatanatinna Gwariseyone, Geso gepomganna. ⁴² Wane chinna, “*Gi* nchinna gixa wa Kristoya? *Ḱatuklopishni?*”

Wane chinruna, “Tawinu.”

⁴³ Wane chinna Wale, “Giyagni ḡigi rixa Tawi wa Giwekikaluruya wane chinru Gitsrukaachi? Wane china:

⁴⁴ *Gitsrukaachi wane chinru*

Nutsrukate,

Ptuplatanu npotuklesretate,

*wa nutakinpotukna Pixa kamnixjene
pujixipta rapukote.*’

⁴⁵ Giyagni waleko Tawi wane chininri Gitsrukaachi, ḡigi rixpokotyawaka giklopishayapni? ⁴⁶ Gi satuna gimkata gigletokanutlu. Wale-gognékakayakawa gi satuna tserpiranawata gepomgaletlu wanepnute.

23

Geso ginkakletna yonchikgapine ga wa Gwariseyonepirana

¹ Giyagni gixolune yine yanumyegita Geso, ga wa yimaklene koxa. ² Wane chinna, “Moysisi tuplapijere tuplatna yonchikgapine ga wa Gwariseyone. ³ Giyagni pejnuruko chinyawakgina gkamrutayaplu, wale gkamrutantu. Seyni gi wa kamrutyawakna gkamrutantu gixa. Gi rixanu wane chinna, seyni gi wane rixa kamruretluna. ⁴ Gi rixanu rumlутluna ginolu, kyapre

ganikolu. Wale rutjikaakana yine. Seyni wannako gi wa gimiyojiyakna raluka komyekletyaluna.

⁵ “Ga wa pejnuruko kamrurna wane rixna wa retikolupa yineya. Gi rixanu tserutamtapotulona yoptoyegitjerna yonchimta. Tserutluna gimkaluptost-simta gwachri. ⁶ Ralukluna tsrukakalune tuplapijere meyiwluya, ga wa tsrune tuplapijere ginkaklewawakapji gajerkaka. ⁷ Ralukluna giputuya ralukikolna, ga wa yine wane chinyapna, ‘Rawii, Rawii.’

⁸ “Ga wa gixa gi wa ‘Rawi’ nchinko, gi rixanu satupjeru gyimakjeru wa Kristo ga wa pejnurunekgi gixa moletkakachingi. ⁹ Gi satuna gixa ‘nuru’ nchinanu tye chijiya, gi rixanu satupjeru Giru tengogne Gajeru. ¹⁰ Gi wa kgiy kolewaklerune nchinko gi rixanu satupjeru giykotjeru. Walenwa Kristo. ¹¹ Wa tsru potu gixa yegi gajeru, gipxakjerupni wale. ¹² Gi rixanu girukokta tsru potu gixnawa, walepni wa mturupotupa. Girukokta wale-nanuko mturu potu gixnawa walepni wa tsru gitaa.

“*Gi wanenil!*”

¹³ “*Gi waneni gixa yonchikgapingi, ga wa gixa Gwariseyone, sanowashat-achingi!* Gi rixanu gixni wa gishyatlu wa tengogne pogirewatyawaka yinyegiya. Gi rixanu gi wa gixako jigloka. Gi koxa gichi jiglookakletna jiglokachinmaka. ¹⁴ *Gi waneni yonchikgapingi, ga wa gixa Gwariseyone sanowashatachingi!* Gi rixanu gkonapijietanna gipnagnurutachronni. Gix-ashleya gogagjirgognerkakgi. Giyagni giklukanuwnapotutanuna.

¹⁵ “*Gi waneni yonchikgapingi ga wa Gwariseyone, sanowashatachingi!* Gi rixanu tsru wenu ga wa popriwaka chiji gyotaljeta gixa, satupje Goteyo gitaknachiriwa gixkakyapa. Ga wa wane rixkoklunu, wane gixkaklu Gigena xirnachri gajeru pixkalutu gixa pnuute gepi kata rixanu.

¹⁶ “*Gi waneni gixa! Maygalenekgi kosekachingi. Wane chinachingi, ‘Girukokta wa kpashiwakpotugruko kawchinanu koschekachri, gike rixa. Seyni girukokta wa kpashiwaka potu gajero kori kawchinanu koschekachri walenwa giklukanuwnnachrini.’* ¹⁷ *Seprolokachingi ga wa maygalengi!* Gi rixanu *¿girni wa tsrupotu? ¿Waka kori waka kpashiwaka potu wa kori kpashiri rixikowaka?* ¹⁸ Ga wa, Girukokta gima wa genekashlu yochpikjetikowakawa kawchinanu koschekachri, gike rixa. Seyni gima girukokta wale gogo gwachri genekashlu kawchinanu koschekachri, walenwa giklukanuwnnachrini. ¹⁹ Maygalengi, *¿girni wa tsru potu: genekashlu waka yochpikjetikowakawa wa genekashlu kpashiri rixikowaka?* ²⁰ Wa yochpikjetikowakawa kawchinanu koschekachri, gikwa kawchinanu koscheka ga wa waleymananuko pejnuruko walekwa gwachri kawchinanu. ²¹ Kpashiwakapji kawchinanu koschekachri, walepij kawchinanu koscheka ga wa walepij Gwachri kawchinanu. ²² Tengogne kawchinanu koschekachri, Goyakalu tuplapijere kawchinanu koscheka ga wa wale gogo Tuplatachri kawchinanu.

²³ “*Gi wanengi gixa, yonchikgapingi ga wa Gwariseyongi!* Gi rixanu pamolete gwenutyalu pgamlusureru, ga wa ganisiji, ga wa kominoji, ga wa gkaspuklu wa tsru potu yokanru Yakanatkaluru Tokanchi chinyawaka. Walenwa poyagkaklewlu, getwamonrewlu, ga wa galixlewlu. Tyekaka gimkata kamrureta. Gi wa pimri koxa gkaspuka kamruretanu.

²⁴ *¡Maygalenekgi kosekachingi!* *¡Yosla gixirikachine pixkagi gixa, ga wa kameyo gnikloka!*

²⁵ “*Gi wanengi gixa, yonchikgapingi, Gwariseyongi! Sanowashatachingi.* Gi rixanu mpowratlu kolpeto rogote ga wa kajpapago rogote, seyni gitokoya katsepoylu chowguchi ga wa makotnachinwa. ²⁶ Gwariseyo maygaletyi,

muchinanu gapka powratanru kolpeto gitokote ga wa kajpapago gitokote, wa rogo gajeru koxa powra rixinripa.

²⁷ “¡Gi wanengi gixa yonchikgapingi ga wa Gwariseyongi! Sanowashat-achingi. Gi rixanu wane pixka gixachingi, yomlechkaka galatawnachri. Maleka galikaka retika kiglepoltu. Ga wa gitoko katseplu gipnachrigapu ga wa pejnuruko kapcholu. ²⁸ Waneko pixka gixa gixa koxa. Maleka galikaka yine getyawakgi poyagkakachinepgutgi. Seyni wa gitokoteya katsepoygi nsanowashle ga wa gmukochire.

²⁹ “¡Gi wanengi gixa, yonchikgapingi ga wa Gwariseyongi! Sanowachat-achingi. Gi rixanu gixa kamrutlu wa Goyakalu tokanu geneklewatachinni kapnatikowaka. Gigletlu poyagkakachinni yomle. ³⁰ Wane chinachingi, ‘Wutsrukatenniklu gawkamka koxa wixa, gi wa wupxakmakna Goyakalu tokanu geneklewatchinni giylatikolu.’ ³¹ Wane gixa gipguitaletnawa wa Goyakalu tokanu geneklewatachinni giylatachineklopishangi. ³² Gixa koxa poyagkakanru gitsrukateni yaglu.

³³ “¡Gimnu pixkalungi! ¿Gi gixpoko gasukletinri Gigena xirnachri gik-lukanuwnayegjixikolupa? ³⁴ Giyagni Gita yokanyegitgi Goyakalu tokanu geneklewatachene, ga wa kgimatkalerune, ga wa yonchikgapine. Pimrine wanna giylatanu gixa. Koroshishkita gitakanna. Pimrine wanna gkochipjetanu ginkaklewawaklepija. Papokchimnunanuka gkojwakinna. ³⁵ Wa gixa giklukanuwninripa pejnuruneko poyagkakachinegraga, chiji gipkaakaluru gragra, wa Gawili poyagkakachrigragakluyakawa Sakariyragaklupotonuko, Warachi wgene, wa gixa giylatanruna kpashiwakpotugruko ga wa yochpikikowakakwa ganikajiteswa. ³⁶ Galikaka wane nchingi, wa nyi gimuweekakgognenatachine giklukanuwna pejnuruko tyekakaya.

Geso wamonuwata Gerosaleyā

³⁷ “¡Gerosale, Gerosale! Goyakalu tokanu geneklewatachinni giylatachriyi. Ga wa pyokanyegitimoni sotlujetachriyi. ¡Gi pejnu katananukta naluka gapatjewgenretyi, gaxawripa pixka tapatjewgeneta! Tomejimpuko tutakna. Ga wa pixa Gesosale gajengi gi galuklu. ³⁸ Gwiyawakapjikaka giknokamtuna gixapni. ³⁹ Gi rixanu wane nchingi, xaniyakawa gi getanutkanno wa gixa wane chininpotonanuko:

Giglenshinikanyegitkalurni

Gitsrukaachi giwaka ginyachri.”

24

Geso ginkakletagnaputlu kpashiwakapji gjrolekachripa

¹ Kpashiwakapji rushpakamtya Geso. Yatka. Rapyegtluna yimaklene, rekakgityapluna kpashiwakapjikaka. ² Geso wane chinna. “¿Getluge tyekaka? Galikaka wane nchingi, gi wa rutukanuna sotlu rogotkakinripa, gi wa mujroleekatunpkni.”

Getkalurkakapa ma mapookanuwa yoptukgognetyawakapa

³ Goliwa Magkate tuplata. Yayegtluna yinaklene wanna mkoje. Wane chinruna, “Punkakanwu. ¿Giklupni wa tyekakapa? ¿Klu getkaluru wanepa wa puninipa ga wa yoptukgognetyawakapa?”

⁴ Rugita Geso. Wane chinna, “Xako gi satunako yokwitangi. ⁵ Gi rixanu gixo ginanu ngiwakaya. Wane chinachinépa, ‘Gitni wa Kristo.’ Gixopni yokwitanna. ⁶ Gyijnakotanutkalu giylalupirana ga wa pogiwlesha giylalupirana. Gi gkegeknanuwanutanu. Rumkata wane gixleta, seyni gi wa yoptukyawakapnichi. ⁷ Gi rixanu yotunyegkakanna pachijne gajene

pachijne gajene yegi ruylakakinripna. Ga wa pogirewatyawaka gajene yotunyegkakanna pogirewatyawaka gajene. Waneplu nachlukaka ga wa guyolikchijrukaka pachijnemnunanukaya. ⁸ Tyekakapni pejnuruko muchichachripa wa kachinolkakapa.

Geso ginkakletlu yimaklene kojwakikolupna

⁹ “Wanepnute gixapni samyokalunenapgi nsaletikolupa ga wa gylatikolupa. Ga wa gayegixko payinemnunanukoya Gita giwaka chinanu. ¹⁰ Giyagni gixopni gitspekaakona. Samyookakanna. Rayegixkakanna. ¹¹ Rupgujewnanna wanna migje Goyakalu tokanu geneklewatachine. Yokwitanunna gixon. ¹² Mukochri gixolewnakalu chinanupa, gixopni masata galuklewletannatka. ¹³ Seyni wa kashnantakanshinikanutachripa yoptukyawakapotunanuko wale gognetkaako. ¹⁴ Muchinanu ptowruneko payinerumnunanuka runkakikolupna Kiglerpotununu Tokanchi pogirewatyawakapirana. Waneklupatkani yoptukyawakapa.

Gagnanukaluru gimtukpotlewatachri

¹⁵ “Giyagni getinpatkalu gagnanukaluru gimtuklewatachri potu, Ntanyili, Goyakalu tokanu geneklewatachri chinyawaka, kpashiwakapji rawanatini, ¹⁶ (Wa getyongatachripa gimata jemanru), waneklu Gote gwachinepni gasukanuna. Magkakaka yanna. ¹⁷ Panchi gogoshrichi gwanatachripa gi gjrukanuna ranikyaplu gipji gajeru. ¹⁸ Wa sana gwachri gi wa satkapanu rawapyaplu gimkalu. ¹⁹ Gi waneni wa kamshironepni wa gashichakachinepni wale gognekakpatka! ²⁰ Gagjigognetanu gi waneyapgi ginapuklu gasuktalu, gi wa gapnanutikalurgogneko. ²¹ Gi rixanu wanepatkalu tsru salewakchi wa mwaajejetkatu reyinuwakletinitkalu tye psolchijneko ga wa xanigognenanu salewakchi. Gi wane rixanu. ²² Wa Gitsrukaachi ma sustakanmaklu walegognekaka gi pamanenupnikmaka gishatkapkona, seyni tsomitkalune chinanu sustaklu walegognekaka. ²³ Giyagni satu wane chininippi, ‘Gewru Kristo,’ ga wa wane chininippi, ‘Ga ga waneru,’ gi wa galixanu. ²⁴ Gi rixanu rupgujewnanna wale migje Kristone, ga wa wanna migje Goyakalu tokanu geneklewatachine. Kamrutanruna tsru getkalurkakapa ga wa koglajrukakapa yokwitikolupmakna tsomitkalune wa rumkatmaka wane gixleta. ²⁵ Xani nunkakatkagi ma mapookanuwa.

²⁶ “Giygani girukokta wane chininippi, ‘Wane rawa, yineru mwiyawanakumka,’ Gi wane gyanu. Ga wa ‘Gitokogruko rawa,’ gi galixanru. ²⁷ Gi rixanu, wa rawrakle pixka rixanu, tkachi gishpatyawakasreta rawrakini pixka ga wa rumxityawakasretpotunanuko pokamlata, wane pixka nixa ginretanu Gita wa Yineru Wgenno nuninipa. ²⁸ Gi rixanu ginakakokta rawmanetanu gipnachri, wane rapatjetinna klatatalune.

Yineru Wgene gapoklepa

²⁹ “Wa ruknoginitka tyegogne gajeru salewakchi, waneklu: Ruchpokanu tkachi.

Gi wane ksuru gi wa pokamlatanu.

Gi wane tengogne tujirotni katagirkaka.

Wa gichkolkaka tengogne gajeru kowshiwshtko

³⁰ “Wanepnute tengogne rupgujewninitka Gita Yineru Wgenno yigap-kakle. Giyagni kegeknanuwatanna payinerumnunanuko tye psolchijne

gajeruko. Retinpatkanona *Gita Yineru Wgenno ginachripatkano*. *Tengogne gajeru kyachgapererumko numununu*. Tsru nuyakle, tsru noyaknu numununu.³¹ Nyokanatanna notowrene. Tsro pogimnupotuplo kowgimayma nyokanatanna. Wanna gapatjetanna ntsomitunanue gepkoxamkojesretayako, yoptukyawakapotunanuko tengogne ga wa pasreta yoptukyawakapotunanuko.

Gikera gipcheksuretinripirana

³² “Gimatanru yapkaklu gikerapiranaya. Wa tyosnuygalejiplutinitka, tucphecksuretinpatka, gimatanutku wa walapustsitkani.³³ Waneko pixka gixanu gigognepirana. Getinpatkalu wane gixlутkani tyekaka, gimatanutku gi Gowukpatkalu. Gipgyaptostsitkali.³⁴ Galikaka wane nchingi, gi ruknogantu tye gimuweekakgognenatachinesha wa ptowruko tyekaka ma mixkanuwa.³⁵ Wa tengogne ga wa chiji giknogantu, seyni wa ntokanu gi giknogantu.

Nowegogneklu pixka

³⁶ “Seyni walegogne, wale gipapko, gike gimata, gi wa Goyakalu towrenuko tengogne gajene, gi wa Gituruko, ga wa Girchipje galikaka gimata.³⁷ Gi rixanu Nowgogneklu pixka nixa gapokletanu *Gita Yineru Wgenno*.³⁸ Gi rixanu wa gonnewlu ma mapookanuwagognenkaka wane rixa nikletuna, runra, ganunrowatna, ga wa ganuruwatna wa Nowe jiglokingognepotunanklo pumlekwa.³⁹ Gi rumatna rapokinipotunanuko gonnewlu ga wa ranikanna pejnurunniko. Wane pixka rixanu napokinipa *Gita Yineru Wgenno*.⁴⁰ Giyagni gepi jejine sana gwanatanu. Satu ganiika ga wa satupni giknokamtkona.⁴¹ Gepi sxone ginripagita satu ginripiya. Sato ganiika. Satopni giknokamtkona.

⁴² “Giyagni gixa giyokanu. Gi rixanu gi gimata girugogne runanu Gitrukate.⁴³ Ga wa gimatanru wa tye. Wa kwangixerupji gimatkamka girpapko runinripa kachowguru, ruyokanmaka. Gi retashatanmaklu kontamgiyaplu gipji.⁴⁴ Giyagni galpokotinwa gixa koxa, gi rixanu gi gimata gixa girpapko nunanu *Gita Yineru Wgenno*.

Wayegrechri maponshinikanutkulu

⁴⁵ “Giyagni ḡirupni wa wayegrechri gaponshinikanutkaluru ga wa kshinikanuru? Wale rutakanma rutsrukate gipji gajene chinanu, wale geneka nikletayna nikjetinnapapko.⁴⁶ Giglenshinikanyegitkaluru wale wayegrechri wa runini rutsrukate rukshikyaplu wane gixanatachri.⁴⁷ Galikaka wane nchingi pejnuruko wane rixle chinanu rutakanru.⁴⁸ Ga wa gektutu wayegrechri wane chinanukta rajiya, ‘Ramga ginreta Nutsrukate.’⁴⁹ Yinuwaka giylakletletna ruwayegretkone. Nika, ga wa rura gimetachineyma.⁵⁰ Wale wayegrechri gitsrukate ginanu. Ma kagwakgognetinitgogne, runanu. Ma mumatinpapko runanu.⁵¹ Kochipjepututanru. Sanowashatachineyma rutakanru walenupa. Waneplu chiyalgu ga wa gashkaygitlu.

25

Yapkaklu pamole maklojinepirana

¹ “Giyagni tengogne pogirewatayawaka pamole maklojine pixka rixanu. Wanna koscheklo yochpiikalurkaka wannanuko. Rushpakamtna yoptotapyapatkaluna gnunrowatachripa.² Pamyona manshinikanurone, ga wa pamyo koxa kanshinikanurone.³ Giyagni wa manshinikanurone

koscheklo yochpikjetanrona, seyni gi ranikluna ringi. ⁴ Seyni wa kanshinikanurone ganiklu ringi pastonoya yochpikjetkaluroyma. ⁵ Ramaganatinikopshini gnunrowatachripa ruxapnewatanra, rutnonatna pejnjuroneko. Rumkanatna.

⁶ “Ganikajyechochno jemka sablechi wane chinachri, ‘¡Tyepatkani! Gnumrowatachripatkani. Gishpakanu. Gyoptotapanru.’

⁷ “Giyagni pejnuroneko maklojine yotunota. Ruglepokotlona yochpikjetanrona. ⁸ Giyagni manshinikanurone wane chinna kanshinikanurone, ‘Psoji genekanunwu gringite. Wa wyochpikjetanro giwniyanatkawu.’

⁹ “Seyni wa kanshinikanurone gigitna. Wane chinna, ‘Gike. Gi getko poyagotanu wixa chinanupa ga wa gixa chinanu koxa. Seyni gagjitapangonuklu gixanupa wa ragijetikowakaya.’

¹⁰ “Ragjitapakopshinruna rapokatka gnunrowatachripa. Ga wa galpokonatachinetka jiglokamtatkaluna kashimyou yegi. Rushyatkatka gipgyapto.

¹¹ “Gowukshini pimrone gina maklojine. Wane chinna, ‘Gitsrukaachi, gitsrukaachi, pkotpukyegitanunwu.’

¹² “Rugita wale. Wane china, ‘Galikaka wane nchingi, gi numatgi.’

¹³ “Giyagni giyokanu. Gi rixanu gi gimatl gigogne, gi wa gipapkoko.

Yapkaklu sroschiprojakkapiranaya

¹⁴ “Gi rixanu tengogne pogirewatyawaka satu jeji pixka rixa wajra yachri. Tomgana wayegrene. Renekamtna wane rixle. ¹⁵ Satu reneka satu pacha waragkaproji, ga wa satu gepkoxamkojemole waragkaproji, ga wa satu gepmole waragkaproji. Satkaka rumkayawaka renekna. Wajra yatka. ¹⁶ Wa satu pacha waragka yoptotachri ralimta. Marnewatatk. Walaya satu pacha waragkatnaka yoptotatnaka. ¹⁷ Waneko pixka rixa wa gepkoxamkojemole waragkaproji waneyalutu. Gepkoxamkojmole waragkatnaka yoptotatnaka. ¹⁸ Ga wa gepmole waragkaproji yoptotachri ralimta. Jitotlu chiji. Yogimatatkalo rutsrukate serojiprojite.

¹⁹ “Gowukshini potu runa wanna wayegrechne gitsrukate. Ruglepokotluna kwentatna. ²⁰ Rapoka satu pacha waragkaproji yoptotachri. Raniklo pimro satu pacha waragkaprojithnaka. Wane china, ‘Gitsrukaachi, satu pacha waragka penekamtno. Petanu. Pimro satu pacha waragkaproji nyoptotatnaka walaya.’

²¹ “Rutsrukate wane chinru, ‘Poyagnu, wayegrechri kigleryi ga wa poyagkachriyi. Psotsotaji putakika poyagkakachriyi. Gixo potu chinanu nutakinyi. Putsrukate gimuwatyawaka pjiglokanu.’

²² “Rapoka koxa gepkoxamkojmole waragkaproji yoptotachri. Wane china, ‘Gitsrukaachi, gepkoxamkojmole waragkaproji penekamtno. Petanu. Pimro gepkoxamkojmole waragkaproji nyoptotatnaka walaya.’

²³ “Rutsrukate wane chinru, ‘Poyagnu, wayegrechri kigleryi ga wa poyagkachriyi. Psotsotaji putakika poyagkakachriyi. Gixo potu chinanu nutakinyi. Putsrukate gimuwatyawaka pjiglokanu.’

²⁴ “Rapoka koxa gepmole waragkaproji yoptotachri. Wane china, ‘Gitsrukaachi, numatyi jeji shiko gajiryi. Pma mutaklewatyawakanu pjirgiya. Pma muknokajityawakanu papatjetya. ²⁵ Npika. Nalimta. Nyogimatlo pserojiprojite chiji gitokote, wa gepmole waragkaproji. Waneyyi wa pixanu.’

²⁶ “Rugita rutsrukate. Wane chinru, ‘Wayegrechri mugletyi ga wa ma mer-nuwatachriyi. ¿Pumatmakge wa nma mutaklewatyawakanu njirgiya, nma

muknokajityawakanu napatjetya? ²⁷ Giyagni pumkata gitakletlo nsero-jiprojite kgipekoklerune yegi, wa napokini nyoptotanmaklo gitanuko ga wa gixolewnachroymananuko.

²⁸ “Giyagni gkonanu waleya gepimole waragkaproji. Wa satu pacha waragkaproji waneyalutu genekanro. ²⁹ Gi rixanu waneyalutu psoluko reneeko. Ruxolewnayegitanru. Ga wa waneyamigjetu, wane rixleko koniko. ³⁰ Ga wa wayegrechri gike gapri migje maleka mapshagawaka giknokanru. Waneplu chiyaglu ga wa gashkaygitlu.”

Giklukanuwnalgognepotupa

³¹ “Wa noyaknu numuninipa Gita wa Yineru Wgenno ga wa pejnuruneko notowreneyma, natajiwniyawaka ntuplapijere ntuplatanu. ³² Gita getanu rapatjeka kona payinemnnunanuka. Nkotspalatanna. Wa gowegane giruko-tachri pixka kotspalatna gowegane chiwo wgeneneyegiya. ³³ Potuklesretate galikaka nutakanna gowegane. Kegnetesretate nutakanna chiwo wgenene.

³⁴ “Giyagni Gita pogirchino wane nchinanna npotuklesretate gajene, ‘Ginanu, Nuru giglenshinikanutanune. Gyoptotanru pogirewatyawaka gixa chinanupa galpokotkaluru ma mutaakonwa tye psolchijneko. ³⁵ Gi rixanu nchinanno. Geneka nikletno. Nonunnagatewanata. Geneka giiretno. Pnu guyakatyachrino. Gyoptotno. ³⁶ Mamkatno. Gmakanro. Nyayixa. Nsalwayegitno. Yoshmakjetikowakananno. Ginyegitno.’

³⁷ “Giyagni poyaggakachine gigitanno. Wane chinannona, ‘Gitsrukaachi, ¿giklu wetyi pnachinatini ga wa woglutyi, waka gonunnagatewatachriyi ga wa weneka giiretyi? ³⁸ ¿Giklu wetyi pnu guyakatyachriyi ga wa wyoptotyi, waka mamkatyi ga wa wmakatyi? ³⁹ ¿Giklu wetyi pyayixanatini ga wa yoshmakikowaka pwini pixa, ga wa wunyegityi pixa?’

⁴⁰ “Wa Gita pogirchino gigitanna. Wane nchinanna, ‘Galikakni wane nchingi, girukokta wa mturu potu wa nyi nomole wane gixin, wane gixno Gita.’

⁴¹ “Wanepnute wane nchinankoxna wa nkegnetesreta gwachine, ‘Gixrikinno, kamakpiratkalungi. Xirnachri gyanu gike rixiniko muwnakatu, tsru kamchi chinanu galpokotkaluru ga wa gitowrenenupa. ⁴² Gi rixanu nachi nixinina, gi geneka nikletanno. Nonunnagatewanatinina, gi geneka giiretanno. ⁴³ Pnu tuyakatinina, gi wa gyoptotanno. Mamkattu nixini, gi wa gmakattanno. Nyayixinina ga wa yoshmakikowaka nwini, gi wa nsalwayegitanno.’

⁴⁴ “Giyagni wanna koxa gigitanno. Wane chinannona, ‘Gitsrukachi, ¿giklu wetyi wa pnachinatini ga wa ponunnagatewatini ga wa pnu puyakatini, mamkattu, ga wa yayixachriyi ga wa yoshmakikowaka pwini, waneklu gi wa wupxakyi?’

⁴⁵ “Gita gigitanna. Wane nchinanunna, ‘Galikaka wane nchingi, gi rixanu gi wane gixlu satu nyi mturpotune, gi wa Gita wane gixa.’

⁴⁶ “Wane yanunna saletikowakapna gike rixiniko mnikawnakatu. Ga wa poyaggakachine wane yanna giwekikowaka gike rixiniko mnikawnakatu.”

26

Tsrukakalune jemanshinikankaka kashichyapluna Geso

¹ Wane rixa. Rali ginkakletinitkalu Geso pejnuruko tyekakapirana, wane chinna yimaklene, ² “Gixa gimatlu wa gepigogne giknoginpata, waneplu Tsru Giknoglushgogne ga wa Gita Yineru Wgenno samyooke, koroshishkita nutakikopatka.”

³ Giyagni tsrukakalune sasertotene, ga wa yine tsrutene gapata. Sasertotene gitsrukapatupji rapatyana. Kaygwasu giwakni.

⁴ Jemanshinikankakna kashichiyapluna Geso yokwireyna, ga wa ruylatyapluna. ⁵ Wane chinna, “Gi wa tsrugognekupni. Ma mejnugimalewatinitipna yine.”

Wetani ruyokjiwutika Geso

⁶ Wetani rawanata Geso, gjirgitutpachri Simopji. ⁷ Tapyegitlu sato suxo. Waneylo pastono klatalo, pgamlugalu yegi. Kwenuru potu. Nikawaka tuplanatini Geso, tuyokjiwutlu.

⁸ Wale retna yimaklene. Rumtuwnana. Wane chinna, “¿Klu chinanu wane tixa salewnaleta? ⁹ Gi rixanu tumkata gishankakotmaka tsru wenruya, renekikolupna kwamonurune.”

¹⁰ Geso gimatlou. Wane chinna, “¿Klu chinanu nsalewnakaklo twu suxo? Gi rixanu kigleru kamrurchi tkamrutyano. ¹¹ Gi rixanu waneyognenananupgi wa kwamonurune gixayma, seyni Gita gi wa gimwagognenanutanutkagi. ¹² Gi rixanu tuyokmanetno pgamlugalo, wa nkapnatikolupa tkamrutyano. ¹³ Galikaka wane nchingi, ginakakokta runkakletiko Kiglerupotunanu Tokanchi wa psolchijneko wa tye koxa tkamrutanru wala wane chinkalurupa wa tushinikikolupa wala.”

Gota galuka samyokletlu Geso

¹⁴ Giyagni satu pamole gepi rixinri, Gota Giskaryote giwakatletachri tsrukakalune sasertotene yegi ya. ¹⁵ Wane chinna, “¿Klu galuka genekletno, gitu samyokangi Wale?” Rupiratyaluna mapmoleproj.

¹⁶ Wanekluyakawa rujgalu ruglepkatapinri samyokyaplu.

Tsru Giknoglughogne chinanu galpokotka

¹⁷ Muchinangogne jimaprojpa gisekachri myapjetkotugognekaka yimaklene ginyegitlu Geso. Wane chinruna, “¿Ginaka paluka galpoklejixwu wa Tsru Giknoglughogne pnikywakapa?”

¹⁸ Wale wane china, “Pokchi gyanu wale jeji yegi. Wane nchinanru, ‘Yimaklewatachri wane china, ‘Nogognestsitkani. Pixa yegi Tsru Gi-knoglughogne nkamrutinri nyimamkleneyma’’” ¹⁹ Ga wa yimaklene Geso chinyawakna kamrutna. Ralpokotluna Tsru Giknoglughogne chinanu.

Geso ginkakletlu wa satu yimakleru samyokanru

²⁰ Kayimnu chininitka nikawaka tuplatatka pamole gepi yimakleneyma. ²¹ Wa nikanatinna, Geso wane china, “Galikaka wane nchingi, satu gixate rixinri samyokanutkano.”

²² Wamonuwnapouttna. Yinuwaka wane chinretna satkaka, “¿Gitgetkopni, Gitsrukaachi?”

²³ Giyagni rugitna Wale. Wane chinna, “Girpaktanwa Gitayma gigakachri kolpetoya gemyoya, walepni wa samyokanno. ²⁴ Galikaka Gita wa Yineru Wgenno wane nyanu chinyawaka wa yonchi Gitapiranaya. ¡Gi waneni wa tye jeji, wale chinanu Gita wa Yineru Wgenno samyooke! Kiglemkalu tye jeji chinanu ma mushpaakannimka.”

²⁵ Giyagni rugita Gota wa samyokjeru. Wane chinru, “¿Gitgetkoni, Rawi?” Wane chinru, “Pixa chinyawaka.”

Jimapro gimnikikolu gitaaikaluru

²⁶ Nikanatinna wanna, Geso kashichlu jimapro. Ruglenshnikanyegitlu. Jiknaglu. Renekna yimaklene. Wane chinna, “Gyoptotanru. Gnikanru. Tyenwa nomane.”

²⁷ Kashichlo girapistono. Poyagnutyeigitlo. Renekna. Wane chinna, “Giranu walaya pejnurunekgi. ²⁸ Gi rixanu tyenwa nograga wa gerotu tokanchi gipiratkaluru chinanu, gixoluru yineru chinanu giyookaluru, wa mukochri kaspukikolupa. ²⁹ Ga wa wane nchingi, xaniyakawa gi wa nuranutkalo twu gowajga wa walegognepotuko wa nuranro geroto wa Goyakalu pogire-watyawakaya.”

Geso ginkakletagnaputlu Petro nutatinripa

³⁰ Wa wanna shikaletinitkalu gimalwuru, rushpakamtatkana. Goliwa Magkate yana.

³¹ Giyagni Geso wane chinna, “Tye yechno pejnurunekgi gixapni git-speekaakona Gita chinanu. Gi rixanu kayongalutkani:

*Nuylakanru girukotapratachri,
ga wa gowegane gapatyawaka gajene
kotspalkaakona.*

³² Wa nyotunotinpatka, Gita gapka kosekanu gixaya. Kalile nyanu.”

³³ Petro gigita. Wane chinru, “Pejnurunekmaka gitspetanu Pixa chinanu, giike nixiniko nutspetanu gita.”

³⁴ Geso wane chinru, “Galikaka wane chinyi, tye yechno ma yanumatkanugnapuwa gaxawripa, mapa kata pnutatanno.”

³⁵ Petro wane chinru, “Numkata gipnaletankoxmaka Pixayma, gi nnutatanyi.” Ga wa pejnuruneko yimaklene wane china.

Getsemani ragjigognetinri Geso

³⁶ Giyagni sana ya Geso wannayma. Getsemani chinikowaka sana yana. Wane chinna yimaklene, “Gewi ntuplatanu, nagjigognetapinikopshini.” ³⁷ Ranikna Petro ga wa gepi Sewereyo wgenene. Yinuwaka wanmuunwaleta. Ga wa kojwakanshinikanutka. ³⁸ Giyagni wane chinna, “Nonshinikanu nwamunuwnapotuty gipukchi pixka potuko. Gkagwakanu gewi. Giyokanu Gitayma.”

³⁹ Wane rajrinya psotsotaaji. Yoptsojita. Yonoogojoputa. Ragjigogneta. Wane china, “Nuru, rumkatini wane gixletikolupa, ruknogantu tye salewakchi Gitaya, seyni gi wa Gita galukyawakapni, seyni Pixa galukyawakapni.”

⁴⁰ Yimaklene yegi ya. Retamtna gimkanatachine. Wane chinru Petro, “Giyagni ¿gi gimkata giyokletge Gitayma pshinitsonu? ⁴¹ Giyokanu. Gagjigognetanu gma yantalletikotupa. Wa jmerenshinikanurungi galikakni, seyni gimane muchkotni.”

⁴² Rumepe wane yaletatnaka. Ragjigognetapa salewnalepirana. Wane china, “Nuru, nma murkanuwalo gi tumkata giknogletini Gitaya wa twu girapistono, wane gixkalurupni palukyawaka.”

⁴³ Rumepe yayegletatnaka. Retamtna gimkanatachine, gi rixanu ruxap-newlena chinanu gi rumkata gimrekaygaletna. ⁴⁴ Rajrinatnaka. Ragjigognetapa mapa kata rixinri. Waneko pixka chintokanutatnaka.

⁴⁵ Wanepnute yimaklene yegi yatnaka. Wane chinna, “Gimkapanuchi. Gapnanutanutka. Nopapkostsitkani Gita wa Yineru Wgenno samyookotka kmukochirerunemyoya. ⁴⁶ Gyotunutanutka. Gayanutka. Gi gowukatkalu nsamyokjerupa.”

Geso samyookaluru. Kashichkaluru

⁴⁷ Wa yanumsanatinawi, runatka Gota satu wa pamole gepi rixinrina. Waleymana gixolune yine kyoglolewarerune, kgagajererune. Runna

tsrukakalune sasertotene ga wa tsrunekoxasreta gajene. ⁴⁸ Wa samyok-
jera genekna saturutu gimaxiklechi. Wane china, “Girukta namlutanu
gita, Walepakni. Gkashichanru.”

⁴⁹ Rapyegitinitkalu Geso, waneklu wane chinru, “¡Rawi!” Ralukatkalu ga
wa ramlutlu.

⁵⁰ Geso wane chinru, “Nomole, ¿klu chinanu puna?”

Giyagni rapyegitluna. Geso. Kashichatkaluna. ⁵¹ Ga wa satu Gesoymalutu
koshpaklu yoglolewapre. Rustaklu sasertotene gitsrukate potu wayegreru.
Yostakjepitlu.

⁵² Giyagni Geso wane chinru, “Pumretanru pyoglolewapre. Rawyawaka
putakanru. Gi rixanu pejnuruneko yoglolewapi koschekachri, yoglo-
lewapiko ruylatiko. ⁵³ ¿Waka gkagwakluge gi numkata gagijreltu Nuru;
Walemka gitakyegitanutkano yokgipimole waragka pnute solalone gi-
towrene? ⁵⁴ ¿Seyni gi rixpoko poyagkaakotanmaka Tokanchi Yonatkaluru
wane chinachri rumkata wane gixleta?”

⁵⁵ Waneklu Geso wane chinna wa gixolune yine, “¿Ginyegitno gixa yo-
glolewiyma gagajeyma, kachowguru pixka gixa kashretnoge? Pagognem-
nunanuka gixayma ntuplanata. Nunkaklewata kpashiwakapjiya. Gi wa
wane gkashichyan. ⁵⁶ Seyni pejnuruko tyekaka wane gixkaluru poy-
agakakikolupa wa yonchi, Goyakalu tokanu geneklewatachine yonga.” Ru-
knokamtluna pejnuruneko yimaklene. Rasukatkana.

Jemanshinikankakjetikowaka tunwatinri Geso

⁵⁷ Ga wa Geso kashichachine ganiklu. Sasertotene gitsrukate potu Kayg-
wasu yegi ranikatkaluna, rapatyawakatkana yonchikgapine ga wa tsru-
⁵⁸ Wa Petro gomkagitlu gogajxigiyako. Sasertotene gitsrukapatupijipotu-
nanuko romkagitlu. Gitoko jigloka. Tuplanata towrechinezma retyaplu
rushinityawakapa.

⁵⁹ Wa tsrukakalune sasertotene, pejnuruneko jemanshinikankak-
jetikowakaya rujgaluna gipujtalewusha galikaka migje Geso chinanu
ruylajixyaplu. ⁶⁰ Gimka gepikna gipguitalewashatachine gapokachine,
seyni gi rukshikluna.

GapkatamatACHINE gepi gapoka, ⁶¹ wane chinachine, “Wale wane china,
‘Numkata jjirrolekletu kpashiwaka potu Goyakalunu, ga wa mapgogne
nkamrujitanutnaklu.’”

⁶² Palna sasertotene gitsrukate potu. Wane chinru, “¿Gike pugita? ¿Klu
rupguitatayina wa nyi?” ⁶³ Seyni Geso pochkeru.

Sasertotene gitsrukate potu wane chinru, “Goyakalu giwekachri kawchi-
nanu nkoschekjixyi. Punkakanwu, ¿Pixlege wa Kristo, Goyakalu Wgenyi?”

⁶⁴ Geso wane chinru, “Pixa chinyawaka. Seyni wane nchinyi,
Xaniyakawa gixa getanno

Gita wa Yineru Wgenno

*tuplatywakapa giyaklu potuklesretate,
nuninkoxapa kyachgapererumkoya tengogne.”*

⁶⁵ Giyagni wa sasertote gitsrukate potu suskamkata. Wane china, “Mu-
pashiregnuchi china. ¿Klu wanepnute magatyawu gipguitalewatachine?
Getanu wa xani. Gyijnakotatkalu ma mupashiregnuya. ¿Gi pixka getle
gixlu?”

⁶⁶ Rugitna. Wane chinna, “Ruklukanuwna rupnirripa.”

⁶⁷ Giyagni rutskagjegojitluna. Yotmutluna. Pimrine giptagojitlu. ⁶⁸ Wane
chinna, “Kristo, Goyakalu chinanu punkakanwu: ¿Katu giylakyi?”

Petro nutatlú Geso

⁶⁹ Malekputu tuplanata Petro. Wane tapyegityalu sato wayegrechro. Wane china, "Pixa koxa Geso Kalile gajeruymananyi."

⁷⁰ Seyni pejnuruneko getanuya nutata. Wane china, "Gi numata gikta pchina."

⁷¹ Rushpaka. Maleka gajeru gipgyaptote ya. Satu getatnaklu. Wane chinna wa wane gwanatachine, "Tye koxa Geso Nasare gajeruymananu."

⁷² Wale kawchinanu nutatnaka. Wane china, "Gi numatlu wa jeji."

⁷³ Pshinitsonu rapyegitluna wane gwanatachine. Wane chinruna Petro, "Galikakni pixa koxa wannaymananyi. Gi rixanu ptokanu pumatika wa wane pixinri."

⁷⁴ Giyagni yinuwaka kamakpiirewleta. Yinuwaka Wale kawchinanu chireta, "Gi numatlu wa jeji."

Waneklu gaxawripa yanumatatka. ⁷⁵ Rushinkaplu Petro wa Geso tokanu, wane chininri, "Ma yanumatkanuwa gaxawripa, mapa kata pnutatanno," chinyalu. Rushpakamtatka. Maleka ya. Chiyampotuta.

27

Geso Pilato yegi

¹ Goyechnokawpotuko jemanshinikankakjetikowaka jiglokna tsrukakalune sasertotene ga wa yine tsrutene Geso chinanu, wa ruylatyapluna. ² Rosttluna. Ranikatkaluna. Pilato girukotlewatachri yegi samyokluna.

Gota gipnale

³ Giyagni Gota wa samyokjero retatkalu wa ruklukanuwnayegjixikolutka, kashrijetanshikanuta. Satkaklo wa mapamoleprojti tsrukakalune sasertotene ga wa tsrune yegi. ⁴ Wane china, "Gita mukochirewatatka. Nsamyoklu muklukanuwnakatugraga."

Wa wanna wane chinru, "¿Gi rixwu wixa? Petanru pixa."

⁵ Ruknokamtlo sroschiproji kpashiwakaya. Ralimta. Rushriknojitanatkawa.

⁶ Tsrukaklune sasertotene gwalo sroschi. Wane chinna, "Ginanshichkalurni tuknokikolu wa kpashiri gignantakikowaka, gi rixanu granchi wenroni." ⁷ Jemanshinikankakna. Walaya ragjitoluna kajpa kamgakleruchijne, pnu giyakatyachine kapnatikowakapa. ⁸ Giyagni wane chinkaluru Granchichijne xanigognenanu. ⁹ Waneklu poyagkakatkalu Goyakalu tokanu geneklewatachri Geremiya wane chinyawaka: *Rawlona mapmoleprojti sroschi wa rutakwenutikolu wenru, wa pimrine Gisrayiliklopishane gitakwenutanru.* ¹⁰ *Reneklona kajpa kamgakleruchijne chinanu, Gitsrukaachi chinyawakno.*

Pilato gepomsatlu Geso

¹¹ Girukotlewatachri getanu tunwata Geso. Ga wa girukotlewatachri gepomgalu. Wane china, "¿Pixele wa Goteylene Pogiryi?"

Geso wane china, "Pixa chinyawaka."

¹² Wa jigyegitkoklunu tsrukakalune sasertoteneya ga wa tsruneya koxa, gike rugita. ¹³ Giyagni Pilato wane chinru, "¿Gi ge pjema gi pejnupiranananukta jigyegityayina Pixa?" ¹⁴ Gi satuna tokanchi rugityalu. Giyagni girukotlewatachri giglajpotuta.

Waka Geso waka Warawasu

¹⁵ Wa tsrugogneklu satu yineru rushyegjetna gostutkaluru girukokta ralukanruna. ¹⁶ Giyagni waneyananna gostutkaluru kpogiru, Warawasu giwakatletachri. ¹⁷ Giyagni rapatinitkana, Pilato wane chinna, “Giru galuka wa nkaspukyegityapgi? ¿Warawaslege waka Geso wa Kristo chinkaluru?” ¹⁸ Gi rixanu wale gimata wa ranxalna chinanu samyokluna.

¹⁹ Gitakyagoklewatikowaka tuplanatini wale, ganunro yokantokanye-gitlu. Wane chinru, “Petashatanru Wale poyagkakachri. Gi rixanu xawakni gixo nsalewna Wale chinanu nupnawleya.”

²⁰ Ga wa tsrukakalune sasertotene ga wa tsrune gishinikanutna gixolune yine wa Warawasu galikaka ragjitinripna, ga wa Geso ruylajixinripna.

²¹ Rugita girukotlewatichri. Wane china, “Giru galuka wa nyi gepi wa nkaspukyegityapgi?”

Wanna wane china, “Warawasupni.”

²² Pilato wane chinna, “Giyagni ¿gi nixyaplu Geso wa Kristo chinkaluru?”

Pejnuruneko wane china, “¡Koroshishkita gitaaikalurupa!”

²³ Girukotlewatichri wane china, “¿Klu gektutu kamruta?”

Wanepnute potu tsaplewatna. Wane chinna, “Koroshishkita gitaaikalurupni.”

²⁴ Giyagni Pilato getinri gike rumkata, seyni wanepnute galikaka rixa gejnugima, gonu koscheka. Reromyoga gixolune yine getanu. Wane china, “Muklukanuwnakatno tyegragaya. Gixa getanutkalu.”

²⁵ Pejnuruneko yine gigita. Wane chinna, “Wixa chinanupni gigragaya, ga wa wwugenene chinanupni.”

²⁶ Giyagni kaspukyegitina Pilato Warawasu. Rali kochipjetjixletinitkalu Geso, samyokatkalu koroshishkita rutakikolupa.

Geso gixpiranatkaluru solaloneya

²⁷ Giyagni girukotlewatichri solalotene ganikatkalu Geso. Tsrupji Pretyopji ranikluna. Pejnuruneko solalone gapatyegitlu. ²⁸ Giyagni Waleko gimkalu komkagatkaluna. Pakni yoshmookaluru pixkalutu mkachri yoshmakatkaluna. ²⁹ Kona kamgikaluru sagyeta yoshmakjiwitatkaluna. Kat-sluksu samyokluna, potuklemyo. Yoptsojityegitlu. Ruxpiranatluna. Wane chinruna, “¡Wuya, Goteyone pogire!” ³⁰ Rutskagjetluna. Kashich-luna katsluksu. Ruylajiwutluna. ³¹ Rali gixpiranatletinikaluna, komkagatkaluna mkachri. Waleko gimkalu yoshmakatnakluna. Ranikatkalu, koroshishkita rutakyapatkaluna.

Koroshishkita gitaaikaluru

³² Rushpakamtinitkana. Retluna Surene gajeru, Simo giwakatletachri. Wale rutijijxlona Geso koroshishkitate. ³³ Rapokluna Kolkota chinikowaka. Walenwa Gijiwuswaga yegi chinikowaka. ³⁴ Reneka giiretmakluna winga shepichlega yapjetkaluro. Retumgammalo. Gi raluka giiretlo. ³⁵ Koroshishkita rutakatkaluna. Kotspaltamkatluna. Gipenoklu rutakluna gimkalu. ³⁶ Tuplatna. Wane retanatyaluna. ³⁷ Gijiwu gogwakate rutakyaluna jigyegitimolu yonga, wane chinachri: Tyenwa Geso Goteyone Pogire.

³⁸ Giyagni Waleyma koroshishkita rutaakana gepi kachowgurune, satu potuklesreta, satu kegnetesreta. ³⁹ Wa giknogachine mupashiregnuchi chinruna. Ruwnownojiwutna. ⁴⁰ Wane chinruna, “Pixni wa kpashiwakapji jjrolekachripi, mapagogne pkamrupjitanutnaklu. Pixnanuko gognetkakinwa. Goyakalu Wgene pixinipa, koroshishkita pujrukini.”

⁴¹ Waneko pixka china gixpiranatletluna tsrukakalune sasertotene, ga wa yonchikgapine, ga wa tsrune. Wane chinna, ⁴² “Pimrine rognetworka. Wale-nanuko gi rumkata gognetkakletnawa. Goteyone Pogirmaka, koroshishkita rujrukini xani. Walixanmaklu. ⁴³ Raponshinikanutkamkalu Ruru Goy-akalu. Rushatkanpanru xani ralukiniplu. Gi rixanu wane china, ‘Goyakalu Wgenno.’” ⁴⁴ Waneko pixka rixa yangaletluna kachowgurune Waleyma koroshishkita gitaaikalune.

Geso gipnale

⁴⁵ Tumananutkani ruchpokatka tkachi psolchijneputunanuyako. Kay-inwakasreta rapokinpotunanuko rumrekatka. ⁴⁶ Kayinwakpapko Geso saplewata. Tsru plaji rixa. Wane china, “*Geloyi, Geloyi, ¿Lama sawajtani?*” Walenwa, “Noyakalute, Noyakalute, ¿klu chinanu puknokatkano?”

⁴⁷ Jeminrina pimrine wane gwanatachine, wane chinna wanna, “Pete. Wale tomgalu Giliya.”

⁴⁸ Waneklu rasukamta satu wannate. Rawlo katsopi. Kachgalu shich-ponkaklu. Katsluksu rutaklu. Reneka giiretlu. ⁴⁹ Pimrine wane china, “Getashatanru. Wetkoxewa gitka runanu Giliya rognetworkaplyaplu.”

⁵⁰ Rumepe saplewletatnaka Geso. Tsru saple rixa. Kasputatkalu ruwekinri.

Ksolaloteru gipguitale

⁵¹ Waneklutka mkachrichrata gimaletanatachri kpashiwaka gajeru giskakamtatka. Gepichratatkalu. Teno rumuyaka giskakleytyatka chijiina.

⁵² Ruyolikchijita. Sotlukaka gitspatjeta. Rutpukamta yomlechkaka. Gi gepika kpashirinni gapnanutachinnimane yotunota. ⁵³ Wa yotunotinitka Wale, waneklu yomlechi rushpakyatkana. Kpashiri pokchi yatkana. Gixolune yegi rupgujewnayeginata.

⁵⁴ Ga wa ksolaloteru ga wa waleymalune Geso girukotanatachine getlu wa gyiolikchijru, ga wa wane gixkalurkaka. Tsru piklu rixanna. Wane chinna, “Galikakni Goyakalu Wgenni wa tye.”

Koroshishkitasti gwachine sxone

⁵⁵ Wane rawanatna gixo sxone gowuka getanatyachine. Kalile romkag-ityaluna Geso. Rupxakanatluna. ⁵⁶ Wannaymana Mariya Maktala gajero, ga wa Santiyako, Gosi ginro Mariya, ga wa Sewereyo wgenene ginro.

Geso kapnatkaluru

⁵⁷ Kayi rixininitka runa satu jeji ponikolu, Garimate gajeru. Gosi gi-wakatletachri. Wa Geso yimaklerkoxni wale. ⁵⁸ Wale yayegitlu Pilato. Gesnimane ragjita. Giyagni Pilato genekjixmanetlu. ⁵⁹ Gosi gwamane-tatkalu. Powrachratalu poyitatkalu. ⁶⁰ Waleko giyomlepmaka gerotpuna rutaklu, sotlu yomlechi gipgyaptote gakanokachri. Wane yiayatka. ⁶¹ Wane rawanatna Mariya Maktala gajero, ga wa sato Mariya. Tuplanatna yomlechi ginaple.

Yomlechi girukotka

⁶² Waleprikgogne, walenwa gapnanutikalurgogne, Pilato yegi rapatyana tsrukakalune sasertotene ga wa Gwariseyone. ⁶³ Wane chinna, “Gitsrukaachi, wushiniku wa wale kyokwirewaklerni wane china, ‘Mapagogne giknoginpatka nyotunotanu.’” ⁶⁴ Giyagni pyokanrewatanu girukotay-omletikolupa mapgogne rixinpotunanuko, ma chowgutapyapluna yimak-lene goyechno, ma wane chinyanupna yine, ‘Yotunomtakta gipnachinet-skalaya.’ Gapkatatachri pupjeru muchinanu pnuute ma mixinitipa.”

⁶⁵ Pilato wane chinna, “Waneygi girukowatachine. Gajewa. Gignantakanru gimatyawaka.” ⁶⁶ Wane yatkana. Rughnantakluna yomlechi. Rupitluna sotlu, girukowatachinezmananuko.

28

Yotunre

¹ Ruknoginitka gapnanutikalurgogne, rumrerekamtinitka muchinan-gogne wa simana, wane yana Mariya Maktala gajero ga wa sato Mariya, yomlechi retapyapna.

² Waneklu waneru tsru giyolikchijru. Gi rixanu Gitsrukaachitorreru gjiruka tengogneya. Rapoka. Rakaprurutlu sotlu yomlechi gajeru. Wale gogo tuplanatatkta. ³ Rawrakle pixka rixgojita. Gimkalu klataa rixpotuta giwru pixka. ⁴ Wale piklena chinanu wa girukowatachine giypiypitana. Gipnachine pixka rixanna.

⁵ Goyakalutowreru gigita. Wane chinna suxone, “Gi mpikanu gixa. Gi rixanu numatgi Geso gjiga, wa koroshishkita gitakanatkaluru. ⁶ Gi wa gewitkalu. Yotunomtakta wa Wale chinyawaka. Ginanu. Getapanru rutakanatikowaka. ⁷ Gajewa. Nteyakawamtanu. Ginkakapanna wa yimaklene yotunomnitritka gipnachinetksalaya. Kosekatkagi. Kalile yatka. Wane getinitkalu. Nunkakatkagi.”

⁸ Giyagni wanna yomlechi teyakawamtyatkana. Pikachine ga wa gimuwatchine potu. Rasukamtna yimaklene runkakapyapna. ⁹ Makakta Gesokni wa yoptotapna. Wane chinna, “Kiglenshinikanupgi.” Rapyegitluna. Kashjxitluna. Yoptsojityegitluna. ¹⁰ Giyagni Geso wane chinna, “Gi mpikanu. Gajewa. Ginkakapanna nomolene wa Kalile yinripatkana. Wane retinnona.”

Girukowatachine ginkakle

¹¹ Wane yakopshinna, pimrine girukowatachine pokchi yatkana. Tsrukakalune sasertotene runkakapna pejnuruko retanrutkana wane gixachritka. ¹² Rapatjetna tsruneyma. Jemanshinikankakna. Gixo sroschi reneekana solalone. ¹³ Wane chinkana, “Wane nchinanu, ‘Yimaklene goyechno ginapa. Chowgutpatkaluna, wumkanatni wixni.’

¹⁴ Wale yijnakotinipa girukotlewatachri, wixa ginglepokyegitangi. Mkojwakanshinikanutkane wixkakangi.” ¹⁵ Wanna yoptotlo sroschi. Wane rixna wa runkakikowakna. Giyagni poshalpiranatka Goteyone yegi xanigognenanu.

Tsruyokanru

¹⁶ Giyagni pamole satupje yimaklene Kalile yatkana, satu magka yegi wa Geso chinyawakpotukna. ¹⁷ Retinitkaluna yoptsojityegitluna. Seyni pimrine nutanshinikanyegitlu. ¹⁸ Rapyegitinitkana Geso, ruynumsatna. Wane chinna, “Psolpotuko nutakika tengogne ga wa chiji. ¹⁹ Giyagni gyanu. Gimakanna payinemnnunanuka. Gkatanna Girchi giwakaya, ga wa Gituru giwakaya, ga wa Giwekkikaluru Kpashiri giwakaya. ²⁰ Ginkakanna kamrutyapluna pejnuruko nyokanatyagi. Gjemanu: Gixayma nwanu psolgogneko yoptukgogneshatyawakpotunanuko.”

Kiglerpotunanu Tokanchi Kpashiri Marko Yonatanru

Gwa katilewakleru

¹ Tyenwa yinuwakikolu Kiglerpotunananu Tokanchi Geso Kristopirana Goy-
akalu Wgene. ² Wane rixa yokanatkaluru Gisayiya Goyakalu tokanu genek-
lewatachri. Wane china:

*Gita yokanatlu notowreru pixa penute.
Wale galpokotanru patnugapote.*

³ Yineru mwiyawakanu sablewatyachri wane china:
Galpokotanru Gitsrukachi gatnugapote.
Mpotukatanru gigapkaka.

⁴ Gwa katilewata yineru mwiyawakanuya. Wane runkakyana yine gen-
shinikanutachinepa katinripna. Ga wa kaspukamukochiretikolupapirana
runkakna. ⁵ Rushpakyegitluna pejnuruneko Gotesreta gajene ga wa Geros-
ale gajene koxa. Wanna ptowruneko katka Gorta gapgaya. Rupgujta-
mukochiretnawana.

⁶ Wa Gwa makatlu kameyopixi. Wa pamta gipchiji rushrika. Wale niklu
tsetse ga wa wrolga gosha gajeru. ⁷ Runkaklewata. Wane china, “Runa
najxigi Gita pnu te muchkonurutu. Gi wa Gita gimukluni nyomshokinri
nkoshpirokayapl yoshmaklejixitsa. ⁸ Gita galikakni katgi gonuya. Wa Wale
katangi Giwekkikaluru Kpashiriya.”

Geso katka

⁹ Wane gixlutkani walegognekaka. Nasare Kalilechijne runyatka Geso.
Wane Gorta gapga Gwa katyalu Geso. ¹⁰ Waneklu wa gonu yotunotyatk. Retlu
gitpukachri tengogne, wa Giwekkikaluru motkoko pixka rixa, Wale
gogwaka gjirukyachri. ¹¹ Tengogne runya satu tokanchi wane chinachri,
“Pixni Noturyi nalukanruyi. Pixa gigletanshinikanutno.”

Geso yantaletka

¹² Waneklu wa Giwekkikaluru ganiklu yineru mwiyawakanu. ¹³ Wane
rawanata yineru mwiyawakanuya gepkoxamkojemolgogne. Wane rum-
lukanutyalu Satanasyo. Wane rawanata kmatsurunetskala. Goyakalu-
towrerune tengogne gajene gipxaklu.

Geso yinuwaka kamrureta

¹⁴ Waneklu kashichkolkunutka wa Gwa. Wanepnute Geso wane ya,
Kalile ya. Runkaklewata Kiglerpotunananu Tokanchi pogirewatyawakapi-
rama. ¹⁵ Wane china, “Gigogne moyagkakatka. Goyakalu pogirewatyawaka
gi gowukatkalu. Genshinikanutanu. Galixanru Kiglerpotunananu Tokanchi.”

Tomgana gepkoxamkoje yimaklene

¹⁶ Tsru wenustsi Kalile yapamta. Retlu Simo repuruyma Gantirishi,
chalugjetachine tsru wenuya, wa kshimagaklerune. ¹⁷ Wane chinna
Geso, “Ginanu gwagajxitanno. Yine gwapjetachine nixkakanutkagi.”

¹⁸ Waneklutka ruknokamtatkaluna chalnena. Romkagitatkaluna.

¹⁹ Wane rajrinya. Retlu Santiyako, Sewereyo wgene repuruyma Gwa.
Wanna koxa kanawa gwanata. Ramatluna chalkaka. ²⁰ Waneklutka
tomgana Wale. Ruknokamtlna rurna Sereweyo kanawaya kamrurewak-
leruneyma. Wane yana. Rawgajxitluna.

Rutuukaklu jeji kamchi puchotlewatachri waneyalutu

²¹ Kapernawo rapokinitkana, gapnanutikalurugognekaka jiglokjeta ginkaklewawakapji. Wane runkaklewlejetya. ²² Ruglajitna wa runkaklewleya. Gi rixanu runkakna tsru gitaaikaluru pixkako rixa. Gi wa yonchikgapine pixka rixa. ²³ Waneru runkaklewawaklepjiyna jeji wa kamchi puchotlewatachri waneyalutu. Wale siplewata. ²⁴ Wane china, “¡Ya! ¿Gi pixannatkawu Geso Nasare gajeru? ¿Puna pumtukpotutapyapwu? Numatyi Kpashiryi Goyakalunu.”

²⁵ Geso chigetjetlu. Wane china, “Pochkepyi. Pushpakanutka waleya.”

²⁶ Wa kamchi puchotlewatachri shipchojtakakanru jejni. Siplewjetana tsruplaji. Rushpakamtatka wa waleya.

²⁷ Pejnuruneko giglajita. Giyagni repomgakakna. Wane chinna, “¿Klunerni wa tye? ¿Klu gerotu ginkaklewltukani wa tye? ¡Waleni wa tsru gitaaikaluru pixka rixa! Wale yokanatna kamchine puchotlewatachine. Jemluna Wale.”

²⁸ Waneklu pogiwata psolchijneputunanuko Kalilesretaya.

Rutuukaklo Simo gimajiro

²⁹ Wanepnute rushpakamtinitkana ginkaklewawakapjiya, wanna wane yana Simo, Gantirishipji, Santiyakooma, Gwa koxa. ³⁰ Wa Simo gimajiro gik-luga. Tpachwata. Giyagni walapirana runkakluna. ³¹ Giyagni rapokinitka kosemyotlo, yotunkaklo. Tupachwalgamtatka. Wala gipxakatkana.

Gixo gitukachine

³² Wa kayi rixinitka wa rumxikinitka tkachi ranikyegitoluna pejnuruneko yayixachine, kamchichachine. ³³ Wa pejnuruneko tsru pokchi gajene gap-atjeta gipgyaptoya. ³⁴ Geso gituukakna gixo yayixachine pnumnunanuka gixachri yayixluya. Wale giknokna maleka gixo kamchine. Gi ruchi yanumsaletna kamchine, gi rixanu rumatluna.

Geso gagjigognetapa

³⁵ Yotunomta goyechnokawpotuko, ma mumrereekanuwa. Rushpakamta. Wane ya yineru mwiyawakanu. Wane ragjigognetya.

³⁶ Simo, waleymalune gjigalu. ³⁷ Rukshikluna. Wane chinruna, “Pejnuruneko gjigayi.”

³⁸ Wane chinna Geso, “Wane gayanu papokchikaka gawastsitanune yegi. Wane koxa nunkaklewatin. Wale chinanukni nuna.”

³⁹ Wane ya. Runkaklewananumta runkaklewawaklepjikakayna psoluko Kalileya. Ruknokyana maleka kamchine.

Geso gituukaklu gjirugitutachri

⁴⁰ Satu gjirgitutachri ginyegitolu. Ragjipotulu. Yoptsojityegitolu. Wane chinru, “Palukiniplu pumkata powratletno.”

⁴¹ Geso getwamonutlu. Romyokyegitolu. Kamruklu. Wane chinru, “Naluklu. Powra pixinripa.” ⁴² Waneklutka gjirgitlu gitukyegitatkalu. Powratkalu.

⁴³ Rujretlu. Yokanatatkalu. ⁴⁴ Wane chinru, “Gike punkakanu. Seyni pyanu. Sasertote pekakgitapinwa. Penekashatanru powranuya wa Moysisi yokanatanru. Walepni gipguitalewlu wanna chinanu.”

⁴⁵ Wa wale gishpakamtatka. Yinuwaka ginkakletletlu gixo. Poshalpiranamtlu. Giyagni wa Geso gi wa gimkata gapokletlu gipgujewnaleta tsru pokchiya, seyni maleka rawanata yineru mwiyawakanuya. Runyegitoluna Wale pnumnunanuka gajene.

2*Geso gituukaklu giktegachri*

¹ Gi gixogogne giknogniniwa, Kapernawo rapokatka. Yijnakyegininitka panchitkalu, ² rapatjekakna gixolune. Gi wa gipgyaptoko poyagotatka. Geso ginkakna wa tokanchi.

³ Runna. Ranikyegiltluna giktegachri. Ranikjene gepkoxamkoje. ⁴ Gi wa rumkata gapyegletluna gixo yine chinanu. Suswakluna wa washre Wale ginaple. Wane rixa kotpukleswtluna. Wane jjrukyluna gjikeko wa giktegachri giklugyawaka. ⁵ Geso getlu wanna galixle. Wane chinru giktegachri, "Wiwi, pmukochirkaka pkaspukikatka."

⁶ Wane koxa tuplanatna pimrine yonchikgapine. Wanna gishinikanuwata raijyna. ⁷ Wane chinna wanna, "¿Klu chinanu wane china yanumsaleta wa tye? Mupashiregnuchi china. Gike gimkata kaspukmukochirewleta. Satupjeru Goyakalupje."

⁸ Giyagni rumata Geso Walenanuko wane rixanshinikanutirrina. Wane china, "¿Klu chinanu wane gixanshinikanuta tyekaka wa gajiya? ⁹ ¿Girni wa myapretu potu? Wane chinikolu giktegachri, 'Wa pmukochirkaka pkaspukikatka,' ga wa wane chinikolu, 'Pyotunotanu. Pkoschekjekotanu. Pyanutka.' ¹⁰ Wa gimatyaplu wa Gita Yineru Wgenno tyechijneya gitaaikalurno kaspukmukochiretjerupno," wane chinru giktegachri, ¹¹ "Pixa wane nchina, Pyotunotanu. Pkoschekjekomtanu. Pyanutka pupji."

¹² Yotunomtatka. Waneklutka koschekjekomtatka. Rushpakamtatka pejnuruneko getanu. Giyagni pejnuruneko giglajita. Rumalwutluna Goyakalu. Wane chinna wanna, "¡Gi pagogneko wane pixkalutu weta!"

Geso tomgalu Rewi

¹³ Rumepe gishpakte. Tsru wenu yatka. Pejnruruneko yine ginyegitlu. Wale ginkaklewyegitina. ¹⁴ Ruknogamta. Retlu Rewi Galgwego wgene. Tuplanata girukotlewatachri wenutikowaka. Wane chinru, "Pomkagitanno." Palnamtatka. Romkagitatkalu.

¹⁵ Waneklu wane rawanatini Geso wa nikawakakwa Rewipji, gixna gjawenutachine ga wa kmukochirerune nikawakakwa koxa rawanatna Gesoyma, yimaklene koxa. Gi rixanu gixolunni yine. Romkagitluna.

¹⁶ Wanena yonchikgapine. Wannawa Gwariseyone koxa. Retanatluna nikeyawaka wannayma kmukochirerune ga wa gjigawenutachine. Wane chinkanna wa yimaklenni Gwariseyoneya ga wa yonchikgapineya, "¿Gi rixatka wa wannayma nika, rura, wanna gjigawenutachine ga wa kmukochirerun?"

¹⁷ Geso yijnakotlu. Wane chinna Wale, "Wa gichkolune gi galuklu kpинrewakleru, seyni yayixachine galuklu. Gi wa nuna ntomgiyapna poyagkakachine, seyni wanna kmukochirerune ntomginripni."

Gogajirewlu

¹⁸ Wa Gwa yimaklene ga wa Gwariseyonenu gogajirewata. Runna. Wane chinruna, "¿Klu chinanu wanna Gwa yimaklene wa Gwariseyone yimaklene koxa gogajirewata, ga wa Pixa yimaklene gi wa gogajirewata?"

¹⁹ Wane chinna Geso, "Gi rumkata gogajirewletna wanna kashimyolu getachine gnunrowatachri wannaymalutuwa, Gita pixka nyimakleneymano. Wa wannayma rawanatini gnunrowatachri gi rumkata gogajirewletna, xani pixka wa Gita gimwakopshinna nyimaklene. ²⁰ Runinpakta pagoge wa gnunrowatachri konikolgognepatka wannayegiya. Waneklu rogajirewatanna wanna.

Yaglu gerotu yimaklewlpurana

²¹ “Gikena gamatlu wa muchirkagakatu mkachri gitsole. Wane rixkoklunu, waleko gerotu sama suskaklu gitsole. Wanepnuteyaka rixa giskakletanatka.
²² Gikena giyokgatlu winga gerotu, tsapkaka tsrutsoleji. Wane rixkoklunu, winga suskakanru tsapkakni. Tuyokgata wino. Tsapkaka salewna. Seyni wa winga gerotu tsapa gerotu tutakgatka.”

Komlakluna gitaklugwu gapnanutikalurgogne

²³ Wane rixa. Sana yapanata gapnanutikalurgogne. Yimaklene yanananumta. Yinuwaka sustakagwuremluna gitaklugwu. ²⁴ Giyagni Gwariseyone wane chinru, “Petanu. ¿Klu chinanu wane rixna gapnanutikalurgogne wa ginanshichkalurgogne?”

²⁵ Wane chinna Geso, “¿Gi ge pagogne getyongatlu wa gi rixpokota Tawi, magatini wa nachichini wale ga wa waleymalune? ²⁶ Gi rixpoko jiglokletlu wa Goyakalupji, wa Gawayatari walenwa sasertote gitsrukapatu. Niklu jimaprokaka gekakgitkaluru. Wa walenwa ginanshichkaluru niklu. Saser-tetenepje niklu. Reneekoxna rumotsane.”

²⁷ Wane koxa chinna Geso, “Wa gapnanutikalurgogne yine chinanu kamrutka. Wa yine gi kamrutka gapnanutikalurgogne chinanu. ²⁸ Giyagni wa gapnanutikalurgogne koxa gitsrukaton Gita wa Yineru Wgenno.”

3

Rutuukaklu giprigamyotachri

¹ Jigloktnaklu ginkaklewawakapji. Waneru satu jeji giprigamyotachri.
² Giruktatluna Geso wa gapnanutikalurgogne rutuukaklewinri wa jigyegityapluna. ³ Wane chinru wa jeji giprigamyotachri, “Pyotunotanu ganikaiya.”

⁴ Wane chinatnakna Geso, “¿Girni wa gapnanutikalurgogne muklukanetu kamrutkalurupa: waka kiglerge waka gektutlege? ¿Gognetkaklurge giweklu waka giylalu?” Ga wa wanna pochke.

⁵ Reknøjtagayegitna. Jigekanuwata. Wamonuwna wa shikgaji rix-inrina. Wane chinru jeji, “Pomyokanu.” Romyoka. Ruglewamymotatka. ⁶ Rushpakantra Gwariseyone. Waneklutka Gioreyoneyma jeman-shinikankakyegitluna Wale ruylatyapluna.

Romkagimtluna gixolune yine

⁷ Geso gitspalamta. Tsru wenu ya yimakleneyma. Romkagimtluna gixolune yine Kalile gajene Gote gajene koxa, ⁸ Gerosale gajene, Gitome gajene, ga wa pasreta Gorta gajene, Tirostsi gwachine, Sitostsi gwachine, gixolune yine. Jemyegitluna gi pixkalutukota kamruta. Runyegitluna Wale. ⁹ Wane chinna Geso wa yimaklene galpokjixanukalo kanawa gixolune yine chinanu ma machpakanupluna. ¹⁰ Gi rixanu gi gepika rutuukaka. Giyagni rujirkojetna Wale gogo yayixachne pejnunanuka kamrukayapluna.

¹¹ Ga wa kamchine puchotlewatachine getinri yoptsojityegitluna. Sapel-watna. Wane chinna wanna, “Pixni wa Goyakalu Wgenyi.” ¹² Geso gjiretna gixo gi rupgujetanruna.

Tsomitna Geso pamole gepi

¹³ Kanika magka. Tomgana Wale gishinikanune. Runyegitluna. ¹⁴ Geso gitakna pamole gepi Waleyema gwachinepa, wa yokanatanunepa ginkaklewatachinepa, ¹⁵ wa kamchine maleka ruknokyapna. ¹⁶ Rutakna pamole gepi: Simo; wale rutakgiwakata Petro; ¹⁷ wa Santiyako, Sewereyo wgene;

Gwa, wa Santiyako gepuru (Giwakatna Wowanerge; walenwa rutlogle pixkalune),¹⁸ wa Gantirishi, wa Wilipi, wa Wartolo, wa Matiyo, wa Tomasu, wa Santiyako Galgweyo wgene, wa Tateyo, wa Simo Muchkopiranawat-achri;¹⁹ wa Gota Giskaryote samyokjerupa.

²⁰ Panchi rapokinitkana, rapatjetatnaka yine. Giyagni wa wanna gi gimkata nikletna. ²¹ Wa jempiranyegitluna wa Wale gimwanune. Runna kashichyapmakluna. Wane chinna wanna, “Sepronachrinatkani.”

Mupashiregnuchi Giwekikaluru Kpashiripirana

²² Gerosale yopikyana yonchikgapine. Wanna wane china wa waneylu Welsewo, wa tsru potu kamchiyima ruknokna kamchine maleka.

²³ Wa tomginitkana Geso, wane china yapkakluya, “¿Gi rixpoko maleka giknokletinwa Satanasyokakluko? ²⁴ Wa pogirewatikowaka gajene wannakluko kotspalanshinikankakmaka, gi rumkata gwagogneretna wa wale pogirewatikowaka gajene. ²⁵ Panchi gajene wannakluko kotspalanshinikankakmaka gi rumkata gwagogneretna wa wale panchi gajene. ²⁶ Wa Satanasyo yagotinmakwa walenanuko wa, kotspalanshinikanutinmakwa gi rumkata gwaleta seyni nikawnanu. ²⁷ Gike gimkata jiglokletlu gipji gichkolu, chowgutyaplu rejnunkate ma mostutkanuwalu wa gichkolu. Waneklu chowgutyalu gipji gajeru. ²⁸ Galikaka wane nchingi, kaspuukalurupni wanna yine wgenene pejnuruneko mukochirkakna, mupashiregnuchi girukokta mupashiregnuchi yanumatini. ²⁹ Seyni girukokta wa Giwekikaluru Kpashiri mupashichkatu, gike rixiniko kaspukiko seyni giklukanuwnachri mukochri gike rixiniko mnikawnakatupa.”

³⁰ Gi rixanu wanna wane china, “Waneylu kamchi puchotlewatachri.”

Geso ginro, repurune

³¹ Tuna runro, repurune koxa. Maleka rawna. Repukmakluna. ³² Wa gixolune yine ruxiplatanune wane chinruna, “Petanu. Malekna punro, pepurune. Rujgayina.”

³³ Wa Wale gigitna. Wane china, “¿Katni wa nunro, wa nepurune?”

³⁴ Retjetna ruxiplatanune. Wane china, “Getanna nunro nepurune. ³⁵ Wa girukokta kamrutlu Goyakalu galukanru, ga ga walena nepuru, nepuro, nunro.”

4

Kgitaklewakleru

¹ Rumepe yinuwaka ginkaklewleta tsru wenustsiya. Rapatjetitluna gixo potu yine. ¡Gi pejnunanukta! Giyagni ratskotatka kanawa. Wane tuplatatka tsru wenuya. Pejnuruneko yine chiji gwa, tsru wenuwnaga. ² Runkaklewyejitna Geso yapkakluya gi gepikapirana. Wane chinna Geso runkaklewleya,

³ “Gjemanu. Satu kgitaklewakleru gishpakamta rutaklewetapanu. ⁴ Wane rixa kopala jreta. Pimriji gatnugapostsi gapokajita. Runna koshichine teno yapachine. Niklokajitluna. ⁵ Pimriji sotlu gwiyawaka gapokajita mawiyawakanu potu kajpa. Waneklu rupcheknimka gi rixanu gi wa tenru kajpa. ⁶ Ga wa rushpakin tkachi jimanatkalu. Ma matskinu chinanu rupriganatka. ⁷ Pimriji kona yegi gapokajita. Tseruwna konkaka. Kapotanatkalu. Gi kajinatkalu. ⁸ Pimriji kiglewaka chiji, gapokajita. Wane jiwatya. Tseruwna. Ruxolewna. Rawa satu mapamoleji, satu patsrujirmoleji, satu satu pachaji.”

⁹ Wane chinna Geso, “Kajnakopnalu wa yijnakotinripa, yijnakotanu.”

10 Walepjé rixini repomgaluna rawastsitanune pamole gepiyima wa yapkaklupiranaya. **11** Wane chinna Geso, “Ga wa gixa geneeka gimatyaplu giyogimanatkaluru Goyakalu pogirewatyawakapirana. Wa maleka gajene ginkaaka yapkaklupjeya pejnurukopirana.

12 Retinna retanmakna, ma mumatininitipna.

Jeminna, jemanmakna, ma mumata jeminititipna, ma kashrijetikotupna, ma kaspukmukochiretkanupna.”

13 Wane chinna Geso, “*¿Gi ge gimatlú tye yapkaku? ¿Gi gixpoko gimatlutanru ptowruko yapkaku?* **14** Wa kgitaklewakleru gitaklu tokanchi. **15** Ga ga wannanwa gatnugapostsi gwachine. Rutakikna tokanchi. Wa jeminitkana waneklu runa Satanasyo. Konyanna tokanchi rajna gitaakaluru. **16** Waneko pixka rixna wa gitaakalurune sotlu gwiyawaka. Wa jeminitkaluna tokanchi waneklu yoptotluna rumuwleyna. **17** Gi wa waneyna gitskina wanna. Wa psinitsonu gwachinepá. Wa runini salewakchi, wa kojwawakchi tokanchi chinanu waneklu rutspekaakana. **18** Pimrine gitaakalune wannanwa konyegirune wa tokanchi jemachine. **19** Wa kojwakanshiniakanrukaka tyegogneya ga wa ponikolewlu yokwire ga wa getsotanrewlu pagixankakaya jigloka. Kapotlu tokanchi. Gi wa jiwanatnaka. **20** Wannanwa gitaakaluru kiglewaka chiji, wa jemachine tokanchi. Wanna yoptotlu. Jiwatna, satu mapamoleji, satu patsrujirmoleji, satu satu pachaji.”

Yochpikjetkaluro

21 Wane koxa chinna Geso, “*¿Taniikege yochpikjetkalurompuko wa gitumpuko ga wa shechimpuko tutakikolupa? ¿Gi ge katako kgapiko tutakikolupni, wa tpokamlatinripa?* **22** Gi rixanu maleshlu wa yogimatkaluru ma mupgujetikotupa. Gi wa pochkeruko mpogijetkotupni. **23** Girukokta kajnakopnalu wa yijnakotinripa, yijnakotanu.”

24 Wane koxa chinna Geso, “Xakoka gyijnakotanru. Wa yantapi gixa yantajetinro, walako yantatingina gixanuko. Gyognikyegitko gixapa. **25** Wa waneyalutu wanepnute reneeka. Waneyamigetu wane rixle konikona.”

Giji tseruwniyachri

26 Wane china Geso, “Wane rixa Goyakalu pogirewatyawaka wa satu jeji gitaklu giji chijiya. **27** Rumka, yotunota, goyechno ga wa gogi. Wa kajiruji gipcheka. Tseruwna. Gi rumata gi rixpokota. **28** Walenanuko jiwakaknawa wa chiji. Muchinanu yosnukapcheta; wanepnute gigwutka, wanepnute giji galixachri gigwuya. **29** Wa ralijitinitka waneklutka gistikapi rustajikatka gi rixanu rapokatka gipapko jirgikolupa.”

Mostasaji

30 Wane china Geso, “*¿Giru wutakanru wale pixkalutu pogirewatyawaka Goyakalu? ¿Giru yapkaku wutakanru?* **31** Wa mostasaji pixka rixa. Wa chiji rutaakoklunu walenwa mtsreru ptowruko kajiruji giyagokoluto wa chijiya. **32** Wa rali gitakletkoklunutka. Rupcheka. Tseruwna tsru potu ptowru kshana gitaakaluru pnute. Tsruplukakni. Giyagni koshichine tengogne gajene gimkata gwaleta gichiklempuko.”

33 Gixo tye pixkalutu yapkakluya Wale ginkakna tokanchi wa rumkata jemletyawakna. **34** Ga wa yapkaku migje gi wa runkakna Geso, seyni Waleko yimaklene wannapje rixini runkakpokowakatna ptowruko.

Rutuukaklu kannipgyalu

35 Wa walegogne wa kayi rixinitka wane chinna Geso, “Wakanu gayanu.”

³⁶ Wa yokanatkatkana gixolune yine. Waneklu ranikatkaluna yimaklene kanawaya. Wane koxa yana pimro kanawkaka Waleyma. ³⁷ Yopyoka tsru kannipgyalu. Tuygajetlo gishpurga kanawa. Giyagni katsepgatkalo kanawa. ³⁸ Tostsi rawananumta. Rumkananumta rutspannojreya. Komyekluna. Wane chinruna, “Yimaklewatachri, ¿gikenna rixyi wa wupniripatka?”

³⁹ Wa yotunotinitka chigetjetlu kannipgyalu. Wane chinru wa tsru wenu, “Pochke. Pushyanamatantu.” Rutuka wa kannipgyalu. Mayegixgataa rixanatka.

⁴⁰ Wa wane chinna Geso, “¿Klu chinanu mpikatka? ¿Klu chinanu gi galixgognenatawa?”

⁴¹ Pikna tsru piklu. Wane chinkakna wannakakluko, “¿Katni wa Tye? Wa kannipgyalu wa tsru wenu jemyawaklu.”

5

Geso gituukaklu kamchichachri

¹ Wakanu yana tsru wenuya Gerasenonesreta. ² Wa ruptekinitka kanawaya, waneklutka yoptotaplu satu jeji yomlechi gajeru. Kamchi puchotlewatachri waneyalatu. ³ Yomlechi yegi gwachrini wale. Gikeko gimkata gosturetatkalu, gi wa yowumatsayakoxapa. ⁴ Wa gi gepi kata wane rostutkamkatka supoya yowumatskoxaya. Wa yowumatsni rustonjemtana waleya. Wa supni tutskinjemtana. Gikena poyago gipuchkakletlu. ⁵ Psolytechnoko psolgogneko wane rixa saplewjenanumta magkaya yomlechkakaya. Rustajitnawa sotluya.

⁶ Wa retinitkalu wa Geso gowukayako rasukamta. Yoptsojityegitlu. ⁷ Saplewata. Tsruplaji rixa. Wane china, “¿Gi pixanutkano Geso, Goyakalu teno potu Gajeru Wgene? Kachingagjire nixyi Goyakalu kawchinanu, gi wa psaletpotutanno.”

⁸ Gi rixanu Geso wane chinatkalu, “Pushpakyegitanru tye jeji, kamchi puchotlewatachri.”

⁹ Geso gepomgalu, “¿Klu giwakyi?”

Rugitlu. Wane china, “Ngiwaka Gixoluru, wa gixolurunpotwu.” ¹⁰ Wa ragitlu maleka ma yokanatyaplu tyesretaya.

¹¹ Wanenanru magkasti gixoluru kochi. Nikanatna. ¹² Ragjitluna pejnuruneko kamchine. Wane chinna, “Kochi yegi pyokanatanunwu wa wanna wjiglokyapa.” ¹³ Geso gichichna. Rushpakamtatkana kamchine puchotlewatachine. Kochinni jiglokamtatkana. Gixolunni kochinni gipjita gjirukyanatka. Tsru wenu rapokanna. Wanegetskonna gepi waragka. Tsru wenu gagyekeyachinena.

¹⁴ Wanna kochi girukotachine gasukamta. Runkaklewtapna tsru pokchiya, ga wa sana gajene koxa. Runatkana retapyapluna klunerukta wane gixkaluru. ¹⁵ Runyegitluna Geso. Retluna wa kamchitpachri wa gixoluru gwanatanru. Tuplanatatkana. Kamkatkalu. Kanshinikanutkalu. Pikanna. ¹⁶ Retanatjene ginkakna gikta rixpokonatka wa kamchitpachri, wa kochinepirana. ¹⁷ Yinuwaka gagjiretluna Geso wa rushpakinripa wannahasretaya.

¹⁸ Ratskota kanawa. Wa kamchitpachri gagjitlu wa Wale yegi rawinripatka. ¹⁹ Geso gi galuka ganikletlu. Wane chingonuklu, “Pupji pyanutka pumwanune yegi. Punkakanna gikta rixpokotatkayi Gitsrukaachi. Wale punkakanna retwamonyutayi.” ²⁰ Ralimta. Yinuwaka ginkaklewletatka Ntekapoliya gikta rixpokotatkalu Geso. Pejnuruneko gimiyea.

Gayro gagjitlu rushicho chinanu

²¹ Koprugatnaka Geso kanawaya. Wakanu ya. Rapatyegitluna gixo yine. Tsru wenuwnaga rawa. ²² Runa satu wa tsru gitaaikalurune ginkaklewawakapji gajenyegiya, Gayro giwakatletachri. Retinitkalu yoptsojityegitlu Gesojixistsiya. ²³ Wane chinru, "Wuya wanepnawakla nshicho wgeneji. Petapanunro. Tupnakastsinatkani. Putakamyogogotanunro tutskalginripa. Tuwekanu."

²⁴ Geso waleymammnutka. Romkagimtluna gixolune yine. Rachpkluna.

Rutuukaklo salewnananatachro

²⁵ Sato suxo gigragalewatachrona. Pamole gepi walapu gigragalewatachrona. ²⁶ Gixo kpinrewaklerunyegimka tyanitka. Wanna chinanu tsalewna gixo. Tniklatwatanatka ptowruko walanuko tixinri. Gikena gipxakanro. Seyni taalinanumtana. ²⁷ Tjempiranyegitinitkalu Geso, tuna Wale gajxigya wa gixolune yine yegi. Tkamrukamkatlu. ²⁸ Wa wane china wala, "Nkamrukamkashatinri nutskalganu." ²⁹ Waneklutka tograga gitskikatka. Tumatnawa tomaneya tuglewatirritka wa tsalewnanatinri.

³⁰ Waneklutka Geso gimatatka Walenanuko rushpakamtyatka giyaklu. Ruprotaka wa gixolune yine yegi. Wane china, "¿Katu kamrukamkatno?"

³¹ Wane chinruna wa yimaklene, "Gi ge petna wa gixolune yine gach-pakyawakyi. Seyni wane pchina, ¿Katu kamrukno?"

³² Wale geknojtata retyaplo katukta wane gixlu. ³³ Wa suxo pika. Tutatata. Tumata wa wała gixyawaka. Tuna. Tyoptsojityegitlu Wale. Tunkaklu ptowruko galikaka. ³⁴ Wale wane chinro, "Wiwi, palixle gitskalakyi. Pyanu. Kiglenshinikanpatkayi. Kiglepatkayi wa psalewninrininanutka."

Yotunkaklo Gayro wgene gipnachro

³⁵ Yanumsatiniwa Wale, ginkaklewawakapji gitsrukatepji runyana pimrime. Wane chinna, "Pshichni tupnanatka. ¿Klu chinanu pkojwakawalu Yimaklewatachri?"

³⁶ Seyni Geso jemashatlu tye tokanchi wane chinkaluru. Wane chinru tsru gitaaikaluru ginkaklewawakapji gajeru, "Gi pumyekanu. Palixashatanu."

³⁷ Gi wa ruchichlu wa satu gininripa Wale gajxigi ga wa Petro, wa Santiyako, wa Gwa, repuru wa Santiyako ³⁸ Wane ya gipijiya ginkaklewawakapji gitsrukate. Retlu sejrechi, chiyagatachine, saplewjetputachine. ³⁹ Jiglokamta. Wane chinna Geso, "¿Klu chinanu nsejrewna nchiyaganat? Wa mturo gi tupna seyni tumkanata."

⁴⁰ Ruxpiranatluna. Wale maleka giknokna pejnuruneko. Ranikna wa mturni giru ga wa tunro, ga wa Waleymalune koxa. Jigloka mturni gwiyawaka. ⁴¹ Ga wa kosemyotinitkalu mturni, wane chinro, "Talita komi." Walenwa yokaakaluru: "Mturo, pixa wane nchinyi, pyotunotanu."

⁴² Waneklutka mturo yotunotatka. Tyanatka, gi rixanu waneyatkalo pamole gepi walapu. Waneklutka ruglajitna. Tsru giglajru rixna. ⁴³ Wale gjiretna gikena gimatanru. Wane china teneeko tnikanru.

6

Geso ginkaklewata Nasareya

¹ Rushpakamta waneya. Rapoka gichijne. Romkagitluna yimaklene. ² Rapokinikta, gapnanutikalurgogne yinuwaka ginkaklewleta wa ginkaklewawakapjiya. Gi gepika yijnakotlu. Ruglajitna. Wanna wane china, "¿Ginaka rumatyalu Wale tyekaka? ¿Klu gimatkalewlunwa tye renekikolu wa Wale?"

¿Gi pixkalutunanni ruyaklekaka kamrutkalurni gemyoya? ³ ¿Gi ge kyosokoklerukni tye, wa Mariya wgene, wanna Gosi, wa Gota, Simo wanna yegwaklu? ¿Gi wa gewna wixayma repurone?” Wale rutspenshinikanutanya.

⁴ Wa Geso wane china, “Goyakalu tokanu geneklewatachine kagwakpiratkalunni, seyni gichijnepjeya, ga wa gimolenyegisretaya, ga wa gipjiya mkagwakpiratkotni.” ⁵ Gi wa rumkata kamruretlu waneya wa satu ruyakleya. Rutuukakna psotsotajiko yayixachine, walepje. Wanna gogo rutakamyota. ⁶ Ruglajita wa ma malixleyna. Sajrukamta papokchikaka walesreta. Runkaklewata.

Yokanatna pamole gepi

⁷ Tomgana Geso wa pamole gepi. Wa yinuwaka yokanretna gepkaka. Tsru rutakna wa kamchine puchotlewatachine chinanu.

⁸ Yokanatatkana gikena ranikanna wa gatnugapoya, satupjeru kanojerna; gi wa nikanruna, gi wa tsapako, gi wa sroschiko tsapaneyna. ⁹ Wa rutakanrona yoshmakjixrechishpatapje. Gi wa gepimkalu rutakanna. ¹⁰ Wane chinna Wale, “Ginakakokta gjiglokanu satu panchi, wanepji gwanu gishpakamtinpotonanuko waneya. ¹¹ Wa pejnuruneko wa gma yoptojetjene, gma jemjenepa, gishpakamtinpatka wa waneya giplokjiximtanu gistapjix-ipagi wa rumatikolupa wanna chinanu.”

¹² Rushpakamtatkana. Runkaklewata wa yine geshinikanutanu.

¹³ Gixo kamchine maleka ruknokna. Ruyookana ringi gixo yayixachine. Rutukna.

Gwa katlewatachri gipnale

¹⁴ Pogirchi Girore jemyegitlu. Gi rixanu rumatkatka Geso giwaka. Wane china, “Gwa wa katlewatachri yotunota gipnachineya. Giyagni kgiyaklewaklerni Wale.”

¹⁵ Pimrine wane china, “Giliyni.”

Pimrine wane china, “Goyakalu tokanu geneklewatachrini. Satu tokanchi geneklewatachri pixka rixa.”

¹⁶ Jeminitka Girore wane china, “Gwakni wale wa nustaknoojixanru. Yotunotatka.”

¹⁷ Gi rixanu muchikawako Girore towyegetanru. Kashijixlu Gwani. Ros-tujixlu wa yoshmakwaka wa Giroryana chinanu repuru gnunro Wilipi. Wa wala ganunrota Girore. ¹⁸ Gi rixanu wa Gwa wane chinatkalu Girore, “Ginananshichkalurni wa pepuru gnunro waneyyi pixinri.” ¹⁹ Giyagni Giroryana gayegixlu. Taluka gylajixletlu. Gi tumkatlu. ²⁰ Gi rixanu wa Girore piklu wa Gwa. Rumatlu wa wale jeji poyagkakachrini wa kpashirni. Girukotlu. Giyagni jeminri gi rumatanshinikanuta. Yijnakotlu rumuwleya.

²¹ Runa pagogne ruglepotkaptini wa Girore wa poyagkakawalaputetini. Meyiwlu nachnewlupa kamruta wa tsrukakalune, tsru gitaaikalune, wa wanna potu Kalile gajene chinanu. ²² Tjiglokamta Giroryana nshicho. Tansata. Tmeyitlu Girore ga wa waleyma gwanatachine nikawakakwa. Pogirchi wane chinro makloji, “Pagjitanno klunerukokta paluka. Gita genekanyi.”

²³ Wale kawchinau wane chinro, “Pagiitanru pejnunanuka nenekanyi. Ganikajiko npogirewatyawakaya nenekanyi.”

²⁴ Tushpakamta wala. Wane chinro tunro, “¿Klu nagjitanu?”

Wala wane china, “Wa Gwa katlewatachrijiwu pagjitanu.”

²⁵ Waneklutka giyampotu tjiglokyegitlu pogirchi. Tagjitu. Wane chinru, “Naluklu xawakniko, penekyapno satu kotajipi Gwa Katlewakleruiwu.”

²⁶ Wa pogirchi wamonuwnapotuta, seyni Wale kawchinanu chinrekaka, waleyma gwanatachaine nikawakakwaya chinanu, gi raluka giknokakle-tokanata. ²⁷ Waneklutka pogirchi yokanatlu satu girukotjeru. Yokanatlu ranikjiwitukolupa. Wa wale wane ya. Rustaknojitu yoshmakawakaya.

²⁸ Ranikjiwutatkalu kotajipiya. Reneklo makloji. Wa makloji geneklo tunro.

²⁹ Jeminitkana wa yimaklene, runna. Ranikluna gimane. Yomlechi rutakluna.

Yokanatanune satoka

³⁰ Yokanatanune rapatjetna Geso yegi. Runkaklewyegitluna ptowruko klunerukta kamrutanrunapirana, wa runkaklewtapinrina. ³¹ Geso wane china, “Ginanu gixa mkoje yineru mwiyawakanuya. Gapnanutanu pshinit-sunu.”

Gi rixanu gi gepikna wane ginachine yachine. Gi wa kagognena nikin-ripna.

³² Ralimtna wanna mkoje sato kanawaya yineru mwiyawakanu. ³³ Gixo geta yaletna. Rumatkana. Wane rasukyegitluna chijya ptowruko tsru pokchikaka gajene. Wanna gapka gapoka. Rapatyegitluna Geso.

³⁴ Ruptekamta Geso. Retna gixolune yine. Retwamonutna gi rixanu gowe-gane pixka rixna gi waneyna girukotjerna. Yinuwaka ginkaklewyegitna gixopirana.

Roglutna pamyo waragkalune yine

³⁵ Wa kayi rixinitka yimaklene gapyegitlu. Wane chinna, “Gewni yineru mwiyawakanu. Wa kayitkani. ³⁶ Pyokanatanna yine wa sana yinripna, wa pokchikaka tyesretaya wa ragjityapluna nikanrupna.”

³⁷ Rugita Wale. Wane china, “Gixa genekanna nikanropna.”

Wane chinruna, “¿Wanerge gayanu? ¿Wagitanro jimapro gepi pachproji wenroloto, wenekyapna nikanropna?”

³⁸ Wale wane china, “¿Gi pejnu jimapro waneygi? Getapanro.”

Rumatinikana. Wane chinna wanna, “Pamyo. Gepi shima.”

³⁹ Towutna wanna tuplatinripna pejnuruneko paplogkaka peklomta poleru. ⁴⁰ Tuplatna paplogkaka satu pachkaka ga wa pamyomolkaka koxa.

⁴¹ Geso kashichlo pamyo jimapro ga wa gepi shima. Tengogne yigata. Ruglenshinikanegitlu. Wa jiknajrotlu jimapro. Renekna yimaklene rutspamtinripna. Raneksatkana wa pejnuruneko wa gepiroto shima koxa.

⁴² Nikatkana pejnuruneko. Jinanutkana. ⁴³ Koschekluna psojkaka pamole gepi kojita katsepo, ga wa shima koxa. ⁴⁴ Wa nikachine pamyo waragka jejine.

Gonu gogote yanamtyawaka Geso

⁴⁵ Waneklutka kanawa ratskojixatkana yimaklene wa Wetsayta gapka yinripna wakanu. Wane yakopshinna yokanatna gixolune yine. ⁴⁶ Rali gingaletinitkana wane ya magka. Ragiigognetapa.

⁴⁷ Wa kayi rixinitka wa kanawa ganikajgatkalo tsru wenuya. Walepje chiji gwatka. ⁴⁸ Retna kegeknanuwatna ranikgatyawakna. Wa kannipgyalyu satkakanna. Wa goyechnokawpotuko Geso ginyegitna. Tsru wenumta yapananumta. Raluka giknoglemtna. ⁴⁹ Retinitkaluna wa tsru wenumta yanamtyawaka. Kagwakluna pagixanu. Saplewatanna.

⁵⁰ Gi rixanu pejnuruneko getu. Rumyekanna. Waneklutka Geso giynumatna. Wane china, “Kiglenshinikanupgi. Gitni. Gi wa mpikanu.”

⁵¹ Ratskota kanawa wanna yegi. Rutukamta kannipgyalu. Ruglajpotutanna. ⁵² Gi rixanu gi rumata jemluna wa jimaprokakpirana. Shikowgajitna wane rixinrina.

Rutuukaklewata Genesareya

⁵³ Wa koprugatinitkana, wane yana Genesarchijne. Rutspakatkana. ⁵⁴ Ruptekinitkana wa kanawaya, waneklutka rumatkatka Geso. ⁵⁵ Rasuktatna psoluko walesretaya. Yinuwaka gwapletkana pnumnu gajene yayixachine gijkeyna ginakakta jemyegityawakluna. ⁵⁶ Ginakakokta rapoka pokchikaka, tsru pokchikaka, sana, rutaakana giputkaka yayixachine. Ragjiluna wa kamrukashatyapluna gimkaluptostsiya. Wa pejnuruneko wa kamrukachine wanna gitskalgatka.

7

Puchotlewatachrikaka

¹ Rapatyegitluna Gwariseyone, pimrine koxa yonchikgapine wa Gerosale gyakatyachine. ² Wanna getinna wa pimrine Wale yimaklene nikyawakna gimiyoyna gimuteru, walenna merkakotu yangakanna. ³ (Wa Gwariseyone, pejnuruneko Gote gajene waneyna giykolu rutsrukateynina wa gixo kata ma meromyogkanna ma merkakanotkanna gi wa nikanna. ⁴ Giputu ruyakatyana ma powratkannuwana gi nikanna. Gixo pimripirana wa yoptotanruna kamrutanruna, wa gerikaluro wa girapkaka, gashgajkaka, yowumaswagkaka.)

⁵ Repomgaluna Gwariseyone ga wa yonchikgapine, “¿Klu chinanu wa pyimaklene gi wa wane rixna wa gitsrukaachinni giykole, seyni nikna wa gimiyoyna gimuteru?”

⁶ Geso wane china, “Sanowashatachingi. Goyakalu tokanu kigle reneklewata Gisayiya gixapirana. Wane rixa yonatkaluru:

*Nyi yine gispunya kagwakpiratno
seyni rajyna wajra yanna Gitaya.*

⁷ Magijeru yonogleyegitnona.

*Runkaklewata wa Goyakalu tokanu pixkalutu
wa yokanrekakna wa yine.*

⁸ Wa gixa giknoklu Goyakalu yokanatanru tokanchi. Waneygi wa yine giykole.”

⁹ Wane chinkoxna Geso, “Kigle giknokle gixlu wa Goyakalu yokanatanru tokanchi wa gomkagityaplu wa gixako giykole. ¹⁰ Wa Moysisi wane china, ‘*Pkagwakpiratanru puru punro.*’ Wane koxa china, ‘*Girukta gogimtukaku ruru, runro walepni wa gipnanu.*’ ¹¹ Ga wa gixa wane china, ‘Wa satu jeji wane chininri wa ruru ga wa runro, “*Ptowruko gitanu wa wale gipxakyapmakyi, korwani*” ’ (Walenna genekashlu Goyakalunupa). ¹² Gixa gi gichichanutkalu pagixanu kamrutinripa ruru, runro chinanu. ¹³ Gixa kaspuklu wa Goyakalu tokanu wa giykole chinanu wa gixako genekanru. Gixo wale pixkalutu gkmruta.”

¹⁴ Wa tomgatnakna gixolune yine. Wane chinna Geso, “Gyijnakotanno pejnurunekgi. Gimata jemanu. ¹⁵ Gike wane wa yineru malekate wa jiglokinripa rumkata puchotleyaplu, seyni wa yineruyako gishpakyachri walenna puchotlu wa yineru. ¹⁶ Girukokta kajnakopnapa wa yijnakotinripa, yijnakotanu.”

¹⁷ Rutspalamtinitka wa gixolune yine yegi, jiglokinitka panchi, repomgaluna yimaklene wa yapkaklupiranaya. ¹⁸ Wane chinna Geso, “Gixa koxa

wane gixa mumatjemkangi? „Gi ge gimata jemu wa pejnuruko maleka gwachri wa jigloklu yineru gi rumkata puchotletlu? ¹⁹ Gi rixanu gi wa jigloklu wa raji seyni ginanwakapje. Rushpaka gichkajetyawaka.” Wale powratlu ptowruko niikaluru.

²⁰ Wane china, “Wa yineruya gishpakyachri, ga ga walena puchotlu yineru. ²¹ Wa gitoko rajiyina yine rushpakya gektutu shinikanchi, gi-mopatlewlu, gapoklewlu, giylalewlu, ²² chowguchkaka, gimkapnuglu, muglenchi, yokwikaklu, mpogijpatnuchi, sotanugnuchiyyale, mupashiregnuchi, tserpiranawlu walenanuko, sepronchi. ²³ Ptowruko wa tye muglenchi gishpaka gitokoya. Ga ga walena puchotlu yineru.”

²⁴ Wane yiyatka Geso. Tirosreta ga wa Sitoya yatka. Jiglokamta panchi. Wale galuklu gike ma mumatanupa, seyni gi rumkata yogimleta.

Suxo Sirogwenisanemole

²⁵ Seyni waneklutka tjemyegitlu sato suxo. Tshicho wgenejni waneyanro kamchi puchotlewatachri. Tuna. Tyoptsojityegitlu gjixistsi. ²⁶ Wa suxni Kriyko, Sirogwenisanemole. Tagjitlu ruknokyaplu maleka kamchi tshichoya.

²⁷ Geso wane chinro, “Petashgapkatanna jinanu rixinripna yine wgenene. Gi kigleru kashichikolupa wa nikanruna wgenchine, ruknokikolupa kewene yegi.”

²⁸ Tugitlu wala. Wane chinru, “Gigi, Gitsrukaachi, seyni wa wanna keweneko nikawakakwa rapukote nikyaluna wa mturune gipopejre.”

²⁹ Wale wane chinro, “Tye tokanchi chinanu pyanutka. Wa kamchi gishpakyatkalo wa pshicho.”

³⁰ Talimta topji. Tetamtatkalo tshicho tukluginatata tojeko, wa kamchi gishpakyatkalo.

Rutuukaklu majnakotu myanumatkatu

³¹ Wane yiyatnaka wa Tirosretaya. Sito yapamta. Tsru wenu Kalile ya, Ntekapoli ganikajite. ³² Ranikyegitluna satu majnakotu, myanumatkatu. Ragjitluna rutakamyogogotyaplu.

³³ Geso ganiklu yine mwiyawakanu Walepje. Yoshmakamyojita gjnakopnakakaya. Rutskagata. Kamrukannutlu. ³⁴ Tengogne yigata. Kosennipgyapotuta. Wane chinru, “Geggwata.” (Walenwa: Putpukanu.) ³⁵ Rutrukajnakopnatatka. Waneklutka rushpirokatka wa kashinatjeru wa ginnu. Yanumpotutatka.

³⁶ Yukanatatkana Geso gikena runkakanna, seyni gixkatzmaka wane china wanepnuteko runkaklewamtna. ³⁷ Tsru giglajru rixna. Wane chinna wanna, “Kiglepotlu ptowruko kamruta. Jemkakna majnakone. Wa myanumatkane yanumkaka.”

8

Roglutna gepkoxamkoje waragkane yine

¹ Wa walegognekaka wanetnakna gixolune yine. Gi wa waneyanna nikanruna. Geso tomgana yimaklene. Wane chinna, ² “Netwamonutna gixolune yine, gi rixanu waneyatkana mapgogne Gitayma. Maleshayna nikanruna.

³ Wa nyokanatinnatkana ma niikkanna wa gipjina, rujxipakgopotanunna. Wa pimrinni gowuka giyakatyana.”

⁴ Rigitluna yimaklene, “¿Ginaka giyakatyachro jimapro wa satu gimkata ginanuwkakletanunna gewi yineru mwiyawakanuya?”

⁵ Geso gepomgana. Wane chinna, “¿Gi pejnu jimapro waneygi?”

Wanna wane china, “Payokgipre.”

⁶ Yukanatna wa gixolune yine tuplatinripna chiji. Kashichlu wa payokgiprerutu jimapro. Poyagnutatka. Jiknajrotlu. Wa renekna yimaklene rutspamtinripna. Reneksatna gixolune yine. ⁷ Waneyna psotsotaji shima wgenkaka. Wale giglenshinikanyeigitlo. Wa yukanatna rutspamtinripna. Rutspamtina gixolune yine yegi. ⁸ Nikatkana. Jinanna. Koschekluna wa gixetachri psojkaka payokgipre kojitala. ⁹ Wanegetskona gepkoxamkoje waragka yine. Yukanatatkana. ¹⁰ Waneklutka ratskota wa kanawa yimakleneyma. Wane ya Talmanutasreta.

Gisekachri Gwariseyonenu

¹¹ Runna Gwariseyone. Yinuwaka yoaptopiiretluna. Rujgaluna Waleya getkaluru tengogne gajeru. Yantaletluna. ¹² Wamonuwnalenshinikanuya kosennipgyapputa. Wane china, “*¿Klu chinanu rujgaluna getkaluru tye gimuweekakgognenatachinen?*” Galikaka wane nchingi, gi wa reneekona getkaluru tye gimuweekakgognenatachinen.”

¹³ Kaspukatkana. Kanawa ratskotatnaka. Wakanu ya.

¹⁴ Ramtaka gwalemntluna nikanruna. Maleshayna. Satupje jimapro waneyna wa kanawa. ¹⁵ Yukanatna Geso. Wane china, “Xako. Ggirukotinwa wa gisekachriya wa Gwariseyonenu, wa gisekachri koxa Girorenenu.”

¹⁶ Yoaptopirkakna wannakakluko. Wane chinkakna, “Jimapro maleshaywu.”

¹⁷ Geso gimatl. Wane chinna Wale, “*¿Klu gyoaptopirkakya wa maleshaygi jimapro? ¿Gi ge gishinikanuwatawa? ¿Gi ge gimata jemanatawa? ¿Waneygi shikolu gaji?*” ¹⁸ Kaygalmakgi *¿gi ge geta?* Kajnakmakgi *¿gi ge gjema?* *¿Gi ge gishinika?* Wa njiknajrotinitkalu pamyo jimapro wa pamyo waragkaneya *¿gi pejnu kojita katsepo wa psojkaka gkoschekyatkalu gixa?*”

¹⁹ Wanna wane chinru, “Pamole gepi kojita.”

²⁰ “Wa payokgipre jimapro wa gepkoxamkoje waragkaneya *¿gi pejnu kojita katsepo wa psojkaka gkoschekyatkalu gixa?*”

Wanna wane china, “Payokgipre kojita.”

²¹ Wane chinna Geso, “*¿Gi ge gimata jemawalu?*”

Retkaku maygaletu Wetsaytaya

²² Rapokna Wetsayta. Rawapluna Wale yegi satu maygaletu. Ragitluna kamrukyaplu. ²³ Geso kanjimtlu wa maygaletu. Raniklu pokchi kegnetyea. Gitskaga sagaygaletlu. Rogwaka rutakamyoyeigitlu. Repomgalu, “*¿Gi ge petlu pa gixanu?*”

²⁴ Rumrekgata. Wane china, “Netna yine, wa yanachine wa gagmuna pixka gixachine neta.”

²⁵ Rumepe gitakamyoyegetatnaku wa giygale. Waneklu retatka. Ruglewatatka. Retashpotutatka gowuka ptowruputoko. ²⁶ Geso yukanatatkalu gipji. Wane chinru, “Gi wa pokchiko pyanu.”

Petro gipgujetlu

²⁷ Yatkana Geso wa yimakleneyma. Pokchikaka ya Susari Wiliponu yegi. Wa gatnugapoya repomgiyna wa yimaklene. Wane chinna Wale, “Wa yine *¿kutu wane chinna Gita nixinri?*”

²⁸ Wanna gigitlu. Wane chinruna, “‘Gwa Katlewakleru;’ pimrine, ‘Giliya;’ pimrine, ‘Satu Goyakalu tokanu geneklewatachinen.’”

²⁹ Wa Wale gepomgana, “*¿Ga wa gixa katu wane chinno?*”

Rugita Petro. Wane chinru, “Pixni Kristoyi.”

30 Rujretna ma yanumsatinitipna Walepirana gikena.

Geso ginkakna ma mapookanuwa rupniripa

31 Yinuwaka ginkakletna wa Yineru Wgene salewninripa gixo, ma yop-totikotupa tsruneya, tsrukakalune sasertoteneya, ga wa yonchikgapineya. Ruylatikolupa. Yotunotanu mapgogne chininri. Wane chinru tye tokanchi gipgugjetkaluru. **32** Wa Petro ganiklu. Yinuwaka chigetjeretlu. **33** Geso giprotakyegitna. Retjetna yimaklene. Chigetjethu Petro. Wane chinru, "Najxigi pyanutka, Satanasyo. Gi rixanu gi pushiniklu wa Goyakalupirana, seyni wa yinepirana galikaka pushinika."

34 Tomgana Geso wa gixolune yine yimakleneyma. Wane china, "Katukokta galuka gwagajxigleto raalixinwa walenanuko. Rawanro koro-shishkitate. Romkagitanno. **35** Girukokta galuka gishatkapletlu wa ruwekinri, ruwekinri ramginina. Girukokta gamtakanru ruwekinri Gita chinanu, Kiglerpotunanu Tokanchi chinanu, rushatkapanru ruwekinri. **36** Gi rixanu Ɂklu kigleyanaplu wa yinerupni psolchijnekmaka waneyap-maklu wane rixle, seyni ruwekinri ramgapotutinina? **37** Gi rixanu Ɂklu rupekotanru yineru ruwekinripa? **38** Katukokta gipatewatanno ga wa ntokanuya koxa wa nyi gimuweekakgognenatachine yegi, kgimopatak-lerune ga wa kmukochirerunni, Gita wa Yineru Wgenno koxa gipate-watanru wale, wa nuninipa Nuru goyaknuya, wanna kpashirine Goyakalu-towrerune tengogne gajene numuninipa."

9

1 Wane chinkoxna Geso, "Galikaka wane nchingi, pimrine gewi gwa-chine gi wa getumganru gipnalu ma metkanuwalunachi Goyakalu pogire-watyawaka ginachripa giyakluyma."

Satuko kogetkogatka

2 Patsrujirgogne rixinri, Geso ganikna Petro, Santiyako, Gwa. Ranikna wannapje satu magka tenolu. Wanna getanu satuko kogetkogatka. **3** Ga wa gimkalu yochigatatkla klatpotlu. Wa giwru pixka rixa. Giyagni gi satuna kgerkakleru tye chiji gwachri gimkata klataa gixkakletlu tye pixka. **4** Wanna yegi rupgugewiyna Giliya ga wa Moysisi, Geso giynumsatachine.

5 Petro, wane chinru Geso, "Yimaklewatachri, poyagnu gewi gawinri. Gewi wkamrutanru mapa gimajechri. Pixanupa satu, Moysisinupa satu, wa Giliyanupa satu." **6** Gi rumata yanumatana, ga wa pikanna.

7 Runa kyachgapererumko. Wale chikletyegitna. Waneylu tokanchi kyachgapererumkoya, wane chinachri, "Tyenwa Noturu nalukanru. Wale giyjnaktanu."

8 Pshinitsonu potu retanatinna, gikena retatkana wannayma. Gesop-jetkani.

9 Magka yopikyatana. Yokenatna Geso gike runkakinripna wa reta-runna, ma yotunotkanuwa wa Yineru Wgene gipnachineya. **10** Rushinikluna wa tokanu. Rugjekakna wannakakluko, "ɁKlunerni wa tye, wa gip-nachinyegiya yotunotini?"

11 Repomgaluna. Wane chinruna, "ɁKlunerni wa yonchikgapine chinanru wa Giliya gapkamka ginanu?"

12 Rigitna Wale. Wane china, "Giliya galikakni rungapkatanu rugleyaplus ptowruko. Gi chinpiranata koxa wa yonchi wa Gita Yineru Wgenno gixo nsalewninripa, ga wa gi nkagwakpiratko? **13** Seyni wane nchingi Giliya ginpatka. Wane rixluna klunerukcta ralukyawakna chinyawaka yonchi walepirana."

Ruknookamchitetlu mturu

¹⁴ Runinitkana wa yimaklene yegi. Retna gixolune yine wanna yegi. Wa yonchikgapine yoptopiratna wanna. ¹⁵ Waneklutka pejnuruneko gixolune yine getlu. Ruglajitna. Rasukyegitluna. Ralukluna.

¹⁶ Geso gepomgana, “¿Klu gyoptopiratyana wanna?”

¹⁷ Gixolune satute gitigilu. Wane china, “Yimaklewatachri, nanikyegityi noturu. Waneyanru kamchi myanumatkatu rixkakjero. ¹⁸ Ginakakokta kashichyanru shipchojtakakjetanru. Solowanamjetana. Raskereygitana. Ruprigananumtana. Wane nchinna pyimaklene ruknokyapluna maleka, seyni gi rumkatluna.”

¹⁹ Rugita. Wane chinna Wale, “¡Ya nyi gimuweekakgognenatachine malixkane! ¿Gi pejnugognenanukta numwanutkagi? ¿Gi pejnugognenanukta nakotangi? Ganikyegitanno.”

²⁰ Ranikyegitluna. Retinitkalu waneklutka wa kamchi shipchojtakakpotutanru mturni. Chiji rapokamtana. Ruprurutana. Rushpaksolnamatana.

²¹ Geso gepomgalu ruru, “¿Gipshini wane gixlenatkalu?”

Wale wane china, “Mturuyakawa rixin. ²² Gixo kata ruknoklu xirnachri, wa gonga koxa ruylataypmaklu, seyni pumkatiniplu pupxakanunwu. Pet-wamonutanunwu.”

²³ Geso wane chinru, “Pumkata galixletinipa, ptowruko gimkata gixkota wa galixachri chinanu.”

²⁴ Waneklutka mturu giru saplewata. Wane china, “Nalixa. Pupxakanno nma malixlenuya.”

²⁵ Geso getna gixolune yine. Rasukamtana. Potowurutna. Chigetjetlu kamchi. Wane chinru, “Kamchi myanumatkatu majnakotu, Gita yokanatyi pushpakyegitanru wale. Gi wanepnuteko pjiglokanutkalu.”

²⁶ Saplewatana. Shipchojtakakpotutanru mturni. Rushpakamtatka. Walenitka gipnachri pixka rixanatka. Giyagni gixo wane china, “Rupnanatka.” ²⁷ Seyni Geso kosemyotlu. Tunwakaklu. Yotunota.

²⁸ Wa jiglokinitka wa panchi yimaklene gepomgalu wannapje rixin, “¿Klu chinanu wixa gi wumkata giknokletlu maleka?”

²⁹ Wane chinna Geso, “Wa tye pixkalutu gi gimkata gishpakleta seyni gagjigognerupjeya.”

Geso ginkakna ma mapookanuwa rupninripa

³⁰ Wa rushpkinitkana waneya, Kalile yapamtna. Gi raluka gimatkota.

³¹ Wa runkaklewyegitna Geso yimaklene. Wane chinna, “Gita wa Yineru Wgenno samyookalurupno yinemoyoya. Ruylatannon. Nupnanu. Nyotunatanu mapgogne rixinri.” ³² Seyni wanna gi gimata jemu wa tokanu. Pika gepomgaletluna.

Yoptopirkakna katni wa tsru potu

³³ Rapokna Kapernawo. Panchi rawinitka, Geso gepomgana, “¿Klu gyoptopirkakananumtya gatnugapoya?”

³⁴ Wa pochkena. Wannakakluko yoptopirkakananumtna wa gatnugapoya katni wá tsru potu.

³⁵ Tuplata Geso. Tomgana pamole gepi. Wane chinna Wale, “Girukokta galuka muchinanu gixleta, walepni wa gapkatpotutachri pejnuruneyapa. Pejnuruneko gipxakjetachrinapi.”

³⁶ Koscheklu mturu. Wanna ganikajite rutaklu. Kampuklu. Wane chinna Wale, ³⁷ “Girukta yoptotlu satu tye pixkalutu mturu Gita giwakaya, Gita yoptota. Girukta yoptofno, gi Gita yoptota seyni wa nyokanatjeru galikaka.”

Geso gjiretlu Gwa kamrutanru

³⁸ Wane chinru Gwa, “Yimaklewatachri, wetlu satu wa pgiwakaya ruknokyana maleka kamchine. Wale gi gomkagitusu. Wujrethu gi rixanu gi romkagitusu.”

³⁹ Geso wane china, “Gi wa gjiretanru. Wa gikena wane gixa giyakleta ngiwakaya wa rumkata pshinitsonu gektuchinretnu. ⁴⁰ Wa wma kamnixjetni wixasretni wale. ⁴¹ Girukokta genekangi sato girapistonoya gonu ngiwakaya gi rixanu Kristonungi, galikaka wane nchingi gi ramgini wenu tikolupa.

Gitspeekaklu

⁴² “Girukokta gitspeekaklu wa satu wa nyi mturune wa nalixjene Gita, kiglemkalu waleya rushriknojitikolupa wa tsru sotlu ginripiya, tsru wenu ruknokikolupa. ⁴³ Wa pumyo gitspeekakinipyi pustakanru. Kigleyyi wa pjiglokinripa wa puwekinri mastsi, wanepnute gepimyozi pixinipa wane pyanuna Gigena wa xirnachri muwnakatupa. ⁴⁴ Wanna tsomne ma mupniyawaka. Wa xirnachri gike rixini ruwnanu. ⁴⁵ Wa pujixi gitspeekakinipyi, pustakanru. Kigleyyi wa pjiglokinripa wa puwekinri yokmatachriyi, wanepnute gepijixyi pixinipa puknookona Gigena wa xirnachri muwnakatupa. ⁴⁶ Wanna tsomne ma mupniyawaka. Wa xirnachri gike rixini ruwnanu. ⁴⁷ Wa puygale gitspeekakinipyi, puknokanru. Kigleyyi wa pjiglokinripa Goyakalu pogirewat�awaka paygalepjeya wanepnute gepiygaleyi pixinipa puknookona Gigena. ⁴⁸ Wanna tsomne ma mupniyawaka. Wa xirnachri gike rixini ruwnanu.

⁴⁹ “Wa pejnuruneko tuwutkalurupa xirnachriya. ⁵⁰ Kiglerni wa tuwu, seyni wa tuwu mushi rixininitka չklu gmorotanu? Waneyapgi gixnanuko tuwu. Kigle gimwakaklepgi.”

10

Giknokagnunrolu

¹ Wane yiayatka. Gotesreta ya, Gorta wakanute. Rapatyegitatnakluna gixolune yine. Rumepe ginkaklewyegitatnakna wa rixjetyawaka.

² Rapyegitluna Gwarisseyone. Repomgaluna wa muklukanutlege giknokagnunrolu wa gnurchi. Rumlukanatluna. ³ Wale gigitna. Wane china, “Հկոյանութիւն Մօյսիսի՞”

⁴ Wane chinruna, “Moysisi gichichlu kiruka yonatyapa ma ganunrotyanpatkalo. Ruknokanrotka.”

⁵ Wane chinna Geso, “Nshiknu gaji chinanu yonyegitgi wa tye Tokanchi Yakanatkaluru. ⁶ Seyni yinuwakyawaka giyaklewlu, jeji, suxo kamrutanra Goyakalu. ⁷ Giyagni jeji giknokanna ruru, runro. Rupxaletanrotkani ganunro. ⁸ Wa gepinanna pamanepje rixanutkana. Giyagni gi gepimanetkana, seyni pamanepjetkana. ⁹ Giyagni wa Goyakalu gapatanru ma mutspalkakinitipa wa yineru.”

¹⁰ Wa panchiya repomgatnakluna yimaklene walekotnaka. ¹¹ Wane chinna Geso, “Girukokta giknoklo wa ganunro, sato ganunrotinitnakna rumopatlewata wala chinanu. ¹² Wa suxo giknokinri tganuru wa satu tganurutini, tumopatlewata.”

Ruglenshinikananyegetna mturune

¹³ Ranikyegitluna mturune wa kamrukayapna. Wa yimaklene chigjetna wa ranikjerna. ¹⁴ Retinri Geso jigekanuwata. Wane chinna Wale,

“Getashatanna mturune runyegitannona. Gi gimaletanna. Gi rixanu wanna pixkalune wannanni wa Goyakalu pogirewatyawaka. ¹⁵ Galikakni wane nchingi, girukokta gi yoptotanru Goyakalu pogirewatyawaka mturu pixka gi wa jiglokanruna.” ¹⁶ Kampukna. Wanna gogo rutakamyota. Ruglen-shinikanegitina.

Gitsrukaachi makluji ponikolu

¹⁷ Gatnugapo yapananumtini, runyegitlu satu gasukamtachri. Yoptso-jityegitlu. Repomgalu, “Yimaklewatachri kigleru ¿Klu nkamrutanu nyoptotyaplu wa nuwekinri gike rixiniko mnikawnakatupa?”

¹⁸ Geso wane chinru, “¿Klu chinanu wane pchinno kigleru? Gi satuna waneru kigleru. Satupjeru, Goyakalupje. ¹⁹ Wa Tokanchi Yukanatkaluru pumata: Gi pumopatlewatanu. Gi pyulalewatanu. Gi pchowguwatanu. Gi wa maleshawaka pupgijtalewashatanu. Gi pyokwirewatanu. Pkagwakpi-ratanru puru ga wa punro.”

²⁰ Rugitlu. Wane chinru, “Yimaklewatachri, pejnuruko tyekaka nkamruttaka nmaklutinyakawa.”

²¹ Geso yopukgatu. Raluklu. Wane chinru, “Satupje pmagatya. Pyanu. Pushankanru ptowruko wane pixle. Penekanna wa kwamonurune. Waneyapyi ponikolewlu tengogneyapa. Punanu. Pomkagitanno. Panikanru pkoroshishkitate.”

²² Seyni wale yanshinikanpotutana tye tokanchiya. Ralimta wamonuwat-achri gi rixanu waneyanru ponikowle gixo wane rixle.

²³ Geso geknokyegitna. Wane chinna Wale wa yimaklene, “Kyaprepotlu jiglokinripna Goyakalu pogirewatyawaka wa ponikolune.”

²⁴ Wa yimaklene giglajita wa tokanuya, seyni Geso gigitatnaka. Wane chinna Wale, “Wiwine, iji payaprenanutkalu wa jiglokyapluna wa Goyakalu pogirewatyawaka wanna serojiproj gaponshinikanutachine!

²⁵ Myapretmakni kameyo tsapujripna tjiglokinripa wa ponikolu pnute jiglokyaplu Goyakalu pogirewatyawaka.”

²⁶ Wanna giglajpotuta. Wane chinkakna wannakakluko, “¿Katu gimkata gognetkaakotanu?”

²⁷ Geso yopukgatna. Wane china, “Wa yineru mumkatanutu, wale rumkata Goyakalu. Wa ptowruko rumkata Goyakalu.”

²⁸ Petro yinuwaka wane chinretlu, “Petanu. Wixa giknokamtlu ptowruko. Womkagitatkayi.”

²⁹ Giyagni Geso wane china, “Galikaka wane nchingi, girukokta gi-knokajimta, yegwakane, repurune, repurone, wa ruru, runro, wugenene, wa rusanatkaka giknokachri Gita chinanu, wa Kiglerpotunaru Tokanchi chinanu, ³⁰ wale geneeko satu pacha kata pnute xani tyegognekaka, panchikaka, yegwakane, repurune, repurone, runrone, wugenene, ru-sanatkaka, kojwawakchi koxa. Pagognesha ginachripa reneeke ruwekinri mnikawnakatupa. ³¹ Seyni gixo muchichachine gapkatpotutana. Gapkat-potutachine wannapni wa muchichachinpatka.”

Geso ginkakna ma mapookanuwa rupninripa

³² Wanena gatnugapo. Gerosale kanikna. Kosekamtna Geso. Ruglajitna. Romkagitluna pikachineko. Ranikatnakna wa pamole gepine. Yinuwaka Wale wane chinretna wane rixikolpatka: ³³ “Xani Gerosale wkanika. Wa Gita Yineru Wgenno samyookotka wa tsrukakalune sasertotene, wa

yonchikapine yegi. Ruklukanuwnayegjixannona nupniripa. Samyokanna payinyegiko. ³⁴ Rapnokatannona. Kochipjetannona. Rutskagjetannona. Ruylatannona. Wa mapgogne giknoginpatka nyotunotanu.”

Santiyako, Gwa gagjitanru

³⁵ Wa Santiyako Gwa, Sewereyo wgenene, rapyegitluna. Wane chinruna, “Yimaklewatachri, waluklu klunerukokta wagjityayi wane pixanwu.”

³⁶ Wane chinna Geso, “¿Kluneru galuka wa nixyapgi?”

³⁷ Wanna wane chinru, “Penekanwu Pixa wuxiplatanyi poyaknu yegi, satu potuklesretate, satu pkegnatesretate.”

³⁸ Wane chinna Geso, “Gi gimata wa gixa gagjitanru. ¿Gimkatge giiretyalo wa girapistono wa Gita girinro? ¿Gimkatge gkatletikolu wa katlu wa Gita katikolu?”

³⁹ Wanna wane chinru, “Wumkatlu.”

Wane chinna Geso, “Wa girapistono nurapre girini. Wa katlu wa Gita katikolu wale koxa gkatikolupa. ⁴⁰ Seyni tuplalu npotuklesretate, wa nkegnetesretate gi wa Gitanni nenekyaplu, ga wa wannanupni galpokyegitkulunepni.”

⁴¹ Wa jeminitkaluna, wa pamole yinuwaka gimtuwnaleta Santiyakoya ga wa Gwaya ⁴² Geso tomgana. Wane chinna Wale, “Gimata wa tsrukakalune kagwakikalune payinetskalaya towutlewpotutna. Wanna gitsrukatenetsru gitaka wanna chinanu. ⁴³ Seyni gi wane gixkakanu, seyni girukokta galuka tsru gixletnachriwa gixayegkakluko walepni wa gipxakjerupa. ⁴⁴ Girukokta gixayegkakluko galuka muchinanu gixletnawa, walepni pejnurune wayegreru. ⁴⁵ Gi rixanu Gita wa Yineru Wgenno gi nuna nupxakikolupa, seyni nuna nupxaklelatinripa, nenekyaplu nuwekinri nwenutyaplu rushpakinripna gixolune yine.”

Retkaklu Wartimeyo maygaletu

⁴⁶ Geriko yana. Geriko yiylatka Wale, ga wa yimaklene, ga wa gixolune yine. Wartimeyo wa maygaletu, Timeyo wgene, tuplanata wa gatnugapostsi, ragjigognenatlo sroschi. ⁴⁷ Jemyegitlu Walenwa Geso Nasare gajeru. Yinuwaka saplewleta. Wane china, “Geso, Tawiklopisha, petwamonutanno.”

⁴⁸ Gixolune yine chigetjetlu pochke rixinripa, seyni wanepnuteyaka saplewjeta, “Tawiklopisha, petwamonutanno.”

⁴⁹ Geso tunwata. Wane china, “Ntomganru.”

Tomgaluna wa maygaletu. Wane chinruna, “Kiglenshinikanupyi. Palnanu. Tomgayi.” ⁵⁰ Ruknoksapowlechratamta. Rupteka palnaleta. Yayeigitatkalu Geso.

⁵¹ Geso gepomgalu. Wane chinru, “¿Klu palukatka wa nixyapgi?”

Maygaletu wane chinru, “Yimaklewatachri, netinripa.”

⁵² Geso wane chinru, “Pyanu. Palixle gitskalakyi.” Waneklutka retatka. Romkagitatkalu Geso wa gatnugapoya.

11

Jigloka Gerosale

¹ Goliwa Magkatetkana. Gi gowukatkana Gerosalestsi, ga wa Wetpage ga wa Wetani. Wane yokanatyana gepi yimaklene. ² Wane chinna Wale, “Gyanu tujra pokchi gixa ginaple gajeru. Pokchipotuko gapokinpatka wane gikshikinri mporo wgene tsatkaluru, gi satuna yineru mtuplatjitanutuwa. Gkoshrikanru. Ganikanru. ³ Girukokta wane chininipgi, ‘¿Klu

chinanugkoshpiroklu?" wane nchinanu, 'Gitsrukaachi galuklu. Waneklutka yokanatanutnaklu gewi.' "

⁴ Wane yana. Rukshikluna mporo wgene tsatkaluru gippyapo maleka rutspalgapotyawaka. Koshpiroklu. ⁵ Pimrine wane gwanatachine wane chinna, "¿Klu chinanu gkoshpirjetlu mporo wgene?"

⁶ Wanna wane china Geso chinyawakna. Retashatkatkana.

⁷ Ranikatkaluna mporo wgene Geso yegi. Gimbalna sapwakatjtluna. Wale gogo tuplamatka Geso. ⁸ Gi gepikna gikwekamkatachine gatnugapo. Pimrine gagmunasurkaka gistakamta. Rukwekamluna gatnugapo.

⁹ Kosekamtachine ga wa kaptomtachine sablewjenanumtna. Wane china sapletna:

iWuya! jGimalwutkaluru

ginachri Gitsrukaachi giwakaya!

¹⁰ *jGimalwutkaluru wutsrukati Tawi pogirewtapyawakni!*
Waneplu pogirewatyawaka.

iWuya tengognepotuya!

¹¹ Geso gapokamtakalu Gerosale. Kpashiwakapji ya. Retjetinitkalu ptowrunganuka, kayi rixinitka rushpaka. Wa Wetani ya wa pamole gepiyamananuko.

Wa gikera masagito

¹² Waleprika Wetani yamtyatkana. Nachlu. ¹³ Retlu gowukaya gikera kasureru. Yayegimtlu, wane getko rukshikinri pagixanu. Rapyegitirni gike rukshika. Gisurepjeni. Gi gipapkoni wa sagiwatinri wa gikera. ¹⁴ Geso wane chinanu gikerni, "Gikena niksagitanutkayi gike pixiniko." Jemluna yimaklene.

Geso powratku kpashiwakapji

¹⁵ Wane yana Gerosale. Jiglokamta kpashiwakapji. Yinuwaka maleka giknokletna kgishanrewaklerunni ga wa gagijietachinni wa kpashiwakapjiya. Yawnajkaklo kwalkaka gipekoserojiprojitatichineni, motkoko gishanretachinni tuplapijere koxa. ¹⁶ Gi ruchichna Wale wa satuna ganikyalo kastonolo wa kpashiwakapji. ¹⁷ Runkaklewyegitna. Wane chinna Wale, "¿Gi ge yonatkaluru:

*Wa noppji gagjigognewakapji chinkalurupni
ptowruko payinerumnunanuko yegi?*

Wa gixa wane gixatkalu
gitawakapna kachowgurune gwiyawaka pixka."

¹⁸ Yijnakotluna wa tsrukakalune sasertotene wa yonchikgapine. Rujgaluna gi rixpoko giylaletanruna gi rixanu pikluna. Wa ptowruko yine giglajita runkaklewleya.

¹⁹ Wa kayi rixinitka tsru pokchiya yiyatka Geso.

Wa gikera giprigatka

²⁰ Ruknoginna goyechnokawa, retluna gikera rupriganatka gitskiyamananuko. ²¹ Petro gishinkapatka. Wane chinru, "Yimaklewatachri, petanru gikera pkamakpiratanruna rupriganatka."

²² Geso, wane chinna, "Galixanru Goyakalu. ²³ Galikaka wane nchingi, katukokta wane chinru tye magka, 'Puxrikanu. Wa tsru wenu puknokinwa.' Gi wa shikpokwakgajitachriko, seyni ralixa wane rixanu chinyawaka, wanepotuko rixanu wale chinanupa. ²⁴ Giyagni wane nchingi, ptowruko girukokta gagjitanu gagjigogenetini, galixinri gyoptotanru, waneyapgi gixinripa. ²⁵ Wa ntunwa gagjigogneretini, gkaspukinri wa waneygi gixinipa

pnu gixjeru, wa gixa Giru tengogne gajeru koxa kaspukmukochiretyapgi wa gmukochirkaka. ²⁶ Ga wa gixa gma kaspukinri, wa Giru koxa tengogne gajeru gi wa kaspukmukochiretanungi.”

Goteylene gepomgalu Geso klu rutakika

²⁷ Satokna Gerosale. Yotaljeta kpashiwakapjiya. Runyegitluna wa tsrukakalune sasertotene, wa yonchikgapine, wa tsrune. ²⁸ Wane chinruna, “¿Klu putakika pixa tyekaka pkamrutinri? ¿Katu gitakyi tyekaka pkamrutinri?”

²⁹ Wane chinna Geso, “Nepomgangi gixa satu tokanchi. Gigitanno. Wanepnute nunkakyapatkagi klu nutakika tyekaka nkamrutinri. ³⁰ Wa Gwa katlelewle, ¿tengogne giyakatyachrirge? ¿waka yinenukla? Gigitanno.”

³¹ Yoptopirkakna wannakakluko. Wane chinna, “Wane wchininipmaka tengogne giyakatyachrini, Wale wane chinanunwu, ‘¿Klu chinanu koxa gi galixlu?’ ³² Ga wa wane wchiniplu, ‘Yinenni’”—wanna pikna gixolune yine, gi rixanu pejnuruneko kagwaklu wa Gwa walenwa Goyakalu tokanu geneklewatachri.

³³ Rugitluna Geso. Wane chinruna, “Gi wumata.”

Wane chinna Geso, “Gita koxa gi ginkakangi klu nutakika tyekaka nkamrutinri.”

12

Gowasha ga wa girukotachine

¹ Yinuwaka Geso yanumsayegletna yapkakluya: “Satu jeji gitaklu sana gowasha. Pirijeretjetlo. Tapgatyawakapa jitota. Tenopijru kamruta. Renekamtna sana girukotachine. Pnu yatka. Wajra ya. ² Talixinipapko yokanatu wayegrechri sana girukotachine yegi rawapyaplo wa sana girukotachinyegiya wa gwachrotka gowashaya. ³ Kashichluna. Kochipjetluna. Yokanatanruna maleshalni. ⁴ Rumepe yokanreyegitna satu wayegrechri. Ruylajiwtutanruna. Rektuteluna. ⁵ Rumepe yokanretatkaku sana. Waleni ruylatna. Pimrinnikoxni gixni. Kochipjetkanna pimrinni. Ruylatkanna pimrinni.

⁶ “Waneyawalu satu gituru ralukanru potu. Yokanyegitna waleni koxa gapkatpotutachritka. Wane china, ‘Kagwakpiratanruna noturu.’”

⁷ “Wa sana girukotachine wane chinna wannakakluko, ‘Tyenwa yoptotachripatka. Ginanu. Wuylaganru. Yoptotanrupmaka wixanpatkani.’”

⁸ Kashichluna. Ruylatluna. Ruknokluna maleka gowashaya.

⁹ “¿Gi rixpokotanu wa kgowashateru? Runanu. Ruylatanunna wa sana girukotachinepni. Renekanna gowasha pimrine. ¹⁰ ¿Gi ge tye yonchiga getyongata?

Wa sotlu myoptotkotu kamrupjitchineya,

Wale gitakaaka yoptowaka gitsejita.

¹¹ Gitsrukaachi chinanu kamrutka wa tye.

Rakaglajiygaletwu.”

¹² Raluka kashretluna. Wanna tsrukakalune pikna gixolune yine. Rumata jemluna wa wannapirana wa yapkaklu. Kaspukluna. Yatkana.

Wenutikolu Susa

¹³ Yokanyegitluna pimrine Gwariseyone ga wa Giroreyone wa kashtokanutyapluna. ¹⁴ Runna wanna. Wane chinruna, “Yimaklewatachri, wumatyi Pixni mayrokletyi. Gike pkagwakpirata. Gi petlu wa yinermanewle giglenu, seyni galikaka potu punkakwu Goyakalu gatnugapotepirana ¿Wa

munanshichkotnige renekikolupa wenrukaka wa Susa waka gike? ¿Wenkerge waka gi wa wenekanru?"

¹⁵ Wa Wale gimatu rixashleyna. Wane chinna Wale, "¿Klu chinanu gimplukanutno? Ganikinno sroschiproji netyaplo."

¹⁶ Wanna ganikyegitlu. Wane chinna Wale, "¿Katu yaglunwa tye, ga wa katunni toyonga?"

Wanna wane chinru, "Susanni."

¹⁷ Wane chinna Geso, "Genekanru Susa wa Susanuko, ga wa Goyakalu genekanru wa Goyakalunu."

Ruglajitna Waley.

Gepomgalu yotunruya gipnaluya

¹⁸ Runyegitluna Sariseyone. Wanna wane china maleshaplu gipnachine yotunre. Repomgaluna. Wane chinruna, ¹⁹ "Yimaklewatachri, Moysisi yonyegitwu wa satu yegwakluko gipnini, ruknokagnunrotana, gi ruknokawgenetana wa repuru gwanro wale gnurownanni, ruxolewkakinripa giklopishapa yegwakluni chinanu. ²⁰ Wanenannina payokgiprerune mletkakachine. Muchinanu tsru gnurownata. Rupnana. Gi ruknokawgenetana. ²¹ Gapkatatachri gwatnaklo. Rupnana koxa waleni. Gi walенико giknokawgenetana. Mapa rixinrini waneko pixka rixana. ²² Payokgipre gwalo. Gi wannaniko giknokawgenetana. Suxni gapkata potu gipnale-tanatka. ²³ Yotunruklupa yotunotinipna, ¿katu gnuropni wa wannaya? Gi rixanu payokgipreni gnurownitka wa wala."

²⁴ Rugitna Geso. Wane china, "¿Gi ge mpupjeta gi rixanu gi gimatu wa Tokanchi Yonatkaluru, gi wa Goyakalu giyaklewleko? ²⁵ Wa yotunotinipna wa gipnachineya gi ganunrowatanutkana, gi kashimyokaakotkana, seyni wa Goyakalutowrerun tengogne gajene wannako pixka rixanutkana. ²⁶ Wa yotunotachinepa gipnachinepirana, ¿gi ge getyongatlo wa Moysisi kirukate, wa Goyakalu giynumatyawaklu kawshipiriya? Wane china: *Gitni wa Gawra Goyakalute, Gisaaka koxa Goyakalute, ga wa Gakowo koxa Goyakalutno.* ²⁷ Gi wa gipnachine Goyakalutni, seyni giwekachine Goyakalute. Giyagni gixni gamtakanshnikanpotutana."

Muchinanu Yokanatkalu Tokanchi

²⁸ Rapoka satu yonchikgapri koxa. Yijnakotna rugiekakyawakna. Rumata kigle gigle Geso gixna. Repomgalu, "¿Girni wa tsru potu Yokanatkalu Tokanchi pejnuruko pnuute?"

²⁹ Geso gigitlu, "Wa muchinanu walena: *Pjemanu, Gisrayili. Wa Git-srukaachi Woyakalute, wa Gitsrukaachi satupjeru.* ³⁰ *Pushinikanru Git-srukaachi Poyakalute psolpotuyako pajiya, psolpotuyako punshinikanuya, psolpotuyako pmuchkonuya.* Ga ga walena muchinanu Yokanatkalu Tokanchi. ³¹ Gepi chininri tye pixka rixa: *Pushinikanru pumole pixnanuko pixka.* Maleshlu satu Yokanatkalu Tokanchi tyekaka pnuute tsru."

³² Wa yonchikgapri wane chinru, "Kigleru, Yimaklewatachri. Galikaka wane pchina, *Satupjeru Goyakalu. Maleshlu satu. Walepjeni.*

³³ *Wushinikanru psolpotuyako wajiya, psolpotuyako wunshinikanuya, psolpotuyako wmuchkonuya.* Wushinikanru wumole wixnanuko pixka, tyekaka ptowruko genekashlu yoxiikalurupa wa genekashlu giylatkalurupa pnuute tsru."

³⁴ Geso getinri wa yonchikgapri gigitlu rumatleya, wane chinru, "Gi wa gowukyi pogirewatywaka Goyakalu."

Gi satuna tserpiranawanshnikanyegitlu repomgiyatkalu.

Gepomgalu Tawi Wgenepirana

³⁵ Kpashiwakapji runkaklewaty. Geso wane china, “¿Gi chinna wa yonchikgapine wa Tawiklopisha rixinri wa Kristo? ³⁶ Wa waleko Tawi wane china wa Giwekikaluru Kpashiriya:

*Gitsrukaachi wane chinru Nutsrukate,
Ptuplatanu npotuklesretate,*

Wa nutakinpotukna pkamnixjene pujixipta rapukote.

³⁷ Waleko Tawi wane chinru Gitsrukaachi. ¿Gi rixpokotyawaka giklopishayapni?”

Gixolune yine rumuwleyna yijnakotluna.

Yopnuglu yonchikgapineya

³⁸ Wane china Geso wa runkaklewleya, “Ggirukotinwa wanna yonchikgapineya, galuka yanretachine gowuukalkaka gimkalunya. Ralukluna ralukikolupna giputuya. ³⁹ Ralukluna wa tsrukakalune tuplapijere ginkaklewawakapjikakaya, muchinanu tuplapijkaka koxa nikjetikowakaya. ⁴⁰ Konapijetkanna gipnagnurutachronni. Rixashleyna gogagijrgognerkakna. Tsru potu ruklukanuwnayegjixikolupna.”

Gipnagnurutachro genekashle

⁴¹ Tuplanata Geso tugnantakikowaka genekashlukaka ginaple. Retjetna yine gi rixpoko gitakleyaplona sroschi gignantakikowaka. Gixna ponikolune gitaklo gixo. ⁴² Tuna sato suxo gipnagnurutachro kwamonuro. Tutaklo gepi mturomchataaji. Walanwa satopje sintawo. ⁴³ Tomgana Geso wa yimaklene. Wane china, “Galikaka wane nchingi, wa twu suxo gipnagnurutachro kwamonuro wala gitaklo pejnurune pnuute gitakachine gignantakikowaka. ⁴⁴ Pejnuruneko gitaklo ruxetanrona. Wa twu suxo twamonnupoga tutaklo pejnuroko walalu, pejnuruko tuwekinripa.”

13

Getkalurkaka ma mapookanuwa Geso

¹ Wa rushpakamtini kpashiwakapjiya, satu yimakleru wane chinru, “Yimaklewatachri, ipetanru gi pixka sotlerutkakananni, ga wa gi pixkapjirutu-nanni!”

² Geso wane chinru, “¿Petlu tyekaka tsru panchikaka? Gi wa rutukanu sotlu rogotkakinripa, gi wa mujrolekatunpakni.”

³ Tuplatini wa Goliwa Magkateya kpashiwakapji ginaple, repomgaluna wanna mkoje rixinna, Petro, Santiyako, Gwa, Gantirishi, ⁴ “Punkakanwu. ¿Giklupni wa tyekakapa? ¿Klu getkaluru wanepa wa tye pejnuruko wa moyagkakinpatka?”

⁵ Yiuwaka Geso wane chinretna, “Xako gi satunako yokwitangi. ⁶ Gi rixanu runanna gixo ngiwakaya, wane chinachinepa, ‘Gitni wa Kristono.’ Yokwitanunna gixopni.

⁷ “Seyni wa gixa jeminiplu wa giylalupirana ga wa pogiwlesha giylalupirana, gi gkegeknunuwanatanu. Rumkata wane gixleta, seyni gi wa yoptukyawakapnichi. ⁸ Gi rixanu ruylakakanna pachijne gajene ga wa pachijne gajeneyma, ga wa pogirewatyawaka giylakakanu pogirewatyawakayma. Waneplu giyolikhijrukaka pachijnemnunanukaya. Waneplu nachlukaka. Tyekakapni muchichachripa wa kachinolkakapa.

⁹ “Gixako getinwa gixnanuko. Wa samyokangina jeman-shinikankakyawakapna. Ginkaklewawakapjikakaya gkochipjetiko. Gitsrukaachine, pogirchine getanu gixapni tunwatanuna Gita

chinanupa gipgujtalelwu waneyapna. **10** Muchinanu ptowruneko payinerumununanuka runkakikolupna Kiglerpotununu Tokanchiya. **11** Wa ganiikoklunpatka gixa wa nsamyookoklunupa gma mapookanupachi gi gkojwakinwa wa gixa chinyawakapa. Gi waleko gyanshinikanutanu, seyni wa genekikolupa gixa walepapkopa, wane nchinyawakapa. Gi wa gixni yanumsatachinepgi seyni Giwekikaluru Kpashiripni.

12 "Gimole samyokanru rupniripa gimoleko ga wa ruru samyokanru gituru rupniripa. Wa wugenenna gimgtuwnayegitanuna rurunepnina. Ruylajixanunna rurunepni. **13** Gayegixkalunepgi pejnuruneyako Gita gi-waka chinanu, seyni wa kashnantakanshinikanutachripa yoptukyawakpotunukopa walepni wa gognetkaako.

14 "Wa getyongatachripa gimata jemanru: Wa getiniplu gagnanutkaluru gimgtukpotlewatachri wane rawinri mawiyawakanupmaka, waneklu Gote gwachine gasukanu. Magkakaka yanna. **15** Panchi gogo gwanatachri wa rujrukanmaka, gi jiglokajitana ranikyaplu gipji gajeru. **16** Wa sana gwanatachri gi wa satkapan rawapyaplu gimkalu. **17** ¡Gi waneni wa kamshironepri ga wa gashichakachinepgi walegognekakpatka! **18** Gagjigognetanu gi waneyapgi ginapuku gasuktatinripa. **19** Wa walegognekakapa waneplu salewakchi wa mwajejetkulu wa muchi giyakletinitkalu wa Goyakalu giyakle, ga wa xanigognenanu. Gi wane rixanu. **20** Wa Gitsrukaachi ma sustakanmaklu walegognekaka gi pamanenapnikmaka gognetkaakona seyni tsomitkalune chinanu wa Wale tsomitanune sustaklu walegognekaka. **21** Giyagni satu wane chininipgi, '¡Gewru Kristo!' ga wa wane chinungi, '¡Getanru. Waneru!' gi wa galixanu. **22** Rupgujewnanna wale migje Kristone, wa wanna migje Goyakalu tokanu geneklewatachine. Kamrutannra getkalurkakapa ga wa koglajrukakapa, yokwitikolupmakna tsomitkalune wa rumkatmaka wane gixleta. **23** Xako gixa. Nunkakatkagi psoluko ma mapookanuwa.

Geso ginkakna runinripapirana

24 "Seyni walegognekakpatka ruknoginpatka wale salewakchi, wa tkachi gichpokanu. Wa ksuru gi wa pokamlatanu.

25 Wa katagirkaka gjirotanu tengogneyapa. Wa gichkolkaka tengogne gajeru kowshiwshtiko.

26 Wanepnute retannona *Gita wa Yineru Wgenno kyachgapererumkoya ginachripno*. Tsru nuyakle ga wa noyaknu numunananu. **27** Waneklu nyokanatanna notowrene tengogne gajene rapatjetikolupna ntsomitannu. Wa gepkoxamkojesretkakayako yoptukyawakpotuko chiji, yoptukyawakpotuko tengogne rapatjerewatinna.

28 "Gimatanru yapkaklu gikerapiranaya. Wa tyosnuygalejiplutinitka, tucphecksuretinpatka, gimatanutkalu wa walapustsitkani. **29** Waneko pixka gixa getinpatkalu wane gixlutkani tyekaka, gimatanutkalu gi gowukpatkalu. Gipgyaptostsitkali. **30** Galikaka wane nchingi, gi ruknoganan tye gimuweekakgognenatachinesha wa ptowruko tyekaka ma mixkanuwa.

31 Wa tengogne ga wa chiji giknoganan, seyni wa ntokanu gi giknoganan.

32 "Seyni walegogne, wale gipapko gike gimata, gi wa Goyakalu towre-runeko tengogne gajene, gi wa Giruruko, ga wa Girchipje galikaka gimata. **33** Giyagni giyokanu. Gagjigognetanu. Gi gimatlus giklupaktani gipapkopa. **34** Waneko pixka rixa wa jeji wajra yachri. Ruknokamtlu gipji. Rutakamtna wayegrene. Satkaka renekamta kamrure. Gipgyapo gwachri towutamta ruyokinripa.

³⁵ “Giyagni gixa giyokanu. Gi rixanu gi gimata giklu runanu wa kwangixlerupji, patako kayi, patako ganikajyechno, patako gaxawripa yanumatini, patako goyechnokawpotuko. ³⁶ Wa rawraka ginretinipa ma mukshiikyanupgi gimkanatachingi. ³⁷ Wa gixa nchinyagi wane koxa nchinna pejnuruneko: Giyokanu.”

14

Jemanshinikankakyegitluna Geso ruylatayapluna

¹ Gepigogne magatiniwa Tsru Giknoglushgogne wa Tsrugogne jimapro gisekachri myapjetkotu, rujgaluna tsrukakalune sasertotene, ga wa yonchikgapine gi rixpoko kashichiyapluna gayroklewliuya ruylatayapluna. ² Wane chinna wanna, “Gi wa tsrugogne wkashichanru, ma mejnugimalewatinitipna yine.”

Geso giyokjiwutka

³ Wetani rawanata Geso Simopji gjirgitutpachri. Tuplanata nikjetikowakaya. Tuna sato suxo. Waneylo pastono pgamlugalo nartogapje kwenuru potu. Tupokastonotlo. Tuyokjiwutlu. ⁴ Wanena pimrine gimtuwnachine wannananuko. Wane chinna wanna, “¿Klu chinanu wane tixa saletletatkalo pgamlugalo? ⁵ Wa tumkata gishankakotmaka wa twu pgamlugalo, wa mapa pachaproj pi pnu. Walamka kwamonurunni geneeko.” ⁶ Geso wane china, “Getashatanro. ¿Klu chinanu nsalewnakaklo? Kigleru kamruchi tkamrutyano. ⁷ Gi rixanu waneygognenangi wa kwamonurune gixayma. Wa galukiniplu gimkata kigleru kamruyegetletra, seyni gi waneygognenanupgi Gita. ⁸ Wa wala kamrutlu tumkatywaka. Tuyokagnaputlo pgamlugalo nomane wa nkapnatikolupa. ⁹ Galikaka wane nchingi, ginakakokta runkakletiko Kiglerpotunanu Tokanchi wa psolchijneko wa tye koxa tkamrutanru wala wane chinkalurupa wa tushinikikolupla wala.”

Gota samyoklu Geso

¹⁰ Gota Giskaryote satu pamole gepi rixinri yayegitna tsrukakalune sasertotene samyokyaplu Geso wanna yegi. ¹¹ Wanna jeminitkalu, rumuwatna. Rupirataluna renekyapluna sroschiproji. Rujgaluna ruglepoktapinri gi rixpoko samyokleyapluna.

Tsru Giknoglushgogne

¹² Muchinangogne jimapro gisekachri myapjetkotu wa renekashatinrina giylatkalurupa wa Tsru Giknoglushgogne chinanu, yimaklene wane chinru, “¿Ginaka paluka yokanretwu wa walpokotyaplu wa pnikanrupa Tsru Gi-knoglushgogne chinanupa?”

¹³ Yokanatna gepi yimaklene. Wane chinna Wale, “Tsru pokchi gyanu. Wane yoptotingi satu jeji wa gashgaji gonu gwanru ganikachri. Gomkagitanru. ¹⁴ Ginakakta jigloka wane nchinanru wa kapjiru, ‘Yimaklewatachri wane china, “¿Ginaku wa napokagrukowakle wa nnikyawakapa Tsru Gi-knoglushgogne nyimakleneyma?” china.’ ¹⁵ Wale gekakgitangi satu teno gajeru tsrgruko gali galpokletkalurutka. Wane galpokotinri wixanupa.”

¹⁶ Wane yatkana yimaklene. Tsru pokchi yatkana. Rukshikluna Wale chinyawakpotukna. Ralpoktluna Tsru Giknoglushgognenupa.

¹⁷ Wa kayi chininitka wane ya wa pamole gepiyma. ¹⁸ Wa tuplatinitkana nikawakakwa, nikna. Wane china Geso, “Galikaka wane nchingi, wa satu gixate numnikjeru, wale samyokanno.”

¹⁹ Wa wanna yinuwaka wamonuwleta. Wane chinna wanna satkaka, “¿Gitgetkopni?”

Satu koxa, “¿Gitgetkopni?”

²⁰ Wane chinna Geso, “Wa satu pamole gepi rixinri, wa gigakachri Gitayma kolpetoya. ²¹ Galikaka Gita wa Yineru Wgennno wane nyanu chinyawaka wa yonchi Gitapiranaya. ¡Gi waneni wa tye jeji, wale chinanu Gita wa Yineru Wgennno samyooko! Kiglemkalu tye jeji chinanu ma mushpaakanmaka.”

²² Wa nikatinna wanna, Wale kashichlu jimapro. Ruglenshinikaney-gitlu. Jiknaglu. Wane gixachri renekna. Wane china, “Gyoptotanru. Tyenwa nomane.”

²³ Wale kashichlo girapiston. Poyagnutatkalo. Renekna. Rurna walaya pejnuruneko.

²⁴ Wane chinna Wale, “Tyenwa nograga wa gerotu tokanchi gipiratkaluru chinanu, gixoluru yineru chinanu giyookaluru. ²⁵ Galikaka wane nchingi, gi wa nuranutkalo gowajiga wa walegognepotuko wa nuranro geroto wa Goyakalu pogirewatyawakaya.”

²⁶ Wa wanna shikaletlu gimalwuru. Rali shikaletinitkaluna, Goliwa Magkate yana.

²⁷ Wane chinna Geso, “Pejnurunepnikgi gixapni gitspeekaakona. Yonatkalurutkani:

Nuylakanru wa girukotapratachri.

Rupalatanna wa gowegane.

²⁸ Nyotunotanu. Nali yotunkakletkoklunpatka, Gita gapka kosekanu gixaya. Kalile nyanu.”

²⁹ Petro wane chinru, “Wa pejnurunekmaka gitspeekaako, ga wa gita gike.”

³⁰ Geso wane chinru, “Galikaka wane nchinyi, wa pixa xani tye yechno ma yanumatkanu gnapu wa gaxawripa gepi kata, pnutatanno mapa kata.”

³¹ Seyni wale psolmucchkonuko tokanuwna. Wane china, “Wa nupnan-maka koxa Pixayma, gi wa nnutatanyi.”

Pejnuruneko waneko pixka china.

Getsemani

³² Wane yana Getsemani giwakatleyawaka. Wane chinna Wale wa yimaklene, “Ntuplatanu gewi. Nagjigognetkakopshini.”

³³ Ranikna Waleyma Petro, Santiyako, Gwa. Yinuwaka giglajreta, wam-monuwnaleta. ³⁴ Wane chinna Wale, “Nonshinikanu nwamonusnapotutya gipukchi pixkapotuko. Gkagwakanu gewi. Giyokanu.”

³⁵ Psotsotaja wajrạyaka ya. Wane yoptsojita chijiya. Ragjigogneta wa rumkata wane gixletikolupmaka, ruknogaru Waleyra wale salewakchi.

³⁶ Wane china, “Gagwa, Nuru, ptowru gimkatachriyi Pixa. Pkoshri-patinno twu girapiston, seyni gi wa Gita galukyawakapni, seyni Pixa galukyawakapni.”

³⁷ Runa. Retamtna gimkanatachine. Wane chinru Petro, “¿Sim, pumkanatge? ¿Gi ge pumkata giyokleta pshinitsonu? ³⁸ Giyokanu. Gagjigognetanu gma jiglokinitipa yantaletikowakapa. Wa ginshinikanu galikakni jmererni, seyni manchi muchkotni.”

³⁹ Rumepe yaletinitnaka ragjigognetyawaka, waneko pixka chintokanu-tatnaka. ⁴⁰ Satokatnaka. Retamtatnakna gimkanatachine. Ruxapnewatna. Gi rumata gigretluna.

⁴¹ Runa mapa kata rixinritka. Wane chinna Wale, “Gimkanutka. Gap-nutanu. Wanekotka. Nopapko gapokatka. Xani Gita wa Yineru Wgennno

samyookatka kmukochirerunemyoya. ⁴² Gytunotanutka. Gayanutka. Gi gowukatkalu nsamyokjerupa.”

Geso kashichka

⁴³ Waneklutka yanumsanatiniwa Geso, runatka Gota. Walenwa pamole gepi rixinri. Waleymana gixolune yine kyoglolewarerune, kgagajere-rune. Wannanwa tsrukakalune sasertotene gayinerutene, yonchikgap-ineyegirune koxa, tsrunyegirune koxa. Gotaymammnukana.

⁴⁴ Wa samyokjeru genekagnaputatkana saturutu gimaxiklechi. Wane chinna wale, “Girukta namlutanu gita, Walepakni. Gkashichanru. Ganikanru. Ggirukotpotumtanru.”

⁴⁵ Runinitka, waneklutka runyegitlu. Wane chinru, “¡Yimaklewatachri! ¡Yimaklewatachri!” Ramluthu.

⁴⁶ Romyokyegimtluna. Kashichluna. ⁴⁷ Wa satu wane gwanatachri koshpakyoglolewapreta. Rustaklu wa sasertote gitsrukate potu wayegreru. Yostakjepitlu.

⁴⁸ Geso wane china, “¿Gishpakamta gixa yoglolewapiyma gagajeyma, kachowguru pixka gixa kashretnoge? ⁴⁹ Pagognemnunanuka gixayma nwanata, nunkaklewanata wa kpashiwakapiyya. Gi wa wane gkashichyano, seyni wa moyagkakikolupa wa yonatkalurkaka, wane gixyatkan.”

⁵⁰ Ruknokamluna pejnuruneko. Rasukatkana.

⁵¹ Satu jeji gomkagitlu sapwakmanetachri gichrataya. Jejine kashichlu.

⁵² Wa wale ruknokachratamtu. Rasukyana mamkatni.

Geso sasertote gitsrukate potu yegi

⁵³ Ranikluna Geso sasertotene gitsrukate potu yegi. Rapatna Walyegiya pejnuruneko tsrukakalune sasertotene, tsrune, yonchikgapine. ⁵⁴ Wa Petro gomkagitlu gogajxigiyako. Sasertote gitsrukapatupjipotunanuko romkagitlu. Tuplanata towrechinezma. Rolkanata chichpawa.

⁵⁵ Wa tsrukakalune sasertotene, pejnuruneko jemanshinikankak-jetikowakaya rujgaluna gipguitalelwumka Gesoya rupnirripa, seyni gi rukshikluna. ⁵⁶ Gi rixanu gixo gipguitatlu maleshawaka, seyni wa rupguitalewlina gi wa pixkakakluni. ⁵⁷ Pimrine gapoka. Rupguitatluna maleshawaka. Wane chinna wanna, ⁵⁸ “Wixa jemlu wane chiniri, ‘Gita yotkakanunru wa tye kpashiwakapi myochi kamrutikaluru. Wa mapagogne chiniri satu nkamrutanu myochi m̄kamrutikotpatka.’”

⁵⁹ Seyni rupguitalna wanna koxa gi pixkakakluni.

⁶⁰ Wa sasertote gitsrukate potu tunwata ganikajitskalaya. Repomgalu wa Geso. Wane chinru, “¿Gikeko pugityano? ¿Klu rupguitatyayinā wanna nyi Pixaya?”

⁶¹ Seyni Wale pochkeru. Gike rugita. Sasertote gitsrukate potu rumepe gepomgaletnaklu. Wane chinru, “¿Pixlege wa Kristoyi Gimbalwutkaluru Wgenyi?”

⁶² Geso wane china, “Gitakni.

*Gixa getanno Gita, Yineru Wgenno,
tuplatyawakapa potuklesreta ruyakle Goyakalu, nuninkoxapa kyachgapere-
rumkoya tengogneya.”*

⁶³ Giyagni wa sasertote gitsrukate potu suskakamkata. Wane china, “¿Klu wanepnute magatyawu gipguitalewatachine? ⁶⁴ Gjematkalu wa mu-pashiregnuchi china. ¿Gi pixka getle gixlu?”

Wa wanna pejnuruneko wane chinyegitluna wa Wale giklukanuwna rupnirripa.

65 Pimrine yinuwaka gitskagjeretanru, rushyagojitanruna, yotmutanruna. Wane chinruna, “Goyakalu tokanu peneklewatkoxewa.” Towrechine giptagojitlu.

Petro nutatlu Geso

66 Rapuko rawanata Petro panchiya. Tuna sato rupxakjero wa sasertote gitrukate potu. **67** Wa tetinri wa Petro roldakanatini, tyopukgatu. Wane china, “Pixni Waleymalutyi, Geso Nasare gajeru.”

68 Seyni wale nutata. Wane china, “Gi numatlu. Gi koxa numatjemlu wa pchinyawaka.” Rushpaka. Maleka ya. Yanumatatka gaxawripa.

69 Wa gipxaklewatachro getinri, tyinuwaka wane chinretatnakna wane gwanatachine, “Tyenwa satu wannate.”

70 Seyni wale nutattnaka. Gowukshini wane gwanatachine wane chinruna Petro, “Galikakni pixni satu wannati. Gi rixanu Kalile gajeryi.”

71 Yinuwaka kamakpiirewleta, wane chinreta Wale kawchinanu, “Gi numatpotunatlu wa tye jeji wa Walepirana gyanumsatinri.”

72 Waneklu gaxawripa yanumatatka gepi kata chininri. Petro gishiniklu wa tokanu Geso chinyawaklu, “Ma yanumatkanugnapu gaxawripa gepi kata, pnutatanno mapa kata.” Yanshinikanunatlu wa wale, chiyagatatkla.

15

Ranikluna Geso Pilato yegi

1 Waneklutka wa goyechnokawa jemanshinikankakatkana wa tsrukakalune sasertotene, wa tsruneyma, wa yonchikgapineyma, wa ptowruneko jemanshinikankakachineyma. Rosttluna Geso. Ranikatkaluna. Pilato samyokatkaluna. **2** Pilato gepomgalu, “¿Pixege wa Goteylene Pogiryi?”

Rugitlu. Wane china, “Pixa chinyawaka.”

3 Wa tsrukakalune sasertotene jigyegitlu gixo. **4** Repomgatnaklu Pilato. Wane chinru, “¿Gi ge pugita? Petanu. ¡Gi pajigyegeleanukta rixyegityina!”

5 Ga wa Geso gi wa waleko rugitya. Giyagni ruglajita Pilato.

6 Wa tsrugogneklu rushyegjetna gostutkaluru girukokta ragijitna.

7 Wane rawanata satu Warawasu giwakatletachri gostutkaluru yagotkakachineyma, giylalewatachine yagotkakluya. **8** Runna gixolune yine. Yinuwaka gagijreltuna rixjetyawakna.

9 Pilato gigitna. Wane china, “¿Gi ge galuklu gita gishyegityapgi wa Pogirna Goteylene?” **10** Rumata ranxalna chinanu samyokluna tsrukakalune sasertotene.

11 Seyni wa tsrukakalune sasertotene komyekanshinikanutna gixolune yine rushyegityapna Warawasu galikakapni.

12 Rugitatnakna Pilato. Wane china, “¿Klu nixyalu galuka wa gixa gi-wakatyalu Goteylene Pogire?”

13 Wanna saplewatnatnaka, “¡Koroshishkita putakjixaganru!”

14 Wane chinna Pilato, “¿Klu gektutu kamruta?”

Wanna saplewpotuta, “¡Koroshishkita putakjixaganru!”

15 Pilato galuka giglenshinikanretna yine. Giyagni rushyegitna Warawasu. Kochipjetka Geso. Rali kochipjeretkoklunutka, samyoklu koroshishkita rutakikolupa.

Solalone gapnokatlu Geso

16 Wa solalone ganiklu wa tsru panchi gitokote. Walenwa Pretoryo. Tomgana ptowruneko wa solalone. **17** Yoshmalkluna pakni yoshmookaluru

pixkalutu mkachri. Yoshmakluna sagyeta kona kamgikolu. ¹⁸ Yinuwaka galukletluna, „jWuya, Goteyone Pogire?”

¹⁹ Ruylakjiwtluna katsluksuya. Rutskagjetluna. Yonogyegitluna. Yoptsojityegitluna. ²⁰ Wa rali gapnokatletinitkaluna, komkagatkaluna wa pakni yoshmookaluru pixkalutu mkachri. Waleko gimkalu yoshmakatkaluna. Ranikatkaluna koroshishkita rutakyapatkaluna.

²¹ Rutjikakluna satu giknogamtachri, Simo, Surene gajeru, Galegantro, Rogwo giru, wa sana ginyachri wa ranikyaplo wa Geso koroshishkitate.

²² Kolkota chinikowaka ranikatkaluna. Walenwa yokaakaluru, Jiwchiswaga yegi. ²³ Renekluna winga smurna yapjetkalurga, seyni gi wa yoptotlo.

Koroshishkita rutaaka Geso

²⁴ Koroshishkita rutakluna.

Kotspaltamkatluna.

Rutakluna rupenookaklena ranikyapluna satkaka.

²⁵ Wa goyechnokawasreta koroshishkita rutakatkaluna. ²⁶ Wa tokanu rogwaka gwachri yonatkaluru wa jigyegitikolu, wane china, “Wa Goteyone Pogire.”

²⁷ Waleyma koroshishkita rutaakana gepi kachowgurune, satu potuklesreta, satu kegnetesreta. ²⁸ Poyagaakatka Tokanchi Yonatkaluru, wane chinachri:

Mugleneyma kagwakikolupa Wale koxa.

²⁹ Mupashiregnuchi chinruna giknogachine. Ruwnownojiwutna. Wane chinna, „jGaga! Wa Pixni wa kpashiwakapji yotkakachripyi, mapgogne chininri pkamrupjitanru. ³⁰ Pixnanuko gognetkakinwa. Pujrukanu wa koroshishkitaya.”

³¹ Waneko pixka rixna wa tsrukakalune sasertotene gapnokatletlu. Wane chinkakna yonchikgapineyma, “Pimrine rognetskaka. Walenanuko gi rumkata gognetkakletnawa. ³² Kristo, Gisrayiline Pogire gjirukanu wa xani wa koroshishkitaya. Wetyaplu. Walixyaplu.” Wa Waleyma koroshishkita gitaaikalune koxa yangalu.

³³ Tumananutkani ruchpokatka psolchijneputunanuyako kayinwakasreta rapokinpotunanuko. ³⁴ Kayinwakpapko Geso saplewata. Tsruplaji rixa. Wane china, “Geloyi, Geloyi, ¿Glama sawajtani?” Walenwa yokaakaluru: “Noyakalute, Noyakalute, ¿klu chinanu puknokatkano?”

³⁵ Jeminrina pimrime wane gwanatachine, wane chinna wanna, “Gjemanneru. Tomgalu Giliya.”

³⁶ Rasukamta satu. Katsopi kotsgatapyaluna kachgalu. Katsluksu rutaklu. Reneklu ruranrupa. Wane china, “Getashatanru. Wetkoxewa gikta runanu Giliya koshpakapyaplu.”

³⁷ Geso tsruplaji rixa. Rupnanatka.

³⁸ Waneklutka mkachrichrata gimaletanatachri kpashiwaka potu gajeru giskakamtatka gepichratatkalu. Teno rumuyaka giskakleyyatka chijiina.

³⁹ Wale ginaple tunwanata satu ksolahoteru. Retanata wane rixa gipnaletinri. Wane china, “Galikakpotunanni tye jejni Goyakalu Wgenni.”

⁴⁰ Wane koxa tunwanatna suxone. Retanatna gowukayako. Wa wanatskala rawanatna Mariya Maktala gajero, Mariya Santiyako mturu wa Gosi ginro, ga wa Salome koxa. ⁴¹ Wa wanna Kalile rawanatiniwa romkagjenatluna. Rupxakjenatluna. Wa pimrone gixo waneklu koxa, Waleyma kanikachine wa Gerosale.

Kapnatluna Geso

⁴² Wa kayi rixinitka wa galpokotikolgogne, walenna gapnanutikalur-gognesti. ⁴³ Gosi Garimate gajeru, jemanshinikankakjetikowaka gajeru kagwakpiratkaluru. Wale koxa kagwaklu pogirewatyawaka Goyakalu. Wane ya. Mpiikatu jiglokyegitlu Pilato. Ragjitlu Gesnimane. ⁴⁴ Wa Pilato giglajita wa rupnirrinatka. Repuklu ksolahoteru. Repomgalu wa muchikawako rupnirrinatka. ⁴⁵ Runkaklu wa ksolahoteru. Reneklu gi-manetka Gosi. ⁴⁶ Wale gagjitlu mkachrichrata. Jijrukatzalu. Poyitatkalu mkachrichrata. Rutaklu yomlechi wa sotlu jitotikalurupna. Rakaprurjixlu sotlu wa giyomle gipgyaptote. ⁴⁷ Wa Mariya Maktala gajero, wa Mariya Gosi ginro, getanatna ginakakta rutakanunruna.

16

Yotunru gipnaluya

¹ Wa ruknoginitka wa gapnanutikalurgogne, Mariya Maktala gajero, wa Mariya Santiyako ginro, wa Salome, ragjitlonu pgamlugalo wa ruyogatyapluna. ² Goyechnokawpotuko muchinangogne simana wane yana yomlechi yegi. Tkachi gishpakatka. ³ Wane chinkakananumtna wannakaluk, “¿Katmakla gakaprurutyanyure sotlu yomlechi gipgyaptote gajeru?”

⁴ Wa retinitkaluna, retluna wa sotlu gajritkalurutka. Gi rixanu tsrupotunau sotlu. ⁵ Jiglokatkana yomlechi. Retluna jeji tuplanatachri potuklesreta, gimkalu gowukalu gitakachri klatalu. Ruglajpotutna.

⁶ Wane chinna wale, “Gi wa giglajitanu. Gijgalu Geso, Nasare gajero, wa koroshishkitu gitakanatkaluru. Yotunomtakta. Gi gewitkalu. Getanru rutakikowaka. ⁷ Seyni gyanutka. Ginkakanna wa yimaklene, Petro koxa, Wale gapka wane kosekingi. Kalile yanu. Wane getinitkalu chinyawakpotukgi.”

⁸ Wane yiyatkana. Rasukamtna yomlechiya. Wa rutatatna. Ruglajitna. Giketsotaji runkakna, piklena chinanu.

⁹ Wa yotunotinitka wa goyechnokawpotuko muchinangogne wa simanatka, rupgujewnayegitlu muchinanu wa Mariya Maktala gajero. Walanwa ruknokakamchitetanro payokgipre kamchine. ¹⁰ Tyinitka wala. Tunkakna wa Waleymalunenanu, wa wamonuwnanatachine, chiyanaganatachine. ¹¹ Wa wanna jemyigitinitkalu ruwekinritka, wa retikolutka walaya, gi ralixna.

¹² Wanepnute gepi wa wanna yanananumta sana yachine. Geso wane gipgujewnayegitna. Satuko kogetkogatka. ¹³ Wane yiyatkana. Runkakna pimrine. Gi wannako ralixna.

¹⁴ Ralipretka rupgujewnayegitna Geso pamole satupjene wa tuplanatinna nikawakakwaya. Chigetjetanna wa ma malixleyna shikowgajitinriyna, gi rixanu gi ralixkana retjene yotunomtinritka.

¹⁵ Wane chinna Wale, “Psolchijneko gyanu. Ginkakletanru Kigler-potunau Tokanchi pejnurunenanuko giyakotkalune yegi. ¹⁶ Wa galixachripa katko wale gognetkaako, seyni wa malixakletu giklukanuw-nayegjixko. ¹⁷ Tyekaka getkalurkaka kamrujetanna wa galixachine. Gita giwakaya ruknokinrina kamchine. Gerotu patokanchikaka yanumatinnna. ¹⁸ Koschekanruna ginnukaka. Rurinrina kamakalu gi wa rumtukanna. Wa yayixachine gogo rutakamyotanna. Ruglewatanna.”

¹⁹ Wa Gitsrukaachi gali yanumsayegletinitkana, tengogne yoptotikatka. Tuplatatka Goyakalu potuklesretate. ²⁰ Wanna gishpakamtatka. Runkakle-watna pasretamnunanukaya. Wa Gitsrukaachi gikamrurewatna. Wanneya

Goyakalu kamrujetlu getkalurkaka. Gitsrukaachi poyegitlu tokanu wa getkalurkakayma. Wane gixkalurupa.

Kiglerpotunanu Tokanchi Kpashiri Lokasu Yonatanru

Teyogwilo chinanupni

¹ Wane rixa. Gi gepika yagota yonretlu wixa yegi kamrutikalurutkapi-rana. Yagota ginkakpokwakletluna. ² Waneko pixka rixna reyinuwakle-wayakawa getachine. Wannanwa tokanchi kamruklerune. Ga wa wanna samyokwu tyekakapirana. ³ Giyagni kigle getle nixlu gita koxa nyonyegityi, kshinikanuru potu Teyogwilo. Rixpokotyawaka nunkakyi. Gi rixanu rey-inuwakayakawa nomkaginshinikanpiranpotutlu, ⁴ pumatpotutyaplu koxa pixa moyegitkalurni wa tokanchi punkakikolu.

Gwa Katlewakleru girune

⁵ Gotechijne pogire Giroreklnananu, waneru satu sasertote, Sakariya giwakatletachri, Gawiylkipishaneyma gitaakaluru. Ganunronwa Gaaroklopisha. Gilisawetinwa tgiwaka. ⁶ Ga wa gepiko poyagkakachinni Goyakalu getanuya. Muklukanuwnakane. Romkagitoluna pejnuruko Gitsrukaachi yakanatanru, Wale gitakanru. ⁷ Gi kwugenna gi rixanu migatni Gilisaweti, ga wa gepiko gi gepika walapu waneyanatkana.

Gwa gishpakte ginkakagnaputka

⁸ Wa gipapko gapokinpatka sasertote kamrure kamrutinri Goyakalu getanu, wane rixa. ⁹ Sasertotene gixjetyawaka, wale gitaaka yochpikyaplu pgamlupagiri. Kpashiwaka potu Gitsrukaachinu jigloka. ¹⁰ Pejnuruneko gixolune yine maleka gagjigognenaty yochpiikakopshini pgamlupagiri.

¹¹ Gitsrukaachitorreru gipgujewnayegitlu. Pgamlupagiri yochpikjetikowakakwa potuklesretate tunwata. ¹² Wa retinitkalu Sakariya, kojwakanshinikanutnanwa. Tsru piklu rixa. ¹³ Ga wa Goyakalutowreru wane chinru, "Sakariya, gi piknu. Gi rixanu pagjigognere jemka. Ga wa pganunro Gilisaweti gishpaakakanru puturu. Gwa pgiwakatanru. ¹⁴ Pumuwanatu. Pumjikanu. Gixo yine gimuwatanu rushpakinri chinanupa. ¹⁵ Gi rixanu tsrupni Goyakalu getanu. Gi wa wingako ruranu. Gi wa kapsagaluko ruranu. Giwekkaluru Kpashiri gwagajitanru potu rixanu, runronanwakyakawa. ¹⁶ Gixo Gisrayiliklopishane satkakanu puturupa Gitsrukaachi Royakalutna yegi. ¹⁷ Giwekkaluru, Giliya pixka, ga wa ruyakleya runanu. Ma mapookanuwa Gitsrukaachi, wale gapka kosekanu. Wale satkakgajinshinikanutanna girchne wugenenna yegi; ga wa kaalirurerune satkayapa kanshinikanurune rixinripna poyagkakachine pixka. Yine galpokotachripni Gitsrukaachi chinanu giglepokotkalunepa."

¹⁸ Sakariya wane chinru Goyakalutowreru, "¿Gi nixpoko gimatletanru? Gi rixanu tsrutssolejinatcano. Ga wa nganunro koxa gi gepika walapu waneyatkalo."

¹⁹ Goyakalutowreru gigitlu. Wane chinru, "Gitni Kawrilno. Goy-akalustsi tunwatatchino. Gitni yokanatkalurno nuynumsatyapyi, ga wa nunkakyapyi tye kiglerupirana. ²⁰ Ga wa xani myanumatkatupyi. Gi pumkata yanumletannu wale wane gixkoklugognepotunanukopa, pma malixtokanutkalchinanno. Gigogne poyagkaakalurupni ntokanu."

²¹ Ga wa yine kagwakanatlu Sakariya. Ruglajitna wa kpashiwaka ramgin-ritka chinanu. ²² Ga wa rushpaktinika, gi rumkata yanumletanatka.

Rumatna wa pagixanu retinrinatka getkaluru kpashiwakaya. Rutsejrig-yejegishatatkana. Myanumatkutannatkani.

²³ Wane rixa. Poyagkaklu wa sasertote kamrure. Rali poyagkakletinitkalu, gipji yatka. ²⁴ Ruknoginitka walegognekaka, kamshirotkani ganunro Gili-saweti. Pamyo ksuru tyogimatnawa. Wane china, ²⁵ “Giyagni wane rixno Gitsrukaachi, wa walegogne retyano konpatetyapatkano yine getanuya.”

Geso gishpakte ginkakagnaputka

²⁶ Patsrujire ksuru chininri Goyakalu yokanatlu gitowreru Kawrili. Satu pokchi Nasare giwakatletachri, Kalilesreta, yokanatlu. ²⁷ Makloji jeji metkatawya yegi yokanatlu. Satu jeji gipiratanrotka, Gosi giwakatletachri, Tawiklopisha. Wala makloji giwaka Mariyini.

²⁸ Wala yegi jigloka Goyakalutowreru. Wane china, “Mariya, gimutkalur-potyi. Pixaymalu Gitsrukaachi.”

²⁹ Tkojwakshinikanutnanwa wale tokanu chinanu. Trutanshinikanuta gi pixkalutuknige wa tye galuklewlu. ³⁰ Giyagni wa Goyakalutowreru wane chinro, “Mariya, gi pikani. Gi rixanu Goyakalu gimutatkayi. ³¹ Xani pmushiwatan. Pushpaakananru puturu. Pgivakatanru Geso. ³² Tyepni wa tsru. Teno potu Gajeru Wgene chinko. Gitsrukaachi Goyakalu genekanru rutsrukati Tawi pogirewatyawaka. ³³ Gakowniklopishane yegi pogirew-gognenatini. Pogirewatyawaka gike rixiniko nikawnanu.”

³⁴ Giyagni Mariya wane chinru Goyakalutowreru, “¿Gi rixpokotanu wa tye? Gi rixanu gi jeji numatawa.”

³⁵ Goyakalutowreru gigita. Wane chinro, “Giwekikaluru Kpashiri ginyegitanyi. Teno potu Gajeru giyakle chikletyegitanyi. Giyagkoxni kpashiripni gishpakachripa wane chinko Goyakalu Wgene. ³⁶ Ga wa petanro. Pumole koxa Gilisaweti wala koxa tutsroginiko tmushiwata. Toturupni. Patsrujire ksuryegitkalo wa migato chinkaluronanu. ³⁷ Gi rixanu Goyakalu gi satuna ma mumkutanutni.”

³⁸ Giyagni Mariya wane china, “Gitsrukaachi wayegrerno. Wane nixikolupa pixa chinyawakpotuko.”

Wala yegi yiaytka Goyakalutowreru.

Mariya salwayegitlo Gilisaweti

³⁹ Walegognekaka tpalnamta Mariya. Kmagkatewaka tya. Teyakawamta. Gotechijne gajeru pokchi tya. ⁴⁰ Sakariyapji tjiglokamta. Taluklo Gili-saweti. ⁴¹ Wane tixatka. Wa Gilisaweti yijnaka galukletinitkalo wa Mariya, wa mturu tonanwaka gajeru ruptekapa. Wa Gilisaweti Giwekikaluru Kpashiri gwagajitanro potu gixachrotkani. ⁴² Tsru saple tixa. Wane china sapleta, “Giglenshnikanyegitkaluryi pixje suxonyegiya. Giglenshnikanyegitkaluru punanwaka gishpakyachripa. ⁴³ ¿Gi nixge gita wa tye giknogyapno, wa Nutsrukate ginro ginyegityawakno? ⁴⁴ Gi rixanu neyijnako galukletiniyakawayi, wa mturu nonanwaka gajeru ruptekapa rumuwle chinanu. ⁴⁵ Giglenshnikanyegitkaluro galixachro, gi rixanu poyagkakikolupa wa tunkakikolupirana, wa Gitsrukaachi ginkakjixyalo.”

⁴⁶ Mariya wane china, Numalwutlu Gitsrukaachi nonshinikanuya.

⁴⁷ Ga wa numuwyegitlu Goyakalu, Nognetkakjeru.

⁴⁸ Gi rixanu mpogireto retyano wayegrerno. Xaniyakawa giglenshnikanyegitkalurno Wane chinannona pejnjurune gimuweekakgognenatachinepa gapkatatachineshaklumnunanukapa.

- 49 Gi rixanu wa Kgiyaklewakleru tsrupirana kamruyegitno.
Kpashiri giwakni.
- 50 Retwamonunanutna pagwashlukaka
gimuwekakgognenatachimnunantu wa pikjene.
- 51 Muchkowamyota. Galixkotnachinewa rajiyna
ga wa ginshinikanuyuna kopalatna.
- 52 Pogirewatyawakna tsrukakalune ruknokya.
Mpogirene tsrune rutaka.
- 53 Kiglerkakaya jinanu rixkakna nachichachine.
Ga wa ponikolune maleshayalune yokanatna.
- 54 Rupxaklu wayegreru Gisrayili,
gi rixanu rushiniklu retwamonrewle,
55 Chinyawakpotukna wutsrukateni,
Gawra ga wa giklopishane rushinityawakpotuko.
- 56 Mapa ksuru Gilisawetyma wane twa Mariya. Wanepnute topji tsatokat-naka.

Gwa Katlewakleru gishpakle

- 57 Ga wa Gilisaweti poyagkakatkalu togogne tushpakkawgenetinripatka, rushpakkatka toturu. 58 Yijnakotinitkana tumwastsitanune ga wa tomolene wa tsru getwamonre rixyalu Gitsrukaachi, rumuwatna walayma.
- 59 Wane rixatka. Yokgipgogne chininri runna wa sajraka gistakletyap-atkaluna wa mturu. Ruru giwakmaka rutakluna, Sakariya. 60 Tugita runro. Wane china, “Gike. Seyni Gwa giwakatko.”
- 61 Wane chinrona, “Gi satuna pumole wane tye giwaka giwakatletachri.”
- 62 Rutsejrigjeyegitluna ruru klu giwaka ralukyalu wale. 63 Ragjitlu pamta. Yonatlu. Wane china, “Gwanwa giwaka.”
Pejnuruneko giglajita.
- 64 Wanekulu Sakariya kotpuknamatka ga wa ginnu. Yanumatatka. Rumal-wutlu Goyakalu. 65 Tsru piklu rixanna pejnuruneko rumwastsitanune. Ga wa psoluko Gotechijne gajeru kmagkatewaka pogiwatya pejnuruko tyepi-rankaka. 66 Pejnuruneko yijnakotachine gimretpiranatlu rajiyna. Wane chinna, “¿Gi gixachrini: xani tye mturu? Gi rixanu waleyimalu Goyakalu.”

Tokanchi reneklewatyawaka Sakariya

- 67 Ga wa Sakariyni ruru, Giwekilaluru Kpashiri gwagajitanru potu. Goy-akalu tokanu reneklewata. Wane china:
- 68 Gimbalwutkalurni Gitsrukaachi, Gisrayiline Goyakalute.
Salwayegitna rayinerutene koshpkapna.
- 69 Wixa yegi rupgujewnakakyalyu Gognetkaklewatachri potu,
satu wayegrerni Tawniklopiša.
- 70 Reynuwakleyakawa wane chinjetyawakpotuko
pejnurunniko kpashirinni tokanchi geneklewatachinniya,
- 71 Gognewatikalurupapirana, wkamnixjeneyegiya,
ga wa pejnuruneko wayegixjeneyegiya.
- 72 Gi rixanu retwamonutna wutsrukateni
ga wa rushiniklu kpashiri tokanu rupiratanru. 73 Wutsrukati Gawrani
rupiratyia Wale kawchinanu
renekyapwu
- 74 Mpiikonepwu wushatkapko wkamnixjeneyegiya,
Wale yegi wkamrurewatnripa,
- 75 Kpashirinepwu, poyagkakachinepwu

Goyakalu getanu psolgogneko wugogne.

⁷⁶ Ga wa pixa, mturu,
teno potu Gajeru tokanu geneklewatachri pchinko
Gi rixanu Gitsrukaachi kosekachripyi
palpokgapotyaplu.

⁷⁷ Rayinerutene pumatkakanu gognewatikalurupirana
kaspukmukochiretikolupna,

⁷⁸ Woyakalute gishiniklewlle ga wa retwamonrewle chinanu,
Wa wale chinanu salwayegitwu
pokamlatachri tengogne potu gishpakyachri.

⁷⁹ Wane rixa pokamlatyegityapna mapshagwaka gwachine,
ga wa gipnalchikle tuplanatachinena,
wkosekikolupa, giglewanshinikanrugapo gayinripa.

⁸⁰ Ga wa mturu tseruwna. Muchkowata Giwekkaluruya. Yineru
mwiyawakanu rawanata walegognepotunanuko wa Gisrayiline yegi rupgu-
jewnini.

2

Geso gishpakte

¹ Wane rixatka walegognekaka. Susa Gakosto yokanrewata psolchijne
gajeneko gitakgiwakatikolupa. Walepirana pogiwata. ² Tye muchinanu
gapka gitakgiwakatikolu wane gixka wa Surchijne girukotlewatychri rixini
Surino. ³ Satkaka waleko gipokchi ya, rutakgiwakatikolupna pejnuruneko.

⁴ Giyagni Kalilchijne gajeru pokchi Nasare yiyatka Gosi. Gotchijne kanika.
Tawi pokchi ya Wele chinikowaka. Tawiklopishni wale. Tawnineru. ⁵ Wa
rutakgiwakatikolupa Mariyayma rupiratanro. Kamshirni wala. ⁶ Wane
rixatka. Wane rawanatinna tpoagyakatkalu togogne tushpakawgenetinri-
patka. ⁷ Tushpaakakatkalu muchinanu toturu. Mkachrichrata tpoiyatkalu.
Prachine wakane nikjetyawaka tuklukakatkalu, gi rixanu maleshayna pa-
gruko pnu guyakatyachine gwajetyawaka.

Goyakalutowreru ginkakapna girukotapratachine

⁸ Walesretako wanena girukotapratachine, maleka gwachine, giruko-
taprayerchnotachine. ⁹ Goyakalutowreru gapyegitna wanna. Gitsrukaachi
gatajiwnale yochigyegitna. Pikpotutna. Tsru piklu rixna.

¹⁰ Ga wa Goyakalutowreru wane chinna, "Gi mpikanu. Gi rixanu kigleru
tokanchi nunkakapgi, tsru gimuwlupirana, pejnuruneko yinenupni. ¹¹ Tawi
pokchi rushpakyia xani gixa chinanu Gognetkaklewatachri. Walenwa Kristo
Gitsrukaachi. ¹² Waleko rumatikolupa: Gikshikanru mturu mkachrichrata
poiyitkaluru; prachine nikjetyawaka giklugachri."

¹³ Walegnapunaru Goyakalutowreruyamatkana gixolune solalone ten-
gogne gajene. Goyakalu gimalwutachine. Wane chinachine:

¹⁴ Goyakalu gimalwutkaluru teno potu Gajeru.

Wa tyechijne gajene yinenupa giglewanshinikanrewlu,
wa giglenshinikanutachinenupa.

Girukotapratachine salwayentaplu prachinepjya

¹⁵ Wane rixatka. Wanna yegi yiyatkana Goyakalutowrerune. Tengogne
yatkana. Ga wa girukotapratachine wane chinkakna, "Wele gayanu xani.
Wetapanru tyepirana wa giknogachri wa Gitsrukaachi ginkakjixyawu."

¹⁶ Giyampotu wane yatkana. Rukshiklona Mariya, ga wa Gosi, ga wa mturu prachine nikjetyawaka giklugachritka. ¹⁷ Wa retinitkaluna, pogitatkaluna wa mturupirana, wa chinikowakna. ¹⁸ Ga wa pejnuruneko yijnakotachine giglajita wa girukotapratachine chinyawakna. ¹⁹ Ga wa Mariya pejnuruko tyekakapirana tumreta tajiya. Tyanshinkanpiranatlu. ²⁰ Satoktakana girukotapratachine. Ralixkotluna Goyakalu ga wa rumalwutluna pejnurukopiranaya, wa yijnakotanruna ga wa retanruna, wa chinikowakpotukna.

Sajruka gistakletikolu Geso

²¹ Yokgippogne chininitka wa sajruka gistakletikolpatka wa mturu, giwakatka Geso, wa Goyakalutowreru giwakatyawaklu, ma nanwakchi mawakanuwa giwakatlu.

Goyakalu yegi raniika Geso

²² Wa poyagkakgognetkatka powralu rutakikolupna, wa Moysisi Tokanu Yukanatkaluru chinyawakpotuko, Gerosale ranikatkaluna, wa Gitsrukaachi renekyapatkaluna. ²³ Wa rixyongatyawaka Gitsrukaachi Tokanu Yukanatkaluru: *Pejnuruneko jejine kotpu Kawugene lemepatini kpashirine chinkalunepni Gitsrukaachi chinanupa.* ²⁴ Wa genekashlu gylatkalurupa renekanna wa Gitsrukaachi Tokanu Yukanatkaluru chinyawaka: *Gepirine kamowane, waka gezi motkoko wgenene.*

²⁵ Gerosale waneru satu jeji, Simo giwakatletachri. Walenwa jeji poyagkakachri ga wa kgipashiregolu. Wale kagwaklu rumnanukikolupna Gisrayiline. Waleyimalu Giwekikaluru Kpashiri. ²⁶ Giwekikaluru Kpashiriya runkaaka gichi rupnanu ma metkanuwatu Gitsrukaachi Kristote. ²⁷ Giwekikaluruya kpashiwakapji yatka. Wa kpashiwakapji ranikinitkaluna rurune wa mturu Geso, wane rixyapatkaluna wa rixjetyawakna wa Tokanchi Yukanatkaluru chinanu. ²⁸ Giyagni wale kampukatkalu. Rumalwutlu Goyakalu. Wane china:

²⁹ “Xani, Gitsrukaachi, petasha yaletanutkalu pwayegreru
giglewanshinikanutachri pchintokanutyawaka.

³⁰ Gi rixanu noygalpotuko netyatkalu gognewatikaluru Pixanu,
³¹ Wa pejnuruneko yine getanu palpkotanru.

³² Pokamlatachripni payinyegiya gipgujewnakakachripa.
Ga wa payinerutene Gisrayiline yochigye gitachripni.”

Simo giglenshnikanyegitna ruru, runro

³³ Ga wa ruru, runro giglajita wa wale wane chinikowaka. ³⁴ Simo giglenshnikanyegitna. Wane chinro runro Mariya, “Pjemanu. Wa Tye gitaka rujrukripna, ga wa yotunomtinripna gixolune Gisrayiline. Rutaaka rumatikalupa rixinripa. Gapatkalurupni Wale, ³⁵ rupgujewninripa gixolunenshnikangaji. Ga wa yogolewapi yoglonshnikanutanyi pixako.”

Gana ginkakletpiranyegitlu Geso

³⁶ Wane koxa twanata Gana, tokanchi geneklewatachro, Panwuri nshicho. Gaseriklopishni. Gixo potu walapu waneyatkalo. Talixinitka, payokgipre walapu tganuru yegi twanata. ³⁷ Gipnagnurutachrotkani, ga wa yokgipi-mole gepkoxamkoje walapu waneyatkalo. Goyechno ga wa gogi gi tushpaka kpashiwakapjiya. Togajirewatirni ga wa tagjigognetirni Gitsrukaachi yegi tkamrurewatya. ³⁸ Walepapko tapoka. Wala koxa gipgujatlu Goyakalu. Walepirana tunkakleta pejnuruneko kagwakachinyegiya, gognewatikaluru Gerosale chinanu kagwakachine.

Satokatkana; Nasare yana.

³⁹ Wa poyagkakinitaluna wa pejnurkakakopirana wa Gitsrukaachi Tokanu Yukanatkaluru chinyawaka, satokatkana. Kalilechijne gajeru pokchi, Nasare, yatkana. ⁴⁰ Ga wa mturu tseruwna. Ga wa muchkowanananumta. Kgimatkaleru potu rixinri. Ga wa Goyakalu gimatlelewle waneylutni.

Kgimatkalerunyeglu Geso

⁴¹ Pawalapkaka Gerosale yana rurune, wa meiyilu yegi, Tsru Gi-knoglushgogne. ⁴² Wa pamole gepi walapu chininitka, Gerosale kanikna meiyilugogneklu, rixjetyawakna. ⁴³ Nikawnagognetinitka, satokatkana. Ga wa mturu Geso Gerosale rutukatka. Gi rumatna rurune rutukin-ritka. ⁴⁴ Kagwakluna rumotsananumtjene yegi rawamtinri. Pagogne yanru yinitkana, rujatkaluna gimolenna yegi ga wa rumatanunna yegi. ⁴⁵ Wa ma mukshiikanutkaluna, Gerosale satokna. Rujgananumtluna. ⁴⁶ Wane rixatka. Mapgogne giknoginitka, kpashiwakapji rukshikyatkaluna. Kgimatkalerune ganikajite tuplanata. Jemanatna, ga wa repomgana. ⁴⁷ Pejnuruneko wa yijnakotjene giglajita rushinikanuwleya ga wa Wale gigityawakna.

⁴⁸ Wa retinitkaluna, ruglajitna. Runro wane chinru, “Noturu, ¿klu chinanu wane pixwu? Gi rixanu, gita ga wa puru gjigayi. Kachingajpotwu.”

⁴⁹ Giyagni Wale wane chinna, “¿Klu chinanu gjigano? ¿Gi ge gimata wa Nuru kamrure numkata kamruretatk?”

⁵⁰ Gi rumata jemluna wale tokanu wa chinyawakna.

⁵¹ Wannayma yopikatka. Nasare yatka. Yijnakotna. Runro taji gim-retpiranatlu pejnuruko tyijnakotanru ga wa tetanrupirana. ⁵² Ga wa Geso tseruwnagimatkalewleta. Ya tseruwnaleta. Pnuteyaka Goyakalu gigleretyawaka kamruta, ga wa yine gigleretyawaka koxa.

3

Gwa Katlewakleru ginkaklewle

¹ Pamole pamyo walapu girukotlewwatininitka Tiweryo Susa, Ponsyo Pilato girukotlewata Gotesretaya. Ga wa Girore girukotlewata Kalilesretaya. Ga wa repuru Wilipi girukotlewata Gitorisretaya ga wa Trakonitesretaya. Ga wa Lisani girukotlewata Gawilinisretaya. ² Sasertotene gitsrukatenne potu rixanatinna Ganasu ga wa Kaygwasu, Goyakalu tokanu ginyegitlu Gwa, Sakariya wgene, yineru mwiyawakananya. ³ Psoluko Gorta Gappgasretchijne yamta. Runkakletananumtlu katlupirana renshinikanutinripna yine, ga wa kaspukmukochiretitkolupna. ⁴ Wane rixa chinyongatyawaka Gisayiya tokanchi geneklewatachri kirukate:

Yineru mwiyawakanu saplewatychri tokanu:

Galpokotanru Gitsrukaachi gatnugapote.

Mpotukatanru gigapkaka.

⁵ *Pejnuruko magkachpalkaka tsepotkalurupni.*

Pejnuruko magkamriji ga wa mturu magka patenkakluktalurupni.

Ga wa katpagapkakalu potukatgapotkalurupni.

Ga wa kamlojgapolu pgayamta rixgapotko.

⁶ *Ga wa pejnuruko yineru getanru gognewatikaluru Goyakalunu.*

⁷ Ga wa Gwa wane chinna gixolune yine gishpakamtachine wale katyapna, "Gimnu pixkalungi. ¿Katu ginkakgi gasukyegityawaklu Goyakalu jgekanupa?" ⁸ Giyagni gkamrutanru geshinikanrewlu gimknu kamrure. Gi wa gyinuwaka wane chinkakletanu, 'Waneywu wutsrükati Gawrani.' Gi rixanu gita wane chingi, Goyakalu gimbata gipgujewnakakletanna Gawraklokishanemka tyekaka sotlukakaya. ⁹ Xani koxa gagmuna sko rapokatka gepchi. Pejnuruko gagmuna kiglejiru mwanutu kayiikalurni. Xirnachri ruknookona. Waneko pixka rixko yineru kigleru kamruchi ma kamrutkanupa."

¿Klu wkamrutanu?

¹⁰ Ga wa gixolune yine gepomgalu. Wane chinruna, "Giyagni ¿klu wkamrutanu?"

¹¹ Rugita Gwa. Wane chinna, "Wa gepi mkachri waneyalutu, renekanru waneyamigetu. Ga wa nikchi waneyalutu waneko pixka rixanu."

¹² Runkoxna gjigawenutachine katikolupna. Wane chinruna, "Yimaklewatachri, ¿klu wkamrutanu?"

¹³ Wale wane chinna, "Gi wa gitaaikaluru pnute gjiganu."

¹⁴ Solalone koxa gepomgalu. Wane chinruna, "¿Ga wa wixa klu wkamrutanu?"

Wane chinna wanna, "Gi satuna mpiikakanu sroschi gjiginriya. Gi koxa gapatlewatanu. Mpoagnutanru gwenukitolu."

Gwa pnute muchkonuruto

¹⁵ Kagwakanatna yine. Pejnuruneko rajiyina gishinikanuwyegitlu Gwa, gikta Kristoni. ¹⁶ Pejnuruneko rugita Gwa. Wane chinna, "Gita galikakni katgi gonuya. Ga wa runa gita pnute muchkonuruto. Gi wa gita gimuluni nkoshpirokayapl yoshmaklejixitsa. Wale katangi Giwekkaluru Kpashiriya ga wa xirnachriya. ¹⁷ Ruplokapre gimyo gwa. Triko powratpotutanru giylakaajetikowaka. Rapatjetanru triknejri rumretyawakapl, ga wa yoxikanru gichicha xirniywaka gike rixiniko muwnakatupa. Waneko pixka rixanunna yinepni. Geshinikanutachine rumretanu, ga wa menshinikanutkane xirnachri ruknokanu." ¹⁸ Giyagni gixo giykolu ga wa pimripirana giykolu kigleru galikakni runkakletna yine.

Yoshmaakaluru Gwa

¹⁹ Giyagni Gwa gjretlu Girore pasreta girukotlewatayachri wa Giroryana repuru Wilipi gnumro chinanu, ga wa pejnuruko mugletu kamrutanru Girore chinanu. ²⁰ Pejnuruko tyekaka pnute potu rixyatka. Yoshmakikowaka rushyayegitlu Gwa.

Geso katka

²¹ Ma yoshmaakonuwa Gwa wane rixatka. Pejnuruneko yine katkatka, ga wa Geso koxa katkatka. Ga wa ragjigognetini tengogne kotpuuka. ²² Wale yegi Giwekkaluru Kpashiri gjrukatk, kamanemnuru. Motkoko pixka rixmanemta. Waneylu tokanchi tengogneya wane chinachri, "Pixni Noturyi nalukanruyi. Pixa gigletanshinikanutno."

²³ Waleko Geso mapamole walapustsitka. Gosi wgene kagwakikaluru.

Geso gitsrukateni giwaakaka

²⁴ Ga wa Gosni wa Gili wgene. Walenwa Mata wgene.

Walenwa Rewi wgene. Walenwa Melchi wgene.

Walenwa Ganasu wgene. Walenwa Gosi wgene.

²⁵ Walenwa Matati wgene. Walenwa Gamo wgene.

Walenwa Nawomo wgene. Walenwa Gesli wgene.

Walenwa Naaka wgene.
²⁶ Walenwa Mati wgene.
 Walenwa Matati wgene. Walenwa Simi wgene.
 Walenwa Gosi wgene. Walenwa Gota wgene.
²⁷ Walenwa Gowana wgene. Walenwa Resa wgene.
 Walenwa Sorowawil wgene. Walenwa Salatili wgene.
 Walenwa Neri wgene.
²⁸ Walenwa Melchi wgene.
 Walenwa Gawti wgene. Walenwa Kosami wgene.
 Walenwa Gelmotami wgene. Walenwa Geri wgene.
²⁹ Walenwa Geso wgene. Walenwa Giliyase wgene.
 Walenwa Goreyi wgene. Walenwa Matati wgene.
 Walenwa Rewi wgene.
³⁰ Walenwa Simo wgene.
 Walenwa Gota wgene. Walenwa Gosi wgene.
 Walenwa Gonani wgene. Walenwa Giliyachi wgene.
³¹ Walenwa Meleya wgene. Walenwa Maynani wgene.
 Walenwa Nata wgene. Walenwa Tawi wgene.
³² Walenwa Gesi wgene. Walenwa Gowe wgene.
 Walenwa Poosi wgene. Walenwa Salmo wgene.
 Walenwa Naasoni wgene.
³³ Walenwa Gaminata wgene.
 Walenwa Gatni wgene.
 Walenwa Pare wgene. Walenwa Gota wgene.
³⁴ Walenwa Gakowo wgene.
 Walenwa Gisaaka wgene. Walenwa Gawra wgene.
 Walenwa Tara wgene. Walenwa Nachori wgene.
³⁵ Walenwa Sarochi wgene. Walenwa Rakawo wgene.
 Walenwa Paleka wgene. Walenwa Gewre wgene.
 Walenwa Sala wgene.
³⁶ Walenwa Kaanani wgene.
 Walenwa Garpaksa wgene. Walenwa Seme wgene.
 Walenwa Nowe wgene. Walenwa Lamechi wgene.
³⁷ Walenwa Matosala wgene.
 Walenwa Genochi wgene.
 Walenwa Gare wgene.
 Walenwa Malereri wgene.
 Walenwa Kaanani wgene.
³⁸ Walenwa Genoso wgene.
 Walenwa Seti wgene.
 Walenwa Gata wgene.
 Walenwa Goyakalu wgene.

4

Geso yantaletka

- ¹ Ga wa Geso Gorta satokyatka. Giwekikaluru Kpashiri gwagajitanrupotni. Yineru mwiyawakanu raniika Giwekikaluru chinanu.
- ² Gepkoxamkojmolgogne tsru kamchi yantaletlu. Gike nika walegognekaka. Ruknoogognetinitka, nachneru.
- ³ Giyagni tsru kamchi wane chinru, “Goyakalu Wgene pixinipa, wane pchinanru tye sotlu jimapro rixinwa.”

⁴ Geso gigitlu, “Wane chinyongayegitkalurutkani: *Gi wa niikalurupje ruwekyayineru.*”

⁵ Tenolu potu magka raniklu. Pshinitsonuji rekakgitlu pejnuruko pogirewatyawaakaka psolchijiko. ⁶ Tsru kamchi wane chinru, “Nutakanyi tye ptowruko chinanu. Ptowruko pogirewle nenekanyi. Gi rixanu gita samyookalurni, ga wa katukta naluka nenekanru. ⁷ Wa pyoptsojityegitinipno pejnuruko pixanpatkani.”

⁸ Geso gigitlu, wane chinru, “Yonatkalurutkani:

Gitsrukaachi Poyakalute pyoptsojityegitanu.

Walepje pkamrurewyegitanu.”

⁹ Giyagni Gerosale raniklu. Kpashiwakapji gwachri tenoptaji potu rutaku. Wane chinru, “Goyakalu Wgene pchininipa, gewi pakaxikamtini. ¹⁰ Gi rixanu wane chinyongayegitkalurutkani:

Gitowrene towutyegitanyi wanna girukotyapyi.

¹¹ Ga wa:

Kashichanyina gimyoyna,

gi pagogneko sotlu putspejxitinripa.”

¹² Geso gигита. Wane chinru, “Kapiranatalutkani: *Gi pyantaletanru Git-srukaachi Poyakalute.*”

¹³ Rali yantaletletinitkalu pejnuruko yantaletlewuya, Wale yegi yiyatka tsru kamchi. Wanepshini retashatlu.

Geso yinuwaka kamrurewleta

¹⁴ Ga wa Giwekkaluru giyakleyma satokatka Geso. Kalile yatka. Psolchijiko walesreta pogiwapiranatyatka. ¹⁵ Wanna ginkaklewawaklepjikaka runkaklewatywa. Gimbalwutkalurni pejnuruneyako.

Nasare giknokikaluru Geso

¹⁶ Nasare yatka, wa tseruwakikwaka. Rixjetyawaka gapnanutikalurgogne jiglokjetlu ginkaklewawakapji. Palna. Retyongata. ¹⁷ Tokanchi geneklewatachri Gisayiya kirukate reneeeka. Koprakatkalo kiruka. Rukshiklu wane china yongatyawaka:

¹⁸ *Gita rawa Gitsrukaachinu Giwekkaluru.*

Gi rixanu Wale tsomitno

*Kiglerpotunanu Tokanchi nenekyapna
kwamanurune.*

*Wale yokanatno kashikanotkalune yegi
nunkakleyaplu gishpakikolupirana.*

Ga wa maygalene yegi, gimrekgalupirana.

Nkoshpakyapna kapsakletkalune.

¹⁹ *Nunkakleyaplu Gitsrukaachi*

gimutlelewle walapute.

²⁰ Saprurutatkalo kiruka. Kamrurewatachri renekatkalo. Tuplatatka. Pejnuruneko ginkaklewawakapji gwanatachine yopukgapotulu. ²¹ Yinuwaka wane chinretna, “Xawakni poyagkaakatka tye Tokanchi Yonatkaluru gixa jemanu.”

²² Pejnuruneko pogitlu. Ruglajyegitluna rumutlelewle tokanuya, wa yanumatnri. Wanna wane china, “*Gi ge Gosi wgenekni wa Tye?*”

²³ Wane chinna Geso, “Pejnurunekgi gixa tye yapkaklu nchinanno, ‘Kpinrewakleru, putuukakinwa pixnanuko. Klunerukta wyijnakpiranyegitanru Kapernawo kamrutikaluruya, gewi koxa puchijneya pkamrutinri.’”

²⁴ Wane china, “Galikakni wane nchingi, gi satuna tokanchi geneklewatachri galuukalurni gichijneya. ²⁵ Galikakni wane nchingi, Giliyaklunau tengoge gishyatkalurunanni. Mapa walapu ga wa patsrujire ksuru rushyanatka, ga wa tsru nachinanni psolchijnekō. Waleklu gi gepikananna gipnagnurutachrone Gisrayilchijneya. ²⁶ Seyni gi satona wanna yegi yokanatka Giliya, seyni Sarepta Pokchi, Sitosreta yokanatka, sato suxo gipnagnurutachro yegi. ²⁷ Giliseyo tokanchi geneklewatachriklunau gi gepikananna gjijrgitutachine Gisrayilchijne gwachine. Seyni gi satuna wa nyi powratka. Ga wa Naama galikakni Suri gajeru powratka.”

²⁸ Giyagni pejnuruneko ginkaklewawakapji gwachine ramewnapotutna, tyepirana yijnakotinna. ²⁹ Palnamtna. Pokchi malekate ranikluna. Pokchi magkatetajgapotuko ranikluna, yotkakyapmakluna gitskata. ³⁰ Seyni Wale wanna ganikajite yapamta. Yatka.

Jeji kamchi waneyalu

³¹ Yopikamtatka. Kapernawo yatka, Kalilesreta gajeru pokchi. Gapnanutikalurgognekaka runkakaklewjeta. ³² Runkaklewlle koglajejetna, gi rixanu tsru gitaakaluru tokanni.

³³ Ginkaklewawakapji waneru satu jeji kamchi puchotlewatachri waneyalu. Wale tsru sable gixa. ³⁴ Wane china, “¡Ya! ¿Gi pixannatkawu Geso Nasare gajeru? ¿Puna pumtukpotutapyawpu? Numatyi katyi Pixa Kpashiryi Goyakalunu.”

³⁵ Geso chigetjetlu. Wane china, “Pochkepyi. Pushpakanutka waley.” Giyagni wa kamchi ganikajitskalaya yawnakaklu. Wale rushpakamtyatka. Gi wa rumtukamtlu.

³⁶ Tsru giglajru rixna pejnuruneko. Wannakakluko giynumsakaka. Wane chinkakna, “¿Klu tokanchinwa tye, gi rixanu tsru gitaakaluru ga wa kgiyaklewaklerni rixa yokanretna kamchine puchotlewatachne? Rushpakamtna.”

³⁷ Pogita piranamtkatka psoluko walesreta sajrukleya.

Geso gituukaklo Petro gimajiro

³⁸ Palnamta Geso. Ginkaklewawakapji yiayatka. Simopji jigloka. Simo gimajirni tsru pachwalu kashichanro. Wala chinanu ragjtluna. ³⁹ Walastsi tunwata. Chigetjetlu pachwalu. Kasputatkalo pachwalu. Waneklu tpalnamtatka. Tupxakatkana.

Rumxikinitka tkachi, gixolune gituukaaka

⁴⁰ Wa rumxikinitka tkachi, pejnuruneko yayixmoletachine ga wa pimrime yayixachine waneyalune, satumnunanuka gagijewnalkakaya ranikyegitluna. Satkaka rutakamyogogota. Rutuukakna. ⁴¹ Kamchi gishpakyegitna gi gepiko koxa. Sablewamtachine wane china saplemtna, “Pixni Goyakalu Wgenyi.”

Seyni rujretna. Gi retasha yanumsaletanna tyepirankakaya, gi rixanu rumatluna Walenwa Kristo.

Runkaklewananumtya Geso

⁴² Gogi rixinitka rushpakamta. Yineru mwiyawakanu ya. Ga wa gixolune yine gjigalu. Yayegitluna. Chipetmakluna wa wanna yegi ma yinitipachi. ⁴³ Seyni Wale wane chinna, “Numkata papokchikaka Kiglerpotunanan Tokanchi ginkaklewletya, Goyakalu pogirewatyawakapirana. Gi rixanu wale chinanukni nyokanatka.” ⁴⁴ Ginkaklewawakapjikakaya runkaklewananumtya Gotechijneya.

5

Gixo potu shimni sajiika ruyakleya

¹ Wane rixatka. Genesare Powgawnaga rawanata. Gixolune yine gach-paklu, Goyakalu tokanu yijnakotinripna. ² Retlo gepi kanawa, gipow-gawnaga gwanatachro. Chalugjetachine gitspakamtanrotka. Rerkachal-netna. ³ Sato kanawa rupteka, Simo kanawate. Simo ragjita ganikajgayaka ranikyaplu. Kanawa tuplata. Runkaklewyegitna gixolune yine.

⁴ Rutuka ginkaklewletinitka, wane chinru Simo, “Tengawaka gyanu. Gi-knokchalnetanu shima gkashichinripa.”

⁵ Simo gigitlu. Wane chinru, “Gitsrukaachi, psolyechnoko wkamrurewputa. Giketsotaaji wkashichhana. Seyni Pixa tokanu chinanu, wuknokanru chalu.”

⁶ Wane rixinitkana gixo potu shimni sajikna. Ruskatana chalnenina.

⁷ Rupxaalunna repnomyoyegitna wa sato kanawa gwanatachine wa rupx-akapyapna. Runna. Gepi kanawa tsepotna. Wane tixa gimxiklepotutana kanawni. ⁸ Wa Simo Petro getinitkalu, Gesosoji rapokamta Petro. Wane china, “Puxrikyegitanno, Gitsrukaachi. Gi rixanu gitni jejno kmukochirerno.”

⁹ Gi rixanu ruglajpotutana ga wa pejnuruneko waleymalune gixoluro shima chinanu wa kashichanrona. ¹⁰ Waneko pixka rixna Gakowo ga wa Gwa, Sewereyo wgenene, wa Simo gipxaalune.

Ga wa Geso wane chinru Simo, “Gi pikani. Xaniyakawa kyinegakler-patkayi.”

¹¹ Chiji kosepowamatkalona kanawkaka. Pejnuruko ruknokamtatkana. Romkagitatkaluna.

Geso gituukaklu gjirgitutachri

¹² Wane rixatka. Satu pokchi rawanatini, waneru satu jeji gjirgitutachripotuna. Geso reta. Yoptsojityegitlu. Chiji yonogita. Ragjilu. Wane chinru, “Gitsrukaachi, palukiniplu pumkata powratletanunno.”

¹³ Giyagni romyokyegitlu. Kamruklu. Wane chinru, “Naluklu. Powrap-attkayi.” Wanekluyakawa gjirgitlu gitukyegitatkalu wale.

¹⁴ Ga wa Geso gjiretakalu gi satuna runkakinripa, seyni, “Pyanu,” chinru. “Sasertote pekakgitapinwa. Penekashatanru powranuya wa Moy-sisi yokanatanru. Walepni nupgjutatjeru wanna chinanu.”

¹⁵ Seyni pnute pogitka Walepirana. Giyagni gixolune yine gapatyegitlu wa yijnakotyapluna, wa rutuukakikolupna yayixleyna. ¹⁶ Seyni Wale gixrikamta. Yineru mwiyawakanu ya. Wane ragjigognetya.

Geso gituukaklu giktegachri

¹⁷ Pagogne wane rixatka. Wale ginkaklewanata. Wane tuplanatna Gwariseyone ga wa Tokanchi Yukanatkaluru yimaklewatachine. Wanna papokchimnunanuka ruyakatyana, Kalilesreta, Gotesreta, ga wa Gerosale koxa. Waneru Gitsrukaachi giyakle rutuukakyapna. ¹⁸ Giyagni pimrine jejine ganiklu satu jeji gjekoya. Walenwa giktegachri. Rujgaluna wa gitoko yoshmakletanruna, Gesostsi rutakyapluna. ¹⁹ Gi ruksikluna gi rixpoko yoshmakletluna gixolune yine chinanu. Panchi gogo ratskotatkana. Washreswa jjirukyaluna gjekoya. Ganikajji Gesostsi rutakluna. ²⁰ Geso getlu wanna galixle. Wane china, “Jeji, pmukochirkaka kaspuukatkayi.”

²¹ Giyagni wa yonchikgapine ga wa Gwariseyone yinuwaka yanshinikan-retna. Wane chinna, “Gi gixachrinwa Tye wa mupashiregnuchi china

yanumsaleta? ¿Katu gimkata kaspukmukochiirewleta? Satupjeru, Goyakalupje."

²² Giyagni Geso gimata wane rixanshinikanutrinra. Rugita. Wane chinna, ²³ "¿Klu chinanu wane gixanshinikanuta tyekaka wa gajiya? ¿Girni wa myapretpotu, wane chinyalu giktegachri, 'Wa pmukochirkaka kaspuuukatkayi,' ga wa wane chinyalu, 'Pyotunotanu. Pyanutka?' ²⁴ Wa gimityaplu wa Gita Yineru Wgenno gitaakalurno tye chijiya kaspukmukochirewletachripa," wane chinru giktegachri, "Pixa wane nchina, Pyotunotanu. Pkoschekjekomtanu. Pyanutka pupji."

²⁵ Waneklu yotunomtakta wa pejnurune wanna getanu. Koscheklu ruklukanatyawakamta. Gipji yatka. Rumalwumtlu Goyakalu. ²⁶ Pejnurunniko giglajitana, ga wa rumalwutluna Goyakalu. Tsru piklu rixna. Wane chinna, "Koglajlewatachri weta xawakni."

Rewi tomgaka

²⁷ Wanepnute rushpakamta. Retlu satu gjigawenutachri. Rewi giwakateltachri, gjigawenutikwaka tuplanatachri. Wane chinru, "Pomkagittanno."

²⁸ Ruknokamtlu pejnurukakako. Palnamta. Romkagitatkalu.

Gijgawenutachine rumnika Geso

²⁹ Rewi tsru nachnewlu kamruta gipjiya. Gi gepikna wane gjigawenutachine ga wa pimrine koxa wannayma tuplanatachine nikikowakaya. ³⁰ Gwariseyone ga wa yonchikgaprenna kegemgana Geso yimaklenyegiya. Wane chinna, "¿Gi rixatka wa wannayma nika, rura, wanna gjigawenutachine, wanna kmukochirerune?"

³¹ Rugita Geso. Wane chinna, "Wa gichkolune gi galuklu kpinrewakleru, seyni yayixachine galuklu. ³² Gi wa nuna ntomgiyapna poyaggakachine seyni wanna kmukochirerune ntomginripni renshinikanutinripna."

Gogajirewlupirana repomgana

³³ Giyagni wanna wane chinru, "Wa Gwa yimaklene gogajirewata gixo kata ga wa ragjigognetkoxna. Waneko pixka rixna wa Gwariseyone yimaklene. Ga wa Pixa yimaklene nikna ga wa runra."

³⁴ Wane chinna Geso, "Gi rumkata gogajirewletna kashimyolu getachine, wanna yegi rawinikopshini gnumrowatachri, xani pixka Gita gimwakopshinna nyimaklene. ³⁵ Runinpatka pagogne wa gnumrowatachri konikol-gognepatka wannaya. Waneklugogne rogajirewatanna wanna."

³⁶ Yapkaklu koxa runkakna. Wane china, "Gikena gamatlu gerotsama wa mkachritsole. Wane rixkoklunu wa gerotsama suskaktsoletlu. Gi koxa pixkakakluni gitsole ga wa gerotsamaya. ³⁷ Gikena giyokgatlu winga gerotu tsapkaka tsrutssoleji. Wane rixkoklunutka winga gerotu suskakanru tsapkakni. Tuyokgata wino. Tsapkaka salewna. ³⁸ Seyni wa winga gerotu tsapa gerotu tuyokgatka. ³⁹ Gi satuna kapokotga girachri galuklu gerotga. Gi rixanu wane china, 'Kapokotga galikaka kiglepotlu.' "

6

Gapnanutikalurgogne yimaklene sustakagwumtlu gitaklugwu

¹ Wane rixatka. Sana yapanatna Gesoyma gapnanutikalurgogne. Ga wa yimaklene sustakagwumtluna gitaklugwu. Gimyoyna jipekamtluna. Nikamtluna. ² Pimrine Gwariseyone wane china, "¿Klu chinanu wane rixna gapnanutikalurgogne wa ginanshichkalurgogne?"

³ Rugita Geso. Wane chinna, “¿Gi ge pagogne getyongapiranyegitlu Tawi kamrutanru wa nachichini wale ga wa waleymalune koxa? ⁴ Gi rixpoko jigglokletlu Goyakalupji. Jimaprokaka gekakgitkalurkaka koscheka. Niklu. Ga wa waleymalune koxa reneka. Walenwa ginanshichkaluru niklu. Saser-totenepej nikanrungi.”

⁵ Wane chinna, “Gapnanutikalurgogne koxa Gitsrukatzno Gita wa Yineru Wgenno.”

Jeji giprigamyotachri

⁶ Wane rixa koxa satu gapnanutikalurgogne. Ginkaklewwakapji jigloka. Wane runkaklewatywa. Wane rawanata satu jeji potuklemyo giprigamyotachri. ⁷ Giruktatluna yonchikgapine ga wa Gwariseyone, wa gapnanutikalurgogne rutuukaklewjetinri. Rujgaluna wa jigyegityapluna. ⁸ Seyni Wale gimathu yanshinkianutanruna. Wane chinru wa jeji giprigamyotachri, “Pytotunatanu. Ganikaji ptunwatanu.”

Giyagni yotunomtakta. Ganikaji tunwata. ⁹ Giyagni Geso wane chinna, “Nepomgangi, ¿girni wa gapnanutikalurgogne muklukanatu kamrutkalurupa, waka kiglerge waka gektutlege? ¿Gognetkaklurge giweklu waka giylalu?”

¹⁰ Geso geknokyegitna pejnuruneko. Wane chinru, “Pomyokanu.” Wane rixa. Ruglewamyotatka. ¹¹ Seprolokpotutatkana. Yanumsayegkakna wanakakluko gi rixpokotanruna Geso.

Wa pamole gepi tsomitka

¹² Wane rixatka walegognekaka. Magka ya. Ragjigognetapa. Psolu yechnoko ruynumattu Goyakalu. ¹³ Gogi rixinikta, tomgana yimaklene. Tsomitna pamole gepi wanna. Yokanatanune chinkoxna. ¹⁴ Wa Simo. Wale rutakgiwakata Petro. Ga wa repuru Gantirishi, ga wa Santiyako, ga wa Gwa, ga wa Wilipi, ga wa Wartolo. ¹⁵ Ga wa Matiyo, ga wa Tomasu, ga wa Santiyako, Galgweyo wgene, ga wa Simo wa Muchkopiranawatachri chinkaluru. ¹⁶ Ga wa Gota, Santiyako wgene. Ga wa Gota Giskaryote. Walenwa samyokjerupa.

Gimta chiji runkaklewatywa

¹⁷ Wannayma yopikatka. Wa gimta chiji rawna ga wa gixolune yimaklene ga wa gixolune potu yine, psoluko Gotesreta gajene, ga wa Gerosale gajene, ga wa tsru wenustsi Tiro ga wa Sitosreta gajene. ¹⁸ Runna yijnakotyapluna, ga wa ragijewnalna rutuukakikolupna. Ga wa kamchine puchotlewatachine kojwakanunena gituukaakalunetkani. ¹⁹ Pejnuruneko gixolune yine galuka kamrukletlu Geso, gi rixanu Waleya rushpaka giyaklu. Pejnuruneko rutuukaka.

Giglenshnikanyegitikolu ga wa “igi waneni!” chinyegitikolu

²⁰ Tunogyegitna yimaklene. Wane china:

Giglenshnikanyegitkalungi kwamonurungi,
gi rixanu gixanni Goyakalu pogirewatyawaka.

²¹ Giglenshnikanyegitkalungi xani nachichachingi,
gi rixanu jinanurunepgi.

Giglenshnikanyegitkalungi chiyagatachingi xani,
gi rixanu gitsolguwtachinepgi.

²² “Giglenshnikanyegitkalunjepgi wa yine gayegixinipgi, ga wa ruxrikye-gitinipgina, ga wa yanginipgina, ga wa ma maluka yijnaklegiwakatinipgina wa mugletu pixka, Gita wa Yineru Wgenno chinanupa.

²³ "Walgogne gimuwatachinepgi. Giptetanu gimuwleya. Gi rixanu tsrupotni gapnutikolupa tengogneya. Gi rixanu tokanchi geneklewatachine wane gixa rutrukatenneya.

²⁴ Seyni jgi wanengi gixa ponikolungi!

gi rixanu waneyatkagi psoluko gimnanukikolu.

²⁵ ¡Gi wanengi gixa jinanurungi xani!

gi rixanu nachichachinepgi.

¡Gi wanengi gixa xawakni gitsolguwatachingi!

gi rixanu wamonuwatachinepgi, chiyagatachinepgi.

²⁶ ¡Gi wanengi gixa wa pejnruruneko yine kiglerune chinanungi! gi rixanu tokanchi geneklewatachine mijene wane gixa rutrukatenneya.

"Gishinikanna gkamnixjene," china Geso

²⁷ "Seyni wane nchingi gixa, yijnakotachingi, gishinikanna gkamnixjene. Kigle getle gixanna gayegixjene. ²⁸ Gagjitanru Goyakalu ruglenshinikanye-gitanna gkamakpiratjene. Gagiigognegyitanna gektutetjene. ²⁹ Ga wa puptagojtjeru pasretgoji koxa penekanru. Ga wa pkonpatatjeru gi wa pumkalu koxa pchipetinri. ³⁰ Katukta gaggitinipyi, penekanru. Ga wa wane pixle konachripa, gi wa psatkakjixanru. ³¹ Gikta gixpoko galuka gixkota gixa wa yineya, waneko pixka pixanna wanna.

³² "Gi rixanu wa gishinikjene gishinikinipa, ¿kluneruya mpoyagnutiko? Gi rixanu kmukochirewaklerune koxa gishinikna wa rushinikjenna.

³³ Ga wa kigle getle gixinipna wa kigle getle gixjene, ¿kluneruya mpoyagnutiko? Gi rixanu kmukochirewaklerune waneko pixka gixa.

³⁴ Wa nserojiprojite genekinna wa gkagwaka nsatkakletjenepa wane pejnupotuko, ¿kluneruya mpoyagnutiko? Wa kmukochirewaklerune koxa sroschi genekjetna wa wane pejnu kagwaka satkakjenepa. ³⁵ Seyni gishinikanna gkamnixjene. Kigle getle gixanna. Nserojiprojite genekanu mkagwaka satkakletkoto. Tsru potu gapnutikolupa. Teno potu Gajeru wgenenepgi. Gi rixanu retwamonutna wa poyagnu mchinkane ga wa muglene. ³⁶ Kgetwamonuklerunepgi, Giru pixka kgetwamonuklerni Wale.

Gi wa kgiklukanuru nchinanru satu

³⁷ "Gi gitakyagoklewatana, gma mutakyagokikotkoxapgi gixa. Gi wa kgiklukanuru nchinanru satu, wa gixa koxa kgiklukanurune gma chinikotkoxapa gixa. Gkaspukiina pimrine, gixa koxa kaspukikalunepgi. ³⁸ Geneklewashatanu, ga wa gixa koxa genekashatko. Yagotkaluru pnute, salyatkaluru, yoshkishkitkaluru, yomitachrinatka yine genekangi. Wa yantapi gixa yantajetinri, walako gyantatiko."

³⁹ Satu yapkaklu runkakna. "¿Rumkatge maygaletu cosekletlu maygaletu? ¿Gi ge kapna rumujruukakanna? ⁴⁰ Yimaklechi gi wa tsrunwa yimaklewachri pnute. Seyni galpokotkaluru yimakjeruko pixka rixanu.

⁴¹ "¿Klu chinanu petlu kapopejiru pumoleygale gwachri, ga wa puygaleko gwachri kaknalu gi peta? ⁴² ¿Gi pchinru pumole, 'Gichikaka. Nwan-ruchi puygale gajeru kapopejiru'? Gi petlu wa puygale gwaknatachri. Sanowashatachriyi. Muchinanu gapka puknokanruchi kaknalu puygale gajeru. Waneklu petpotutanutkalu puknokyaplu pumoleygale gwachri kapopejiru.

Gijiya rumatika satkaka gagmuna

⁴³ "Gi rixanu maleshlu kigleru gagmuna muglejiwletu. Maleshkoxlmu gletu gagmuna kiglejiwleru. ⁴⁴ Gi rixanu gijiya rumatika satkaka gagmuna. Gi rixanu gi wa kawshipiri tjirgika gikersagi. Gi koxa kawshiri tjirgika

gowaji. ⁴⁵ Kigleru yineru raji ponikowle kigleru, kiglekakalu koshpakya. Mugletu yineru ponikowle mugletu mugletkaka koshpakya. Gi rixanu gixo potu rajgajeru yanumsatya ginamaya.

Goyakalu tokanu yijnakotachri

⁴⁶ “Klu chinanu wane nchinno, ‘Gitsrukaachi, Gitsrukaachi,’ Ga wa gi wa nchinyawakgi gkamruta? ⁴⁷ Girukokta nunyegitjeru, wa ntokanu yijnakotachri ga wa wane rixlu, nekakgitangi giru pixka rixa. ⁴⁸ Jeji pixkalutni kamrupjitchri. Wale jitotu. Teno rixlu. Sotlumta gogo ruglepokotlu. Rapompotutini wenu, yoshkigamtlu walepji. Gi rumkata kowjewjeretlu, gi rixanu giplepokotikwala rutaaka. ⁴⁹ Giyagni girukokta yijnakotlu gi wane rixa, jeji pixkalutu kamrupjitchri. Mshikowakanu chiji rutaklu muglepokotikowakanu chiji. Yoshkigamtlu gonu. Waneklu yawnamtanatka. Tsru yawnalu rixana walepji.”

7

Geso gituukaklu satu ksolaloteru wayegreru

¹ Wa rali ginkakletinitka pejnuruko tokanu ga wa yine yijnakotlu. Giyagni Kapernawo yatka. ² Satu ksolaloteru wayegreru ralukanru potu yayixyana. Rupnakastsinatkani. ³ Yijnakpiranyegitlu Geso. Goteyone tsrutene yokanata Wale yegi. Ragijixlu rutskalatyaplu wayegreru. ⁴ Rapyegininitkaluna Geso, ragjipotutluna. Wane chinruna, “Rumulkuni wale wane rixikolupa. ⁵ Gi rixanu rushinikanerutwu. Wale kamrupjjixlu wunkaklewawaklepji.” ⁶ Geso wannayma wane ya. Seyni gi gowukatkalu gipjji, ksolaloteru yokanyegitlu rumatletanune. Wane chinruna, “Gi pkojwakinwa, Gitsrukaachi. Gi rixanu gi numukluyi wa nopji washrempuko pjiglokinripa. ⁷ Tye chinanu koxa gi wa numukluyi netyayi wa nyayegityapi. Seyni wane pchintokanushatanu. Nwayegreru gitukanutka. ⁸ Gi rixanu gita koxa jejno tsru gitaakalune rapukote gwachrino. Gita koxa solalone gitakika. Wane nchinru wa tye, ‘Pyanutka.’ Yatka. Satu wane nchina, ‘Punanu,’ Runa. Wane nchinru nwayegreru, ‘Pkamrutanru wa tye,’ Kamruthlu.”

⁹ Geso yijnakotinri, ruglajita waleya. Ruprotakyegitna. Wane chinna gixolune yine romkagijtene, “Galikaka wane nchingi, gi satuna Gisrayiline yegi nukshikyalu tye pixkalutu galixlewlu.”

¹⁰ Panchi satokinitkana wa yokanatkalue, retatkaluna wayegrechri gitukachritka.

Nayi gajero gipnagnurutachro wgene ruweekaka Geso

¹¹ Wanepnute wane rixatka. Pokchi yatka Nayi chinikowaka. Waleyammuna yimaklene ga wa gixolune yine. ¹² Pokchi gippyaptotestsi rapokinitkana, maleka koshpaaka satu gipnachri satupjeretu toturu runro. Gipnagnurutachroni wala. Gixolune yine pokchi gajene gimotsatlo. ¹³ Wa Gitsrukaachi getinro, retwamonutlo. Wane chinro, “Gi pchiyagatanu.”

¹⁴ Kayegiklu. Kamruklu ruklugyawakamta. Ranikjene tunwata. Wane china, “Makluji, pixa wane nchina, pyotunotanu.” ¹⁵ Giyagni tuplata wa gipnapachritka. Yinuwaka yanumsaleta. Giyagni runro renekatkalu.

¹⁶ Giyagni pejnuruneko pikana. Rumalwutluna Goyakalu. Wane chinna, “Tsru tokanchi geneklewatachri Goyakalunu gipgujewnayegitwu. Goyakalu salwayegitna rayinerutene.” ¹⁷ Pogiwata tyepirana psolchijnepotuko Gotechijneya ga wa psolusretayako.

Gwa Katlewaklerutowrene yokanatkalue

¹⁸ Gwa yimaklene ginkaklu wa pejnuruko Walepirana. Giyagni Gwa tomsatna gepi yimaklene. ¹⁹ Gitsrukaachi yegi yokanatna. Wane chinjixlu, ‘*¿Pixlege wa ginachripyi, waka satlachi wkagwakanu?*’

²⁰ Giyagni wa jejine yayegitlu Wale. Wane chinruna, “Gwa Katlewakleru yokanatwu Pixa yegi. Wane chinjixwu, ‘*¿Pixlege wa ginachripyi, waka satlachi wkagwakanu?*’”

²¹ Wale pshinitsonu rutuukakna gixolune ragijewnalkakayna, ga wa salewnakakjerna, ga wa kamchineya. Ga wa gixo maygalene rumrekgakakna. ²² Rugita Geso. Wane chinna, “Gajewa. Ginkakapanru Gwa getanrukakaya ga wa gyijnakotanrukakaya: Maygalenenanu getatka. Ga wa myankanenanu yanatka. Ga wa gjirgitunatachaine powratkatka. Ga wa majnakonenanu jemashatatka. Ga wa gipnachine yotunkaaka. Ga wa kwamonurune yegi runkakletika Kiglerpotunanu Tokanchi. ²³ Giggleshnikanyegitkaluru mutspetkatu Gitaya.”

Geso gipgjutatyawaku Gwa Katlewakleru

²⁴ Wa yinitkana wa Gwatowrene, Geso yinuwaka ginkakletna gixolune yine Gwapirana, ‘*¿Kluneru wa yineru mwiyawakanuwa getapa?*’ *¿Satu katslu kannipgyalu kowshikanrurge?* ²⁵ Seyni *¿kluneru getapa?* *¿Satu jeji popchimkalurege gitakachri?* Gi rixanu pogirchinepji rawna wale potu mkachri ga wa popchimkalu gitakachine. ²⁶ Seyni *¿klu chinanu wane gya getletapa?* *¿Satu tokanchi geneklewatachirige getapinripa?* Gigi, wane nchingi. Tokanchi geneklewatachri pnute. ²⁷ Gi rixanu walenwa yonpiranyegitkaluru:

Petanu. Gita yokanatlu notowreru Pixa penute.

Wale galpokotanru patnugapote Pixa penute.

²⁸ “Gi rixanu wane nchingi, maleshlu satu suxo gishpakyachri Gwa Katlewakleru pnute tsru. Seyni wa mtserutu potu tengogne pogirewatyawakaya tsruni wale pnute.”

²⁹ Giyagni pejnuruneko yine ga wa gjigawenutachine yijnakonatlu. Poyagkakachri chinruna Goyakalu, gi rixanu katkana Gwa katlewleya. ³⁰ Seyni wa Gwariseyone ga wa yonchikgapine ruknokluna Goyakalu gishinikyawaka wannayako, gi rixanu gi katkana waley.

Mturune gipitu tuplanatachaine

³¹ Wane china Gitsrukaachi, “Giyagni *¿giru pixka nutakanna nyi gimuweekakgognenatachaine?* *¿Kluneru pixka rixna?*” ³² Mturune pixka, gipitu tuplanatachaine. Tomgakakna. Wane chinna:

Wtumlejyegitgi. Gi wa gansata gixa.

Wamonusu gixa yegi.

Gi wa nchiyagata.

³³ “Gi rixanu runa Gwa Katlewakleru. Gi niklu jimapro. Gi ruuro winga. Wane nchina, ‘Kamchi waneylu.’” ³⁴ Nuna Gita Yineru Wgenno. Nikachrino ga wa girachrino. Wane nchina gixa, ‘Getanu. Satu jeji tsru nikalu. Winga kgirakleru. Gjigawenutachine ga wa kmukochirerune gipxaalu.’” ³⁵ Wa gimatkalewlu potukalu gekagkitka pejnuruneko wugenene chinanu.”

Simopji Gwariseyo rawanatini Geso

³⁶ Chanixlu satu Gwariseyo waleyma nikinripa. Giyagni Gwariseyopji jigloka. Nikjetikowaka tuplata. ³⁷ Wane tixa. Tsru pokchi wanero sato suxo kmukochirewaklero. Tumatinitka wa Gwariseyopji tuplanatini, pastono pgamlugalo tanika. ³⁸ Gitjimne twanata gjixistsi. Chiyaganata. Tyinuwaka

gigakajixletlu toktegaya. Tojiwutsa tsheyityalu. Tamlujixitlu. Ga wa tuyok-gatlu wa pgamlugalo.

³⁹ Wa Gwariseyo getinri, wa tomgajeru wane china ginanwakaya, “Goy-akalu tokanu geneklewatachri rixkamka wa tye, rumatanmaklo girni wa twu suxo ga wa gi pixkalotni wa kamrukjero. Kmukochirewaklerni.”

⁴⁰ Giyagni rugita Geso. Wane chinru, “Simo. Satu tokanchi naluka ginkakletyi.”

Wale gigita, “Wane pchinanu, Yimaklewatachri,” china.

⁴¹ Wane china Geso, “Satu sroschi marnewatyachri waneeylu gepi ri-wishkatjene. Satu riwishkatlu pamyo pachaproj. Ga wa satu, pam-yomoleproj riwishkatlu. ⁴² Maleshayna wa wenutyapluna. Giyagni kaspukyana gepiko. Giyagni ¿giru wa gepi rixinrina gishinikpotutlu?”

⁴³ Rugitlu Simo. Wane chinru, “Goo. Wale getko wa gixo potu kaspukikaluru.”

Giyagni wane chinru, “Wane potuko pchina gigleta.”

⁴⁴ Reknokyegitlo wa suxo. Wane chinru Simo, “Petlo twu suxo. Njiglokapjity. Gi penekno gonu nojixi chinanu. Seyni wa twu tugaklu nojixi toktegaya ga wa tojiwutsaya tsheyitlu. ⁴⁵ Gi wa pamlutno. Seyni wa wala njiglokiniyakawa gi tkaspuka gamlujixletno. ⁴⁶ Gi wa ringi puyokjiwutno, seyni wa twu pgamlugalo tuyokjixitno. ⁴⁷ Giyagni wane nchinyi, gixoluru tmukochire tkaspukika. Giyagni tushinikpotutno. Ga wa ptsotsotajiko kaspukikaluru ptsotsotaji rushiniklewata.”

⁴⁸ Wane chinro wala, “Pmukochirkaka pkaspukikatka.”

⁴⁹ Giyagni Waleyma tuplanatachine yinuwaka wane chinanshinikan-retna, “¿Gi gixachringe wa Tye, wa mukochri koxa kaspukachri?”

⁵⁰ Giyagni wane chinro suxo, “Palixle gognetkakyi. Pyanutka. Kiglen-shinikanpatkayi.”

8

Suxone, Geso gipxakachine

¹ Wanepnute wane rixatka. Papokchimnunanuka, tsru pokchi ga wa mturu pokchiya runkaklewananumta. Kiglerpotunanu Tokanchi runk-akletanumta Goyakalu pogirewatyawakapirana. Ga wa pamole gepi Waleyma. ² Ga wa pimrone suxone gituukaakalune kamchinea ga wa yayixlukakaya. Mariya wa Maktala gajero chinkaluro. Walaya payokgipre kamchinea giknokikaluro. ³ Ga wa Gwana, Chosa gnumro, Girore gitakanru, ga wa Sosana, ga wa pimrone gixo. Wanna gipxakna wane rixleyna.

Yapkaklu kgitaklewaklerupiran

⁴ Gixolune potu yine Waleyma papokchimnunanuka giyakatyachinni. Wale yegi yatkana. Wane china yapkakluya,

⁵ “Satu kgitaklewakleru gishpakanita. Kopalajtapa. Kopalajtini, pimriji gatnugapostsi gapokajita. Rakatooka. Ga wa teno yapachine koshichine niklokitjitu. ⁶ Pimriji sotlu gwiywaka gapokajita. Rupcheknimka. Ruprigana gi rixanu gi kgachijiyeginru. ⁷ Pimriji kona yegi gapokajita. Konaymananuko tseruwna. Ga wa kona kapotanatkalu. ⁸ Ga wa pimriji kglewaka chiji rapokajita. Rupchekatka. Jiwatatka. Ruxolewnapotuta.”

Wane chininitkalu tyepirana, wane china sapleta, “¡Girukokta kajnakop-nalu wa yijnakotinripa, yijnakotanu!”

Geso ginkakpokowakatlu yapkaklu kgitaklewaklerupiran

⁹ Yimaklene gepomgalu klnerni wa tye yapkaklu. ¹⁰ Wane china, “Gixa geneeka gimatyaplu giyogimanatkaluru Goyakalu pogirewatyawakapirana. Seyni wa pimrine, yapkakluya,
Wa retinna ma metkanupna.

Ga wa jeminna ma mumatjeminitipna.

¹¹ “Ga wa tyenwa yapkaklu. Wa kajirujni wa Goyakalu tokanu. ¹² Ga ga wannanwa gatnugapostsi gwachine, wa yijnakotachine. Gowukshini runa tsru kamchi. Rajgajerna tokanchi konanna, ma malixinitipna, ma mognetkakikotupna. ¹³ Ga wa sotlu gwiywaka gwachine, wa yijnaktokanutintikaluna, rumuwleyna yoptyotluna tokanchi. Seyni gi wa waneyna git-skina. Wa pshinitsonu galixachinepa, wa yantaletlewlpapko gapokini ruxrikirinrina. ¹⁴ Ga wa kona yegi gapokajitachine, wannanwa yijnakotachine. Wa wane yinina, kojwakanishinikanrukaka, ga wa ponikowlu, ga wa meyiwlukaka tye gwashluya kapotlu tokanchi. Gi wa jiwanatatkana. ¹⁵ Ga wa kiglewaka chiji gapokajitachine, wannanwa potukgajirune, kigle gajirune. Yijnakotluna tokanchi. Kamrutmuna. Kashnantakgognenatinrinra. Jiwatinrina.

Maleshu wa yogimatkaluru ma mupgujetikotupa

¹⁶ “Gike yochpiklo katalo yantapistono yogimatayaplo, waka shechi rapukote rutakyaplo. Seyni wa katalo kgapi tutaako, wa jiglokachine getyaplu tpokamlanu. ¹⁷ Gi rixanu maleshu wa yogimatkaluru ma mupgujetikotupa. Gi wa pochkeruko mumatkotupni ga wa mpogijetkotupni. ¹⁸ Xakoka wa gyijnakotanru. Gi rixanu wa waneyalutu reneeka. Ga wa waneyamigjetu, waneyapgtulu konikona.”

Geso ginro ga wa repurune

¹⁹ Runro ginyegitlu ga wa repurune. Gi rumkata gapyegletluna gixo yine chinanu. ²⁰ Runkaaka. Wane chinruna, “Punro, pepurune maleka rawna. Raluka getletyina.”

²¹ Giyagni rugitna. Wane chinna, “Nunro ga wa nepurune wannanwa yijnaktokanutlu Goyakalu, ga wa kamrutmuna Wale chinyawaka.”

Geso gituukaklu kannipgyalu

²² Wane rixatka pagogne. Sato kanawa rupteka yimakleneyma. Wane chinna, “Tsru wenu wakanute gayanu.” Rutspegtakana.

²³ Koprugatinikopshinna Wale gimkamta. Ga wa yopyoka tsru kannipgyalu tsru wenuya. Tuygajetlo kanawa. Kyowikolini. ²⁴ Yayegetluna Wale. Komyekluna. Wane chinruna, “Gitsrukaachi, Gitsrukaachi, wupnannatka.”

Giyagni yotunota. Chigetjetlu kannipgyalu ga wa gishpurga. Rutukatka. Mayegixgataa rixanatka. ²⁵ Wane chinna, “¿Ginakatkalu galixle?” Pikanna. Ruglajitanna.

Wane chinkakna wannakakluko, “¿Gi gixachrioxnige wa Tye, wa kannipgyaluymawaka towuta ga wa gonu? Ga wa yijnakotka.”

Geso gituukaklu Geraseno kamchichachri

²⁶ Gerasenonechijne rutspakna. Walenwa Kalile wenne wakanute. ²⁷ Wa ruptekinitka kanawaya, yoptyotaplu satu jeji pokchi gajeru, kamchine waneyalutu. Gowukshini potu mamkatunatka. Gi panchiko rawa, seyni yomlechi rawa. ²⁸ Wale getinri Geso, siplewata. Chiji rapokamta Walesti. Tsruplaji rixa. Wane china siplewleta, “¿Gi pixanutkano Geso, Goyakalu teno potu Gajeru Wgene? Nagjityi gi wa psaletpotutanno.” ²⁹ Gi rixanu Wale yokanatatkalu kamchiya wa jeji rushpakinripatka. Gi rixanu gixkamaka kashichkatka. Rostutka. Yowumatsa rostutikamka. Ga wa supo

yoshmakjixitka. Seyni sustonganru yowumatsni. Kamchi yokmentatlu yine mwiyawakanu yinripa.

³⁰ Geso gepomgalu, “¿Klu giwakyi?”

Wale wane china, “Gixoluru.” Gi rixanu gixo potu kamchine jigloklu wale.

³¹ Ragjtluna gitskata potu ma yin tipna. ³² Wanenanru magka gixoluru kochi. Nikanatna. Ragjtluna Wale yokanatyapna kamchine kochine jiglok-inripna. Giyagni yokanatna. ³³ Giyagni jeji rushpakamtyatkana kamchine. Kochine jiglokamtatkana. Gixoluru kochi gipjita gjrukya. Tsru wenu rapokanna. Wane ragyekyanna.

³⁴ Wa kochine girukotachine, wa retinitkaluna wane rixinitka, rasukamtna. Runkaklewatna tsru pokchiya, ga wa sana gajene koxa. ³⁵ Runatkana retapyapluna wane gixachritka. Ga wa Geso yegi yana. Retamtluna wa jeji kamchine gishpakamtinritka. Tuplanatatka wa Gesojixistsi. Kamkatkalu. Kanshinikanutkalu. Pikanna. ³⁶ Runkaklewatna wa getanattachine gi rixpoko gigletkotatka wa kamchitpachritka. ³⁷ Giyagni pejnuruneko gixolune Gerasenonesreta gajene gagjitu yinripatka wan-nayegiya gi rixanu tsru piklu rixanna. Wa Wale kanawa ruptekatka. Satokatka.

³⁸ Ga wa wale jeji wa kamchine gishpakinritka ragjitlu Waleyma rixinri-patka. Seyni Wale yokanatlu. Wane chinru, ³⁹ “Psatokanu. Pupji pyanutka. Punkakletanru Goyakalu gixyawakatkayi.” Wale yatka. Psolpokchiko runkakletamtyatkalu Geso gixyawakatkalu.

Gayro nshicho

⁴⁰ Wa Geso satokinikta kigle yoptole rixluna gixolune yine, gi rix-anu pejnuruneko kagwakanatu. ⁴¹ Rapoka satu jeji Gayro giwakatlet-tachri. Walenwa ginkaklewawakapji gitsrukate. Gesojixistsi yoptsojimatma. Ragjtlu gipji yinripa. ⁴² Gi rixanu waneylu satopjeroto rushicho. Wala pamole gepi walapu waneyatka. Tupnakastsinatkani.

Yanananumtiniwa gixolune yine gachpaku.

Sato suxo kamrukamkaptostsitaplu Geso

⁴³ Sato suxo gigragalewatachrona. Pamole gepi walapu gigragalewat-achrona. Gixo kpinrewaklerune chinanu tnikatlewatanatka ptowruko walanuko tixinri. Gikena gimkata gituukakletanro. ⁴⁴ Gitjimne tyapamta. Tkamrukamkaptostsitaplu. Wanekluyakawa tutskikagragatata.

⁴⁵ Giyagni Geso wane china, “¿Katu kamrukapno?”

“Goo,” chinna pejnuruneko. Giyagni wane chinna Petro ga wa waley-malune, “Gitsrukaachi, gixolune yine gachpakyi ga wa kachinekyina.”

⁴⁶ Seyni Geso wane china, “Satu kamrukapno. Gi rixanu Gita gimata wa giyaklu gishpakamta Cityegiya.”

⁴⁷ Giyagni wa suxo getnawa gi wa tyogimatnawa, gitatachro gina. Tyopt-sojityegitlu. Pejnuruneko getanu tunkakletnawa klu chinanu tkamruklu, ga wa wanekluyakawa tutukinritka.

⁴⁸ Wale wane chinro, “Wiwi, palixle gitskalakyi. Pyanu. Kiglenshinikan-patkayi.”

Geso yotunkaklo Gayro nshicho

⁴⁹ Yanumsatiniwa Wale, ginkaklewawakapji gitsrukatepji runya satu. Wane china, “Pshichni tupnanatka. Gi pkojwakanutkalu Yimaklewatachri.”

⁵⁰ Yijnakotinitkalu Geso, rugitlu. Wane chinru, “Gi pumyekanu. Palixas-hatanu. Ga wa tutskalganu.”

⁵¹ Panchi yatka. Gi satuna retasha jiglokleta Waleyma, seyni Petro ga wa Gwa ga wa Santiyako, ga wa mturo giru ga wa tunro wannapje. ⁵² Pejnuruneko chiyaganata, ga wa kegeknanuwatna. Wale wane china, "Gi nchiyagatanu. Gi wa tupna seyni tumkanata."

⁵³ Ruxpiranatluna gi rixanu rumatna wa tupnirrinatka. ⁵⁴ Ga wa Wale kosemyotlo. Tomgalo. Wane china, "Mturo, pyötunotanutka."

⁵⁵ Giyagni satokatka tuwekinri. Waneklu tyotunotatka. Renekjix-akalo tnikanru. ⁵⁶ Turune giglajinatachine. Wale gjiretna gi satuna ma munkakinitipna wa wane gixkalurutka.

9

Pamole gepi yokanatka

¹ Tomsatna pamole gepi yimaklene. Renekna giyaklu. Rutaakoxna wa rutuukakyapna satumnunanuka yayixlu, ga wa pejnuruneko kamchine chinanu. ² Yokanatna Goyakalu pogirewatyawaka runkakletinripna, ga wa rutuukaklewatinripna. ³ Wane chinna, "Gikena ganikanu wa gatnugapoya, gi wa kanojerchiko, gi wa tsapako, gi wa gnikanruko, gi wa sroschiko, gi wa gepimkaluko ganikanu. ⁴ Ginakakotka gjiglokanu satu panchi, wane gwanu, ga wa wane gishpakamtinpotunanuko. ⁵ Wa pejnuruneko wa gma yoptojetjenepa, gishpakamtinpatka wa wane pokchiya, giplokjiximtanu gistarpijixipagi wa rumatikolupna."

⁶ Giyagni rushpakamtna. Papokchimnunanuka yana. Runkakletluna Kiglerpotunanu Tokanchi. Pasretamnunanuka rutuukaklewatyana.

Gwa Katlewakleru gipnale

⁷ Giyagni Girore pasreta girukotlewatyachri yijnakotinitkalu pejnuruko wane gixkalurutka, gi rumatanshinikanuta, gi rixanu pimrine wane china, "Gwa gipnachinetskalaya yotunomtyatka." ⁸ Pimrine, "Giliya gipgugjewnatka," china. Ga wa pimrine, "Satu wa tokanchi geneklewatachinni muchikawlurunniyegiya yotunotatka."

⁹ Wane china Girore, "Gwa nustaknoojixanru. Giyagni Ɂkatni xani wa tyekaka njempiranyegitanru?" Giyagni raluka getletlu. Satokatkana yokanatanune. Pejnuruko runkakluna wa kamrutanruna.

Pamyo waragkane geneka nikletka

¹⁰ Ranikna. Rutspalamta wannayma. Papokchi Wetsayta chinikowaka yana, wanna mkoje. ¹¹ Wa rumatinitkana wa gixolune, romkagitluna. Ga wa Wale yoptotna. Goyakalu pogirewatyawakpirana runkakna. Rutuukakna wa galuka pinitkalune.

¹² Rumxiikastsitkani, pamole gepi yayigitatkalu. Wane chinruna, "Pyokanatanna wa gixolune yine papokchikaka yinripna ga wa sankaka tyesretaya. Wane ruknokakyapluna goyechno. Rukshikanruna nikarupna. Gi rixanu gewwu wa yineru mwiyawakanu."

¹³ Wane chinna Geso, "Gixa genekanna wa nikarupna."

Wane chinruna, "Maleshayanwu. Pamyo jimapropje waneywu, ga wa gepi shima. ɁWaka wixlege yanu wagjitapayplu niikaluru nyi pejnuruneko yine chinanu?" ¹⁴ Gi rixanu wangetkona pamyo waragka jejine.

Giyagni wane chinna yimaklene, "Ntuplajixanna paptogkaka pamyomolkaka." ¹⁵ Wane rixna. Pejnuruneko tuplata.

¹⁶ Geso gwali pamyo jimapro ga wa gepi shima. Tengogne yigata. Ruglen-shinikanyegitlu. Wa jiknajrotlu. Renekna yimaklene rutspamtinripna

gixolune yine yegi. ¹⁷ Nikatkana pejnuruneko. Jinanna. Koschekluna gixetachritka psojkaka pamole gepi kojita katsepo, ga wa shima koxa.

Petro gipguitalewata

¹⁸ Wane rixatka. Walepjé chininitka ragjigogneta. Wanestsi rawna yimaklene. Repomgana. Wané chinna, “¿Wa gixofune yine katu wane chinna Gita nchininri?”

¹⁹ Wanna gigitlu. Wane chinna, “Gwa Katlewakleru. Pimrine, Giliya. Pimrine, satu Goyakalu tokanu geneklewatachinni muchikawlurunni yotunotyachritka.”

²⁰ Ga wa Wale wane chinna, “Ga wa gixa ¿katu wane chinno?”

Rugita Petro. Wane chinru, “Goyakalu Kristotyi.”

²¹ Rujretna ma yanumsatinitipna Walepirana gikena. Wane china, ²² “Numkata Gita Yineru Wgenno salewnaleta gixo, nma yoptotikotupa tsruneya, tsrukakalune sasertoteneya, ga wa yonchikgapineya; nuylatikolupa. Nyotunotanu mapagogne rixinri.”

Geso gomkagitachine gimkata kamruretanru

²³ Geso wane chinna pejnuruneko, “Katukokta galuka gwagajxigletno raalixinwa walenanuko. Pagognemnunanuka rawanro koroshishkitate. Romkagittanno. ²⁴ Girukokta galuka gishatkapletlu wa ruwekinri, ruwekinri ramginina. Girukokta gamtakanru ruwekinri Gita chinan rushatkanru. ²⁵ Gi rixanu ¿klu gaprini wa yineru psolchijikmaka wane rixetanu, seyni ramginina ga wa salewninina? ²⁶ Katukokta gipatewatanro ga wa ntukanuya koxa, Gita Yineru Wgenkoxno gipatewatanru wale wa nuninipa natajiwaleyma ga wa Nurunu, ga wa kpashirine Goyakalutowrenuneyma. ²⁷ Galikaka wane nchingi, pimrine gewi gwachine gi wa getumganru gipnalu ma metkanuwalunachi Goyakafu pogirewatyawaka.”

Geso kogetkogatka

²⁸ Wane rixatka. Rali chinretokanuta. Wanepnute yokgippogone gi-knoginitka, ranikna Petro ga wa Gwa ga wa Santiyako. Magka kanikna, ragjigognetapa. ²⁹ Wane rixa. Ragjigognenatini satuko kogetkogatka. Ga wa gimkulu klatalu, katajiru. ³⁰ Waneklu gepi jejine giynumsatl Wale. Wannanwa Moysisi ga wa Giliya. ³¹ Goyaknu rumupgujewnana. Rupnalepapirana ruynumsatna, wa Gerosalema poyagkakanrupa. ³² Ga wa Petro ga wa waleymalune ruxapnewpotutanna. Wa ruyokanatinna retluna royaknu ga wa gepi jejine Waleyma tunwanatachine.

³³ Wane rixatka. Rutspalyegintinitkaluna, Petro wane chinru wa Geso, “Gitsrukaachi, kigleru gewi gawinri. Wkamrutanru mapa gimajechri. Pix-anupa satu, Moysisinupa satu, wa Giliyanupa satu.”

Gi rumatanshikanutinna Petroni wa wane chininri. ³⁴ Tyekaka wane chinanatiniwa, runa kyachgapererumko. Wale chikletyegitna. Pikanna wa kyachgapererumko jiglokamtinenna. ³⁵ Waneylu tokanchi kyachgapererumkoya, wane chinachri, “Tyenwa Noturu ntsomitanru. Wale gyijnakotanu.”

³⁶ Wa tokanuwninitka, Gesopje retatkana. Ruchrokanna. Walegognekaka gi satuna runkakna wa retanruyna.

Geso gituukaklu mturu kamchichachri

³⁷ Wane rixatka. Waleprikgogne magka yopikinitkana, gixolune potu yine yoptotaplu.

³⁸ Waneru satu jeji wa gixolune yineymalutu. Saplewata. Wane china, “Yimaklewatachri, nagjityi noturu petinripa. Satupjerutu noturni. ³⁹ Petanru.

Kamchi kashjetanru. Walegnapunanu sablewjejetana. Shipchojtakakjetanru. Ratpotposolnamjetana. Gi raluka kaspukletmaklu. Saletjetanru.
40 Nagjitna pyimaklene maleka ruknokyapluna. Gi rumkatluna.”

41 Rugita Geso. Wane china, “¡Ya nyi gimuweekakgognenatachine malixkane, mpotukane! ¿Gi pejnugognenanukta numwanutkagi? ¿Gi pejnugognenanukta nakotyagi? Panikanru puturu gewi.”

42 Ranikiniwalu, kamchi yotkakanru. Shipchojtakakpotutanru. Ga wa Geso chigetjetlu kamchi puchotlewatachri. Rutuukaklu mturu. Ruru renekatkalu.

Geso ginkakagnaputatnaklu rupnalepapirana

43 Pejnurunniko giglajitana gi rixanu retluna tsru potu kamrutanrukaka Goyakalu. Ga wa ruglajinatinna pejnuruneko wa pejnuruko kamrutanruya, wane chinna yimaklene, **44** “Tyepirankaka gajnakokpotutanu gixa. Gi rixanu Gita Yineru Wgenno samyookalurupno yinemeyoya.” **45** Seyni wanna gi rumata jemlewatanna tye tokanchi. Wannaya yogimatkaluru ma mumata jemyanupluna wanna. Pika gepomgaletluna tye tokanchiya.

¿Girni wa tsrupotu?

46 Giyagni rugjekakna girni wa wanna tsrupotu. **47** Giyagni Geso gimatlwa yanshinikanutanruna raijiyna. Koscheklu satu mturu. Walestsi tun-wakaklu. **48** Wane chinna, “Girukta yoptotlu satu tye pixkalutu mturu, Gita giwakaya, Gita yoptota. Girukta yoptotno nyokanatjeru yoptota. Gi rixanu wa mturu potu gixa yegi, walenwa tsru potu.”

Wma kamnixjetni wixasretni wale

49 Giyagni rugita Gwa. Wane chinru, “Gitsrukaachi, wetlu satu wa pgiwakaya ruknokyana maleka kamchene. Wujretlu gi rixanu gi romkagitwu wixa.”

50 Goso wane chinru, “Gi wa gjretanru. Gi rixanu wma kamnixjetni wixasretni wale.”

51 Wane rixatka. Wa poyagkakastsitkalu gigogne wa teno ranikolpatka muchkotanshnikanutnawa Gerosale yinripa.

Geso chigetjetna Santiyako ga wa Gwa

52 Yukanatna gepi ginkaklewatachinepa Wale penute. Yatkana. Samarya gajene pokchi rapokna wa ralpokotyapluna Wale chinanu. **53** Gi yoptotluna gi rixanu Gerosalesreta yigata.

54 Retinitkaluna yimaklene Gakowo ga wa Gwa, wane chinna, “Gitsrukaachi, ¿gi ge paluklu wtowutyaplu xirnachri gjrukhanu tengogneya, nikatyapna?”

55 Giyagni Geso satkapyegitna. Chigetjetna. **56** Papokchi yatkana.

Geso gomkagitchine

57 Gatnugapo yapamtini, satu wane chinru, “Nomkagitanji ginakakta pyanu.”

58 Goso wane chinru, “Kewnechrone waneyna kapna. Ga wa koshichine tengogne yapachine waneyna rawyawakna. Ga wa Gita Yineru Wgenno maleshayno nutspanjiwutyawaka.”

59 Wane chinru satu, “Pomkagittano.”

“Ga wa wale wane china, “Gitsrukaachi, puchichanno muchinanu gap-kachi wane pyanu. Nuruchi nkapnamtanu.”

60 Giyagni wane chinru, “Gipnachinni. Giyagni petashatanna wan-nananukni gipnachinne kapnatikolupa wannaya. Ga wa pixa pyanu. Punkakletanumtanru Goyakalu pogirewatyawakapirana.”

⁶¹ Giyagni satu koxa wane china, “Nomkagitanji, Gitsrukaachi. Seyni petashgapkatanno nungiyapna nopji gajene.”

⁶² Geso wane chinru, “Girukokta tsru jitlolopagipi kashichachritka, gi wa rajxigiyaka recknoka. Waneko pixka rixmaksa satu nkamrurewyegijeru; wa yinuwaka gikamrurewletno ga wa rajxigiyaka recknoka, gi rumukluni Goyakalu pogirewatayawaka kamrurewatirripa.”

10

Payokgipremolene yokanatka kamrurewatirripa

¹ Wanepnute Gitsrukaachi yokgijtatna pimrine payokgipremole. Wanna yokanata gepkaka Wale penute psolpokchikakako ginakakta rushinika yaleta. ² Wane chinna, “Galikakni gixlu jirgakalurupa. Seyni wa kamrurewakerune gi gixna. Giyagni gagjitanru jirgakalurupa Gitsrukate jirgalyegipa yokanatyapna kamrurewakerune. ³ Gajewa. Gita yokanatgi gowegane pixka kewetnanetskala. ⁴ Gi wa sroschigapimapana ganikanu, gi wa tsapako, gi wa yoshmakjixreko. Gi satuna galukamtanu gatnugapoya.

⁵ “Girupjikokta gjiglokinipa, muchinanu gapka wane nchinanu, ‘Giglewanshinikanrewlu wanepa tyepji.’ ⁶ Ga wa wane rawanatini satu giglewanshinikanrewlu wgene, gixa giglewanshinikanre wale yegi rawanu. Ga wa malesha chinini, satokanu gixa yegi. ⁷ Walepjiko gwanu. Wane gnikini. Wane girini klunerukta waneyna wanna. Gi rixanu wa kamrurewakeru rumkata yoptoletlu kamrure gipekole. Gi wa papjimnu gyanu. ⁸ Girpokchikokta gapokinipa ga wa gyoptotko, gnikanru klunerukokta gitspakikolupa. ⁹ Wane gwachine yayixachine gituuukakanu. Wane nchinanna, ‘Kayegikatkagi gixa Goyakalu pogirewatayawaka.’

¹⁰ “Giru pokchikokta gapokinipa, gma yoptotkoklunupa, wanepji gish-pakamtinitka, pokchi gapka gyanu. Wane nchinanu, ¹¹ ‘Gixa pokchichijne pagi wupxakjxitjeru gixa yegi wsheytanru. Seyni wa tye gimatanu, wa kayegikmakatagi gixa Goyakalu pogirewatayawaka.’ ¹² Seyni gixa wane nchina, wa gakotkalurupa Sotomachijne gajenniya wale pokchi gajene pnute wa walegognepatka.

Myoptotkane pokchikaka jgi waneni! chinyegitkaluru

¹³ “*Ji waneni pixa Korasi Pokchi!* *Ji waneni pixa Wetsayta!* Gi rixanu Tiroya ga wa Sitoya wanepmaklu giyaklewlu wa gixa yegi wane gixikaluru, muchikawamka renshinikanutanmakna kawshistugalu mkachri gitakachine, ga wa chichipagi tuplanatachine. ¹⁴ Seyni gakotkalurupa Tiro ga wa Sito gajenniya gixa pnute wa giklukanuwnalgognepatka. ¹⁵ Ga wa pixa, Kapernawo, tengognepotunanuko pixka putaako. Ga wa gipnachine gwiy-wakpotunanuko pixka putaako. ¹⁶ Wa gixa nyokanatanune yijnakotachine, Gita yijnakotna. Ga wa gixa giknokachine, Gita ruknokna. Ga wa Gita giknokachine, nyokanatjeru ruknokna.”

Payokgipremolene gapokatnaka

¹⁷ Satokatkana payokgipremolene. Gimuwatachine. Wane chinna, “Gitsrukaachi, kamchinenko yijnakotwu wixa pgiwakaya.”

¹⁸ Geso wane chinna, “Gita getlu Satanasyo rawrakle pixka tengogne gjruryachri. ¹⁹ Nutakatkagi gakatsretyapna gimnune ga wa geklone, ga wa geyikyaplu pejnuruko kamnixlewatachri giyakle. Gike gimtukangi. ²⁰ Seyni gi wa gimuwatanu wa tyeya wa kamchinenko yijnakotagi, seyni gimuwatanu tengogne gitakgiwakatikolutka.”

Geso gimuwpotuta

²¹ Waneklu koxa rumuwpotuta Giwekkaluru Kpashiriya. Wane china, “Numalwutyi, Nuru, tengogne Gitsrukate ga wa chiji Gitsrukate. Gi rixanu tyekaka pyogimatyana kgimatkalerune ga wa kanshinikanerune. Ga wa mturune pupguyetyana. Gigi, Nuru, gi rixanu palukyawakni.

²² “Ptowrunanuka Nuru genekyano. Gike gimatlú girni wa Gituru seyni Girchipje gimatlú. Gike gimatlú girni wa Girchi, seyni Giturupje gimatlú ga wa katukta koxa Gituru galuka gimatkakletlu.”

²³ Yimaklene yegi ruprotaka, wannapje rixinna. Wane china, “Katukta getlu wa gixaygale getanru, giglenshnikanyegitkalurni waleygale. ²⁴ Gi rixanu wane nchingi wa gixo Goyakalu tokanu geneklewatachinni ga wa pogirchinni galuka getletmaklu wa gixa getanrutka. Gi wa retluna. Raluka yijnakletmakluna wa gixa yijnakotanrutka. Gi wa yijnakotluna.”

Satu yonchikgapri gimlukanutlu Geso

²⁵ Wane rixaka. Satu yonchikgapri palna rumlukanutyaplu. Wane chinru, “Gitsrukaachi, ¿klu nkamrutanu wa nuwekgognenatinripa?”

²⁶ Wale wane chinru, “¿Gi china yongata wa Tokanchi Yokanatkaluru? ¿Gi pixpoko getyongaletlu?”

²⁷ Wale gigita. Wane china, “Pushinikanru Gitsrukaachi Poyakalute psolpotuyako pajya, psolpotuyako punshinikanuya, psolpotuyako pmuchkonuya, psolpotuyako pushinikanutletanruya. Pushinikanru pumole pixnanuko pixka.”

²⁸ Geso wane chinru, “Wane potuko pchina gigleta. Wane pixanu ga wa puwekanu.”

Samari gajeru kigleru

²⁹ Walemka galuka muklukanuwnakatu chinretnawa. Wane chinru Geso, “¿Katni wa nomole?”

³⁰ Rugita Geso. Wane chinru, “Satu jeji Gerosale yopikyachri Geriko yachripa kachowgurune yegi rapokana. Komkaganruna. Ruylakanruna. Yatkana. Rupnakastsinatkani ruknokamtatkaluna. ³¹ Ma kagwakamtyawakanu wane rixatka. Satu sasertote walegapo yopikya. Retamtanru. Pasreta yapamta. Ruknogamtlu. ³² Waneko pixka rixa satu Rewiklopisha. Wane rapokamta. Retamtanru. Pasreta ruknogamta koxa wale. ³³ Seyni satu Samarya gajeru, yagapotachri gapyegitatnaklu. Retlu. Retwamonutlu. ³⁴ Wale yegi ya. Poyitlu gitre. Ruyoklu ringi ga wa winga. Gipratji rutakatkalu. Pnu giyakatyachine gwajetyawaka ranikatkalu. Girukotlu. ³⁵ Waleprika gepiproji koshpaka. Reneklu wa kapjiru. Wane chinru, ‘Pgilukotanru. Klunerukta wanepnute pwenutyalu, wa nsatokinipa nsatkakininy gitia.’”

³⁶ “¿Giru pkagwaka pixa wa mapa chininrinwa gimole wa kachowgurune yegi yachrini?”

³⁷ Wale wane china, “Wa retwamonutjeru.”

Giyagni Geso wane chinru, “Pyanu. Waneko pixka pixanu pixa.”

Geso salwayegitna Marta ga wa Mariya

³⁸ Wa wane yinitkana, satu pokchi yatkana. Sato suxo Marta giwakatletachro topji tyoptotyalu. ³⁹ Wala waneya wa tepuro. Mariya giwakatletachro. Gitsrukaachijixistsi tuplata. Tyijnaktokanlutlu. ⁴⁰ Giyagni Marta shiretanshnikanuta gixo tkamrureya. Tapyegitlu. Wane china, “Gitsrukaachi, ¿igike pixa Pixa wa tuknokamtanno nepuro, gitapje nkamrurewatanatka? Giyagni punkakanro tupxakapyapno.”

⁴¹ Gitsrukaachi gigitlo. Wane chinro, "Marta, Marta, kojwakanshinikanutachroyi, mumatanshinikanutkatyi gixo chinanu. Satupje galuukaluru.
⁴² Ga wa Mariya kigleru tsomita walanupa. Gi wa tkoniko."

11

Gitsrukaachi gagjigognere

¹ Wane rixatka. Wane ragjigognetya. Rali gagjigogneretini, satu yimakleru wane chinru, "Gitsrukaachi, pyimaka gagjigogneretanwu, wa Gwa pixka yimaklene yimaka."

² Wane chinna, "Wa gagjigognetinipa, wane nchinanu: Wuru, gipashichgiwakatkalurupyi.

Runanutka Pixa pogirewatayawaka.

³ Penekanwu xawakni wnikanrupa tyegogne chinanupa.

⁴ Pkaspukinwu wmukochire, wixa pixka wkaspukyana pejnuruneko wriwishkatjene. Gi wa yantaletikowakako putakanwu."

Ganikajyechno salvatachri

⁵ Wane koxa chinna, "¿Gi gixpokota gixa wa satu gimatanru gapyegitingi ganikajyechno? Wane chinangi, 'Nomole, mapa jimaprochi penekanno.

⁶ Gi rixanu satu numatanru, pnu kyakleru, ginyegino. Maleshayno nenekyaplu."

⁷ "Gitokmaka gigitinri. Wane nchinanmaka, 'Gi pkojwakanno. Gipgyapto rushyatka. Gitaymana mturune shechi. Gi numkata tunreta nenekyapli.'

⁸ "Wane nchingi gixa, gimka gyotunotanu wa genekyaplu gimatatkalchinanru. Seyni gma mapatewatinitipa chinanu gyotunota. Genekanru psoluko ralukanru.

⁹ "Gita wane chingi, gagjitanu ga wa geneeko. Gijganu ga wa gikshikanu. Giyaylagipgyaptotetanu. Gkotpukyegitko. ¹⁰ Gi rixanu girukokta gagjita, yoptota. Ga wa gijgachri rukshika. Ga wa giyaylagipgyaptotetachri kot-pukyegitko.

¹¹ "Ga wa gixa ¿satu girchi wa gituru gagjitinri jimapro renekanru sotlu? ¿Ga wa shima ragjitini, gimnurge renekanru? ¹² ¿Ga wa tonaji ragjitini, geklorge renekanru? ¹³ Giyagni wa gixa muglenmakgi gimata genekawgeneta kigleru genekashle, pnutlu Giru tengogne Gajeru Giwekkaluru Kpashiri renekanna ragjitjene."

Panchi gajene kotspalanshinikankakinmakna wannakakluko, nikawnanna.

¹⁴ Maleka ruknokamtlu kamchi. Myanumatkatni. Wane rixatka. Maleka rushpakatka kamchi, wa myanumatkatunaru yanumatatka. Giyagni gixolune yine giglajita. ¹⁵ Pimrine wanna wane china, "Kamchine gitsrukate Welsewoyma ruknokna kamchine maleka."

¹⁶ Pimrine gimlukanutlu. Ragjiltuna Geso rekakgityapna getkaluru Goyakalu kamrutanru. ¹⁷ Geso gimtanshinikanutanna wanna. Wane china, "Pejnuruko pogirewatikwaka wa wane gajene kotspalanshinikankakmaka wannakakluko, nikawnana pogirewatikwakna. Pejnuruko panchi, wa wane gajene kotspalanshinikankakmaka wannakakluko, maleshpatakalu. ¹⁸ Ga wa Satanasyo walenanuko kotspalkakkashinikanutinmakwa, ¿gi rix-poko gwagogneteranu wale pogirewatayawaka? Gi rixanu gixa wane china wa Welsewo giyakleya maleka nuknokna kamchine. ¹⁹ Ga wa Gita Welsewo

giyakleyamka maleka nuknokanna kamchine, ḡatū giyakleyamka maleka ruknokna gwugenene? Giyagni gwugenerenepni gixa gitakyagokjenepa.²⁰ Ga wa Goyakalumyoji Gita maleka giknokinna kamchine, galikakni wane rixa gapkpletgi Goyakalu pogirewatyawaka.

²¹ “Wa gichkolu kashreru girukotinri gipji, kigle gwashleru wane rixle. ²² Seyni satu wale pnute muchkonururu gapyegitirri, raalixanru, konyanru kashri raponshinikanutanrunganu. Rushankiyanru rejnunkakate.

²³ “Wa yineru Gitasreta mwakatu walenna nkamnixjeru. Gitayma map-atkatu, kotspalewata.

Kamchi puchotlewatachri satokinri

²⁴ “Kamchi puchotlewatachri yineru rushpakamtinitka pnumnu yanpanata, popriwaakaka. Rujgalu rapnanutyawakapa. Gi wa rukshiklu. Giyagni wane china, ‘Nsatokanutka nopji nuyakatyawaka.’

²⁵ “Wane rapokinitka rukshiklu saxritkaluru ga wa galpokotkaluru.

²⁶ Giyagni wane ya. Waleyma ranikna pimrine payokgipre kamchine wale pnuterune muglene. Jiglokna. Wane rawna. Ralipretka gektutu giknogatkalu tye jeji muchinanu pnute.”

Wa galikakakni giglenshinkanyegitkalune

²⁷ Wane rixatka. Wa tyepirana runkakletanatini sato suxo gixolune yine yegi tsaplewata. Wane china, “Giglenshinkanyegitkalurni wugenewlumapa pwanatyawaka, ga wa tnuchi pashichyawaka.”

²⁸ Wale wane china, “Wanna galikakni giglenshinkanyegitkalune wa Goyakalu tokanu yijnakotachine ga wa kamrutachine.”

Gimuweekakgognenatachne muglenni getkaluru gjiga

²⁹ Rapatjetna gixolune yine. Yinuwaka wane chinreta, “Nyi gimuweekakgognenatachne muglenni getkaluru rujgana. Seyni getkaluru gi wa reneekona, seyni Gonasu tokanchi genelewatachri getikolupje.³⁰ Gi rixanu wa Gonasu pixka walenna getkaluru Niniwe gajenyegiya, waneko pixka nixa Gita Yineru Wgengo nyi gimuweekakgognenatachneyegiya.

³¹ Giklukanuwnalgognepa tyotunotanu tkachi kegnetesretate gajerni pogirewatachroni wa jejine nyi gimuweekakgognenatachneyema. Tuklukanuwnakakanna, gi rixanu yoptukyawakchijiko tunya tyijnakotyaplu Salomo gimatkalewle. Ga wa gewru Salomo pnuterutu. ³² Giklukanuwnalgognepa jejinni, Niniwe gajenni, yotunotanu nyi gimuweekakgognenatachneyema. Wannani giklukanuwnakakanna nyi gikuweekakgognenatachne. Gi rixanu wannani genshinikanuta Gonasu ginkaklewle chinanu. Ga wa getanru gewru Gonasu pnuterutu.

Manchi katalote

³³ “Gike yochpiklo katalo yogimatyaplo, gi wa yantapistono rapukote rutakyaplo. Seyni wa katalo kgapi tutaako, wa jiglokachine getyaplu tpokamlanu. ³⁴ Pumane katalote walenna pugale. Giyagni potukaygale pixinipa, psoluko pumane pokamlapa. Seyni pugale mugletu rixinipa, psoluko pumane mapshagalupni. ³⁵ Giyagni pgirukotinwa wa pokamlalu pixa gwachri ma muchpokinpitipa. ³⁶ Giyagni psoluko pumane pokamlatyawaka rixini, maleshni mapshagasretwaka, psoluko pokamlawatyawakni, katalo pixka rixa gatajiwnaletanu pixa yegi.”

Geso giklukna Gwariseyone ga wayonchikgapine

³⁷ Wa yanumsatinitka, satu Gwariseyo gagjitlu rumnikyaplu. Giyagni jiglokamta. Nikjetyawaka tuplata. ³⁸ Ga wa Gwariseyo retinri, ruglajita gi rixanu gi wa reromyogapkata wa ninkinipa.

³⁹ Giyagni wa Gitsrukaachi wane chinru, “Gixni wa Gwariseyongi mpowratlu kolpeto rogote ga wa kajpapago rogote, seyni wa gixa gitokote katseplu makotnachinwa ga wa muglenchi. ⁴⁰ Mshinikanungi. ¿Wa rogote kamrutachri gi ge gitoko koxa kamruta? ⁴¹ Seyni gishiniklewle geneklewle washatini, ga wa getanu, ptowruko powrayapgi.

⁴² “Seyni iji wanengi gixa Gwariseyongi! Gi rixanu pamolete gwenutulyu pgamlusureru, ga wa rotasure, ga wa pejnuruko giputu gitakaluru, seyni Goyakalu poyagkaklewle ga wa rushiniklewle giknogashamta. Tyekaka gimkata kamrureta. Gi wa pimri koxa giknogashamtanu.

⁴³ “¡Gi wanengi gixa Gwariseyongi! Gi rixanu galuklu tsrukakalune tulaplijere ginkaklewakapji gajerkaka. Galuklu giputuya galukikolu. ⁴⁴ ¡Gi wanengi gixa! Kapna pixkalungi, metapnatktolu, ga wa yine rogo yapanatna. Gi rumatna.”

⁴⁵ Giyagni wa satu yonchikgapri gigita. Wane chinru, “Yimaklewatachri, wa wane pchininri, wixa koxa gektutu pchina.”

⁴⁶ Wale wane china, “¡Gi wanengi gixa koxa yonchikgapingi! Gi rixanu gitjikakna yine kyapre ganiikolu. Ga wa gixa gi wa pamyojiko gjitukyalu gitjitkalurkaka.

⁴⁷ “¡Gi wanengi gixa! Gi rixanu gixa kamrutlu wa Goyakalu tokanu geneklewatachinni kapnatikowaka. Ga wa gitsrukateni giylatanna. ⁴⁸ Giyagni gixni wa gippujtatnachinwagi gigleretlu wa gitsrukateni kamrutanru. Gi rixanu wanna giylatanna, ga wa gixa kamrutlu giyomlena. ⁴⁹ Giyagkoxni rumatkalewleya Goyakalu tokanu wane china, ‘Nyokanyeigitanna wanna ntokanu geneklewatachine ga wa nyokanatanune. Pimrinepni ruylatanna. Ga wa pimrinepni kojwakanna.’

⁵⁰ “Nyi gimuweekakgognenatachine gepomsatko wa pejnurunni Goyakalu tokanu geneklewatachinnigraga chinanu, gipkaakalurugraga, rekamrutikowaka tye psolchijneko ga wa xangognenanu. ⁵¹ Rigitanna pejnurunni chinanu, wa Gawiligragakluyakawa ga wa Sakariyagraklupotunuko, wa giylatkaluru kpashiwakpotugruko ga wa yochpikikowakakwa ganikajiteswa. Gigi. Nyi gimuweekakgognenatachine gepomsatko wale chinanupa.

⁵² “¡Gi waneni gixa yonchikgapingi! Gi rixanu gixa konru wa gimatyawaka kotukupare. Gi wa gixako jigloka. Ga wa jiglokachinmaka gimaleta.”

⁵³ Wa Geso wane gishpakamtinitka, wa yonchikgapine ga wa Gwariseyone yinuwaka tsru jgekanchi gixleta. Gixopirana repomsatluna.

⁵⁴ Rutsekletmalkuna, wa kashtokanutyapluna wa yanumsatinri.

12

Girukotinwa wa sanowashluya

¹ Wa rapatininitkana gixolune yine, gixo waragkane, wane rixa gakatookakletna. Muchinanu gapka Geso yinuwaka giynumsaletna yimaklene, “Ggirukotinwa wa gisekachri, walena sanowashlena, wa Gwariseyonenu. ² Gi rixanu maleshu wa gishyatkaluru ma mupgujetikotupa. Gi wa pochkeruko gi wa mumatkotupni. ³ Klunerukokta wa mapshagwaka nchintokanutinri, pokamlawaka jemiko. Klunerukokta gitokogruko potu gixaxa nchintokanutinri, panchi gogote runkakletiko.

Katu mpikanu

⁴ “Ga wa wane nchingi, numatanune, gi mpikanna manchi gylatachine. Ga wa wanepnute giike rumkata kamruretatkana. ⁵ Seyni nekagkitangi katu mpikanu. Wale mpikanu, wa kgiyaklewakleru wa rali giylaletinitkagi Gigena xirnachri ruknokyapgi. Gigi, wane nchingi, Goyakalu mpikanu. ⁶ ¿Gi ge wa ganikajproji chinanu rushankaaka pamyo koshichi? Ga wa gi satuna wanna gimuslawatka Goyakalu getanu. ⁷ Seyni gijiwutsako pejnuruko yantatkalurni. Giyagni gi mpikanu. Kiglepotgi gixa gixo koshichine pnuute.

Girukokta gipgjutatno yine getanu

⁸ “Wane nchingi, girukokta gipgjutatno yine getanu, Gita Yineru Wgenkoxno gipgjutatanru wale Goyakalutowrerune getanu. ⁹ Wa nnutatjeru yine getanuya, Goyakalutowrerune getanu nutatkalurupni. ¹⁰ Girukokta gapatno Gita Yineru Wgenno kaspukikalurupni. Seyni girukokta mupashiregnuchi chinru Giwekkaluru Kpashiri gi wa kaspukiko.

¹¹ “Wa ginkaklewawakapjikaka gwapioklunupa, ga wa tsrukakalune ga wa tsru gitaaikalune yegi, gi wa gkojwakanshinikanutinwa gi gixpoko giykoylegetinwa ga wa nchinyawakapa. ¹² Gi rixanu Giwekkaluru Kpashiri waneklupapko ginkakangi wa gimkata chinretyawakapa.”

Jeji ponikolu mshinikanutu

¹³ Wane chinru satu gixolune yine yegi, “Yimaklewatachri, wane pchinanru nyegwaklu wa kotspalatininno yoptotanrupa.”

¹⁴ Ga wa Wale wane chinru, “Jeji, ¿katu gitakno gitakyagokachri ga wa kotspaltatachri nixinripa gixa chinanu?”

¹⁵ Wane chinna, “Getinwa. Psolpotuyako ggirukotinwa gixo gejnu galukachine gma mixinitipa. Gi rixanu gi wa gixo rejnunkate gigletu yineru gwashle.”

¹⁶ Yapkaklu runkakna. Wane chinna, “Satu jeji ponikolchijne gixo potu rawyalu. ¹⁷ Wale gishinikanuwata ginanwakaya. Wane china, ‘¿Gi nixanutka? Gi rixanu maleshayatkano nutakyaplu njirganru.’

¹⁸ “Wane china, ‘Wane nixanu. Nughnantakyawaakaka nkoshganu. Tsrupotu nixanutkalu. Wane nutakanru pejnuruko ntrikoteji ga wa wane nixle. ¹⁹ Wane nchininwa gitnanuko, Gixo wane nixle waneyatkano gignataakaluru gixo walapu chinanupa. Napnanutanutka. Nnikanu. Nurantu. Numjikanu.’”

²⁰ “Goyakalu wane chinru, ‘Mshinikanutyi. Tyeyechno kashichko puwekinri. ¿Ga wa palpokotanru katunpatkani?’”

²¹ “Wane rixa ponikolelwu gapatachri, seyni wa Goyakaluya gi wa ponikolni.”

Kojwakanshinikanrewlu ga wa kegeknauwu

²² Geso wane chinna yimaklene, “Giyagni wane nchingi, gi gkojwakanshinikanutau giwekinriya, klu gnikanuna. Gi koxa gimaneya, klu gmakatanu. ²³ Gi rixanu giweklu wa niikaluru pnutni wale, ga wa manchinwa gitaaikaluru pnutni wale. ²⁴ Getpotutanna pokotune mutaklewatkanni. Gi jirgana. Maleshyna rapotyawakagruckna, gi wa rugnantakyawakagruckna. Ga wa Goyakalu goglutna. ¡Gi psonanukta kigleygi gixa koshichine pnuute! ²⁵ ¿Katu gixa gimkata yognikletlu pshinitsonuji ruwekinriya kojwakanshinikanrewleya? ²⁶ Giyagni gi gimkata wa mturu potu kamruretini, ¿klu chinanu koxa wanepnute gkojwakanshinikanutnawa?

²⁷ “Getjetanru kagwuru, gi rixpoko tseruwnaleta. Gi kamrurewpotuta. Gi jiweta. Seyni wane nchingi gi wa Salomoko psolpogirewleyako makawata satu tye gwukaka pixka. ²⁸ Ga wa Goyakalu wane gixa makatletinri kshana

xawakni gwachri, yechikawa xirnachri ruknookonatka ɿgi ge wale pnute makatangi gixa, ptsotsotaji galixachingi? ²⁹ Ga wa gixa gi gjiganru klu gnikanu, ga wa klu giranu. Gi gkojwakanshinikanutinwa. ³⁰ Gi rixanu payine tye psolchijneko gajene pejnuruko tyekaka rujgana. Ga wa Giru tengogne Gajeru gimatl tyekaka galukanru. ³¹ Seyni muchinanu gapka gjiganru Goyakalu pogirewatyawaka, ga wa Wale poyagkaklewle. Pejnuruko tyekaka koxa waneyapgi.

Ponikolelwlu tengogne gajeru

³² “Gi mpikanu muxone gowegane gapatachingi. Gi rixanu gixa Giru gigleretlu pogirewatyawaka renekyapgi. ³³ Gishankanru wane gixle. Kwamonurune genekashatanu. Wane gixanu wa gixa ponikolelwle gignantakikowaakakapa tengogne gajerupa mutsrunkatupa, mnikawnakatupa, kachowguru ma mapokyawakanupä, gi wa kochopako gimtuklewatyawakapa. ³⁴ Gi rixanu ginakaktaplü mponikowle wanekoxaplu gaji.

Wayegrechri giyokanatachri

³⁵ “Giyagni galpokmanetinwa, waneyapgi gkatalote yochpiikaluro. ³⁶ Ga wa gixa jejine pixkalunepgi, wa rutsrukna kagwakachine, giklu kashimyolu yegi rushpakini rutsrukna. Wa runinipa ga wa ruylaylagipgyaptotetinipa, giyampotu kotpukyegityapluna. ³⁷ Giglenshinkanyegitkalunepni wanna wayegrechne wa runinipa rutsrukna giyokanatachne rukshikinipa. Galikakni wane nchingi, wa ralpokotinwa. Tuplajixanna. Ga wa wale gipxakanna. ³⁸ Goprikmaka runinipa ga wa gogistsi runinipmaka ga wa retamtanna wane gixanatachne, giglenshinkanyegitkalunepni wanna. ³⁹ Seyni gimatanru wa tye: wa kwangixerupji gimatkamka gipapko runanu wa kachowguru, gimka retasha kotamgaletikolupa wa gipji. ⁴⁰ Giyagni gixa koxa gali galpokletachinepgi, gi rixanu gma kagwakinpapko Gita Yineru Wgenno ginanu.”

Wayegrechri mpoyagkaakatu

⁴¹ Giyagni Petro wane chinru, “Gitsrukaachi ɿtye yapkaklu wixapiranrege pchina, waka pejnurunekopiranra?”

⁴² Gitsrukaachi wane china, “Giyagni ɿkatni wa girukotapjitchri poyagkakachri ga wa kanshinikanuru, wa rutsrukate gitakanru wa gipji kamrurewatyachne chinanu, wa renekyapna nikanruna kyagolu niklupapkokaka? ⁴³ Giglenshinkanyegitkalurni wa wale wayegrechri, wa rutsrukate ginini retamtu wane gixanatachri. ⁴⁴ Galikakni wane nchingi, pejnuruko wane rixle chinanu rutakanru. ⁴⁵ Ga wa wale wayegrechri wane chinmaka rajiya, ‘Ramga ginreta nutsrukate.’ Yinuwaka giylakletletna wayegrechne ga wa wayegrechne; nika ga wa rura gimetachineyma. ⁴⁶ Wale wayegrechri gitsrukate ginanu. Ma kagwakgognetinitgogne runanu. Ma mumatinpapko runanu. Kochipjepotutanru. Malixkane yoptotanruyimapu rutakanru walenupu.

⁴⁷ “Wa wale wayegrechri wa rutsrukate gishinikanru gimatachri seyni gi wa ralpokota, gi wa rushinikywaka kamruta, gixo kata ruylaakona. ⁴⁸ Seyni wa mumatkatu girukokta kamruta wale rumupgotka, gi gixo kata potu ruylaako. Wa girukokta gixo reneeka, gixo koxa rujikko. Wa gixo gitakikaluru, gixo ragjitanruna.

Kotspalkakikolu Geso chinanu

⁴⁹ “Nuna tye psolchijneko nutakyaplu xirnachri. ⁵⁰ Gi pagaluklenanukta nixlu wa yochpikikolpatka! ⁵⁰ Katlewlu waneyno nkatikolupa. ⁵¹ Gi pagerutkonanukta nixka ma poyagkaakanukopshini! ⁵¹ ¿Gkagwakluge wa tyechijne nuninri kigle gwashle nenekyapna tye psolchijne gajeneko? Wane nchingi, gike. Seyni kotspalkakikolu galikakni. ⁵² Gi rixanu xaniyakawa wanepna pamyo papji gajene kotspalanshinikankakachinepa. Mapa kamnixanna gepi, ga wa gepi kamnixanna mapa.

⁵³ Girchi kamnixanru gituru,
ga wa gituru kamnixanru ruru.
Ga wa ginrochi kamnixanro tshicho,
ga wa tshicho kamnixanro tunro.
Ga wa gimajichro kamnixanro tomekanunro,
ga wa mekanunrochi kamnixanro tgimajiro.”

¿Gi gixpoko gi gimata getletlu tyepapkopirana?

⁵⁴ Wane chinkoxna gixolune yine, “Wa kyachgapererumko getini wa tkachi gimxityawakasreta ruyakatini, waneklu wane nchina, ‘Ginpatkani.’ Ga wa wane rixa. ⁵⁵ Ga wa tkachi kegnetesretate giyakannipgyatyachri rapokannipgyatini, wane nchina, ‘Gemerpatkani.’ Wane rixa. ⁵⁶ ¡Sanowashatachingi! Gimata getgogneretlu chiji ga wa tengogne. ⁵⁷ Gi gixpoko gi gimata getletlu tyepapkopirana?

Pkaspukikolupa pkamnixjeruya

⁵⁷ “⁵⁷ Klu chinanu gixnanuko gi gitakyagoklu wa potukalu? ⁵⁸ Wa pkamnixjeruyma gitsrukaachi yegi pyini, pujgapotutanru pkaspukikolupa walyegiya, ma kotlolomtyanupyi kgitakyagoklewakleru yegi. Ga wa kgitakyagoklewakleru ma samyookanpakyi gitowreru yegi. Ga wa gitowreru ma yoshmakanupyi yoshmakjetikowaka. ⁵⁹ Wane nchinnyi, gi wane pushpakini pma wenutkanuwalo talipremchataajpotunanuko.”

13

Gma menshinikanutkanu, giylatko gixa

¹ Walgogne koxa wanena pimrine. Runkakluna Kalile gajenepirana, wa wannagrada Pilato yapjetjixlu renekashlekakna giylatkakurkakagrada. ² Geso gigita. Wane chinna, “² ¿Gkagwakluge wa nyi Kalile gajene kmukochire-waklerune pejnuruneko Kalile gajene pnute gi rixanu wane rixa salewnaletna? ³ Wane nchingi, gike. Seyni gma menshinikanutkanu gixa, pejnurunekgi waneko pixka gixa giylatkotanuna. ⁴ Ga wa wanna pamole yokgipi, wa Silowe gajeru tenopjiru yawnayegitanune. Ruylatanna. ⁵ ¿Gkagwakluge wa wanna magatya wa pejnuruneko yine Gerosale gajene pnute? ⁵ Wane nchingi, gike. Seyni gma menshinikanutkanu gixa, pejnurunekgi waneko pixka gixa giylatkotanuna.”

Gikeramuna masagito

⁶ Wane china tye yapkaklu, “Satu waneylu gikeramuna rusanate gowasha gitaaikaluro. Wane ya rujgasantaplo. Gi rukshiksagitlo. ⁷ Wane chinru gowasha girukotachri, ‘Petanro. Masa walapu nuna. Nujgasagjetlo wa twu gikera. Gi nukshiksagitlo. Pustakaganro. ⁸ ¿Klu chinanu tumaletashatatkalu chiji?’”

⁸ “Wale gigita. Wane chinru, ‘Gitsrukaachi, tye walapuchi petashatanro. Wa nyopagiskotanrochi ga wa npojitaskotanrochi. ⁹ Tsagiwatinipa, kigleru. Ga wa wane tma mixkanupa, pustakjixaganutkalo.’”

Gapnanutikalurgogne Geso gituukaklo suxo

¹⁰ Satu ginkaklewawakapij gapnanutikalurgogne runkaklewatywa Geso. ¹¹ Wanenaro sato suxo kamchi yayixkaklewatachri waneyaluto. Pamole yokgipi walapu tyayixa. Satpokachroni. Giketsotaji tumkata potukawletyana. ¹² Wa Geso getinro, tomgalo. Wane chinro, "Suxo, pkaspukikatka pyayixinriya." ¹³ Rutakamyogogotlo. Waneklu tpotukawamtatka. Tumalwutlu Goyakalu.

¹⁴ Giyagni ginkaklewakapij gitsrukate gimtuwna gi rixanu Geso gapnanutikalurgogne pinrewata. Rugita ginkaklewakapij gitsrukate. Wane chinna wa gixolune yine, "Waneru patsrujirgogne rumkata kamrurewatikolu. Giyagni walegognekaka ginanu mpinitikolupa. Gi wa gapnanutikalurgogoneko."

¹⁵ Giyagni Gitsrukaachi Geso gigita. Wane china, "¡Sanowashatachingil! ¿Gi ge satkakgi gixa wa gapnanutikalurgogne goglujetyawakna gkoshipirokyana gwakate ga wa mporote gipra? Ganiku rurapinripa. ¹⁶ Ga wa twu Gawraklopisha, getanro, wa Satanasyo gostutanrona pamole yokgipi walapu, ¿gi ge tumkata koshipirookotana wa tye tostutikolu wa gapnanutikalurgogoneko?"

¹⁷ Wa wane chininitka, pejnuruneko patewatana kamnixjene. Ga wa pejnuruneko gixolune yine gimjika wa pejnurkakayako Wale kamrutanru gimalwutkaluru.

Yapkaklu mostasajipirana

¹⁸ Giyagni wane china Geso, "¿Kluneru pixka rixa Goyakalu pogirewatyawaka? ¿Giru pixka nutakanru? ¹⁹ Mostasaji pixka rixa. Satu jeji ganiklo. Rusanate rutaklo. Tseruwna. Gagmuna tixnawa. Giyagni tenyapachine koshichine gina. Walaplu shalewatna."

Yapkaklu gisekachripirana

²⁰ Wane chinatnaka, "¿Giru pixka nutakanru Goyakalu pogirewatyawaka? ²¹ Gisekachri pixka rixa. Sato suxo gwalu. Gepimole masu yaglu trikopagi tyapjetlu, psoluko gisekinpotunanuko."

Mtsergipgyaptotetu

²² Papokchimnu yapananumta. Tsru pokchi, mturu pokchi runkaklewananumtya. Gerosale rushinika.

²³ Satu wane chinru, "Gitsrukaachi, ¿gi gixo potu gognetkaako?" Wale wane chinna, ²⁴ "Gyagota jiglokletanru mtsergipgyaptotetu, gi rixanu wane nchingi, gixo gijga jiglokletanu. Gi rumkatanruna. ²⁵ Wa kwangixlerupji palrinpatka, rushyatanutkalu gipgyapto, gyinuwaka maleka gwaletanuna. Giylaylagipgyaptotetanuna."

"Wane nchinanuna, 'Gitsrukaachi, Gitsrukaachi, pkotpukyegitanunwu.'

"Ga wa rugitanu. Wane chinanu, 'Gi numatgi, ginaka giyakatyachinektagi.'

²⁶ "Giyagni gyinuwaka wane chinretanu, 'Pixa getanu wnikanata ga wa wuranata. Ga wa wuputreya punkaklewatywa.'

²⁷ "Wane chintokanyegitangi, 'Gi numatgi ginaka giyakatyachinektagi. Gitspalatinno gixa pejnurunekgi mpoyagkaknuchi kamrurewatyachingi.'

²⁸ "Waneplu chiyaglu ga wa gashkaygitlu, wa Goyakalu pogirewatyawaka gixa geta tuplaletanna Gawra, ga wa Gisaaka, ga wa Gakowo, ga wa pejnuruneko Goyakalu tokanu geneklewatachine, ga wa gixapni maleka giknookona. ²⁹ Runanna tkachi gishpatyawakasreta gajene, ga wa tkachi gmxityawakasreta gajene, ga wa tkachi potuklesretate gajene, ga wa tkachi kegnetesretate gajene. Goyakalu pogirewatyawaka tuplatanna

nikjetikowakaya. ³⁰ Ga wa wanena kaptotachine. Wannapni muchichachinpatka. Ga wa muchichachinenanu wannapni kaptotachinpatka.”

Geso ginkaaka Girore gishinikyawakmakapirana

³¹ Walgogne koxa yayegitluna pimrime Gwariseyone. Wane chinruna Geso, “Pasukanutka. Pyanutka gewiya. Gi rixanu Girore galuka giylaetyi.”

³² Wale wane chinna, “Gajewa. Ginkakapanru wale kewnechro pixkalutu, ‘Petanu. Maleka nuknokna kamchine ga wa nutuukaklewata xawakni ga wa yechikawa. Ga wa yechikawapnutgogne, nali kamruretanu. ³³ Seyni wa xawakni ga wa yechikawa ga wa yechikawpnutgogne numkata yaleta, gi rixanu Goyakalu tokanu geneklewatachri gi gimkata gipnaleta Gerosale mwakatu.’

³⁴ “¡Gerosale, Gerosale! Goyakalu tokanu geneklewatachinni giylatachriyi. Ga wa pyokanyegitjenni sotlijetachriyi. ¡Gi pejnu katananukta naluka gapatjewgenretyi gaxawripa pixka tapatjewgeneta! Tomejimpuko tutakna. Ga wa pixa gi galuklu. ³⁵ Giyagni gipji giknokamtkalurupni gixa chinanu. Gi rixanu wane nchingi, xaniyakawa gi getanutkano wa gixa wane chinotpunano.”

Giglenshinikanyegitkalurni

Gitsrukaachi giwaka ginyachri.”

14

Geso gituukaklu satu gankajetachri

¹ Wane rixatka Geso. Satu gitsrukaachi Gwariseyopji jigloka gapnanutikalurgogne nikinripa. Giruktatluna. ² Waneru satu jeji gankajetachri Wale yegi. ³ Yonchikgapine ga wa Gwariseyone wane china Geso, “¿Ginan-shichkalurege wa gapnanutikalurgogne gituukaklewlu waka gike?”

⁴ Wanna pochke. Giyagni Wale kosestu. Rutuukaklu. Yakanatatkulu.

⁵ Wane chinna Wale, “¿Giru jeji wane gixa yegi, wa gituru ga wa mporote wa kapna rujrukinna, gi ge koschekanna waneklu wa gapnanutikalurgogneko?”

⁶ Gi rumkata yoptopiiretluna wa tyepiranaya.

Kashimiyolu getachine

⁷ Retanatna wa tsrukakalune tuplapijere tsomityawakna nikjetikowakaya. Chanixkalune runkaka satu yapkaklu. Wane chinna,

⁸ “Wa satu chanixinipyi kashimiyolu yegi, gi wa tsrukakalune tuplapijere ptuplatanu. Patako gonra satu kagwakpiratkaluru wa pixa pnute chanixkaluru waleya. ⁹ Ga wa yayegitinipyi nchanixjeru pixa ga wa wale, wane chininiipyi, ‘Penektuplapijeretanru tye.’ Giyagni patewatachriyi pyinuwaka gimirteru potu tuplapijere tuplaleta.

¹⁰ “Seyni wa pchanixkoklunupa, wane pyanu. Gimuteru potu tuplapijere ptuplatanu, wa runinipa wa pchanixjeru, wane chininiipyi, ‘Nomole, kiglewaka pyanu.’ Waneklu gimalwutkalurupyi wa pejnuruneko pumnikjenyegiya. ¹¹ Gi rixanu girukokta wa tsru gitaknachriwa mturu rutaako wale. Ga wa mturu gitaknachriwa tsru rutaako wale.”

¹² Wane koxa chinru wa chanixjeru, “Wa niikaluru pkamrutini ga wa tsru nachnewlu, gi pchanixanna pumatanune, gi wa pumunanwakaneko, gi wa pumoleneko, gi wa pumwasttsitanu ponikoluneko, wanna ma mupeko chanixleyanupyi, pma mapnutikotupa. ¹³ Wa nachnewlu pkamrutinipa pixa, pchanixanna kwamonurune, mast sine, yokmatachine, ga wa maygalene. ¹⁴ Ga wa giglenshinikanyegitkalurupyi, gi rixanu maleshayna

rapnutyapyina. Seyni yotunkoklunupna poyagkakachine, waneklu gap-nutkalurupyi.”

Yapkaku tsru nachnewlupirana

¹⁵ Satu rumnikjeru yijnakanatlu tyepirana. Wane chinru, “Giglen-shinikanyegitkalunepni wa Goyakalu pogirewatyawaka nykachinepa.”

¹⁶ Wale wane chinru, “Satu jeji tsru nachnewlu kamruta. Gixo chanixa.

¹⁷ Nachnewlupapko chininitka, yokanatlu wayegreru, runkakapyapna chanixkalune, ‘Ginanutka. Gi rixanu pejnuruko galpokotkalurutkani.’

¹⁸ “Pejnuruneko pixkakaklu rixanshikanutna. Yinuwaka gaalirewletna. Muchinanu chanixkaluru wane china, ‘Nagjitatkalu chiji. Numkata wane yaleta, netapyaplu. Nagjityi petashjixa yaletanno.’

¹⁹ “Satu wane china, ‘Pamole wakane nagjita gepirinkaka. Nyantata-panna. Nagjityi petashjixa yaletanno.’

²⁰ “Satu wane china, ‘Nganunrowatatkta. Giyagni gi numkata wane yaleta.’

²¹ “Satokatka wayegrechri. Walepirana runkaklu rutsrukate. Giyagni rumtuwna kwangixerupji. Wane chinru wayegreru, ‘Giyampotu’ tsru pokchipitu pyanu ga wa gatnugapkaka. Pwapanna gewi kwamonurune, ga wa mastsine, ga wa maygalene, ga wa yokmatachine.’

²² “Wane china wayegrechri, ‘Gitsrukaachi, wane gixkalurutkani wa pchinyawaka, ga wa kaswajiwalu.’

²³ “Giyagni gitsrukaachi wane chinru wayegrechri, ‘Gatnugapo pyanu ga wa prijertamnu. Pertapanna jiglokinripna, tseowninripa nopji. ²⁴ Gi rixanu wane nchingi, gi satuna wa nyi jejine wa chanixkalune getumganru wa nnijitu.’”

Geso gomkagitachine gimkata kamruretanru

²⁵ Gixolune yine Waleymannuna. Ruprotakyegitna. Wane chinna,

²⁶ “Girukokta ginyegitinipno ga wa ma mayegixkanuplu ruru, gi wa run-roko, ga wa ganunroko, ga wa wugeneneko, ga wa gímoleneko, ga wa gí-moleroneko, ga wa ruwekleko, gi rumkata nyimakleru gixleta. ²⁷ Girukokta gi gwalo koroshishkitate, gi wa Gita gajxigi rawa, gi rumkata nyimakleru gixleta.

²⁸ “Gi rixanu wa satu gixa yegi galuka tenopjiru kamruretachri, *¿gi* ge muchinanu gapka tuplanatanu ga wa rutakyagokwenutanru, gikta waneylu wa nikatyaplu? ²⁹ Rawiyawakapa tenopjiru ralpokoshata, gi rumkata nikatletinripa wane ma mixinitipa, pejnuruneko getachine ma yinuwaka gixpiranatletyapluna. Wane chinna, ³⁰ Tye jeji yinuwakashha kamruretu pañchi. Gi rumkata nikatletlu.”

³¹ “Ga wa pogirchi giylalu yegi yachri satu pogirchi yoptotachripa, *¿gi* ge muchinanu gapka tuplanatanu jemanshinikanrewatachri rixinripa gikta rumkata pamole waragkayma yoptoletlu wa gepmole waragka waneyalu wa runyegitjerupa? ³² Ga wa ma mumkattanru, wajra rawiniwa pogirchi runyegitjeru, yokanatna tsrune, repomgiyapluna rawashletnapirana. ³³ Giyagni waneko pixka rixa. Girukokta gixa gma kaspuukanru wa pejnuruko wa wane gixle gi rumkata nyimakleru gixleta.

Rumushikinitka tuwu

³⁴ “Kiglerni wa tuwu. Seyni wa mushi rixininitka tuwu *¿kluneru* morotkatka?

³⁵ Gi wa chijiko pojistikolu kigleylu, seyni maleka giknookalurutkani.

“Girukokta kajnakopnalu wa yijnakotinripa, yijnakotanu.”

15

Yapkaklu gowega pupjetachropirana

¹ Yayegitluna pejnuruneko gjigawenutachine ga wa kmukochirerune yinjakotyapluna. ² Kegemgana Gwariseyone ga wa yonchikgapine. Wane chinna, “Wa Tye kmukochirerune yoptota. Ga wa wannayma nika.”

³ Giyagni Wale ginkakna tye yapkaklu. Wane chinna, ⁴ “Satu jeji wa gixa yegi satu pacha gowega waneyalutu, sato gamgini ḋgi ge yineru mwiyawakanu ruknokamtna wa mturujmole mturuji ga wa gamgachro chinanu wane ya rukshikinpotonanuko? ⁵ Rukshikinro, rutjimtatkalo gimuwatchari. ⁶ Gipji rapokinitka tomgana rumatanune ga wa rumwastitanune. Wane chinna, ‘Gimumuwatanno. Gi rixanu nukshikatkalo nowegate gamganatachro.’ ⁷ Wane nchingi, wa tengogne waneplu tsru potu gimuwlus satupje kmukochireru renshinikanutinri chinanu, mturujmole mturuji poyagkakachine chinanu pnute, genshinikanru mmagatikane.

Yapkaklu sroschiproji gamgachropirana

⁸ “Ga wa sato suxo pamoleprojie waneyaloto, wa paproji tamgini ḋgi ge tyochpiklo katalo, ga wa tsaxritlu panchi, ga wa tujgapotutlo tukshikinpotonanuklo? ⁹ Wa tukshikinitkalo, waneklu tunkakna tumatanune ga wa tumwastitanune. Wane chinna, ‘Gimumuwatanno. Gi rixanu nukshikatkalo gamganatachro nserojiproji.’”

¹⁰ “Wane nchingi, waneko pixka rixa. Waneplu gimuwlus Goyakalu towre-runyegiya wa satupje kmukochireru chinanu renshinikanutini.”

Yapkaklu wgenchi pupjetachripirana

¹¹ Wane china, “Gepi wgenru satu jeji. ¹² Mturu wane chinru ruru, ‘Papaa, penekanno wane wixlle psojite wa gitau nixinripa.’”

“Giyagni kotspalatyatkana wane rixlena.

¹³ “Gi gixgogne potu giknoginitka, gituru mturu gwatkalo pejnuroko. Wajrachijne yatka. Wane saletyalo wane rixle mgirukotnachriwa. ¹⁴ Wa pejnuroko nikatininatka, rapoka tsru nachi walechijne. Yinuwaka magleyatanatka. ¹⁵ Wane ya. Rupxaklu satu walechijne gajeru. Wale yokanatlu peklomtate yegi kochine roglutinripa. ¹⁶ Raluka ginanuwkakletnawa galkarowajiya wa kochine nikanru. Gikena genekanru.

¹⁷ “Ga wa rushinikanuwpotutinitka, wane china, ‘Gi pejnunanukta nuru yegi kamrurewatyachine gixetlu niikaluru! Ga wa gitni gewi nachi makatininno. ¹⁸ Npalnamtanutka. Nuru yegi nyanutka. Wane nchinanru, ‘Papaa, tengogne getanu nmukochirewata ga wa pixa getanu. ¹⁹ Gi wa numuklutkani wa puturu nchinikolpatka. Satu pkamrurewyegitjeru pixkakanutkano.’”

²⁰ “Giyagni palnamta. Yayegitlu ruru. Ga wa ruru gowukako retyalu. Retwamonutlu. Rasukyegitlu. Kanopatlu ga wa ramlutlu. ²¹ Giyagni wa gituru wane chinru, ‘Papaa, tengogne getanu nmukochirewata ga wa pixa getanu. Gi wa numuklutkani wa puturu nchinikolpatka. Satu pkamrurewyegitjeru pixkakanutkano.’”

²² “Giyagni ruru wane chinna wayegrene, ‘Giyampotu gwapanru wale potu mkachri. Gyoshmakanru. Yoshmakamyorechi genekanru. Gyoshmakjixitanru yoshmakjixrechi. ²³ Waka wgene gwapanu gixowaakaakaluru. Gilyatanru. Wnachnewatanu. Wmeyiwatanu. ²⁴ Gi rixanu tye noturu gipnachrinanni. Ruwekamatatka. Gamgachrinanu ga wa rukshiikatka.’ Yinuwaka meyiwlenna.

²⁵ “Ga wa tsru gituru sanananru. Wa panchistsi rapokinitka, yijnakotlo gitlotkalurkaka ga wa gansalu. ²⁶ Satu wayegrechri tomga. Repomgalu klnerni. ²⁷ Wale wane chinru, ‘Pepuru gapokatka, ga wa puru waka wgenni gixowaakaakalurni gylajixa. Gi rixanu gichkolu yoptotlu.’”

²⁸ “Giyagni yegwaklu gimtuwna. Gi raluka jiglokleta. Rushpakamta ruru rumnanukyaplu. ²⁹ Giyagni wale gigita. Wane chinru ruru, ‘Papa, igi pejnu walapunanukta pwayergreru nixnawa! Gi pagogneko nkaspuklu pyokanatyano. Gi pagogneko penekno chiwo wgene numatanune numeyiwatinripa. ³⁰ Seyni wa tye puturu wa pnikata wane gixletjeru suxone kjejigeroneya, wa runinitka, puylatlu waka wgenpotuko gixowaakaakaluru wale chinanu.’”

³¹ “Giyagni wale wane chinru, ‘Noturu, pixa gimwagognenatno. Pejnu ruko wane nixle pixanni. ³² Giyagni wumkata meyiwlata ga wa gimuwleta wa pepuru chinanu. Gi rixanu tye pepuru gipnachri pixkalutunanni, ga wa ruwekatka. Gamganatachrini ga wa gikshiiklurutkani.’”

16

Panchi girukowatachri mpoyagkaakatu

¹ Geso wane chinkoxna yimaklene, “Waneru satu jeji ponikolu. Waneylu gipji girukotachri. Wa wale jigyegitkalurni waleyegiyā, wa saletlu wane rixle. ² Giyagni tomgalu. Wane chinru, ‘¿Klnerni wa tye wa nyijnakyegityawakyi? Puglepokotanru pgirukotanru kwentate. Gi rixanu gi pumkata girukowletatka.’”

³ “Giyagni girukowatachri wane china gitoknanwakaya, ‘¿Klu nkamrutanu? Gi rixanu nutsrukate giknokanno ngirukowatinriya. Gi numkata jitleta. Npatewata sroschi nagjityapmaka. ⁴ Numatatka klu nkamrutanu wa nushpakinipa ngirukowatinri, wannapji yoptotinipnona.’”

⁵ “Giyagni tomgana satkaka rutsrukate riwishkatachri. Wane chinru muchinanu gapokachi, ‘¿Gi pejnu priwishkatalu nutsrukate?’”

⁶ “Wale wane china, ‘Gepkoxamkoje waragka pamyo pachaksu ringi.’”

“Giyagni wane chinru, ‘Ga ga pkwentate. Ptuplatanu. Giyampotu pyonatanru gepi waragka gepi pacha pamymoleksu ringi.’”

⁷ “Satu wane chinatnaka, ‘¿Ga wa pixa? ¿Gi pejnu priwishkata?’”

“Wale wane china, ‘Satpacha shiuate trikoji.’”

“Giyagni wane chinru, ‘Ga ga pkwentate. Yokgipmole pyonatinri.’”

⁸ “Ralixkotlu gitsrukaachi wa girukowatachri mpoyagkaakatu, gi rixanu kgimatkaleru rixa. Gi rixanu tyegogne gajene wa wanna gimuweekak-gognenatachinelusha kgimatkalerune rixna pokamlawaka gajene pnute. ⁹ Gita wane chingi, wane gixa gimatletkakkanna gyokwireya, wa sroschi yoptotinripna. Wane pixini gnikawnagognenatini, waneklu wanna yoptotangi Gigena rawiyawakapna gike rixiniko mnikawnakatupa.

¹⁰ “Girukokta poyagkakachri ptsotsotaji chinanu, gixo koxa chinanu poyagkakanu. Ga wa mpoyagkaakatu ptsotsotaji chinanu, gixo koxa chinanu gi poyagkakanu. ¹¹ Giyagkoxni wa mugletu ponikolewleya gi wa poyagkakachingi, ¿katu gaponshinikanutangi wa galikaka potu ponikolewleya?”

¹² “Wa pimrine wane gixleya mpoyagkaakane gixini, ¿katu genekangi gixanupa?”

¹³ “Gi satuna gimkata panchi kamrurewatya gepi gitsrukaachinyegiya, gi rixanu waka rayegixanru satu, satu rushinikanu; waka satu rupxaletanu, satu reyikanu. Gi gimkata wayegrechri gixleta Goyakalu chinanu ga wa ponikowlu chinanu.”

Gwariseyone gixpiranatlu Geso

¹⁴ Ga wa Gwariseyone sroschi galukachine potu yijnakonatlu pejnuruko Walepirana. Ruxpiranatluna Wale. ¹⁵ Wane chinna Wale, “Gixni wa gixnanuko poyagkakachine gixashatnawa wa yine getanuya. Seyni wa Goyakalu gimatzgajitgi. Gi rixanu wa kiglepotlu yine getanuya, walena wa gagnanutkaluru Goyakalu getanu.

Geso wane gixa getletyawaklu Tokanchi Yukanatkaluru

¹⁶ “Tokanchi Yukanatkaluru ga wa Goyakalu tokanu geneklewatachime waneyanangi Gwaklupotunanuko. Wanekluyakawa runkakletka Goyakalu pogirewatayawakapirana. Pejnuruneko muchkowyegitlu. ¹⁷ Myapretpotni tengogne nikawninripa ga wa psolchijneko, wa satu yotmokle pnu te nikawninripa Tokanchi Yukanatkaluruya.

Geso ginkakletlu giknokagnunrolupirana

¹⁸ “Girukokta giknoklo ganunro ga wa sato ganunrotatnaka, rumopatlewixatka. Ga wa girukta ganunrotlo wa jeji giknokanro rumopatlewata.

Geso ginkakna wa ponikolu ga wa Lasaropirana

¹⁹ “Waneru satu jeji ponikolu. Pakni yoshmookaluru pixkalutu mkachri ga wa wale potu klatalu mkachri gitakachri. Pagognemnunanuka meyiwl u ponikpoturu rutaka. ²⁰ Satu kwamonuru, Lasaro giwakatletachri, rupgyaptotestsi rutaaka. Katreku. ²¹ Raluka ginanuwleta ponikolu nikjetyawaka gjirukyachriya. Kewene koxa gina. Ga wa remrotreluna.

²² “Wane rixatka. Rupnana kwamonurni. Goyakalutowrene ganikatkalu. Gawrasta rutakluna. Rupnana koxa ponikolni. Kapnatkana. ²³ Ga wa gipnachine gwiywaka salewnapotutinri, wane yigatya. Wajra retyalu Gawra, ga wa Lasaro walesta gwanatachritka. ²⁴ Giyagni wale saplewpotuta. Wane china, ‘¡Papa Gawra, petwamonutanno! Lasaro pyokanyegetanno, gonu rugakaptomyojimtanu. Ruyalkapanutanunno. Gi rixanu tye xirnachri nsalewnapotutyanatka.’

²⁵ “Gawra wane china, ‘Wiwi, pushinkapanru wa puwekanatini pyoptojenatanru kigleru wane pixle. Ga wa Lasaro koxa gektutu yoptojenatanru. Giyagni wa xani gewi gimnanukikalurni wale, ga wa pixa salewnagognenatachripatkayi. ²⁶ Ga wa tyekaka pejnuruko pnu te, wixa ga wa gixa ganikajite rawgognenatyawaka tsru gitskata. Giyagni wixa yegi galuka kopruretachine gixa yegi rixinripmakna, gi rumkatluna. Ga wa wane gajeneko gi gimkata koprureta wa wixa yegi rixinripmakna.’

²⁷ “Giyagni wane china, ‘Xani koxa nagityi, papa. Nurupji pyokanatanru wale. ²⁸ Gi rixanu waneyno pamyo nomolene. Rupgugtayegityapna wale, wa gewi tye salewnikowaka ma muninitkipkoxna wanna.’

²⁹ “Ga wa Gawra wane china, ‘Wanna waneya Moysisi kirukate ga wa Goyakalu tokanu geneklewatachime. Wanna yijnakotanna.’

³⁰ “Giyagni wale wane china, ‘Gike, papa Gawra, seyni satu gipnachinyegiya yayeginna, renshinikanutanna.’

³¹ “Ga wa Gawra wane chinru, ‘Ma yijnakotkanruna Moysisi ga wa Goyakalu tokanu geneklewatachime, gi koxa rushinikanutkona wa satu gipnachinetskalaya yotunotini.’”

¹ Wane chinna yimaklene, “Gi rumkata gimaletkota wa gitspetkalurkaka chininripa. Seyni iji waneni girukokta jjruklu yineru! ² Kiglemkalu waleya rushriknojitolupa wa tsru sotlu ginripiya, tsru wenu ruknokikolupa, wanepnute wa tye satu mturpotu jjruklinri.

Geso ginkakletlu kaspukmukochirewlupirana

³ “Gixnanuko ggirukotinwa. Wa pumole mukochirewatini punkakanru wa ruklukanuwninri. Ga wa renshinikanutinipa, pkaspukinri wale. ⁴ Ga wa payokgipre kata pagogne mukochirewatini pixaya, ga wa payokgipre kata satkakyegitinyi wane chinachri, ‘Nenshinikanuta,’ pkaspukinri wale.”

Pyognika galixletanwu

⁵ Giyagni yokanatanune wane chinru Geso, “Gitsrukaachi, pyognika galixletanwu.”

⁶ Giyagni wa Gitsrukaachi wane china, “Waneygi gixkamka galixle mostasaji pixka, wane nchinanru tye sukomormuna, ‘Pkokolikinwa. Tsru wenu putakinwa.’ Yijnakotangi.

Geso ginkakletlu wayegrechri kamruretanrupirana

⁷ “⁷Satu wa gixa yegi waneya wayegreru tsru jitlolepagitachri ganikachri ga wa gowegane girukotachri, wa sana ruyakatini, gi koxa wane nchinru, ‘Punanu. Nikjetikowaka ptuplatanu?’

⁸ “⁸Gi ge wane nchinangonuklu, ‘Pkamrutanru nnikanrupa. Palpokotinwa. Pupxakanro nnikakopshini ga wa nurini. Wanepnute pixa nikanutka ga wa puranu?’

⁹ “⁹Poyagnutanrige wa wayegrechri gi rixanu wale kamrutlu towutikowaka waka gike? ¹⁰ Waneko pixka gixanu gixa. Wa gixa kamrutinitkalu wa pejnuruko ntowutikwaka, wane nchinanu, ‘Wayegrechine gimuterunwu, gi rixanu wtutakolupje wkamrutatka.’”

Pamole gjirgitutachine powratkalune

¹¹ Wane rixatka. Gerosale yini, Samari koprumta ga wa Kalilechijne koxa koprumta. ¹² Satu pokchi rapokamtinitka, pamole jejine yoptotaplu gjirgitutachine. Wajra tunwatna. ¹³ Sapelewtna. Wane chinna, “Geso, Gitsrukaachi, petwamonutanunu wixni.”

¹⁴ Wa retinitkana wane chinna, “Gajewa. Sasertotene gekakgitapinitkawa.” Wane rixatka. Wane yakopshinna powratkana.

¹⁵ Giyagni satu wa wannate retnatkawa wa rutukinritka, satkapa. Tsru sable rixa gimalwuretlu Goyakalu. ¹⁶ Chiji yoptsojitatma gjixistsi. Poyag-nutlu. Samarya gajerni wale.

¹⁷ Ga wa rugita Geso. Wane china, “¹⁷Gi ge pamolna powratkalune? Ga wa mturuji ¹⁸ginakatkana? Gi satuna geta satkapletka wa Goyakalu rumalwutiyapa, seyni tye puu gajeru galikakni.”

¹⁹ Wane chinru, “Palnanutka. Pyanutka. Palixle gitskalakyi.”

Pogirewatyawaka gininripa

²⁰ Repomsatka Geso Gwariseyoneya gikluplu Goyakalu pogirewatyawaka. Wale gigitna. Wane chinna, “Gi wa getkaluru runini Goyakalu pogirewatyawaka. ²¹ Gi wane koxa chinanna, ‘Getanu. Gewru.’ Gi koxa, ‘Waneru.’ Gi rixanu, Goyakalu pogirewatyawaka gixa gitokote rawa.”

“Nowgogneklu pixka,” china Geso

²² Giyagni wane chinna yimaklene, “Pagognekaka ginanu wa gixa galukpotu getletannmaklu pagogne wa Gita Yineru Wgennogognekaka. Gi

wa getanru. ²³ Wane chinangina, ‘Ga ga waneru.’ ‘Ga ga gewru.’ Gi wane gyanu. Gi gomkagitanru. ²⁴ Gi rixanu rawrakle pixka rixanu pasreta teno rapukotgogne rawrakini pixka ga wa pasreta teno rapukotgognepotunanuko pokamfata. Wane pixka nixanu Gita Yineru Wgenno nogognepa. ²⁵ Seyni muchinanu numkata salewnaleta gixo, nma yoptotikotupa nyi gimuiweekakgognenatachineya.

²⁶ “Gi rixanu Nowegogneklu pixka rixanu nogogneklupa wa napokinipa Gita Yineru Wgenno. ²⁷ Niknina, rurnina, ganunrowatnina ga wa ganuruwatnina, wa Nowe jiglokingognepotunanuklo pumlekwa. Runatka gonnewl. Nikatanna pejnurunniko.

²⁸ “Waneko pixka rixa Lotgogneklu. Niknina, rurnina, marnewatnina, rushanrewatnina, rutaklewatnina, panawatnina. ²⁹ Wa Lote gasukingognepotuko Sotomaya, tengogne gina pixka rixa gjrukleta xirnachri ga wa gasogre. Pejnurunniko nikata.

³⁰ “Waneko pixka rixanu nogognepa, wa Gita Yineru Wgenno nupgu-jewnninigognepa. ³¹ Walegognepa panchi gogo gwanatachri ga wa panchi rawa rejunkate, gi rujrukanu rawapyapl. Waneko pixka rixanu wa sana gwanatachri, gi wa satkapanu rajxigiyaka. ³² Gishinkapanro Lote gnuonroni.

³³ “Girukokta gjiga chipetlegiwekletanu ruwekinri ramginina. Ga wa girukokta gamtakanru, rushatkapgiwekletanu. ³⁴ Wane nchingi, wale yechnopa, satu shechi gepi gwanatanu. Satu ganiiko, ga wa satupni giknokamtkona. ³⁵ Gepi sxone gipnunripagkakanatachinepa. Sato ganiiko, ga wa satopni giknokamtkona.”

³⁶ Rigitna. Wane chinruna, “¿Ginaka, Gitsrukaachi?”

³⁷ Wale wane chinna, “Ginakakokta rawmanetanu gipnachri wane rapat-jetinna klatatalune.”

18

Yapkaklu wa gipnagnurutachro ga wa kgitakyagoklewaklerupirana

¹ Satu yapkaklu runkaakoxna wa ma mamanga gagjigognere titinitpna. ² Wane china, “Papokchi waneru kgitakyagoklewakleru. Wale gi piklu Goyakalu. Gi koxa kagwakpiratna yine. ³ Wale pokchi koxa wanero sato gipnagnurutachro. Wale yegi tya. Wane chinru, ‘Puglepokyegitanno nkam-nixjeruya.’”

⁴ “Seyni gixgogne gi raluklu. Wanepnuteta wane china ginanwakayatka, ‘Gimka npiklu Goyakalu. Gi koxa nkagwakpiratlu yineru. ⁵ Seyni twu gipnagnurutachro kojwakalchinanno nughapokyegitanutkalo. Nma maalinanumtitinitipa wala kojwakle chinanu wa ginjetachro.’”

⁶ Wane china Gitsrukaachi, “Gijynakotanru wa chinyawaka wa kgitakyagoklewakleru. Walenwa mpoyagkaakatu yineru. ⁷ Ga wa Goyakalu ¿gi ge gapnuyegitanna tsomitanune wa gogi ga wa goyechno ragijitjene? Ga wa ma pognanutupni wannayegiya. ⁸ Wane nchingi, giyampotu rapnuyegitanna. Seyni wa Gita Yineru Wgenno gininipa tye chijiya ¿nukshikinri galixlu?”

Wa Gwariseyo ga wa gjigawenutachri

⁹ Wane koxa chinna tye yapkakluya pimrine gaponshinikanutnachinwa wa moyagkakachine rixinrina; pimrine reyikna:

¹⁰ “Gepi jejine kpashiwakapiji kanikna ragjigognetinripna. Satu Gwariseyni, ga wa satu gjigawenutachri. ¹¹ Wa Gwariseyo tunwata. Walenanuko wane china gagjigognegleytnawa, ‘Goyakalu, npoyagnutyi

gi wa pimrine jejine pixkalutno, kachowgurune, mpoyagkaakane, kgimopataklerune. Gi koxa wa tye gjigawenutachri pixka gixachrino. ¹² Satu simankaka gepi kata nogajirewjeta. Pejnuruko nyoptotanro pamoleete nenekjeta.

¹³ “Ga wa wajra tunwata gjigawenutachri. Gi raluka tengogne yigleta. Seyni ruylakastata. Wane china, ‘Goyakalu, petwamonutanno gita kmukochirerno.’

¹⁴ “Wane nchingi, tye yopikachritka gipji muklukanuwnakaakotutkani satu pnute. Gi rixanu girukokta wa tsru gitaknachriwa mturu rutaako wale. Ga wa mturu gitaknachriwa tsru rutaako wale.”

Geso ga wa mturune

¹⁵ Ranikyegitluna gajerya maturewnachinewa kamrukyapna. Wale retna yimaklene. Chigetjetkana ranikjenna. ¹⁶ Wa Geso tomgana. Wane chinna Wale, “Getashatanna mturune runyegittannona. Gi gimaletanna. Gi rixanu wanna pixkalune wannanni wa Goyakalu pogirewatyawaka. ¹⁷ Galikaka wane nchingi, girukokta gi wa mturu pixka rixyoptoletanru Goyakalu pogirewatyawaka gi wa jiglokanru.”

Ponikolu

¹⁸ Satu gitsrukaachi gepomgalu. Wane chinru, “Yimaklewatatachri kigleru, ¿klu nkamrutantu nyoptotyaplu nuwekinri gike rixiniko mnikawnakatupa?”

¹⁹ Geso wane chinru, “¿Klu chinanu wane pchinno kigleru? Gi satuna waneru kigleru. Satupjeru, Goyakalupje. ²⁰ Wa Yakanatkalluru Tokanchi pumata:

Gi pumopatlewatanu.

Gi puylalewatanu.

Gi pchowguwatanu.

Gi wa maleshawaka pupgjtalawashatanu.

Pkagwakpiratanru puru ga wa punro.”

²¹ Ponikolu wane china, “Pejnuruko tyekaka nkamrutatka nmaklutin-wakawa.”

²² Ga wa Geso yijnakotlu tye. Wane china, “Satupje pmagaty. Pushankanru ptowruko wane pixle. Penekanna wa kwamonurune. Waneyapyi ponikole tengogneyapa. Punanu. Pomkagitanno.”

²³ Giyagni ponikolu, walepirana yijnakotinitka, wamonuwnapotutatka gi rixanu ponikolpotni. ²⁴ Retinri Geso, wane china, “¡Gi pakyprenunuanuktalu Goyakalu pogirewatyawaka jiglokinripna wa kserojiprojirune!” ²⁵ Geso wane china koxa, “Myapretnakni kameyo tsapujripna tjiglokinripa wa ponikolu pnute jiglokyaplu Goyakalu pogirewatyawaka.”

²⁶ Ga wa yijnakonatachine wane china, “Giyagni ¿katu gimkata gognetkaakotanu?”

²⁷ Geso wane china, “Wa yineya mumkatanatu, wale rumkata Goyakalu.”

²⁸ Giyagni Petro wane china, “Petanu. Wixa giknokamtlu wane wixle. Ga wa womkagitatkayi.”

²⁹ Wale wane chinna, “Galikakni wane nchingi, girukokta giknokapjimta, ga wa ganunro, ga wa gimolene, ga wa rurune, ga wa wugenene Goyakalu pogirewatyawaka chinanu, ³⁰ wale yoptotanru gixo kata pnute xani tye-gognekaka, ga wa pagognesha ginachripa waneyaplu ruwekinri mnikaw-nakatupa.”

Geso ginkakletagnaputlu rupnalepapirana

³¹ Wa Geso ganikna pamole gepi. Wane chinna, "Xani Gerosale wkanikanutka, moyagkakikolupa pejnuruko Goyakalu tokanu geneklewachine chinyongatyawaka wa Gita Yineru Wgennopirana. ³² Gi rixanu samyookalurupno payine yegi. Gapnokatkalurupno. Gektutetkalurupno. Ga wa gitskagjetkalurupno. ³³ Kochipjetannona. Ruylatannona. Ga wa mapgogne chininri nyotunotanu."

³⁴ Ga wa wanna gi gimata jemlu tyepirana. Wanna yogimatika tyepirana. Gi rumatluna wa chinyawaka.

Maygaletu Geriko gajeru

³⁵ Wane rixatka. Gerikostsi rapokinitka, waneru satu maygaletu. Gatnugapostsi tuplanatachri. Sroschi gagijietachri. ³⁶ Wale yijnako giknogletinna gixolune yine. Repomlewata klundern. ³⁷ Runkakluna wa Geso Nasare Gajeru giknogamta. ³⁸ Giyagni sablewjeta. Wane china, "Geso, Tawikloisha, petwamonutanunno."

³⁹ Wa kosekamtachine chigetjetlu pochke rixinripa. Seyni wanepnute sablewjepotuta, "Tawiklopisha, petwamonutanunno."

⁴⁰ Giyagni Geso tunwata. Rawapjixlu Wale yegi. Wa rapyegininitkalu, repomgalu. ⁴¹ Wane chinru, "Klu palukatka wa nixyapyi?"
Wale wane china, "Gitsrukaachi, netinripa."

⁴² Ga wa Geso wane chinru, "Petanutka. Palixle gitskalakyi." ⁴³ Waneklu retatka. Romkagitatkalu. Rumalwumtlu Goyakalu. Ga wa pejnuruneko yine getinri rumalwutluna Goyakalu.

19

Sakeyo wa gjigawenutachri

¹ Geriko Pokchi rapokamtitka Geso. Koprupokchimtlu. ² Waneru satu jeji Sakeyo giwakatletachri. Walenwa gjigawenutachine gitsrukate. Ponikolni wale. ³ Raluka getletlu Geso gi gixachri. Gi rumkata getletlu wa gixolune yine chinanu ma tennu chinanu. ⁴ Penute ya gasukleta. Sukomormuna ratskota retyaplu. Gi rixanu wane yapamtanu.

⁵ Wane rapokinitka Geso, yopukgatlu. Wane chinru, "Sakeyo, giyampotu pujrukanutka. Gi rixanu xawakni pupji numkata gapokleta." ⁶ Giyagni giyampotu rujruka wale. Gimuwatachri yoptotlu.

⁷ Pejnuruneko getanatachine kegemga. Wane chinna wa satu jeji kmukochireru yegi jiglokinri wane rawinripa.

⁸ Giyagni tunwata Sakeyo. Wane chinru Gitsrukaachi, "Petanu, Gitsrukaachi. Ganikaji wane nixle nenekna kwamonurune. Ga wa girukokta nyokwire nujgiyo sroschi, gepkoxamkoje kata pnute nsatkaklo."

⁹ Geso wane chinru, "Xawakni tyepji rapokatka gognewatikaluru, gi rixanu Gawraklopishkoxni wale. ¹⁰ Gi rixanu Gita Yineru Wgenno gina nujgiyaplu gamganatachri ga wa nognetkakyaplu."

Yapkaklu wa gepi pachaprojipirana

¹¹ Wale tokanchi yijnakotinitkana, satu yapkaklu wane chinyatnakna Geso, gi rixanu gi gowukatkalu Gerosale, ga wa wanna kagwaklu waneklu rupgujewnanu Goyakalu pogirewatayawaka. ¹² Giyagni wane china, "Satu jeji wale potu pnu chiji ya, pogirewatayawaka yoptotinripa ga wa satokinripa. ¹³ Pamole wayegrene tomga. Satkaka gepi pachaproji reneka. Wane chinna, 'Gmarnewatanu napokinpotunanuko.'

¹⁴ "Ga wa gichijne gajene gayegixlu. Yakanatkana tsrune wale gajxigi, wane chinanna, 'Gi waluklu wixa yegi pogirewatirripa wa tye.'

¹⁵ "Wane rixatka. Wa yoptotinitkalu pogirewatyawaka. Satokinikta tom-gajixatkana wanna wayegrechine wa sroschi renekamtanune, rumatyapna satkaka marnewatinrinra.

¹⁶ "Muchinanu rapyegitlu satu. Wane chinru, 'Gitsrukaachi, petanu. Gepi pacha pserojiprojite yogniklo gepi waragkaproji.'

¹⁷ "Wale wane chinru, 'Poyagnu, kigleru wayegrechriyi. Ptsotsotaji chinanu poyagkakinri. Giyagni pamole pokchi putakiko.'

¹⁸ "Satu ginatnaka. Wane china, 'Gitsrukaachi, gepi pacha pserojiprojite tyogniklo satu waragkaproji.'

¹⁹ "Wale koxa wane china, 'Pixa koxa pamyo pokchi putakiko.'

²⁰ "Satu ginatnaka. Wane china, 'Gitsrukaachi, petanro gepi pacha pserojiprojite. Numretlo mkachrisama poyitkaluro. ²¹ Npikyi. Gi rixanu jeji shikgajiryi. Pma mutaklewat�awakanu pwiya. Pma muknokajityawakanu papatjetya.'

²² "Giyagni wale wane chinru, 'Mugletu wayegrechriyi. Pixako ptokanu nuklukanuwnayegjixinyi. ¿Pumatnoge wa shikgajiru jeji nixinri? ¿Nma mutaklewat�awakanu nwini, ga wa nma muknokajityawakanu napatjetya?

²³ ¿Klu koxa gi putakalo nserojiprojite kgipekoklerune yegi, wa napokini nyoptotanmaklo gitanuko ga wa gixolewnachroymananuko?"

²⁴ "Wane chinna wane tunwanatachine, 'Gkonanro gepi pachaproji waleyegiya. Genekanru wa gepi waragkaproji waneyalutu.'

²⁵ "Wanna wane chinru, 'Gitsrukaachi, waneyatkalu gepi waragkaproji.'

²⁶ "Giyagni wane nchingi, waneyalutu psoluko reneecko. Ga wa waneyamigjetu, wane rixleko koniko. ²⁷ Ga wa nkamnixjene koxa wa nma maluka pogirewletjene wannayegiya, ganikanna gewi. Giylaganna gita getanu."

Gerosale rapoka Geso gakagloklewatachri

²⁸ Tyepirana rali wane chinremtinitka Geso, yatka. Kosekamtatka. Gerosale kanikatka. ²⁹ Wane rixatka. Gi gowuka chininitka Wetpage ga wa Wetani. Magkastsitkani, wa Goliwa Magkate chinikowaka. Gepi yimaklene yokanata. ³⁰ Wane chinna Wale, "Gyanu tujra pokchi ginaple gajeru. Gapokinpatku, waneklupa gikshikanro mporo wgene tsatkaluru, yineru mtuplatanutowa. Gkoshrikanru. Ganikanru. ³¹ Girukokta gepomginipgi, '¿Klu chinanu wane gixa koshiprokletlo?' wane nchinanu, 'Gitsrukaachi galuklu.'"

³² Wane yatkana yokanatkalue. Rukshikluna chinyawakpotukna. ³³ Koshipirokatkaluna mporo wgene. Kwangixleru wane chinna, "¿Klu chinanu gkoshipiroklu mporo wgene?"

³⁴ Wanna wane china, "Gi rixanu Gitsrukaachi galuklu."

³⁵ Ranikatkaluna Geso yegi. Sapwakatjitatkaluna gimkaluyuma mporo wgene. Gitji rutakatkaluna Geso. ³⁶ Yamtiny Wale, rukwekamatna gatnugapo.

³⁷ Gi gowuka rixininitka, Goliwa Magkate yojrigle rapokiniwa, pejnu-runeko gixolune yimaklene gimuwata. Yinuwaka gimalwuretluna Goyakalu. Saplee gimalwuretluna wa pejnuruko retanruyna, wa giyak-lukakaya. ³⁸ Wane chinna:

¡Gimalwutkaluru Pogirchi,

Gitsrukaachi giwaka ginyachri!

¡Kigle gwashle rixanu tengogneya!

¡Tenowaka potu waneplu goyaknu!

³⁹ Giyagni pimrine Gwariseyone gixolune yine yegi gwachine wane chinruna, "Yimaklewatachri, pchigetjetanna pyimaklene."

⁴⁰ Wale gigita. Wane china, "Wane nchingi, wa nyi pochke rixinmakna, sotlumka saplewatanu."

Geso gichiyagatlu Gerosale

⁴¹ Gi gowuka tixininitka, retlu tsru pokchi. Chiyagata wale chinanu. Wane china, ⁴² "Pumatkamkalu xani pugogneya, kluneru chinanmaka kigle gwashlepmakyi! Seyni xani pugale yogimatika. ⁴³ Gi rixanu runanu pagognekaka, pkamnixjene chiji pirijeretinyina. Sajrukanyina. Pejnurusretako rerutanya. ⁴⁴ Chiji jirukanyina, ga wa pwugenene gitoko gwachine. Gi wa rutukanu sotlu rogotkakinripa, gi rixanu gi pumatlu wa psalwayegitikologgne."

Kpashiwakapji powratka

⁴⁵ Kpashiwakapji jiglokamtatka. Yinuwaka giknokletna maleka gishanrewanatachine. ⁴⁶ Wane chinna, "Kayongalutkani:

Nopji gagjigognewakapjipni.

 Ga wa gixa wane gixatkalu
 gitawakapna kachowgurune gwiywaka."

Kpashiwakapji runkaklewatyia Geso

⁴⁷ Pagognemnunanuka kpashiwakapji runkaklewatyia. Ga wa tsrukakalune sasertotene ga wa yonchikgapine, ga wa wanna potu yine gijga giylaletluna. ⁴⁸ Gi rukshikluna gikta rixpokotyapluna. Gi rixanu pejnuruneko yine Walepje kagwakna wa jemyapluna.

20

Geso gitakikolu gepomsayegitka

¹ Pagogne wane rixatka. Yine runkakanata kpashiwakapjiya. Runkakletlu Kiglerpotunanu Tokanchi. Rapyegitluna tsrukakalune sasertotene, ga wa yonchikgapine tsruneyma. ² Ruynumsatluna. Wane chinruna, "Punkakanwu klu putakika Pixa tyekaka pkamrutinri. ¿Katu gitakyi wa tyeysa?"

³ Giyagni rugita Geso. Wane chinna, "Gita koxa gepomgangi satu tokanchiya. Ginkakanno. ⁴ Wa Gwa katlelewle ¿tengogne giyakatyachrirge? ¿Waka yinenukla?"

⁵ Yoptopirkakna wannakakluko. Wane chinna, "Wane wchininiplaka, tengogne giyakatyachrini, Wale wane chinanunwu, '¿Klu chinanu koxa gi galixlu?'" ⁶ Wane wchinininapa yinenni, pejnuruneko yine sotlujetanunwu. Gi rixanu rushinikanutkana Goyakalu tokanu geneklewatachritkani Gwani." ⁷ Giyagni rugitna wa gi rumatna ginakakta giyakatyachri.

⁸ Giyagni Geso wane chinna, "Gi Gitako ginkakangi klu nutakika tyekaka nkamrutinri."

Kamrurewatachine muglene

⁹ Yinuwaka ginkakletna yine tye yapkakluya, "Satu jeji sana gowasha rutaka. Renekamtna sana girukotachine. Pnu yatka. Gixgogne ramga. ¹⁰ Topapkotka satu wayegrechri yokanata girukotachine yegi, wa renekyapluna wa sana gwiyachritka. Seyni wa girukowatachine kochipjetanru. Maleshalni yokanatna. ¹¹ Rumepe yokanretatnaklu satu wayegrechri. Seyni wale koxa kochipjetna. Rektutetanruna. Maleshalni

yokanatna. ¹² Wanepnute mapa rixinri yokanatnaka. Waleni rustakna. Ruknokanruna.

¹³ “Giyagni wa kgisanateru wane china, ‘¿Klu nkamrutanutka? Nyokanatanru nalukanru noturu. Kagwakpirgetkotanruna wale.’”

¹⁴ “Wa sana girukotachine wa retinitkaluna, wane chinna wannakakluko, ‘Tyenwa yoptotachripatka. Ginanu. Wuylaganru. Yoptotanrumaka wix-anpatkani.’”

¹⁵ “Kashichanruna. Gowasha ruknokyranruna. Wane ruylatyanruna.

“Giyagni ¿gi rixanutkana kgisanateru wa wanna sana girukotachine?”

¹⁶ Runanu. Ruylatanunna wa nyipni sana girukotachinepni. Pimrine renekanu gowasha.”

Wa wanna yijnakotinitkalu, wane chinna, “Gike rixiniko.”

¹⁷ Wa Wale retanatna. Wane china, “¿Klunerkoxi wa tye yonatkaluru?”

Wa sotlu myoptotkotu kamrupitachineya,

wale gitaaka yoptowaka gitsejita.

¹⁸ “Katupnikta tye sotlu gitspetanuna, rumlokpotutanuna, ramgapotutanuna. Ga wa tye sotlu gjirukgogotanruna ramgapotutanuna.”

¹⁹ Waneklu yonchikgapine ga wa tsrukakalune sasertene galuka kashretlu Geso, gi rixanu rumata jemluna wa wannapirana chinyalu tye yapkaklu. Seyni yine pikna. ²⁰ Giruktatluna. Yokanyegitluna yimlewashatachine, wa poyagkakachine pixka rixashatinripna, wa kashtokanutyapluna, samyokyapluna gitsrukaachi yegi, wa tsru potu gitaakaluru giruktlewatyawaka. ²¹ Repomgaluna. Wane chinruna, “Yimaklewatichri, wumatlu wanepotuko pchinjeta ga wa punkaklewjetra. Gi wa manewle giglenu chinanu pyoptotlu yineru. Seyni galikaka potu punkakletpiranatlu Goyakalu gatnugapote. ²² ¿Wa munanshichkotnige wenrukaka wenekyaplù Susa waka gike? ¿Wenekege waka gi wa wenekanru?”

²³ Seyni Wale gimatlw wanna sanowashle. Wane chinna, ²⁴ “Gekakgitanno wa sroschiproji. ¿Katu yaglu waneylo, ga wa katunni toyonga?”

Wane chinruna, “Susanni.”

²⁵ Giyagni Geso wane chinna, “Giyagni genekanru Susa Susanni, ga wa Goyakalu Goyakalunni.”

²⁶ Gi rumkata kashretokanutluna yine getanu. Ruglajitanna wa rugityana. Pochkenna.

Gepomsalu yotunrupirana

²⁷ Rapokna pimrine Sariseyone. Wane chinachine maleshlu yotunrupa gipnachineya. Repomgaluna. ²⁸ Wane chinruna, “Moysisi yonyegitwu, satu yegwakluni kganunronru gipninina gi kwugenniri, wa repuru gwanro wale gnunronanni ruxolewkakinripa giklopishapa yegwakluni chinanu. ²⁹ Giyagni wanena payokgiprerune moletkakachine. Muchinanu tsru gnunrowata. Rupnana. Mwugenetniko. ³⁰ Waneko pixka rixana gapkatatachri. ³¹ Mapa chininrina gwalo. Waneko pixka rixanna pejnurunniko payokgipreni. Rupnanna. Gi ruknokawgenetanna. ³² Suxni gapkata potu gipnaletanatka. ³³ Giyagni yotunruklu, ¿giru gnunropni wa wannaya? Gi rixanu payokgipreni gnunronitka wa wala.”

³⁴ Geso wane chinna, “Tyegogne gajene ganunrowata ga wa ganuruwatna.

³⁵ Seyni wa rumuknu getkonina rapkapyapluna tujragogne mnikaw-nakatupa ga wa yotunru gipnachinetskalaya wanna gi ganunrowatanutka. Gi koxa ganuruwatanutkana. ³⁶ Gi rumkata gipnaletanutkana. Gi rixanu Goyakalutowrene pixka rixanutkana. Goyakalu wgenenpatkani, gi rixanu

yotunru wgenenpatkani. ³⁷ Wa yotunotachinepa gipnachinepirana, Moysisi ginkakpokowaklewata kawshipiripirana runkakletinri, wane rixinri *Gitsrukaachi, Gawra Goyakalutni, ga wa Gisaaka koxa Goyakalutni, ga wa Gakowo koxa Goyakalutni.* ³⁸ Gi wa gipnachine Goyakalutni, seyni giweka-chine Goyakalute. Gi rixanu pejnoruneko giweka Wale chinanu.”

³⁹ Giyagni pimrine yonchikgapine gigita. Wane chinna, “Yimaklewat-achri, kigleru wane pchinre.” ⁴⁰ Gi rixanu wanekluyakawa gi tserpiranawa gepomgaletatkaluna.

Kristo, Tawiklopiha

⁴¹ Giyagni Wale wane chinna, “*¿Gi chinna wa Tawiklopiha rixinri wa Kristo?* ⁴² Gi rixanu waleko Tawi wane china Shikalchi kirukateya:

Gitsrukaachi wane chinru Nutsrukate:

Ptuplatanu npotuklesretate,

⁴³ *Nutakinpotukna pkamnixjene*

putspanjixgapre rixinripna.

⁴⁴ “Giyagni waleko Tawi wane chinru Gitsrukaachi, *¿gi rixpokotyawaka giklopishayapni?*”

Geso giklukna yonchikgapine

⁴⁵ Pejnoruneko yine yijnakonatinri, wane chinna yimaklene, ⁴⁶ “Ggirukotinwa wanna yonchikgapineya. Galuka yanretachine gimkaluyna gowukalu. Ralukluna ralukikolupna giputuya. Ralukluna wa tsrukakalune tuplapijere ginkaklewawakapijkakaya, muchinanu tuplapijkaka koxa nikjetikowakaya. ⁴⁷ Nikatapjjietkanna gipnagnurutachronni. Rixashleyna gogajjrgognerkakna. Wanna giklukanuwnakakalunpotupni.”

21

Gipnagnurutachro genekashle

¹ Geso getanata. Retna ponikolune, wa genekashlu gignantakikowaka gitakachine. ² Sato gipnagnurutachro reta kwamonuro. Tutaklo gepi mtur-omchataaji. ³ Wane china, “Galikaka wane nchingi, wa twu kwamonuro gipnagnurutachro wala gitaka pejnorune pnute. ⁴ Gi rixanu nyi pejnoruneko ruxetanrona rutakna renekashlena Goyakalunupa. Seyni wa twu magatyachro potu tutaklo tseyomchataaji, pejnoruko tuwekinripa.”

Geso ginkakletagnaputu wa kpashiwakapji gjrolekachripa

⁵ Pimrine kpashiwakapjipirana yanumsanatna, wa kiglepottakalu sotlu ga wa giglewlu kaka genekashhatkaluru. Geso wane china, ⁶ “Wa tyekaka getanru. Pagogne ginanu gi wa rutukanu sotlu rogotkakinripa, gi wa mujrolekatunpkni.”

⁷ Giyagni repomgaluna. Wane chinruna, “Yimaklewatachri, *¿giklupni wa tyekakapa? ¿Klu getkaluru wanepa wa tyekaka wane gixinripatka?*”

⁸ Giyagni wane china Geso, “Ggirukotinwa gi wa yokwitkalunepgi. Gi rixanu gixo ginanu ngiwakaya. Wane chinanna, ‘Gitni. Kayegikatkalu gigogne,’ chinanna. Giyagni gi wa gomkajigitanna. ⁹ Seyni wa gixa jeminiplu wa gylalupirana ga wa yawroptajrukakapirana, gi gimiye Kanu. Gi rixanu rumkata muchinanu wane gixleta, seyni gi wa yoptukyawaknichi.”

Tsru getkalurkakapa ma mapookanuwa yoptukyawakapa

¹⁰ Giyagni Geso wane chinna, “Yotunyegkakanna pachijne gajene pachijne gajene yegi, ga wa pogirewatyawaka yotunyegkaka pogirewatyawaka.

¹¹ Waneplu tsru giyolikchijrukaka pachijnemnunanukaya. Ga wa waneplu yayixlukaka, ga wa nachlukaka, ga wa gimiyelekukaka, ga wa tsru getkalurkaka tengogneya.

¹² “Ga wa ma mapookanupachi tyekaka, gkashichckona. Kojwakangina. Ginkaklewawakapjikakaya ga wa yoshmakikwaka nsamyooke. Ga wa pogirchine yegi ga wa gitsrukaachine yegi ganiiko Gita giwaka chinanu. ¹³ Rushpakanu gipguitalewle chinanu. ¹⁴ Giyagni gaji gitakanru tye shinikanchi xani, gi wa gyanshinikanyegitanru gikta nchnina giykoyeletinwa. ¹⁵ Gi rixanu Gita genektokanutangi ga wa gimatkalewle ma mumkata satkakletanruna, gi koxa rumkata yoptopiiretanruna pejnuruneko gkm-nixjene. ¹⁶ Gixa samyooke giruneyako, ga wa gimunanwakaneyako, ga wa gimoreneyako, ga wa gimatununeyako. Ga wa gixa pimringi ruylatanna. ¹⁷ Gayegixkalunepgi pejnuruneyako Gita giwaka chinanu. ¹⁸ Ga wa gixji-wutsa gi wa patsapjeko gamgingi. ¹⁹ Gakotanshinikanutinri, giwekanu.

Gerosale mwakotupni

²⁰ “Wa gixa getiniplu solalone sajrukiniplu Gerosale, waneklu gimatankaluy kayegikatkalu mwakotu rixinripatka pokchi. ²¹ Waneklu wa Gote gwachine magkakaka ya gasukletanna. Ga wa pokchi ganikajite gwachine wane rushpakinna. Ga wa pokchi malekate gwachine gi wa pokchi yanutkana. ²² Gi rixanu walegognekekaka saletikolupna Gerosale gwachine, wa poyagkakikolupa pejnurkakako yonatkalurkaka. ²³ ¡Gi waneni wa kamshironepni ga wa gashichakachinepni walegognekekpatka! Gi rixanu waneplu tsru kegeknanuwlu tye chijiya, ga wa jgekanchi nyi yinyegiya. ²⁴ Yawnanna yoglelewapi gistikikalune. Payinemnunanuka ganikanna kashikanotkalunenapa. Ga wa Gerosale gakatooko payineya poyagkakikolpotunanuko payingognesha.

Yineru Wgene gininripa

²⁵ “Waneplu getkalurkaka tkachiya, ga wa ksuruya, ga wa katagirkakaya, ga wa tye psolchijneyako payinemnunanuka salewnale. Wa tsru wenu sejrewnale ga wa gishpurga yowjere nutanshinikankakinna. ²⁶ Rupnagoojetanunna yinepni piklena chinanu, ga wa kagwananruna chinanu tye psolchijneko ginachripa chinanu. Gi rixanu wa gichkolkaka tengogne gajeru kowshiwshkito. ²⁷ Wanepnute retannona wa *Gita yineru Wgenno ginachripa kyachgapereruyma*. Tsru nuyakle ga wa noyaknu numunananu. ²⁸ Wa tyekaka yinuwaka wane gixletinpatka, mpotukawatanu. Ntunogitanu. Gi rixanu gi gowukatkalu gkoshpakkolpatka.”

Gikera gipchekekaygalejitiinipirana

²⁹ Satu yapkaklu wane chinyana, “Getanro gikera ga wa pejnurmunkano. ³⁰ Wa gixa getinitkalo tupchekekaygalejitiinitka, gixnanuko gimatattkalu gi gowukatkalu walapu. ³¹ Waneko pixka rixanu gixa getinpatkalu wane gixlutkani tyekaka, gimatankaluy gi gowukpatkalu Goyakalu pogirewatwyawaka.

³² “Galikaka wane nchingi, gi ruknogaranu tye gimuweekakgognenatachinesha, wa ptowruko tyekaka ma mixkanuwa. ³³ Wa tengogne ga wa chiji nikawnanu, seyni wa ntokanu gi nikawnanu.

Giyokanu; gagjigognetanu

³⁴ “Ga wa gixa girukotinwa gixnanuko, gi wa ginjiwujpa gixkalchinanu, gi wa gimru chinanu, gi wa gkojwakanshinikanutinri tyegogne gajeruya, mkgawaakotupa rapyegityapgi nogogne gitseklu pixka. ³⁵ Gi rixanu wane

rixa gapyegletanna pejnuruneko tye psolchijnemtako gwachine. ³⁶ Giyagni psolgogneko guyokanu. Gagjigognetanu pejnuruko ginachripa gimkata gasukletinripa, ga wa Gitasts, Yineru Wgennostsi gimkata tunwaletinripa.”

Kpashiwakapji runkaklewatyera Geso

³⁷ Ga wa gogikaka, wa kpashiwakapji runkaklewjetya. Ga wa goyechno Goliwa Magkate chinikowaka yajeta. Wane rawjejetra. ³⁸ Ga wa pejnuruneko yine goyechnokawpotuko yotunjeta. Kpashiwakapji yayegityaluna wa yij-nakotyapluna.

22

Tsrukakalune sasertotene ga wa yonchikgapine

¹ Gi gowukatkalu meyiwlugogne, wa jimapro gisekachri myapjetkotu niikalurupa, wa Giknoglushgogne chinkaluru. ² Ga wa tsrukakalune sasertotene ga wa yonchikgapine gigjalu gi rixpoko giylaletanruna Geso, gi rixanu yine pikna.

Gota galuka samyokletlu Geso

³ Satanasyo jiglokatkalu Gota, Giskaryote chinkaluru. Walenwa pamole gepi rixinrina. ⁴ Wane ya. Ruynumsatapna tsrukakalune sasertotene ga wa kpashiwakapji girukotachine gi rixpoko samyokletyaplu wanna yegi. ⁵ Wanna gimuwata. Rupiratyaluna renekyapluna sroschiproji. ⁶ Giyagni wale gipiratyana. Rujgalu ruglepoktapinri gi rixpoko samyokletyaplu wa gixolune yine mwiyawakanu.

Tsru Giknoglushgogne chinanu galpokotkaluru

⁷ Rapokatka jimapro gisekachri myapjetkotu nikikolgogne. Rumkata giylaletluna Tsru Giknoglushgogne genekashatkaluru. ⁸ Giyagni Petro ga wa Gwa yukanata. Wane chinna, “Gajewa. Galpokotanru wixanupa wa Tsru Giknoglushgogne wnikanrupa.”

⁹ Wane chinruna, “Ginaka paluka galpoklejixwu?”

¹⁰ Wale wane chinna, “Wa tsru pokchi gyinipa, wane yoptotingi satu jeji wa gashgaji gonu gwanru ganikachri. Gomkagitanru panchipotunanuko ginakakta jigloka. ¹¹ Wane nchinanru wa kapjiru, “Yimaklewatachri wane china, “Ginaku wa napokagrulkwakle wa nnikyawaka Tsru Giknoglushgogne nyimakleneyma?” china.”

¹² “Wale gekakgitangi satu tsru teno gajerugruko gali galpokletkalurutka. Wane galpokotinri.”

¹³ Giyagni wane yatkana. Rukshikluna Wale chinyawakpotukna. Ralpoktluna Tsru Giknoglushgognenupa.

Ralipre nachnewlu

¹⁴ Wa gipapko gapokinitka, nikjetikwaka tuplata. Ga wa Waleymana yukanatanune. ¹⁵ Wane chinna Wale, “Naluka gimniklepotutgi tye Giknoglushgogne nma salewnagnapuwa. ¹⁶ Gi rixanu wane nchingi, gi wanepnuteko nnikanutkalu ma poyagkaakanuwa wale Goyakalu pogirewatwyawakaya.”

¹⁷ Rawlo girapistono. Poyagnutatkalo. Wane china, “Gyoptotanro wa twu. Gimurkakanu. ¹⁸ Gi rixanu wane nchingi, gi nuranutkalo wanepnute gowajga ma mapookanuwa Goyakalu pogirewatwyawaka.”

¹⁹ Kashichlu jimapro. Poyagnutinitkalu, jiknajrotlu. Reneksatna. Wane china, “Tyenwa nomane gixa chinanu geneekaluru. Wane gixjetanu gishinikyapno Gita.”

²⁰ Rali nikletinitkana, waneko pixka rixlo girapistono. Wane china, “Twu girapistono walanwa gerotu gipiratkaluru nogragaya, gixa chinanu giyookaluru.

²¹ “Seyni getanru nsamyokjerumyopa Gitayma nikjetikowakaya. ²² Gi rixanu galikakni Gita wa Yineru Wgenno galimtanu nutakikowaka, seyni iji waneni wa tye jeji, wale chinanu Gita wa Yineru Wgenno samyooko!”

²³ Giyagni wanna yinuwaka gepomsakakleta wannakakluko girupni wale wane gixachripa.

Wa tsru potu Goyakalu pogirewatyawakaya

²⁴ Yoptopirkakna wannakakluko giru yimaklelrupni wannate tsru kagwaakaluru. ²⁵ Giyagni Geso wane chinna, “Payineko pogirene girukotanna wanna, wanna chinanu gitaakalune kigleru gixjene chinkalune. ²⁶ Ga wa gixa gi wane gixanu. Seyni wa tsru potu gixachri gixyegiya, mturu potu pixka rixanu. Ga wa gitsrukaachi, satu kamrurewatachri pixka rixanu. ²⁷ Gi rixanu, ¿girni wa tsrupotu, wa nikjetikwaka tuplatachri waka kamrurewatachri? ¿Gi ge wa nikjetikwaka tuplatachri? Seyni wa gixyegiya, Gitni wa kamrurewatachri pixkalutno. ²⁸ Ga wa gixni wa Gitaymalunenangi nyantaletikowaakakaya. ²⁹ Giyagni Gita gipiratyagi. Nuru pixka pogirewatyawaka rupiratyano. ³⁰ Wa numnikjenepgi ga wa numurjenepgi wa nnikjetyawaka npogirewatyawakaya. Ga wa pamole gepi pogirchi tuplapijere ntuplatanu. Gixa gitakyagokanna pamole gepinerune wa Gisrayiline.”

Geso ginkakletagnaputlu Petro nutatiniplu

³¹ “Simo, Simo, petanu. Satanasyo gagijiyegitgi trikoji pixka gixirikajitkalunepgi. ³² Ga wa Gita gagigogneyegityi wa palixle mmagatinitipa. Ga wa pixa penshinikanutinpatka, pmuchkotanshinikanutanna pumolene.”

³³ Giyagni Petro wane chinru, “Gitsrukaachi, galpokotachrino yoshmakik-waka nyinripa Pixayma waka gipnalu yegi.”

³⁴ Geso wane chinru, “Petro, wane nchinyi, ma yanumatkanuwa gaxawripa xawknai, pnutatanno mapa kata pma mumatyanupno.”

Yogolewapi

³⁵ Wane chinatnakna, “Wa nyokanatingi wa sroschimap maniikangi, ga wa mtsapanengi ga wa myoshmakjixlengi, ¿pagixanre gmagaty?”

Wanna wane china, “Gi satuna wmagaty.”

³⁶ Geso wane chinra, “Seyni wa xani wa sroschimap waneyalutu ranikanru, ga wa tsapa koxa. Ga wa yogolewapi waneyamigjetu, rushkananru gimkaluko. Ragitanru. ³⁷ Gi rixanu wane nchingi rumkata poyagkakletinripachi wa tye yonatkaluru Gitapirana. Wane china: *Mugleneyma kagwakikolupa Wale koxa*, Gi rixanu wa yonatkaluru Gitapirana poyagkakpotutkalurupni.”

³⁸ Giyagni wanna wane chinru, “Gitsrukaachi, petanru. Gewru gepi yogolewapi.”

Wale wane chinna, “Gigiyatka.”

Getsemani ragjigognetya Geso

³⁹ Giyagni wane yiyatka. Wa rixjetyawaka Goliwa Magkate ya. Ga wa yimaklene koxa gomkagitlu. ⁴⁰ Wa wane rapokinitkana, Wale wane chinna, “Gagjigognetanu gma yantaletikotupu.”

⁴¹ Ga wa Wale gitspalatyana wa sotlu gimkata giknokikwakphini. Yoptsojita. Wale ragjigognetya salewnalepapirana. ⁴² Wane china,

“Nuru, palukiniplu tuknogantu twu girapistonu Gitaya, seyni gi wa Gita galukyawakapni, seyni Pixa galukyawakapni.”

⁴³ Satu Goyakalutworeru tengogne guyakatyachri gipguguewnayegitlu. Muchotlu. ⁴⁴ Tsru chingajiwlu rixinri, wanepnute muchkowa gagijognnereta. Wane rixa runkokle wa tsru rutspigle pixka rixagragata wa chiji gapokachri.

⁴⁵ Wa ragjigognetyawaka palnamtinitka. Yayegintra yimaklene. Retamtna gimkanatachine wamonnupogna chinanu. ⁴⁶ Wane chinna, “¿Klu chinanu gimkanata? Gytunotanu. Ga wa gagjigognetanu wa yantaletikowakapa gma jiglokinitipa.”

Geso samyooka ga wa kashichka

⁴⁷ Wa Geso yanumsanatiniwa, getanu, gixolune yine. Ga wa Gota chinkaluru, wa pamole gepi chininri, wanna kosekamta. Wa Geso yegi rapokatka. Ramlutlu. ⁴⁸ Giyagni Geso wane chinru, “Gota, ¿pamlurege psamyokyatkano Gita wa Yineru Wgenno?”

⁴⁹ Ga wa Waleymalune getatanlu giknogachripa. Wane chinruna, “Gitsrukaachi, ¿yoglolewaplege wustaklewatini?”

⁵⁰ Satu wannaymalutu wa sasertotene gitsrukate potu wayegreru ruylaka. Potuklejepi yostakyalu. ⁵¹ Ga wa rujretlu Geso. Wane china, “Wanpotunanuko getashatanu.”

Kamrukjepitlu. Rutuukaklu.

⁵² Geso gepomgana sajrukjene, wannanwa tsrukakalune sasertotene, ga wa kpashiwakapji girukotachine, ga wa tsrune; wane chinna, “¿Kachowguru gishinikachine pixkagi gixa gishpaklemta yoglolewapiyama ga wa gagajeyma? ⁵³ Pagognemnunanuka kpashiwakapji gixayma nwanata. Gi wa wane gomyokyegityano. Seyni tyenwa gipapkotkani gixa, ga wa mapshag-waka girukotachripakpotkani.”

Petro nutatlu Geso

⁵⁴ Kashichatkaluna. Ranikluna. Sasertotene gitsrukapatupji ranikluna. Ga wa Petro gowukayako gomkagitlu. ⁵⁵ Ganikajputu pawatna. Wane ruxiplakakyana. Wanna yegi tuplata koxa Petro. ⁵⁶ Sato wayegrechro getlu wa chichpawasti tuplanatyawaka. Tetpotutlu. Wane china, “Wa tye Waleymalutunana.”

⁵⁷ Giyagni wale nutatlu. Wane china, “Suxo, gi numatlu.”

⁵⁸ Gowukshiniyaka satu getatnaklu. Wane china, “Pixa wannaymalutunanyi.”

“Ga wa Petro wane china, “Jeji, gi wa gitni.”

⁵⁹ Gowukshini giknoginitka, satu psolmucchonuko wane chinatnaka, “Galikakni wa tye koxa Waleymananu. Gi rixanu Kalile gajerni.”

⁶⁰ Ga wa Petro wane china, “Jeji, gi numata gikta pchnina.”

Waneklu, wa yanumsatiniwa, gaxawripa yanumatatka. ⁶¹ Giyagni Git-srukaachi geknokyegitlu. Retlu Petro. Ga wa Petro gishinkaplu Gitsrukaachi tokanu, wa chinyawaklu, “Ma yanumatkanuwa gaxawripa xawakni, pnutatanno mapa kata.”

⁶² Giyagni maleka rushpaka Petro. Chiyampotuta.

Geso gixpiranatka ga wa kochipjetka

⁶³ Geso kashichachine jejine gixpiranatlu. Kochipjetluna.

⁶⁴ Rushyagojtluna. Repomsatluna. Wane chinruna, “Goyakalu tokanu peneklewatkoxewa. ¿Katu giylakyi?” ⁶⁵ Wanepnute tye pixkalutu mupashiregnuchi gi gepika chinruna Geso.

Jemanshinikankakjetikowakaya tunwata Geso

⁶⁶ Gogi rixinikta rapatjetna yine tsrutene, ga wa tsrukakalune sasertotene, ga wa yonchikgapine. Jemanshinikankakjetyawakna ranikluna. ⁶⁷ Wane chinna, “*¿Pixlege wa Kristoyi? Punkakanwu.*”

Wale wane chinna, “Wa nunkakingi gi galixanno. ⁶⁸ Wa nepomginkoxgi, gi wa gititanno. ⁶⁹ Ga wa xaniyakawa *Goyakalu kgiyaklewakleru potuklesrete ntuplatanu Gita Yineru Wgenno.*”

⁷⁰ Ga wa pejnuruneko wane china, “*Giyagni ¿Pixlege wa Goyakalu Wgene?*”

Wale wane china, “*Gixa chinyawaka Gitakni.*”

⁷¹ Giyagni wanna wane china, “*¿Klu wanepnute gipgujtalu walukatka? Gi rixanu wixa yijnakotokanutatkalu Walepotuko.*”

23

Geso wa Pilato ginaple

¹ Giyagni palnamattkana pejnuruneko gixolune yine. Pilato yegi ranikatkaluna. ² Yinuwaka jigyeglejetatkaluna. Wane chinna, “Tye wukshika wa wumolene pupjekakachri. Rujretna wa Susa genekikolupa wenru. Wane china Walegimni wa Kristo, Pogirchi.”

³ Giyagni Pilato gepomgalu. Wane chinru, “*¿Pixnige wa Goteyone Pogiryi?*” Rugitlu Wale. Wane chinru, “*Pixa chinyawaka.*”

⁴ Pilato wane chinna tsrukakalune sasertotene ga wa gixolune yine, “Gi satuna giklukanuwnalu nukshikyalu tye jeji.”

⁵ Ga wa wanna muchkotnawana. Wane chinna, “*Komyekanshnikanutna yine. Runkaklewata psoluyako Gotechijneya. Kalile rumuyaka ginkaklewletya gewina.*”

Geso wa Girore ginaple

⁶ Giyagni Pilato yijnakotinitkalu, repomgalewata gikta Kalile gajerni tye jeji. ⁷ Wa rumatinikta wa Girore girukowasretatyawaka gajerni, yokanatlu Girore yegi, gi rixanu walegognekaka Gerosale rawanata Girore.

⁸ Ga wa Girore getinitkalu Geso, rumuwpotuta. Gi rixanu gi pomshinikmaka raluka getletlu. Gi rixanu yijnakpiranyegitlu. Kagwaka getletlu satu getkaluru Wale kamrutantu. ⁹ Gixo tokanchi repomgiylu, seyni Wale gike rugityalu. ¹⁰ Wanna koxa tunwanatna tsrukakalune sasertotene ga wa yonchikgapine. Muchkowa jigyegletluna. ¹¹ Ga wa Girore solaloteneyma geyiklu. Rapnokatluna. Ponikolu mkachri yoshmakluna. Pilato yegi yokanattnaklu. ¹² Walegogne rumatkakatkana Girore ga wa Pilato. Gi rixanu muchikawa kamnixkakapna.

Waka Geso waka Warawasu

¹³ Giyagni Pilato tomgana tsrukakalune sasertotene ga wa tsrukakalune ga wa yine. Wane chinna, ¹⁴“Wa tye jeji ganikyegitno wa yine pupjekakachri pputa. Ga wa nepomsatlu gixa getanu. Gi satuna nukshika giklukanuwnaletlu tye jeji wa gjigyegityalu. ¹⁵ Gi wa Giroreko. Gi rixanu wale yokanatlu wixa yegi. Ga wa gi satuna kamruta rupniru chinanupa. ¹⁶ Giyagni nkochipjejixanru. Wane gixachri nkaspukanru.”

¹⁷ Wa satkaka meyiwlugognekaka rumkata kaspuklejetlu satu. ¹⁸ Ga wa pejnuruneko gixolune yine pasaplewatkalunni wane chinna, “*Puxri-ikakanru wa Tye. Ga wa Warawasu pkaspukinwu.*” ¹⁹ Walenwa yagotkaklu chinanu wa pokchi kamrutikaluru yagotkaklu, ga wa ruylale chinanu yoshmaaka.

²⁰ Rumepe tomgaletatnakna Pilato. Raluka kaspukletmaklu Geso. ²¹ Seyni wanna sablewataatnaka. Wane chinna, “¡Koroshishkita putakaganru! ¡Koroshishkita putakaganru!”

²² Wale wane chinna mapa kata chininri, “Seyni ¿klu gektutu kamruta wa Tye? Gi satuna nukshikyalu rupninri chinanupa. Giyagni nkochipjejixanru. Nkaspukanru.”

²³ Seyni wanna gichko sablewlepotutatnaka. Ragjitluna koroshishkita rutakikolupa. Giyagni wanna tokanu gaalirewata. ²⁴ Giyagni Pilato towuwatatakwa ragityawakna rixikolpatka. ²⁵ Giyagni kaspukjixatkalu Warawasu wa yoshmaakaluru, yagotkaklu chinanu ga wa ruylale chinanu yoshmaakaluru, wa wanna gagjitanru. Ga wa Geso samyokatka wanna galukyawaka.

Wa gatnugapo Gijiwuswaga gapokgapotachri

²⁶ Ranikattaluna. Surene gajeru Simo kashichna, sana giyakatyachri. Wale rutjikaklona koroshishkita, Geso gajxigi ranikyaplo. ²⁷ Romkagitaluna gixolune potu yine, ga wa suxone koxa, kegeknauwatachaine, wamonuwatachine Wale chinanu. ²⁸ Ruprotakyegitna Geso. Wane chinna, “Gerosale gajerone, gi wa gichiayagatanno. Seyni gixnanuko gichiayagatinwa, ga wa gwugenene chinanu. ²⁹ Gi rixanu runanu pagognepa, wane chininripna, ‘Giglenshinikanyegitkalune migatone, ga wa nanwakchikaka mmushiwatkane, ga wa tnuchkaka ma mashichkotu.’ ³⁰ Waneklupa yinuwaka *wane chinretanruna magkakaka:*

Wixa gogo pujrukanu.

Ga wa mturu magkakaka:

Pushyatanwu.

³¹ Gi rixanu wa tyekaka kamrutna wa yinuwakikoluya, ¿gi rixpokotanna pagogne?”

Koroshishkita gitaaikaluru

³² Raniikakoxna Waleyma gepi gektutu kamruklerune giylatkalunepa. ³³ Rapokluna Kolkota chinikowaka. Walenwa Gijiwuswaga yegi chinikowaka. Wane koroshishkita rutakyaluna, ga wa gepi gektutu kamruklerune koxa, satu potuklesreta, ga wa satu kegnetesreta. ³⁴ Geso wane china, “Nuru, pkaspukinna wanna. Gi rixanu gi rumatna kluneru kamrutna.”

Kotspaltamkatluna. Rutakluna rupenokalkakna.

³⁵ Wane tunwanatna yine. Retanatna. Tsrukakaluneyma ruxpiranatluna. Wane chinna, “Pimrine rognetskaka. Walenanuko gognetkakinwa wa xani Goyakalu Kristote rixinpakni, ga wa tsomitanru.”

³⁶ Wa solalone yayegitlu. Rapnokatluna. Renekmakluna kachgalu. ³⁷ Wane chinna, “Wa Goteyone pogire pixinipa, pognetkakinwa Pixnanuko.”

³⁸ Wanekoxlu jigyegitikoluyonga Wale gogwaka wane chinachri: Tyenwa Goteyone Pogire.

Wa gepi kachowgurune

³⁹ Wanenna gepi gektutu kamruklerune, wa gixripatachinni. Satu mu-pashiregnuchi chinru. Wane china, “¿Gi ge Kristoky i pixa? Pixnanuko pognetkakinwa ga wa wixni koxa gognetkakanu.”

⁴⁰ Rugita wa satu. Chigetjetlu. Wane chinru, “¿Gi ge piklu Goyakalu? Waneko pixka giklukanuwnayegjixkaluryi pixa. ⁴¹ Ga wa wixa galikakni wanepotuko wixka. Gi rixanu wkamrutyawaka pixkapotuko wyoptota. Seyni wa Tye gi satuna mugletu kamruta.”

⁴² Giyagni wale wane china, “Geso, pushinikanno gita wa pogirewatyawaka pjiglokinipa.”

⁴³ Giyagni Geso wane chinru, “Galikakni wane nchinyi, xawakni Gitaymapyi gigletikowaka tengogneya.”

Geso gipnale

⁴⁴ Tumananutkani ruchpokatka psolchijneputunanuyako, kayinwakasreta rapokinpotunanuko. ⁴⁵ Tkachi giwnamtatka. Mkachrichrata gimatechachri kpashiwaka potu gajeru gitlalakamtatka ganikajpotunanuko.

⁴⁶ Giyagni Geso tsru sable potu rixa. Wane china, “Nuru, *pumyo nutaklu nuwekinri*.”

Wane rixatka, rupnanatka.

⁴⁷ Wa ksolahoteru getinri wane rixinritka, rumalwutlu Goyakalu. Wane china, “Galikakpotunanni tye jejni poyagkakachrini.”

⁴⁸ Ga wa pejnuruneko gixolure yine wane gapatjetychine getpachine, wa retinitkaluna wane rixinritka, ruylakastatna. Satokna. ⁴⁹ Ga wa pejnuruneko rumatanune ga wa suxone, Kalileya romkagitjene, gowuka tunwanatna. Retanatluna wa tyekaka.

Gesni kapnatkaluru

⁵⁰ Ga wa satu jeji Gosi giwakatletachri. Walenwa jemanshinikankak-jetikowaka gajeru, jeji kigleru ga wa poyagkakachri. ⁵¹ Wale gi gigitlu wanna gishinikywaka, gi wa wanna kamrutanru. Garimate gajerni, Gotesreta gwapokchitachri. Wale koxa Goyakalu pogirewatyawaka kagwaka. ⁵² Wale Pilato yegi ya. Gesnimane rajita. ⁵³ Jijrukatalu. Pachrata poyitatkalu. Rutaklu yomlechi sotlu jitotikalurupna, gi satuna mutakikowanuwa. ⁵⁴ Walegognenwa Tsrugognestsitka. Ga wa gapnanutikalurgogne gimirerekamtinpakta.

⁵⁵ Ga wa suxone, Kalile rumuninine, gomkagitlu retapyapluna kap-natikowaka, ga wa gi rixpoko gitakamanretanruna. ⁵⁶ Ga wa satokatkana. Ralpokotluna pgamlungiru ga wa pgamlugalu. Gapnanutikalurgogne rap-nanutna wa yokanru chinyawaka.

24

Yotunru

¹ Goyechnokawpotuko muchinangogne simana wane yana yomlechi yegi. Raniklona pgamlugalo wa ralpokotanrona. ² Retluna wa sotlu gakaprurutkalurutka yomlechi gajeru. ³ Jiglokapatluna. Gi wa rukshik-manetatkala Gitsrukaachmane Geso. ⁴ Wane rixatka. Ma mumatan-shinikanutkana wa tyeya, waneklu gepi jejine gapyegitna katajimkalune.

⁵ Pikanna. Chiji yonogimtna. Wane chinkana, “*¿Klu chinanu gjigalu wa giwekachri wa gipnachinetskalaya?*” ⁶ Gi wa gewitkalu seyni yotunomtatkana. Gishinkapanru wa runkakyagi wa Kalile rawanatiniwa, ⁷ wa wane chininri, ‘Numkata Gita, Yineru Wgenno kmukochirerunemyo samyookalurupno. Numkata koroshishkita nutakikolupa, ga wa mapgogne rixinri nyotunotanu.’ ⁸ Giyagni wanna gishinkaplu wa tokanu.

⁹ Yomlechi satokyatkana. Pejnuruko wa tyekaka runkaakana pamole satupje ga wa pejnuruneko pimrime. ¹⁰ Wannanwa Mariya Maktala gajero, ga wa Gwana, ga wa Mariya Santiyako ginro, ga wa pimrone wannaymalone ginkakna yokanatkalune tyekakapirana. ¹¹ Ga wa wanna yanumsalesha pixka rixa jemletluna. Ga wa gi ralixkana. ¹² Palnamta Petro. Rasukamta.

Yomlechi yegi ya. Rujnoka. Retlu mkachrichrata kotnuukaluru. Gipji satokatka giglajitachri wa giknogachriyatka retinri.

Yimaklene Gemawo Pokchi yachinepa

¹³ Walegogneko gepi wanna papokchi yana. Pamole gepi kilometroni Gerosaleya, Gemawo chinikowaka. ¹⁴ Ruynumsakakananumtna wan-nakakluko wa pejnurukopirana giknogachriyatka. ¹⁵ Wane rixatka. Wa ruynumsakakananumtinna, repomsakakananumtinna, Waleko Geso kayegikna. Wannaymamnutkalu. ¹⁶ Ga wa wanna gimaletaygaletka ma mumatyanylupluna.

¹⁷ Ga wa Wale wane chinna, “¿Klipirana nchinkakananumta gixkakluko gyanananumtyawaka wamonuwgojitachingi?”

¹⁸ Satu wa Kleyopa giwakatletachri gigitlu. Wane chinru, “¿Gerosale gapkapachripjeraygi pixa? ¿Gi ge pumatlu pixa wa wane rixanatininkta tyegognekaka?”

¹⁹ Giyagni Wale wane chinna, “¿Klunernige?”

Ga wa wanna wane chinru, “Wa Gesni Nasare gjajernipirana. Walenwa jejni Goyakalu tokanu geneklewatachrimi. Kgiyaklewaklerni kamrureya ga wa tokanuya, Goyakalu getanu ga wa pejnuruneko yine getanu. ²⁰ Ga wa wane rixa samyokletluna wa tsrukakalune sasertotene, ga wa wut-srukateneyga giklukanuwnayegjixkalurni rupnirripa. Ga wa koroshishkita rutakluna. ²¹ Ga wa wixa kagwaklu Walepni wa Gisrayiline koshpkachrip-maka. Ga wa tyekaka pnutetkani xawaknitkani mapgognetkani wane rixinritka. ²² Ga wa pimrone suxone koxa wa wixanune koglajitwuna. Wa goyechnokawpotuko yomlechi yana. ²³ Gi rukshikmanetluna. Giyagni runatkana. Wane chinna klugimkoxakta retna, Goyakalutowrene. Wanna gima wane china ruwekgimataka. ²⁴ Wane koxa yapna pimrine wixay-malunenanu yomlechi yegi. Wa chinyawakpotukna suxone rixa getletluna. Seyni Wale gi retapna.”

²⁵ Giyagni Wale wane chinna, “Gaa mumata jemkangi. Mshinikangajingi wa galixinripa wa pejnuruko wa Goyakalu tokanu geneklewatachine chinyawaka. ²⁶ ¿Gi ge tyekaka rumkata salewnaletya wa Kristo, ga wa royakun jiglokinripa?” ²⁷ Moysisi kirukate yinuwakya ga wa pejnuruneko tokanchi geneklewatachine kirukate, yokakyeginha pejnuruko yonpiranye-gitaklurni Wale.

²⁸ Kayegikatkaluna pokchi rushinikyawakna. Wane rixa wa pnu yale-tanukta. ²⁹ Ga wa wanna chipetlu. Wane chinruna, “Wixyempakyichi, gi rixanu kayistsitkani; nikawnagognemtanukta.”

Giyagni jigloka. Wannayma rutukamta. ³⁰ Wane rixatka. Wannayma tuplanatini nikjetikowakaya, rawlo jimapro. Ruglenshinikanayegitlu. Jik-naglu. Reneksatna. ³¹ Giyagni rumrekqatatkana. Rumatatkaluna. Ga wa Wale gamgamtatka wannaygaleya. ³² Wane chinkakna wannakakluko, “¿Gi wixpokonshinikanunanumta wa gatnugapo ruynumsananumtinitkawu ga wa runkakpokowakatyawu wa yonatkalurkaka?”

³³ Walepapkoyakawa palnamtna. Gerosale satokna. Rukshikana gap-atanatachine pamole satupjene ga wa wannaymalune. ³⁴ Wane chinna, “Galikakni yotunomtatka Gitsrukaachi. Simo yegi rupgujewniyatka.”

³⁵ Giyagni wanna ginkaklewata wa gatnugapoya retanrukaknapirana, ga wa gi rixpoko gimatletatkaluna wa jimapro jiknajrotinritka.

Geso gipgujewnayegitna pamole satupje

³⁶ Wa yanumsatiniwana tyepirana, wanna ganikajite tunwatatka Geso. Wane chinna, "Kiglenshinikanupgi."

³⁷ Giyagni wanna gemyeka. Pikanna. Samenru kagwakyaluna wa retyawakluna. ³⁸ Wale wane chinna, "¿Klu chinanu gkojwakanshinikanuta? ¿Klu chinanu wane gixa gishinikanuwgajreta? ³⁹ Getamyotanno ga wa nojixi, wa Gitakni. Gkamrukanno ga wa getanno. Gi rixanu wa samenchi gi kagitlu, gi kagaplu wa gixa getyawakno."

⁴⁰ Wane rixinitka, rekakgmyotatkana ga wa gijixi. ⁴¹ Gi ralixawana wa rumuwleyna ga wa ruglajreyna. Wane chinna, "¿Gi ge waneygi gewi pagixanu niikaluru?"

⁴² Giyagni wanna psoji shima jimkaluro ganikyegitlu. ⁴³ Ga wa Wale yoptotlo. Wanna getanu nikatka.

Geso yokakyegitna tokanchiyonpiranyegitkalurni Wale

⁴⁴ Ga wa Wale wane chinna, "Tyenwa ntokanu nunkakyagi wa gixa yegi nwanatiniwa. Wa rumkata poyagkaakota pejnurkakako Gitapirana yonatkaluru, wa Moysisi Tokanu Yakanatkaluruya, ga wa Goyakalu tokanu geneklewatachinen kirukateya, ga wa Shikalchi kirukateya."

⁴⁵ Giyagni kotpuksinikanutatkana wa rumata jemyapluna yonatkalurkaka. ⁴⁶ Ga wa wane chinna, "Wane rixyongata, wa Kristo salewninripa ga wa mapgogne chininripa yotunotinripa gipnachinettskalaya. ⁴⁷ Ga wa payinemnunanuka yegi runkakletikolupa giwakaya renshinikanutinripa kaspukmukochiretikolupna. Ga wa Gerosale yinuwakini. ⁴⁸ Gixni wa gipguytatachinenepgi tyepirana. ⁴⁹ Gixa yegi nyokanatanru Nuru gipiratanru. Ga wa gixa Gerosale Pokchi gitukanu, wa gitakoklunpotunanuko tsru guyaklewlu potu tengogne giyakatyachri."

Tengogne raniikatka

⁵⁰ Wetanistsipotuko ranikna. Yotukamyota. Ruglenshinikanegitna. ⁵¹ Wane rixatka. Wa ruglenshinikanegatininitkana, wanna yegi konikatka. Tengogne raniikatka. ⁵² Giyagni wanna yoptsojityegitlu. Wanepnute Gerosale satokatkana. Gimuwpotumtachinetka. ⁵³ Psolgogneko kpashiwakapji rawna. Goyakalu rumalwutna.

Kiglerpotunaru Tokanchi Kpashiri Gwa Yonatanru

Tokanchi

¹ Yinuwakikolu wane rawa Tokanchi. Ga wa Tokanchi Goyakaluy-mananru. Ga wa Tokanchinwa Goyakalu. ² Yinuwakikolu Tyenwa Goyakaluyuma.

³ Ptowruranuka kamrutka Waleya. Wale mwaknu gikenna kamrutka wa gwachritka. ⁴ Wale rawa giweku. Ga wa giweklunwa yine pokamlatyegitachri. ⁵ Pokamlalu mapshagawaka pokamlatachri. Wa mapshagawaka gi gakagloklu.

Gwa gipguitatlu pokamlalu

⁶ Waneru satu jeji Goyakalu yokanatanru. Gwa giwakatletachri. ⁷ Wale gina rupguitalewatinripa, rupguitatyaplu pokamlalu, ralixinripna pejnuruneko wale chinanu. ⁸ Gi wa pokamlalni wale, seyni runa rupguitatyaplu pokamlalu.

Pokamlalu galikakpotunaru

⁹ Tokanchinwa pokamlalu galikakpotunaru. Wa pejnuruko yineru pokamlatachri tye psolchijneko gapokachri. ¹⁰ Tyechijne rawanata. Tye psolchijneko kamrutka Waleya. Tyechijne gajene gi gimatlu. ¹¹ Walenu runyegita Wale. Ga wa Walenune gi wa yoottoluna. ¹² Seyni pejnuruneko yoottotjene Wale gitakna Goyakalu wgenene rixinripna, wa ralixgiwakatjene. ¹³ Wanna gi wa granchiko wugenetikna, gi wa manchi galukyawaka, gi wa jeji galukyawakako, seyni Goyakaluya wugenetikna.

Tokanchiko manewata

¹⁴ Tokanchiko manewata. Wixatskala rawanatapa. Wetlu royaknu. Girchi satupjerutu Gituru goyaknu waneylu. Kgimutlewaklerpotni. Galikakpotni.

¹⁵ Gwa gipguitatlu. Wane china sapleta, “Tyenwa nchinjenatanru, ‘Najxigi ginachripa, muchichachri gitaya, gi rixanu muchinanu gwachrini gitaya.’”

¹⁶ Gi rixanu wane rixle gixoluruya wyoptojeta pejnurunekwu. Ga wa rumutlewle wanepnute rumutlewle potu wyoptota. ¹⁷ Gi rixanu Moysisiya reneeeka Tokanchi Yukanatkaluru. Wa Geso Kristo chinanu rawa gimutlewlu ga wa galikakpotunaru tokanchi. ¹⁸ Gikena getlu Goyakalu gi pagogneko. Girchistsi gwachri, satupjerutu Gituru, Wale ginkakletlu.

Gwa Katlewakleru gipguitale

¹⁹ Tyenwa Gwa gipguitale, wa Goteyone yokanatinitkana Gerosaleya sasertotene ga wa Rewinane repomgiyapluna, “¿Giryi pixa?”

²⁰ Rupgujetnawa Gwa. Gi wa nutatnawa. Rupgujetnawa, “Gi wa Kristono gitा.”

²¹ Repomgaluna, “¿Klunerkoxn? ¿Giliyaklayge pixa?”

Wane china, “Gi waleno.”

“¿Wa tokanchi geneklewatachrirayge?”

Rugita, “Gike. Gi waleno.”

²² Giyagni wane chinruna, “¿Gi gixachriyi? wunkakyapna wyokanatjene. ¿Gi pchinnewa pixnanuko?”

²³ Wane china:

*“Gitni giplaji yineru mwiyawakanu saplewatyachrino,
wane chinachrino:*

*Mpotukatanru Gitsrukaachigapo,
wa Gisayiya tokanchi geneklewatachri chinyawaka.”*

²⁴ Wa yokanatkalue, Gwariseyonenu. ²⁵ Repomgaluna. Wane chinruna, “¿Klu koxa pkatlewatya, wa Kristomigjekyi, gi wa Giliyyi, gi wa tokanchi geneklewatachrikoxyi?”

²⁶ Gwa gigitna. Wane chinna, “Gita katlewata gonuya. Seyni gixatskala rawa wa gixa mumatanatu. ²⁷ Walenwa gita gajxigi ginachri. Gi wa gita gimukluni wa nkoshpirokayapl u yoshmaklejixitsa.”

²⁸ Tyekaka wane gixkaluru Wetawara Pokchi, Gorta wakanute, wa Gwa katlewjetyawaka.

Getanru Gowega Wgene Goyakalunu

²⁹ Waleprikgogne Gwa getlu Geso wale yegi yachri. Wane china, “Getanru Gowega Wgene Goyakalunu, tye psolchijneko gajene konmukochiretachri.

³⁰ Tyenwa nchinjenatanru, satu jeji najxigi ginachripa, Walenwa muchichachri gitaya, gi rixanu muchinanu gwachrini gitaya. ³¹ Gi numatanatlu. Seyni wa rumatikolupa Gisrayiline yegi, giyagni nuna gita nkatilewatinripa gonuya.”

³² Wa Gwa gippujtalewata. Wane china, “Netlu Giwekkaluru tengogne gjirukyachri. Motkokko pixka rixa Geso gogo gwachri. ³³ Gi numatanatlu, seyni wa nyokanatjeru gonu nkatilewatinripa, Wale wane chinno, ‘Wa Giwekkaluru peta gjirklegogwakatanru, Wale gogwaka gwachri, Walenwa Giwekkaluru Kpashiri katlewatychrini.’ ³⁴ Gita getlu. Nunkakletlu Tyenwa Goyakalu Wgene.”

Muchichachine Geso yimaklene

³⁵ Waleprikgogne rumepe tunwaleta Gwa, ga wa gepi yimaklene.

³⁶ Rushinga yaletinri Geso, wane china, “Getanru gowega Wgene Goyakalunu.”

³⁷ Gepi yimaklene yijnako yanumsaletlu. Romkagitatkaluna Geso.

³⁸ Ruprotaka Geso. Retna rawgajxigitjene. Wane chinna, “¿Klu gjiga?”

Wa wanna wane chinru, “Rawi (walenwa yokaakaluru, Yimaklewatachri), ¿ginaka pwa?”

³⁹ Wane chinna Wale, “Ginanu. Getapanru.”

Wane yana. Retluna ginakakta rawa. Walgogne rutukna Wale yegi. Kayinwakpapkotkani.

⁴⁰ Wa gepi Gwa yijnakotachine, romkagitjene, satni Gantirishi Simo Petro gepuru. ⁴¹ Gantirishi gikshikgapkatlu waleko yegwaklu Simo. Wane chinru, “Wukshikatkalu Mesiya.” Walenwa yokaakaluru Kristo.

⁴² Geso yegi raniklu. Geso getlu. Wane china, “Pixni wa Simo, Gona wgene. Pixa giwakatko Segu. (Walenwa yokaakaluru Sotlu.)”

Geso tomgana Wilipi, Natanayli

⁴³ Waleprikgogne Kalile raluka yaleta Geso. Rukshiklu Wilipi. Wane chinru, “Pomkagittanno.”

⁴⁴ Wetsayta Pokchi gajerni Wilipi. Walenwa Gantirishi ga wa Petro pokchi.

⁴⁵ Wilipi gikshiklu Natanayli. Wane chinru, “Wukshikatkalu Moysisi yonyegitanru Tokanchi Yukanatkaluruya, ga wa tokanchi geneklewatachinen koxa yonyegitanru. Gesni, wa Gosi wgene, Nasare Gajeru.”

⁴⁶ Natanayli wane chinru, “¿Nasarege rumkata giyakletya pagixanu kigleru?”

Wilipi wane chinru, “Punanu. Petapanru.”

⁴⁷ Geso getanataplú Natanayli. Wane chinyeigitlu, “Getanru satu galikakotunuru Gisrayili. Walenwa mayrokletu.”

⁴⁸ Natanayli wane chinru, “¿Ginaka pumatyan?”

Geso gigita. Wane chinru, “Wilipi ma tomgakanuwaiyi, wa gikera rapukote pwanaatini, netyu.”

⁴⁹ Rugita Natanayli. Wane chinru, “Rawi, Pixni Goyakalu Wgenyi. Pixni wa Gisrayiline Pogiryi.”

⁵⁰ Geso gigitlu. Wane chinru, “Gi rixanu wane nchinyi, ‘Netyi wa gikerampukoya,’ ¿palixge? Tyekaka pnuate tsru petanu.” ⁵¹ Wane chinru, “Galikakni, galikakni wane nchingi, xanikakayakawa getanru tengogne gitpuquinri, ga wa Goyakalutowrene gatskomtachine, gjrukamtachine Gita Yimeru Wgenno yegi.”

2

Kashimyolu Kanaya

¹ Waleprika pnutogogne waneru kashimyolu Kana Pokchiya, Kalilesreta. Wanero Geso ginro. ² Chanixka koxa Geso ga wa yimaklene kashimyolu yegi.

³ Winga magata. Wa Geso ginro wane chinru, “Winga maleshayna.”

⁴ Wane chinro Geso, “¿Gi rixno Gita ga wa pixa, suxo? Gi rapokawa nopapko.”

⁵ Runro wane chinna gipxaklewatachine, “Gkamrutanru klunerukokta runkakyagi.”

⁶ Wanenanru patsrujire sotlu gashgaji, wa powratjetyawakna Goteyone. Gepi, mapa yokmajtagapi jigloklu satkaka.

⁷ Wane chinna Geso, “Ntseptagatanru gonu tyekaka gashgaji.” Tsepotgapotutluna.

⁸ Wane chinna Wale, “Nsajikgatanru xani. Nikikwaka chinanuwatyachri ganikyegitanu.”

Ranikyegitluna. ⁹ Wa retumginitkalo chinanuwatachri gonu kamrutilkuro winga, gi rumata ginaka tuyakaty, seyni wa gipxaklewatachine gonga saajegatachine gimata. Wa chinanuwatachri tomgalu gnunrowatachri. ¹⁰ Wane chinru, “Pejnuruko yineru muchinanu rutaklo kiglero winga. Wa rumetinitkana rutakatkalo mugletotka. Ga wa pixa gimretlo xangognenanu kiglero winga.”

¹¹ Tyenwa muchinanu getkaluru kamruta Geso Kanaya, Kalilesretaya. Rekakgigoyaknuta. Ga wa yimaklene galixlu. ¹² Wale gowukshini yopika. Kapernawo yatka Wale ga wa runro, ga wa repurune, ga wa yimaklene. Gi gixgogne wane rawna.

Geso powratlu kpashiwakapji

¹³ Gi gowukatkalu Tsru Giknoglushgogne Goteyonenu. Gerosale kanika Geso. ¹⁴ Kpashiwakapji retyana wakane gishanretjetachine, ga wa gowegane gishanretjetachine, ga wa motkokone gishanretjetachine, wanepnute gipekserojiprojkkakachine tuplatachine. ¹⁵ Kochipjerewapitsa kamruta. Kpashiwakapji rerutyana pejnuruneko, ga wa gowegane, ga wa wakane. Rupkakyanna serojiprojna wa kgipekoklerune. Yawnajkaklo gikwalna.

¹⁶ Motkoko gishanretjetachine wane china, “Gkoshpakanro wala gewiya. Gi wa Nurupjiko marnewakapji gkamrutini.”

¹⁷ Giyagni yimaklene gishinkaplu yonatkalurni: *Wane nixa jmerpotno pupji chinanu.*

¹⁸ Wa Goteyone wane chinru, “¿Klu getkaluru pekakgitwu wa tye pkamrutinri?”

¹⁹ Rugita Geso. Wane chinna, “Gnikatanru tye kpashiwaka potu, ga wa mapgogne chininri ntunotakanru.”

²⁰ Giyagni wane chinna wa Goteyone, “Gepkoxamkojmole patsrujire walapu kamrupjinatkaluru tye kpashiwaka potu, ga wa Pixa ¿mapgognepje ptunotakanru?” ²¹ Seyni Wale wane chinyegitlu gimanepirana kpashiwaka potu. ²² Giyagni wa yotunotinitka gipnachinetskalaya, yimaklene gishinkaplu wa wane chinjenatinri. Ralixluna wa yonatkaluru, ga wa Geso chinyawaka.

Geso gimatgajitna pejnuruneko

²³ Tsru Giknoglushgogne, meyiwlugogne, Gerosale rawanatini gixo galixgiwakatlu. Retanatluna wa getkalurkaka kamrutini. ²⁴ Waleko Geso gi gaponshinikanyegitnawa wannayegiya, gi rixanu Wale gimatna pejnuruneko. ²⁵ Gi wa magatywa satu gipguitatyaplu yineru, gi rixanu Waleko gimatlu yineru gaji gwachri.

3

Geso ga wa Nikotemo

¹ Wanenanru jeji satu Gwariseyo, Nikotemo giwakatletachri. Goteyone gitrukate. ² Tyenwa goyechno yayegitlu Geso. Wane chinru, “Rawi, wumatyi Goyakalu yegi ginyachriyi yimaklewatachri pixinripa. Gi rixanu gike gimkata kamruretlu tyekaka getkaluru wa Pixa kamrutanrukaka waleyma ma mixkanumka Goyakalu.”

³ Rugita Geso. Wane chinru, “Galikakni, galikakni wane nchinyi, wa mumepe gishpakletkatu gi rumkata getletlu Goyakalu pogirewatyawaka.”

⁴ Nikotemo wane chinru, “¿Gi rixpoko gishpakletatnaka satu jeji tsrutsolejinatka? ¿Rumkatge gimepe jiglokletanutnaklu runronanwaka, rushpakinri-patnaka?”

⁵ Rugita Geso, “Galikakni, galikakni wane nchinyi, satu ma wugenetik-maka gonuya ga wa Giwekikaluruya, gi rumkata jiglokletanru Goyakalu pogirewatyawaka. ⁶ Ga wa manchi gishpakychri manchini wale, ga wa Giwekikaluru gishpakychri, giwekikalurni wale. ⁷ Gi wa puglajitanu wa wane nchinyayi, gimkata gimepe gishpakletanutnaka. ⁸ Wa kannipgyalu ginakakta raluka wane yannipygata. Pyijnakpogimnutlu, seyni gi pumata ginakakta runya, ga wa ginakakta yanu. Wane rixa pejnuruko Giwekikaluru gishpakychri.”

⁹ Rugita Nikotemo. Wane chinru, “¿Gi rixpoko wane gixkotanu?”

¹⁰ Rugita Geso. Wane chinru, “¿Pixni wa Gisrayiline yimakachriyi, ga wa gi ge pumatlu tyekaka? ¹¹ Galikakni, galikakni wane nchinyi, wa wumatanru wane wchina, ga wa wetanru wupguitata. Gi gyoptotlu wupguitatanru. ¹² Wa nunkakingi tyechijne gajerupirankaka, gi galixa, ¿gi gixpokotyawaka galixini wa tengogne gajerupirankaka nunkakingi?

¹³ Gike gatskotlu tengogne, seyni wa tengogne gjirukyachripje, Gita wa Yineru Wgenno tengognerutno. ¹⁴ Moysisi pixka yotunkakinri wa gimnu yineru mwiyawakanuya, waneko pixka nixa: numkata yotunkaakotanu Gita Yineru Wgenno. ¹⁵ Wa pejnuruneko nalixjene ma mamginitipa, seyni waneyapna ruwekinrina gike rixiniko mnikawnakatu.

Ralukyapogna Goyakalu tye psolchijne gajeneko

¹⁶ “Wane rixa galuklepotutna Goyakalu tye psolchijne gajeneko, giyagni renekna satupjerutu Gituru, wa pejnuruneko ralixjene ma mamginitipa, wa waneypna ruwekinrina gike rixiniko mnikawnakatupa. ¹⁷ Gi rixanu Goyakalu gi yokanalu Gituru tyechijne ruklukanuwnayegjixyapna tye psolchijne gajeneko, seyni wa tye psolchijne gajeneko gognetkakikolupa Wale chinanu. ¹⁸ Wa Gita galixachri gi ruklukanuwnayegjixko. Seyni malixakletu ruklukanuwnayegjixkanatka gi rixanu gi ralixgiwakatno Gita Goyakalu Wgenno satupjerutu. ¹⁹ Tye chinanu Goyakalu giklukanuwnayegjixanru yineru, wa tye psolchijneko runa pokamlalu, ga wa yine galukpotutlu mapshagwaka pokamlalu pnuute, gi rixanu mugletni wa kamrurna. ²⁰ Wa pejnuruneko mugletu kamrutachine gagnanutlu pokamlalu. Gi wa pokamlalu yegi yana ma mekakgi giklukanuwnaletikotupna kamrurna. ²¹ Wa poyagkakachrii yayegitlu pokamlawaka, rekakgi kamruretikolupa Goyakaluya wane gixka.”

Gnunrowatachri galukjeru

²² Wanepnute Gotechijne ya Geso yimakleneyma. Wane rawjenatini wannayma. Katlewjixa. ²³ Katlewata koxa Gwa Genoya, Sali Pokchistsi, gi rixanu wane rawa gixo gonu. Wane yana. Katkalune. ²⁴ Gi rixanu gi wa yoshmaklewjetikwaka rutaakawa Gwa. ²⁵ Gwa yimaklene gigjekaka satu Goteyoyma powratjetikwakapiranaya. ²⁶ Yayegitluna wa Gwa. Wane chinruna, “Rawi, wa Gorta wakanute pixaymalutunaru, wa pupguitajenatanru, petanru, katlewjixa. Ptowrunpotunanuko yayegitlu.”

²⁷ Rigitna Gwa. Wane china, “Gike rumkata yoptoleta yineru, seyni walepjie wa Goyakalu genekyalu. ²⁸ Gixakni wa nupguitatjengi wane nchinre, ‘Gi wa Kristono gita,’ seyni gitni wa yokanatkalurno Kristo penutete. ²⁹ Wa gnunrowatachri walenwa kganunrolu, Kristo pixka waneylu ralixjene. Wa gnunrowatachri galukjeru, walestsi gwachri, pixka nixa gita. Ralukjeru yijnakotulu gnunrowatachri tokanu, ga wa rumuwpotuta tokanu chinanu. Waneko pixka nixa gita. Numuwpotuta Kristo chinanu. ³⁰ Rumkata tsru gixleta Wale, ga wa gita giyagokananumtanu.

Teno giyakatyachri

³¹ “Ga wa teno giyakatyachri pejnuruneko pnuute tsruni Wale. Ga wa chiji giyakatyachri, chiji gajerni wale. Tye chiji gajerupirana runkakleta. Ga wa tengogne giyakatyachri pejnurune pnuute tsruni Wale. ³² Ga wa retanru, ga wa yijnakotanru Wale rupguitata. Gike yopto gippguitaletlu. ³³ Yopto gippguitaletjeru runkakpokowakayegitlu wa Goyakalni wa poyagkakachri. ³⁴ Gi rixanu wa Goyakalu yokanantru, Kristo, Goyakalu tokanu runkakleta. Gi rixanu gi reneklu Goyakalu Giwekkaluru kyagolu. ³⁵ Ruru galuklu Gituru. Ptowrunanuka reneklu gimyoya. ³⁶ Wa Goyakalu Wgene galixachri waneylu ruwekinri gike rixiniko mnikawnakatu. Seyni wa Goyakalu Wgene malixkatu gi retanru ruwekinri, seyni Goyakalu jigekanuwyeeegognenatlu.”

4

Gakowni jitotkomgalesti tuplatinri Geso

¹ Giyagni wa Geso gimatlui wa Gwariseyone yijnakyegitlu Gwa pnuute rixna yimaklene Geso. Katlewjixna. ² Gimka katlewata Geso, seyni yimaklenepje katlewata. ³ Giyagni Gote rushpkaya. Kalile satokanutnaka.

⁴ Samarya rumkata yaplemta. ⁵ Giyagni wane rapoka papokchi Samarisreta, Sicha chinkaluru pokchi, wanestsi wa Gakowó genekchijityalu gituru

Gosi.⁶ Waneru Gakowni jitotkomgale. Giyagni Geso gama yagapleta. Wane tuplata gitkomgasti. Tumananutkani.

Samari gajero

⁷ Samari gajero sato suxo gina sajkapgatachropa. Wa Geso wane chinro, “Putanno.”⁸ Gi rixanu yimaklene pokchi yatkana. Ragjitapluna niikaluru.

⁹ Samari gajero wane chinru, “¿Gi pixkatge Pixni Goteyyi pagjitno wa nutyapyi, gitni wa Samari gajerno?” Gi rixanu Samaritanoneyma gi rumatletkakna Goteyone.

¹⁰ Rugita Geso. Wane chinro, “Pixamka gimatanru Goyakalu genekashle ga wa Girni wa wane pchinjeru, ‘Putanno,’ pixa gagjitanmaklu Waleya. Walemka genekanyi gonu giwekachri.”

¹¹ Suxo wane chinru, “Gitokopna rawatkomgata. ¿Ginaka pguta waneyyi wa gonu giwekachri?¹² ¿Pixlege wa wutsrukati Gakowni pnute tsrurayge, wa tyetkomga wenekjerni, waleni koxa giiru, ga wa wugenene, ga wa giprane?”

¹³ Rugita Geso, “Pejnuruneko tye gonu girachine, rumepe gonunngatlewletanatnakna.¹⁴ Wa girukta girinri wa gonu Gita genekyaplu gi pagogneko ronunnagatewatanutnaka. Seyni wa gonu Gita genekyaplu gonutkomga pixka rixnanwakatanu, rushpakgatinri ruwekinri chinanu giye rixiniko mnikawnakatupa.”

¹⁵ Suxo wane chinru, “Nutsrukate, penekanno tye gonu, giekni gi nonunagatewatanutka. Gi koxa gewi nsajkapinitka.”

Goyakalni Giwekikaluru

¹⁶ Geso wane chinro, “Ptomgapanru pganuru. Ginanu gewi.”

¹⁷ Suxo gigita. Wane china, “Gi kganurno.”

Geso wane chinro, “Wanepotuko pchina, ‘Gi kganurno,’¹⁸ Gi rixanu pamyo pganurtapa. Ga wa xani wanerutu pganurmaka, gi wa pganurni. Galikakpotunaru wane pchinno.”

¹⁹ Wane chinru suxo, “Nutsrukate, netyi tokanchi geneklewatachriyi.

²⁰ Wutsrukateni tye magkate yonogyegitni. Wa gixa wane china, Gerosale gimkata yonogjetikwaka rixinripa.”

²¹ Wane chinro Geso, “Suxo, palixanno, gipapko ginanu, gi wa tye magkateko, gi wa Gerosaleko gixa yonogyegitanru Girchi.²² Gixa yonogyegitlu gma mumatanatu. Wixa yonogyegitlu wumatanru. Gi rixanu Goteyone yegi ruyakatyua gognewatikaluru.²³ Seyni gipapko ginanu, xawaknitkani, wa galikakpotunaru kyonogiklerune yonogyegitanruna Girchi psolu rajyakoyna, galikakpotunaru. Gi rixanu Girchi gijgakoxna wane gixachine yonogyegityapluna.²⁴ Goyakalni Giwekikaluru, ga wa yonogyegitjene Giwekikaluruya galikakpotunaru, rumkata yonogyegitluna.”

²⁵ Wane chinru wa suxo, “Numata gita wa Mesiya gininripa—Walena Kristo chinkaluru—wa Wale gininipa runkakanwu ptowrukopiran.”

²⁶ Geso wane chinro, “Walekno Gita giynumsatyi.”

¿Kristo getkokatkanwa Wale?

²⁷ Wane rixanatawa rapokna yimaklene. Ruglajitna wa suxo ruynumsasatinri. Seyni gi satuna wane china, “¿Klu paluka?” waka “¿Klu puynumsatyalo wala?”

²⁸ Giyagni wa suxo tuknokgashgajremtak. Pokchi tyatka. Wala wane chinna jejine,²⁹ “Ginanu. Getapanru satu jeji, wa pejnuruko nixyawaka nchinjeru. ¿Kristo getkokatkanwa Wale?”

³⁰ Giyagni pokchi yiyatkana. Yayegitluna Wale.

Jirgikolu

³¹ Wanekopshini ragjitluna yimaklene. Wane chinruna, “Rawi, pnikanutka.”

³² Wale wane chinna, “Waneyno nnijitu nnikanrupa wa gixa mutatanutu.”

³³ Giyagni wa yimaklene wane chinkakna, “¿Satu getko gwapnijitulu?”

³⁴ Wane chinna Geso, “Nnijitni wa nkamrutanru nyokanatjeru gishinikanru, ga wa nnikatyaplu kamrure. ³⁵ ¿Gi ge wane nchina gixa, wa gepkoxamkoje ksuru magatiniwa rapokinripa wa jirgikolu? Giyagni Gita wane chinyagi, ntunogitanu. Getanru trikoshia. Rutlikagwutatka jirgikolpatka. ³⁶ Jirgachri yoptotlu wenutikolu. Rapatjetlu wenutikolu gike rixiniko mnikawnakatupa, wa gitakachri koxa ga wa jirgachri koxa rumuwatinripna. ³⁷ Gi rixanu tye chinanu galikakpotunanni wa tokanchi, ‘Satni wa gitaklewatachri, ga wa satni wa jirgachri.’ ³⁸ Wa Gitni wa yokanatgi gjirgiyaplu wa gixa ma kamruretanatu. Pimrine yaprewpotuta, ga wa gixa kashrigna wanna kamrurenantu.”

Gixo Samari gajene galixa

³⁹ Wa gixo Samari gajene wale pokchi gajene galixlu suxo tokanu chinanu, gipguitalewatachro. Wane china, “Runkakyano pejnuruko nixyawaka.”

⁴⁰ Giyagni Samari gajene runyegininitkaluna, ragjitluna wane rutukinripachi. Wane rutuka gepgogne. ⁴¹ Gixo wanepnute galixa Geso tokanuya.

⁴² Wane chinrona suxo, “Gi wa ptokanuya walixatka, gi rixanu wixpotuko jematkalu. Wumata galikakpotunanu rixinri Tyenwa wa tye psolchijne gajeneko gognetkakachripatka.”

Kalile yatnaka Geso

⁴³ Gepgogne chininri wane rushpkaya. Kalile yatka. ⁴⁴ Gi rixanu Waleko Geso gipguitatlu wa tokanchi geneklewatachine gichijneyna gi wa kagwakpiratikna. ⁴⁵ Giyagni Kalile rapokinitka, wa Kalile gajene yoptotlu, gi rixanu wa Gerosaleyia retjetluna pejnurkakako wa tsrugogne kamrutanru. Gi rixanu wanna koxa wane ya meyiwluyegi.

Pogirchi gitakanru wgene gituuakaaka

⁴⁶ Giyagni Kana yatnaka Geso, Kalilesreta, wa gonga winga kamrutyawaka. Kapernawo rawanata satu pogirchi gitakanru. Wale wgene yayixa. ⁴⁷ Wale yijnakyegininitkalu Geso Gote ruyakatyatka. Kalile rapokatka. Geso yegi ya. Ragjitlu yopikinripa ruttukakyaplu gituru, gi rixanu rupnakastsinatkani. ⁴⁸ Giyagni Geso wane china, “Gma metkamkalu getkalurkaka, ga wa koglajrukaka, gi galixanu.”

⁴⁹ Pogirchi gitakanru wane chinru, “Nutsrukate, pyopikanu ma mupnakanuwa noturu.”

⁵⁰ Wane chinru Geso, “Pyanutka. Puturu giweka.”

Wa jeji galixlu wa tokanchi Geso wane chinyalu. Yatka. ⁵¹ Wa yopikamtinika wayegrene gishpakamta yoptotpatkaluna. Runkakluna. Wane chinruna, “Puturu giweka.”

⁵² Giyagni repomgana gipapko yinuwaka giglewleta. Wane chinruna, “Kapetgogne rutmayitini, rupachwalgatka.”

⁵³ Giyagni ruru gimatlu wanepapkonwa Geso wane chinru, “Puturu giweka.” Ralixa wale, ga wa pejnuruneko gipji gajene.

⁵⁴ Wa tye gepi chiniri getkaluru kamrutatnaka Geso, Gote ruyakatinika. Kalile yinitka.

5

Yayixachri, Wetesta gajeru

¹ Wanepnute meiyiwlugognetnakni Goteyonenu. Gerosale kanika Geso. ² Wa Gerosale, gowegane gipgyaptotestsi, waneru kawjetikwaka. Gewreyone tokanu wane chinika Wetesta. Wale waneya pamyotamnukaka. ³ Wane ruklunna gixolune yayixachine, maygalene, yokmatachine, giprigmanetchine. Kagwakluna rakaykokgatikolupa gonu. ⁴ Gi rixanu gipapko gapokini Gitsrukaachitowreru gjrukini kawjetikwaka. Rakaykokgatlu wa gonu. Rali gagaykokgatkoklunutka wa gonu, muchinanu gjrukagatchri kawjetikowakaya, wale gituka gi gixachrikokta yayixlu chinanu. ⁵ Wanenanru satu jeji mapamole yokgipi walapu yayixachrinatka.

⁶ Wa Geso getinri tye giklugachri, wa rumatinri gowukshini potu wane rawinri, wane chinru, “¿Paluka giglewletge?”

⁷ Rugitlu wa yayixachri, “Gitsrukaachi, maleshayanno jeji nyoshmak-jerupmaka wa kawjetikowaka wa rakaykokgatkoklunupa gonu. Wa nunakopshini gita satu gjrukata muchinanu gitaya.”

⁸ Wane chinru Geso, “Pyotunotanu. Pkoschekjekotanu. Pyanutka.”

⁹ Waneklu ruglewatatka jeji. Koschekjekotatka. Yanamatatka.

Geso jigyegitka wa gapnanutikalurgogne kaspukapgutatinri

Gapnanutikalurgognenwa walegogne. ¹⁰ Giyagni wa Goteyone wane chinru wa gigletkalurutka, “Gapnanutikalurugognewani. Ginanshichkalurni wa panikjekotinripa.”

¹¹ Wale gigitna, “Nugletjeru Walepotuko wane chinno, ‘Pkoschekjekotanu. Pyanutka.’”

¹² Giyagni repomgaluna, “¿Giru jejni wa wane chinyi, ‘Pkoschekjekotanu. Pyanutka?’”

¹³ Wa gigletkalurutka gi gimatlui gi gixachritkani. Gi rixanu Geso gixrikamta, gi rixanu gi gepikna yine wane.

¹⁴ Wanepnute kpashiwakapji Geso gikshikyalu. Wane chinru, “Pet-inwa. Pugletikolufka. Gi wa wanepnuteko pmukochirewatanutka, wane pnuterutu ma munyegityanpatkayi.”

¹⁵ Wa jeji galimta. Runkakapna Goteyone, Gesoktanwa rugletjeru. ¹⁶ Wale chinanu wa Goteyone kojwakananumtlu Geso. Raluka giylaletluna, gi rixanu wa tyekaka kamruta gapnanutikalurgogneko. ¹⁷ Wa Geso wane chinna, “Xangognenau kamrurewata Nuru, ga wa Gita koxa kamrurewata.”

¹⁸ Giyagni wale chinanu pnute raluka giylaletluna Goteyone, gi rixanu gi wa gapnanutikalurgognepe gi rapnanuta, seyni wane china Ruru potu rixinri Goyakalu. Goyakaluko pixka rixnawa.

Goyakalu Wgene gitakikolu

¹⁹ Giyagni Geso gitita. Wane chinna, “Galikakni, galikakni, wane nchingi, giike rumkata kamrureta Walepjie rixini Gituru, seyni wale rumkata wa Ruru reta kamruretanru, gi rixanu klunerukta kamruta Goyakalu, Gituru koxa waneko pixka gixa kamruretu. ²⁰ Gi rixanu Girchi galuklu Gituru. Rekakgitlu pejnurkakako Wale kamrutanru. Tyekaka pnute tsru kamruchi rekakgitanru wa gixa giglajitinripa. ²¹ Gi rixanu Girchi wane gixa yotunkakletna gipnachine. Ruweekakna. Waneko pixka koxa rixa Gituru. Girukokta raluka giweekakleta, ruweekaklu. ²² Gi rixanu Girchi gikena

rulkukanuwnayegjixa. Seyni pejnuruko giklukanuwnayegjixlelu reneklu Gituru. ²³ Kagwakpiratyapluna Ruruko pixka wa Gituru wa pejnuruneko. Wa Gituru mkagwakpiratku, gi koxa kagwakpiratlu Girchi wa yokanatjeru.

²⁴ “Galikakni, galikakni wane nchingi, ntokanu yijnakotachri, nyokanatjeru galixachri waneylu ruwekinri gike rixiniko mnikawnakatu. Maleshayaplu rulkukanuwninripa. Gipnaluya rushpakamtya. Jigloklu giweklu. ²⁵ Galikakni, galikakni wane nchingi, rapokanu gigogne, xawaknini wa gipnachine yijnaktokanutinipno Gita Goyakalu Wgenno. Yijnakotachine giwekanu. ²⁶ Gi rixanu Girchi waneylu giweklu Walenanuko. Reneekoxlu Gituru waneko pixka nixinripa wa waneyapno giweklu Gitananuko. ²⁷ Rutaakoxno nuklukanuwnayegjixlewinripa gi rixanu Yineru Wgenno.

²⁸ “Gi giglajitanu tyeya, gi rixanu rapokanu gigogne wa pejnuruneko yomlechi gwachine yijnaktokanutanno. ²⁹ Kigleru kamrutachine gishpanku yotunruyapa ruwekinripna. Wa gektutu kamrutachine yotuntanna ruklukanuwnayegjixikolupna.

Kristo gipguitatachine

³⁰ “Gike numkata kamrureta Gitapje nixini. Nyijnakotyawaka waneko pixka nixa giklukanuwnayegjixlewleta. Wanepotukni wa nuklukanuwnayegjixlewie. Gi rixanu gi nujgalu Gitako nushinikanru, seyni wa nyokanatjeru gishinikanru. ³¹ Wa Gitnanuko gipguitatinwa, wa nupgughtalewie gi wa galikakpotunanni. ³² Satni wa gipguitatno. Numata Gita wa rupguitatanru Gitaya wanepotukni wale.

³³ “Gixa yokanatna yine Gwa yegi. Wale gipguitatlu galikakpotunanu tokanchi. ³⁴ Gi wa nyoptolu wa yineru gipguitalewie. Seyni tyekaka nchina wa gixa gognetkakikolupa. ³⁵ Gwanwa katalu xirnachri, pokamlatachri. Wa gixa galuka gimuweleputa pshinitsonu pokamlanu.

³⁶ “Waneyno Gita tsru potu gipguitalelu Gwanu pnute. Gi rixanu Girchi genekyano kamrurichi npoyagkakinripa. Waleko kamrurichi nkamrutanru, waleko gipguitatno wa Girchi yokanatno. ³⁷ Wa nyokanatjeru Girchi Walekni gipguitatno Gita. Gi pagogneko gjemaplajitu gixa. Gi koxa getgetkowakatlu. ³⁸ Gi koxa waneygi tokanu gaji gwachri. Gi rixanu Goyakalu yokanatanruno, wa Gita gixa ma malixanutno. ³⁹ Getjepotutanru yonatkaluru tokanchi, gi rixanu gixa kagwaka waleya waneyapgi giwekinri gike rixiniko mnikawnakatu. Wale tokanchinwa gipguitatno Gita. ⁴⁰ Gixa gi galuka ginyegetleto waneygi gixinripa giwekinripa.

⁴¹ “Gi nyoptolu gimalwuru yineya.

⁴² “Seyni Gita gimatyeigitgi wa maleshaygi Goyakalu galuklewie gixa gwachri. ⁴³ Gita gina Nuru giwakaya. Gi gyoptotno. Satumka ginanu waleko giwakaya, wale gyoptotanu. ⁴⁴ ¿Gi gixpoko galixleta gixa, gixkakluko gimalwukakinri? Gi gjigalu wa satupjerutu Goyakalu kigle getle rixyapgi.

⁴⁵ “Gi wa gyanshinikanutanru wa Gita jigyegitangi Girchiyeiya. Waneru gjigyegitjerupa. Moysisni wa gixa kagwakanshinikanutanru. ⁴⁶ Gi rixanu gixa galixanmaklu Moysisi, gitkoxmaka galixanu. Gi rixanu Gitapirana yonyegita wale. ⁴⁷ Gma malixiniplu wale yonatanru ¿gi rixyawaka galixtokanutinno?”

¹ Wanepnute Kalile tsru wenne wakanute yatka Geso. Walenwa Tiwerya wenne. ² Gixolune yine gomkagitolu, gi rixanu getkalurkaka retna, Wale kamrujetanru yayixachineya. ³ Magka kanika Geso. Wane tuplata yimakleneyma. ⁴ Gi gowukatkalu Tsru Giknoglushgogne, Goteyone meyiawatinrigogne.

⁵ Giyagni tunogiygaleta Geso. Retna gixolune yine ginyegityawaklu. Geso wane chinru Wilipi, “¿Ginaka wagjitapinro jimapro wa nikinripna wanna?”

⁶ Yantaletyalu wane chintokanuta, gi rixanu Wale gimatlum kamrutanrupa.

⁷ Wilipi gigitlu, “Gepi pacha wenroluto jimapro gi moyagotanu satkaka ptsotsotajkaka yoptotinripna.”

⁸ Satu yimakleru Gantirishi, Simo Petro gepuru, wane chinru, ⁹ “Gewlu satu mturu waneylu pamyo jimapro triko pixkalutu kamrutikaluru, ga wa gepi shima. Seyni ¿klu kigleylu wane pejnurune chinanu?”

¹⁰ Giyagni Geso wane china, “Ntuplakakanna yine.”

Waneru tsru peklomta. Tuplatna. Pamyo waragka getko jejine. ¹¹ Giyagni Geso gwalo jimapro. Rali moyagnutletinri, Wale geneksatna yimaklene. Wa yimaklene geneksatna tuplatachine. Waneko pixka rixlo shima ralukyawakpotukna.

¹² Wa jinanu rixinitkana, wane chinna yimaklene, “Gapatjetanru wa gixetachri psojkaka gike ma salewninitipa.”

¹³ Giyagni rapatjetluna. Pamole gepi kojita tsepotna psojkaka wa pamyo jimapro triko pixkalutu kamrutikaluru, ruxetanruna nikanatachine.

¹⁴ Giyagni wa jejine getinri getkaluru wa Geso kamrutanru, wane chinna, “Tyenwa galikakpotunanu tokanchi geneklewatachri tyechijne ginachripa.”

Tsru wenu gogote yapamta Geso

¹⁵ Giyagni rumatini Geso wa rushinika kashretyapluna pogirna rutakyapluna, ruxrikamtatnaka. Magka ya Walepje.

¹⁶ Kayi chininitka. Yopikamtina. Wenu yana yimaklene. ¹⁷ Kanawa ruptekna. Tsru wenu wakanute, Kapernawosreta, yanna. Mapshagatkalu. Gi wa runyegitawana Geso. ¹⁸ ¡Gi psoshpurgananuktalu tsru wenu, tsru rawokannipgyale chinanu! ¹⁹ Giyagni ranikgatnimkatkana. Gepi waragkastsi, mapa waragkastsi getko gowuknu yatkana. Retluna Geso. Tsru wenu gogote yapamta. Gi gowukatkalu kanawa yegi. Pikanna.

²⁰ Wa Wale wane chinna, “Gitni. Gi mpikanu.” ²¹ Giyagni raluka yoptolapluna kanawaya. Wanekluyakawa tutspaka kanawa rushinikyawakna chiji.

Gixolune yine gjigalu Geso

²² Waleprika gixolune yine tsru wenu wakanute gwachine getlo maleshlo sato wanepnute kanawa. Satopjero. Ga wa Geso gi gipteklo wala yimakleneyma. Wa yimaklenepje yatkana. ²³ Seyni wa Gitsrukaachi gali moyagnutletlo jimapro, Tiweryawnaga tuknogamtya kanawkaka. Tiwerya giyakatyachrokaka. ²⁴ Giyagni wa gixolune yine geta gi wa Gesoko wanetka, gi wa yimakleneko. Wane retinitkana gixolune yine, kanawa ruptekatkana. Kapernawo yatkana. Wane rujgiyatkaluna Geso.

Galikakpotunanu tengogne giyakatyachri jimapro

²⁵ Tsru wenu wakanute rukshikinitkaluna, wane chinruna, “Rawi, ¿Giklu papokatka gewi?”

²⁶ Rugitna Geso. Wane china, “Galikakni, galikakni wane nchingi, gi wa gjigano getkalurkaka getinri chinanu, seyni wa jimapro gnikinri ga wa

jinangi gixinri chinanu gjigano. ²⁷ Gkamrurewatanu gi wa niikaluru gamgachri chinanu, seyni wa waneyapgi gwagognenatachri giwekinri mnikawnakatupa niikaluru chinanu gkamrurewatanu. Walenwa Gita Yineru Wgenno genekangi. Gi rixanu Girchi, Goyakaluko gimaxikoletno Gita.”

²⁸ Guyagni wane chinruna, “¿Klu wkamrutanu wa Goyakalu kamrure wkamruretinripa?”

²⁹ Rugita Geso. Wane chinna, “Tyenwa Goyakalu kamrure, wa gixa galaxyaplu Wale yokanatananu.”

³⁰ Guyagni wane chinruna, “¿Klu getkaluru koxa pkamruta Pixa wa wetyaplu, wa walixyapyi? ¿Klu pkamruta? ³¹ Wutstrukatenni niklo mana yineru mwiyawakanuya, yonchi chinyawaka: *Jimapro tengogne giyakatyachro roglutna*.”

³² Wane chinna Geso, “Galikakni, galikakni wane nchingi, gi wa Moyisisi genekgi wa tengogne giyakatyachro jimapro, seyni Nuru genekgi wa galikakpotunanu tengogne giyakatyachri jimapro. ³³ Gi rixanu Goyakalu jimapre Walenwa tengogne gjirukyachri, tye psolchijne gajeneko genekgi-wekletachri.”

³⁴ Guyagni wane chinruna, “Gitsrukaachi, penekjetanwu tye jimapro.”

Geso, wa jimapro giwekilaluru

³⁵ Wane chinna Geso, “Gitni wa jimapro giwekilalurno. Nunyegitjeru gi pagogneko nachiplu. Nalixjerupa gi pagogneko ronunnagate-watanu. ³⁶ Seyni wane nchingi gixa, getmakno. Gi galixa. ³⁷ Pejnuruneko Girchi genekyano ginyegitanno. Wa nunyegitjeru gi wa maleka nuknoklu.

³⁸ Gi rixanu tengogne gjirukyachrino gi wa Gitako nushinikanru nkamrutenripa, seyni wa nyokanatjeru gishinikanru. ³⁹ Tyenwa nyokanatjeru Girchi gishinikanru, wa pejnuruneko renekyano gi satuna gamganu, seyni nyotunkakanru ralipregognegapatka. ⁴⁰ Gi rixanu tyenwa nyokanatjeru gishinikanru, wa pejnuruneko Gituru getachine, Wale galixachine waneyapna ruwekinrina gike rixiniko mnikawnakatu. Gita yotunkakanna ralipregognegapatka.”

Kegemgana Goteyone Geso chinanu

⁴¹ Guyagni Goteyone kegemganyegitlu wane chinre chinanu, “Gitni jimaprono tengogne gjirukyachrino.”

⁴² Wane chinna, “¿Gi ge Gesokni wa tye, wa Gosi wgene, wa ruru, ga wa runro wumatna? ¿Gi rixkoxge wane china wa Tye, ‘Tengogne gjirukyachrino?’”

⁴³ Geso gigita. Wane chinna, “Gi gkegemganu Gitaya gixkakluko. ⁴⁴ Gi satuna gimkata ginyegletno Gita wa Girchi nyokanatjeru ma kosetanatu. Gita yotunkakanna ralipregognegapatka.”

⁴⁵ “Yonatkalurni tokanchi geneklewatachine kirukateya: *Goyakalu yimakanna pejnuruneko*. Wa pejnuruneko Girchi yijnakotachine, yimaaikalune runyegitnona. ⁴⁶ Gi wa satu getyalu chinanru Girchi, seyni Gitapje Goyakalu yegi giyakatyachrino netlu Girchi. ⁴⁷ Galikakni, galikakni wane nchingi, nalixjeru wale waneya ruwekinri gike rixiniko mnikawnakatu. ⁴⁸ Gitni wa jimapro giwekilalurno. ⁴⁹ Gitsrukatenenni niklo mana yineru mwiyawakanuya, ga wa rupnanatkana. ⁵⁰ Gitni wa jimapro tengogne gjirukyachrino, wa tye nikachripa ma mupninitipa. ⁵¹ Gitni wa jimapro giwekachrino, tengogne gjirukyachrino. Girukokta nikiniplu tye jimapro ruwekgognenatanu. Wa jimapro Gita geneklepa walenwa nogitu neneklepa ruwekinripna psolchijne gajene.”

Gesogitu ga wa gigraga

⁵² Giyagni Goteyone gejnugimyegkaka. Wane chinna, “¿Gi rixpoko genekletanwu Tye gigitu wnikyaplu?”

⁵³ Wane chinna Geso, “Galikakni, galikakni wane nchingi, gma niikanuplu nogitu, Gita Yineru Wgenno ga wa gma muragragatkanuplu nograga, maleshayapgi giwekinri gixa gwachri. ⁵⁴ Wa nnikgitutjeru, nuragragatjeru waneylu ruwekinri gike rixiniko mnikawnakatu. Gita yotunkakanru ralipregognepatka. ⁵⁵ Gi rixanu nogitni wa galikakpotunanu niikalurni, ga wa nograga galikakpotunanu girkalurni. ⁵⁶ Wa nnikgitutjeru, ga wa nuragragatjeru Gita rawa. Wale Gita gwa. ⁵⁷ Wane rixa yokanretno Girchi giwekachri, ga wa Girchi chinanu nuweka, waneko pixka rixa wa nnikjeru. Wale koxa giwekanu Gita chinanu. ⁵⁸ Tyenwa jimapro tengogne gjiruwyachri. Gi wa gitsrukattenu pixka rixa, wa mana nikna. Wa gipnachinenatkani. Wa tye jimapro nikachri giwekgognenatanu gike rixiniko mnikawnakatu.”

⁵⁹ Tyekaka wane china ginkaklewwakapiya, Kapernawo Pokchi runkak-lewanatya.

Wa Giwekikaluru Walenwa geneka giweklerewatachri

⁶⁰ Wa gixo yimaklene yijnakonatinri, wane chinna, “Kgimlu tye tokanchi. ¿Katu gimkata yijnakletlu?”

⁶¹ Wa rumatini Geso Walenanuko wa yimaklene kegemginri tye tokanchi chinanu, wane chinna Wale, “¿Tyerge gitspeekakgi? ⁶² ¿Gi gixpokotanu wa getinipno Gita Yineru Wgenno teno nyinipa muchinanu nwanatyawaka?

⁶³ Wa Giwekikaluru Walenwa geneka giweklerewatachri. Wa manchi gike gaprini. Wa tokanchikaka Gita ginkakyagi, walenwa giwekikaluru ga wa giweklu. ⁶⁴ Seyni wanena pimrine gixate wa malixkane.”

Gi rixanu Geso gimata yinuwakikoluyakawa ginnaktanwa malixkane, katupni wa samyokjerupa. ⁶⁵ Wane china, “Wale chinanu wane nchingi, gi satuna gimkata ginreta Gita yegi ma muchichkanru Girchi.”

Tokanchi giweklu mnikawnakatupiran

⁶⁶ Wanepnute gixo yimaklene satkapa. Gi wa Waleyma yanatkana.

⁶⁷ Giyagni wane chinna Geso wa pamole gepi, “¿Gi ge galuka yaleta gixa?”

⁶⁸ Simo Petro gigitu, “Gitsrukaachi, ¿katyegmaka gayanu? Pixa waneya tokanchi giweklu mnikawnakatupiran. ⁶⁹ Wixa galixa. Wumatyi wa Kristoyi pixinri, Goyakalu giwekachri Wgenyi.”

⁷⁰ Geso gigitu, “¿Gi ge ntsomitgi gixa wa pamole gepirungi? Ga wa gixa satu kamchini.” ⁷¹ Gota Giskaryote wa Simo wgenepiranni wane china, gi rixanu walepni wa samyokjerupa. Walenwa pamole gepirune rixinrina.

7

Ma malixlena Geso gepurune

¹ Wa wanepnute Kalile yapanata Geso. Gote gi raluka yapleta, gi rixanu Goteyone galuka giylaletlu. ² Gi gowukatkalu Goteyone meyiwatinrigogne, wa Gimajechrigogne. ³ Repurune wane chinru, “Pyanutka gewiya. Gote pyanutka. Wa pyimaklene koxa getyaplu pkamrujetanru. ⁴ Girukokta galuka kpogiru gixleta gi yogimatlu kamrure. Tyekaka pkamrutinri, pupgu-jetinwa psolchijne gajeneko yegi.” ⁵ Gi rixanu gi wa repuruneko galixlu.

⁶ Giyagni wane chinna Geso, “Nopapko gi wa rapokawa. Seyni waney-gognenangi wa gipapko. ⁷ Tye psolchijne gajeneko gi gimkata gayegixletgi

gixa. Seyni Gita rayegixna. Gi rixanu Gita gipgujtatna wanna wa mugletu kamruretinrina.⁸ Gixa kanikanu tye meyiwluyegi. Gichi nkanikanu Gita tye meyiwluyegi. Gi rixanu gi wa poyagkaakawa nopapko.”

⁹ Wane chininitkana, Kalile rutukatka.

Gimajechrigogne meyiwluyeglu Geso

¹⁰ Wa meyiwluyegi kanikinitkana repurune, gowukshini kanikatka Geso koxa. Gi wa gipgujewnachri, seyni pocheru pixkako.¹¹ Giyagni rujgaluna Goteyone meyiwluyegiya. Wane chinna, “¿Ginaklu wa Wale?”¹² Tsru gixaxkaklu rixna gixolune yine Gesoya. Wa pimrime wane china, “Kiglerni.”

Pimrime wane china, “Gike. Seyni Wale yokwitna yine.”

¹³ Seyni gi satuna pgujetanwaka yanumsayegitlu Goteyone piklena chinanu.

Kpashiwakapji runkaklewatyaw Goso

¹⁴ Ganikaji meyiwluyegi kanika Geso. Kpashiwakapji ya. Wane runkaklewatyaw.¹⁵ Giyagni ruglajitna Goteyone. Wane chinna, “¿Gi rixpoko gimatletlu wa Tye wa yonchi? Gi wa yimaakalurni.”

¹⁶ Geso gigitna. Wane china, “Nunkaklewle gi wa Gitanukni, seyni wa nyokanatjerunni.¹⁷ Girukta galuka kamruretlu nyokanatjeru gishinikanru rumatanru nunkaklewlepirana, Goyakalunrege waka Gitako ntukanra.¹⁸ Waleko tokanu ginkakletachri, waleko rumalwutikolu rujga. Seyni wa yokanatjeru gimalwutikolu gigachri, walenna galikakpotunanu. Male-shaylu wale mpoyagkaknuchi.¹⁹ ¿Gi ge Tokanchi Yakanatkaluru renekgi Moysisi, ga wa gixa gi satuna kamrutlu Tokanchi Yakanatkaluru? ¿Kluneru chinanu galuka giylaletno?”

²⁰ Yine gigitala. Wane chinna, “Kamchi waneyyi. ¿Katu galuka giylaletyi?”

²¹ Geso gigitna. Wane chinna, “Satu kamrurchi nkamruta. Wa pejnu-runekgi gixa giglajita.²² Galikakni Moysisi genekegi wa sajrku gistiklewlui (seyni gi wa Moysisi runya, seyni wa gitsrukaachinni runya) ga wa gapnanutikalurgogne gixa sajrku gistikletu jeji.²³ Wa gapnanutikalurgogne sajrku gistiklikupa jeji wa Tokanchi Yakanatkaluru Moysisinu ma kaspukikotupa, ¿gimtuwnayegitnoe gixa wa gapnanutikalurgogne nutuukakpotutyalu satu jeji?²⁴ Gi gitakyagoklewatanu rixa getletikwaka chinanu, seyni wanepotuko gitakyagoklewatanu.”

¿Gi ge Walekni Kristo?

²⁵ Giyagni wane chinna pimrime Gerosale gajene, “¿Gi ge Walekni wa Tye wa raluka giylaletanruna?”²⁶ Getanu. Gipgujewnachri yanumsata. Gike chinruna. ¿Rumatatkaluna xani galikakpotunanu tsrukakalune wa Kristo rixinri?²⁷ Seyni wa Tye wumattu ginaka giyakatyachrini. Seyni wa Kristo gininipa gike gimata ginakacta ruyakatini.”

²⁸ Giyagni kpashiwakapji runkaklewatanini Geso, siplewata. Wane china, “Gimatno Gita. Ginaka giyakatyachrino gimata. Gi wa Gitako nushinikanu nuna. Seyni wa nyokanatjeru galikakpotunanni Wale, wa gixa mumatanutu.²⁹ Gita gimatlou, gi rixanu Walenno. Ga wa Wale yokanatno.”

³⁰ Giyagni raluka kashretluna, seyni gi satuna gomyokyegitlu gi rixanu gi wa gipapko gapokawa.³¹ Gixo Wale galixachine wane gixolunetskala. Wane chinna, “¿Wa Kristo gininipa, getkalurkakapa wa Tye kamrutanrupnutlege kamrutananu Wale? Gike.”

Gwarisyonetowrene ykanatka kashichyapluna Goso

³² Wa Gwariseyone yijnakotna gixolune yine kegemgiyawakna Walepirankakako. Tsrukakalune sasertotene ga wa Gwariseyone yokanatna gitowrenna wa kashichyapluna.

³³ Geso wane china, “Pshinitsonuchi numwamtangichi. Nyokanatjeru yegi nyanutka. ³⁴ Gijganmakno. Gi gikshikanutkano. Wa nwiyawakapa gixa gi gimkata yaletanu.”

³⁵ Giyagni wa Goteylene wane chinkaka wannakakluko, “¿Ginaka rushinika yaletge wa Tye wma mukshikyanpatkalu? ¿Rushinika yaletge gitspalat-achine, Kriykonetskala gwachine yegi, runkaklewyegityapna Kriykone?

³⁶ ¿Klipiranni wa tye wa Wale wane chinya? Wa, ‘Gijganmakno. Gi gikshikanutkano. Wa nwiyawakapa gixa gi gimkata yaletanu.’”

Gonu giwekachri yapgatyawaka pixka

³⁷ Ralipregogne, tsru meiyiwlugogne potu, Geso tunwata. Saplewata. Wane china, “Girukokta gonunnagatewata runyegitanno. Ruranu. ³⁸ Yonchi chinyawaka, Gonu giwekachri yapgatyawaka pixka rixa gishpakletanu ginanwakaya nalixjeru.” ³⁹ Giwekikalurupiranni china wa tye tokanchi, wa ralixjenepa yoptotanrupni Wale. Gi rixanu gi rapyegitawana Giwekikaluru Kpashiri, gi rixanu Geso gi wa royakawatyawaka jiglokawa.

Gixolune kotspalanshinikankaaka

⁴⁰ Giyagni gixolune yijnakotinri tyepirana, pimrime wane china, “Galikapotunanni Tyenwa tokanchi geneklewatachri.”

⁴¹ Pimrime wane china, “Kristokni wa Tye.”

Pimrime wane china, “¿Kalilege ruyakatini Kristo? Gike. ⁴² ¿Gi ge wanekni china yonchi wa Tawiklopisha, Wetle Pokchirge, Tawi gwanatyawaka, wane ruyakinripa Kristo?”

⁴³ Giyagni wannakakluko kotspalanshinikankakna gixolune Geso chinanuya. ⁴⁴ Wa pimrime galuka kashretlu, seyni gikena gomyokyegitlu.

Gi pagogneko Wale pixka rixa ginkakleta satu yineru tye jeji pixka

⁴⁵ Giyagni towrechine gapyejtna tsrukakalune sasertotene ga wa Gwariseyone. Wane chinkana towrechine, “¿Klu chinanu gi ganiklu?”

⁴⁶ Wa towrechine gigita, “Gi pagogneko Wale pixka rixa ginkakleta satu yineru tye jeji pixka.”

⁴⁷ Giyagni wa Gwariseyone gigitna. Wane chinkana, “¿Gixkoxnirge yokwitkanatka? ⁴⁸ ¿Ralixluge satu tsrukakalu, ga wa satu Gwariseyo? Gi ralixluna. ⁴⁹ Seyni wa nyi gixolune, Tokanchi Yakanatkulu mumatkane, kamakpiratkalunni.”

⁵⁰ Wane chinna Nikotemo (Goyechno yayentapjeru. Walenwa Gwarisey-one satute). ⁵¹ “Tokanchi Yakanatkulu wixanu gi giklukanuwnayegjixlu yineru ma muchinanu jemiranyegitkanuwatu, rumatikolupa wale kamrutanru.”

⁵² Rugitluna Nikotema. Wane chinruna, “¿Kalile gajerkoxlayge pixa? Petjetanru. Pumatanru. Gi pagogneko Kalile rupgujewnni tokanchi geneklewatachri.”

⁵³ Satkaka gipji yatka.

¹ Wa Geso Goliwa Magkate yatka. ² Goyechnokawpotuko kpashiwakapji yatnaka Geso. Pejnuruneko yine ginyegitlu. Tuplata Geso. Runkakleweyegitna.

³ Wa yonchikgapine ga wa Gwariseyone ganiklo sato suxo Wale yegi. Tkashichka tumopatlewanatyawakaya. Ganikaji rutaklona. ⁴ Wane chinruna, "Yimaklewatachri, twu suxo kashichka tumopatlewanatyawakpotukoya. ⁵ Wa Tokanchi Yakanatkaluruya, Moysisi towutwu sotlujetikolupna wane gixachrone. Ga wa Pixa, ¿gi pchina Pixa?"

⁶ Wane chinna yantaletyaluna rumkata jigyegleyapluna. Geso yonogimta. Chiji yonawata gimonyojiya. ⁷ Romkaga gepomsaletinitkaluna, potukawata. Wane chinna, "Girukokta gixa satu mmukochiretu, wale gapka ginkaganro sotluya." ⁸ Rumepe yonogletatnaka. Chiji yonawatatanaka.

⁹ Wa yijnakotinitkana, yatkana. Satkaka yananumta. Muchinanu tsrustsoleji potu ga wa gapkatatachripotunanuko. Gesopje giknokamtkatka, ga wa suxo ganikaji gwanatachro. ¹⁰ Potukawatatanaka Geso. Gi satuna retatka. Suxopjetkani. Wane chinro, "Suxo, ¿ginakatkana pjigyejijene? ¿Gikena giklukanuwnayegjixyi?"

¹¹ Wala wane china, "Gi satuna, Gitsrukaachi."

Geso wane chinro, "Gi Gitako giklukanuwnayegjixyi. Pyanutka. Gi wanepnuteko pmukochirewatanutka."

Gesni wa tye psolchijne gajeneko pokamlatyegitachri

¹² Wa Geso yanumyegitnakna. Wane china, "Gitni tye psolchijne gajeneko pokamlatyegitachri. Wa nomkagitjeru gi wa mapshagwaka yananu, seyni waneyaplu pokamlalu giweekaklewatachri."

¹³ Giyagni Gwariseyone wane chinru, "Pixnanuko gipguitatnawa. Wa pupguitalewle gi wa galikakpotunanni."

¹⁴ Rugita Geso. Wane chinna, "Gitnanukmaka gipguitatnawa. Nupguitalewle galikakpotunanni. Gi rixanu numata Gita ginaka nuyakatyga wa ginaka nyanu. Wa gixa gi gimata ginaka nuyakatyga wa ginaka nyanu.

¹⁵ Wa gixa giklukanuwnajixlewata rixpokmanetyawaka. Gita gi satuna nuklukanuwnayegjixa. ¹⁶ Gita giklukanuwnajixlewatinu nuklukanuwnajixlewle galikakpotunanni, gi rixanu gi wa Gitapjeni, seyni Gita ga wa nyokanatjeru, Girchi. ¹⁷ Wa Tokanchi Yakanatkaluru gixanu wane yonatika: Gepi jejine gipguitalewle galikakpotunanni. ¹⁸ Gitni wa Gitnanuko gipguitatnachriwano, ga wa nyokanatjeru Girchi gipguitatno Gita."

¹⁹ Wane chinruna, "¿Ginaklu Puru?"

Geso gigita, "Gi gimatno Gita, gi wa Nuruko. Gitamka gimatantu, Nurkoxmaka gimatantu."

²⁰ Tye tokanchikaka wane chinya Geso sroschi gignantakikwaka, kpashiwakapji runkaklewatini. Gi satuna kashichlu gi rixanu gi wa gipapko gapokawa.

Niyiwakapa Gita gixa gi gimkata wane yaletanu

²¹ Giyagni rumepe wane chinretatnakna Geso, "Nyanutka. Gijganmakno, seyni gixapni gmukochire gimupnanuna. Niyiwakapa Gita gixa gi gimkata wane yaletanu."

²² Giyagni wane chinna Goteyone, "¿Walenanuklege giylatinwa? Giyagoka gonra wane china, 'Niyiwakapa Gita, gixa gi gimkata wane yaletanu.'"

²³ Wane chinna Geso, "Gi wa teno gajengi gixa. Gitni wa teno gajerno. Gixni wa tyechijne gajengi. Gi wa tyechijne gajerno Gita. ²⁴ Giyagni wane

nchingi wa gmukochire gimupnanuna. Gi rixanu, gma malixkanupmakno Gita nixinri gmukochire gimupnanuna.”

²⁵ Giyagni wane chinruna, “¿Gi gixachriyi Pixa?”

Wane chinna Geso, “Wa muchinanu nunkakyagi. ²⁶ Waneyno gi gepika nunkakletpiranatyapgi, nuklukanuwnayegjixapgi, seyni wa nyokanatjeru galikakpotunanni. Wa Waleya nyijnakotinri Gita, wale nunkakleta tyechi-jneya.”

²⁷ Wa Girchipirana runkakyana. Gi rumata jemluna ²⁸ Giyagni Geso wane chinna, “Wa gixa yotukinpatkano Gita wa Yineru Wgenno, waneklu gimatanutkano wa Gita nixinri, ga wa gike nkamruta Gitnanuko, seyni wa Girchi yegi numatinri wale nunkakleta. ²⁹ Gitaymalu wa nyokanatjeru. Gi rutspaltapyano Gitapje nixinri Girchi. Gi rixanu Gita kamrujetu rugleretjetyawaka.” ³⁰ Tyepirana runkakletini, gixo galixlu Wale.

Galikakpotununu tokanchi koshpakangi

³¹ Giyagni wane chinna Goteyone ralixjenetka, “Wa ntokanu gomkayegi-tini, galikakpotununu nyimaklenepgi. ³² Gixa gimatantu galikakpotununu tokanchi. Galikakpotununu tokanchi koshpkangani wayegrechne gma mix-initipa.”

³³ Rugitluna, “Gawraklopishanwu wixa. Gike wayegrenenanwu, gi pagogneko. ¿Gi pchinkoxge Pixa, ‘Gishpakachinepgi?’”

³⁴ Rugitluna Geso, “Galikakni, galikakni, wane nchingi, wa pejnuruneko mukochri kamrutachine, mukochri wayegrenni. ³⁵ Wa wayegrechri gi wa panchi rawgognenatanu. Wgenchi gwagognenatanru. ³⁶ Giyagni wa Gituru koshpkakinipgi, galikakpotununu gishpkachinepgi. ³⁷ Numatgi Gawraklopishangi gixinri, seyni galuka giylaletno, gi rixanu wa ntokanu gi wa gwagi. ³⁸ Gita ginkakletlu wa Girchistsi netinri, ga wa gixa kamrutlu wa girustsi gjeminri.”

Kamchi girutachingi

³⁹ Rugitluna. Wane chinruna, “Wurni Gawrani.”

Wane chinna Geso, “Gawra wgenengi gixkamka, Gawra kamrujetanrumka gkamrutanu. ⁴⁰ Ga wa xani galuka giylaletno, jeji tokanchi galikakpotununu ginkakjerno. Wale tokanchi Goyakalu yegi njeminri. Gi wale kamruta Gawra. ⁴¹ Gixa kamrutlu girni kamrure.”

Wane chinruna, “Wixa gi wa gapoklewlu chinanu wushpaky. Pagirupje waneywu. Walenwa Goyakalu.”

⁴² Wane chinna Geso, “Wa Goyakalu girutkamka, galukanmakno galikaka. Gi rixanu Goyakalu yegi nuyakaty Gita. Gewi napoka. Gi rixanu koxa gi wa Gitako nushinikanu nuna, seyni Wale yokanatno. ⁴³ ¿Klu chinanu gi gimata jemlu nunkakletjetanru? Gi rixanu gi gimkata yijnakotlu ntokanu.”

Gixni wa giru giyakatyachingi

⁴⁴ “Gixni wa giru giyakatyachingi. Walenwa tsru kamchi. Giru get-sotanrewle galuka kamrureta. Reiyinuwakleyakawa kgylalewaklerni wale. Galikakpotununu tokanchiya mwakatni wale. Gi rixanu maleshaylu wale galikakpotununu. Rayroklewatini, waleko rushinikanu china, gi rixanu kayrokterni. Gayroklu girni. ⁴⁵ Gixa gi galixno, gi rixanu Gita galikakpotununu nchina. ⁴⁶ ¿Katu wa gixa gimkata gekakgi giklukanuwnaletyano wa nmukochirewatirnitka? Galikakpotununu nchinini, ¿klu chinanu gi galixno? ⁴⁷ Goyakalu yegi giyakatyachri yijnakotlu Goyakalu tokanu. Giyagni gi gyijnakotlu gixa, gi rixanu gi wa Goyakalu yegi giyakatyachingi.”

Gawrani mwakanuwa, Gitni

⁴⁸ Rugitluna Goteyone. Wane chinruna, “*¿Gi ge wanepotuko wchina wixa, wa Pixni wa Samari gjajeryi, ga wa waneyyi kamchi?*”

⁴⁹ Rugita Geso, “Maleshayno kamchi, seyni nkagwakpiratlu Nuru, ga wa gixa mkagwakpiratkotu gixno. ⁵⁰ Gi wa nujgalu numalwutikolupa. Waneru wa nujga gimalwuretjeru. Waneru kgitakyagoklewakleru. ⁵¹ Galikakni, galikakni wane nchingi, ntokanu gomkagitachri gike rixiniko retanru gipukchi.”

⁵² Wane chinruna Goteyone, “Xawakni wumatanatkayi waneyyi kamchi. Gawrani gipnana ga wa tokanchi geneklewatachinni. Ga wa Pixa wane china, ‘Wa ntokanu gimretachri gike rixiniko retumganru gipukchi.’

⁵³ ¿Pixlege wa wutsrukati Gawrani pnutepgutyi? Wale gipnachrinatka. Ga wa tokanchi geneklewatachinni gipnana. ¿Katu pixnawa Pixnanuko?”

⁵⁴ Rugita Geso, “Gitnanuko gimalwutinwa, gike gaprini numalwure. Nuru genekno numalwutikolupa. Walenwa wa gixa Goyakalute nchinanru.

⁵⁵ Gixa gi gimatlu, ga wa Gita gimatlu. Gi numatlu, nchinanmaka Gita, gixa pixkamka nixanu kayroklerupmakno. Seyni numatlu. Numretatokanutlu.

⁵⁶ Gawrani gitsrukati rumuwatni retgognetinno nogogne. Retlu ga wa rumuwatni.”

⁵⁷ Giyagni wane chinruna Goteyone, “Gi pamymole walapuunawayi. ¿Petnirge Gawrani?”

⁵⁸ Wane chinna Geso, “Galikakni, galikakni wane nchingi, Gawrani mwakanuwa, nwatka Gita.”

⁵⁹ Giyagni koscheksotletna sotlujetyapluna. Wa Geso yogimata. Kpashi-wakiji rushpakamtya.

9

Jeji rushpakiniyakawa maygaletu rutuukaka Geso

¹ Wane yapamtini Geso retlu satu jeji rushpakiniyakawa maygaletu.

² Yimaklene gepomgalu. Wane chinruna, “Rawi, ¿katu mukochirewata, waleko waka rurune, wa maygaletu rushpakinriya?”

³ Rugita Geso, “Gi tyeko mukochirewata, gi wa ruruneko, seyni wa Goyakalu kamrure gipgujewnniripa waleya. ⁴ Numkata kamrurewleta wa nyokanatjeru kamrurkaka gogikopshini. Goyechno gina. Waneklu gikeko gimkata kamrurewleta. ⁵ Tyechijne nwakopshini, tye psolchijneko pokamatatachrino.”

⁶ Wane chininitka, chiji rutskagata. Rugakajpatlu gitskagaya. Maygale-tuygale sagajpatlu kajpa. ⁷ Wane chinru, “Gajewa. Kawjetikwaka Silowega perkapinwa.” Silowe walenwa yokaakaluru, Yukanatkaluru. Giyagni wane ya. Rerkinawa. Getachri ginatka.

⁸ Giyagni wa rumwastsitanune, ga wa muchikawa retanatjene wa maygaletu rixanatini, wane chinna, “*¿Gi ge walekn ni wa tye, wa tuplajenatachri gagijjenatachri?*”

⁹ Pimrine wane china, “Walekni.”

Ga wa pimrine wane china, “Gike, seyni wale pixka rixa.”

Waleko wane china, “Gitakni.”

¹⁰ Giyagni wane chinruna, “*¿Gi pixpoko gimrekgalatka?*”

¹¹ Rugita wale. Wane china, “Wa jeji Geso giwakatletachri, kamrujpatlu kajpa. Sagaygaletno. Wane chinno, ‘Gajewa. Silowega perkapinwa.’ Wane nya. Nerkinawa. Netatka.”

¹² Wane chinruna, “*¿Ginaklu Wale?*”

Wale wane china, "Goo. Gi numata."

Gwariseyone gepomgalu maygaletunano

¹³ Gwariseyone yegi ranikluna maygaletunano. ¹⁴ Gapnanutikalurgognenwa Geso kamrujipatlu kajpa, rumrekakakatkalu. ¹⁵ Giyagni rumepe gepomgaletatnakluna Gwariseyone gi rixpoko getletatka. Wale wane chinna, "Kajpa sagayaletno. Nerkinawa. Netatka."

¹⁶ Giyagni pimrine Gwariseyone wane china, "Tye jeji gi wa Goyakalu yegi giyakatyachrini, gi rixanu gi wa gapnanutikalurgogne rapnanuta."

Pimrine wane china, "¿Gi rixpoko gimkata kamruretlu tyekaka getkalurkaka satu jeji kmukochireru?"

Wannakakluko kotspalanshinikankakna. ¹⁷ Giyagni rumepe wane chinretnakluna maygaletu, "Ga wa pixa, ¿gi pchina pixa Waleya, gi rixanu rumrekakakyi?"

Wale wane china, "Tokanchi geneklewatachrini."

Gwariseyone gepomgalu maygaletunano giru

¹⁸ Giyagni gi ralixpiranyegitluna Goteyone wa maygaletu rixanatinri, ga wa retinritka. Gi ralixluna tomginpotunanukna rurune rugletaygaletikolutka. ¹⁹ Repomgakna. Wane chinkana, "¿Tyenwa gituru, wa gixa wane chinanru maygaletu gishpakyachri? ¿Ga gi rixpoko getletatka?"

²⁰ Giyagni rugitna rurune. Wane chinna, "Wumatlu tyenwa wixa wgene wa maygaletu gishpakyachri. ²¹ Gikta rixpoko getletatka gi wumata. Katukta gimrekakaku gi wumata. Gepomganru wale. Tsrutkani wale. Walenanuko ginkakletinwa."

²² Wane chinna rurune gi rixanu Goteyone pikanna. Gi rixanu Goteyone yijnaakakatkana wa satu gipgujitatinri wa Mesiya rixinri, ruknooko maleka ginkaklewawakapiya. ²³ Giyagni rurune wane china, "Tsrutkani. Gepomganru wale."

Satupje numata

²⁴ Giyagni rumepe tomgaletatnakluna wa jeji maygaletunano. Wane chinruna, "Pumalwutanru Goyakalu. Wixa gimatlue jeji kmukochirerni."

²⁵ Giyagni wale gigita. Wane china, "Kmukochireru rixinri, gi numata. Satupje numata, wa maygaletu nixanatinri, xawakni netatka."

²⁶ Giyagni rumepe wane chinretnakluna, "¿Gi rixpokotyi? ¿Gi rixpoko gimrekakakletyi?"

²⁷ Rugitna, "Nunkakatkagi. Gi wa gjemno. ¿Klu chinanu galuka yijnakletnakluk? ¿Gixkoxlege galuklu wa yimaklenge gixinripa?"

²⁸ Yangaluna. Wane chinruna, "Pixni wa yimakleryi, ga wa wixa Moysisi yimaklenwu wixa. ²⁹ Wixa gimata wa Moysisi ruynumsata Goyakalu. Ga wa Tye, gi wumata ginaka runya."

³⁰ Rugita wa jeji. Wane chinna, "Galikakni giglajruni wa gixa gi gimatluginakakta runya, ga wa rumrekakakno. ³¹ Wumata wa Goyakalu gi yijnakotna kmukochirerune, seyni wa satu Goyakalu yonogyegitachri, ga wa Wale gishinikanru kamrutachri, wale yijnakota. ³² Gi pagogneko jempiranyegitka wa satu gimrekakakyawakatkalu wa maygaletu gishpakyachri. ³³ Goyakalu yegi ma muyakatkanumka wa Tye gikemka rumkata kamruretanu."

³⁴ Rugitluna. Wane chinruna, "Psolpotuyako mukochri gimush-pakachriyi, ¿ga wa pixa ginkaklewyegitwu wixa?"

Maleka ruknokluna.

Maygalene

³⁵ Yijnakota Geso wa maleka ruknokyawakluna. Rukshiklu. Wane chinru, “*¿Palixluge wa Goyakalu Wgene?*”

³⁶ Rugita wale. Wane china, “*¿Katni Wale, Gitsrukaachi, wa nalixyaplu Wale?*”

³⁷ Wane chinru Geso, “*Petatkalu. Walekni giynumsatyi.*”

³⁸ Wale wane china, “*Nalixa, Gitsrukaachi.*” Yoptsojityegitlu.

³⁹ Wane china Geso, “*Giklukanuwnayegjixlewlu chinanu, Gita gina tye psolchijneko, retinripna metkane, ga wa maygalene rixinripna getachine.*”

⁴⁰ Wa pimrine Gwariseyone Wale yegi gwanatachine yijnakotlu Wale. Wane chinruna, “*¿Wixkoklege maygalenwu?*”

⁴¹ Wane chinna Geso, “*Maygalengi gixkamka, gimka kmukochirepgi. Ga wa xani gi rixanu gixa wane china, ‘Weta,’ giyagni gmukochire waneygi.*”

10

Geso ginkakle: Yapkaklu gowegane prijerepiranaya

¹ “Galikakni, galikakni, wane nchingi, wa gowegane prijere gipgyaptotpotuko mjiglokikatu, seyni pnusretako ratskomtya, walenwa kachowguru.

² Wa gipgyaptopotuko jiglokyachri, Walenwa gowegane girukotachri. ³ Wale chinanu kotpukgipgyaptoteta wa gipgyapo gajeru. Gowegane yijnaktokanutlu. Rowegatene tomga satkaka tgiwakaya. Koshpakna. ⁴ Wa pejnu-runeko Walenune koshpakinikana, kosekamtatkana. Gowegane gomkag-tilu gi rixanu rumatotkanutluna. ⁵ Gi wa romkagitanruna pnú gajeru, seyni rasukirrina wale, gi rixanu gowegane gi gimatafokanutra maleka gajene.”

⁶ Tye yapkaklu tokanchi Geso ginkakna, seyni wanna gi gimata jemlu klunwa wane chinyana.

Gesni wa kigleru kgirukotaprakleru

⁷ Giyagni Geso gimepe wane chinrettnaka, “Galikakni, galikakni wane nchingi, Gitni wa gowegane gipgyaptotno. ⁸ Pejnuruneko muchinanu ginachine Gitaya kachowgurunni, seyni wa gowegane gi yijnakotna. ⁹ Gitni wa gipgyaptono. Gitaya jiglokyachri rognetaako. Jiglokjetanu. Rushpak-jetanu. Rukshikjetanu nikyawakapa. ¹⁰ Wa kachowguru gina walepje chinanu, chowguwatatinripa, ga wa ruylalewatinripa, ga wa nikatlewatinripa. Gita gina waneyna rixinripna ruwekinrina, ga wa ponikowa giwek-letinripna.

¹¹ “Gitni wa kigleru kgirukotapraklerno. Kigleru girukotapratachri ruwekinri rutaka gowegane chinanu. ¹² Wa wenutkalurni, wa girukotapratachri migje, kgowegateru migje, retapinri kewetna ginachri, ruknokamtna gowegane. Rasukatka. Kewetna kashichanna. Rakapalatna gowegane. ¹³ Wa wenutkaluru gasuka gi rixanu wa wenutkalurni. Gike rixluna wa wale wa gowegane.

¹⁴ “Gitni wa kigleru kgirukotapraklerno. Numatna nowegatene. Wa Gitanune gimatno. ¹⁵ Waneko pixka rixa gimatletno Gita Girchi, ga wa Gita gimatlu Girchi. Nutaklu nuwekinri gowegane chinanu. ¹⁶ Pimrone koxa waneyno gowegane, tye prijere mwakane. Wanna koxa numkata gwapleta. Yijnaktokanutannona. Waneplu satupje rapatyawakpna gowegane, ga wa satupje girukotapratachri. ¹⁷ Giyagni Girchi gishinikno gi rixanu nuwekinri nutaka numepe yoptoletyapatnaklu. ¹⁸ Gike konanno nuwekinri, seyni Gitako gitaku Gitanuko. Nutaaka nutakyaplu. Nutaaka numepe yoptoletyapatnaklu. Wane rixa yokanretno Nuru.”

Kotspalanshinikankaklu Goteyonkakluko

¹⁹ Wanetnaklu kotspalanshinikankaklu Goteyonkakluko tye tokanchi chinanu. ²⁰ Gixolune wane china, “Kamchi waneylu. Seprolokachrini. ¿Klu chinanu gyijnakotlu?”

²¹ Pimrine wane china, “Gi wa kamchichachri tokanni wa tye. ¿Kamchirge gimkata gimrekgakakletlu satu maygaletu?”

Nowegatene jematakanutno

²² Gerosale waneru meyiwlugogne, wa kpashiwakapji gitaakoklun-gogne. Ginapukluni. ²³ Kpashiwakapji yotaljeta Geso, gitamnu Salomonu.

²⁴ Giyagni sajruklna Goteyone. Wane chinruna, “¿Giklunanu pali kojwakan-shinikanretanwu? Wa Kristo pixinipa, punkakanwu pgujetanwaka.”

²⁵ Rugitna Geso, “Nunkakatkagi. Gi galixa. Wa nkamrurkaka Nuru giwakaya, waleko gipgujtntno Gita. ²⁶ Seyni gixa gi galixa gi rixanu gi wa nowegatengi. ²⁷ Nowegatene jematakanutno. Gita gimatna. Romkagitchona.

²⁸ Gita genekna ruwekinrina gike rixiniko mnikawnakatu. Gi pagogneko ramganna. Gikena koshripatanma nomyoya. ²⁹ Nuru, nenekjeru, pejnurune pnute tsruni Wale. Gikena gimkata koshripletna Nurumyoya. ³⁰ Gita ga wa Girchi satupjerunwu.”

Goteyone galuka sotlujeretlu Geso

³¹ Rumepe koscheksotleretna Goteyone sotlujetyapluna. ³² Rugitna Geso, “Gixo kigleru kamrurchi nekagtgi Girchiya. ¿Giru kamruchi tyekaka chinanu nsotlujetannmakno?”

³³ Rugitlna Goteyone, “Wa kigleru kamrurchi chinanu, gi wa wsotlujetyi, seyni wa mupashiregnuchi chinanu wsotlujetannmakyi, gi rixanu Pixa yinerukyi Goyakalu putaknawa.”

³⁴ Rugitna Geso, “¿Gi ge yonatka wa Tokanchi Yakanatkaluruya gixanu: *Gita wane china, goyakalungi?*”

³⁵ “Wane chininna goyakalune wanna Goyakalu tokanu genekekikolune, ga wa yonchi gi rumkata kaspukletko, ³⁶ wa Gita Girchi kpashiri gitakanruru, tyechijne yakanatanru, gixa wane china, ‘Mupashiregnuchi pchina,’ gi rixanu wane nchnina, ‘Gitni Goyakalu Wgenno.’ ³⁷ Gimka Nuru kamrure nkamrutanu, gi galixanno. ³⁸ Wa nkamrutinri, gimka galixanno Gita, galixanru kamrurchi, gimatyapatkalu, gimatgognenatinripa wa Girchi gwano Gita, ga wa Gita Girchi nwa.”

³⁹ Giyagni rumepe galuka kashretmalkuna, ga wa Wale gishpakamta wannayegiya.

Rumepe Gorta wakanute yaletatnaka Geso

⁴⁰ Rumepe Gorta wakanute yaletatnaka, wa Gwa muchinanu katlew-jenatyawaka. Wane rawanata. ⁴¹ Gixo yayegitu. Wane chinna, “Gwa galikakni gi satuko getkaluru kamruta. Seyni Gwa ginkakletjenatanru wa Tye ptowruko galikakni.” ⁴² Gixo galixlu waneya.

11

Lasaro yayixinri

¹ Yayixana Lasarni, Wetani gjerni, Mariya gwiyawaka pokchi, ga wa tyegwaklo Marta. ² Mariya, wa Gitsrukaachi pgamlugalo giyokachro, ga wa tsheyjixitlu tojiwutsaya ga ga walawna yayixyegwakatachro Lasarni.

³ Repurone yakanrewata Wale yegi. Wane chinjixluna, “Gitsrukaachi, petanu, wa palukanruni yayixanatka.”

⁴ Wa yijnakotinitka Geso wane china, “Tye yayixlu, gi wa gipukchipni seyni rumalwutikolupa Goyakalu, wa Goyakalu Wgene gimalwutikolupa Wale chinanuya.”

Lasaro gipnale

⁵ Geso gishinikna Marta, ga wa tepuro, ga wa Lasaro. ⁶ Giyagni wa jeminitka wa yayixinrinatka, wane rutukawa gepgogne wa rawanatyawaka.

⁷ Giyagni wanepnute wane chinna yimaklene, “Gote gayanutnaka.”

⁸ Yimaklene wane chinru, “Rawi, tyegognekakniko, raluka sotlujeretanya ina Goteyone. ¿Waneklege pyanutnaka?”

⁹ Rugita Geso, “Waneylu pagogne pamole gepi gora. Gogi yanini satu, gi wa rutspeta, gi rixanu tyechijne pokamlatachini reta. ¹⁰ Wa satu goyechno yanini rutspeta, gi rixanu maleshlu pokamlalu waleya.”

¹¹ Rali wane chinretinitka, wane chinna, “Lasarni, walukanru, rapnanuttaka. Seyni wane nyanu. Nkomyekapanru.”

¹² Giyagni wane chinruna yimaklene, “Gitsrukaachi, rapnanutini, rutukanu.” ¹³ Wa Geso wane chinre wale gipnaley. Wa wanna kagwaklu wa rapnanushatinri rumkinriyapirana, china.

¹⁴ Giyagni Geso wane chinatkana pgujetanwaka, “Lasarni gipnanatka.

¹⁵ Numuwata gixa chinanu, gi wa wane nwanata, galixinripa. Seyni gayanutka wale yegi.”

¹⁶ Giyagni Tomasu wa Gepirutu chinkaluru wane chinna ruyimakikolune, “Wane koxa gayanu wixa Waleyma wupninripa.”

Yotunru ga wa giweku

¹⁷ Giyagni rapokinitka Geso, rumatatkalu gepkoxamkojgognetkani kapnatikolutka. ¹⁸ Wa Wetani gi gowukayatkalu Gerosale, mapa getko kilometroni. ¹⁹ Gixo Goteyone ginyegitlo Marta ga wa Mariya yegwakluniyna rumnankapkana. ²⁰ Giyagni Marta jeminitka Geso gininritka, tyoptotaplu. Ga wa Mariya panchi tuplanata.

²¹ Giyagni Marta wane chinru Geso, “Gitsrukaachi, gewi pwanatkamka, gimka rupnanni nyegwakluni. ²² Xani koxa numatlu wa pejnuruko pagjityaplu Goyakalu, Goyakalu genekanyi.”

²³ Wane chinro Geso, “Yotunotanu pyegwaklupa.”

²⁴ Marta wane chinru, “Numatlu yotunotinripa yotunkoklunchipa ralipregognepa.”

²⁵ Wane chinro Geso, “Gitni wa yotunru ga wa giweku. Wa nalixjeru rupnamaka, ruwekanu. ²⁶ Pejnuruneko giwekachine nalixjene gi pagogneko rupnanna. ¿Gi ge palixlu tye?”

²⁷ Wane chinru, “Gigi, Gitsrukaachi. Nalixatka gita Pixni wa Kristoyi, Goyakalu Wgenyi, tyechijne ginachriyi.”

Geso chiyagata

²⁸ Tali wane chinretinitka, talimta. Pochkeroko tomgalo tepuro Mariya. Wane chinro, “Gewitkalu Yimaklewatachri. Repukyi.”

²⁹ Wala jeminitka, giyampotu tpalnamta. Tyayegitlu. ³⁰ Gi wa pokchi rapokawa Geso, seyni wa Marta yoptotapyawakaklu rawanata.

³¹ Giyagni Goteyone panchi gwanatachine walayma tumnanukanatjene, wa retinitkalona Mariya tunwamtinritka giyampotu, tushpkamktatka, romkagimtlona. Kagwakna wa yomlechi tyinripa wane chiyamtapinripa.

³² Giyagni Mariya tapyegitinitkalu Geso, tetinri, chiji tapokamta gjixistsi. Wane chinru, “Gitsrukaachi, gewi pwanatkamka, gimka rupnanni nyeg-wakluni.”

³³ Giyagni Geso wa retinro chiyagatachro, ga wa walayma ginachine Goteyone chiyaganatachine jigeukanuwata ginshinikanuya. Kojwakan-shinikanuta. ³⁴ Wane china, “¿Ginaka gitakanru?”

Wane chinruna, “Gitsrukaachi, punanu. Petapanru.”

³⁵ Chiyagata Geso. ³⁶ Giyagni wane chinna Goteyone, “¡Getanru! ¡Gi pagaluklenanukta rixlu!”

³⁷ Wanna pimrine wane china, “¿Gi ge rumkatlu wa Tye wa maygaletu gimrekgakakachri, gituukakletlu wale ma mupninitipa?”

Lasaro yotunkaaka

³⁸ Giyagni Geso jigeukanuwatnaka Walenanuko. Yomlechi yegi rapoka. Gitawakapnani, sotlu gishyatkaluru. ³⁹ Wane china Geso, “Gkoschekanru sotlu.”

Marta, wa gipnachri gepuro wane chinru, “Gitsrukaachi posunatkalu, gi rixanu gepkoxamkojognetkani.”

⁴⁰ Geso wane chinro, “¿Gi ge wane nchinyi, palixini petanru Goyakalu goyaknu?”

⁴¹ Giyagni koschekluna wa sotlu wa gipnachri gitakikowakaya. Wa Geso teno yigata. Wane china, “Nuru, npoyagnutyi Pixa yijnakotyawakno.

⁴² Numata pyijnakjetno. Seyni gixolune yine chinanu wa sajrukachine, wane nchina, wa ralixinripna Pixa yokanatyano.”

⁴³ Rali wane chinretinitka, saplewata. Tsru tokanu rixa, “Lasaroo, tekali. Pushpakanu.”

⁴⁴ Wa gipnanatachri rushpakatka, gostumyotkaluru, ga wa gjixi mkachrichrataya. Ga wa gigoji sapwakgojitia kasamalu.

Wane chinna Geso, “Gkaspukanru. Getasha yaletanru.”

Jemanshinikankakna ruylatyapluna Geso

⁴⁵ Giyagni gixo Goteyone wa Mariya yegi ginachine, ga wa Geso kamrutanru getachine ralixluna Wale. ⁴⁶ Wa wanna pimrine Gwariseyone yegi ya. Runkaakana wa Geso kamrutanrupirana. ⁴⁷ Giyagni wa tsrukakalune sasertotene ga wa Gwariseyone gapatjetna jemanshinikankakjetikwaka gajene. Wane chinna, “¿Gi wixanutka? Gi rixanu wa tye jeji kamrutlu gixo getkalurkaka. ⁴⁸ Wetasha wane gixletinri pejnuruneko galixanru. Runanna Romanone. Konanunwuna gawiywaka ga wa wgirukotlewatayawaka.”

⁴⁹ Wa Kaywasu, satu wannate, wale walapu sasertotene gitsrukate potu rixinri, wane chinna, “Gixa gike gimata. ⁵⁰ Gi waleko gyanshinikanuta wa rupxakyapwu wa satu jeji gipniripa yine chinanu, ma mamginitipna pejnuruneko yine.” ⁵¹ Gi wa waleko rushinikanu wane china, seyni wa sasertotene gitsrukate potu rixinri wale walapu, tokanchi reneklewata. Wane china wa Geso gipniripatka yine chinanu. ⁵² Gi wa wannanerupje chinanu, seyni koxa wanerutupje rapatyawakapna Goyakalu wgenene wa gipalanatachine. ⁵³ Giyagni walgogneyakawa jemanshinikankakna ruylatyapluna.

⁵⁴ Giyagni Geso gi wane yapatka pgujetanwaka Goteyonetskalaya, seyni wane yiyatka. Yineru mwiyawakanusti gwachijnetachri ya, satu pokchi Giprayi giwakatletachri. Wane rawanata yimakleneyma.

Yokanatkaluru kashichikolupa

⁵⁵ Wa Tsru Giknoglushgogne Goteyonenu gi gowukatkalu. Walesreta rush-pakyana gixo. Gerosale kanikna, Tsru Giknoglushgogne ma mapookanuwa, kpashirine rutakikolupna. ⁵⁶ Giyagni rujgaluna Geso. Kpashiwakapija tun-watachine wane chinkakna, “⁵⁷ Gi pixka getle gixlu? ⁵⁸ Gi wa meyiwatikwaka runanu?” ⁵⁷ Tsrukakalune sasertotene ga wa Gwariseyone yokanrewatna, wa katukokta gimata ginaka rawa, runkaklewatinripa wa kashichyapluna.

12

Ruyokjixitka Geso Wetaniya

¹ Giyagni patsrujirgogne magatiniwa Tsru Giknoglushgogne, Wetani rapoka Geso, wa Lasaro gwiywaka, wa gipnapachri wa yotunkakanru gipnachinetskalaya. ² Giyagni wane ralpokotaluna nachnewlupa. Marta gitspaprota. Lasaro walena ruxiplatjeru nikikowakaya. ³ Giyagni Mariya wa pgamlugalo ganikaji ginnu twapa, nartogapje kwenuru potu. Tuyokjixitlu Geso. Tsheyjixitlu tojiwutsaya. Psolupjiko tyapa pogamlunuta.

⁴ Satu yimakleru Gota Giskaryote, Simo wgene, wa samyokjerupa, wane china, ⁵ “⁵⁹ Klu chinanu gi tushankaka twu pgamlugalo wa mapa pachaproji chinanu, kwamonurunnimka teneeko?” ⁶ Gi wa retwamonutya chinanna wa kwamonurune, seyni gi rixanu kachowgurni wale. Sroschimapra ranika. Rawjetlu tsapatkaluru.

⁷ Giyagni Geso wane china, “Petashatanro. Nkapnatikolgogne chinanu tumretlo wa twu. ⁸ Gi rixanu wa kwamonurune gimwagognenata gixa, ga wa Gita gi wa gimwagognenatanu.”

Jemanshinikankakyegitluna Lasaro

⁹ Giyagni gixolune Goteyone gimata wa wane rawinri Wale. Gi wa Geso chinanupje runna, seyni Lasaro koxa retapinripna wa yotunkakanru gipnachinetskalaya. ¹⁰ Jemanshinikankakna tsrukakalune sasertotene, Lasaro koxa ruylatinripna. ¹¹ Gi rixanu wale chinanu gixo Goteyone wane ya. Ralixluna Geso.

Gerosale rapokinri gakaglokewatachri

¹² Waleprikgogne gixolune yine gina meyiwlü yegi, gi rixanu yijnakotluna Geso Gerosale yinripa. ¹³ Rawluna kasureru. Yoptotapluna. Saplewatna: *jPoyagnu!*

*jGiglenshinikanyegitkaluru Gitsrukaachi giwaka ginyachri,
Gisrayiline Pogire!*

¹⁴ Geso gikshiklu mporo. Waletji tuplata. Yonchi chinyawaka:

¹⁵ *Gi pikanu, Siyo nshicho.*

Petanru. Pogire gina,

mporo wgenetji tuplatachri.

¹⁶ Muchinanu yimaklene gi gimata jemu tyekakapirana, seyni royaknu jiglokinitka Geso, waneklu rushinkapluna tyekaka yonatkaluru Walepirana, ga wa wane rixluna tyekaka.

¹⁷ Giyagni wa gixolune Wale yegi gwanatachine, wanna gipgujtatlu tomgiyawaklu Lasaro kapnaya. Gipnachinetskalaya yotunkaklu. ¹⁸ Wale koxa chinanu yoptotapluna gixolune yine, gi rixanu jempiranyegitluna Wale getkaluru kamrutinri. ¹⁹ Giyagni Gwariseyone wannakakluko wane chinkaka, “Getlu. Gikegapri gkamruta. Getanru. Psolchijne gajeneko gwagajxigilu.”

“Waluka getletlu Geso”

²⁰ Kanikachine meyiwlü yoptsojityentapachinepaymana pimrine Kriykone. ²¹ Giyagni wa nyi gapyegitlu Wilipi, Wetsayta, Kalilesreta gajerununu. Ragjtluna. Wane chinruna, "Wumole, waluka getletlu Geso."

²² Wilipi ginkakaplu Gantirishi. Gantirishi ga wa Wilipi ginkaklu Geso. ²³ Geso gigitna. Wane china, "Nopapko gapokanu noyaknu njiglokinripa Gita, Yineru Wgenno. ²⁴ Galikakni, galikakni wane nchingi, Chiji ma mujrukini trikoji, ma mupnakanu, walepje gituka. Wa rupninina, gioxji rawini. ²⁵ Ruwekinri galukachri, ramginina ruwekinri, ga wa ruwekinri gayegixachri tyechijneya, wale gimretanru ruwekinripa giike rixiniko mnikawnakatupa. ²⁶ Satu kamrurewyegitinne, romkagitanne. Ginakpaktano, wane koxa rawanu nkamrurewyegitjeru. Satu kamrurewyegitinne, Nuru gitakanru kagwakpiratikolupa.

Yineru Wgene gimkata yotunkakletkota

²⁷ "Xani nkoyjwakanshnikanuta. ¿Gi nchinanu? ¿Nuru, pognetkakanno tyepapkoya? Seyni tye chinanukni tyepapkko nuna. ²⁸ Nuru, pgiwaka gimalwutikolupa Pixa chinanu."

Giyagni tengogne ruyakaty tokanchi, "Rumalwutikolutka Gita chinanu. Rumepe gimalwutikolupa Gita chinanupa."

²⁹ Giyagni wa gixolune wane gwanatachine, yijnakonatachine, wane chinna, "Rutlogleni."

Pimrine wane china, "Goyakalutowreru giynumsatlü."

³⁰ Rugita Geso. Wane china, "Gi wa Gita chinanni runa tye tokanchi, seyni gixa chinanu. ³¹ Xani ruklukanuwnayegixikolna tye psolchijne gajeneko. Xani tye psolchijne gajeneko gitsrukate, Satanasyo, giknookalurupni maleka. ³² Wa yotukinpatkanona chijiya, pejnuruneko nkosetanu Gita yegi." ³³ Wane china rumatkakyapna gi pixkalutu gipukchi rupnniripa.

³⁴ Giyagni rugitluna gixolune, "Wixa jemlu Tokanchi Yokanatkaluruya wa Kristo gwagogenatanu. ¿Gi pchinkoxge Pixa: 'Rumkata yotunkaakota Yineru Wgene?' ¿Gi gixachringe wa tye Yineru Wgene?"

³⁵ Giyagni Geso wane chinna, "Pshinitsonu gixa yegi rawanu pokamlalu. Pokamlalu waneyakopshingi gyananu, ma kashichkanupgi wa mapshagal. Wa mapshagwaka yanachri gi wa rumata ginakakta ya.

Goteylene malixle

³⁶ "Pokamlalu waneyakopshingi galixanru pokamlalu, wa pokamlalu wgenene gixinripa." Walekakapirana yanumsata Geso. Ralimta. Yogi-matyana.

³⁷ Gixomka getkaluru kamrugetanutna. Gi ralixluna Wale, ³⁸ poyagkakikolupa wa tokanchi Gisayiya tokanchi geneklewatachri chinyawaka:

Gitsrukaachi, ¿katu galixlu wunkakletanru?

¿Katu gekakgitka wa Gitsrukaachimyo?

³⁹ Wale chinanu gi rumkata galixletna, gi rixanu rumepe wane chinrettanaka Gisayiya:

40 Maygalene rixkakna.

Shikowgajkakna.

Giygaleyna ma metinitipna.

Ma mumata jemgajitinipna ma kashrijetikotupna.

Nma mutskalakyanupna.

⁴¹ Tyekaka chinjeta Gisayiya wa retinri wa royaknu, Walepirana ruynumsatinri.

⁴² Wane gixkamka, seyni wa tsrukakaluneko gixo galixlu Wale, seyni wa Gwariseyone chinanu gi wa rupgujtatluna, ginkaklewakapji ma mu-knokotupuna. ⁴³ Gi rixanu ralukpotutluna yine gimalwure Goyakalu gimal-wure pnupe.

Geso tokanu giklukanuwnakaklewatinri

⁴⁴ Saplewata Geso. Wane china, “Nalixjeru gi Gita ralixa seyni wa nyokanatjeru galikaka. ⁴⁵ Wa netjeru retkoxlu wa nyokanatjeru. ⁴⁶ Gitni pokamlalno tye chiji ginachrino wa pejnuruneko nalixjene mapshagwaka mawinitipna.

⁴⁷ “Satu jeminri ntokanu, gi wa ralixanru, gi wa Gita giklukanuwnayegjix-anru. Gi rixanu gi wa nuna nuklukanuwnayegjixyapna tyechijne gajene, seyni nognetkakyapna tyechijne gajene. ⁴⁸ Nuknokjeru, gi wa yopto-tokanutno, waneru wa ruklukanuwnayegjixjerupa. Wa tokanchi nunkak-letanru, wale giklukanuwnakakanru ralipregognepa. ⁴⁹ Gi rixanu gi wa Gitako nushinikanu nunkaklewata, seyni wa nyokanatjeru Girchi, Wale yokanatno wane nchinyawakapa, ga wa nunkakletanrupa. ⁵⁰ Numatlu Wale yokanatyawaka Walenwa giweklu gike rixiniko mnikawnakatu. Giyagni wa Gita ginkakletanru wa Girchi chinyawakno, wane nchina ginkakleta.”

13

Geso gerkajixitna yimaklene

¹ Ma mapookanuwa meyiwlü Tsru Giknoglushgogne, rumata Geso wa gipapko gapokinritka, tyechijne rushpakinripatka, Girchi yegi yinri-patka. Wane rixa gishinikletna Walenune tyechijne gwanatachine, yoptukyawakpotuko rushinikna.

² Rali nachineletinitkana kamchi gajitletkakatkalu Gota, wa Simo Giskaryote wgene, samyokyapatkalu. ³ Rumata Geso wa Girchi genekyalu pejnurkakako, ga wa Goyakalu yegi giyakatyachri, ga wa Goyakalu yegi ya. ⁴ Palnatka nachnewluyegiya. Komkaga. Sheyipisama rawa. Saprikapchijitnawa. ⁵ Wanepnute gerkapi rutakgatlu gonu. Yinuwaka gerkajixletna yimaklene. Sheyipisama saprikapchijitanruya sheityana.

⁶ Giyagni Simo Petro yegi runini, Petro wane chinru, “Gitsrukaachi, ¿Pixlege gerkajxitanno?”

⁷ Rugita Geso. Wane chinru, “Wa Gita kamrutanru, gi wa xani pumata jemu. Wa gowukshiniyaka pumata jemanru.”

⁸ Wane chinru Petro, “Gike pixiniko perkajxitanno.”

Geso digitlu, “Nma merkakanyi maleshayapyi Gitanuya.”

⁹ Wane chinru Simo Petro, “Gitsrukaachi, gi wa nojixipje, seyni nomyo koxa ga wa nojiwu koxa.”

¹⁰ Wane chinru Geso, “Wa gerkkalurutka, gi wa magatatka. Satupjetkalu wa gjixipje gerkako, seyni psoluyako powratka. Ga wa gixa powralungi, seyni gi wa pejnurunekgi.” ¹¹ Gi rixanu rumatlu samyokjerupa. Giyagni wane china, “Gi wa pejnurunekgi powra.”

Gyimanrupa nekakgitgi

¹² Giyagni rali gerkajixletinitkana, wa rawamkatinitka, tuplatatnaka nikikowakaya. Wane chinna, “¿Gi ge gimatlu wa nixyawakgi? ¹³ Gixa wane chinjetno, ‘Yimaklewatachri ga wa Gitsrukaachi.’ Wanepotuko nchina, gi rixanu Gitakni. ¹⁴ Maka Gita wa Gitsrukaachino ga wa Yimaklewatachrimo nerka jixitgi, gixa koxa gimkata gerkajixkakleta. ¹⁵ Gi rixanu gyimanrupa nekakgitgi, gixa koxa kamrutyaplu nkamrutyagi. ¹⁶ Galikakni, galikakni

wane nchingi, wa wayegrechri gi wa rutsrukate pnute tsruni wale. Wa yokanatkaluru gi wa yokanatjeru pnute tsruni wale. ¹⁷ Tyekaka gimatin, gulglenshinikanyegitkalunepgi wa wane gixinipa.

¹⁸ “Gi wa pejnrunekegi gixapirana wane nchina. Gita gimatna ginnanwa ntsomitanune, seyni poyagkaakalurupa satu tokanchi yonatkaluru, wane chinachri: *Wa Gitayma jimapro nikachri rumtukno yokwireya.*

¹⁹ “Xanigognenanu nunkakgi ma mapookanuwa, wa rapokinipa galix-anno Gita nixinri. ²⁰ Galikakni, galikakni wane nchingi, wa nyokanatnru yoptotachri Gita yoptota. Ga wa Gita yoptotachri nyokanatjeru yoptota.”

Geso ginkakletlu wa satuyimaklerni wa samyokerupa

²¹ Wane chininitka Geso, kojwakanshikanuta. Rupgujtalewata. Wane china, “Galikakni, galikakni wane nchingi, satu gixa nchiniri wale samyokanno.”

²² Giyagni yimaklene getjekaka. Gi rumatanshinikanutna katupiranni wane china. ²³ Waneru satu yimakleru Geso gishinikanru, Geso gitspanostatachri. ²⁴ Giyagni Simo Petro gitnoyegitlu tye, wa repomgiyaplu katupiranni wane china. ²⁵ Geso gitspanostatachri wane chinru, “Gitsrukaachi, ¿katni wale?”

²⁶ Giyagni rugita Geso, “Waleni Gita genekanrupa psoji gigakachri.” Wale gigaku psoji. Reneklu Gota Giskaryote, wa Simo wgene. ²⁷ Psoji niklokinitka, Satanasyo jiglokatku.

Giyagni Geso wane chinru, “Pkamrutanru giyampotu pkamrutanru.”

²⁸ Gi satuna nikikowakaya tuplanatachine gimata klu chinanu wane chinru. ²⁹ Gi rixanu pimrine kagwaklu wa Gota ktsapane rixinri, Geso wane chinru, “Pagjitanru wa walukanru meyiwlw chinanu, waka kwamonurune renekanu pagixanu.” ³⁰ Giyagni wale yoptotinitkalu psoji, waneklu rush-pakamtatka. Goyechnotkani.

Gerotu yokanru

³¹ Giyagni rushpakamtinitka, wane china Geso, “Xanitkani njiglokanutka noyaknu Gita Yineru Wgenno. Ga wa Goyakalu gimalwutikolpatka Gita chinanu. ³² Goyakalu gimalwutikolupa Gita chinanu, Goyakalu chinanu koxa Gita gimalwutikolupa. Xaniyakawa numalwutikolupa Goyakalu chinanu.

³³ “Wiwine, pshinitsonu numwanutkagi. Gijganmakno. Wa Goteyone nchinyawaka, wa nyiyawakapa Gita, gixa gi gimkata wane yaletanu. Wane koxa nchingi gixa xani.

³⁴ “Satu yokanru gerotu nenekgi, wa gishiniikakinripa. Gita gishinikinikopixkagi, waneko pixka gixa gishiniikakletanu. ³⁵ Wale chinanu pejnrunekeo gimatanu gixni wa nyimaklengi, wa gixkakluko gishiniikakinripa.”

Geso ginkakletagnaputlu Petro nutatinripa

³⁶ Simo Petro wane chinru, “Gitsrukaachi, ¿ginaka pyanu?”

Geso gigitlu, “Wa nyiyawakapa Gita gi pumkata gomkagletanno wa xani. Wa gowukshini pomkagitanno.”

³⁷ Petro wane chinru, “Gitsrukaachi, ¿klu chinanu gi numkata gomkagle-tanyi wa xani? Pixa chinanu nutakanru nuwekinri.”

³⁸ Geso gigitlu, “¿Gita chinanu putakanru puwekinri? Galikakni, galikakni, wane nchinyi, ma yanumatkanuwa gaxawripa, mapa kata pnutatanno.”

14

Gatnugapo, ga wa tokanchi galikakpotu, ga wa giweklu

¹ “Gi gkojwakanshnikangajitinha. Galixlu Goyakalu. Galixankoxno Gita.
² Nurupji gixo gwirkwaka wane. Wane ma mixkanumka, nunkakanmakgi. Giyagni nyanuchi. Nalpoktapingi gwiyawakapa gixanupa. ³ Nyinpatka, nalpokotiniplu gwikowakapa gixanupa, nunanutnaka. Gitako gwapanutkagi. Nwiyawaka koxa Gita, wane koxa gwanu gixa. ⁴ Gimatlú ginaka nyanu. Gimatgapotlu.”

⁵ Tomasu wane chinru, “Gitsrukaachi, gi wumata ginaka pyanu. ¿Gi wixpoko gimatletanu wa gatnugapo?”

⁶ Geso wane chinru, “Gitni wa gatnugapo, ga wa tokanchi galikakpotu, ga wa giweklu. Gike yayegitlu Girchi, seyni Gitapje chinanu yayegitlu Girchi.
⁷ Gimatinno, Nuru koxa gimatanu. Xaniyakawa gimatlú. Getatkalu.”

Pekakgitanwu wa Girchi

⁸ Wilipi wane chinru, “Gitsrukaachi, pekakgitanwu wa Girchi. Poyagota wixa chinanu.”

⁹ Geso wane chinru, “Gi pomshniko numwatkagi, ¿gi ge pumatno, Wilipi? Wa netjeru retkoxlu Girchi. ¿Gi pchinkoxge pixa, ‘Pekakgitanwu Girchi?’

¹⁰ ¿Gi ge palixno wa Gita Girchi nwinri, ga wa Girchi Gita rawa? Wa tokanchi nunkayagi, gi wa Gitako nonshnikanu wane nchinna. Seyni wa Girchi Gita gwachri Wale kamrutlu wa kamrurchikaka. ¹¹ Galixanno Girchi nwinri, ga wa Girchi Gita rawa. Gma wane gixkanupa, galixanno kamrurchiyako.

Kamruchi tyekaka pnuute

¹² “Galikakni, galikakni wane nchingi, wa kamruchikaka nkamrutanru nalixjeru koxa kamrutanru. Ga wa tyekaka pnuute kamrutanu nalixjeru, gi rixanu Girchi yegi nyanu. ¹³ Klunerukokta gagitanru Girchi ngiwakaya, wale nkamrutanu, Girchi gimalwutikolupa Gituru chinanu.
¹⁴ Klunerukokta gagitipiña ngiwakaya, Gita kamrutanru.

Giwekkaluru Kpashiri gipiratkaluru

¹⁵ “Gishinikinipno gkamrutanru nyokanatanrukaka. ¹⁶ Gita gagitanru Girchi ga wa satu Kgimnanukakleru renekangi, gixa yegi gwagognenat-achripa. ¹⁷ Walenwa Giwekkaluru galikakpotunaru. Wale tyechijne gajene gi gimkata yoptoletanru, gi rixanu gi retluna. Gi koxa rumatluna. Gixa gimatlú gi rixanu gixa yegi rawa, ga wa gixa gitokote rawanu.

Kristo gipgujewiniri

¹⁸ “Gi wa murungi nuknokamtanu. Nyayegitangi. ¹⁹ Pshinitsonu tyechijne gajene gi getanutkano, ga wa gixa getanno, gi rixanu Gita giweka, ga wa gixa koxa giwekanu. ²⁰ Walegogne gimatanu wa Girchi nwinri, ga wa Gita gwa gixa, ga wa gixa nwa Gita. ²¹ Nyokanrekaka waneyalutu, ga wa wale kamrutzachri, walenwa nushinikjeru. Nushinikjeru Nuru gishinikanrupa. Gita gishinikanru. Nupgujetinwa wale yegi.”

²² Gota gi wa Giskaryotni wale, wane chinru, “Gitsrukaachi, ¿klunerni wa tye wa wixa yegi pupgujetinwa, gi wa tye psolchijne gajeneko yegi?”

²³ Geso gigitlu. Wane chinru, “Girukokta gishinikinipno rumretatokanuttano. Nuru gishinikanru wale. Wale yegi gayanu. Wale yineru yegi gawgognenatanu. ²⁴ Nma mushinikjetu gi gimretanru ntokanu. Ga wa tokanchi gyijnakotanru gi wa Gitanni, seyni Girchi wa nyokanatjeru tokanni.

Giglewanshnikanru nuknokyegimtgi

²⁵ “Tyekaka nunkakgi gixa yegi nwanatini. ²⁶ Wa Kgimnanukakleru, Giweikaluru Kpashiri, wa Girchi yokanatanru Gita giwakaya, Wale gimatkakangi pejnurukopirana. Rushiniikakangi pejnurupiranako nunkakyagi. ²⁷ Giglewanshinikanru nuknokyegimtgi. Nuglenunshinikanu nenekgi. Gi wa tyechijne gajene genekle pixka, Gita genekyagi. Gi wa gkojwakanshinikanutinwa. Gi wa kpikelegolunepgi.

²⁸ “Giyjnakotlu wa nunkakyawakgi: ‘Nyanu, ga wa nunanutnaka gixa yegi.’ Gishinikinipno, gimuwanatanmaka, gi rixanu wane nchina, Girchi yegi nyanu. Gi rixanu Girchinwa Gita pnute tsru. ²⁹ Ga wa xani nunkakatkagi ma mapookanuwa, wa wane rixinpatka galixinripa. ³⁰ Gi wa gixo potu nuynumsatanutkagi, gi rixanu runatka kamchi, tyechijne gitsrukate. Gike waneylu wa Gitaya. ³¹ Seyni rumatinripna tyechijne gajene Girchi nushinikinri, ga wa Girchi yokanatyawakno wane nixa kamrureta.

“Ntunwatanu. Gewi gayinitka.

15

Geso ginkakna Gowatsa galikakpotupirana

¹ “Gitni wa gowatsno galikakpotu. Nurni wa kgisanateru. ² Pejnuruko giplutsa Gita gwachri, gi kajru, Wale konanru. Ga wa pejnuruko kajiru Wale powratanru jiwpotutinripatka. ³ Ga wa gixa powralunetkagi tokanchi chinanu wa nunkakyagi. ⁴ Gita gwanu gixa. Gixa nwanu Gita. Wa giplutsa pixka gi rumkata gwaleta walenanuko, wa gowatsa mwakatu rixini, waneko pixka gixa, Gita gmawakanu.

⁵ “Gitni wa gowatsno. Gixni wa giplutsa. Gita gwachri, wa wale nwini Gita, wale gixoji gwiylu. Gi rixanu Gita mwakatu gike gimkata kamrureta gixa. ⁶ Girukta gi gwinno, maleka giknockalurupa wa giplutsa pixka. Rupriganu. Rawanruna. Xirnachri ruknokanruna, ga wa xirnanu. ⁷ Gita gwini. Gixa rawini ntokanu, galukanru pejnunanuka gagjitanu. Waneyapgi. ⁸ Waleyra rumalwutika Nuru, wa gixa gixo Wale kamrure gwinri. Wane gixinipa nyimaklenepgi.

⁹ “Girchi gishinikinikopixkano, wane nixa gishinikletgi. Nushiniklelle gomkagitanu. ¹⁰ Gkamrutiniplu nyokanrekaka nushiniklelle gomkagita. Gita pixka Nuru yokanrekaka nkamruta ga wa rushiniklelle nomkagita. ¹¹ Tyepirana nunkakgi, numuwle waneyapgi, ga wa gixa gimuwlle tseruw-napotutinripa.

Geso ginkakna wa gikena waneya rushiniklelle tye pnute tsru

¹² “Tyenwa nyokanre, wa gishiniikakinripa, Gita gishinikinikopixkagi. ¹³ Gikena waneya rushiniklelle tye pnute tsru, wa rutakyaplru wek-inri rumatanune chinanu. ¹⁴ Gixni wa numatanungi wa gkamrutinri nyokanatyagi. ¹⁵ Gi wa wayegrechne nchinanutkagi, gi rixanu wa wayegrechri gi rumata kluneru kamruta wa rutsrukate. Seyni numatanune nchinatkagi, gi rixanu ptowrukakapirana nyijnakotanru Nuru yegi, numatkagi. ¹⁶ Gi wa gixa tsomitno Gita, seyni Gita tsomitgi gixa. Nutakgi gyin-ripa, kiglerkaka gkamrutinripa, ga wa gkamrutanrupa gwagognenatinripa, wa klunerukokta gagjityaplu Girchi ngiwakaya Wale genekangi. ¹⁷ Tyenwa nyokanyeitgi, gishiniikakinripa.

Geso galipre ginkaklewleta

¹⁸ “Tyechijne gajene gayegixinipgi, gimatanru Gita gapka rayegixna ma mayegixkanuwagina gixa. ¹⁹ Tyechijne gajene gixkamka, tyechijne gajene galukmakna wannanune. Seyni gi rixanu gi wa tyechijne gajengi ga wa Gita

tsomitgi tyechijneya, giyagni rayegixgina tyechijne gajene. ²⁰ Gishinikanru wa tokanchi wa nchinayagi: Wayegrechri gi wa rutsrukate pnute tsruni. Gitpotuko kojwakinikana, kojwankoxgina gixa. Wa ntokanu rumretkamkana, gixanu koxa rumrettana. ²¹ Seyni wa tye pejnunanuna kamrutingina ngiwaka chinanu, gi rixanu gi rumatluna wa nyokanatjeru. ²² Nuna. Nunkaklewywgita gkojwakjenepa. Nma munkanumka, gimka nunkaklewyegitanna, gimka kmukochirepna, seyni nunkakna. Giyagni xani maleshayna rushyamukochiretinrina. ²³ Nayegixjeru Nuru koxa rayegixa. ²⁴ Wane nma mixkanupa wanna yegi, satu mkamrutanutu, gimka waneyapna mukochirna. Ga wa xani Gita koxa ga wa Nuru koxa retna. Rayegixnona Gita ga Nuru koxa. ²⁵ Seyni poyagkakikolupa yonchi chinyawaka Tokanchi Yukanatkaturuya wannanu: *Gike chinanu rayegixnona*.

²⁶ “Ga wa runanu Kgimnanukakleru, Wale Girchi yegi nyokanegetangi, wa Giwekkaluru galikakpotu, wa Girchi yegi gishpakyachri. Wa runinipa, Wale gipguitatanno. ²⁷ Wa gixa koxa gipguitalewatanu gi rixanu nyinuwakinyakawa gimwano.

16

Geso gomkagi ginkaklewleta

¹ “Tyekaka nunkakgi gma pupjetinitipa. ² Ginkaklewakapjikaka gi-knokikolupa. Runanu gipapko wa katukokta giylatangi kagwakanru Goyakalu chinanu kamrurewatirin. ³ Tyekaka kamrutingina gi rixanu gi rumatluna Girchi, gi wa Gitako. ⁴ Seyni wa tyekaka nunkakgi, wa rapokinipa walepapko gishinkapanru wa wane nchinayagi. Seyni tyekaka gi nunkakgi muchinanu, gi rixanu gixa yegi nwa. ⁵ Ga wa xani nyokanatjeru yegi nyanutka, ga wa gixa gi satuna gepomgano, ‘Ginaka pyanu?’ ⁶ Seyni gi rixanu nunkakgi tyekakapirana gwamonnu mpachikgajita.

Giwekkaluru Kpashiri kamrurepirana runkakleta Geso

⁷ “Seyni galikaka nunkakgi gipxakikolupni nyinripa, gi rixanu wane nma yakanu Kgimnanukakleru gi ginanmaka gixa yegi. Ga wa Gita wane yinipa, Wale nyokanegetangi. ⁸ Wa Kgimnanukakleru gininipa rushinikanutanna tyechijne gajene mukochripirana, ga wa poyagkaklewlpurana, ga wa giklukanuwlupirana. ⁹ Mukochripirana galikaka rushinikanutanna, gi rixanu gi ralixnona Gita. ¹⁰ Wa poyagkaklewlpurana rushinikanutanna, gi rixanu Girchi yegi nyanu. Gi wa getanutkano. ¹¹ Ga wa giklukanuwlupirana rushinikanutanna, gi rixanu tyechijne gitsrukate giklukanuwnayegjikalrupa.

Galikaka potu Giwekkalurupirana runkakleta Geso

¹² “Gi gepika waneyawano nunkakyapgi, seyni xani gi gimkata kashnantalettu. ¹³ Wa runinipa galikaka potu Giwekkaluru Wale kosekangi pejnuruko Galikakpotunanu Tokanchi yegi. Gi rixanu gi Waleko rushinikanu runkakletanu, seyni wa yijnakotyalu pejnunanuka runkakletanu. Runkakangi ginachrikakapapirana. ¹⁴ Wale chinanu numalwutikolupa, gi rixanu Gitanu rawanu. Walepirana runkakangi. ¹⁵ Klunerukta Girchinu walekoxni Gitanu. Giyagni wane nchina wa Gitanu rawini, runkakangi.

Gwamonnu gimuwlux gixkalurupni, china Geso

¹⁶ “Pshinitsonu gi getanutkano. Wanepnute pshinitsonu, getanutnakno.” ¹⁷ Giyagni wane chinkakna pimrine yimaklene,

“*¿Klunerni wa tye wa wane chinyawu, ‘Pshinitsonu gi getanutkano. Wanepnute pshinitsonu getanutnakno.’* Ga wa ‘gi rixanu Girchi yegi nyanutka?’”

¹⁸ Giyagni wane chinna, “*¿Klunerni china, wa ‘pshinitsonu?’* Gi wumata jemlu wa wane chinre.”

¹⁹ Rumata Geso raluka gepomgaletyaluna. Wane chinna, “*¿Gixkakluko gepomgakaka wane nchininri, ‘Pshinitsonu gi getanutkano. Wanepnute pshinitsonu, getanutnakno?’*” ²⁰ Galikakni, galikakni wane nchingi, wa gixapa chiyagatanu, ga wa gwamonuwatanu. Tyechijne gajene gimuwatanu. Gixa gwamonuwatanu, seyni gwamonnu gimuwlu gixkalurupni. ²¹ Wa suxo tushpakawugenetini, kachinolu tetu gi rixanu rapokatka topapko. Wa rushpakinitka mturu gi wa tushinikatkalu tsalewninrinanu, tumuwle chinanu wa tyechijne rushpakinriyatka satu yineru. ²² Giyagni xani gixa koxa galikakni kachinolu geta. Seyni netanutnakgi ga wa gimuwgajitanu. Gikeko koningi gimuwle. ²³ Walegognepa gike gagitanno gixa. Galikakni, galikakni wane nchingi, klunerukokta gagitanru Girchi ngiwakaya Wale genekangi. ²⁴ Xanigognenanu gike gagitawa ngiwakaya. Gagitanru ga wa gyoptotanru tseruwninripa gimuwle.

“Girchi yegi nyanutka,” china Geso

²⁵ “Tyekaka yapkaklu tokanchiya nunkakgi. Wa gipapko ginanu, gi wa yapkaklu tokanchiya nunkakangi. Seyni pgujetanwaka nunkakangi Girchipirana. ²⁶ Walegogne gixa gagitanu ngiwakaya. Gi wane nchingi Gita gagitanru Girchi gixa chinanupa. ²⁷ Gi rixanu Girchiko galukgi gi rixanu gixa galukno, ga wa galixno Goyakalu yegi tuyakaty. ²⁸ Girchi yegi nushpkamtya. Tyechijne nuna. Nuknokamtanutnaklu tyechijne. Girchi yegi nyanutka.”

“Gita gaalixaplu tye psolchijneko,” china Geso

²⁹ Wane chinruna yimaklene, “Petanu. Xani pgujetanuwaka pchina yanumsaleta. Gi satuna yapkaklu pchina. ³⁰ Xawakni wumata Pixa gimatlu ptowrunanuka. Gi pmaga gepomgakota. Tye chinanu walixa Goyakalu yegi tuyakaty.”

³¹ Rigitna Geso, “*¿Xawakni galixge?*” ³² Gipapko ginanu, runatka, gitspalkakanu. Satkaka rawyawaka yantu. Gitapje giknokamtanu. Seyni gi Gitapjeni, gi rixanu Gitaymalu Girchi.

³³ “Tyekaka nunkakgi waneygi nchininripa gglewanshinikanru Gita chinanu. Tyechijne waneyapgi salewakchi. Seyni kiglenshinikanupgi. Gita gaalixaplu tye psolchijneko.”

17

Geso gagjigognere

¹ Tyekaka wane china Geso. Teno yigata. Wane china, “Nuru, nopalpo gapokatka. Puturu gimalwutikolupa Pixa chinanu, wa Pixa koxa gimalwutikolupa Puturu chinanu. ² Wane pixa gitakletno pejnurune yine chinanu, wa pejnuruneko penekyano, Gita genekyapna ruwekinrina gike rixiniko mnikawnakatupa. ³ Tyenwa giweklu gike rixiniko mnikawnakatu, wa rumatyappyina, satupjeru Goyakalu galikakpotunanu, ga wa Geso Kristo wa pyokanatanrungo. ⁴ Gita chinanu pumalwutikolutka tyechijneya. Nnikatatkalu kamrurchi penekyano nkamrutyaplu. ⁵ Ga wa xani, Nuru, penekanno noyaknu, wa Pixastsi nwini noyaknunanu tye psolchijneko mawanatkanuwa.

Geso gagjigogneyegitna yimaklene

⁶ “Wa nyi yine tyechijne gajene penekyano, nekakgigiwakatyi. Pixanune, ga wa Gita penekatka. Rumretatokanutyina. ⁷ Xawakni rumatatkaluna pejnurkakako penekyano Pixa ruyakaty. ⁸ Gi rixanu wa tokanchi wa penekyano, nenenkatkana. Yoptotatkaluna. Rumatatkaluna galikakpotunau Pixa yegi nuyakatinri. Ga wa ralixna Pixa yokanatyano. ⁹ Wanna chinanu nagjita. Gi wa tye psolchijne gajeneko chinanu nagjita, seyni penekyano chinanu, gi rixanu Pixanunni. ¹⁰ Wa pejnuruko wane nixle, Pixa wane gixleni. Pixa wane gixle Gitankoxni. Gimbalutkalurno waleya. ¹¹ Gi wa tyechijnetkano, ga wa wanna tyechijne gwawa. Pixa yegi nyanu Gita. Nuru kpashiri, pgiwakaya pumretanna wa penekyano, satupjerune rixinripna, Wixa pixka. ¹² Wanna yegi nwanatini, Gita gimretanatna pgiwakaya. Wa penekyano numretanatna. Gi satuna gamgiyna wanna, seyni kamchi jiglokanrunapjeni gamgana, poyagkakikolupa wa yonatkaluru.

¹³ “Ga wa xani Pixa yegi nya, ga wa tye wane nchina tyechijneya, waneyna rixinripna numuwle tseruwnapotutachri. ¹⁴ Gita genekna ptokanu, ga wa tyechijne gajene gayegixna, gi rixanu gi wa tyechijne gajenni, Gitako pixka, gi wa tyechijne gajerno. ¹⁵ Gi wa nagjita wa Pixa gwapyapna tyechijneya, seyni Pixa girukotyapna mugletuya. ¹⁶ Gi wa tyechijne gajenni, Gita pixka; gi wa tyechijne gajerno. ¹⁷ Kpashirine pixkakanna galikaka potu ptokanuya. Galikakpotni ptokanu. ¹⁸ Wa tye psolchijneko Pixa yokanatno, waneko pixka nixa tye psolchijneko yokanretna. ¹⁹ Wanna chinanu Gitinanuko kpashiri nixnawa, kpashirine rixinrikoxapna wanna galikaka potu tokanchiya.

Geso gagjigogneyegitna gapatachinenpa

²⁰ “Gi wannapje chinanu nagjita, seyni koxa wa nalixjenepa wanna tokanu chinanu. ²¹ Satupjerune rixinripna pejnuruneko, Pixa pixka, Nuru, Gita pwinri, ga wa Gita Pixa nwinri; wanna koxa satupjerunepa Wixa rawinripna, wa tyechijne gajene galixinripa Pixa yokanatyano. ²² Wa noyaknu penekyano, wale nenenkatkana. Wa satupjerune rixinripna, Wixa pixka satupjerunwu. ²³ Wanna nwinri Gita ga wa Pixa Gita pwinri, satupjerune rixpotutinripna, wa tye psolchijneko gajene gimatirripa Pixa yokanatyano, ga wa pushinikyana Gita pushinikiniko pixka.

²⁴ “Nuru, wa wanna penekyano naluklu ginakaktanwa Gita, wanna koxa Gita yegi gwanu, wa retyapluna noyaknu penekyano. Gi rixanu Pixa gishinikno tyechijne ma mutaakanuwu.

²⁵ “Nuru poyagkakachri, tyechijne gajene gi gimatyi, seyni Gita gimatyi. Ga wa nyi gimatwa Pixa yokanatyano. ²⁶ Gita gimatkakna pgiwaka, ga wa numatkakanna, wa gishiniklewlu wa pushinikyano wanna rawinripa, ga wa wanna nwinripa.”

18

Geso samyookaluru ga wa kashichkaluru

¹ Wane chininitka Geso, yatka yimakleneyma. Setro Gapga wakanute yatka, wa sana gwiywaka. Geso jiglokamtu sana yimakleneyma.

² Ga wa Gota koxa wa samyokjerupa rumatlu sana. Gi rixanu gixo kata wane rapatjetyana Geso ga wa yimakleneyma. ³ Giyagni Gota ganikna solalone, wa tsrukakalune sasertotene ga wa Gwariseyonetowrerune. Wane yana yochpiikaluroyma, kataluyma, giylalewapiyma.

⁴ Giyagni Geso gimatlou ptowrunanuka wa ruknogjerupa. Potukle ya. Wane chinna, “¿Katu gijga?”

⁵ Rugitluna, “Geso, Nasare gajeru.”
Wane chinna Wale, “Gitni.”

Wannaymakoxlu Gota samyokjeru. ⁶ “Gitni,” chinanna Geso, ruxririkamtanna. Nakgamtanna.

⁷ Giyagni rumepe gepomgaletatnakna, “¿Katu gijga?”
Wanna wane china, “Geso Nasare gajeru.”

⁸ Rugita Geso, “Nunkakatkagi Gitni. Giyagni Gita gjigjini getasha yaletanna nyi,” ⁹ poyagkakikolupa tokanchi Wale chinyawaka, “Wa penekyano, gi satuna gamgiyno.”

¹⁰ Giyagni Simo Petro kyoglolewareru, koshpaku. Rustaklu sasertotene gitsrukate potu wayegreru, ga wa rustakjepitlu. Potuklejepi rustakyulu. Wayegrechri giwaka Malko.

¹¹ Giyagni Geso wane chinru, “Petro, gipata pyoshmakanru yoglolewapi. Wa Girchi genekyano wa girapistono, ¿gi ge nurinro?” Wane china salewnalepapirana.

Geso Ganasa yegi

¹² Giyagni solalone, ga wa ksolaloteru, ga wa Goteyonetowrerune, wanna kashichlu Geso. Rostutluna. ¹³ Ganasa yegi gapka ranikluna. Gi rixanu Kaygwasu gimatjirni. Walenwa wale walapu sasertotene gitsrukapatpotu. ¹⁴ Walenwa Kaygwasu wa Goteylene giykotachri, wa wane chinachri wa rupxakyapna wa satu jeji gipniripa yine chinanu.

Sasertotene gitsrukate potu gipomgalu Petro

¹⁵ Simo Petro gomkagitlu Geso, ga wa satu yimakleru. Wa tye yimakleru rumata sasertotene gitsrukapatpotu. Gesoyma jigloklu sasertotene gitsrukapatupji. ¹⁶ Maleka, gipgyaptostsi rawanata Petro. Giyagni rushpaka wa satu yimakleru wa sasertotene gitsrukate potu gimatanru. Ruynumsatlo gipgyapto gajero. Gitoko raniklu Petro.

¹⁷ Giyagni wa gipxaklewatachro gipgyapto gajero wane chinru Petro, “¿Gi ge tye jeji yimakleroxyi pixa?”

Wale wane china, “Gi wa gitni.”

¹⁸ Wane tunwanatna wayegrechne ga wa towrechne, yoshikpawatachine. Gi rixanu kachikleru. Rolkana. Petro koxa wannastsi tunwata. Rolka koxa wale.

Sasertotene gitsrukate potu gipomgalu Geso

¹⁹ Giyagni wa sasertotene gitsrukate potu gipomgalu Geso, yimaklenepiranaya, ga wa runkaklewleya. ²⁰ Geso gigitlu, “Pgugjetanuwaka potu nchnina yanumsayegletna psolchijneko gajene. Gita ginkaklewjeta ginkakklewakapjiya, wa rapatjejetyawakna pejinuruneko Goteylene. Gi wa yogimawakako nunkaklewatyat. ²¹ ¿Klu pepomgiyno Gita? Pepomganna wa yijnakotachine wa nchinhyawakna. Petanu. Wanna gimata wa nchinhyawaka.”

²² Wa wane chininitka, satu towrechri wane tunwanatachri giptagojitu Geso. Wane china, “¿Wane pixa gigletlu sasertotene gitsrukate potu?”

²³ Rugitlu Geso, “Wa gektutu nyanumsatini, pupgugjetanru gektutu, ga wa kigleru, ¿klu chinanu puylakno?”

²⁴ Giyagni sasertotene gitsrukate potu Kaygwasu yegi yokanatlu Ganasu gostutkaluru.

Petro nutatlu Geso

²⁵ Wa Simo Petro tunwa golkalenatachri. Wane chinruna, “¿Gi ge satu yimaklerkoxyi pixa?”

Wale nutata. Wane china, “Gi wa gitni.”

²⁶ Satu sasertotene gitsrukate potu wayegreru, wa Petro gistakjepmole-tanru, wane chinru, “¿Gi ge sana netyayi Waleyma?”

²⁷ Giyagni rumepe nutletatnaklu Petro. Waneklu yanumatatka gax-awripa.

Geso Pilato yegi

²⁸ Giyagni Kaygwasu yegi ranikyatkaluna Geso. Tsrupji, Pretoryopji ranikluna. Goyechnokawni. Wannako gi jigloklu Pretoryopji ma puchown-inripan, seyni wa Tsru Giknoglushgogne nachnewlu nikitripna. ²⁹ Giyagni maleka rushpakyegitna Pilato. Wane china, “¿Klu gjijgyegitlu tye jeji?”

³⁰ Rugitluna. Wane chinruna, “Gektutu ma kamrutkanumka wa Tye, gimka wsamyokanyi.”

³¹ Giyagni Pilato wane chinna, “Ganikanru gixa. Giklukanuwnayegjix-anru Tokanchi Yukanatkulu gixanu chinyawaka.”

Wane chinruna Goteyone, “Ginanshichkaluru wuylatyaplu satu.” ³² Wane rixa wa poyakkakikolupa Geso wane chinre, wa rumatkakyana gi pixkalutu gipukchi rupniripa.

Pilato gepomgalu Geso

³³ Giyagni Pilato rumepe jiglokletlu Pretoryopji. Tomsatlu Geso. Wane chinru, “¿Pixni Goteyone Pogiryi?”

³⁴ Rugita Geso, “¿Pixako pushinikanrerge wane pchina, waka pimrinra ginkakyi wa Gitaya?”

³⁵ Rugita Pilato, “¿Gitlege wa Goteyo? Pumolene ga wa tsrukakalune sasertotene gita samyokyina. ¿Kluneru pkamruta?”

³⁶ Rugita Geso, “Wa npogirewatyawaka gi wa tyechijne rawa. Tyechijne rawkamka npogirewatyawaka, ntowrerune yagotkakanmaka nma samyokikotupmaka Goteyone yegi. Ga wa xani npogirewatyawaka gi wa gewi rawa.”

³⁷ Giyagni wane chinru Pilato, “Giyagni ¿pogirchiklaye Pixa?”

Rugita Geso, “Pixa wane chinyawaka pogirchi nixinri. Wale chinanukni nushpaka, ga wa wale chinanukni nuna tyechijne, nupguitat�aplu tokanchi galikakpotunanu. Pejnuruko galikakpotunanu gixachri yijnaktokanutno.”

³⁸ Pilato wane chinru, “¿Klunerni wa galikakpotunanu?”

Waka Geso waka Warawasu

Wa wane chininitka rushpakanakla Goteyone yegi. Wane chinna, “Gi satuna nukshikyalu ruklukanuwninri. ³⁹ Wa gixa gixjetyawaka satu nkosh-pakyegityagi tsru Giknoglushgogne. ¿Giyagni gi ge galuklu gita koshpakyegit-yapgi Goteyone Pogire?”

⁴⁰ Giyagni pejnuruneko gimepe saplewletatnakla. Wane chinna, “Gi wa Tyepni, seyni Warawasu galikakapni.” Ga wa Warawasni kachowgurni.

19

Getanru wa jeji

¹ Giyagni Pilato gwapatkalu Geso. Kochipjejixlu. ² Solalone kona kamgiylona sagyeta. Yoshmakjiwutluna. Pakniga yoshmookaluru pixkalutu mkachri yoshmalkluna. ³ Wane chinna, “¡Galu, Goteyone Pogire!”

Ruylakluna.

⁴ Pilato gishpakanaka maleka. Wane chinna, "Getanu. Nanikyegitgi maleka, wa gimatiripa gi satuna ruklukanuwninri nukshikyalu."

⁵ Giyagni rushpaka Geso maleka. Sagyeta kona kamgikolo rutaka, ga wa pakniga yoshmookaluru pixkalutu mkachri. Wane chinna Pilato, "Getanru wa jeji."

⁶ Giyagni retinitkaluna tsrukakalune sasertotene ga wa towrechne, sablewatna. Wane chinna, "¡Koroshishkita putakaganru! ¡Koroshishkita putakaganru!"

Pilato wane chinna, "Gixako ganikanutkalu. Koroshishkita gitakanru. Gi rixanu gita gi gikshikyalu wa ruklukanuwninri."

⁷ Rugitluna Goteyone, "Wixa waneya Tokanchi Yokanatkaluru. Tokanchi Yokanatkaluru wixanu chinyawaka rumkata gipnaleta, gi rixanu Goyakalu Wgene rixnawa."

⁸ Tye tokanchi jeminitka Pilato, pnu te pikletkalu. ⁹ Rumepe jigloklettanaku Pretoryopji. Wane chinru Geso, "¿Ginaka giyakatyachriy?"

Seyni Geso gi gigitlu. ¹⁰ Giyagni wane chinru Pilato, "¿Gita gi wa puynumsata? ¿Gi ge pumata wa gita gitaka koroshishkita nutakyapi, ga wa nutaaka nkoshpakyapi?"

¹¹ Rugita Geso, "Tengogne pma mutaakikamka gimka putaako Gita chinanu. Giyagni pixa yegi nsamyokjeru pixa pnu te tsru mukochri waneylu wale."

Pilato samyoklu Geso koroshishkita rutakikolupa

¹² Wanekluyakawa Pilato galukmaka koshpakteku. Seyni Goteyone sablewata. Wane chinna, "Wa Tye pkoshpakinipa, gi wa Susa gimatjerpatkayi. Girukokta pogirchi rixnawa yoptopiratlu Susa."

¹³ Giyagni Pilato tye tokanchi yijnakotinri, maleka ranikatkalu Geso. Gitakyagoklewjetkwaka tuplata, wa Sotlumta chinikwaka, ga wa Gewreyone tokanu, Kawata. ¹⁴ Tsru Giknoglushgognestsitkani. Tumananutkani. Wale wane chinna Goteyone, "Getanru Mpogire."

¹⁵ Giyagni wanna sablewata, "¡Puxriikakanru! ¡Puxriikakanru! ¡Koroshishkita putakaganru!"

Wane chinna Pilato, "¿Wa koroshishkita nutakanru mpogire?"

Rugitluna tsrukakalune sasertotene, "Maleshaywu wpogire. Susapjeni."

¹⁶ Giyagni samyoklu koroshishkita rutakyapluna. Yoptotluna Geso. Ranikatkaluna.

Koroshishkita gitaaikaluru

¹⁷ Rutjitakoroshiteshkitatata. Ralimta. Jiwchiswaga yegi chinikowaka ya. Gewreyone tokanu wane chinka Kolkota. ¹⁸ Wane koroshishkita rutakyaluna, ga wa Waleyma pimrine gepi. Satkaka pasretkaka. Geso ganikaji gwa.

¹⁹ Yonatkoxlu Pilato jigyegitkolupirana. Koroshishkitaptostsi rutaklu. Wane chinyongata:

Geso, Nasare Gajeru, Goteyone Pogire.

²⁰ Giyagni gixo Goteyone getyongatlu tye jigyegitikolu, gi rixanu koroshishkita rutakikwaka Geso, gi gowuklu tsru pokchi. Gewreyone tokanu yonatika, ga wa Ratinane tokanu, ga wa Kriykone tokanu. ²¹ Giyagni tsrukakalune sasertotene Goteyonenu wane chinru Pilato, "Gi wa 'Goteyone pogire' pchinkakyongatanru, seyni, 'Wale wane china, "Goteyone Pogirno'"

²² Rugita Pilato, "Nyonatanrutkani nyonatatka."

²³ Giyagni solalone koroshishkita gitakinitkalu Geso, rawamkatatkaluna. Gepkoxamkoje kotspaltatyatkaluna, satkaka solalonenupa. Ga wa gimkaluchrata. Wa gimkaluchrata myotsgakotni. Teno ruyaka saxpaletika psoluko. ²⁴ Giyagni wannakakluko wane chinkaka, “Gi wa wsuskakanru, seyni wupenokatanru galikaka katunpaktani wa mkachri.”

Wane rixa poyagkakikolupa wa yonchi wane chinachri:
Kotspalatluna nomkalu wannanupa rixinripa.
Nomkalu chrata rupenokotna.
 Giyagni wane rixna solalone.

Geso gitaklo runro Gwa yegi girukotyaplo

²⁵ Geso koroshishkitatestsi koxa tunwanatna runro, ga wa runro gepuro, ga wa Mariya wa Kleyogwa gnunro, ga wa Mariya Maktala gajero. ²⁶ Giyagni Geso getinna runro ga wa yimakleru rushinikanru wane gwanatachri, wane chinro runro, “Suxo petanru puturu.”

²⁷ Wanepnute wane chinru yimakleru, “Petanro punro.” Wanekluyakawa yimakleru ganiklo waleyma tixinripa.

Geso gipnale

²⁸ Wanepnute gi rixanu rumata Geso pejnurkakako poyagkaakalurutkani wa yonchiko poyagkakikolupa, wane china, “Nonunnagatewata.”

²⁹ Wanenanro pastono kachgalu gwanro katsepolo. Giyagni wanna shichpongakaklu katsopi kachgalu. Gisopoje rutakluna. Ginama rapookakluna.

³⁰ Giyagni kachgalu rurinitka Geso, wane china, “Nikatkalurutkani.”

Yonogijumta. Reneklu ruwekinri.

Yoglokwanapatka Geso

³¹ Tsru Giknoglushgognestsitkani, ga wa tsrupotgognenwa wale gapnanutikalurgogne. Giyagni koroshishkita ma mutukmanetinitipna gapnanutikalurgogne, Pilato rajjitna Goteyone jiknagatpalitkolupna, wa koroshishkita koshpakikolpatkana. ³² Giyagni solalone wane ya. Yoptowaka gwachrigapkanji jiknagatpalitna. Waneko pixka rixanruna wa satni wa Waleyma koroshishkita gitaakalurni. ³³ Seyni wa Gesni yegi rapokinna gi rixanu retrluna gipnachritka, gi wa jiknagatpalitkaluna. ³⁴ Seyni satu solalo yoglokwanapatlu chokorujeya. Waneklu rushpaka gigraga, gonu koxa. ³⁵ Wa getachri gipgujtatu, ga wa rupgujtale galikaka potu. Wale gimata wa galikaka potu china, wa gixa koxa galixinripa. ³⁶ Gi rixanu tyekaka wane gixa poyagkakikolupa wa yonchi chinikwaka: *Gijiknagaputko Wale*. ³⁷ Ga wa satu yonchi koxa wane chinatnaka: *Retanruna yoglotanruna*.

Kapnatkaluru Gesni

³⁸ Wanepnute Gosi Garimate gajeru, Geso yimaklerni seyni giyogimat-nachriwa Goteyone pikle chinanu. Pilato rajjita wa Gesnimane koshpakinripa. Ruchichlu Pilato. Giyagni wane ya. Koshpakmanetlu Geso.

³⁹ Nikotemo koxa wane ya, wa muchikawa goyechno yayegitjeru Geso. Raniklo miramunga ga wa galowemunga yapjetkaluro, gepkoxamkojmole patsrujire getko ginnu. ⁴⁰ Ranikmanetatkaluna Gesni. Poyitatkaluna mkachrichrata. Pgamlugalo rupoyitluna wa Goteyone gixjetyawaka kap-natikolupa. ⁴¹ Wa koroshishkita rutakikwaka waneru sana. Wa sana waneru gerotu yomlechi, satuna ma mutakikowakanuwa. ⁴² Giyagni gi rixanu Tsru Giknoglushgognestsitkani Goteyonenu, ga wa gi gowuklu yomlechi, wane rutakluna Gesni.

20

Yotunru

¹ Muchinangogne wa simana, goyechnokawpotuko mapshagakowalu yomlechi tyo Mariya Maktala gajero. Tetlu sotlu gajriikaluru yomlechiya. ² Giyagni tasukamta. Simo Petro yegi tyo, ga wa satu yimakleru Geso galukanru. Wane chinna, “Kapna ranikyatkaluna Gitsrukaachini. Gi wumata ginaka rutakanruna.”

³ Ralimta Petro ga wa satu yimakleru. Yomlechi yegi yana. ⁴ Pagasukamtkalunni gepi. Wa satu yimakleru kapnugamtu Petro. Wale gapka gapoklu yomlechi. ⁵ Rujnoka getletlu. Retlu mkachrichrata wane gwanatachri. Seyni gi wa jigloka. ⁶ Giyagni rapoka romkagitjeru, Simo Petro. Jiglokamtu kapna. Retlu mkachrichrata wane gwanatachri. ⁷ Ga wa kasamalu wa gijiwu sapwakanatachri gi wa mkachrichrataya rawanata, seyni sapruruukaluru pasretako gitaakaluru. ⁸ Giyagni jiglookoxatka satu yimakleru wa yomlechi gapokgapkatachri. Retlu. Ralixa. ⁹ Giyagni gi rumatawaluna yonchi chinyawaka, wa rumkata yotunretinripa gipnachinetskalaya.

¹⁰ Giyagni satokatnakna yimaklene gimolenyegna.

Geso gipgujewnayegitlo Mariya Maktala gajero

¹¹ Wa Mariya maleka tunwanata. Yomlechistsi chiyaganaty. Wa chiyaganatini tujnoka tetyaplu kapna. ¹² Tetna gepi Goyakalutowrene klatamkalune tuplanatachine, satu gijiwsretanaru, ga wa satu gjixisre-tanaru Gesomane gwanatyawaka. ¹³ Wane chinrona, “Suxo, ¿klu kachoky?” Wane chinna wala, “Gi rixanu ranikluna Nutsrukatni. Gi numata ginakakta rutakanruna.”

¹⁴ Wane chininitka tuprotaka. Tetlu Geso. Wane rawanata. Gi tumatlu wa Geso rixinri.

¹⁵ Wane chinro Geso, “¿Suxo, klu kachokanaty? ¿Katu pujga?”

Wala kagwaklu sana girukotachrini. Wane chinru, “Gitsrukaachi, Pixa ganikiniplu punkakanno ginaka putakniri. Gita ganikanutkalu.”

¹⁶ Wane chinro Geso, “¡Mariya!”

Tuprotaka. Wane chinru wala, “¡Rawoni!” Wane chinreni, “Yimaklewatachri.” ¹⁷ Wane chinro Geso, “Gi pkamrukanno, gi rixanu gi wa teno nyawa Gita, Nuru yegi. Seyni nomolene yegi pyanu. Punkakanna, ‘Teno nyau Nuru yegi ga wa Giru yegi, Noyakalute yegi, wa Goyakalute yegi.’”

¹⁸ Talimta Mariya Maktala gajero. Tunkakna yimaklene wa tetyawakatkalu Gitsrukaachi, ga wa tyepirana wane chinro.

Geso gipgujewnayegitna yimaklene

¹⁹ Wa muchinangogne simana kaynotka, tushyatka gipgyaptokaka wa yimaklene gapatyawaka Goteyone pikle chinanna, runa Geso. Wanna ganikajite tunwata. Wane chinna, “Kiglenshinikanupgi.” ²⁰ Wane chininitka rekakgimyotna ga wa gikwanapa. Giyagni yimaklene gimuwata retyawak-luna Gitsrukaachi.

²¹ Giyagni rumepe wane chinretatnakna Geso, “Kiglenshinikanupgi. Wa Girchi yokanatiniko pixkano Gita, waneko pixka nixa yokanretgi.”

²² Wane chininitka, runnipgyayegitna. Wane chinna, “Gyoptotanru Gi-wekikaluru Kpashiri. ²³ Wa gixa kaspukmukochiretanune, kaspukyegit-kalunepni. Wa gimretmukochiretanune gimretyegitkalunepni.”

²⁴ Wa Tomasu, satu wa pamole gepi rixinrina, wa Gepirutu chinkaluru, gi wannayma wane rawanata wa Geso gapkapini. Giyagni wane chinruna pimrine yimaklene, “Gitsrukaachi wetatka.”

²⁵ Wane chinna wale, “Nma metkanuplu wa gimyo wa klawopchole, nma yoshmaakanuplu nomyoji klawopna, nma yoshmaakanuplu nomyo gikwanapa, gi nalixanu.”

jNutsrukate! jNoyakalute!

²⁶ Yokgipgogne giknoginitka, gitoko rawanatnakna yimaklene. Wannaymakoxlu Tomasu. Runa Geso. Gipgyaptokaka gishyatka. Ganikaji tunwata. Wane china, “Kiglenshinikanupgi.”

²⁷ Wane chinatku Tomasu, “Pomyokyegitanno pumyoji. Petamyotanno. Pomyokyegitanno. Nokwanapa pyoshmakanru. Gi wa malixakletupyi, seyni galixachripyi.”

²⁸ Wa Tomasu gitilu. Wane chinru, “jNutsrukate! jNoyakalute!”

²⁹ Wane chinru Geso, “Gi rixanu petno, palixa. Giglenshinikanutkalunni nmametjene ga wa galixachine.”

Twu kiruka rumushinikikolupa

³⁰ Giyagni gi gepi pimrikaka getkalurkaka kamruta Geso, yimaklene getanu, twu kiruka mutakyongatkotu. ³¹ Tyekakni yonatkaluru galixinripa Gesonwa Kristo Goyakalu Wgene, ga wa galixinri waneyapgi giwekinri giwakaya.

21

Geso gipgujewnayegitna payokgipre yimaklene

¹ Wanepnute Tiwerya Wenne rupgujewnayegitnakna yimaklene Geso. Wane rixa gipgujewnaleta. ² Rapatanatna Simo Petro, ga wa Tomasu wa Gepirutu chinkaluru, ga wa Natanayli, Kana gajeru Kalilesreta, ga wa Sewereyo wgenene, ga wa pimrine gepi yimaklene. ³ Wane china Simo Petro, “Nchaluntapanu.”

Wane chinruna, “Gapakapwu pixayma.”

Wane yana. Kanawa ruptekna. Wale yechno, gi satona kashichna.

Tiwerya Wennensti rupgujewninri Geso

⁴ Goyechnokawa chininitka, wanga tunwanata Geso. Seyni wa yimaklene gi rumatluna Geso rixinri. ⁵ Wane chinna, “Wiwine, ¿gi ge waneygi gnikarupa?”

Rugitluna, “Malesha.”

⁶ Wale wane chinna, “Kanawa potuklesretate giknokanru chalu. Gikshikanro.” Giyagni ruknokluna. Gi rumkata kosletatkuna, gi rixanu gi gepiklo shima.

⁷ Giyagni wa yimakleru Geso gishinikanru wane chinru Petro, “Gitsrukaachikni Wale.”

Giyagni wa Simo Petro wa yijnakotinitka Gitsrukaachi rixinri, gimkalu sapwaknawa gi rixanu mamkutunanni. Tsru wenu ruptekgamatkta. ⁸ Ga wa pimrine yimaklene kanawa yapamta, gi rixanu gi gowuklu chiji, seyni pamyomolesti getko gowuknuni. Kosemtluna chalu shimayma.

⁹ Giyagni chiji ruptekinitkana, retluna chichpawa giglepokotkaluru, ga wa shima gitakaluro, ga wa jimapro. ¹⁰ Wane chinna Geso, “Ganikanro shima, wa gkashichanronatka xani.”

¹¹ Ratskotlota Simo Petro. Chiji kosemtlu chalu. Katsepommuro tsrokaka shima. Satu pacha pamyonmole mapa shima. Wane pejnumkalo, seyni gi ruskaka chalu. ¹² Wane chinna Geso, "Ginanutka. Gnikanutka."

Gi satuna yimakleru tserpiranawata wa repomgiyaplu, "¿Katyi Pixa?" Rumatluna wa Gitsrukaachi rixinri. ¹³ Runa Geso. Koscheklu jimapro. Renekna. Waneko pixka rixlo shima. ¹⁴ Tyenwa mapa kata chininri rupgurejewna Geso yimaklene yegi wa gipnachinetkalaya rali yotunretinititka.

Peneka nikletanna nowegatene

¹⁵ Giyagni rali nikaprikletinitkana Geso wane chinru Simo Petro, "Simo Gonasu wgene, ¿gi ge pushinikno wa nyi pnute?"

Wane chinru, "Gigi, Gitsrukaachi. Pixa gimata nalukyayi."

Wane chinru, "Peneka nikletanna norprane gowega wgenene."

¹⁶ Rumepe wane chinretatnaklu, "Simo, Gonasu wgene, ¿gi ge pushinikno?"

Wane chinru, "Gigi, Gitsrukaachi. Pixa gimata nalukyayi."

Wane china, "Peneka nikletanna nowegatene."

¹⁷ Mapa kata chininri wane chinru, "Simo, Gonasu wgene, ¿Gi ge palukno?"

Wamontaklu Petro wa mapa kata chininri wane chinru, "¿Gi ge palukno?"

Wane chinru, "Gitsrukaachi, Psoluko pumata. Pixa gimata nalukyayi."

Wane chinru Geso, "Peneka nikletanna nowegatene. ¹⁸ Galikakni, galikakni wane nchinyi wa makluki pixini pushrikapchijitnawa. Palukywaka pya. Wa tsrutssoleji pixini pkanaraku. Satu gishrikapchijitanyi. Ranikanyi pma maluka yaletyawakanu." ¹⁹ Tyenwa china rumatkakyaplu gi pixkalulu gipukchi chinanu rumalwutikolupa Goyakalu. Wane chininitka wane chinru, "Pomkagitanano."

Yimakleru rushinikanru

²⁰ Ruprotaka Petro. Retlu wa yimakleru wa Geso gishinikanru romkag-itjerna, wa rutspanostatkoxjeru nikikowakaya, wa wane chinachri, "Gitsrukaachi, ¿katupni wa psamyokjerupa?" ²¹ Giyagni Petro getlu wale. Wane chinru Geso, "Gitsrukaachi, ¿ga wa tye, gi rixanu?"

²² Wane chinru Geso, "Nalukiniplu rutukanu wale nuninpotunanuko, ¿gi pixanru pixa? Pomkagitanano pixa."

²³ Giyagni rushpaka tye tokanchi wa moletkakachinkakluko, wa tye yimakleru gi wa rupnanu. Seyni wa Geso gi wane chinru, "Gi rupnanu," seyni, "Nalukiniplu rutukanu wale nuninpotunanuko, ¿gi pixanru pixa?"

²⁴ Tyenwa yimakleru gipguitatachri tyekakapirana. Wale yonatlu tyekakapirana. Wumatlu wa rupguitalewle galikakpotunanni.

²⁵ Gi gepiikoxlu wa Geso kamrutanru. Satkaka yonatkamka walepje rixinri, nkagwaklu gi wa tye psolchijneko poyagotlo kiuukaka yonatkalu-rupmaka.

Yokanatkalune Kamrure

Giwekikaluru Kpashiri Gipiratkaluru

¹ Teyogwilo, muchinanu tokanchi nunkakyayi pejnurukopirana wa Geso kamrurewatinitka ga wa runkaklewatininitka. ² Psoluko nunkakatkayi yinuwakleyakawa ga wa tengogne yoptoikolgognepotunanuko. Wa tengogne ma yoptoikonuwa towutamtna yokanatanune wa tsomitanune. Giwekikaluru Kpashiriya towutamtna. ³ Muchinanu salewnanata Geso. Rali salewnaletinitka, gepkoxamkojmolgogne rupgujewnayegitatkana wanna giwekachritka. Gixo waneylu rumatpotutikolu. Goyakulu pogirewatyawaka runkakleta. ⁴ Waleyma rapatanatinna, Wale yokanatna Gerosale ma mushpakin tipnachi, seyni wane kagwakinrina Girchi gipiratanru “wa gixa yijnakotyano,” china, ⁵ “Gi rixanu Gwa katlewata galikakni gonuya, ga wa Giwekikaluru Kpashiri gkatikolupa gixa. Gi gixogogne potu magatatka.”

Tengogne yinritka

⁶ Giyagni wa gapatanatachine gepomgalu. Wane chinruna, “Gitsrukaachi, ¿gi ge sawakni pugletanutnaklu Gisrayiline pogirewatyawaka muchinanu pixka?”

⁷ Wale wane chinna, “Gi gimkata gimatletlu walegognekaka, gi wa gipap-koko wa Girchi gitakanru Waleko girukotyaplu. ⁸ Seyni gyoptotanru giyaklu Giwekikaluru Kpashiriya, gixa gogo gapokachripa. Nupgjufatjenepgi Gerosaleya, ga wa psoluko Goteya, ga wa Samaryakoxaya, ga wa yoptykyawakpotunanuko tyechijne.”

⁹ Rali wane chinretinitka tyekakapirana, retanatinrina ruxenownakakamtkatka. Kyachgapererumko yoptoctlu ma metikotpatka. ¹⁰ Teno yiganatna yinikopshini. Gepi jejine tunwastsitna, klatalu mkachri gitakachine. ¹¹ Wanna wane chinkoxna, “Jejine, Kalile gajene, ¿klu wane ntunwanatya, tengogne gyiganata? Waleko Geso tengogne yoptoikaluru gixyegiya, waneko pixka rixa ginretanu gishingatiniko pixkalu tengogne yinitka.”

Tenogruko rawinrina yimaklene

¹² Giyagni Goliwa Magkate chinikowaka satokyatkana. Gerosale yana. Gi gowuklu Gerosaleya, wa gapnanutikalurgogne gimkata yanretikowaka.

¹³ Rapokna. Ratskotna. Tenogruko yana, rawjetyawakna Petro, ga wa Gwa, ga wa Santiyako, ga wa Gantirishi; Wilipi ga wa Tomas; Wartolo ga wa Matiyo; Santiyako, Galgwego wgene, ga wa Simo Muchkopiranawatachri, ga wa Gota, Santiyako gepuru. ¹⁴ Pejnuruneko wanna panshinikanerune gomkagi gagjigognera, suxoneyma, Mariyayma Geso ginro, ga wa repuruneyma.

Gotni gipekole tsomitkaluru

¹⁵ Walegognekaka Petro tunwata moletkakachine ganikajiteya. Wane pejnu getko: satu pacha gepimole gapatjetachine. Wane china, ¹⁶ “Jejine, nomolene, rumkata poyakkakletikolutka wa yonchi Gotnipirana, wa muchikawa chinyawaka Giwekikaluru Kpashiri Tawinamaya. Gotni wa kosekna wa Geso kashichachine. ¹⁷ Wixayma gitakgiwakatkalurni. Rutaaka tye kamrurchi chinanu.

¹⁸ “Giyagni galikakni waleni wenutlu chiji muglenchi wenru chinanu. Rakaxikamta. Rupsheksatumbana. Psoluko rupkakgichkapintana.

¹⁹ Kpoginru pejnuruneko Gerosale gwachinyegiya. Wane rixa tyechijne Gaseltama chinkaluru wanna tokanuya. Walenwa Granchichijne. ²⁰ Gi rixanu Shikalchi Kirukate wane yonatkalurutkani:

Yineru mwiyawakanupni rawyawaka.

Gike gwanutkulu.

Ga wa:

Satu rupekolole jiglokanru waleni girukowatyawakmaka.

²¹ “Giyagni satu nyi jejine wixaymalune gitakikolupa, gi rixanu psologneko wixayma rawna ginakakokta wa Wutsrukate Geso jiglokjenatin ga wa rushpakjenatin wixaymananuko. ²² Gwa katlewatiniyakawa wa wixyegiya tengogne yoottotikolgognepotunanuko. Satu nyi jejine rumkata gitakletikolupa Geso yotunotinri gipgujtatachripa.”

²³ Rutaakana gepi: Gosi, Warsawa chinkaluru, Poyagkakachri yoklegiwakatachri, ga wa waleyma Matiya.

²⁴ Ragjigognetna. Wane chinna, “Gitsrukaachi, Pixni pejnurune gimatgajitachriyi. Pekakgitanwu girni ptsomita wa nyi gepi. ²⁵ Walepnii tye kamrurewatyawaka ga wa tye yokanatanru kamrure yoottotanu. Wane rutskikyanatka Gotni rawyawakako yinripa.”

²⁶ Rutakluna gipenoklu wanna chinanu, ga wa rujruka Matiya chinanu gipenoklu. Rutaaka pamole satupjeyma yokanatanune.

2

Giwekkaluru Kpashiri gapokinri

¹ Poyagkakatkalu pamyomolegogne, Jirgikolpatkagogne. Pejnuruneko panshinikanurune gapatjekaka. ² Walegnapunaru waneru rakagnenekle tengogne giyakatyachri gichkonnipgyalu pixka. Giyampotu rajpokokan-nipgyata. Wa tuplanatyawakapjina tsepownapogimnuta psolupijipotuko. ³ Rupgujewnayegitna katmerolkaka pixkalutu gitspaljemtachri. Satkaka wannatseptagi rapoka.

Satkaka waleko tokanu yijnakoyamnumletna

⁴ Giwekkaluru Kpashiri gwagajpotutatkana pejnuruneko. Yinuwaka yanumleytaluna panerunemnu tokanu wa Giwekkaluru yanumsakakyawakna.

⁵ Gerosale rawna Goteyone jejine kkipashiregolune, pachijnemnunanuka giyakatyachine tengogne rapukote gwachijnejetachri. ⁶ Rakagnenekle gwinikta rapatjetna gixolune. Gi rumatanshikanutanra gi rixanu satkakneru tokanu yijnako yanumsaletkana. ⁷ Rumyekna. Ruglajitna. Wane chinna, “Getanna. ¿Gi ge Kalile gajenni wa nyi pejnuruneko yanumsatachine? ⁸ ¿Gi wixpoko wixa satkakwu wixako tokanuya wa wumush-pakanru wtokanu wyijnako yanumletna? ⁹ Wixni Partone, ga wa Metone, ga wa Gelamitane, ga wa Mesopotami gajene, Gote gajene, ga wa Kapatosi gajene, Ponto gajene, ga wa Gasya gajene. ¹⁰ Prigi gajene, ga wa Pampiri gajene, Gigipto gajene, ga wa pasretkaka Liwya, Surene tukasreta gajene, ga wa Roma giyakatyachine, ¹¹ Goteyone ga wa Goteyo gitaknawachine koxa. Krete gwachine, Garawa gwachine, wyijnako yanumsaletna wixako wtokanuya tsru ruyaklekaka Goyakalupirana.”

¹² Rumyekna pejnuruneko. Gi rumatanshikanutanra. Wane chinkakna, “Klunerutkange?”

¹³ Pimrine kgixpiranataklerune. Wane chinna, “Jinanunatkana winga.”

Petro ginkaklewle

¹⁴ Giyagni Petro tunwata wa pamole satupjeneyema. Gichko tokanru runkaklewyegitna. Wane chinna, “Jejine, Goteyone, ga wa pejnuruneko Gerosale gwachingi, gimatanru tye. Gyijnakotakanutanno. ¹⁵ Gi rixanu gi wa gimetachinni wa nyi wa nchinanshinikanutyawaka. Gi rixanu tu-mananustsiwani. ¹⁶ Seyni tye kgonutkala wa tokanchi geneklewatachri Gowele chinyawaka: ¹⁷ Wane china Goyakalu:

Wane rixanu ralipregognepatka.

Giwekikaluru Gitanu napookakpotutanru

pejnuruneko gaji.

*Tokanchi geneklewatachinelni pwugenene jejine
ga wa suxone.*

Gmaklutene getanru kaygawlukaka.

Gixa tsrutene gipnawatanu gipnawlukaka.

18 Galikakni walgognepatka

*nwayegrene, nwayegrerone yegi
nyokanatanru Giwekikaluru Gitanu.*

Tokanchi geneklewatachinelni.

¹⁹ *Koglajrukaka nenekanu tengogneya,
ga wa tengognempuko getkalurkaka
tyechijneya, jralu, ga wa xirnachri,
ga wa chichipgya gimonopgyatachri.*

²⁰ *Kashrijewnanu tkachi. Ruchpokanu.*

*Ga wa ksrujraplu, ma mapookanuwachi
Gitsrukaachi tsru koglajrugogne.*

²¹ *Wane rixanu girukokta Gitsrukaachi
giwaka tomsatanu, wale gognetkaako.*

Tye Geso yotunkaka Goyakalu

²² “Jejine, Gisrayiline gyijnakotanru tye tokanchi: Geso, Nasare gajeru, Walenwa jeji Goyakalu kiglepiranyegiru rixkakanru gixyegiya ruyaklekakaya, ga wa koglajrekakaya, ga wa getkalurkakaya. Tyenwa Goyakalu kamrutanru Waleya gixatskalaya, gimatyawaka koxa gixa.

²³ Walenwa samyookaluru Goyakalu giglepokotyawaka wa rushinikanru, ga wa muchikawako rumatgognenatanru. Wale gixa gixripkakanru ga wa giylatanru wa kmukochirerunemyoya. Koroshishkita gitakjixanru. ²⁴ Wale Goyakalu yotunkaka. Gipukchichino kaspukyalu. Gi rixanu gi rumkata chipetkotatka gipukchiya.

²⁵ “Gi rixanu Tawi wane chinpiranyegitlu:

Netlu Gitsrukaachi

gita ginaple rawgognenatinri.

Gi rixanu npotuklesretate rawa,

Gi wa nkomyemyetko.

²⁶ *Wale chinanu numuwgajita,*

ga wa numuwleymanaruka nyaranumata.

Ga wa xani nomane koxa gapnanutanu

kagwakikolupa chinanu.

²⁷ *Gi rixanu gi puknokamtanno*

gipnachine gwiyawaka.

*Gi koxa puchichanru
wa Pixanu mmukochiretu rujpaginripa.
28 Pumatkakno giweklugapkaka.
Pomjikpotutanno Pixa yegi nixinri.*

²⁹ “Jejine, nomolene, gichichanno nunkakyapgi pgujetanuwaka tsrupotni gitsrukaachini Tawipirana. Wa gipnachrinatka. Kapnatkana. Ga wa giyomle wixyeglu xanigognenanu. ³⁰ Giyagni tokanchi geneklewatachri rixinri, Tawi gimatlu wa *Wale kawchinanu Goyakalu wane chinru wa Tawik-lokishaneyə gixmanetyawaka Goyakalu gippujewnakakanru Kristo pogire-watinripa Tawi pogirewayawakaya.* ³¹ Ma mapookanuwa retinitkalu, runkakletlu Kristo yotnotinripa. *Gi wa ruknooko gipnachine gwiyawaka.* Gi wa gigituko jpaggianu ³² Wa tye Geso yotunkaka Goyakalu. Walepirana pejnurunekwu gippujatachinchinwu. ³³ Giyagni pogirchi rutaaka Goyakalu potuklesretate. Girchi yegi rawyalu gipiratkaluru Giwekkaluru Kpashiriprana. Rawinitkalu rupkakatkalu wa tye gixa getanru ga wa gyijnakotanru.

³⁴ Gi rixanu Tawi gi wa tengogne ya, seyni wale wane china:

*Gitsrukaachi wane chinru wa Nutsrukate,
Npotuklesrestate ptuplatanu,*
³⁵ *Nutakinpotukna pkamnixjene
putspanjixgapre rixinripa.*

³⁶ “Gimatankoxlu pejnuruneko Gisrayiliklokipishangi wa tyeko Geso wa koroshishkitu gitakanru, Goyakalu galikakni gifakatkalu Gitsrukaachi ga wa Kristo rixinripa.”

Mapa waragkane katkalune

³⁷ Giyagni yijnakotinrina tyepirana, kachingajinatkana. Wane chinkana Petro ga wa pimrine yokanatanune, “Jejine, wumolene, ḡgi wixanutka xani?”

³⁸ Ga wa Petro wane chinna, “Genshinikanutanu. Gkatikolupa wa gixa satkakgi Geso Kristo giwakaya, gkaspukmukochiretikolupa. Gyoptotanru Giwekkaluru Kpashiri geneekaluru. ³⁹ Gi rixanu gixanupni wa gipiratkaluru, ga wa gwugenenenupkoxapa, ga wa gyoptukaklopishatyawakpotunanuka, gi pejnukta wa Gitsrukaachi Woyakalute tomganunepa.”

⁴⁰ Gixo pimri tokanchi ruppgujtalewata. Ruykolewata. Wane china, “Gognetkakikolupa gixa tyegogne gimuweekakanatachine mputukanyegeiya.”

⁴¹ Giyagni wa yoptotokanutjene katka. Yogniikalunni walegogne mapa waragka getko yine.

⁴² Yokanatkalue ginkaklewle romkagitna. Romkagi gimatkakletna. Romkagi jiknajroletlona jimapro. Romkagi gagjigogneretna.

Muchichachine Kristonune gimatkaklewle

⁴³ Pejnuruneko yine pika. Gixo koglajru ga wa getkaluru kamrutka wanna yokanatkalueya. ⁴⁴ Pejnuruneko galixachine gimwakaka. Ptowrunanuka rejnunkatna pejnurune wane gixleni. ⁴⁵ Rushankaluna rejnunkatna, wane rixlena. Kotspalkakyana pejnuruneko wa satkaka magatyawaka.

⁴⁶ Wane rixjegognenatna kpashiwakapija pashinikanurune pagognem-nunanuka. Jiknajrojetlona jimapro panchikakaya. Paniikalunni gimuwat-achine, myokwirgajine. ⁴⁷ Rumalwutluna Goyakalu. Kiglepiranyegirune pejnuruneko yinyegiya, ga wa Gitsrukaachi yognikananumtna pagognem-nunanuka gognetkaakalunepa gapatjetachine yegi.

3*Satu myankatu gituukaaka*

¹ Petro ga wa Gwa kayinwaka gagjigognepapko kanikna. Kpashiwakapji yana. ² Satu jeji rushpakinyakawa myankatu gwajpetka. Pagognem-nunanuka kpashiwakapji gipgyaptotestsi rutakluna, wa Kigleru potu Gip-gyapto chinikowaka. Wa kpashiwakapji jiglokachine ragijitnripa sroschi. ³ Wale getna Petro ga wa Gwa kpashiwakapji jiglokachinepa. Sroschi ragjitna renekyapluna.

⁴ Ga wa Petro Gwayma yopukgatluna. Wane chinru, "Petanwu." ⁵ Wa wale getpotutna. Kagwakanata pagixanu yoottotinripa, wanna genekashatyaplu.

⁶ Petro wane china, "Maleshayno sroschi, gi wa koriko. Seyni satu waneyno. Wale nenekyi. Geso Kristo Nasare gajeru giwakaya, palnanu. Pyananu."

⁷ Potuklemyo kashichyalu. Palnakaklu. Waneklu gichko rixkatka gjixi ga wa giygaleji. ⁸ Rupteka tunwaleta. Yanatka. Wannayma jiglokamtatkalu kpashiwakapji. Yanamatatka. Ruptemta. Rumalwumtlu Goyakalu. ⁹ Pejnuruneko yine geta yanretlu ga wa rumalwumtlu Goyakalu. ¹⁰ Rumatluna wa kpashiwakapji Kigleru Gipgyaptotestsi tuplajetachri sroschi gagijetachri. Ruglajpotutanna. Rumyekpotutanna wa wane rixinritka.

Petro ginkakewle Salomotamnu

¹¹ Wa myankatunaru gigletkalurutka kashichna Petro ga wa Gwa. Pejnuruneko yine potogiwnayegiti Salomotamnu chinikowakaya. Giglajitache. ¹² Petro getlu. Wane chinna yine, "Jejine, Gisrayiline, ēgi gixge giglajita wa tyeya? Klu chinanu gyopukgapotutwu, wixako wuyaklepgle, wixako wupashirenupgutlege wyankakyalu wa tye?" ¹³ Gawra Goyakalute, Gisaakanu, Gakowonu, wutsrukateni Goyakalute tsru pogirelwu renekanru Gituru Geso, wa gixa samyokanru ga wa ginutatanru Pilatyegiya. Giklukanuwnayegjixlu wa kaspukalurupmaka. ¹⁴ Gixa ginutatlu wa Kpashiri ga wa Poyagkakachri. Gixa gagjitolu genekikolupa kgylalewakleru. ¹⁵ Giylatanru giweklu genekachri wa Goyakalu yotunkakanru gipnachine tskalaya. Walenwa gipgjutatachinwu wixa. ¹⁶ Ralixgiwakatko chinanu, giwaka gichko rixkaklu wa tye, gixa getanru ga wa gimatanru. Wa galixlu Wale chinanu, tye gituukakpotutlu gixa pejnurunekgi getanu.

Petro chanixna renshinikanutinripna

¹⁷ "Ga wa xani, nomolene, numatlu wa gma mumatkanchinanu wane gixlu, gitsrukate pixka koxa. ¹⁸ Giyagni Goyakalu poyagkaklu wa muchikawa runkaklewjixanru pejnurunniko tokanchi geneklewatachinnamaya, wa Kristote salewninripa. ¹⁹ Giyagni genshinikanutanu. Gkashrijetko, powratkalunepgi gmukochireya, ²⁰ Gitsrukaachyegiya runinipa giyal-ganshikanrugogne, ga wa Geso Kristo yokanyegityapgi, wa muchikawa gixa chinanu gitaakaluru. ²¹ Galikakni rumkata tengogne chipetletlu wa rugletkoklungognepotunanuko ptowruko. Wale runkakleta Goyakalu, Walenune kpashirine tokanchi geneklewatachinnamaya, muchikawa potu gwapachinni. ²² Gi rixanu Moysisi wane china, 'Gitsrukaachi Goyakalute gipgjewnakakyegitangi Tokanchi Geneklewatachri satu gimolepa gita pixka. Wale gyijnakotanu pejnurukakko Wale ginkakangi. ²³ Wane rixanu: Girukoktayineru gyijnakotanru Wale Tokanchi Geneklewatachri, nikatkalurupni yinyegiya.'

²⁴ “Pejnuruneko tokanchi geneklewatachine, Samoyroni muchichachri ga wa gapkatamtachine, pejnuruneko ginkaklewatachine ginkakletpiranatlu tyegognekaka. ²⁵ Gixni wa tokanchi geneklewatachinniklopishangi. Gixa chinanni wa gipiratkaluru wa Goyakalu gipiratyana wutrukateni. Wane chinru Gawrani, ‘Puklopisha chinanu giglenshinikanyegitkalunepni payinemnunanuka tye psolchijneko gwachine.’

²⁶ “Rali yotunkakletinitkalu Gituru Goyakalu gixa yegi gapka yokanatlu ruglenshinikanyegityapgi gkashrijetikolupa satkaka gma muglenuya.”

4

Petro ga wa Gwayoshmaaka

¹ Wanna Petro ginkaklewyeginatinna yine, sasertotene gapyegitna kpashiwakapji gitsrukateyma ga wa Sariseyone. ² Kojwakanshikanutkana wa Goyakalupirana runkakikolutkana yine, ga wa Geso chinanu yotunkoklunchipa gipnachinetskalaya runkaakana. ³ Kashichkana. Yoshmakikowaka rutaakana waleprikpotunuko, gi rixanu kayitkani. ⁴ Seyni gixo tokanchi yijnakonatachine galixa. Wane pejnugetkona jejine pamyo waragka.

Jemanshinikankakjetikowaka rupgujtatyatya Petro

⁵ Wane rixatka waleprikgogne Gerosale rapatjetyana rutrukattenna, ga wa tsrune, ga wa yonchikgapine. ⁶ Ga wa Ganasu Sasertotene Gitsrukapatputu, ga wa Kaygwasu, ga wa Gwa, ga wa Galeantro, ga wa pejnuruneko Saserotene Gitsrukapatputumolene. ⁷ Wanna ganikajite tunwakaakana. Repom-satkana, “*¿Klu giyakluya, katu giwakaya wane gixyalu wa tye?*”

⁸ Giyagni Petro Giwekikaluru Kpashiri gwagajitanru potu wane chinna, “Yine gitsrukatiengi ga wa Gisrayiline tsrutengi, ⁹ xawakni gepomsatkalunwu wixinri, satu kigleru chinanu, jeji yayixachri kamrutikoluya, gi rixpoko gituuakakota. ¹⁰ Pejnurunekgi gixa ga wa pejnuruneko Gisrayilinerune gimatanrupa tye: wa Geso Kristo giwakaya rutuka tye yineru. Geso Nasare gajerunwa gixa koroshishkita gitakanru, ga wa Goyakalu yotunkakanru gipnachinetskalaya. Gesoya wa tye jeji gixa getanu gitukachritka tunwatachri. ¹¹ Gesonwa Tye:

*Sotlu myoptotkotu gixaya sotlupji kamrupjitachingi
Wale gitaka yoportowaka gitsejita.*

¹² “Gi satuna rawa gognewatikaluru. Gi rixanu maleshu pagiwaka tengogne rapukote renekikolna yine, wa wale chinanu wumkata gognetletikolupa.”

Gi wumkata kaspuka ginkakletletlu wa wetanru ga wa wyijnakotanru

¹³ Retkana pgujetanuwaka china ginkakletna Petro ga wa Gwa. Rumatkana jejine kiruka myimaakone, mumatkanni. Giyagni rumatkana wa Gesoyma rawanatinrina. Tsrukakalune giglajita.

¹⁴ Retanatluna jeji gituukaakaluru wannayma tunwatachri. Gike rumkata chinretna. ¹⁵ Yokanatkakana maleka rushpakinitkana jemanshinikankakjetikowakaya. Jemanshinikankakna wannakakluko.

¹⁶ Wane chinkakna, “*¿Gi wixanutkana wa nyi jejine? Gi rixanu getkaluru pgujetanuru kamrutkaluru wannaya. Pejnuruneko Gerosale gwachine yegi rumatika. Gi wumkata ginutletlu.*” ¹⁷ Seyni ma poshalpiranyegitikotupa yinyegiya, wkawgutanna xaniyakawa gikena ma munkakinitpatkana tye giwakaya.”

¹⁸ Tomgakatnakna. Towutkana ma munkaklewatinitpatkana giketsotaji, gi wa yimaklewatanna Geso giwakaya. ¹⁹ Wa Petro ga wa Gwa gigitna. Wane chinna, "Gitakyagokanru poyagkakashri chininipa Goyakalu getanu, wa Goyakalu pnute gyijnakotko gixa. ²⁰ Gi rixanu gi wumkata kaspukle ginkakletletlu wa wetanru ga wa wyijnakotanru."

²¹ Giyagni yokanatkatkana. Pnute kawgutkatkana, gi rixanu gi wa ruk-shiika saletikolupna wa yine chinanu. Gi rixanu pejnuruneko Goyakalu gimalwuta wa wane rixikolutka. ²² Gi rixanu wa jeji wa gituukaakalurutka tye getkaluruya, wale waneya gepkoxamkojmole pnute walapu.

Galixachine gagjigogneta gi wa popiklerunepa rixinripa

²³ Wa kaspukkana. Wannanune yegi yana. Runkakletluna wa pejnuruko wa tsrukakalune sasertotene ga wa tsrune chinyawakna. ²⁴ Rali yijnakle-tinitkana, panshinikanurune muchkowtukanutna. Wane chinruna Goyakalu, "Gitsrukaachi potu, Pixni wa Goyakalyi, wa tengogne kamrutachriyi, ga wa chiji, ga wa tsru wenu, ga wa ptowrunanuka wanerutu kamrutachriyi.

²⁵ Wa putowreru Tawinamaya wane pchina:

*¿Klu chinanu matsuwatna payinemnunanuka,
Ga wa yine gike gapri rushinikna?*

²⁶ *Tyechijne gajene pogirchne gimalpookakatka,
Ga wa tsrukakalune potowruta
Gitsrukaachi kamnixachine,
Ga wa Kristote kamnixachine.*

²⁷ "Gi rixanu galikakpotunanu kpashiri Puturu Geso ptsomitanru chinanu, tye pokchi rapatyana Girore ga wa Ponsyo Pilato, ga wa payinemnunanuka, ga wa Gisrayilinerune. ²⁸ Wane rixinripa puyakleya ga wa pushinikanruya muchikawako putakanru wane rixikolupa. ²⁹ Ga wa xani, Gitsrukaachi, petanru kawgurna. Penekanna pwayegrene psolpotuyako pgujetanwaka china ginkakletyapluna ptokanu. ³⁰ Giyagni wixyemputipyi wane gixkalurukakapa gitskalgalkaka, ga wa getkalurkaka, ga wa koglajrukaka wa kpashiri Puturu Geso giwakaya."

³¹ Rali gagjigognereinitkana, rapatjetyawakapjina gimyemyeta. Gi-wekikaluru Kpashiri psolmuchkonku jiglokajpotutna pejnuruneko. Goyakalu tokanu runkakletna pgujetanuwaka.

Ptowrunanuka rejnunkatna pejnurune wane gixleni

³² Wa gixolune galixachine panshinikanurunni. Gi satuna wane china, "Gitanupjeni," wa wane rixlemka, seyni ptowrunanuka rejnunkatna pejnurune gejnunkatni. ³³ Ga wa yokanatanune gipgujtatl Gitsrukaachi Geso yotunotinri tsru giyaklewluya. Gimutlewatachinpotna pejnuruneko wanna. ³⁴ Gi satuna magatyachri wanna. Gi rixanu katukokta kwangixleru sankaka ga wa panchikaka, rushankalu. Raniklu wa rushankanru wenru. ³⁵ Yokanatanunejixistsi rutakluna. Reneksatkana satkaka wane rixa magletyawakna.

³⁶ Giyagni Gosi, wa yokanatanune wane chinanru yoklegiwaka Wirnawisi (walenwa yokaakaluru Gimnanuklewatachri) Rewineru, Supro giyakatyachri. ³⁷ Waneyananru chiji. Giyagni rushankalu. Raniklu wenru. Yokanatkalunejixistsi rutakwenutlu.

¹ Waneru satu jeji Ganani giwakatletachri. Sagirni ganunro. Rushankalu wane rixlena. ² Psoji kotnukwenutyaluna. Tumata koxa ganunro. Psoji ranika. Yokanatkalunjixistsi rutaklo. ³ Petro wane china, “Ganani, ¿klu chinanu Satanasyo tsepotgajityi pyokwitmaklu Giwekkaluru Kpashiri, pkotnukyalu puchijne wenru? ⁴ Pumretanatinri ¿gi ge waneyananyi? Wa pushankinitkalu ¿gi ge pixa chinanni? ¿Klu chinanu pyanshinikangaji kamruretu? Gi wa yine pyokwita seyni Goyakanalu pyokwitmaka.”

⁵ Giyagni Ganani jeminitkalu tye tokanchi, yawnamtanatka. Rupnanatka. Tsru piklu rixna pejnuruneko jempiranyegetachine. ⁶ Palnamtna maklujine. Poyitanatkaluna. Koshpakanatkaluna. Kapnatanatkaluna.

Sagira gipnale

⁷ Gowukshini tjigloka ganunro. Gi tumata wane rixinrinatka. ⁸ Giyagni Petro wane chinro, “Punkakanno. ¿Wane pejnurge gishankiylu wa chiji?” Wala wane china, “Gigi. Wane pejnu.”

⁹ Ga wa Petro wane chinro, “¿Klu chinanu wanerutu nchinanshinikanuta gyantaletyaplu Giwekkaluru Gitsrukaachinu? Petanna gipgyaptostsi rapokatkana pganurni kapnatpachine. Koshpakankoxyina pixa.”

¹⁰ Waneklu tyawnamtanatka walejixistsiya. Tupnanatka. Jiglokamtna maklujine. Gipnachroni rukshikatkana. Koshpakanatkalona. Tganurstsi kapnatanatkalona. ¹¹ Tsru piklu rixna pejnuruneko gapatjetachine, pejnuruneko tyepirana yijnakotachine.

Gixo getkalurkaka, goglajrukaka

¹² Yokanatkalune kamrujetu gixo getkalurkaka, koglajrukaka yinet-skalaya. Pejnuruneko pashinikanurune Salomotamnu rawanatna. ¹³ Gi pimrineko tserpiranawata gipxaletletna wanna, seyni wa yine gimalwuptutna. ¹⁴ Gitsrukaachi galixachine gixolewnananumta wanepnute gixo potu jejine, ga wa suxone koxa. ¹⁵ Giyagokni gatnugapkaka raniikana yayixachine. Gijeekakayna ga wa shechimtakakaya rutaakana, wa Petro gininipa mayawlepjeko chikletyegimtyapmaklu satu wa wanna. ¹⁶ Gerosale potowrurutyana gixolune Gerosalesputa gwapokchijetachine. Raniikana yayixachine ga wa kamchine kojwakanune. Pejnuruneko wanna gituukaalunetkani.

Petro, Gwa gishpakachinetka

¹⁷ Wane rixna wa Sasertotene Gitsrukate potu ga wa pejnuruneko waleymalune. Wannanwa Sariseyone mkoje. Ranxatna. ¹⁸ Kashichkana yokanatanenue. Yoshmakikowaka pejnurunenu rutaakana. ¹⁹ Wa Git-srukaachitowreru goyechno kotpukaplu yoshmakikowaka gipgyaptote. Koshpakna. Wane china, ²⁰ “Gyanutka. Kpashiwakapji ntunwatanu. Ginkakkanna yine pejnupiranako tye giweklupirana.”

Yokanatkalune kashichkatnaka

²¹ Wa yijnakotinitkaluna goyechnokawpotuko jiglokuna kpashiwakapji. Wane runkaklewatyana.

Ga wa rapatna sasertotene gitsrukate potu ga wa waleymalune. Repuukana jemanshinikankakjetikowaka gajene, ga wa pejnuruneko tsrune mkoje Gisrayiliklopishane. Yoshmakikowaka rawapjixikna.

²² Yoshmakikowaka rapokna towrechine. Gi rukshiikana. Satokna wa towrechine. Runkaklewatna.

²³ Wane china, “Yoshmakikowaka wukshika gishyatkaluru moyegishyaleru, ga wa girukowatachine gipgyapto ginaple tunwatachine. Wa wkotpukitkalu gi satuna wukshika gitokogrukoya.”

²⁴ Tyepirana yijnakotinna wa sasertotene gitsrukate potu ga wa kpashi-wakapij gitrukate, ga wa tsrukakalune sasertotene gi rumatanshinikanutanna kluneru giknoganutka.

²⁵ Satu gapoka. Runkakna, “Wa yoshmakikowaka gitakanune jejine, kpashiwakapij tunwanatatkana. Yine runkaklewyeginatkana.”

²⁶ Giyagni kpashiwakapij gitrukate ga wa towrechineyma wane yana. Wale gwapna. Gi wa psolmuchtikonuko, gi rixanu pika sotlijetkotna yineya.

Gi wayine gimkata galixkota. Goyakalu galikakni

²⁷ Rawapkana. Jemanshinikankakjetikowaka tunwakaakana. Saser-totene gitsrukate potu gepomgana. Wane china, ²⁸“Gachi wujretpotutatkagi wa tye giwaka gma munkakletinitpatka. Psolpotuko Gerosale mposhalpi-ranatatkalu ginkaklewle. Galuka giklukletwu tye jejigragaya.”

²⁹ Rugitna Petro ga wa pimrine Geso yokanatanune. Wane chinna, “Gi wa yine gimkata galixkota. Goyakalu galikakni.

³⁰ “Wutsrukatenni Goyakalute yotunkaklu Geso, wa gixa giylatanru. Gagmunashkita gixripkakanru. ³¹ Wale Goyakalu potuklesretate tsru potu rutakanru Gitsrukaachi rixinripa ga wa Gognetkaklewatachri, ren-shinikankakyapna Gisrayiline kaspukamukochiretkolupna. ³² Wixni ga wa Giwekilaluru Kpashiri gipgujtatachinwu tyepirana. Wale Goyakalu genekna ralixjene.”

Kamalye giykole

³³ Wanna yijnakotinri kegeknaruwatna. Jemanshinikankakna ruy-latikolupna. ³⁴ Giyagni jemanshinikankakjetikowaka tunwata satu Gwariseyo, Kamalye giwakatletachri. Tokanchi Yokanatkaluru yimakle-watachri. Pejnuruneko yine kagwakpiratanru. Wale maleka koshpakjinxna pshinitsonu yokanatkalune. Wane chinna wale, ³⁵“Jejine, Gisrayiline, ggirukotinwa nyi jejineya wa gksamrutanruyapa. ³⁶ Gi rixanu muchikawako rupgujewna Teyota. Tsru chinashatnachriwa. Wane pejnu getko gep-koxamkoje pacha jejine gapatyegitul. Giylatkalurni. Pejnuruneko ralix-jene gipalata. Giweenanatkanina. ³⁷ Wanepnute gitakgiwaakaklulgogneni Gota Kalile giyakatyachri gipgujewna. Rawapna gixo yine rawgajxig-jenepa. Walekoxni gipnana. Ga wa pejnuruneko ralixjene rakapalatkana.

³⁸ Xawakni wane nchingi, getashatanutkana nyi jejine. Gkaspukanutkana. Gi rixanu tye shinikanchi, wa tye kamruchi yinenu rixinipa nikawnanu. ³⁹ Wa Goyakalunu chininipa gi gimkata nikatletanru, gma mukshikikotupa Goyakalu gyagotinri.” Wane rixa gishinikanutletna Kamalye.

Yokanatkalune gjretka. Kaspukatkana

⁴⁰ Tomgakatkana yokanatkalune. Muchinanu kochipjetkana. Rali kochip-jeretkoklunutkana, rujretkana wa Geso giwaka ma munkakletinitpatkana. Kaspukatkana.

⁴¹ Giyagni wanna jemanshinikankakjetikowaka gajenyegiya yatkana gimuamtachine, gi rixanu rutaka yagookana rumuknina salewninrina, reyiikana Geso giwaka chinanu. ⁴² Psolgogneko kpashiwakapijia ga wa papjikakaya gi kaspuka ginkaklewletna Geso Kristopirana, gi kaspuka yimaklewletna.

¹ Walegognekaka ruxolewnatkana yimaklene, Kriykone tokanu yanumatyachine yegi kegemgayegitna Gewreyone chinanu, gi rixanu wan-nanu gipnagnurutachrone gi gislagika geneksajetikowakaya pagognem-nunanuka. ² Giyagni wa pamole gepine rapatkakna gixolune yimaklene. Wane chinna, “Gi kigleru wa wixa giknokamtyalu Goyakalu tokanu wkam-rurewatinripa wa nikikowaka chinanu. ³ Giyagni, nomolene, gjigganna payokgipre jejine gixkaklukoya kiglepiranyegirune, Giwekikaluru Kpashiri gwagajpotutanunetka ga wa kgimatkalerune. Wanna wutakanu tye kam-ruchi chinanupa. ⁴ Ga wa wixa gomkagitanru wagjigognere ga wa wkam-rure tokanchi chinanu.”

⁵ Pejnuruneko gixolune yine gigleretlu tye tokanchi. Ga wa tsomitkana Gishtuwa, jeji galixachri potu Giwekikaluru Kpashiri gwagajitanru potu ga wa Wilipi, ga wa Prokoror, ga wa Nikanoro, ga wa Timo, ga wa Parmena, ga wa Nikolasu, Goteyo gitaknachiriwa, Gantiyoki giyakatyachri.

Gixo sasertotene galixlu tokanchi

⁶ Wa wanna yokanatkalune ginaple tunwakaakana. Yokanatkalune gagjigogneyegitna. Wannatseptagi rutakamyotna.

⁷ Gitsrukaachi tokanu tseruwna. Ruxolewnana yimaklene Gerosaleya. Sasertotene koxa gixolune galixlu tokanchi.

Gishtuwa kashichikkaluru

⁸ Wa Gishtuwa kgimutlewakleru potu ga wa kgiyaklewakleru potu rixkaklu Goyakalu. Giyagni wale kamrutlu tsru koglajrukaka, tsru getkalurkaka yinetskalaya. ⁹ Giyagni wane rixna pimrine ginkaklewawakapji gajene Gishpakachinenu, ga wa Sureyone, ga wa Galegantrinone, ga wa Surisyane, ga wa Gasya giyakatyachine. Yoottopiratluna Gishtuwa. ¹⁰ Gi wa rumkata gaaliretluna rumatkaleya, gi wa Giwekikaluru koxa yanumkakjeru.

¹¹ Giyagni yokshatkana jejine wane chininripna, “Wjema wane chinretlu tokanchi mupashiregnuchi Moysisipirana ga wa Goyakalupirana.”

¹² Komyekanshinikanutkana yine ga wa tsrune koxa, ga wa yonchikgapine. Rapyegitluna. Rakapgogomtluna. Jemanshinikankakjetikowaka ranikluna. ¹³ Tunwakaakana gipgujtalewashatachine kayroklewaklerune. Wane chinna, “Tye jeji gi wa kaspuka gapatletlu tye kpashiwaka ga wa Tokanchi Yokanatkaluru. ¹⁴ Gi rixanu wyijnako wane chinretlu, ‘Wa tye Geso Nasare gajeru nikatanru tyepji. Kashrijetgimatanru wa Moysis genkeyawu wixjetyawaka.’”

¹⁵ Giyagni pejnuruneko jemanshinikankakjetikowaka tuplatachine yopukgapotutlu. Retgojtitluna. Wa Goyakalutowreru pixka rixgojita.

7

Gishtuwa giykoyegitnawa Gawrani tomgakikolupirana

¹ Sasertotene Gitsrukate potu wane chinru Gishtuwa, “¿Wane gixachrirge?”

² Wale wane china, “Jejine, nomolene, ga wa tsrune, Gyijnakotanu. Goyakalu gimalwutkaluru gipgujewnayegitlu wutsrukati Gawrani. Mesopotami rawanatini. Chara mawakanniwa. ³ Goyakalu wane chinru Gawra, ‘Puchijne pushpakinitka, ga wa pumolenyegiya. Nekakgichijnetyawakapyi pyanutka.’”

⁴ “Giyagni Kalteyonchijne rushpkamtyatka. Chara rawanatatk. Rup-nanatka runni. Wane Goyakalu ganikyatnaklu Gawra. Tyechijne rapoka

wa gixa gwiyawaka wa xani. ⁵ Waneya gi renekchijnetlu, gi psojiswajinako rutakjixityawakapmaka. Seyni rupiratyalu *renekchijnetyaplu walenu chininripa, ga wa giklopishanenupa wanepnute.* Gi wa kwugenewalu.

⁶ Wane chinru Goyakalu wa waleklopishanepni pnu *gajenenapni payinchijneya. Wayegrechne rutaakonna. Gepkoxamkoje pacha walapupa gi yigleko retkona.*

⁷ “Wane china Goyakalu, ‘Gita giklukanuwnayegjixanna wa payine wanna wayegretelewanatachine. Wanepnute rushpakanna waleklopishane. Gewiya yonogyeginnona.’

⁸ “Tokanchi gipiratkaluru reneklu, sajruka gistaklewlpurana. Gawra wugenetlu Gisaaka. Yokgippogone chinimri sajruka gistakletlu. Gisaaka wugenetlu Gakowo. Ga wa Gakowo wugenetna pamole gepi tsrupotunni gitruskaachinni.

Gishtuwa ginkakletlu Gakowni ga wa Gosnipirana

⁹ “Ga wa tsrupotunni gitsrukaachinni kanxalerune rushankanruna Gosni Gigipto yinripa. ¹⁰ Seyni Goyakalu waleyma. Koshpaklu pejnuruko salewinriya. Goyakalu gipxaklu rumutyaplu Gwarawo, Gigipsyone pogire. Kigmatkaleru rixkaklu Gwarawo getanu. Wale gitaklu girukotlewatrinripa Gigiptoya ga wa pejnuruko gipji gajeruya.

¹¹ “Runa tsru nachi psolchijnepotunanuko Gigiptoya, ga wa Kana koxa. Tsru salewakchi. Wutsrukateni gi rukshikluna nikanruna. ¹² Giyagni Gakowo jempiranyeginri wa Gigipto rawinri triko, yokanatna wutsrukateni muchinanu kata. ¹³ Gepi kata rapkapinitkana yegwakane. Gosi ginkakatkana wa repurna rixinrina. Gwarawo gimatanerutatkalu Gosi. ¹⁴ Gosi gepulklu ruru Gakowo ga wa pejnuruneko gimolene, payokgipremole pamyo yineru.

¹⁵ “Yopikatka Gakowo. Gigipto rapoka. Wane rupniyanatka waleni ga wa wutsrukateni. ¹⁶ Wannani Suche ganiikana. Kapna rutaakanatkana wa Gwarani gagityawakapna sroschi wenruya. Wa Gemoro wgenene, Suche gajene ragityalu.

Gishtuwa ginkakletlu Moysisni gishpakinripirana

¹⁷ “Konapu chininitka wa gogi wa Wale kawchinanu Goyakalu gipiratyalu Gawra Gigipto ruxolewnananumtna yine. ¹⁸ *Gigipto jiglokinpotunanuko satu pogirchi Gosi mumatkatu.* ¹⁹ Wale yokwitna wumolenni. Gi yigleko retanna wutsrukateni. Maleka rutakjixinpotukna gegishpaulunniwa ma muweekananumtinitipna.

²⁰ “Walegognekaka rushpaka Moysisi. Goyakalu gigleretanru. Mapa ksuru rurupji tseruwakika. ²¹ Wa maleka rutaakoklunutka, Gwarawonshicho gwapatkalu. Tseruwakatkalu. Toturu pixka tixlu. ²² Psolpotuyako Gigipto gajene gimatkale yimaaka Moysisi. Tokanchi ga wa kamrurichi gixo gimkatachrini.

Gishtuwa ginkakletlu Moysisni myoptotkotupirana

²³ “Gepkoxamkojemole walapu poyagkakinitka rushinika salwayegletra gimolene, Gisrayiliklopishane. ²⁴ Wa retinitkalu wa satu yenetkaluru, yoptoyegitlu. Ruylatanru Gigipto gajerni. Rapnuyegitlu yenetkaluru. ²⁵ Wale kagwaklu gimolene gimata jemyaplu wa Goyakalu gognetkakanna waleya. Seyni wanna gi gimata jemlu. ²⁶ Waleprika yagotkakna. Wale gapyeigitna. Ruykotmakna kigle gimwakakle rixinripna. Wane china, ‘Jejine, moletkakashchingi. ¿Klu chinanu gyenetskaka?’

²⁷ “Giyagni rumwastsitanru yenetachri satkaklu. Wane china, ‘*Katu gitakyi wutsrukate ga wa wuklukanuwnayegijixjeru pixinripa?*’ ²⁸ ‘*Paluka giylaletno kapetgogne puylatanruna pixka Gigitpo gajerni pixka?*’

²⁹ “Tye tokanchi chinanu rasukatka Moysisi. Pnu gajeru rixnatkawa Matiychijne ya. Wane geipi wugenetya.

Gishtuwa ginkakletlu gi rixpoko Goyakalu tomgalu Moysisi

³⁰ “Gepkoxamkojmole walapu poyagkakatnaka. *Goyakalutowreru gipgu-jewnayegitlu xirnalmero kawshipiriya, yineru mwiyawakanuya Sina Magkatestsiya.* ³¹ Giyagni Moysisi giglajita retyawaklu wa xirnachri. Kayegiklu rumata getyaplu. Gitsrukaachi tokanu jema, ³² ‘*Gitni putsrukateni Goyakalutno, Gawra Goyakalute, ga wa Gisaaka Goyakalute, ga wa Gakowo Goyakalute.*’

“Rutatatana pikle Moysisi. Gi rumkata getleta. ³³ Wane chinru Gitsrukaachi, ‘*Pkoshpakanro pyoshmaklejixi. Gi rixanu kpashiwakchijne ptun-watyawaka.*’ ³⁴ *Netpotutlu nayinerutene Gigitpo gwachine ma yigleko ma metikolna. Nyijnakotlu wanna gochgire. Nujruka nkoshpakyapna. Punanu wa xani. Gigitpo nyokanatanyi.*’

Gishtuwa ginkakletlu Gisrayiline ma maluka yijnaklewlepirana

³⁵ “Waleko Moysisi wanna ma yoptotanatu—wane chinanruna, ‘*Katu gitakyi gitsrukaachi ga wa giklukanuwnayegijixlewatachri pixinripa?*’ chinanruna. Waleko yokanata Goyakalu, wanna Gisrayilini gitsrukate rixinripa, ga wa koshpakjerepni Goyakalutowreru chinanu. Walenwa gitowreru, kawshipiri gipgujewniyachri. ³⁶ Wale koshpakna, koglajrukaka getkalurkaka kamrutinri Gigiptochijneya, ga wa Tsru Wenuya Sergalu, ga wa yineru mwiyawakanuya gepkoxamkojmole walapu. ³⁷ Tyenwa Moysisi wa Gisrayiliklopishane wane chinachri, ‘*Gitsrukaachi Goyakalute gipgujewnakakyegitangi Tokanchi Geneklewatachri satu gimolepa gita pixka.*’ ³⁸ Waleknii wa gapatikowaka gwachri yineru mwiyawakanuya, wa Goyakalu towreruyma, wa Sina Magkate ruynumsatjeru, ga wa wutsrukateni giynumsatjeri. Wale yoptotokanuta tokanchi giwekachri renekyapwu. ³⁹ Waleknii wutsrukateni ma maluka yijnakletanatu, seyni satkakmakluna. Rajiyna raluka satokleyatnakna, Gigitpo yinripatnakna.

⁴⁰ “Wane chinruna Gaaro, ‘*Pkamrutinwu goyakalune wkosekjenepe. Gi rixanu tye Moysisi wa Gigiptochijne wkoshpakkajeru, gi wumata gikta rixanatka.*’ ⁴¹ Walegognekaka kamrutlona waka wgene. Ranikyeginlona yaglusha genekashlukaka giylatkalurupa. Rumeyiwakatluna gimonya kamrutinrina.

⁴² “Giyagni Goyakalu katjitna. Samyokna gixolurkaka tengogne gajerkaka yonogyegityapna. Wa tokanchi geneklewatachine kirukate chinyongatyawaka:

Gisrayiliklopishangi,

¿Ganikyeginoge Gita

*giylatkalunepa ga wa genekashlukaka giylatkalurupa
wa gepkoxamkojmole walapu wa yineru mwiyawakanuya?*

⁴³ *Gkoscheklu mkachripji Molochopji.*

Wane gixno, ga wa gkoscheklo

katagiri koxa, Rempanni goyakalute.

yagluchkaka wa gkamrutanru gyoptsojityegitanrupa.

Giyagni najriikanungi Wawilonya tukasretate.

Gishtuwa ginkakletlu Goyakalupjipirana

⁴⁴ “Wutsrukatenni waneya mkachripji Goyakalu gipgujewnajetyawakapji pochkewakaya. Goyakalu towutyawakpotuko. Wa Moysisi chinyawaka wa retyawakpotuko, wane rixa kamruretanruna. ⁴⁵ Wutsrukatenni yop-topjitatku. Goswuyma rutakluna payine gwanatyawakaya. Wannani panenni ruknoka Goyakalu wutsrukatenniyegiya, Tawigognepotunanuko. ⁴⁶ Goyakalu gimutlu. Tawi gagitlu retyaplu, kamrujixyaplu wa Gakowo Goyakalute gwapjityawaka. ⁴⁷ Seyni Salomo kamrulutu panchi Walenupa.

⁴⁸ “Seyni wa tengajeru potu gi wa myochi kamrupjiticaluru rawa. Tokanchi geneklewatachri chinyawaka:

⁴⁹ *Tengognenwa ntuplapijere.*

Chijni wa nutspanjixgapre.

¿Gi pixkapjurutu gkamrutinno?

china Gitsrukaachi.

¿Ga wa ginakapni wa napnanutyawakapa?

⁵⁰ *¿Gi ge nomyo nkamrutyalu pejnurkakako tyekaka?*

Gishtuwa wane chinna, “Gixni wa Giwekkaluru gyagotgognenata”

⁵¹ “Shikonshinikanurungi. Gixni msajruka gistaakkongajgi ga wa gijnakop-naya koxa. Giwekkaluru Kpashiri gyagotgognenata, gitsrukatenniko pixka. Waneko pixka gixa gixa. ⁵² Pejnurunniko tokanchi geneklewatachinni kojwaknina gitsrukatenni. Ga wa wanna giylatanna Poyagkakachri gin-inripipirana ginkakletachinni. Wale Poyagkakachri samyokachingi gixa xani. Wale giylatachingi. ⁵³ Gixni wa gyroptotlu Tokanchi Yokanatkalue Goyakalutowrerune gitakyawaka. Gi wa gkamrultu.”

Gishtuwni sotlujetkalurni

⁵⁴ Yijnakotinitkaluna kegeknantuwanatna. Rashkaygityegitluna. ⁵⁵ Seyni wa wale, Giwekkaluru Kpashiri gwagajitanru potu, teno yigata. Retpotuta. Retlu Goyakalu goyaknu, ga wa Geso Goyakalu potuklesretate gwachri. ⁵⁶ Wane china, “Netlu tengogne gitpukachri, ga wa Yineru Wgene Goyakalu potuklesretate tunwatachri.”

⁵⁷ Giyagni saplewpotumtna. Kachpokajnakopnamtna. Pagakap-gogomtkalune rixanruna. ⁵⁸ Koshpaktuna pokchiya. Sotlujetanatkaluna. Getashanatachine satu maklujijixistsi rutakamkatluna. Sawolo giwakatletachrini wale. ⁵⁹ Gishtuwni sotlujetanruna.

Ragjigogneta. Wane china, “Nutsrukate Geso, pyoptotanno.”

⁶⁰ Yoptsojitatma. Tsru saple rixa. Wane china sapleta, “Nutsrukate, gi puklukjixanna tye mukochriya.” Wane chintokanutinitka rapnanutatka. Sawolo gigleretlu ruylatikolu.

8

Sawolo kojwakna gapatjetachine

¹ Walgogne tsru kojwawakchi rixkana gapatjetachine, Gerosale gwanatachine. Pejnuruneko gipalata Gotechijneya, ga wa Samarchijneya. Yokanatkaluepje gixeta. ² Ranikanatkalue Gishtuwni jejine kkipashiregolune. Tsru chiyalgu rixna wale chinanni. ³ Giyagni Sawolo yenetpotutna gapatjetachine. Papjimnu jigloka. Kosepowjixna jejine, sxone. Samyokjixna yoshmakikolupna.

Samari runkaklewaty Wilipi

⁴ Giyagni gipalatachine pasretamnunanuka yana. Runkakle-tananumtluna tokanchi. ⁵ Giyagni Wilipi yopika. Samari Pokchi rapoka. Runkaklewyegitna Kristopirana. ⁶ Panshinikanurune yine yijnakpotutlu Wilipi chinyawaka. Yijnakonatna, ga wa retanatluna wa getkalurkaka kamrutanru. ⁷ Gi rixanu kamchine puchotlewatachine gishpakyana gixo kamchichachine. Tsru sable rixna kamchine. Gixo giktegachine, ga wa myankane gituukaakalunetka. ⁸ Giyagni waneru tsru gimuwlwale pokchi.

Kagonchi Simo galixa

⁹ Wanenanru satu jeji Simo giwakatletachri. Muchikawa kagonchinnanni wale pokchiya. Rumyekna Samari gajene. Satu tsru chinnachriwa. ¹⁰ Pejnuruneko yijnakpotutlu, mturune ga wa tsruneymananuko. Wane chinna, “Tyenwa tsru ruyakle Goyakalu chinkaluru.”

¹¹ Yijnakpotutluna gi rixanu wa kagonchitnri rumyekyana muchikaw-gognenanuyakawa. ¹² Seyni wa ralixinitkaluna Wilipi Kiglerpotununu Tokanchi runkakletini Goyakalu pogirewatyawakapirana, Geso Kristo gi-wakapirana, katkana jejine ga wa suxone. ¹³ Wale koxa Simo galixa. Katka. Wilipiyma rawa. Tsru getkalurkaka, ruyaklekaka wane gixkaluru reta. Rumyeka.

Samari salwatyana Petro ga wa Gwa

¹⁴ Wa yokanatkalue Gerosale gwanatachine yijnakyegitluna Samari gajene yoptotywakatkalu Goyakalu tokanu. Giyagni wanna yegi yokanatkana Petro ga wa Gwa. ¹⁵ Wanna yopika. Rapokinitkana ragjigognetna Samari gajene chinanu wa yoptotyapluna Giweikaluru Kpashiri. ¹⁶ Gi rixanu gi satuna rapokawa. Katashatkana Geso giwakaya. ¹⁷ Giyagni rutakamyotseptagaitkana. Yoptotatkulu Giweikaluru Kpashiri.

¹⁸ Wa retinitka Simo wa rutakamyotseptaglewatirrina yokanatkalue, Gi-weikaluru Kpashiri geneekatka, sroschi ranikyegitmakna. ¹⁹ Wane china, “Gitakankoxno gita tye chinanu, wa gi gixachrikokta nutakamyotseptagitanu, yoptotanru Giweikaluru Kpashiri.”

²⁰ Giyagni Petro wane chinru, “Pixaymaplo pserojiprojite gamgikowaka, gi rixanu pkagwaklu Goyakalu genekashle sroschi yoptotikalurni.

²¹ Maleshayyi pixa tyepirana. Gi putaaka. Gi rixanu gi potukgajyi Goyakalu getanu. ²² Giyagni penshinikanutanu tye gektutuya. Gitsrukaachi pagijitanu gikta pkaspukmukochirgajitko pyanshinikanutanru. ²³ Gi rixanu pachikgajitachriyi, gektutu gostutanruyi wane nixa getletyi.”

²⁴ Giyagni rugita Simo. Wane china, “Gitsrukaachi gagjiyegitanunno gixa, gi satuna wa gixa wane chinyawaka ma munyegitkanupno.”

²⁵ Giyagni wanna gippujtatinri. Goyakalu tokanu rali ginkakletirrina, satokna. Gerosale yana. Papokchimnunanuka Samaritane pokchi wane runkakletyaluna Kiglerpotununu Tokanchi.

Wilipi ga wa Getyope giyakatyachri

²⁶ Gitsrukaachitowreru giynumatlu Wilipi. Wane chinru, “Palnanu. Tkachi kegnetesrethane pyanu, Gerosale yopikgapotyachri. Kasa gapok-gapotachri. Wanenwa yineru mwiyawakanu.” ²⁷ Palnatka. Wane yatka. Wanenanru satu Getyope gajeru, suxone girukotachri, tsru jiglokachri Kanrasa yegi Getyope gajene pogirewatyachro. Wale gitaaaka pejnuruko tponikole chinanu. Wane ya, Gerosale yoptsojtapinripa. ²⁸ Rali yoptsojityentapinitkalu, satoka. Chijiyapachrote tuplananumta. Retyonganunumtllo

Gisayiya tokanchi geneklewatachri kirukate. ²⁹ Giwekikaluru wane chinru Wilipi, "Pyayegitanro. Twu chijiyapachrosti pyanu."

³⁰ Wilipi gasukyegitlo. Yijnako getyongonatlo tokanchi geneklewatachri Gisayiya kirukate. Wane china, "Giyagni ɿpumata jemluge wa peta yontagantru?"

³¹ Wale wane china, "Gi rixyawaka numata jeminri gi satuna ginkakpokowakatanno?"

Ragjitu Wilipi ratskotinripa, waleyma tuplamta. ³² Tyepiranyegiktani retyonganumta:

Gowega pixka giylajetikowaka raniika.

Gowega wgene myanumatkato tjiwxitjeru yegi, waneko pixka rixa Wale. Gi yanumata.

³³ *Kamturetkoklunu gi wanepotuko rixluna girukotlewatachine.*

¿Katu ginkakletanna walegogne gajene?

Gi rixanu chiji konikaluru ruwekinri.

³⁴ Suxone girukotachri gepomgalu Wilipi. Wane chinru, "Nepomganyi. ¿Katupiranni wane china tokanchi geneklewatachri? ¿Walenanuklege waka satupiranra?"

³⁵ Giyagni Wilipi tyepiranako yonatkaluru yinuwaka ginkakpokowakletyapl. Runkaklu Kiglerpotunanan Tokanchi Gesopirana.

³⁶ Gatnugapo yapananumtna. Gongastsi rapokna. Wane china suxone girukotachri, "Petanru gonu. ¿Klu gimaletu nkatakolu?"

³⁷ Wilipi wane chinru, "Psolpotuyako pajiya palixini, pumkatlu."

Giyagni rugita. Wane china, "Nalixlu wa Geso Kristo Goyakalu Wgene rixinri."

³⁸ Tunwajixlo chijiyapachro. Ruptekgamtna Wilipi ga wa suxone girukotachri. Wilipi katlu. ³⁹ Kanikatkana. Giwekikaluru Gitsrukaachinu koschekamtaklu Wilipi. Gi wanepnuteko suxone girukotachri getatkalu. Yatka gatnugapo gimuwaamtachri. ⁴⁰ Gasoto retikatka Wilipi. Pnumnu ya. Pejnuru pokchiko runkakletyalu Kiglerpotunanan Tokanchi, Susari rapokin-potunanuko.

9

Sawolo kashrijetkaluru

¹ ¡Gi pakawgurenanktalu rixna Sawolo Gitsrukaachi yimaklene! Ruy-lalelwennaspuu rixa. Sasertotene gitsrukapatyegi ya. ² Ragjitu kiruka Tamasko gajene chinanu, wa ginkaklewawakapji gajene, wa rukshikinipna jejineko ga wa suxoneko tyepirana gomkagitachne Gerosale ranikyapna gostutkalune. ³ Gatnugapo yapamta. Tamaskostsi rapokatka. Walegnapunaru yochigeyitanru tengogne gajeru yochigatachri. ⁴ Chiji rapokatana. Yijnakotlu satu tokanchi wane chinjeru, "Sawolo, Sawolo, ¿klu chinanu pkojwakno?"

⁵ Wane china, "¿Katyi Pixa, Gitsrukaachi?"

Wane chinru, "Gitni Geso, wa pixa kojwakanrnu. ⁶ Seyni palnanutka. Pokchi pyanu. Wane punkakiko pumkata kamruretanrupa."

⁷ Sawoloymalune jejine menuwatachne. Plaschi galikakni yijnakotna, seyni gikena retna. ⁸ Giyagni Sawolo chiji palniyatka. Rumrekgtanimkatka. Gikena retanatka. Giyagni kanjimtanatkaluna. Tamasko Pokchi rutakatkaluna. ⁹ Mapgogne wane rawa. Metkatuna. Mniikatuna. Murkatuna.

Ganani yokanatka Sawolo yegi

¹⁰ Tamasko rawanata satu Gitsrukaachi yimakleru Ganani giwakatletachri. Kaygawleya wane chinru Gitsrukaachi, "Ganani." Wale gigitali, "Gewno, Gitsrukaachi."

¹¹ Gitsrukaachi wane chinru, "Palnanu. Gatnugapo pyanu, Potukgapolu chinkaluru. Gotapji pujginri satu Sawolo giwakatletachri, Tarso gajeru. Gi rixanu wale gagjigogneta. ¹² Satu jeji reta kaygawleya, Ganani giwakatletachri, wa pixa. Reta jiglokletyi. Pixa gitaktseptagimyogogotanru retinripatka."

¹³ Giyagni Ganani gigitlu Gitsrukaachi, "Nutsrukate, gi gepika yine njempiranyegityalu tye jeji, gi pejnunanukta gektutu kamrutyana Pixanune kpashirine Gerosale gajene. ¹⁴ Gewi koxa rutakika tsrukakalune saser-toteneya rostutyapna pejnuruneko Pixa giwaka koschekachine."

¹⁵ Gitsrukaachi wane chinru, "Wane pyanu. Gi rixanu walenwa nkamrurewapre ntsomitinri, ngiwaka ranikinripa payinyegiya, ga wa pogirchinyegiya, ga wa Gisrayiliklopishanyegiya. ¹⁶ Gi rixanu Gita gekakgitanru gi pejnunarpaktalu rumkata salewnaletinripa ngiwakaya."

¹⁷ Giyagni Ganani wane ya. Panchi jigloka. Rutaktseptagimyogogotlu. Wane china, "Nepuru Sawolo, Gitsrukaachi Geso, wa gatnugapoya petinri wa puninitka, Wale yokanatno petinripa, wa Giwekkaluru Kpashiri gwagajpotutaypi."

¹⁸ Waneklu rujruktataygalemtatka gitataji pixkalutu. Retatka. Palnatka. Katkatka. ¹⁹ Wa nikinitka gichkonshinikanutkalu. Gi pejnugognekta Sawolo gimwana Gitsrukaachi yimaklene Tamasko gwachine.

Tamasko runkaklewatyaw Sawolo

²⁰ Waneklu ginkaklelewakapjikaka Kristopirana runkakleta. Wane chinjeta wa Gesonwa Goyakalu Wgene.

²¹ Wa pejnuruneko yijnakonatachine gimyeka. Wane chinna, "¿Gi ge tyenwa Gerosale saetlewatayachri wa tye giwaka koschekachinni? Wale chinanu runa gewi, gostutkalune ranikyapna wa tsrukakalune sasertotene耶gi."

²² Giyagni Sawolo wanepnute muchkotanshinikanutka. Gi rumatan-shinikankakna Goteyone Tamasko gajene. Runkakpokowakatna Kristokni wa Geso.

Goteyone galuka giylaletlu Sawolo

²³ Gixgogne giknoginitka Goteyone jemanshinikankaka ruylatyapluna Sawolo. ²⁴ Wale gimata jemanshinikankakpiranyegitluna. Wanna girukot-potutlu gipgyaptokaka gogi ga wa goyechno ruylatyapluna. ²⁵ Giyagni wa Gitsrukaachi yimaklene pokchi prijere gogote rutakluna goyechno. Wane ruruukakyaluna. Wane kojita jiruukyaluna.

Gerosale yinri Sawolo

²⁶ Wa Gerosale rapokininitka raluka Gitsrukaachi yimaklene gipxaletleta. Seyni pejnuruneko pikanru. Gi ralixluna wa Gitsrukaachi yimakleru rixinri.

²⁷ Giyagni Wirnawisi gwaplu. Raniklu yokanatkalue yegi. Runkakna gi rixpoko Sawolo getletlu Gitsrukaachi gatnugapoya, ga wa Gitsrukaachi giynumatyawaklu. Runkaakoxna wa Tamasko Sawolo ginkaklewatyapu-jetanuwaka Geso giwakaya. ²⁸ Rupxaletjetna. Wannayma yotaljeta Gerosaleya. Pgujetanuwaka china yanumsaleta Gitsrukaachi giwakaya. ²⁹ Wale gigjetna Kriykone tokanu yanumatyachine. Ruylatmakluna. ³⁰ Wa rumatinitkana moletkakachine ranikluna Susarpotuko. Wane Tarso yokanaty-atkaluna.

Ruxolewnana gapatjetachine

³¹ Giyagni gapatjetachine ruglewanshinikanutna psoluyako Gote, ga wa psoluyako Kalile, ga wa psoluyako Samari. Tseruwakanshinikanutkana. Kosekna Gitsrukaachi pikachine. Giwekikaluru Kpashiri gimnanukanune ruxolewnana.

Geneyasa giguretikaluru

³² Wane rixa Petro. Pnumnu yapamta. Yopika koxa kpashirine Lita gwachinyegiya. ³³ Wane retyalu satu jeji Geneyasa giwakatletachri. Yokgipi walapu gijkeo ruklukanatka. Giktegachrinni. ³⁴ Wane chinru Petro, “Geneyasa, Geso Kristo gituukakyi. Pyotunotanutka. Puglepokje-jekotanutka.”

Waneklu yotunotatka. ³⁵ Retluna pejnuruneko Lita gwachine, ga wa Sarona gwachine. Wanna kashrijetka. Gitsrukaachinunepa.

Petro yotunkaklo Tawita

³⁶ Gope twa sato Gitsrukaachi yimaklero, Tawita giwakatletachro. Walenwa yokaakaluru Kshotero. Kigleru kamruijetachro. Kwamonurune genekjetachro. ³⁷ Wane rixatka walegognekaka. Tyayixana. Tupnanatka. Rerkatkalona. Tenogruko rutakanrona. ³⁸ Litaya gi gowuklu Gope. Giyagni wa Gitsrukaachi yimaklene yijnakotlu wa Petro wane gwanata. Gepi jejine yokanyegitluna. Ragjityapluna, “Gi pyoxigikamtanu. Punyegitanwu.”

³⁹ Giyagni Petro palnamta. Wannayma wane ya. Rapokatka. Tenogruko ranikatkaluna. Walesti tunwatna pejnuruneko gipnagnurutachrone. Chiyatagtna. Rekakgitluna gitokoochi ga wa mkachri wa Kshoterni kamrurni wanna yegi twanatini.

⁴⁰ Giyagni pejnuruneko maleka yokanata Petro. Yoptsojita. Ragjigogneta. Ruprotakyegitlo tomane. Wane china, “Tawita, pyotunotanutka.”

Tumrekgata. Tetlu Petro. Tuplata. ⁴¹ Romyokyegitlo. Tunwakaklo. Giyagni tomgana kpashirine ga wa gipnagnurutachrone. Giwekachro rekakgitatka. ⁴² Wale gimatka psoluyako Gopeya, ga wa gixo galixlu Gitsrukaachi. ⁴³ Wane rixa Petro. Gi gepikgogne Gope rawa Simopji, nikchimta yoshmojetachri.

10

Kornelyo kaygawle

¹ Susari rawanata satu jeji Kornelyo giwakatletachri, ksolaloteru gixolune solalone Gitalyanone chinkalune. ² Kgipashiregolu. Goyakalu pikachri pejnuruneko gipji gajeneyamananuko. Kgetwamonreru. Renekashjetna yine. Goyakalu ragjigognejeta. ³ Kayinwaka retpotutlu kaygawleya satu Goyakalu towreru. Reta jiglokleyegitlu. Wane chinru, “Kornelyo.”

⁴ Retpotutlu. Pikanatka. Wane china, “¿Klunerni, Gitsrukaachi?”

Wane chinru, “Pagigognere ga wa petwamonrekaka Goyakalu getanu rushinikikolpatka. ⁵ Ga wa xani pyokanatanna jejine Gope yinripna. Pepukanru satu Simo. Yoklegiwaka Petro. ⁶ Wa Simopji rawanata, kyoshmomtakleru. Tsru wenustsi gwap jitachri,” china.

⁷ Wa yinitka Goyakalutowreru Kornelyo giynumsatachri. Tomgana gepi kamrurewyegitjene, ga wa satu solalo kgipashiregolu, satu rupxaletjetanruymalutu. ⁸ Runkakna pejnurukopirana. Yukanatatkana Gope.

Petro kaygawle

⁹ Waleprika yagaponatatkana wanna. Tsru pokchistsi rapokinitkana, Petro tenogruko ratskota, ragjigognetinripa. Tumananustsitkani. ¹⁰ Wane rixa. Nachpotunru. Raluka nikletana. Ralpokokopshinna, rushpan shinikanuta. ¹¹ Retu tengogne gitpukachri. Reta gjirukletu katlogam-nuru. Tsru mkkachrichrata pixka rixa. Gepkoxamkojetsojri gishrikikaluru. Jirruukaluru. ¹² Wane rawamtna ptowrunanuka nikchine gepkoxamko-jejixirune, ga wa yosrolotachine chiji gajene, ga wa tengogne yapachine kamejirune. ¹³ Satu tokanchi jema, “Palnanu, Petro. Puylatanru. Pnukanru.”

¹⁴ Giyagni Petro wane china, “Gitsrukaachi, gike nixiniko. Gi rixanu gi pagogneko gimuteru, kapcholu nnikjejeta.”

¹⁵ Gepi kata chininri jemtnaklu tokanchi wale yegi: “Wa Goyakalu powratanru gi wa gimuteru pchinanutkalu.” ¹⁶ Mapkata wane rixatka. Waneklu gitloga tengogne rawikatka.

Petro yoptotna Kornelyo yokanatanune

¹⁷ Petro gi rumatanshinikanunata walenanuko klnerni wa kaygawlu retyawaka. Waneklu wa Kornelyo yokanatanune jejine gipgyapo gapokatka. Repomsayeginanumtluna Simopji. ¹⁸ Tomgana. Repomgana gitka xani wane rawanata Simo wa Petro yokletgiwakatletachri.

¹⁹ Yanshinikanunatinawa Petro wa kaygawleya, wane chinru Giwekkikaluru, ²⁰ “Pete. Mapa jejine gjgai. Ga wa xani palnanutka. Pujrukanutka. Gi putakyagoka yaletanu. Wannayma pyanu. Gi rixanu Gita yokanatna.”

²¹ Giyagni Petro gjirukyegitna jejine Kornelyo yokanatanune. Wane china, “Getanno. Gitni wa gjiganrungo. ¿Klu chinanu gina?”

²² Wa wanna wane china, “Kornelyo wa ksolaloteru, jeji moyagkakachri, Goyakalu pikachri, kiglepiranyegirni pejnuruneko Goteyoneyegiya. Satu Goyakalutowreru kpashiri yokanatu wale gwapjixapyapi, gipji pyinripa. Yijnakotokanutanyi.”

²³ Giyagni chanixna jiglokinripna. Renekna rumkiyawakapna. Waleprikgogne yotunota. Wannayma wane yatka. Waleyemannuna pimrine Gope gajene moletkakachine.

Kornelyopji rapoka Petro

²⁴ Pagognetnakni Susari rapokna. Kornelyo kagwakanatna. Rapatanunetka gimalene ga wa rumatletanune potu. ²⁵ Wane rixa. Petro jiglokamtinitka, Kornelyo yoptotaplu. Chiji rapokamta gjixistsi. Yoptsojityegitlu.

²⁶ Giyagni Petro palnakaklu. Wane china, “Palnanu. Yinerkoxno git.”

²⁷ Ruynumsakakamtatkana waleyma. Jiglokamta. Retna gixo gapatanata-chine. ²⁸ Wane chinna wale, “Gixa gimatlu ginanshichkaluru satu jeji Goteyo gipxaletyaplu payineru, yayegityaplu. Ga wa Goyakalu gekakgitno gi satuna yineru gimuteru, kapcholu chinkalurupa. ²⁹ Giyagni nepuuka pnumnu mchinkatno nuna. Giyagni nepomgayi, ¿klu chinanu pepukno?”

Kornelyo ginkaklu Petro klu chinanu repuklu

³⁰ Kornelyo wane china, “Gepkoxamkojegognetkani xanipapko nogajirewanata. Kayinwakpapko nagjigognenata nopjiya. Netlu satu jeji. Tunwaginapletno. Katajimkalu. ³¹ Wane china, ‘Kornelyo, pagjigognere jemkalurni, ga wa petwamonre gishiniikalurni Goyakalu getanu.’ ³² Giyagni Gope pyokanrewatanu,’ chinno. ‘Pepukanru satu Simo, Petro yokletgiwakatletachri. Simopji rawanata, kyoshmomtaklerupji, tsru wenustsi gwapjitchiri.’ ³³ Giyagni waneklu nyokanrewata pixa yegi. Kigleru pkamruta

punyawaka. Ga wa xani geewu pejnurunekwu wixa Goyakalu getanu, wyijnakotyapyi pejnuruko Gitsrukaachi yokanatyayi.”

Petro ginkaklewle Kornelyopjiya

³⁴ Giyagni Petro yanumata. Wane china, “Galikakni numatjematkalu gi wa manewle giglenu chinanu yoptyaplu Goyakalu wa yineru. ³⁵ Seyni payinerumnunanuka Wale pikachri, poyagkakachri, walenna Goyakalu gigleretanru. ³⁶ Gisrayilineklopishane yegi yokanatl tokanchi. Tyenwa Kiglerpotunanu Tokanchi giclewanshinikanrupirana Geso Kristo chinanu. Walenna pejnuruneko Gitsrukate. ³⁷ Gixa gimatlu tokanchi pogitkaluru psoluko Goteya. Kalile yinuwakya. Wane chininitka katlu wa Gwa runkakletanru. ³⁸ Wa Geso, Nasare gajeru, wa Goyakalu Giwekkaluru Kpashiri gipkakyeginanru, ga wa gyaklu koxa. Wa Wale pnummu yapananumta. Kigleru kamrunanumta: rutuukakna pejnuruneko tsru kamchi kapsakletanune, gi rixanu Waleymalu Goyakalu.

³⁹ “Wa wixni wa gipgujtatachinwu pejnurupirankakayako wa Gotechijne kamrutinri ga wa Gerosale. Wa Wale ruylatna. Ruxripkakluna gagmnashkitaya. ⁴⁰ Wa Wale Goyakalu yotunkaka mapgoggne chininri. Ruchichlu rupgujewnniripa. ⁴¹ Gi wa pejnuruneko yine yegi rapoka, seyni gipgujtatachinyegipje, wa Goyakalu muchikawa tsomitanune, wa wixa Waleyma nikachinwu ga wa girachinwu rapyegita, rali yotunremtinitka gipnachinet-skalya. ⁴² Yokanatwu wa yinyegiya wunkaklewatinripa ga wa wupgujtayaplu; wane wchinanu wa Walenna Goyakalu gitakanru gitakyagokle-watachripa giwekkachineya ga wa gipnachineya. ⁴³ Pejnuruneko tokanchi geneklewatachine gipgujtajenatanruni wa Wale. Wane chinna wa pejnuruneko wa Wale galixachinepa kaspukmukochiretkalunepni giwakaya.”

Payineko yoptotlu Giwekkaluru Kpashiri

⁴⁴ Wa yanumsatiniwa Petro tyepirana, wa Giwekkaluru Kpashiri gapokyeginna pejnuruneko wanna tokanchi yijnakonatachine. ⁴⁵ Rumyekna galixachine sajrukistaakalune Petro gimsatsatachine gi rixanu payine koxa yegi rupkaaka geneakashlu Giwekkaluru Kpashiri. ⁴⁶ Rumyekna gi rixanu yijnako yanumsaletkana payinerunemnuka tokanu ga wa rumalwtulna Goyakalu.

Giyagni wane china Petro. ⁴⁷ “¿Katu gimkata ginanshiretlu gonu wa ma katikotupna wa nyi Giwekkaluru Kpashiri yoptyotachine wixako pixka?”

⁴⁸ Katjixatkana Geso Kristo giwakaya. Giyagni ragjtluna pimrigognechi wanna yegi rawinripa.

11

Petro ginkakna Gerosale gapatjetjache

¹ Yokanatkalue ga wa moletkakachine Gote gwanatachine yijnakyeginna wa payineko koxa wa Goyakalu tokanu yoptyawakatkana. ² Wa Gerosale kanikinitka Petro, yoptyopratluna wa sajruka gistaakotachine. ³ Wane chinna, “Pixni jiglokyeginna jejine msajruka gistaakotkone. Wannayma pnika.”

⁴ Giyagni Petro yinuwaka ginkakpokowaklepotutna. Wane china, ⁵ “Gope Pokchi nwanatiní, nagjigognenatini. Nushpkanshinikanuta. Kaygawleya netlu katlogamnuru gjrukachri. Tsru mkachrichrata pixka rixa. Gepkox-amkojetsojri jjrukikaluru tengogneya. Gita yegi rapoka. ⁶ Nyopukgatlu. Netpotutlu. Nikchine chiji gajene gepkoxamkoojixirune, ga wa kmatsu-rune, ga wa yosrolatachine, ga wa kamejirune tengogne yapachine neta.

⁷ Nyijnakotlu satu tokanchi wane nchinjeru, ‘Palnanu, Petro. Puylatanru. Pnikanru.’

⁸ “Wane nchina, ‘Gitsrukaachi, gike nixiniko. Gi rixanu gi pagogneko gimuteru, kapcholu jigloknamatno.’

⁹ “Giyagni gepi kata chininri tengogne giyakatyachri tokanchi gigitno, ‘Wa Goyakalu powratanru gi wa gimuteru pchinanutkalu.’

¹⁰ “Mapkata wane rixatka, ga wa pejnuruko tengogne rawikatka.

¹¹ “Waneklu rapokna mapa jejine wa nwapjitanru. Susari yokanatikna gita yegi. ¹² Giwekikaluru wane chinno nma mutakyagoka yaletinitipa wannayma. Giyagni nyatka. Gitaymalune koxa nyi patsrujire nomolene. Satu jejipji wjigloka. ¹³ Wale ginkakwu gikta rixpoko getletlu Goyakalutowreru gipjiya. Wane gima tunwanata. Wane chinru, ‘Gope pyokanrewatanu. Pepukanru satu Simo, Petro yoklegiwakatletachri,’ chingimata. ¹⁴ ‘Wale ginkakanyi tokanchi, wa wale tokanchi chinanu pognetkaako pixa ga wa pejnuruneko pupji gajene.’

¹⁵ “Giyagni nyinuwaka ginkaklewyegletinna, rapyegitna Giwekikaluru Kpashiri wixa muchinanu pixka, wa rapyegitinitkawu. ¹⁶ Giyagni nushinkaplu Gitsrukaachi tokanu. Wale chinyawaka, ‘Gwa katilewata galikakni gonuya, ga wa Giwekikaluru Kpashiri gkatikolupa gixa.’ ¹⁷ Giyagni wa Goyakalu renekinna waleko genekashlu koxa wa wixako pixka, wa Gitsrukaachi Geso Kristo galixachinwu, *ügi* gixachripno gita numkata gimaletletyapmaklu Goyakalu?”

¹⁸ Giyagni yijnakpiranatluna tyekaka, ruchkekna. Rumalwutluna Goyakalu. Wane china, “Giyagni Goyakalu geneekoxna payine renshinikanutinripna, ruwekinripna.”

Gantiyoki yokanatka Wirnawisi

¹⁹ Giyagni wa gipalatachne salewakchiya Gishtuwni chinanu, pnumnu yapananumtna, Winisipotuko ga wa Supro, ga wa Gantiyoki. Gike runkakna wa tokanchi, ga wa Goteyonepjé. ²⁰ Wanena pimrine wa nyi jejine Supriyone ga wa Surenensene, Gantiyoki rapokinikitana. Kriykone runkakna Kiglerpotunanu Tokanchi Gitsrukaachi Gesopirana. ²¹ Wannaymalu Gitsrukaachi. Gixolune galixa. Wanna kashrijetka Gitsrukaachinunepa rixinripna.

²² Gapatjetachne Gerosale gwachine yijnakotlu tyepirankaka. Wirnawisi yokanatna. Gantiyoki yinripa. ²³ Wa wale gapokinitka, retlu Goyakalu gimutyawakna. Rumjika. Ruykotna pejnuruneko psolgalukleya rajinya Gitsrukaachi yegi rawgognenatinripna. ²⁴ Gi rixanu jeji kiglerni. Giwekikaluru Kpashiri gwagajitanrupotni ga wa kalixaklerpotni. Gixolune yogiwnananumtna Gitsrukaachi yegi.

²⁵ Tarso yatka Wirnawisi. Sawolo rujga. Rukshiklu. Gantiyoki raniklu.

²⁶ Psolwalapuko gapatjetachneymana. Gixolune yine runkakpokowakye-gitna. Kristonune chinkana Gitsrukaachi yimaklene muchinanu gapka Gantiyokiya.

Gakawo ginkakagnaputlu tsru nachlupa psolchijiyakopa

²⁷ Walegognekaka Gerosale yopikyana tokanchi geneklewatachne. Gantiyoki rapokna. ²⁸ Satu tokanchi geneklewatachri palna. Gakawo giwakatletachri. Runkakna Giwekikaluruya waneplu tsru nachi psolchijne gajenpotunanuko yegi. Klawtyoklunanu wane rixanata. ²⁹ Giyagni Gitsrukaachi yimaklene wane rixanshinikanutna yokana gipxakletinripna Gote gwachine moletkakachne yegi. ³⁰ Satkaka poyagotyawaka wane rixle yokanatanu. Wanepotuko rixna. Wirnawisi, Sawolo ganiklu tsrune yokanyegitikolu.

12

Santyakni ruylajixa Girore; Petro yoshmaakaluru

¹ Waneklu koxa pogirchi Girore kashichjixanna pimrine gapatjetachine yenetyapna. ² Gwa yegwakluni Santyakni yoglolewapi ruylajixya. ³ Retlu Girore waleko rugleretkakna Goteyone, pnute rixa. Petro koxa kashicha. ⁴ Wa jimapro gisekachri myapjetkotgognekakni. Wa kashichinitkalu Petro, yoshmakikowaka rutakjixlu. Gepkoxamkojeptogi solalone yegi samyoklu, rumretyapluna. Ruknoginitka Tsru Giknoglushgogne raluka koshpakletlu yine chinanu.

⁵ Guyagni Petro yoshmakikowaka girukotika. Ga wa gapatjetachine psol-muchonuko Goyakalu ragjigogneyegitluna.

Yoshmakikowaka koshpakika Petro

⁶ Wa Girore galuka koshpakletinitkalu, walyechno Petro gimkanata gepi solalone ganikajite. Gostutkaluru gepi yowumatsaya. Wa girukowatachime gipgyapto ginapleya girukotluna yoshmakikowaka. ⁷ Gitsrukaachitorreru gapoka. Pokamlalu yoshmakikowaka gatajitya. Petrokwanapa ruylaka. Komyeklu. Wane china, "Giyampotu pyotunotanu."

Rujrukatsamtatka yowumatsa gimony gajerni.

⁸ Goyakalutowreru wane chinru, "Pushrikapchijitanu. Postutanru pyoshmakjixre."

Wane rixa. Wane chinru, "Pyoshmamkatanu. Pomkagittanno."

⁹ Rushpakamta. Romkagimtakalu. Gi wa rumata wa galikaka rixinri wa Goyakalutowreru wane gixyawaka. Wale kagwaklu kaygawlu reta. ¹⁰ Ruknogamtluna muchinanuptogi girukowatachime, ga wa gepi chiniinriptogi girukowatachime. Yowuma gipgyapto rapokna, maleka gish-pakikowaka, pokchi ganikajite. Wa gipgyapto gitpukamta walenanuko wanna chinanu. Rushpakamtna. Ruknogamtluna pagapo. Waneklu Goyakalu towreru gitspalamtyatkalu.

¹¹ Rushnikpotutatka Petro. Wane china, "Xawakni numatattkalu galikakni wa Gitsrukaachi yokanatlu gitowreru; koshpakapno Giroremyoya, ga wa pejnurukoya Goteyone kagwakanatyatkano."

Petro ginkakpokowakatlu yoshmakikowaka koshpakkolu

¹² Rumata jematkalu. Mariyapji yatka. Gwa, Marko yokletgiwakatachri ginropji, gixo gapatanatyawaka. Ragjigogenatna. ¹³ Maleka gajeru gipgyapto ruylaylata Petro. Tushpakamta sato tserowaklechi, Rote giwakateltachro, tyijnakotinripa. ¹⁴ Tumat yijnakootokanutinitkalu Petro, tumuwlepoga gi tkotpuklu maleka gipgyaptote. Seyni gitokogruko tya gasukleta. Tunkaklewata wa Petro maleka gipgyaptote tunwatinritka. ¹⁵ Wanna wane chinro, "Pseprolokana." Seyni wala tupnaje ginkakleta wane rixinri.

Giyagni wanna wane china, "Goyakalutowreru, Petro girukotachrini xani."

¹⁶ Seyni Petro gomkagi giylaylagipgyaptotleta. Kotpukyegitinitkaluna. Rumyekna. ¹⁷ Seyni yotukamyoyeginata pochke rixinripna. Runkakna gi rixpoko koshpakletlu Gitsrukaachi yoshmakikowakanya. Wane china, "Ginkakanna Santiyako ga wa moletkakachine tye pirana."

Rushpakamtkatka. Pnuko yatka.

Girukowatachime ganiika Girore yegi

¹⁸ Wa gogi chininitka tsru kegeknantuwl u rixna solalone Petro chinanu klukta giknogyawakatkalu. ¹⁹ Girore gjigapotutlu. Gi wa rukshiklu. Repomsapotutna girukowatachime. Rali gepomsaletinna ruylajixanna.

Girore gipnale

Wanepnute Girore Gote yopikya. Susari ya. Wane rawanata.
 20 Ruylakakna Girore wa Tiro gajene ga wa Sito gajeneyma. Seyni
 pansiñikanurunetkani wale yegi yana. Rushinikanutluna Plasto, pogirchi
 gimkiyawaka girukotachri. Rawashatinripna ragjitna, gi rixanu wa
 gichijnhana gajene waneyna nikanruna pogirchichijneya.

21 Rutakgognetka pagogne. Girore gitaklu pogirchimkalu. Pogirchi tu-
 plapijere tuplata, ga wa runkaklewyegitna. 22 Saplewatna yine, “Goyakalu
 tokanuktani. Gi wa yinerunni.” 23 Waneklu Gitsrukaachitowreru giylatanru
 Giroorni, gi rixanu gi wa Goyakalu rumalwujixa. Tsomi nikanru. Rupnana.

24 Ga wa Gitsrukaachi tokanu tseruwna. Ruxolewna.

Wirnawisi ga wa Sawolo Gerosale satokyatka

25 Poyagkakinitkaluna kamrurna Gerosale satokyatkana Wirnawisi,
 Sawolo. Raniikoxluna Gwa, Marko yoklegiwakatletachri.

13

Wirnawisi ga wa Sawolo yinuwaka yagapgaleta yokanatkalune chinanna

1 Gantiyoki gajene gapatjetachinetskalaya wanena tokanchi genekle-
 watachine ga wa yimaklewatachine. Wirnawisi, ga wa Simo, Nigi gi-
 wakatletachri, ga wa Losyo, Surene gajeru, ga wa Manaya tseruwaakaluru
 Giroreyma, pasreta girukotlewatyachri, ga wa Sawolo. 2 Wanna yono-
 gyegitlu Gitsrukaachi, ga wa rogajirewatna. Wane china Giwekkaluru
 Kpashiri, “Gkotspalattno Wirnawisi ga wa Sawolo kamrurchi chinanu.
 Wale chinanu ntomgana.”

3 Giyagni rogajirewatna. Ragjigognetna. Wannatseptagi rutakamyotna.
 Yokanatkatkana.

Supro runkaklewatyana Wirnawisi, Pawlo

4 Giyagni wanna yokanatkalune wa Giwekkaluru Kpashiriya yopikna.
 Selesi rapokna. Wane yagapgatyana. Supro rapokna. 5 Salamina rapokat-
 nakna. Wane runkaklelyaluna Goyakalu tokanu Goteyone ginkaklewawak-
 lepjikaka. Waneyamnuna Gwa kamrurewyegitjerna.

6 Koprutna psolu kniprekako, Papo rapokinpotukna. Wane retyaluna satu
 jeji kagonchi, tokanchi geneklewatachri wale potu migje. Goteyni. Wargeso
 giwakatletachri. 7 Sergyo Pawlo girukotlewatachriymalu Wargeso. Jeji kgim-
 matkalerni Sergyo Pawlo. Wale gepukna Wirnawisi ga wa Sawolo. Raluka
 yijnakletlu Goyakalu tokanu. 8 Gilima kagonchimka gaalixna. Gilimni wa
 yokaakaluru Wargeso giwaka. Raluka satoakakletmaklu girukotlewatachri
 ma malixinitipa. 9 Giyagni Sawolo, walenwa Pawlo, Giwekkaluru Kpashiri
 gwagajitanru potu, retpotutlu. 10 Wane chinru, “Psolpotuyako kyokwire-
 wakleryi, mshinikanutyi. Tsru kamchi wgenyi. Poyagkaklewlu gayegix-
 achriyi. ¡Wuya! ¡Pkaspuka yoliwgapkakletanmaklu potukgapolu Gitsrukaach-
 inu! 11 Ga wa xani, Gitsrukaachimyo pixa yegi rapoka. Metashatkatunapyi.
 Gowukshinina gi petlewatanuna tkachi.”

Waneklu rapyegitanatkalu yachgapere pixkalutu ga wa mapshagalu.
 Sajrurunatanatka. Rujgalu kanjitzerupa. 12 Giyagni wa girukotlewatachri
 wane gixkaluru retinitka, ralixa. Ruglajitana Gitsrukaachi tokanuya.

Gantiyoki, Pisirisreta, runkaklewatinri Pawlo

¹³ Papo rutspegyatkana wanna Pawlo. Perge yana Pampirisreta. Ga wa Gwa gitspalatyana. Gerosale satoka. ¹⁴ Perge yagappgatyana. Rapokluna Gantiyoki, Pisirisreta. Gapnanutikalurgogne jigloklna ginkaklewawakapji. Wane tuplatna. ¹⁵ Retyongatka Tokanchi Yokanatkaluru ga wa tokanchi geneklewatachine kirukate. Rali getyongaletkoklunu yokanrewatna ginkaklewawakapji gitsrukatenew wanna yegi. Wane chinjixkana, “Jejine, wumolene, waneygi nchininipa satu tokanchi yine giykitinripa, ginkaklewatanu.”

¹⁶ Giyagni Pawlo palna. Yotukamyoyegetna pochke rixinripna. Wane china, “Jejine, Gisrayiline, wa Goyakalu pikachine, giyjnakotanu.

¹⁷ Wutsrukatenni tsomita nyi Gisrayiline Goyakalute. Pnu gajene rixanatinna Gigiptyoa, tsru potu rixkakna. Tsru ruyakle wane koshpakyana. ¹⁸ Gepkoxamkojmole walapupshini Goyakalu gakotlu rixjetyawakna yineru mwiyawakanuya. ¹⁹ Payokgipreneru nikata Goyakalu Kanachijneya. Payinnichijne renekna.

²⁰ “Ruknoginitka gepkoxamkoje pacha pamymomole walapu, renekna gitayagoklewatachine, Samyro tokanchi geneklewatachrikilupotunanku.

²¹ Wanepnute pogirchi renekikolupna ragitna. Goyakalu genekna Sawolo, Susu wgene, jeji Wigamiklopisha, gepkoxamkojmole walapu rawinripa.

²² Konkoklunutka wale. Tawi renekna Goyakalu pogirna rixinripa. Wane china gipgujtaletlu, *Netlu Tawi*, Gesi wgene, *nugleretgajityawaka*. Wale kamrutanru pejnuruko nalukanru.

²³ “Rupiratyawakpotuko waleklopishaney Goyakalu gipgujewnakkaku Geso, Gisrayiline Gognetkakachritka. ²⁴ Ma munkanuwa Geso, Gwa ginkakletlu katlu genshinikanrupirana pejnuruneko Gisrayiline chinanu. ²⁵ Wa poyakkaka kamrurenanumtinitka Gwa, wane china, ‘Giru gkagwakyano? Gi wa gitni gkagwakanru, seyni runa satu najxigi. Gi wa gita gimukluni nkoshpirokayaplus yoshmaklejixitsa.’

Gesoya poyaggakikolu Goyakalu gipiratanru

²⁶ “Jejine, nomolene, Gawraklopishane wgenengi, ga wa gixatskala gwichine. Goyakalu pikachingi, Goyakalu yokanyegitgi gixa tokanchi tye gognewatikalurupirana. ²⁷ Gi rixanu wa Gerosale gwachine ga wa rutsrukattena gi rumatluna gognewatikalurupirana. Ga wa gi rumatluna wa tokanchi geneklewatachine tokanu pagapnanutikalurgognemnu retyontatka. Giyagni poyaggakluna tye tokanchi wa Geso ruklukanuw-nayegjixyana. ²⁸ Gi rukshika giklukanuwaletluna rupninripa, seyni Pilato ragitna ruylatikolupa. ²⁹ Poyaggakinitkaluna pejnurkakako Walepirana yonatkaluru, gagmunashkitaya rawiyatkaluna. Yomlechi rutakluna. ³⁰ Seyni Goyakalu yotunkaklu gipnachinetskalaya. ³¹ Gixgogne retkatnaka rukanikanunyea wa Kalileya kanikini Gerosale. Wannanwa yine yegi rupgujtajtene.

³² “Wixa koxa ginkaklewyegitgi Kiglerpotunanu Tokanchi wa gitsrukatenni gipiratyegitkalurupirana. ³³ Wanepotuko Goyakalu poyaggakatkalu wannaklopishane yegi: wixa yegi yotunkakatkalu Geso. Shikalchi geipi chininri chinyongatyawaka koxa:

Pixni Noturyi. Xawakni nwugeneri.

³⁴ “Kapiranalni wa tye: wa gipnachinetskalaya yotunotinri Geso, gi pagoneko gjpagikowaka satokinripatka. Wane china: *Nenekangi kpashirkaka gaponshinikanutkaluru Tawinu.*

³⁵ “Giyagkoxni wane china satu shikalchiya:
Gi puchi gjipagletanru Pixa Wgene kpashiri.

³⁶ “Gi rixanu Tawi galikakni gigogne gajene gipxaka. Rali gipxakletinitkana, rapnanutatka. Rutsrukatenyi yegi rutaaka. Rujpaganatka. ³⁷ Ga wa Wale Goyakalu yotunkakanru gi gipaga.

³⁸ “Giyagni jejine, nomolene, gimatanru runkakletka gixa chinanu kaspuka mukochiretikolu Waley. ³⁹ Moysisi Tokanu Yokanatkaluruya gi gimpata ptowruyako muklukanuwnakaakone gixletna yine, ga wa Gesoya ptowruyako muklukanuwnakaakonetka rixinritkana pejnuruneko galixachine. ⁴⁰ Giyagni getinwa ma munyeigitinitipi wa tokanchi geneklewatachine chinyawaka:

41 Getanu kgeyikaklerune.

Giglajitanu. Gisuptagananu.

*Gi rixanu kamrurchi nkamrutanu
gixagogneklu.*

*Kamruchi satumka ginkakpokowakatangi
gi galixanru.”*

Gixo Goteyone ga wa Goteyo gitaknachinwa gomkagitlu Pawlo

⁴² Goteyone ginkaklewawaklepji rushpakinitkana Pawlo ga wa Wirnawisi, payine gagjita tujra gapnanutikalurgogne runkaklewyegitikolupna tyepirana. ⁴³ Rungakatkana gapatachaine. Gixolune Goteyone ga wa Goteyone gitaknachinwa kyonogiklerune, Pawlo romkagitna ga wa Wirnawisi. Pawlo ga wa Wirnawisi giynumsatna. Rushinikanutkana Goyakalu yegi rawinripna Wale gimutyapna.

Wirnawisi ga wa Pawlo yayegitatkana payineko

⁴⁴ Giyagni rapokinika gapnanutikalurgogne psolu pokchi gajenenshinikanuko gapatjeta yijnakotyapluna Goyakalu tokanu. ⁴⁵ Ga wa Goteyone getna gixolune yine. Ranxapotutna. Giyagni Pawlo ginkaklewle yoptopiratna mupashiregona.

⁴⁶ Giyagni Pawlo ga wa Wirnawisi pgujetanuwaka china ginkakletna. Wane chinna, “Gixa muchinanu gapka wumkata ginkakleta Goyakalu tokanu. Seyni gi rixanu gixa giknoklu, ga wa gitakyagoknawa gi wa gimuk-nuni gyroptotyalu giwekinri mnikawnakatu, xanipatka pnuko gayanutka payine yegi. ⁴⁷ Gi rixanu wane rixa yokanretwu Gitsrukaachi:

Nutaki payine pokamlatyegitachripyi

*Gognewatikaluru chinanu pixinripa
yoptukyawakpotunanuko chiji.”*

Pawlo, Wirnawisi Gantiyoki giknokikalurune

⁴⁸ Payine yijnakotinri tyepirana, rumuwatna. Rumalwutluna Git-srukaachi tokanu. Ralixna pejnuruneko wa gitaaikalune waneyapna ruwekinrina gike rixiniko mnikawnakatupa. ⁴⁹ Wa Gitsrukaachi tokanu psoluko walesretaya raniika. ⁵⁰ Ga wa Goteyone yokshatna sxone kyonogiklerone wannapotune, ga wa tsrukakalune pokchi gajene. Pawlo, Wirnawisi chinanu kojwawakchi gixkaaka. Ruknookana wanechijneya.

⁵¹ Giyagni wa wanna ruplokjiximtna gistapjixnapagi wannayegiya. Gikonyo yatkana. ⁵² Giyagni Gitsrukaachi yimaklene gimuwaatachaine potu ga wa Giwekkaluru Kpashiri gwagajitanune potu rixna.

¹ Wane gixlutkani Gikonyo yana. Pawlo, Wirnawisi jigloklu Goteyone ginkaklewawaklepji. Wane rixa ginkaklewletna wa gixolune yine galixatka, Goteyone ga wa Kriykone koxa. ² Ga wa Goteyone malixkane komyekan-shinikanutna yine. Yokshatkana moletkakachine chinanu. ³ Giyagni gi gepikgogne wane rawna. Pgugjetanuwaka china ginkakletna Gitsrukaachi chinanu. Wale gipguitajetlu tokanchi Gitsrukaachi gimtulewleyapirana. Renekna getkalurkaka, koglajrukaka. Wannamyoya wane rixika. ⁴ Seyni gixolune pokchi gajene kotpalanshinikankaka: pimrine Goteyoneyma, pimrine yokanatkaluneyma. ⁵ Payne giptekyegimtmakna ga wa Goteyone koxa, rutsrukateneymananukna. Yenetikolupmakna ga wa sotlujetikolupmakna. ⁶ Wanna gimata. Rasukna. Listra, Terwe yana, pokchikaka Likayon-isretaya ga wa sajrukyawaka chiji. ⁷ Wane runkakletyaluna Kiglerpotunanan Tokanchi.

Goyakalune kagwakikna Pawlo, Wirnawisi

⁸ Listra gajeru jeji muglejxitu tuplanata, myankatu rushpakinyakawa. Pagogne myanjejetktu. ⁹ Wale yijnaka yanumsaletlu Pawlo. Pawlo yopuk-gapotutlu. Retlu ralixinri rutuuakakilupa. ¹⁰ Muchkowtokanuta. Wane china, “Palnanu. Potuktunwalepyi.” Ruptekapa. Yanamtatka.

¹¹ Giyagni yine getinri wa Pawlo kamrutanru, sablewatna. Likayoni gajene tokanu wane chinna, “Goyakalune, jejine pixkalune wixa yegi gi-rukachine.”

¹² Giyagni Gopite chinruna Wirnawisi, ga wa Pawlo Merkoryo chinruna, gi rixanu walenwa tokanchi ginkakletjepotuta. ¹³ Giyagni Gopite sasertotete pokchi ginaple gwachri, gipgyaptokaka ranikna wakane jejine ga wa gigleg-wutkaluru. Raluka genekashetlu giylatkaluru yineyma.

¹⁴ Wanna yokanatkalune Pawlo, Wirnawisi yijnakotinitkalu suskakamatna. Rakaxikamtna. Yine ganikajite rapokna. Sablewatna.

¹⁵ Wane chinna, “Jejine, Ɂklu chinanu wane gixa? Yinkoxwu wixa. Gixa pixka geta salewnaletachinwu. Kiglerpotunanan Tokanchi wunkakleta gkashrijetikolupa tyekaka gike gaprimigjeya. Goyakalu giwekachrinunepgi. Tengogne kamrutachri, ga wa chiji, ga wa tsru wenu, ga wa ptowrunanuka wanerutu kamrutachri. ¹⁶ Giknogachri gwashlukakatka Wale getashatna payinemnunanuka wannako gigapo yapinripna. ¹⁷ Seyni koxa gi wa mupguitatkuo retashyegitnawa. Seyni kigleru kamruta. Teno giyakatyachri gina renekgi, ga wa jirgalupapko. Poyampotutyawaka renekgi gnikjetanruya, ga wa gimuwleya.” ¹⁸ Wane chinikopshinna kyapreru rumkata gituukakletna yine ma menekashatikotupna giylatkalurupmaka.

Listra sotlujetika Pawlo

¹⁹ Rapokna Gantiyoki ga wa Gikonyo giyakatyachine Goteyone. Rushinikanutkana gixolune. Sotlujetluna Pawlo. Gipnachri kagwakyaluna. Pokchi kotlolomtyatkaluna. Maleka rutakluna. ²⁰ Wa Gitsrukaachi yimaklene sajruklu. Yotunota. Pokchi satokatnaka. Waleprika Terwe yatkana Wirnawisiyama.

²¹ Wane pokchi Kiglerpotunanan Tokanchi wanna ginkakletya. Gixo yimaklene rixkakna. Listra satokatkana, ga wa Gikonyo, ga wa Gantiyoki. ²² Muchkotanshinikanutkana Gitsrukaachi yimaklene. Ruykotkana romkaga galixletinripna. Ruykotkana wa gixo salewakchyma wumkata jiglok-letyaplu Goyakalu pogirewatyawaka. ²³ Satkaka gapatjetikwaka rutaakana tsrune. Ragjigogneta gogajirewatachine. Gitsrukaachi raponshinikanutna wanna chinanu, wa ralixinrutkana.

Suri satokyana; Gantiyoki yana

²⁴ Pisiri yapa kopruremtna. Pampiri Pokchi rapokna. ²⁵ Perge runkakletyaluna tokanchi. Gatali yopikna.

²⁶ Wane rutspegyana. Gantiyoki rapokna, wa Goyakalu gimuslelewle rumaponshinikanitokwakna kamruruchi chinanu, wa poyagkakapanrutkana. ²⁷ Rapokinitkana, wanna gapatjixna gapatjetachine. Runkaklewatna gi pejnunanukta Goyakalu gikamrurewatyawaknapirana, ga wa Goyakalu kopukyegitna payine galixlu gipgypotote. ²⁸ Gi gepikgogne wane rawna Gitsrukaachi yimakleneyma Pawlo ga wa Wirnawisi.

15

Gepomsakaklu wa sajruka gistiklewlupiranaya

¹ Wa pimrine Goteya giyakatyachine ginkakna moletkakachine. Wane chinna, “Gma sajruka gistikletkonu wa Moysisi gixjixlewatyawaka, gi gimkata gognetkaakotanu.”

² Giyagni waneru tsru gigiekaklu, gepomsakaklu Pawloyma ga wa Wirnawisi wanna chinanu. Rutaakana Pawlo ga wa Wirnawisi Gerosale kanikinripna, pimrine wannayma, wa yokanatkälune ga wa tsrune yegi tye gepomsakaklu chinanu. ³ Giyagni wanna gipxaletamtka gapatjetachineya. Winisi yapa kopruremtna ga wa Samari. Runkaklewananumtna payine kashrijetikolupirana. Tsru gimjiklu rixkakna moletkakachine. ⁴ Gerosale rapokinitkana, yoptotkana gapatjetachineya ga wa yokanatkälune, ga wa tsruneya. Runkaklewatna gi pejnunanukta Goyakalu gikamrurewatyawaknapirana.

⁵ Giyagni tunwatna pimrine Gwariseyone mkoje galixachinetka. Wane chinna, “Rumkata sajruka gistaakotkana. Rumkata kamrujixkotkana Moy-sisi Tokanu Yokanatkäluru.”

Gapatyawaka Gerosaleyä

⁶ Yokanatkälune gapatjeta ga wa tsrune rumatyapluna wa tyepirana.

⁷ Tsru gepomsakaklu wane chininitka, palna Petro. Wane chinna, “Jeline, nomolene, gixa gimatlu wa muchikawako Goyakalu tsomitno gita tokanuya wa payine yijnakotyaplu Kiglerpotunaru Tokanchi, ralixinripna.

⁸ Goyakalu gaschi gimatachri gipguitatna, wa wane rixa genekletna Giweikaluru Kpashiri wixako pixka. ⁹ Psolpotuyako pixkakakanwu rixa getletwu wixa, wanna. Powratgajitna ralixleyna. ¹⁰ Giyagni wa xani ɿklu chinanu gyantaletlu Goyakalu, Gitsrukaachi yimaklene gogo gitakyawaklu gitjipiye? Gi wa wutrukatenniko gimkata ganikletlu, gi wixako. ¹¹ Seyni walixlu Gitsrukaachi Geso gimuslelewleya wognetkaaka wannako pixka.”

Santiyako gigitranu

¹² Giyagni pejnuruneko gixolune gichkeka. Yijnakotluna Wirnawisi ga wa Pawlo runkaklewinna gi pejnunanukta tsru getkalurkaka ga wa koglajrukaka Goyakalu wane gixkakyawakna payinetskalaya.

¹³ Wa ruchkekinitkana wanna, Santiyako gigita. Wane china,

¹⁴ “Nomolene, gyijnakotanno. Simo ginkakletlu gikta rixpokotlu Goyakalu. Muchinanu salwayegitna payine, wa wannayegiya yoptotyapna rayinerutenepa. ¹⁵ Waneko pixka chintokanutna tokanchi geneklewatichine, yonchi chinyawaka:

¹⁶ *Wanepnute nsatokanutnaka.*

*Nugletanutnaklu Tawnipji,
wa yawnachrinatka.*

*Nugletanutnaklu gimatutewnachritka.
Ntunotakanutnaklu.*

¹⁷ *Wa gixetachine yine gjigiyaplu Gitsrukaachi,
ga wa pejnuruneko payinemnunanuka,
ngiwakaya chinkalune.*

*Wane china Gitsrukaachi
tyekaka pejnuruko kamrutchri.*

¹⁸ Muchichyawakpotunanuko rumatkakatkalu Goyakalu tyekakapirana.

¹⁹ “Giyagni gita gitakyawaka mkojwaakonepni payine kashrijetkalune Goyakalunune rixinripna. ²⁰ Seyni yonyegitkalunepni rutspalatyapluna puchotlewatachri yagluchishaya, ga wa gapoklewluya, wa saprinojrurusha, ga wa granchiya. ²¹ Gi rixanu muchikawa potu gwashluyakawa Moysisi waneya runkakletjene papokchikaka ginkaklewawakapjikakaya. Wane retyongapiranatika pagapnanutikalurgognemnu.”

Yokanatkalune kirukate

²² Giyagni kigle getle rixluna yokanatkalune, ga wa tsrune, ga wa pejnuruneko gapatjetachine tsomitikolupna pimrime jejine wannayegiruneko, Gantiyoki yokanatikolupna Pawlo Wirnawisiyma, wa Gota, wa Warsawa yokletgiwakatachri, ga wa Sura girukotlewatachine jejine moletkakachinyegiya. ²³ Kigle getle rixluna yonatkaluropa kiruka wanna ganikanropa. Wane chinachropo:

“Wixa yokanatkalunwu ga wa tsrunwu, ga wa wumolene galukgiwakatgi, wumolengi, Gantiyoki gwachine, ga wa Suri gwachine, ga wa Surisya gwachine.

²⁴ Gi rixanu wyijnakyeigitu pimrime wixa yegi giyakatyachine kojwakgi tokanchiya. Rumtukanshnikanutgina. Gi wa wanna wyokanata.

²⁵ Panshinikanurunwu wixanatini kigle getle wixlu wtsomitkapna jejine ga wa wyokanatyapna gixa yegi: walukanune Wirnawisi ga wa Pawloyma. ²⁶ Giyagni wutakna jejine genekgiwekletachinemka Wutsrukate Geso Kristo giwaka chinanu. ²⁷ Giyagni wyokanatna Gota ga wa Sura. Waneko pixka china ginkakletangina. ²⁸ Kigle getle rixlu Giwekkaluru Kpashiri ga wa wixa koxa gi satuna kamruchi gitakyegitko wanepnute. Tyekakapjetkani gimkata kamrutkaluru: ²⁹ Gitspalatinri wa yagluchisha geneekalurkaka, ga wa granchi, ga wa saprinojrurusha, ga wa gapoklewluya. Wale pejnunanukaya gkamrutini, kigleru gkamruta.

Seyoka.”

Gantiyoki gajene geneeka kiruka

³⁰ Giyagni wanna yokanatkalune yopikna. Gantiyoki rapokna. Wanna gapatkakna gixolune. Kiruka yonatkaluro reneekana.

³¹ Retyongafinitikalona rumuwatna giykolu chinanu. ³² Gota koxa ga wa Sura tokanchi geneklewatachinkoxna wanna. Giyagni ruykolewatna gi gepika tokanchiya moletkakachine yegi. Muchkotanshnikanutkana.

³³ Pshinitsonu wane rawamtna. Yokanatkana moletkakachineya kiglenshnikanurune, yokanatjenna yegi yinripna. ³⁴ Seyni wa Sura kigle getle rixlu rutukinripa wane. Gotapje yatkta. ³⁵ Pawlo ga wa Wirnawisi Gantiyoki rawanatna. Gitsrukaachi tokanu runkakletna. Kiglerpotunana Tokanchi runkakletna pimrime gixoluneyma.

Gepi kata chininri yagapgatna

³⁶ Pagognetnakni Pawlo wane chinru Wirnawisi, “Wsatokanutnaka wsalwayegityapna moletkakachine papokchimnunanuka wa Gitsrukaachi tokanu wunkakletanatyawaka, gi pixkaktana.”

³⁷ Wirnawisi galuka ganikletmaklu Gwa, Marko yokletgiwakatachri.

³⁸ Seyni Pawlo gi kigle getle rixlu ranikikolupa wannayma rixinripa gi rixanu wa Pampiri Marko gitspalamtyana; kamrurchi yegi myakatutka wannayma. ³⁹ Jigeekakna. Wane rixlenanukna rutspalkakyana. Wirnawisi ganikatkalu Marko. Koprugatna. Supro yana. ⁴⁰ Ga wa Pawlo Sura tsomitatka. Yatka. Gitsrukaachi gimutlewleya rumaponshinikanyegitkna moletkakachineya. ⁴¹ Suri ga wa Surisyaya yapananumtna. Muchkotanshinikanunanumtkana gapatjetachinkaka.

16

Timotiyo gimotsatna Pawlo ga wa Sura

¹ Terwe rapoka Pawlo. Wanepnute Listra. Wane rawa satu Gitsrukaachi yimakleru Timotiyo giwakatletachri, galixachro Goteyo suxo wgene. Ga wa ruru Kriykon. ² Listra ga wa Gikonyo gajene moletkakachine kiglepiranyegiru chinanruna. ³ Walemka Pawlo galuka waleyma chininripa. Raniklu. Sajruka gistikletlu Goteyone chinanu wane pokchikaka gajene, gi rixanu pejnuruneko gimatl Kriykon wa ruru. ⁴ Papokchimnu yapananumtna. Renekananumtkana rumretyapluna tokanchi poyagkaakalrupa wa yokanatkalue ga wa tsrune gitakanru Gerosale gwachine chinanu. ⁵ Giyagni wa gapatjetachinkaka muchkotanshinikanutkana ralixleyna. Pagognemnunanuka ruxolewnananumtna.

Masetone gajeru gipgujewnayegita kaygawleya

⁶ Prigi sreta koprutna. Wanepnute Kalatasreta. Giwekiluru Kpashiri gjiretna Gasya ma munkaklewatin tipna tokanchi. ⁷ Misi rapokatnakna. Witinimka yana. Giwekiluru Gesunu gi gichichna. ⁸ Giyagni ruknogamtuna Misi. Yopikna. Trowa rapokna. ⁹ Goyechno Pawlo getlu kayigawlu. Satu jeji Masetoni gajeru tunwastsitlu. Ragjitu. Wane chinru, “Pkoprutgatanu. Masetoni punanu. Pupxakapanunwu.” ¹⁰ Wa retinitkalu kaygawlu waneklu wupruka Masetoni gayinripa. Wale wumatyatkalu Goyakalu tomgawu Kiglerpotunamu Tokanchi wunkaklewyegityapna.

Wilipo Pokchi terotewanshikanutika Litya

¹¹ Trowa wutspegyatka. Potuklega gaya. Samotrase wapoka. Waleprik-gogne Neyapoli wapokatnakna. ¹² Waneya Wilipo wapoka. Walenwa tsru potu pokchi Masetonisretaya. Walenwa pnu giyakatyachine gwiyawaka. Wale pokchi gawanata gi pejnugognekta.

¹³ Pagogne gapnanutikalurgogne pokchi gayiyatka gipgyaptoteya. Gonustsi gayiya wa ragjigognejetyawakna. Wane wtuplata. Wuynumsatna sxoxne wa gapatachine. ¹⁴ Wanenanro sato suxo Litya giwakatletachro, Tiyatira Pokchi mkachri pakni yoshmookaluru pixkalutu gishanretjetachro. Goyakalu yonogyegitachro. Tyijnakota. Gitsrukaachi kotrukanshinikanutlo wala, tyijnakpotutyaplu Pawlo chinyawaka. ¹⁵ Wala katka ga wa tomolene. Rali katkoklunutkana, tagijitu. Wane china, “Gitakyagokinno wa Gitsrukaachi nalixinri, gjiglokajitanno. Wane gwanu.” Chipetpotutwu.

Makloji wa kamchi kagonchitinri waneyaluto

¹⁶ Wane rixatka. Gagjigognetikwaka gayamtini, tyoptotapwu sato makloji wayegrechro. Waneylo kamchi kagonchiwatirni. Gixo tkanashkatanru twapyegitanre twayegitanre tkagonchitirni. ¹⁷ Tomkagimtwu Pawlo ga wa wixa. Wane china saplenanumta, “Nyi jejine Goyakalu teno potu Gajeru wayegrenni. Wanna ginkaklewyegitgi gognewatikalurgapopirana.”

¹⁸ Gi gepikgogne wane tixjeta. Seyni gi rugleretlu Pawlo. Ruprotaka. Wane chinru kamchi, “Geso Kristo giwaka nyokanatyayi, pushpakanutka walaya.” Wanekluyakawa rushpakanatatk.

Yoshmakikowaka gitaaikalune

¹⁹ Retinitkana twayegitanune wa maleshatkalu kagwakanshinikanutanruna kanashkatinripna, kashichanatkuna Pawlo ga wa Sura. Kosemtkanatkana. Tsrukakalune gapatjetyawaka raniihana.

²⁰ Girukotlewatachine yegi rutaakoklunutkana. Twayegitanune wane china, “Nyi jejine Goteyoneko. Tsru kojwaklu rixpokchitwuna.

²¹ Runkakletluna gixjetikowaakaka ginanshichkalurni wyijnakotyaplu, wkamrutyaplu gi rixanu Romanonwu wixa.”

²² Gixolune giptekyegimtna. Girukotlewatachine suskamkatna. Gagaje kochipjejixikna. ²³ Rali gipgoletkoklunutkana yoshmakikwaka yoshmaakana. Kyoshmaklewakleru yokanatka rumretpotutyapna. ²⁴ Wane rixa towutkota, gitokpotugruko yoshmakna. Yoshmakjixitkana.

Kyoshmaklewakleru Wilipo gajeru gerotewanshnikanutka

²⁵ Ganikajyechno ragjigogneta Pawlo ga wa Sura. Goyakalu gimalwutikolu shikaletna. Wa gostutkalune yijnakotna. ²⁶ Walgnapananu waneru tsru giyolikhijru. Wane rixlunanuko wa yoshmakwakapjistsigi gimyemyeta. Wanekluyakawa pejnuru gipgyaptoteko gitpukamta. Pejnuruneko gitkokgosturemtatka. ²⁷ Giyagni ruyoka kyoshmaklewakleru. Retlu yoshmakwaka gipgyaptotkaka rutpuukanatatk. Koshpaklu yogolewapi. Ruylatinmakatkawa. Kagwaka gasukletatkana gostutkalune. ²⁸ Seyni Pawlo tsru sable rixnawa. Wane china, “Gi wa pumtukinwa, gi rixanu pejnurunekwu gewi.”

²⁹ Giyagni katalo ragjita. Rakaxikamta. Jiglokagruckomta. Gitatatachri chiji rapokamta Pawlojixistsi ga wa Sura. ³⁰ Maleka koshpaktkana. Wane chinna, “Tsrune, jklu numkata kamrureta nognetkakikolupa?”

³¹ Wanna wane chinru, “Palixanru Gitsrukaachi Geso Kristo. Waneklu pognetkaako pixa ga wa pupji gajene.”

³² Runkakluna Gitsrukaachi tokanu, ga wa pejnuruneko gipji gajene.

³³ Wanekluyakawa waleytechnoko ranikna. Rerkatkana wa rupgotikolna. Waneklu katkatka wale ga wa pejnuruneko walenu. ³⁴ Gipji ranikatkana. Ralpokotlu nikikwaka. Rumuwata gi rixanu pejnuruneko gipji gajeneymananuko ralixatkalu Goyakalu.

Girukotlewatachine koshpakna Pawlo, Sura

³⁵ Gogi chininitka girukotlewatachine yokanatna kashrewaklerune. Wane chinna, “Pkaspukanna wa nyi jejine.”

³⁶ Kyoshmaklewakleru ginkakatkalu Pawlo tye tokanchi. Wane china, “Wa girukotlewatachine yokanrewata gkaspukikolpatka gixa. Giyagni wa xani gyanutka. Kiglenshnikanurunemnupgi.”

³⁷ Giyagni Pawlo wane chinna, “Kochipjetwuna pejnurune getanu, muklukanuwnakanwu. Jejine Romanonekwu; yoshmakikwaka yoshmakwuna. ¡Ga wa xanimkalge ruknokanwuna giyogimatkalunwu? ¡Gike wixiniko! Seyni runanna wannako. Koshpakapanwuna.”

³⁸ Kashrewaklerune ginkakapna girukotlewatachine tye tokanchi. Pikanna wa yijnakotinrina Romanone rixinrina. ³⁹ Runna. Rumnanuukana. Koshpaakatkana. Ragjitkana wa pokchiya yinripna. ⁴⁰ Giyagni yoshmakikwaka rushpakanatyatkana. Lityapji jiglokna. Retatkana moletkakachine. Rumnanuukatkana. Wane yiayatkana.

17

Sejrewnananumtna Tesalonika gajene

¹ Gampipoli yapamtna, ga wa Gapoloni. Tesalonika rapokna. Wane rawa Goteyone ginkaklewawaklepji. ² Pawlo gixjetyawaka jiglokyegitna. Mapa kata gapnanutikalurgogne wale giynumsatna Tokanchi Yonatkalurupiranaya. ³ Rekagitna rumkata salewnaletinri Kristo. Rumkata gipnachinetksalaya yotunretinri. Wane china, “Geso wa nunkakletyegityagi Walenwa Kristo.”

⁴ Pimrine wanna galixa. Pawlo, Surayma jiglokna. Wa Kriykone kyono-
gyegiklerune, gi gepikna wanna. Ga wa suxone wanna potu gixolune.

⁵ Giyagni Goteyone wa malixaklene ganxata. Rawapkana pimrine je-
jine yaglotashatachine muglene. Potowurkaakana gixolune. Sejrew-
nanumtna pokchiya. Ruptekyegimtluna Gasopji. Koshpaakomkana
Pawlo, Sura yinyegiya. ⁶ Gi wa rukshikana. Gasni kostapna, ga wa pimrine
moletkakachine koxa. Pokchi girukotlewatachine yeji raniihana.

Wane china sapletna, “Nyi psolchijne gajeneko komyekanshinikanuta-
chine gewi koxa runna. ⁷ Gaso yoptotatkana. Susa yokanrekaka mpoy-
agkaakane wanna Pawlo pejnruruneko. Wane chinna wanegimlu satu
pogirchi Geso.”

⁸ Kojwakanshinikanutkana yine ga wa pokchi girukotlewatyachine, tyepi-
rana yijnakotinrina. ⁹ Yoptomtlona sroschi satkapinripa Gaso ga wa pimrine
koxa. Kaspukatkana.

¹⁰ Waneklu moletkakachine yokanatatkana Pawlo ga wa Sura goyechno,
Were yinripna. Wane rapokinitkana, Goteyone ginkaklewawaklepji
jiglokna.

Were Pokchina Pawlo, Sura

¹¹ Tesalonika gajene pnute kshinikanna wanna Were gajene, gi rixanu
yijnakotluna tokanchi psolgalkleyako. Pagognemnunanuka retjetluna
yonchi wa galikaklege tyekakapirana. ¹² Giyagni wanna gixo galixa Kriyko
suxone wanna potune, ga wa jejine gixolune.

¹³ Giyagni Tesalonika gajene Goteyone gimatinitka Were koxa runk-
akletikatka Goyakalu tokanu Pawlo chinanu. Wane yana. Komyekan-
shinikanutkana gixolune yine. Kojwakanshinikanutkana. ¹⁴ Giyagni
waneklu wa moletkakachine yokanatatkalu Pawlo. Tsru wenusreta yinripa.
Ga wa Sura ga wa Timotiyo waneko gituka. ¹⁵ Wa Pawlo ganikjene Gatenpo-
tuko ranikluna. Wanna ganiklu Pawlo tokanu giyampotu runinripna Sura
ga wa Timotiyo. Yatkana.

Gaten rawanatini Pawlo

¹⁶ Kagwakinikopshinna Pawlo Gatenaya jigekanshinikanutka wa pokchi
retinri gi gepiklu yagluchisha. ¹⁷ Giyagni ginkaklewawakapjiya ruynum-
satna Goteyone ga wa kyonogyegiklerune. Pagognemnunanuka giputuya
ruynumsatna yoptotanunkaka. ¹⁸ Pimrine galuka gimatletachine Gepiko-
reyone mkoje gajene ga wa Gestoyko mkoje gajene yoptopiratluna. Ga wa
pimrine wane china, “;Klu raluka chinreta tye kyanumsakleru?”

Pimrine wane china, “Kginkaklewaklergetkoni pnuko gixachine goyakalunepirana.” Gi rixanu Gesopirana ga wa gipnachine yotunrepiranu runkakletyegitna.

¹⁹ Kashichanruna. Gareyo Magkate ranikluna. Wane chinna, “*Gi* ge wumkata gimatletlu tye gerotu ginkaklewlu, wa pixa ginkakletanru? ²⁰ Gi rixanu pnuko gixpiranatachri punkakwu. Giyagni waluka gimatletlu klupi-ranni wa tye.” ²¹ Pejnuruneko Gatena gajene ga wa pnu gajene, walepiranapje ruknokakgognetyana, wane rixinrina yijnakotinrina gerotupiranu.

Gareyo Magkate runkaklewatyaw Pawlo

²² Gareyo Magkate ganikajite tunwata Pawlo. Wane china, “Jejine, Gatena gajene, psoluyako netgi yonogyegjeshpotutachingi. ²³ Gi rixanu wa nuknogamtni, netlu gyonogyegjetanrukaka. Netkoxlu satu genekashatik-wakakwa, wane china yongatyawaka:

Goyakalu Mumatkotu Chinanu.

“Giyagni wa Wale wa gixa yonogyegitanru gma mumatanutuko, Wale nunkakletyegitangi.

²⁴ “Tye psolchijneko ga wa ptowrunanuka tyechijne gajeru kamrutachri Goyakalu, wa tengogne, tyechijne Gitsrukate rixinri, gi wa myochi kamrutikaluru kpashiwakapji rawa. ²⁵ Gi wa yinemyo gipxakikaluru pagixanu magatyachri pixkalutu. Gi rixanu Wale pejnuruneko geneka giwékleta, ga wa runnipgyatinrina, ga wa pejnurakkako.

²⁶ “Pagragapje kamrutyana panermnunanuka psolchijinemtako rawinripna. Wale gitakyegitna rushingognetyawakapna, ga wa yoptukyawaka rawyawakapna. ²⁷ Wa ruijiyapluna Goyakalu, wa kamrumrunshinikanutkamkaluna rukshikanmäkluna. Gimka gowuklu wa satkaka wixa yegi. ²⁸ Gi rixanu Wale wuwekya, ga wa Wale wuyoljetya, ga wa Wale gawya. Wa pimrine kiglerupirana kamrutachine gixanune chinyawaka:

Gi rixanu Wale gishpakyachinkoxwu.

²⁹ “Giyagni Goyakalu gishpakyachinwu wixinri, gi wumkata kori pixkalutu kagwakletyalu Goyakalu, gi wa sroschi pixkalutuko, gi wa sotlu pixkalutuko, gi wa yaglu kamrutikolu gimatkalewluya, yinerushinikan奴ya.

³⁰ Giyagni mumatkonchiklushananu, retashlewata Goyakalu. Ga wa xani yokanatna pejnurunekoneru pachijnemnunanuka gajene renshinikanutinripna. ³¹ Gi rixanu pagogne rutaka wanepotuko rutakyagokyapna psolchijne gajeneko tye jejya Wale gitakanru. Renekna pejnuruneko ralixinripna gi rixanu gipnachinetskalaya yotunkaklu.”

Pimrine Gatena gajene galixlewata

³² Giyagni wa yijnakotinrina wa gipnachine yotunrepiranu, pimrine gixpiranawata. Pimrine wane china, “Wumepe yijnakletanutnakyl tyepirana.”

³³ Giyagni Pawlo wanna ganikajite rushpakanlyatka. ³⁴ Pimrine jejine galixa. Rupxaletluna. Wannaymakoxlu Tiyonisyo, Gareyo Magkate gajeru, ga wa sato suxo Tamari giwakatletachro, ga wa pimrine wannayma koxa.

18

Korinto yinuwaka kamrurewleyta Pawlo

¹ Wanepnute Gatena iyiyatka Pawlo. Korinto rapoka. ² Wane retyalu satu Goteyo, Gakila giwakatletachri, Ponto gajeru, ga wa ganunro Presura. Gi gowukshini Gitalya giyakatyachri. Gi rixanu Klawtyo towuwata wa pejnuruneko Goteyone Roma gishpakinripa. Pawlo yayegitna. ³ Wannapji rawa gi rixanu waleko kamrurchi koxa kamrujeta wale. Kamrurewata.

Gi rixanu mkachripji kamrutachinni. ⁴ Ruynumsalewjeta pejnuruko gap-nanutikalurgogne ginkaklewwakapjiya. Rushinikanutna Goteyone ga wa Kriycone.

Gixolune Korintyone galixlewata. Katkakana

⁵ Wa Masetoni ruyakatinitkana Sura ga wa Timotiyo, Pawlo gimupruklu tokanchi. Goteyoneyegiya rupgujtatlu wa Gesni wa Kristo. ⁶ Raalixmakluna. Mupashiregnuchi chinna. Pawlo giplokamkaluta. Wane chinna, “Gixako chinanupni gamga giwekletanuna. Powrano gita. Xaniyakawa payine yegi nyanutka.”

⁷ Wane yiyatka. Gosto giwakatletachri jiglokajitattka. Goyakalu yonogyegitachri. Ginkaklewwakapjistsi rawapjita. ⁸ Krispo wa ginkaklewwakapji gitsrukate galixlu Gitsrukaachi, pejnuruneko gipji gajeneymananuko. Ga wa gixo Korintyo gajene yijnakotlu. Ralixluna. Katkakana.

⁹ Giyagni Gitsrukaachi wane chinru goyechno Pawlo kaygawleya, “Gi pikanu. Seyni punkaklewatanu. Gi wa pochkepyi. ¹⁰ Gi rixanu pixaymano. Gike giptekyegitanyi wa rumtukyapyi. Gi rixanu gi gepikayno yineru tye pokchi.”

¹¹ Satu walapu wanepnute patsrujire ksuru wane rawa. Goyakalu tokanu runkakna.

Kalyo yegi tunwata Pawlo

¹² Kalyo walenwa Gakayi girukotlewatychri rixini Goteyone pansiñikanurunni kamnixluna Pawlo. Gitaka yagoklewjetikowaka ranikluna. ¹³ Wane chinna, “Tye gishinikanutna yine yonogyegityapluna Goyakalu, Tokanchi Yokanatkaluru ginanshichyawaka.”

¹⁴ Yanumatkastsini Pawlo, Kalyo wane chinna Goteyone, “Satu mpoy-agkaakatumka ga wa yokwirumka mugletu rixinri, numkata yijnakletan-makgi, Goteyone. ¹⁵ Wa gepomsakaklusha chinini tokanchipirana, ga wa giwakchipirana, ga wa Gyokanyegitikolu Tokanchipirana, getanru gixa. Gi rixanu gi naluklu gitaka yagoklewatachri nixinri tyekakapirana.”

¹⁶ Gitaka yagokjetikwakaya wane rakaxrijetyana. ¹⁷ Pejnuruneko Kriycone kashichlu Sostenese wa ginkaklewwakapji gitsrukate. Gitaka yagokjetikowakaya ginaple ruylakyanruna. Ga wa Kalyo gike rixlu tyekaka.

Rutspegatka Pawlo Suri yinripa

¹⁸ Wanepnute Pawlo gixgogne wane rawinitka, rungatkana moletkakachine. Rutspegatka. Suri ya, ga wa Presura ga wa Gakila. Senkre Pokchi jiwjitiika, gi rixanu waneylu wa Pawlo Goyakalu rupiratinri. ¹⁹ Gigwiso rapoka. Wane ruknokna Pawlo. Wale ginkaklewwakapji jigloka. Ruynumsatna Goteyone. ²⁰ Wanna gagjitlu wannayma rutukinripachi gowukshiniyaka. Seyni gi rugita. ²¹ Rungagonukna. Wane china, “Goyakalu galukiniplu nsatkyegitanutnakgi.” Gigwiso yiyatka.

Mapa chiniri Pawlo yagapagle

²² Susari yinitka. Kanika. Ralkapna gapatjetachine. Gantiyoki ya.

²³ Rali wane gwaletinitka ralimta. Kalatasreta ga wa Prigisreta kopruta. Papokchimnunanuka rapokananumta. Muchkotanshinikanunanumtna pejnuruneko Gitsrukaachi yimaklene.

Gigwiso runkaklewatya Gapolo

²⁴ Giyagni satu Goteyo Gigwiso gapoka, Gapolo giwakatletachri, Galegantri giyakatyachri, jeji gimata yanumsatachri potu, gimkatachri potu Tokanchi Yonatkalarupirana. ²⁵ Runkakpokowakatluna

Gitsrukaachgapopirana. Muchkopiranawatachri ginshinikanuya. Runkaklewata ga wa yimaklewputa Gitsrukaachipiranaya. Gwa katlelepiranapje rumata.²⁶ Gapol yinuwaka pgujetanwaka china ginkaklewleta ginkaklewvakapjiya. Presura ga wa Gakila yijnakotlu. Ranikluna. Runkakpokowakpotatluna Goyakalgapo.

²⁷ Raluka koprugleta, Gaka yinripa. Moletkakachine yonyegitna Gitsrukaachi yimaklene. Ruykotikolna yoptotpluna. Wa wale gapokinitka, gixo rupxakna wa gimutlewluya galixyachine.²⁸ Gi rixanu psolmuchtikonuko rushinikanutna Goteyone pejnurune getanu. Tokanchi Yonatkaluru rekakgityana Kristo chininri wa Geso.

19

Gigwislu Pawlo. Pamole gepi yimaakalune yoptotlu Giwekikaluru Kpashiri

¹ Wane rixatka. Korinto rawanatinikopshini Gapol, Pawlo gitokosha potu koprunata. Gigwiso rapoka. Retna pimrine Gitsrukaachi yimaklene. ² Wane chinna wale, “*Gi ge gyoptotlu Giwekikaluru Kpashiri wa galixinitka?*”

Wanna wane chinru, “Giyaka wyijnakpiranyegitlu wa Giwekikaluru Kpashiri wane rixinri.”

³ Wane china, “*Giyagni klu gkatika?*”

Wanna wane china, “*Gwa katlewleya.*”

⁴ Wane china Pawlo, “*Gwa katlewata. Genshinikanrupirana katlewaty. Gwa wane chinna yine ralixyapluna rajxigi ginachripa. Walenwa Geso Kristo.*”

⁵ Wa yijnakotinitkaluna katkatkana Gitsrukaachi Geso giwakaya. ⁶ Wa Pawlo gitakamyotseptaagogotinitkana, rapyegitna Giwekikaluru Kpashiri. Panerunmnou tokanu yanumatayana, ga wa Goyakalu tokanu reneklewawtna.

⁷ Wane pejnugetkona pamole gepi jejine.

Tiranopji runkaklewatyawaka Pawlo

⁸ Mapa ksuru ginkaklewvakapji jiglokjeta. Pgujetanwaka china yanumsaleta. Ruynumsalewata. Rushinikanutlewata Goyakalu pogirewatwy-wakapiranaya. ⁹ Seyni pimrine shikowata. Gi ralixna. Rapatluna Gitsrukaachgapo gixolune jemanu. Pawlo gitspalatyana ga wa Gitsrukaachi yimaklene ranika. Pagognemnunanuka Tiranoji yimaklewaty-waka ruynumsalewaty. ¹⁰ Wane rixa gepi walapu. Giyagni pejnuruneko Gasya gwachine Goteyo ga wa Krikyo, yijnakotluna Gitsrukaachi tokanu.

Payokgipre Sewa wgenene

¹¹ Metjejetkotu ruyaklekaka Goyakalu kamruta Pawloya. ¹² Giyagni mkachrisamkaka, gistatlechkaka gimane gajeru yayixachine yegi ranikna. Rutuka yayixlemtatkana. Kamchime gishpakanatyatkana.

¹³ Wanena pimrine Goteyone kagonchine yapashawakle gwachine. Wa kamchime waneyalune chinanumka koschekmakluna Gitsrukaachi giwaka. Wane chinna, “Wa Pawlo ginkakletanru Geso kawchinanu nyokanatgi.”

¹⁴ Wanena Sewa wgenene payokgipre, Goteyo, sasertotene gitsrukate. Wanna wane gixa. ¹⁵ Kamchi gigita. Wane china, “Geso numata. Pawlo koxa numata. Ga wa gixa, *¿katgi gixa?*”

¹⁶ Wa jeji kamchi gwanru ruptekyegimtna. Raalixna. Gepi pnute muchkonru. Giyagni walepji rasukyana mamkane poletkalunena.

¹⁷ Kapiranyeglu wa tye pejnuruneko Goteyone ga wa Krikyone yegi Gigwiso gwachine. Pikitakana pejnuruneko. Gitsrukaachi Geso giwaka

tserutpiranyegitka. ¹⁸ Gixna galixachinetka gapoka. Rupgujtawana. Runkaklewatna wa kamrutanruyna. ¹⁹ Gixna wa kagonchiwanatachine kiruka rapatna. Yoxikanatkalona pejnruruneko getanu. Koshpakwenutlona. Wane pejnu rukshikwenrotyalona: pamole waragkaproji. ²⁰ Wane rixa muchkonpotuya tseruwnaleta Gitsrukaachi tokanu. Muchkowata raalire-watinri.

Masetoni yokanatkana Timotiyo ga wa Gerasto

²¹ Giyagni wane rixkatka, Giwekkaluru gishinikanutlu Pawlo Masetoni ga wa Gaka yinripa. Waneya Gerosale yinripatnaka. Wane china, “Nali wane gwaletinipa, Roma koxa numkata getleta.”

²² Giyagni gepi rupxakjene Masetoni yokanata, Timotiyo ga wa Gerasto. Gasya rutukawa wale pshinitsonu.

Tiyanapji kamrurewjetayachine

²³ Walegognekaka tsru kegeknanuwlu wane Gitsrukaachgapo chinanu. ²⁴ Gi rixanu waneru satu sroschi pagixanu kamrujetyachri, Rimitri gi-wakatletachri. Wale sroschi kamrujetyalu kpashiwakapjiji Tiyananupa. Gixo wenru rawyana kamrurewaklerune. ²⁵ Wale gapatjekakna kamrure-waklerune waleko kamrurchi kamrujetachine. Wane chinna, “Gixa gimatl tye kamruchi chinanu waneywu wponikowle. ²⁶ Gixa getlu ga wa gyij-nakotu wa tye Pawlo, gi wa Gigwisopje seyni psolunshinikanuko Gasya, rushinikanutananumtyana gixolune. Wale kashrijetjetna. Wane china wa gi gima goyakalunni wa myochi kamrutikaluru. ²⁷ Gi wa walepjeni wa tye kamruchi giike gaprini chinanatko, seyni wanepnute wa kpashiwakapji wa tsro goyakalo Tiyanapji giike gapri rumkata gixkota. Yinuwaka nikatkotanu toyaknu. Walanwa yonogyegifka psolu Gasya gajeneyako, ga wa psolchijneko gajeneye.”

Gigwiso gajene gixrijeptajitaa gixa

²⁸ Wa yijnakotinitkaluna tyepirana, ramewnapotutna. Saplewatna. Wane chinna, “Tsropotni wa Tiyana, Gigwiso gajenenu.”

²⁹ Pokchi gajene gixrijeptajitaa gixa. Panshinikanurune gakaxikamta. Pejnrune gapatjetyawakagruko yana. Kayo ga wa Garistarcho kashichna, Masetoni giyakatyachine, Pawlo gipxaletanune. ³⁰ Pawlo galuka gishpakyegletna gixolune yine. Gitsrukaachi yimaklene gi gichichlu. ³¹ Pimrine koxa tsrukakalune Gasya gajene, ralukjene, yokantokanyegitluna. Ragjtluna pejnrune gapatjetyawakagruko ma mutakinitipa.

³² Pimrine saplewjeta, ga wa pimrine pnuko china sapleta. Gi rixanu gapatachine sejrewnashatachine. Gixo potu gi gimata klu chinanu rapatna.

³³ Gixolune yine ganikajite koshpakluna Galegarnto. Goteylene gertamtanru. Giyagni Galegarnto yotukamyoyegitna pochke rixinripna. Raluka giglepokleyegitnawa wa gixolune yegi. ³⁴ Wa rumatinitkaluna Goteyo rixinri, pejnruneko pasaplewatkalune. Gepi goranshinikanu saplewjetna. Wane chinna, “Tsonwa Tiyana Gigwiso gajenenu.”

³⁵ Giyagni wa yonchikgapri kochrokatkana. Wane china, “Jejine, Gigwiso gajene, ɿgirni wa jeji mummatkuwa Gigwiso Pokchi gajene kpashiwakapji girukotachine wa tsro Tiyanapji, ga wa Gopite gjiruwyachro. ³⁶ Giyagni gi rixanu gi rumkata nutatkota, gixa gimkata gitukletatka. Giike giyampotu wane gixanu. ³⁷ Gi rixanu gixa gwapna nyi jejine. Gi wa mupashiregonni. Gi koxa woyakalote kapataklerunni. ³⁸ Giyagni Rimitri ga

wa waleymalune kamrurewaklerune waneyna rixinna jijyegitimolu papi-rana satu chinanu, gapatikowaka rutakanna. Wanena girukotlewata-chine. Runkakletkakanna. ³⁹ Ga wa giginiplu satuyako, gapatjetikwaka gitaaikaluru ruglepokotikolupa. ⁴⁰⁻⁴¹ Gi rixanu gimkata tomgakota gixa yagotkakluyapa xawakni chinanu. Gi rixanu gike chinanni wugityaplu tye potowurushatyawakapirana.”

Wane chininitka, yokanatatkana gapatachine.

20

Masetoni ga wa Kresi ya Pawlo

¹ Wa rutukinitka gejnugima Gitsrukaachi yimaklene repuka Pawlo. Rum-nanukatkana. Rungatkana. Yatka. Masetoni yinripatka. ² Wanesreta yapamtiny, ruykonanumtna gixo tokanchi. Kresi rapoka. ³ Mapa ksru wane rawanata. Raluka yagapgaleta, Suri yinripmaka. Goteyone jemanshinikankakyegitlu. Wane rixa gishinikleta Masetoni satokinripa. ⁴ Gasyapotuko rupxaaltapyaluna Sopate Were gajeru, wanepnute Tesa-lonika gajene Garistarcho ga wa Sekonto, wanepnute Kayo, Terwe gajeru, ga wa Timotyo; wanepnute Gasya gajene, Tichiko ga wa Trogimo. ⁵ Wanna koseka. Trowa kagwakyawuna. ⁶ Wa jimapro gisekachri myapjetkotugognekaka giknoginitka, Wilipo wutspegya. Pamyogogne Trowa wapyegit-yatkana. Wane gawanata payokgipregogue.

Trowa salwatyia Pawlo rungiyapna

⁷ Muchinangogne simanaya, rapatna Gitsrukaachi yimaklene jikna-jrotapluna jimapro. Pawlo giynumsatna. Waleprikgogne raluka yale-tatka. Goginkaklewleru ganikajyechnopotunanuko. ⁸ Gi gepiklo katalo wa tenogruko wa rapatyawakna. ⁹ Satu makluji Gewticho giwakatle-tachri gonotaswawaka tuplanatachri. Ruxapne gaalixanruna. Wa Pawlo gogiyumsalewle rixini, ruxapne gaalixanrunatka. Mapagruko chininriya ruyaka gjrukleyana. Gipnachrinatka gwapkanatka. ¹⁰ Giyagni Pawlo yopikamta. Wale gogo rapokamta. Kanopatu. Wane china, “Gi wa gejnugi-malewatanu. Gi rixanu ruwekinri waneyawalu.”

¹¹ Giyagni ratskotatnaka. Jiknajrotatkalu jimapro. Niklu. Gixo ruynumsatna goyechnokawpotunanuko. Wane gixachri yatka. ¹² Ranikatkaluna makluji giwekachri. Rumnanukpotutkana.

Trowa yiayatka; Mireto rapoka.

¹³ Wixa gatskotatkalo kanawa. Gaso gayatka. Wane wyoptotinri Pawlo. Gi rixanu wane rixa ginkakpokowakleta. Wale chiji yapamtanu. ¹⁴ Wale yoptotinitkawu Gasoya. Wpokotatkalu. Mitirini gayatka. ¹⁵ Wane wutspegya. Waleprikgogne wapolku Chiyo ginaple. Pagognetnakni Samo yopjewakle wutspaka. Trogelyo gawamta. Waleprika wapolku Mireto. ¹⁶ Gi rixanu Pawlo gishinika giknoglemltu Gigwiso, Gasya ma mamginitpatka. Gi rixanu shireta Gerosale rumkata giknokakleyaplu Tsru Jirgikolgognepatka.

Runkaklewata rungiyapna

¹⁷ Mireto repukyana Gigwiso gajene gapatjetachine tsrutene. ¹⁸ Rapyegitinitkaluna, wane chinna, “Gixa gimata wa nejigloklegogne Gasya wanekluyakawa, gi pixka gimwale nixanatgi. ¹⁹ Gitsrukaachi wayegreno nixa. Psolpotuyako malixkotnachriwano. Ga wa gixo noktegaima. Ga wa gixo nyantaletikolu Goteyone jemanshinikankakjetyawakno. ²⁰ Klunerukta gimkata gipxakjerupa gi wa nyoxigika ginkakletgi yimakletgi pejnurune

getanu ga wa papjikakaya. ²¹ Goteyone yegi ga wa Kriykone yegi nupgujtalu genshinikanrupirana Goyakalu chinanu, ga wa Wutsrukate Geso Kristo galixikolupapirana.

²² “Ga wa xani gostutkalurno Giwekikaluruya, Gerosale nyanu. Gi numata klunerukta giknoganno waneya. ²³ Seyni papokchimnnunanuka Giwekikaluru Kpashiri gipgujtayegitno. Wane china wa gosturewlw ga wa salewakchi waneyapno. ²⁴ Seyni gike rixno. Gi wa nutakyagoklu nuwekinri kigleypotno gita. Walepjie, npoyagkakyaplu psoluko Goyakalu gitakyano numuwleypotuko, ga wa kamrurchi Gitsrukaachi Geso nyoptotinri, nupgutatyaplu Kiglerpotunaru Tokanchi Goyakalu gimutlelepirana.

²⁵ “Ga wa xani, numata gita gi satuna gixa getgojitanutkano, pejnurunekgi wa gixatskalaya nyapanatini, nunkakletanatinri Goyakalu pogirewatyawakapirana. ²⁶ Giyagni tyegogne nupgujtalu muklukanuwnakatno gita pejnuruneko giwekgognenatinripa chinanu. ²⁷ Gi rixanu gi wa nyoxigika ginkakletgi pejnuruko Goyakalu gishinikanru. ²⁸ Ggirukotinwa gixnanuko, ga wa ggirukotanna pejnuruneko rowegatene. Wa wanna girukotjene Giwekikaluru Kpashiri gitakgi, ggirukotuyapna Gitsrukaachi gapatjetanune, wenutanune Walenuko gigragaya. ²⁹ Gi rixanu numata gita, gitgajxigiyaka gixa yegi yoshmakinwana kewtnane kmatsurune, gowegane metashatkanepa. ³⁰ Pimrine wa gixa, jejine mpotukatupirana ginkakletjetachine gipgujewnanu. Gitsrukaachi yimaklene wanna gajxigimka rawkakanna. ³¹ Giyagni giyokanu. Gishinikanru wa mapa walapu goyechno ga wa gogi gi nkaspuka giykoletgi satkaka gixa noktegayma.

³² “Ga wa xani Goyakalu naponshinikanyegitgi, ga wa tokanu rumutlewleya. Walenwa kgiyaklewakleru tokanchi, tseruwakyapgi, ga wa renekyapgi kiglerkakapa gyoptotanrupa pejnuruneko kpashirine gixkaluneyma. ³³ Gi satuna neta sotanserojipjojita, gi koriteko, gi gimkaluko. ³⁴ Gixa koxa gimata tye nomyo nkamrurewatya nalukanru chinanu ga wa gitaymalune koxa chinanu. ³⁵ Psolpotuyako nyimakgi, wane gixa kamrurelewlepotletinripa gimkata gipxakletna gigrokachine. Gimkata gishinikletlu Gitsrukaachi Geso tokanu. Wale wane china, ‘Giglenshnikanyegitkaluru geneklewashatachri yoptotachri pnuute.’ ”

Mireto rungika Pawlo

³⁶ Wane chininitka, yoptsojita. Ragjigogneta pejnuruneko wannayma. ³⁷ Giyagni pejnuruneko tsru chiyaglu gixa. Kanopnojiltuna Pawlo. Ram-lutluna. ³⁸ Kachingajpotna wane chintokanutyawakna ma metgojityanpatkaluna. Rumotsamtatkaluna kanawyempotuko.

21

Mireto yiya. Tiro rapoka

¹ Wutspalamtyatkana, wyagapgatatk. Potuklegapo gaya. Kowo wapoka. Waleprikgogne Rota wapoka. Wane gaya. Patara wapoka. ² Wukshiklo sato kanawa gitsroka. Winisi koprugatachropa. Wane wuptekatka. Wyagapgata. ³ Pguje chininitka Supro. Wuknogamtlu. Wkegnetesretate rawa. Suri gaya. Wapokatkalu Tiro. Gi rixanu wa kanawa wane koschek-wunutiko. ⁴ Wane wukshikyana Gitsrukaachi yimaklene. Payokgipregogne wane wutuka. Wanna wane chinru Pawlo Giwekikaluruya Gerosale ma kanikinitipa. ⁵ Wpojakgakgognetinitka, wyiyatka. Pokchi supatalpotuko rumapwuna pejnuruneko suxone ga wa mturuneymananuko. Wanga

wyoptsojitatka. Wagjigognetatka. ⁶ Wungakakatka. Kanawa watskotatka. Wanna rawyawakna satokatka.

Susari Pawlo salwayegitlu Wilipi

⁷ Tiro wuyakatyatka. Wpoyagkaka yagappaletatka. Tolemayta wapoka. Walukna moletkakachine. Wanna yegi pagogne wutuka. ⁸ Waleprika gayatka. Susari wapoka. Wilipi Kiglerpotunanu Tokanchi ginkakletachripiji wjigloka. Walenwa payokgipre chinirri. Wale yegi wutuka. ⁹ Gepkoxamkoje wgenru. Maklojine. Tokanchi geneklewatachine.

¹⁰ Gi gepikgogne wane gawa. Gote yopikyana satu tokanchi geneklewatachri Gakawo giwakatletachri. ¹¹ Runyegitwu. Rawlo Pawlo gishrikapchijremta rawa. Waleko gjixi rostutnawa Gakawo, ga wa giumyo. Wane china, "Giwekkaluru Kpashiri wane china, 'Goteyone Gerosale gajene wane rixa gosturejixanruna jeji tye gishrikapchijremta waneyalutu. Payinemyo samyokanruna.'"

¹² Wyijnakotinri, wagjitlu wixa wane gajene koxa Gerosale ma kanikinitpachi. ¹³ Giyagni Pawlo gigita, "¿Gi gixanatge nchiyananata, gwamontak-gajitno? Gi rixanu galpokomtachritkano gi wa gostutkalurupjepno, seyni nupnirikoxapa numkata gixkota Gerosaleya Gitsrukaachi Geso giwakaya chinanu."

¹⁴ Gi wumkata gishinikanutletinitkulu, pochketkawu. Wane wchina, "Wane gixkalurupa Gitsrukaachi gishinikanru."

Gerosale rapoka Pawlo

¹⁵ Walegognekaka giknoginitka, wuprukatka. Gerosale wkanikatka. ¹⁶ Wixaymakoyna Susari gajene pimrine Gitsrukaachi yimaklene. Rani-koxluna satu Gitsrukaachi yimakleru kapokotu, Mnas, Supro gajeru. Waleyma wane gawamta.

¹⁷ Gerosale wapokinikta moletkakachine gimuwatchine yoptotwu. ¹⁸ Waleprikogogne wixayma jigloka Pawlo Santiyako yegi. Pejnuruneko tsrune gina. ¹⁹ Rali galukletinitkana, psolpotuko Pawlo ginkakna ptowruko wa Goyakalu gixyawaka payineyegiyako wale kamrureya.

²⁰ Wa yijnakotinitkana, rumalwutluna Goyakalu. Wane chinruna, "Pete, wumole, gi pejnu waragkananukta Goteyone galixachinetka. Pejnuruneko muchkopiranawyegitlu Tokanchi Yokanatkalue. ²¹ Wanna ginkaaka pixapirana: pixa gima yimakna pejnuruneko Goteyone payinet-skala gwachine wanna gitspalatyapatkalu Moysisinu. Wane pchingimata ma sajruka gistikletikotpatkana mturune; gixjetikwaka ma mixinit-patkana. ²² Giyagni žkulu wanepa? Wa gixolune gimkata gapatleta. Gi rixanu pejnuruneko yijnakyegitinipyi papokinritka. ²³ Giyagni wane pixanu wa wchinyawakyi. Wanena wixa yegi gepkoxamkoje jejine Goyakalu gipiryegitache. ²⁴ Panikanna nyi. Kpashiri pixkaako wannayma. Wanna chinanu pwenutunu shishyajiwutikolupna. Pejnuruneko gimatanu wa pixapirana runkaakana gikeenani, seyni pixa koxa wanepotuko gixanata. Pkamrurtu Tokanchi Yokanatkalue. ²⁵ Ga wa payine galixachine wyonyegita wa ginanshichkaluru yaqluchisha geneekalurkakaya, ga wa granchiya, ga wa gapoklewluya."

²⁶ Giyagni Pawlo ganikna jejine. Waleprikogogne kpashiri rixka wannayma. Kpashiwakapji jiglokata. Runkakletyapl poyakkakikolgognekakapa kpashirine rixikolpatkana, satkaka genekashle giylatkalurupa genekikolupa.

²⁷ Payokgipregogne nikawnakasti, pimrine Goteyone Gasya gajene, wa retinrina kpashiwakapji, komyeckanshiniikanutkana pejnuruneko gixolune

vine. Kashichluna. ²⁸ Saplejetna, “Jejine, Gisrayiline, gipxakanunwu. Tyetkanwa jeji pasretnunananuka pejnuruneko ginkaklewyegetachri, yine gapatachri, ga wa Tokanchi Yokanatkaluru koxa, ga wa tyepji koxa. Wanepnute Kriykone yoshmaka kpashiwakapji. Tye kpashiwaka gimuteru rixkaka.” ²⁹ Gi rixanu muchikawa retjejetanruna waleyma pokchiya Trogimo, Gigwiso gajeru. Wanna kagwaklu Pawlo jiglookakyawaklu kpashiwakapji.

³⁰ Giyagni pejnuruneko pokchi gajene yotaljeptaajitaa rixna. Potowrutna yine. Kashichanruna Pawloni. Kpashiwakapji koshpakyaluna. Waneklu gipgyaptokaka gishyatka. ³¹ Ruylatanmakluna.

Runkakapka solalone gitsrukate, “Psolpokchiko Gerosale yotaljeptaajitaa gixa.” ³² Waneklu solalone gitsrukate ganikna solalone ga wa ksolatoterune. Rasukamtna. Gixolune yine yegi rapokna. Giyagni retkana, solalone gitsrukate ga wa solalone, kaspuka giylaklemtluna Pawlo.

³³ Giyagni rapokinikta solalone gitsrukate, kashjixlu. Rostujixanru geipitsa yowumatsaya. Repomgalu gi gixachrini, ga wa klu kamruta. ³⁴ Wa gixolune pnumnu china sapletna. Gi rumkata gimata jemletlu galikaka wa sejrewakchi chinanu. Giyagni gitoko ranikjixatkalu solalonepji. ³⁵ Gatskopije rapokinikta. Wane rixa koschekletatkaluna solalone psol-muchkonuko yine kamrutanru chinanu. ³⁶ Gi rixanu gixolune gwagajxig-ita. Saplewananumtna, “¡Puylaganru!”

Pawlo gagjitlu wa ruchichikolupa ruykoyegitinwa

³⁷ Yoshmaakastsitkalu Pawlo solalonepji, wane chinru solalone gitstrukate, “¿Gi ge munanshichkotni wa papirana nunkakyapyi?”

Wale wane china, “¿Pumatluge Kriyko tokanu? ³⁸ ¿Gi ge Gigipsyo gajerukyi pixa, wa muchikawako gepkoxamkoje waragka jejine kgiyalewaklerune pkomyekanshinikanuta; yineru mwiyawakanu panikna?”

³⁹ Wane china Pawlo, “Gita galikakni jeji Goteyno, Tarso gajerno, pokchi kapiranyegiru Surisyasretaya. Giyagni nagityi puchichyapno yine nunkak-inripa.”

⁴⁰ Giyagni wale gichichlu Pawlo. Gatskopije tunwata wale. Yotukamyota pochke rixinripna yine. Wa pochke potu rixinitkana, Gewreyone tokanu yanumatya. Wane china,

22

¹ “Jejine, nomolene, tsrune, gyijnakotanunno. Nuykoyegitnawa xani gixyegiya.”

Pawlo giykoyegitnawa yine getanu

² Jeminitkana Gewreyone tokanu yanumatinna, pochkepotutkana. Wane china, ³ “Gita galikakni Goteyno. Tarso gishpakyachrino Surisyasretaya. Tye pokchi ntseruwakika Kamalyoyegliko. Wanepotuko yimaakalurno Tokanchi Yokanatkaluru wutsrukateni chinyawaka. Muchkopiranawat-achrino Goyakaluya, pejnurunekgi gixako pixka xani. ⁴ Gita kojwakjenatna tyegapo yapachine rupninpotonanukna. Nostutna. Yoshmakjetikowaka nsamyokna jejine ga wa suxone. ⁵ Wa wane nixatka sasertotene gitsrukate potu walenwa netjeru, ga wa pejnuruneko tsrune. Wanna yegi nagijityalo kiruka wumolene chinanu. Tamaskomka nyanu, Gerosalemka nanikyapna gostutkalune wane gwanatachine saletkalunepmaka.

Runkakletlu kashrijetanshinikanutikolupirana

⁶ “Wane rixatka, nyanatini, Tamaskostsi napokini, ganikajgogneni walegnapunanu yochigyejtno tengogne gajeru yochigatachri. ⁷ Chiji napokana. Nyijnakotlu satu tokanchi wane nchinjeru, ‘Sawolo, Sawolo, ¿klu chinanupkojwakno?’

⁸ “Giyagni gita gigita, ‘¿Katyi Pixa, Gitsrukaachi?’

“Wane chinno, ‘Giti Geso, Nasare gajeru, pixa kojwakanruno.’

⁹ Gitaymalune retrluna galikakni yochigatachri. Pikanna. Seyni gi wa jemluna wa nuynumsatjeru tokanu.

¹⁰ “Wane nchina, ‘¿Klu nkamrutana, Gitsrukaachi?’

“Gitsrukaachi wane chinno, ‘Palnanu. Tamasko pyanu. Wane punkakiko pejnuruko putakikolupa pkamrutanrupa.’ ¹¹ Ga wa gitnitka gi netanatka wale gatajnu yochigle chinanu. Gitaymalune kanjimtno. Tamasko napoka.

Ganani salwayegitinripirana runkakleta

¹² “Giyagni satu Ganani, jeji kgipashiregolu Tokanchi Yokanatkalu chinyawakpotuko, kiglepiranyegejiru pejnuruneko Goteyone yegi wane gwachine. ¹³ Runyegitno. Tunwata. Wane chinno, ‘Nepuru, Sawolo, petanutka.’ Wanekluyakawa netatkalu.

¹⁴ “Wane china, ‘Wutsrukatennti Goyakalute muchikawako yokgitatkayi pumatayaplus Wale gishinikanru. Petyakoxaplu wa Poyagkakachri. Pyijnakotyakoxaplu tokanu ginamaya. ¹⁵ Gi rixanu Wale gipgujtatachripyi payinmnunanuko yegi petanrupirana ga wa pyijnakotanrupirana. ¹⁶ Ga wa xani ¿klu pyoxigikanatya? Palnanutka. Pkatkotka. Pmukochire gerzikalurpatkayi. Pkoschekgiwakatanutkalu.’

Wale chanixikolu wa payine yegi runkaklewatinripa

¹⁷ “Wane nixatka. Gerosale nsatokatka. Kpashiwakapji nagjigognenattyatka. Nushpakanshinikanuta. ¹⁸ Netlu wane nchinjeru, ‘Pshiretanu. Giyampotu pyanutka Gerosaley. Gi rixanu wanna gi yopto gipgujtaletanyi Gitaya.’

¹⁹ “Wane nchina, ‘Gitsrukaachi, wanna gimata yoshmakjetkwaka nyoshmakjenatna Pixa galixachine. Nkochipjetna ginkaklewakapjikakaya. ²⁰ Pugujtatjerni Gishtuwni giylatkoklununa wane koxa ntunwanata gita. Nugleretlu. Numretamkatna wa ruylatjene.’

²¹ “Wane chinno, ‘Pyanutka. Gi rixanu Gita yokanatanyi wajra payine yegi.’”

Girukotka Pawlo wa ksolaloteruya

²² Yijnakotluna wale tokanchi chininpotonanuko. Waneklu siplewpotutna. Wane chinna, “Tye chiji gkoninri wane gixachri. Gi rumkata giwekleta.”

²³ Siplewjetna. Ruknopxemkatna. Yoptepagitna. ²⁴ Solalone gitsrukate ranikjixlu solalonepjigruko. Wane china wa kochipjetikolupa, repomsatko, rumatikolupa klu chinanu wane rixa siplejeyegitluña. ²⁵ Nikchimtatsaya kanraakakanatluna. Pawlo wane chinru ksolaloteru wane gwanatachri, “¿Munanshichkotlege gkochipjetyaplu satu jeji Romano muklukanuwnayegijxkotuko?”

²⁶ Giyagni ksolaloteru yijnakotinitkalu, wane ya. Runkakaplu solalone gitsrukate. Wane china, “¿Gi pixanu? Gi rixanu Romanni tye jeji.”

²⁷ Wane ya solalone gitsrukate. Wane chinru, “Punkakanno, ¿pixni Romanyi?”

Wale wane china, “Gigi.”

²⁸ Solalone gitsrukate gitga, “Tsu wenru napkapyalu Romano nutakikolu.”

Ga wa Pawlo wane china, “Seyni gitga wane nixa gishpakleta.”

²⁹ Giyagni waneklu rutsalamtyatkaluna saletjenepmaka. Ga wa solalone gitsrukate koxa pika, rumatinri Romano rixinri, ga wa rostujixyalu.

Jemanshinikankakjetikowaka tunwatyawaka Pawlo

³⁰ Waleprikgogne raluka gimatleta galikakni klu chinanu jigyegitluna Goteyone. Koshpirokjixatkalu rostutikolu. Repukatkana tsrukakalune sasertotene ga wa pejnuruneko jemanshinikankakjetikowaka gajene. Rawpatkalu Pawlo. Wanna yegi rutaklu.

23

¹ Giyagni Pawlo yopukgatna jemanshinikankakjetikowaka gajene. Wane china, “Jejine, nomolene, muklukanuwnanshinikanutkatno wa nixjetyawaka xanigognenanu Goyakalu getanu.”

² Sasertotene Gitsrukate potu Ganani towutna walestsi gwanatachine giylaknamatyaplu.

³ Giyagni Pawlo wane china, “Goyakalu giylakanmakyi pixa, prijeru galatatakuru pixkalutyi. ¿Pixa tuplanatachrirayge putakyagokyegitno Tokanchi Yokanatkaluru chinyawaka, ga wa Tokanchi Yokanatkaluru mchinyawakanu puylakjixnoge?”

⁴ Wane gwanatachine wane china, “¿Pyangalge sasertotene gitsrukate potu Goyakalunu?”

⁵ Giyagni Pawlo wane china, “Gi numata, nomolene, wa sasertotene gitsrukate potu rixinri. Gi rixanu yonatkalurni, *Gi wa gektutu tokanchi pchinyegitanru punerune gitsrukate.*”

Rugjekaktokanutra Gwariseyone ga wa Sariseyone

⁶ Giyagni Pawlo gimatlinri pimrine Sariseyone rixinri, ga wa pimrine Gwariseyone jemanshinikankakjetikowaka saplewatya, “Jejine, nomolene, gitni Gwariseyno, ga wa Gwariseyone wgenno. Nalixkalchinanu yotunkakikolupna gipnachine, gitni wa giklukanuwnayegjixkalurno.”

⁷ Wane chininitka rugjekaktokanutra Gwariseyone ga wa Sariseyone. Gixolune kotspalanshinikankaka. ⁸ Sariseyone wane china maleshlu yotunru, gi wa Goyakalutowreruko, gi wa giwekkaluruko. Seyni Gwariseyone gipgujtalu gepiko wane.

⁹ Tsru saplechi rixna. Palnana yonchikgapine Gwariseyonesreta gwanachine. Yawrotna. Wane chinna, “Gi satuna gektutu wukshikyalu tye jeji. Gi kta xani wa giwekkaluru giynumatinri waka Goyakalutowreru.”

¹⁰ Tsru yagotkaklu wane rixinri, solalone gitsrukate pikana kochnokakyapluna Pawlo. Giyagni repukna solalone. Kashjixlu wanna ganikajiteya. Solalonepjigruko ranikjixlu.

Gitsrukaachi giglenshinikanutlu Pawlo

¹¹ Waleprikyechno Gitsrukaachi tunwastsitlu. Wane chinru, “Kiglenshinikanupyi Pawlo. Gi rixanu Gerosale pupgjutatiniko pixkano waneko pixka pumkata gipgujtaletno Romaya koxa.”

Pawlo jiigkakyegitachine kamakpiratnamkawana

¹² Gogi chininitka pimrine Goteyone jiigkaka. Kamakpiratnamkawana. Wane chinna ma muylatkangimapluna Pawlo gi nikanna, gi ruranna.

¹³ Gepkoxamkojmole pnutna jiigkakachine. ¹⁴ Tsrukakalune sasertotene

ga wa tsrune yegi yana. Wane chinna, "Wkamakpiratnamkawa gi ptsotsotajiko wnikloknijitutanu wma kamakatkanupluchi Pawlo.¹⁵ Giyagni wa xani gixa wa jemanshinikankakjetikowaka gajeneyema ginkakanru solalone gitsrukate, koshpakyegitangi wanepotuko galuka gimatlepgutatanru pagixanupirana waleya. Ga wa wixa ma mapookanuwa galpokotachinepwu wuylatyaplu."

Pawlo palikleru yijnakyegitlu yogimagnaputyawakapluna

¹⁶ Giyagni Pawlo palikleru yijnakyegitlu yogimagnaputyawakapluna. Wane ya. Solalonepji jiglokamta. Runkakatkalu Pawlo.

¹⁷ Giyagni Pawlo tomgalu satu ksolaloteru. Wane china, "Panikanru tye makluji solalone gitsrukate yegi. Gi rixanu waneylu papirana runkakyaplu."

¹⁸ Giyagni yoptotlu. Raniklu solalone gitsrukate yegi. Wane china, "Wa gostutkaluru Pawlo tomgano. Ragjitno tye makluji nanikyegityapyi. Waneygimlu papirana runkakyaplu."

¹⁹ Wa solalone gitsrukate kanjimtlu. Kegneta ya wannapje. Repomgalu, "Klu waneyyi punkakyapno?"

²⁰ Wane china, "Wa Goteyone jemkaka ragjitanyina wa yechikawa pkosh-pakyaplu Pawlo jemanshinikankakjetikowaka yegi. Wanepotuko raluka gimatlepgutgimatanruna pagixanupirana waleya.²¹ Giyagni gi palixanna pixa. Gi rixanu gepkoxamkojmole pnute jejine wannanune yógmagna-putlu. Wanna kamakpirjetnachinwa ma niikanupna, ma murkanupna ma muylatkanuplunachi. Xani ralpokotatkana. Kagwakluna ptokanu."

²² Giyagni solalone gitsrukate yokanatatkalu makluji. Rujretlu, "Gikena pma munkakinitipa wa punkakapyatkano tyepirana."

Galpokjixikowaka wa gitsrukaachi Wilisi yegi ranikikolupa Pawlo

²³ Gepi ksolaloterune tomga. Wane china, "Galpokjixanna gepi pacha solalone gokaynona Susari yinripna, ga wa payokgipremole kawalyo kypaklerune, ga wa gepi pacha kchokorejerune.²⁴ Gwapanna kawalyone Pawlo gwamtanropna. Kigle gapokle gixkakanru Gitsrukaachi Wilisi yegi."

Kiruka Wilisi chinanupa

²⁵ Yonatlo kiruka wane chinyawaka:

²⁶ Gitni Klawtyo Risyano.

Wa kshinikanuru potu Gitsrukaachi chinanupa Wilisi.

Nalukgiwakaty.

²⁷ Tye jeji, Pawlo, Goteyone kashichanruna, ruylatanrupmakna. Sollaloneyma napyegetilu. Nkoshpaku. Gi rixanu numatatkalu Romano rixinri.²⁸ Naluka gimatletinri klu chinanu jigyegitluna. Jemanshinikankakjetyawakna naniku.²⁹ Nukshiklu wa jigyegityaluna Goteyone gepomsalkakapiranaya Tokanchi Yokanatkalueye wananu. Gike jigyegityaluna rupnirni chinanupa ga wa rostutikolupa.³⁰ Wa nunkakapkoklunutka jemanshinikankakatkana waleya, wanekluyakawa nyókanatatkalu pixa yegi. Nunkakna jigyegitjene runkakyapyna waleya.

Seyoka.

Wilisi yegi samyokika Pawlo wa Susariya

³¹ Solalone ganikatkalu Pawlo rixa towutikowakna. Goyechno Gantipatri ranikluna.³² Waleprikgogne Pawloyma ruchi yaletatkana kawalyo yapchine. Solalone satoka gipjigrukna.³³ Susari rapokinitkana. Kiruka renekatkaluna gitsrukaachi. Wale yegi rutaakoxluna Pawlo.³⁴ Gitsrukaachi

getyongatatkalo kiruka. Repomgalu ginakasreta gajerunanni. Rumatinitka Surisa gajeru rixinri,³⁵ wane china, "Njemanyi runinipna wa pjigyejijene." Giorepji, tsrupji, girukotjixyatkalu.

24

Tertolo jigyegitlu Pawlo wa gitsrukaachi yegi

¹ Pamyogogne giknoginitka yopikatka Sasertotene Gitsrukapatu Ganani, pimrine tsruneyma, ga wa satu ktokanuwakleruyma, Tertolo. Runkakletluna Pawlopirana gitsrukaachyegiya. ² Tomgaka Tertolo. Yinuwaka jigyeglewleta. Wane china, ³ "Ga wa pixa chinanu kigle gwashlepotwu. Gixopirana gilepokotka yinyegiya pyanshinikanugnaplelew chinanu. Psoggoneko, pasretmnunanuka wyoptotyalu, psolpotuyako wpoyagnutjetyi, kanshinikanuru potu Wilisi. ⁴ Ga wa nma mamaletpotutyanupyi, nagjityi pyijnakotyapwu pshinitsonu wa pixjetyawaka potukalyi.

⁵ "Gi rixanu wukshiklu tye jeji kojwakpotlewjetachri. Yagotkaklu palnakakjetachrini wa pejnuruneko Goteoneyegkaka psolchijiyako. Walenwa Nasarenone mkoje chinkalune kosekachri ⁶ Kpashwakapji gimuteru rixkakmaka. Wkashichanru. Waluka gitakyagokleyegitanru Tokanchi Yokanatkaluru wixanu chinyawaka. ⁷ Ga wa solalone gitsrukate Risya gapyejitu. Psolmuckonuyako wumyo konyawu. Yokanatna jigyegitjene pixa yegi yinripna. ⁸ Pixpotuko gepomsatanru, pumkata gimatletyaplu pejnuruko tyekakapiranaya wjigyejityalu."

⁹ Pajigyejikolutu rixluna Goteayne. Wanepotuko chinruna tyepirana.

Pawlo giykoyegitnawa Wilisi yegi

¹⁰ Gitsrukaachi towutlu Pawlo yanumatinripa. Giyagni Pawlo gigita, "Gi rixanu numata gixo walapu kgitakyagoklewakleryi nyi yinyegiya, kiglen-shinikanurno nuykoyegitinwa. ¹¹ Gi rixanu pixa gimkata gimata jemletlu gi wa pamole gepgognepnutewani Gerosale nkanikinri nyoptsojitiyeglewta pinripa. ¹² Gi wa rukshiknona satuyma nugjekaktokanutinri kpashiwakapiya. Gi koxa rukshiknona yagotkaklu palnakakachrino, gi wa ginkaklewwakapjiyako, gi wa pokchiyako. ¹³ Gi rumkata gimatkakletlu xani wa jigyegityanona. ¹⁴ Tye nupgujtatnawa pixyegiya, rixgapotyawaka wane chinka pnuko gixachri yimaklewlu, wanepotuko nixa kamrureweyegletlu nutsrukateni Goyakalute. Nalixlu ptowrukakako Tokanchi Yokanatkaluruya ga wa tokanchi geneklewatachine kirukateya yonatkaluru. ¹⁵ Goyakalu nkagwakyalu waneplu yotunru gipnachine chinanu, poyakkachine ga wa mpoyagkaakane. Wale koxa kagwkana wanna. ¹⁶ Wale chinanu nmuchkotnawa psolpotuyako muklukanuwnnan-shinikanutkatupno Goyakalyegiya ga wa yinyegiya.

¹⁷ "Giyagni gixo walapu giknoginitka wane nya nenekashatyapna kwanmonurune nonerune, ga wa geneakashlukaka nanikinripa. ¹⁸ Kpashiwakapji rukshikyanona pimrine Gasya gajene Goteayne. Kpashiri nixkaaka. Gi wa gixolnemaya, gi wa gejnugimalewanatachineyma rukshiknona. ¹⁹ Wanna gimkata gewi gwaleta pixa yegi jigyegitannonna waneyna chininipna gitapiranaya. ²⁰ Wannako gimkata ginkaklewleta wa pagixanu mpoyagkaakuto retinnona wa jemanshinikanakaketikowaka ntunwanatini. ²¹ Walepje getko satu tokanchipie wa nsaplewatinni wanna ganikajite ntunwanatini. Wane nchina, 'Yotunkakikolupna gipnachinepirana gitni wa giklukanuw-nayegjixkalurno xani gixyegiya.'

Wilisi kagwakjixna ma menekanshiniikanutkanuwa

²² Giyagni Wilisi yijnakpiranatinitalu kagwakjixna, gi rixanu rumatpotutlu wanna Pawlo galixlepirana. Wane china, “Wa yopikinipa wa solalone gitsrukate Risya, numatpotutanu gixapirana.”

²³ Giyagni yokanatuksolaloteru Pawlo girukotinripa. Kayaagostureko rixatkaluna. Gi wa rumaletkona gimolene rupxakjenepa.

Gi gepiikata repkul Pawlo wa Wilisi

²⁴ Pagognetnakni runa Wilisi Trosilayma ganunro. Walanwa Goteyo. Pawlo tomga. Yijnakyegitlu galixlu Geso Kristoya. ²⁵ Poyagkaklupiranaruynumsatlu, ga wa girukotmanrewlupiranu, ga wa giklukanuwnayeglupipirana. Pika Wilisi gitsrukaachi. Rugita, “Pyanutka xani. Kagogne nchininipa nepukanyi.”

²⁶ Kagwaakoxtu Wilisi renekikolupa sroschi Pawlo chinanu kaspukyapl. Giyagni gi gepiko kata repkul. Ruynumsatlu.

²⁷ Gepi walapu giknoginitka, Porsyo Wisto kashrigatkalu Wilisi. Ga wa Wilisi galuka gimutletna Goteyone. Giyagni ruknokamtatkalu gostutkaluru Pawlo.

25

Goteyone jigyegitlu Pawlo Wisto yegi

¹ Giyagni walesreta rapokinikta Wisto. Mapgogne chininitka Susari kanikya. Gerosale rapoka. ² Runkakluna tsrukakalune sasertotene ga wa wanna potu Goteyone Pawlopirana. Ragjitluna. ³ Ragjitluna rupx-akikolupna Pawlo chinanu. Gerosale ranikjixyapl. Yogimagnaputy-atkaluna gatnugapoya ruylatyapluna. ⁴ Giyagni Wisto gigita wa Pawlo Susari girukotikaluru, ga wa waleko pshinitsonu yanutka. ⁵ Wane china, “Giyagni wa gixa ginkatachine Susari giyopikanu. Gjigyegitanru wa waneya chininipa pagixanu mugletu wa tye jeji.”

Pawlo gapguwyegitlu Susa

⁶ Wanna yegi rawanata yokgipgognepje ga wa pamolgogne getko. Yopika. Susari ya. Waleprikgogne gitakyagoklewjetikowaka tuplata. Rawajpix-atkalu Pawlo. ⁷ Rapokinikta wale, Gerosale giyakatyachine Goteyone sajurku. Runkaksayemptutluna gektutpotupiranu. Gi rumkata gipguj-taletluna galikaka rixinri.

⁸ Ruykoyegitnawa Pawlo. Wane china, “Giketsotaji wa Tokanchi Yokanatkalue Goteyonenu, gi wa kpashiwakapjiko, gi wa Susako mugletu nkamrutya.”

⁹ Wa Wisto galuka gimutletna Goteyone. Giyagni Pawlo rugita. Wane china, “¿Gi ge paluka kanikleta Gerosale? Wane nutakyagokinyi tyekakapirana.”

¹⁰ Wane china Pawlo, “Wa Susa gitakyagoklewjetyawaka ntunwatanu. Wane numkata ginglepokletikolupa nutakyagokikolupa. Gikena mugletu nkamrutkamka Goteyone, wa pixa gimatpotutyawaka. ¹¹ Gi rixanu wa mugletu nkamrutmaka ga wa pagixanu nupinrin chinanupa, gi wa nkegemga nma mupninitipmaka. Seyni malesha chinini wa jigyegityanona gikena ginkata samyokletno wannayegi. Napguwyegitlu Susa.”

¹² Giyagni Wisto giynumsatna jemanshinikankaketikowaka gajene. Rali giynumsaletinitkana, wane china, “¿Papguwyegitlu Susa? Susa yegi pyanu.”

Wisto ginkaklu pogirchi Gakripa Pawlopirana

¹³ Pagognetnakni pogirchi Gakripa ga wa Wirnisa Susari rapokna. Wisto ralukinripna. ¹⁴ Gixgogne wane rawinitkana, Wisto ginkaklu pogirchi

Pawlopirana. Wane china, "Waneru satu jeji Wilisi giknokamtanru gostutkaluru.¹⁵ Gerosale nyini, tsrukakalune sasertotene ga wa tsrune Goteyone ginkakno walepirana. Ragijyegitluna ruklukanuwnayegjixikolupa.

¹⁶ "Wanna nugita, gi wa rixjetyawakna Romanone wa satu yineru samyooko wale ma metgojitkanuwana jigyegitjene wuchichyaplu ruykoyegit-inipwa jigyegitkoluya.¹⁷ Giyagni gewi runinitkana pejnurunemnuni, gi nkagwakjixajitna. Waleprikgogne gitakyagokikowaka ntuplata. Nwapjixlu jeji.¹⁸ Rapokinitkana jigyegitjene gi satuna jigyeglewluglewlukaka rupashichanruyna, ga wa satu Gesopirana gipnachrinatka wa Pawlo gipguitatyalu giwekachri rixinri.¹⁹ Gita gi numatanshinikanuta wane pixkalulu gepomsalewlupiranaya. Giyagni wane nchinru gikta Gerosale raluka yaleta ruglepokyegitikolupa, rutakyagokikolupa tyepirankaka.²⁰ Wa Pawlo gapguwata rumretikolupa Pogirchi Gakosto gimata getjerewatinrigogneputunanuko. Giyagni numretjixlu Susa yegi yokanatkoklunpotunanuko."

²² Giyagni Gakripa wane chinru Wisto, "Gita koxa galuka yijnakletlu wale jeji."

Wale wane china, "Yechikawa pyijnakotanru."

Pawlo ganiika Gakripa yegi ga wa Wirnisi koxa

²³ Giyagni waleprikgogne runa Gakripa ga wa Wirnisi koxa. Tsru pogirelwu rumupgujewnana. Jiglokjetikwaka rapokna, solalone git-srukateneymananuko, ga wa jejine wanna potu pokchi gajene. Wisto gwapjixlu Pawlo.²⁴ Wane china Wisto, "Pogirchi Gakripa ga wa pejnurune jejine wixaymalune, getanru tye. Pejnuruneko gixolune Goteyone jigyegitluna gita yegi Gerosaleya ga wa gewi koxa. Wane china saplew-jeretna ma muwekinipatka.²⁵ Ga wa gi satuna numata jema rupnirin chinanupa, ga wa waleko gapguwyegitlu Gakosto. Giyagni wane nixa gishinikleta yokanatkalurupni.²⁶ Gi wanepotuko waneyno walepiranaya nyonyegityaplu wa gitsrukaachi. Giyagni nkoshpaku gixa yegi. Pix-potuko galikaka, pogirchi Gakripa, wa repomsatkozlunkunpatka waneyapno tokanchi nyonatanrupa.²⁷ Gi rixanu gita goya seprolokunwa gostutkaluru yokanatkoklunchi munkaklewyegitkotuko klu chinanu jigyegitka."

26

Pawlo giykoyegitnawa Gakripa yegi

¹ Giyagni Gakripa wane chinru Pawlo, "Pumkata ginkakleyegitnawa."

Giyagni Pawlo yotukamyota. Ruykoyegitnawa,² "Pogirchi Gakripa, npoy-agnultu wa pixyegiya nuýkoyegitnwa xani ptowrukopirana wa Goteyone jigyegityano.³ Galikakakni. Gi rixanu pixni wa Goteyone gixjetyawaka ga wa repomsalelekakna gimatachriyi. Giyagni nagjityi mapognanutupyi pyijnakotyapno.

Gi rixpokotyawaka Gwariseyo rixinri

⁴ "Gi rixanu nmaklutinyakawa nixjetyawaka muchikawayakawa nonerunetskalaya ga wa Gerosaleya, pejnurune Goteyone gimata.

⁵ Muchikawayakawa rumatnona wanna, wa raluka gipguitaletinip-maknona, wa wanepotuko gixa yonogletachine wixanune mkoje pixkalutunanno Gwariseyonanno.⁶ Ga wa xani kagwakikolu chinanu Goyakalu gipiratanru wutsrukatteniya nutunwata nutakyagokikolu.

⁷ Wale kagwakikolu kagwaka gapkapletpna wpamolegepinerutene, Goyakalu kamrurewyempotutachine gogi ga wa goyechno. Wale

kagwakikolu chinanu Goteyone jigyegitno, Pogirchi Gakripa.⁸ ¡Gaal! ¿Gixa goya gayrokklurge gixkaklukoya wa Goyakalu yotunkakanna gipnachine?

Kristonune kojwaka Pawlo

⁹ “Giyagni gita galikaka gishinikanuwata numkata kamrureta gixo nkamnixyaplu giwaka Nasare Gajeru Geso.¹⁰ Tye nkamrutapa Gerosaleya. Gitaakalurunanno tsrukakalune sasertoteneya. Yoshmakikwaka nushyayegityana gixo kpashirine. Ruylatkoklunutkana, nugita gita.¹¹ Gi gepiko kata pejnuruko ginkaklewawakapjikakaya nsaletjetyana. Psolmuchtikonuko nertatna mupashiregnuchi chininripmakna. Gimtuwnananumtachripotno wanna chinanu. Nkojwakananumtna pasreta gajerkaka pokchipotunuko.

Yochigatachri wa Tamasko gapokgapotachriya

¹² “Wane nixananumtini, Tamasko nyinitka. Nutaaka ga wa waneyno kiruka nyokanatikolu tsrukakalune sasertoteneya.¹³ Pogirchi, ganikaj-gognetkani gatnugapo netyalu tengogne gajeru yochigatachri, tkachi gatajnu pnu. Ratajiwnayegitu gita ga wa numotsane.¹⁴ Giyagni chiji wapokana pejnurunnikwu wixni. Satu tokanchi nyijnakota Gewreyone tokanuya nyunumatjeru. Wane china, ‘Sawolo, Sawolo, ¿klu chinanu pkowjkawno? Pixnanniko kachinolu pixnanwa pakaxjerewatana yowumajri pixka.’

¹⁵ “Wane nchina, ‘¿Katyi Pixa, Gitsrukaachi?’

“Wane china Gitsrukaachi, ‘Gitni Geso wa pixa kojwakanruno.¹⁶ Seyni palnanutka. Ptunwatanu. Gi rixanu tye chinanu nupgujewnayegityi nutakyapyi notowrerupyi ga wa gipguitalewatachripyi petanrukakapirana ga wa nupgujewnayegityapyipirana.¹⁷ Nkoshpakanyi yinyegiya ga wa payinyegiya, wa wanna yegi nyokanatanyi.¹⁸ Rumrekgakakikolupna panene, ruprotakinripna, mapshagwaka rushpakinripna. Pokamlawaka yigatinripna; Satanasyo girukotlewatywaka rushpakinripna; Goyakalu yegi yigatinripna; kaspukmukochiretkolupna, ga wa waneya rixinripna kpashirine gixkakaluneyma, gi rixanu ralixnona Gita.’

Gi wa malixkotni wale wa tengogne gekakgitikaluru

¹⁹ “Giyagni, pogirchi Gakripa, gita gi wa malixkatno wa Goyakalu gekakgityano.²⁰ Seyni wa Tamasko gwanatachine gapka, ga wa Gerosale gajene, ga wa psolusretako Gote gajene, ga wa payineko nunkaklewyegita renshinikanutinripna. Kashrijetikolupna Goyakalunune rixinripna, gen-shinikanutachine kamrure pixkapotuko kamrutinripna.²¹ Wale chinanu Goteyone kashichno kpashiwakapjiya. Ruylatmaknona.²² Giyagni Goyakalu gipxakalchinanno, xanigognenanu nomkagi gipguitalewleyegitna mturune ga wa tsrune. Gikena nchina wanepnute. Tyepjeni tokanchi geneke-lewatachne chinyawaka ga wa Moysisi chinyawaka ginachripa.²³ Tokanchi ginkakletachne ginkakletlu wa Kristo salewninripa. Walenwa muchinanu gapka yotunotachripa gipnachinetskalaya, yine yegi runkakletyaplu pokamlalu ga wa payinyegiya.”

Pawlo chanixlu Gakripa ralixinripa

²⁴ Wane china giykoyegletnawa. Giyagni Wisto tsru tokanu rixnawa. Wane china, “Seproluktayi, Pawlo. Gi gepika Tokanchi Yonatkaluru pumat-inri seprolookakyi.”

²⁵ Wane china Pawlo, “Gi wa seproluno, kshinikanuru Wisto, seyni tokanchi galikakpotunanu kanshinikanuru nyanumatya.²⁶ Gi rixanu,

Pogirchi, pumatlu tyekakapirana. Pixa getanu koxa nyanumsata pgujetanwaka. Gi rixanu gi nkagwaklu yogimatika wale. Gi rixanu gi wa kegnete kamrutikalurni wa tye. ²⁷ Pogirchi Gakripa, ¿gi ge palixna tokanchi genklelewatachine? Numatyi palixinri.”

²⁸ Giyagni Gakripa wane chinru Pawlo, “Ptotsotaji magata pushinikanutyano Kristonu nixinripa.”

²⁹ Wane china Pawlo, “Nagjiltu Goyakalu wa ptsotsotajiyako ga wa gixpotuyako pixa ga wa pejnruruneko nyijnakotjene wa xani, gitako pixka gixachinetkani, seyni tye gosturutsapje gi waneyapgi.”

Gakripa goya

³⁰ Rali wane chinretinitka Pawlo tyepirana, Pogirchi palnatka, ga wa gitsrukaachi, ga wa Wirlisa, ga wa wannayma tuplanatachine. ³¹ Wa ruxrikamtinitkana, wannakakluko wane chinkakna, “Gi satuna kamruta tye jeji rupnirri chinanupa, gi wa rostutikolupako.”

³² Giyagni Gakripa wane chinru Wisto, “Tye jeji gimkata kaspukletkamka ma mapguwyegitkanumkalu Susa.”

27

Romayokanatkalu Pawlo

¹ Giyagni wa rutaaka wyagapgatinripatka, Gitalya gayinripatka. Ksolaloteru Golyo giwakatletachri, Gakosto solalotene yegi gwachri, samyokatkaluna Pawlo, ga wa pimrine gostutkalune waleyma. ² Giyagni watskotatkalo sato tsro kanawa potu Gatromentina giyakatyachro. Gasya pokchikaka galuka yaletachro. Wutspegtaka. Wixaymalu Garistarcho, Tesalonika, Masetonyasreta gajeru.

³ Waleprika Sito wutspakatka. Golyo kigle getle rixlu Pawlo. Ruchi yaletlu, ralukanune yegi yinripa, rupxakyapluna. ⁴ Wane wutspegyatka. Suproknipreka tukasretate gayapamta. Gi rixanu kannipgyalu gakaxrikamtwu. ⁵ Surisya Wenne ga wa Pampiri Wenne gayapamatatka. Mira wapoka Lisyasreta pokchi. ⁶ Ksolaloteru wane gikshikyalo sato tsro kanawa potu Galegantri giyakatyachro, Gitalya yachropo. Wala pokotwu. ⁷ Gi gepikgogne wyagapgata yiglepotuko. Wixasha gapokleta Knito ginaple. Gi kaspukapanwu kannipgyalu. Kretatlapga wyapamta Salmostsi. ⁸ Kyapre potu gayinri. Wapoklu Kigleru Yopjewaka chinikowaka. Wane gi gowukaylu Lase Pokchi.

Pawlo giykole njemkotu

⁹ Gi gepikgogne wuknokakatka. Kyowiklu yagapgalu, gi rixanu ruknogatka wa gogajirewlugogne. Pawlo giykotna. ¹⁰ Wane chinna, “Jejine, netlu tye yagapgalu waneplu tsru gimbuklupa ga wa tsru gamgalupa, gi wa wunruchipjeni ga wa kanawa koxa, seyni wuwekinriko koxa.”

¹¹ Ga wa ksolaloteru galixna kanawa ganikachri tokanu ga wa kanawateru, wa Pawlo chinyawaka pnuote. ¹² Gi kiglepokypewakleru wuknokakyaplu ginapu. Gixo gishinika yaleta waneya, gikta rumkata gapokletluna Winisi, wane wuknokakyaplu ginapu, Kretakniprekla yopjewakle, tkachi kegnetesretateswaji ga wa potuklesretateswaji giyakatyachrinnipyga gapokannipgyajetyawaka.

Jiweylunnipgya pixkalutu

¹³ Tkachi kegnetesretate ruyakannipgyatya. Yiglepotuko rajpopokannipgyata. Kagwakluna waneyatkana wa rushinikanruyna. Kosetatkalu tsataprena. Kretakniprekawnaga yana. ¹⁴ Gowukshini rapyegitlo

kannipgyalu jiweylunnipgya pixkalutu, Geroklito giwakannipgyani. ¹⁵ Tushatkapka kanawa. Gi tumkata yoptoretlu kannipgyalu. Wetashatatkalo. Gayashatatkalo. ¹⁶ Satu mturu kanipreku, Klawta giwakatletachri, wuknogamta. Wixasha gimkatle gishatkapletlo mturo kanawa pokotkaluro. ¹⁷ Wala ranikinitkana. Wane rixa gigleretanutkalona tsro kanawa. Rapatlona. Surtesloji pika gapokletna. Jirukluna mkachrichrata. Wane wixa gayashletatka. ¹⁸ Giyagni wyowjeyempotutana. Waleprika ruknopjegawunnutanatkana. ¹⁹ Waleprika potu wumyoyopotuko wuknokgachratatyatkalu kanawa yaninri. ²⁰ Gixgogne gi pgujru tkachi, gi katagiriko. Wunnewgognenatana. Gike kagwaakatka wanepnute wushatkapikolupa.

Pawlo giglenshikanutna rumotsatjene

²¹ Gixgogne wogajirewatanatka. Giyagni Pawlo wanna ganikajite tunwata. Wane china, "Jejine, galikaka gixa gimkata galixletkamkano. Gimka Kreta wutspieginnichi, ma munyegitanimkawu tye gimtuklu ga wa gamgalu. ²² Ga wa xani nuykotgi kiglenshikanupgi. Gi rixanu gi satuna gixa gamgagiwekletanu. Seyni kanawapje gammangu. ²³ Gi rixanu tyeyechnoni gita yegi rapoka Goyakalutwreru. Wa Walenno gita. Wale nkamrurewye-gita. ²⁴ Wane china, 'Pawlo, gi pikanutka. Susa yegi pumkata gapokletinripa. Ga wa Goyakalu genekyi pejnuruneko puyagapgatanune.' ²⁵ Giyagni, jejine, kiglenshikanupgi. Gi rixanu gita galixlu Goyakalu, wanepotuko rixanu wa chinyawakno. ²⁶ Seyni wumkata satu kanipreku gitaakota."

Galuka gasukletachinmaka

²⁷ Pamole gepkoxamkojyecho chiniri, Gatriyakoskitgatlapa gayashatanatka. Ganikajyecho kanawa ganikachte kagwaklu gi gowukatkalu chiji. ²⁸ Yantagatluna. Gepkoxamkojmolekano rukshikyaluna tennuga. Wanepnuteyaka yana. Rumepe yagotgaletatnakna. Mapmole patsrujire metro tennuga rukshikyatkaluna. ²⁹ Wanna piklu sotlu gwiywaka wyoxgiyeginripa. Giyagni tostsi ruknokgatluna gepkoxamkoje tsataprena. Ragjigogneta rumrerekirripa. ³⁰ Giyagni tsro kanawamka rasukyamkana ganikachte. Jirukgatatkalo kanawa mturo. Wala pguta rapgutanatna jirukgatyapluna wa tojri gajeru tsataprena. ³¹ Pawlo wane chinru ksolahoteru ga wa solalone "Tsro kanawa ma mutukinna wanna, gixa gi gimkata gishatkapkotanu."

³² Giyagni solalone gistakatsatkalona mturo kanawa. Retasha gjrukletatkalo.

Tsro kanawa yagapgatyachine gali gogajirewleta

³³ Pawlo nikjixatkana pejnuruneko rumrerekastsipotunanuko. Wane china, "Pamole gepkoxamkojgognetkani tye gkagwakanata gogajirewatnri. Giketsotaji gnika. ³⁴ Giyagni nuykotgi gnikanutka. Gi rixanu tyenwa giwekinripa. Gi rixanu gi pajiwutsana gamgini pejnurunekgi gixa."

³⁵ Wane chininitka, rawlo jimapro. Poyagnutlu Goyakalu pejnurune getanu. Jiknajrotlu. Yinuwaka nikletatkalu. ³⁶ Giyagni pejnuruneko kiglenshikanutka. Niikoxatkana wanna. ³⁷ Wane pejnuwu tsro kanawa, gepi pacha payokgipremole patsrujire. ³⁸ Jinanutkana. Komlikayakatatkalo kanawa. Tsru wenu ruknokanatkalu trikoji.

Taschekatka kanawa gitsroka

³⁹ Gogi rixinikta gi wa rumatluna chiji, seyni retluna ratlogkapyawaka. Kaksatewnaglu. Wane rushinika gitspaakakletlona kanawa

rumkatiniplona. ⁴⁰ Koshpirokatsatatkaluna tsatapre. Tsru wenu kaspukatkaluna. Waneklu koxa kogrokatsatatkaluna potukatapretsna. Romulkuna mkachirchrata teno gajeru kannipgyalu yegi. Wangasreta ya kownokletatkaluna. ⁴¹ Giskitga ganikajite, taschekatka kanawa. Taschekajritanatka. Gi tuyoljetatka. Ga wa totsi tutspatgastsityatka gichkogalu chinanu.

⁴² Giyagni solalone gishiniklu ruylatikolupna gostutkalune, gikena ma masuukanpakni ganogatachri. ⁴³ Seyni ksolaloteru galuka gognetkakletlu Pawlo. Rumaltayegitlu wanna gishinikle. Wale yokanatatkana gimkata ganogletachine muchinanu gapka ruptekgamtinripatkana, chiji rapokin-ripna. ⁴⁴ Ga wa gixetachine, pimrineko kanawashpata, ga wa pimrineko klunerukokta kanawa gajeru, yiylatkana. Wane rixkatka pejnuruneko chiji gapoka. Rognewatatkana.

28

Gimnu saprikamyotlu Pawlo

¹ Wognewatinitka. Giyagni wumatatkalu kaniprekluni. Melita giwakni. ² Ga wa patokanchiko yanumatyachine retwamonpotutwuna. Pawatatkana. Kigle yoptole rixwuna pejnurunekwu gina chinanutka ga wa kachikleru chinanu. ³ Giyagni rapatjepluta Pawlo. Xirnachri gogo rutaklu. Satu gimnu chichi gemnu rasukya. Saprikamyomtanru.

⁴ Patokanchiko yanumatyachine getinri gimnu ruxripamyonatlu, wane chinkakna, "Tye jeji galikakni kgylalewaklerni. Tsru wenu rognewatyan, seyni kgiklukanuwnala chinanu gi retashatka ruwekinripa."

⁵ Giyagni wale giwlipatlu gimnu. Xirnachri rapokamtana. Giketsotaji yayixa. ⁶ Kagwaka gankaletmalkluna, ga wa walegnapunanu yawnamt-inripa gipnachri. Seyni gowukshini potu kagwakinikana, retluna wa gike giknoglu. Kashrijetanshinikanutna. Goyakaluktani chinruna.

Poplyo giru gituukaaka

⁷ Waneru kachijneru, kanipreku gitsrukate. Poplyo giwakatletachri. Kigle yoptole rixwu. Mapgogne gipji rutakwu. Rushinikanuwyegitwu. ⁸ Wane rixatka. Poplyo giru yayixachrina. Pachwatana ga wa tserugatana, giklugachrina. Pawlo jiglokyegitlu. Ragjigogneta. Rutakamyogogotlu. Ruttuukaku. ⁹ Wane rixinitka, pimrine koxa kanipreku gwachine, yayixachine ginyegitlu. Ruttuukaakana. ¹⁰ Gixo renekashatwuna kagwakpiratyachinan-wuna. Wutspeginpatka pokotyawuna walukanru.

Romatkalu Pawlo

¹¹ Mapa ksuru giknoginitka, sato kanawa Galegantrina giyakatyachro wutspagyatka, waneknipreka giknokakginaputetyachro. Wala waneya tumatikolu Gopite wgenene gepirune yaglu. ¹² Surakosa wapoka. Mapgogne wane wutuka. ¹³ Waneya wsajruka. Wapokatkalu Rigyo. Waleprika tkachi kegnetesretate ruyakanipgyatya. Waleprika potu wapoklu Pote-wolo. ¹⁴ Wane wukshikyana moletkakachine. Ragjitwuna payokgipregogne wumwiyapna. Wane wixa yaleta Roma. ¹⁵ Wane gajene moletkakachine yijnakyegitinitkawu, yoptotapwuna. Gapyoputu Pokchipotunanuko ga wa Mapa Gwajetikwaka Pokchi rapokna. Pawlo getinitkana, Goyakalu poyagnuta. Kiglenshinikanutkalu.

¹⁶ Roma wapokatka. Ksolaloteru gostutkalune samyokatkalu solalonepji gitsrukate. Ga wa ruchichka Pawlo waleko rawyawaka rawinripa, satu solaloyma girukotjerupa.

Pawlo gepukna tsrukakalune Goteyone Roma gjajene

¹⁷ Wane rixatka. Mapgogne giknoginitka, Pawlo gapatjixna tsrukakalune Goteyone. Rapatinitkana wane chinna, "Jejine, nomolene, gikeyaka nkam-ruyegitna yine. Gi wa wuneruneko gixjetyawaka nkotnuka. ¹⁸ Seyni Gerosale nsamyokika gostutkalurno Romanonemoyoya. Wanna gitakyagokinno, raluka kaspukletnona, gi rixanu maleshayno nuklukanuwnale nupnirinri chinanupura. ¹⁹ Ga wa Goteyone yoptopiratno. Giyagni nerutka Susa napguwyegitinripa. Gi wa waneyno njigyegityapna nonerune. ²⁰ Giyagni tye chinanu nepukgi netyapgi ga wa nuynumsatyapgi. Gi rixanu Gisrayilne kagwakle chinanu gostutkalurno tye yowumatsaya."

²¹ Giyagni wane chinruna, "Gi Gote giyakatyachrotsotaji kiruka wyop-toyegityi. Gi satuna wane giyakatyaa wumole runkaklepiranyegityapyi, mugletu chinpiranyegityapyi. ²² Walukmaka yijnakyegletyi pchinan-shinikanutyawaka. Gi rixanu wixa gimatlusolusretayako nyi pnuko gixa galixletachine mkoje gapatkalunni."

Ma malixlenna Goteyone

²³ Pagogne rutakna. Gi gepika wanna yayegitlu rawyawaka. Runk-akpokowakatna. Wanna yegi rupgujattlu Goyakalu pogirewatyawakapirana. Rushinikanutna Gesopiranaya Moysisi Tokanu Yokanatkaluruya, ga wa tokanchi geneklewatachine kirukateya, goyechnokawpotuko wa kaptutanuko. ²⁴ Giyagni pimrine gishinikanutka chinyawaka chinanu, ga wa pimrine gi galixa. ²⁵ Gi wa pashinikanurunni wannakakluko. Giyagni ralimtatkana. Pawlo wane china tye tokanchi, "Kigle yanumle rixa Gi-wekkaluru Kpashiri, tokanchi geneklewatachri Gisayiyaya. Wane chinna wutsrukateni:

²⁶ Nyi yine yegi pyanutka.

Wane pchinanu:

*Gijnakopna gyijnakotini, gi gimata jemanuna.
Getini getinmaka, gi gimata getanuna.*

²⁷ *Gi rixanu shikowgajitatkana nyi yine.
Ga wa gijnakopnayna kyapreru yijnakotyana
Ga wa rushyaygaletna. Giyalna ma metinitipna.
Gi wa gijnakopnayna yijnakotinripna.*

*Gi rajiyakna rumata jemyana,
ma kashrijetikotupna, nma mutuukakyayanupna.*

²⁸ Giyagni gixa gimatantu payineko yokanyegitkatka tye gognetkaklewlu Goyakalunu. Wanna yijnakotanru."

²⁹ Wane chininitka, Goteyone yatka. Repomsakakpotna.

Gepi walapu gostutkaluru rixinri Pawlo runkaklewaty

³⁰ Giyagni Pawlo gepi walapu psolwalapuko gipji wenutkalurupji rawa. Yoptotna pejnuruneko runyegitjene. ³¹ Goyakalu pogirewatyawakapirana runkakleta. Pgujetanwaka chiina ginkakletna Gitsrukaachi Geso Kristopirana. Gike gimaletlu.

Kpashiri Pawlo Kirukate Romanone Chinanu

Kiruka yonatachri ga wayonatanrupirana

¹ Gitni Geso Kristo wayegrerro Pawlono, tomgakalurno yokanatanrupa, nutakikolupa Kiglerpotunanu Goyakalu Tokanu chinanu. ² Tye tokanchinwa muchikawa rupiratanru tokanchi geneklewatachineya Goyakalunu, kpashiri yonchiya. ³ Tye tokanchinwa Giturupiranni. Walenwa Tawiklopisha gimaneya. ⁴ Walenwa gipgujetkaluru Goyakalu Wgene rixinri muchkonuyma. Gipgujetkaluru Giwekikaluru Kpashirpotuya, wa gipnachinetskalaya yotunomtyachritka wa Geso Kristo Wutsrukate. ⁵ Geso gimuslelele chinanu yokanatanru nutakikolu, ralixyapluna Wale tokanu ptowruneko pachijnemnunanuka gajene wa giwakaya.

Kiruka yoptotachine Romanone galixachine

⁶ Wanna galixachinemkojenangi gixa. Geso Kristo tomganungi, ⁷ wa pejnurunekgi Roma gwachingi. Goyakalu galukanungi, tomgakalungi, kpashirinepgi, gimuskalunepgi gixa. Wa Goyakalu Wuru, Wutsrukate koxa Geso Kristo giglenshinikankakangi ga wa rumutangi.

Pawlo galuka Roma salwayegletna galixachine

⁸ Muchinanu npoyagnutlu Noyakalute, Geso Kristoya pejnurunekgi gixa chinanu, wa gixa galixle psolchijneko pogitikolutka. ⁹ Goyakalni nkamrurewyegitanru nonshinikanuya Kiglerpotunanu Tokanchi Giturunu. Walenwa netjeru, gi nutuka gishinikletgi wa gixa nagjigogneeyegognenatgi. ¹⁰ Nagjitlu patako waneplu pagogne, Goyakalu galukiniplu, kigleru yagapgalu gixa yegi nyinripa.

¹¹ Gi rixanu gita galuka getlepotutgi wa nkotspaltayegityapgi Goyakalu genekashle Giwekikaluruya gmuchkotanshinikanutjerupa. ¹² Walenwa wugleretanshinikanutikolupa gixaymananuko satkaka galixleya, gixanni wa gitanu koxa. ¹³ Seyni gi naluklu, nomolene, gma mumatyaru, wa gixo katmaka wane nushinika gixa yegi nyinripa, seyni xanigognenanu wane nixa gimaletletkota. Naluklu wa gixatskalaya koxa waneyapno nkamrutanrupa, payinetskalaya pixka.

¹⁴ Nriwishkatna Kriykone, kgimtakanurune koxa, wanepnute kgimatkalerune ga wa mumatkalene. ¹⁵ Giyagkoxni gita pejnuruko numkyawaka naluklu ginkaklewyegityapgi Kiglerpotunanu Tokanchi wa gixa koxa Roma gajengi.

Kiglerpotunanu tokanchi giyaklewle

¹⁶ Gi rixanu gi nupatewatlu gita Kiglerpotunanu Tokanchi. Gi rixanu walenwa Goyakalu giyaklewle wa gognewatikaluru chinanu, pejnuruneko galixachine chinanu, wa Goteyone gapka chinanu, ga wa Kriykone koxa chinanu. ¹⁷ Gi rixanu Kiglerpotunanu Tokanchi gekakgitlu Goyakalu poyagkaklewle yineru galixle chinanu. Ga wa pnuteyaka galixlu waneyaplu, Yonchi chinyawaka: *Wa poyagkakachri giwekanu ralixleya chinanu.*

Yine mukochire

¹⁸ Pgujetanurni Goyakalu jgekanu tengogneya ptowruko makag-wakpireyna, ma poyagkaklenuya wanna yine chinanu wa rumretanruna galikakpotunanu tokanchi mpoyagkaakane rixinrina. ¹⁹ Gi rixanu wa

Goyakaluya gimatikolutka wanna koxa gipgujetyegitka. Gi rixanu wa Goyakalu gipgujetlu. ²⁰ Gi rixanu wa mpogijetkaka wa Goyakalunu, walenna gike rixiniko mnikawnakatu ruyakle, wa Goyakalu rixinri. Mpogijetkaka gipujetanru wa ruyakotiniyakawlu wa tye psolchijneko. Gimata jemkalurni wa kamrutkalurkaka chinanu. Giyagni wannako chinanupni, wanna mpoyagkaakane.

²¹ Gi rixanu rumatmalkuna Goyakalu, gi rupashichluna Goyakalu rixinri. Gi koxa poyagnutluna, seyni maleshawaka nutanshinikanutna. Manshinikanugajine mapshaga rixgajitkana. ²² Kgimatkalerune rixashatnawana. Seprolokanatkana. ²³ Royaknu Goyakalu mpojpakatu rupekotluna yagluchi yineru pojpakalu pixkalutu, ga wa kamejirune pixkalutu, ga wa nikchine gepkoxamkojejirune pixkalutu, ga wa gistako yosrolotyachrikaka ixfkalutu.

Jejine sotanugolune

²⁴ Giyagkoxni wa Goyakalu samyokna puchowninripatkana sotanugnuchi rajiyna, mpashmanene rixkakinripna wannakakluko. ²⁵ Wanna gipekotlu galikakpotunanu tokanchi Goyakalunu gayroklu chinanu. Yonogyegitluna, giyakotkalunkaka wa Kgiyaklewakleru pnute. Walenna gimalwugognenatkalurupa gike rixiniko mnikawnakatupa. Wane gixkalurupa.

²⁶ Giyagni wa Goyakalu samyokna wa sotanugnuchi kapatmenuru waneyapna. Gi rixanu wa suxnenekashrijetluna rixjetyawakna rumumturetanruna wa ma mixyawakanna gimumturetkaluru. ²⁷ Waneko pixka koxa rixna wa jejine. Ruknokluna rixjetyawakna rumumturetanruna wa suxneya. Tsru sotanugnuchi rixna wa wannakakluko. Wane rixa mapatmennuchi kamrutna wa jejine jeinkakluko. Gimane koyna saletikolupna rapnutikolupna pupjeyeginatanrunako pixkalutu.

²⁸ Gi wa rugleretluna rumatpotutyapluna Goyakalu. Waneko pixka Goyakalu samyokna satu shinikanchi mugletuya, wa kamrutyapluna maluukotu. ²⁹ Ptowruko mpoyagkaknuchi, muglenchi, gimkapnuglu, gekktutu gwagajpotutanunni. Ga wa wanepnute waneyna ranxalna, ruy-lalewlena, yoptopirkakleyna, yokwireyna, ma nshinikannuyna. Gixaxatachinni. ³⁰ Kapataklerune, Goyakalu kamnxachinni, kgektutetakklerune, galixkotnachinwa, tsru gixashatnachinewa, gekktutu koshpakanche, kaaligiruklerune. ³¹ Manshinikanune, mpoyagkaakane, rumumtureta galuklewe mixkane, maluka gishinikanuwyeagleakane, metwanrene. ³² Rumata jemanrukmaknina Goyakalu gitakanru, wa wale pejnuka kamrutachire poagyakluna wa rupniripna. Gi wa walepje kamrutna, seyni rugleretluna pimrine koxa waneko pixka kamrutinripna.

2

Goyakalu wanepotuko gitaka yagoklewle.

¹ Giyagni pixako pchinanupni, yineru, girukoktai pixini wa ruklukanuwna pchiniegitalu satu. Gi rixanu wa Klunerukokta ruklukanuwna pchiniegitalu, puklukanwa pixnanniko. Gi rixanu waneko pixkalutunyi pixni, wa pixa wane china ruklukanuwninripa. ² Seyni wumatlu wanepotuko ruklukanuwnayegjixanna Goyakalu wale pejnunanuka kamrutachinepni. ³ ¿Gi ge pushiniklu pixa, yineryi, ruklukanuwnana pchiniegitalu tyekaka kamrutachine, pkamrutlu waneko pixkalutu: pixlege kaspuwnanu wa giklukanuwnalupa Goyakaluya? ⁴ ¿Peyikluge pixa wa Goyakalu makotkotu rumutlewle, tsru pogirewlu potu shinikannuyna, ga wa

rakotanshinikanrewle? ¿Gi putakyagoklu walekni, wa Goyakalu kosekan-shinikanutu penshinikanutinripa?

⁵ Seyni pshiknugajya, wa paji gi penshinikanutu, pumretanru pixan-pako jgekanchi walegognepa jgekanchigogneklu, rupgujewninrigognepa wa Goyakalu wanepotuko gitakyagoklewatinipa. ⁶ Wale gapnutanru satkaka rixpoko kamruretyawaka. ⁷ Kashnантакогненатачине киглеру камрутна, ружалуна ючыгу, кагвакиир, мпојпакнучи, Wale rap-nutinna wanna ruwekinripna gike rixiniko mnikawnakatu. ⁸ Seyni kgimkapnugaklerune, gi wa ralixluna wa galikakpotunaru, seyni ralixluna wa mpoyagkaknuchi, Wale rapnutinna wannapni jgekanchi wanepnute gimtuwakchi. ⁹ Salewakchi, kachinolu koxa psolpotuko yineru giwekachri chinanu wa gektutu kamrukleru, wa Goteyonepni muchichachripa, ga wa Kriykonkoxapni. ¹⁰ Seyni pogirewlu, kagwakpiiru, giglewanshinikanru kigleru kamrutachinepa, muchinanu Goteyonupa, Kriykonekoxapni. ¹¹ Gi wa manewle giglenu chinanu yoptotanru Goyakalu wa yineru.

Tokanchi Yukanatkaluru wane migjene

¹² Gi rixanu ptowruneko waneyamigjene Tokanchi Yukanatkaluru mukochirewatachine, Tokanchi Yukanatkaluru waneyamigjene koxa ramganna. Ga wa ptowruneko Tokanchi Yukanatkaluruya mukochire-watachine ruklukanuwnanna Tokanchi Yukanatkaluruya. ¹³ Gi rixanu gi wa poyagkakachine Goyakalu getanuya wa yijnakoshatachine, seyni Tokanchi Yukanatkaluru kamruklerune muklukanuwnakaakonetkani. ¹⁴ Gi rixanu wa payine gi waneyna Tokanchi Yukanatkaluru, rumumturetanruna kamrtluna wa Yukanatkaluru Tokanchiya, wanna Tokanchi Yukanatkaluru waneyamigjene, seynimka waneyna Tokanchi Yukanatkaluru wannayako. ¹⁵ Rekagitluna wa Tokanchi Yukanatkaluru kamrurepa kayongalutkani raijyna. Rupguitanshinikanutnawana. Wanekopshini jigyegitnawana rushinikanuwnaleyna. Rapgutkna panshinikanu wa satunshinikanu. ¹⁶ Wane rixanu walegognepa wa Geso Kristoya Goyakalu gitakyagokanru yine yogimatanru, wa chinyawaka Kiglerpotunaru Tokanchi gita ginkakletanru.

Wa Goteylene ga wa Tokanchi Yukanatkaluru

¹⁷ Petanu, pixni Goteyo chinnachriwayi, wa Tokanchi Yukanatkaluru munangachriyi. Ptserpiranatnawa Goyakaluya. ¹⁸ Pixa gimatl Goyakalu gishinikanru, pumata getanru wa kiglerpotu. Yimaakaluryi Tokanchi Yukanatkaluruya. ¹⁹ Paponshinikanutnawa wa pixni wa maygalen kosekachriyi; pixni wa pokamlalyi mapshagawaka gwachineya. ²⁰ Pyimakjetna manshinikanune. Mturune yimakachriyi. Waneyyi gimatkalelwu psoluko ga wa psoluko galikakpotunaru Tokanchi Yukanatkaluru. ²¹ Giyagi pixa koxa wa satu yineru yimakachriyi pixinipa, ¿gi ge pyimaknawa pixnanuko koxa? Pixa wa ginkaklewatachriyi ma chowguwatikotupa, seyni ¿pchowguwatawa pixa? ²² Pixa wane chinachriyi ma mumopatlewatikotupa, ¿pumopatlewatge pixako? Pixni wa yagluchkaka getnanutachriyi ¿mupashiregotyi? ²³ Tserpiranatnachriwayi wa Yukanatkaluru Tokanchiya. Pma kamrutkalchinanu wa Tokanchi Yukanatkaluru, ¿gi ge pma mupashichyanru wa Goyakalu waka gike? ²⁴ Gi rixanu mupashichkotu gixkaklu Goyakalu giwaka payinetskalaya, chinyawaka wa yonchi.

Sajruka gistiklewlw galikakpotunaru

²⁵ Gi rixanu sajruka gistiklelewata gipxaklewata galikakpotunanni, pkamrutiniplu wa Yukanatkaluru Tokanchi. Seyni pkaspukiniplu wa Tokanchi Yukanatkaluru, wa pixa sajruka gistikolku kamrutmaka masajruka gistikotpatka. ²⁶ Giyagni wa msajruka gistikletkotu kamrutyaplku Tokanchi Yukanatkaluru chinyawaka, *¿gi* ge wale ma sajruka gistikletkoklunu gitaa sajruka gistikletkotu chinanu? ²⁷ Girukta wa mumumture sajruka gistikletkotu seyni kamrupotutlu wa Tokanchi Yukanatkaluru, wale giklukanuw-nakakanyi pixa kapiranyegirutkayi, ga wa sajruka gistikletkaluryi, seyni pkaspukinri wa Tokanchi Yukanatkaluru.

²⁸ Gi rixanu gi wa Goteyni, wa wane rixa gipgujewnaletachrini, gi waleni koxa wa sajruka gistiklelewlu gipgujewnalu wa manchiya. ²⁹ Seyni Goteyni wa gitokoya Goteyo, ga wa sajruka gistiklelewlu walenna gaschiya, wa giwekkaluruya gi wa Tokanchi Yonatkaluruya. Gi wa rumalwurni yineya seyni Goyakaluya.

3

Panene pnute waneylu Goteyo

¹ *¿Giyagni kluneru waneylu Goteyo panene pnute?* *¿Klu rupxaklewata wa sajruka gistiklelewlu?* Gixo psoluyako. ² Gi rixanu muchinanu Goyakalu tokantu galikakpotunanu gaponshinikanutanu Goteyone yegi.

³ *¿Gi rixkoxge wa pimrine wanna malixaklene rixinrina?* *¿Wanna ma malixle chinanu gi ralixikolupa Goyakalu?* ⁴ Gi ke rixiniko. Seyni wa Goyakalni myokwiretu ga wa ptowruko yineru kayloklerunmakni, wa tokanchi yonatkaluru chinyawaka:

Wa Pixa, Goyakalu, muklukanuw-nakaakotupyi pchina yanumsaletinri;
Wa paalirewatiripa wa putakyagokikolupmaka.

⁵ Yineru ma poyagkaklenu chinanu pnute pgujpotlu Goyakalu poyagkaklewle. Wane rixini galikaka, *¿gi wchinanuna?* *¿Mpoyagkaakatlege wa saletlewatirri Goyakalu?* (Wa yineru gixyawakako nchina.) ⁶ Gi ke rixininanuko. Wa wane rixini *¿gi rixpoko giklukanuw-nayegijixletanna tye psolchijneko gwachine wa Goyakalu?* ⁷ Seyni naylokle chinanumka tsru rixinipa Goyakalu myokwirnu, rumalwutikolupa Goyakalu, *¿klu chinanu nuklukanuw-nayegijixkota gita kmukochireru pixka?* ⁸ *¿Klu chinanu gi wane wchina, “Wkamrutanru gektutu runinripa wa kigleru”?* wa pimrine wane chinyegitwu wa wane pguta wchinyawaka. Poyagkaaka ruklukanuw-nayegijixkolupna wane chinachine.

Maleshlu poyagkakachri, gi satunako

⁹ Giyagni *¿klunerni?* *¿Wanna pnutlege kiglewu wixa Goteyonwu?* Gi ke rixininanuko. Muchinanu wunkakletanatkana Goteeyone, ga wa payineko, pejnuruneko kmukochirerunni. ¹⁰ Wane chinyongatyawaka:

Maleshlu poyagkakachri, gi satunako.

¹¹ *Maleshlu gimata jemachri.*

Maleshlu satu Goyakalu gjgachri.

¹² *Pejnuruneko gitspalata.*

Gi ke gapine rixkanna.

Pawane gixkalunenatkarina.

Maleshlu satu kigleru kamrutachri.

¹³ *Yomlechi gitpukachri pixka rixaplajitna.*

Ginnuyna yokwirewatna.

Gimnu kachingate pixkalulu waneyna gispuyna rapukote.

14 Ginamna katsepoyna kamakpiirewleyna, kapsakletlewleyna.

15 Teyaknanjixirunni wa ruyokyapluna granchi.

16 Gigapkaka rawa gimpsekulewlu, tsru salewnalu.

17 Gi rumatluna gwashatikowagapo.

18 Wannaygale getanu maleshayna piyaluna Goyakalu.

19 Seyni wumatlu ptowruko Yukanatkaluru Tokanchi chinyawaka, wane china Tokanchi Yukanatkaluru waneyalune chinanu, wa pejnuruko yineru pokche rixinripa wa psolchijneputunanuko gwachri giklukanuw-nakaakalurupa Goyakalu getanu. *20* Gi rixanu wa Tokanchi Yukanatkaluru kamrutkalchinanu gi pamanennako muklukanuwnakaakonepni Wale yegi. Gi rixanu Tokanchi Yukanatkaluruya rumatika wa mukochri.

Poyagkaklewlu wa galixlewlu

21 Ga wa xani Tokanchi Yukanatkaluru migje poyagkaklewle Goyakalu pgujetanurutkani. Gipgujtakalurni wa Tokanchi Yukanatkaluruya ga wa tokanchi geneklewatachineya. *22* Poyagkaklewle Goyakalu, Geso Kristo galixikolu chinanu, wannanupni ralixjene pejnunanuka. Gi rixanu pixkak-lunni. *23* Gi rixanu pejnuruneko mukochirewata. Gi rapkapluna wa ro-yaknu Goyakalu. *24* Ga wa rumutlewie chinanu Goyakalu muklukanuw-nakaakone rixkakna. Walenwa renekashle, gi rixanu Kristo Geso wenutlu yine gognewatinripa. *25* Goyakalu galukyawaka, Geso chinanukni kaspauka yineru mukochire ralixleya, Gesograda chinanu. Wane rixa gipgujew-nakakletlu Goyakalu poyagkakachri rixinri, wa wane rixa getashlethlu wmuchochire wa muchikawa wkamrutanrukaka. *26* Pogetwamonrewlu rixkalchinanu Goyakalu, rumatapluna yine wa galikakni poyagkakachrini Wale tyegognekakaya, gi rixanu tyegognecko poyagkakachrini Wale, ga wa poyagkakachri rutaku yineru, Geso ralixinri chinanu.

Tserpiranawnalu gimaletkaluru

27 ¿Ginaakoxluge wa tserpiranawnalu? Ginanshichkaluru. ¿Giru Tokanchi Yukanatkaluru chinanu? ¿Kamruchiylege? Gike. Seyni rixjetyawaka galixlu. *28* Giyagni wyanshinikanutlu muklukanuwnakaakotu rixinripa wa yineru ralixleya, wa Tokanchi Yukanatkaluru kamruremigjeya. *29* ¿Wa Gotey-onenupjerge wa Goyakalu? ¿Gi ge payine Goyakalutkoxni wa Goyakalu? Galikakpotunanni payine Goyakalutkoxni. *30* Gi rixanu satupjerutni Goyakalu. Walenwa muklukanuwnakane rutakanna sajruka gistaakotachine galixluya, ga wa msajruka gistaakotkone koxa galixlu chinanu. *31* ¿Giyagni wutakashatlu maleshawaka wa Tokanchi Yukanatkaluru galixlu chinanu? Gike. Wmuchkotlu Tokanchi Yukanatkaluru.

4

Gawrani wyimanrupa

1 ¿Gi wchinankoxlu wa Gawra gikshikanru? Walenwa wutsrukatiwu-maneya. *2* Wa Gawra muklukanuwnakaakotu rixinmaka wa kamruchiya, ralixkotinmakwa, seyni gi wa Goyakalu getanu. *3* Gi rixanu ¿gi china wa yonchi? *Wa ralixlu Goyakalu Gawrani. Rutakyegitka poyagkaklewle rixinri.*

4 Seyni wa kamrurewatachriya gi wa geneakashlu kagwaaka wa wenu-tikolu, seyni riwishkaachi. *5* Ga wa girukta gi kamrurewata seyni ralixlu Goyakalu wa mupashiregolune muklukanuwnakaakone gitakachri, wale galixle gitaka poyagkakleyapa. *6* Tawi pixka koxa wane chinyegitlu

giglenshnikanyegitkaluru wa yineru wa Goyakalu gitakyalu poyagkakle kamruchi migje. ⁷ Wane china:

*Giglenshnikanyegitkalune wanna ruklukanuwnnalna
kaspukyegitkana, wa wanna
gishyamukochiretkalune.*

⁸ *Giglenshnikanyegitkaluru wa jeji gi wa
kmukochireru rutaaka Gitsrukaachiya.*

Yaglu rixa sajruka gistaaklewlu, rumatikolupa poyagkaklewlu

⁹ Giyagni wa tye giglenshnikanyeglewlwlu ¿wa sajruka gistaakotkalunep-jenuplege? ¿Waka msajruka gistaakotkonkoxaple? Gi rixanu wane wchina, wa *Gawra galixle gitaaka wale poyagkakle rixinripa*. ¹⁰ ¿Gi rix-poko poyagkakachri kagwaakota wale? ¿wa sajruka gistaakotkaluru, waka msajruka gistaakotwu? Gi wa sajruka gistaakletkaluru, seyni msajruka gistaakotu. ¹¹ Sajruka gistaakikolu yaglu rixinripa, rumatikolupa poy-agkakachri rixinri ralixleya chinanu. Wane rixa msajruka gistaakotwu, rurna rixinripa pejnuruneko galixachine msajruka gistaakone, wanna koxa poyagkakachine gitakikolupa. ¹² Rurna rixinrikoxapa sajruka gis-taakotkalune, gi wanna sajruka gistaakotkalunepje, seyni koxa wa gomk-agitachine galixlugapo wa wutsrukati Gawrani msajruka gistaakonuwa waneylu.

Wa gipiratkaluru tokanchi, gi wa Tokanchi Yokanatkaluru chinanu

¹³ Gi rixanu gi wa Tokanchi Yokanatkaluru chinanu, seyni wa poy-agkaklewlu chinanu galixlewluya, Gawra ga wa giklopishane gipiryegitka wanna yoptotyaplu psolchijneko. ¹⁴ Gi rixanu wa Tokanchi Yokanatkaluru waneyalune wannapmakni yoptotachinepa, gike gaprimkatkani wa galixlu; giknookalurmakni wa gipiratkaluru tokanchi. ¹⁵ Gi rixanu wa Tokanchi Yokanatkaluru kamruttu jgekanchi. Gi rixanu ginakakta maleshlu Tokanchi Yokanatkaluru, gi koxa wane kaspukika wa Yokanatkaluru Tokanchi.

Wa gipiratkaluru yoptotko galixlewlu chinanu

¹⁶ Giyagni poyagkakachine gitaaka wa galixle chinanu, wa Goyakalu gimusleleya rixinripa, moyegi rixinripa tokanchi gipiratkaluru pejnu-runeko giklopishane chinanupa, gi wa wannapje chinanupni wa Tokanchi Yokanatkaluru waneyalune, seyni wanna koxa chinanupni, wa Gawra galixle waneyalune. Walenwa wutsrukati pejnurunekwu wixa. ¹⁷ Wane chinyongatyawaka, *Gita gitakyi gixo payinerumnunanuka gitsrukati pixin-ripa*. Wane rixa Gawra Goyakalu getanu. Walenwa Gawra galixanru. Walenwa gipnachine genekgiwekletachri. Walenwa wane gwachri pixka chinru wa mwakatuwa.

¹⁸ Mumkata kagwaakotupmaka, kagwaka Gawra. Ralixlu wa *gixo payinerumnunanuka gitsrukati rixinripa*, chinyawakpotuko: *Wane pixka rixanna puklopishane*. ¹⁹ Gi wa rugroka galixluya. Gi rutakyagoknawa gi-maneya gipnachritka. (Satu pacha walapustsitkani.) Gi koxa rutakyagoklu gipnachri twugenewlemapa Sara. ²⁰ Gi koxa nutatlu Goyakalu gipiratanru ma malixlenuya. Seyni muchkotnawa ralixleya. Rumalwutlu Goyakalu. ²¹ Psolpotuyako rushinikanuwatya wa ptowruko rupiratanru Goyakalu, kgiyaklerni kamrutyaplu. ²² Giyagkoxni wa Gawra galixle *rutakyegitlu poyagkaklewle rixinri*. ²³ Gi wa walepje chinanni yonatka wa rutakyegitikolu. ²⁴ Seyni wixa koxa chinanu, wa wixa galixachinwu gitakyegitikolupu, gi rixanu walixlu wa Geso yotunkakachri Wutsrukate wixanu

gipnachinetskalaya. ²⁵ Walenwa samyookaluru wixa mukochire chinanu, ga wa yotunkaakaluru muklukanuwnakaakone wixinripa.

5

Muklukanuwnakaakone yoptotanrupa

¹ Giyagni muklukanuwnakaakonwu galixluya, kigle gwashletkawu Goyakaluyuma Wutsrukate Geso Kristo chinanu. ² Wale chinanu koxa wapkaplu tye gimutlewlu gawyegitanru galixluya. Wumuwata wkagwakinri Goyakalu goyaknu. ³ Gi wa walepjeni, seyni wumuwatanu koxa salewakchiya. Wumatlu wa salewakchi kamrulutu kashnantakgognenu.

⁴ Ga wa kashnantakgognenu kamrulutu gasruglewlutu. Ga wa gasruglewlutu kamrulutu kagwakikolu. ⁵ Ga wa kagwakikolu gi wa kapatmenurni. Gi rixanu Goyakalu gishiniklewlle gipkaakalurni wajija Giwekikaluru Kpashiriya, wenekikolu.

Kristo gipna mkagwakpiraklene chinanu

⁶ Gi rixanu wa Kristo muchkonwu wixanatini, gipapko rupnana mkagwakpiraklene chinanu. ⁷ Kyapreru satu gipnanmaka poyagkakachri chinanu, seyni patako satu mpiikatu rixnawa rupninripa kigleru chinanu. ⁸ Seyni Goyakalu gekakgi galuklewleta wixaya, gi rixanu, kmukochirerunwu wixanatini, Kristo gipna wixa chinanu.

⁹ Giyagni wanepnuteyaka muklukanuwnakaakonwu gigragaya; Waleyawognetkaako wa jgekanchiyegiya. ¹⁰ Giyagni wkamnixanatinrikopshini rupoyikgayegitinwu Goyakalu Gituru gipuka chinanu, wanepnuteyaka wupoyikgayegitikolutka, wognetkaako Wale giwekle chinanu. ¹¹ Gi wa walepjeni, seyni wumuwata Goyakaluwa, Wutsrukate wixanu Geso Kristo chinanu. Wale chinanu wupoyikgayegitikolutka.

Pogirewata mukochri ga wa gipukchi

¹² Giyagni, wane rixa jiglokleta mukochri tye psolchijiko satupje yineru chinanu. Mukochri chinanni wa gipukchi. Giyagni wane rixa giknogletna gipukchi pejnuruneko yine. Gi rixanu pejnuruneko mukochirewata.

¹³ Wa ma mwanatkanuwa Yakanatalkurul Tokanchi, tye psolchijineko rawanatatkutu mukochri. Seyni Yakanataluru Tokanchi mwananuwa gi wa ruklukanuwnakaaka yineru. ¹⁴ Seyni pogirewatatka gipukchi Gatakluaykawa wa Moysisiklupotonanuko, wanna koxa chinanu gi wa Gata ma mumretkale pixka rixa mukochirewletna. Gatanwa ginachripatka yaglu.

Poyagkaklewlu genekashatkaluru

¹⁵ Seyni gi wa mukochri pixka rixa genekashlu. Gi rixanu satupje yineru mukochire chinanu rupninnaxi, pnuteyaklu wa Goyakalu gimutlewle gixo chinanu, ga wa genekashlu satupje yineru gimutlewle chinanu. Walenwa Geso Kristo. ¹⁶ Gi koxa wane pixka rixa wa genekashlu, wa satupje yineru mukochire pixka. Gi rixanu satupje mukochri runya giklukanuwnayegjixlu ruklukanuwnayegjixkolupna, seyni gixo mukochri runya gimutlewlu muklukanuwnakaakone rutakikolupna. ¹⁷ Gi rixanu satupje yineru mukochireya pogirewatinri gipukchi ga wa satupje yineru chinanu koxa, wanepnuteyaka pogirewatanna giwekachinepa satupje wa Geso Kristo chinanu, gixo gimutlewlu yoptotachinepa, wa poyagkaklewlu genekashatkaluru yoptotachinepa.

Gixo potu gimutlewlu

¹⁸ Giyagni waneko pixka rixanu satupje yineru mukochireya ruklukanuwnayegjixkolna pejnuruneko yine. Waneko pixka rixa: satupje

yineru poyagkaklewleya, pejnuruneko yine muklukanuwnakaakone gitakiku ruwekinripna.¹⁹ Gi rixanu satupje yineru majnaknu chinanu rutaakan kmukochirerune gixonila. Waneko pixka satupje yineru yijnakle chinanu gixo gitako poyagkakachinepa.

²⁰ Wa Tokanchi Yukanatkaluru jigloka wa mukochri tseruwninripatka. Wa mukochri tseruwninitka tseruwnapouta wa gimutlewlukoxa.²¹ Wane rixa pogirewata mukochri rupniriyina yine, waneko pixka rixa poyagkaklewlu chinanu; pogirewata gimutlewluruwekinripna gike rixiniko mnikawnakatu Geso Kristo chinanu Wutsrukate wixanu.

6

Wixa gipniyanatkalu mukochrini

¹ ¿Gi wchinanu koxa? ¿Womkagitanru mmukochirewatirni tseruwninripa gimutlewlul? ² Gike wixiniko. Gi rixanu wixa gipniyanatkalu mukochrini. ¿Gi wixpoko satokleyegitanutnaklu wale? ³ ¿Gi ge gimatlugixa wa wixa girukokta katkaluru Geso Kristoya, katkaluru rupnaleya? ⁴ Gi rixanu katluya kapnatkalunwu. Waleyma gipnachinetkawu. Wa Kristo wane rixa yotunretinri gipnachinetkalaya Girchi goyaknuya, waneko pixka wixanu wixa: gawinripi gerotu giweklupa.

Goyakaluwu wuweka Kristoya

⁵ Waleyma pagipnakalunetkawu wixini Wale gipnale yagluya, waneko pixka rixa yotunotinri yaglu wixanu. ⁶ Wumatlu wa tye: wa kapokotmane wixinri Waleymananuko koroshishkita rutaaka, gike mumkatkatu rixikolupa wa mukochrimane, ma wayegretyanpatkawu mukochri. ⁷ Gi rixanu wa gipnachrinatka, gi wa mukochri giklukatkalu.

⁸ Kristoyma wupnini, walixlu wa wuwekinrikoxapa Waleyma. ⁹ Wumatlu wa Kristo yotunotinritka wa gipnachinetkalaya, gi rupnanutka. Waleya gi pogirewatanatka gipukchini. ¹⁰ Gi rixanu rupnirini, pakatapie rupniyanatkalu mukochrini, seyni ruwekinri Goyakaluya ruwekatka. ¹¹ Waneko pixkapotuko gixanu gixa. Gkagwakinwa galikakni gipniyanatkalu mukochrini, seyni Goyakaluya giweka wa Kristo Gesoya Wutsrukate wixanu.

Genekinwa Goyakalu

¹² Giyagni gi pogirewatanu mukochri gimaneya wa gimane gipnachripa, gma yijnakotyaplu gimane retsotanrewleya. ¹³ Gi koxa genekanru gimane psojite mukochri, mpoyagkaknuchi gapi rixinripa, seyni giwekachingi wa gipnapachine pixkalungi genekinwa Goyakalu. Goyakalu galikaka genekanru gimane psojite poyagkaklewlu gapi rixinripa. ¹⁴ Gi rixanu gi wa gitrukatautanaklu mukochri. Gi rixanu gi wa Tokanchi Yukanatkaluruyegitkagi, seyni gimutlewluyegitkagi.

Poyagkaklewlu wayegrenepa

¹⁵ Giyagni ¿klunerni? ¿Wmukochirewatewge gi rixanu gi wa Tokanchi Yukanatkaluryegwu, seyni gimutlewluyegwu? Gike wixiniko. ¹⁶ ¿Gi ge gimata gixa wa girukokta wayegrene gitakinwa gyijnakotyaplu, wale wayegrene gixinitka wa gyijnakotanru? Waka mukochri wayegrengi gixinripa, waka yijnaklewlu wayegrengi poyagkakachine gixinripa. ¹⁷ Poyagnutkalurni Goyakalu, wa mukochrimka wayegretanatanungi, gyijnakotatkalu gajiya tye pixkalutu ginkaklewlu wa wale chinanu gitaaka gixa. ¹⁸ Mukochri yegi gishpakyatka. Poyagkaklewlu wayegretatkagi. ¹⁹ Gi rixanu yineru muchkotu gixyawakpotuko pixka nchingi. Wane gixa

genekletlu gimane psojite gimuteru wayegreru rixinripa, mpoyagkaknuchi wayegreru rixinripa, waneko pixka gixanu xani. Genekanru gimane psojite poyagkaklewlu wayegretyaplu gipashiregnuyapa.

Mukochri wenutikolu

²⁰ Gi rixanu mukochri wayegretanatingi, gi wa poyagkaklewlu wayegrenenangi. ²¹ ¿Klu koxa waneyatkagi waleya, wa xawakni gipatewatanrutka? Gi rixanu gipnalni wale yoptyukyawaka. ²² Ga wa xani mukochri gishpakyatka. Goyakalu wayegrenetkagi. Ga wa gkamrure koxa kpashiritka. Ga wa yoptyukyawakapni giwekinri gike rixiniko mnikawnakatupa. ²³ Ga wa mukochri wenutikolu wa gipnalpotu, seyni Goyakalu genekashle yoptyotachri walenwa giweklu gike rixiniko mnikawnakatupa Kristoya Geso Wutsrukate wixanu.

7

Gipniyatkalu Tokanchi Yukanatkalurupiranaya

¹ Nomolene, gi wa mumatkangi, gi rixanu nuynumsatna Tokanchi Yukanatkaluru gimatachne. ¿Gi ge gimatlu wa Tokanchi Yukanatkaluru rutsrukata yineru ruwekakopshini? ² Gi rixanu kganururo, ruwekakopshini tganuru, Tokanchi Yukanatkaluru ginanshichawalo. Seyni rupnini tganuru, Tokanchi Yukanatkaluru gnurchipirana tushpakyatka. ³ Giyagni wa ruwekinwa tganuru, gimpatalwatachro chinkaluropni wa satu jeji tganurutinipa. Seyni tupnagnurutinitka tushpakanika Tokanchi Yukanatkaluru. Giyagni gi wa gimpatalwatachrotkani wa satu tganurutinitka.

Gipniyanatkalu Tokanchi Yukanatkaluru

⁴ Waneko pixka gixa, nomolene gitanune, gipniyanatkalu Tokanchi Yukanatkaluru Kristomaneya, satunuko gixinripatka, walenwa yotunotachritka gipnachinetksalaya, kigle kamrurewlepwu Goyakalu chinanu. ⁵ Gi rixanu manchi wixanatinwa, mukochri getsutanrewle, Tokanchi Yukanatkaluruya, wumane psojikaka kamrurewatywa. Wale gwakakyaplu gipukchi. ⁶ Ga wa xani Tokanchi Yukanatkaluru wushpakyatka. Wupniyanatkalu wkashinatjerni, ga wa Giwekkaluruya wkamrurewatinripatka. Werotewatinritka. Gi wa yonchi kapokotewatinriya wkamrutanutka.

Tokanchi Yukanatkaluruya rumatika mukochri

⁷ ¿Gi wchinanu? ¿Tokanchi Yukanatkaluru mukochrige? Gike rixiniko. Gi numatanatl mukochri, seyni wa Tokanchi Yukanatkaluru chinanu numatlu mukochri. Gi rixanu gikoxmaka numatanru getsutanrewlu, wane ma chinkanumka Tokanchi Yukanatkaluru: *Gi petsutanrewatanu.* ⁸ Mukochri gikshiklu ruglepoktapinri yokanru. Wane rixkakyano ptowruko getsutanugnuchi. Gi rixanu Tokanchi Yukanatkaluru migie mukochri gipnachrini. ⁹ Tokanchi Yukanatkaluru migie nuwekanata. Seyni wa Tokanchi Yukanatkaluru gininitka, mukochri giwekatnaka, ga wa gita gipnana. ¹⁰ Netatkalu yokanru giweklu chinanmaka, walenwa nupnale chinanu. ¹¹ Gi rixanu mukochri gikshiklu ruglepoktapinri yokanru. Yokwitanno. Waleya ruylatanno. ¹² Giyagni galikakni Tokanchi Yukanatkaluru kpashirni, ga wa yokanru kpashirni, poyagkakachrini, kiglerni.

Mukochri gita gitokote gwachri

¹³ Giyagni ¿kiglerunanu gita chinanu gipnalu rixa? Gike rixiniko. Seyni mukochri mukochri gipgujewni rixanu gita chinanu. Giyagni galikakni Tokanchi Yukanatkaluru chinanu.

¹⁴ Gi rixanu wumathlu Tokanchi Yukanatkaluru Giwekikaluruyni. Ga wa gitni manchino, gishankakalurno mukochrinupno. ¹⁵ Gi rixanu wa nkamrutanru gi numata jemu. Gi koxa wa nalukanru nkamruta. Seyni nayegixanru wale nkamruta. ¹⁶ Wa nma malukanutu wale nkamrutini, nupgujtatlw wa Tokanchi Yukanatkaluru kiglerni. ¹⁷ Giyagni xani gi wa gita kamrutlu, seyni mukochri gita gitokote gwachri kamrutlu. ¹⁸ Gi rixanu numatalu gitnanuko, walenna nomane, gi rawa kigleru. Gi rixanu waneyno naluklele, seyni gi nuksiklu kigleru nkamrutinri. ¹⁹ Gi rixanu gi nkamrutanlu naluka kamruretanru kigleru. Seyni wa gektutu nma malukanutu wale nkamruta. ²⁰ Ga wa nma malukanutu nkamrutini, gi wa nkamrutanutkulu gita, seyni mukochri kamrutanru gita gitokote gwachri.

Yagotkaklu nonshinikanuya

²¹ Nukshiklu pnuko gixjetikowaka: wa naluka kigleru kamruretini, gektutu gwakoxno. ²² Gi rixanu wa gitoko gajeruya numjika Tokanchi Yukanatkaluruya Goyakalu. ²³ Seyni netlu nomane psojite pnuko gix-pokotikowaka. Wale satkakmaku nonshinikanu gixpokotyawaka. Rani-likxo gostutkalurno nkamrutyapmaklu mukochri gixpokotyawaka nome psojiteya galukyawaka.

²⁴ ¡Kapsakletkalurno! ¿Katu koshpakanunno tye gipukchimaneya? ²⁵ Npoyagnutlu Goyakalu, Geso Kristoya Wutsrukate wixanu. Giyagni nonshinikanu galukyawaka nkamrutini, Goyakalu ykanrekaka wayegrerno. Ga wa nomaneya galukyawaka nkamrutini, mukochri gixpokotyawaka wayegrerno.

8

Gi ruklukanuwnayegjixkona wa Kristo Geso gwachine

¹ Giyagni malespotutkulu ruklukanuwnirritkana wa Kristo Geso gwachinetka, wa galixachinetka. ² Gi rixanu Giwekikaluru ykanrengiweklupirana Geso Kristoya wale koshpakno mukochri ykanreya, ga wa gipukchi ykanreya. ³ Gi rixanu wa Tokanchi Yukanatkaluru mumkatanatanutu, wumane gigroklewle chinanu, Goyakalu kamruta. Wane rixa ykanretlu Waleko Gituru kmukochirerunmane pixkalutu ga wa mukochri chinanu. Wane rixa nikatlepotutyaplu mukochri wumane gwachrini, ⁴ poyagkakikolupa wa kigleru ykanruya wixaya, wa manchi gixjetyawaka mixkanwu, ga wa Giwekikaluru gixyawaka.

⁵ Gi rixanu manchi pixka gixachine, manchipiranaya nshinikanutachinni; ga wa Giwekikaluru pixka gixachine, Giwekikalurupiranapje yanshinikanutachinni. ⁶ Gi rixanu manchinshinikanu gipnalni, ga wa Giwekikalurunshinikanu giwekluni, ga wa kiglenshinikangajirni. ⁷ Giyagni manchi gishinikyawaka walenna kamnixikolu Goyakalu. Gi rixanu wane gixachri gi yijnakotlu Goyakalu ykanre. Gi koxa rumkatlu. ⁸ Giyagni manchi giyakatyachine gi rumkata giglenshinikanretluna Goyakalu.

Gixa gitokote gwachri Giwekikaluru

⁹ Ga wa gi manchi giyakatyachingi, seyni Giwekikaluru giyakatyachingi, wa gixa gwinri Giwekikaluru Goyakalunu. Katukta Giwekikaluru Kriston-umigjetu, gi Kristonni wale. ¹⁰ Seyni gixa gitokote rawini Kristo, gimane galikakni gipnachrini mukochri chinanu. Ga wa giwekikaluru giweka wa poyagkakikolu chinanu. ¹¹ Wa gixa gitokote rawini Giwekikaluru, Geso yotunkakjeru wa gipnachinetskalaya, wa yotunkakjeru Kristo Geso

gipnachinetkalaya ruweekakankoxlu gixamane popukalu Giwekikaluruya Walenu, gixa gitokote gwachri.

Kristoyma yoptotachinepwu

¹² Giyagni nomolene, riwishkatachinwu, gi wa manchiyni, giyagni gi wa manchi gixjetyawakako wixinripni. ¹³ Gi rixanu manchi gixyawakako gixininapa, gipnanuna. Seyni wa Giwekikaluruya gixa gipnakakanru wa manchi kamrure waneklu giwekanu. ¹⁴ Gi rixanu pejnuruneko Giwekikaluru Goyakalunu kosekanune, wannanwa Goyakalu wgenene. ¹⁵ Gi rixanu gi gyoptotlu wayegrechinshinikanu wa mpikyapatnaka. Seyni gyoptotlu wgenchi gitaaikalurunshinikanu. Wale chinanu wsaplewata, "Gawwa, Nuru." ¹⁶ Gi rixanu Giwekikaluruko wixanshinikanu gipguita'l Goyakalu wgenene wixinri. ¹⁷ Wale wgenene wixinri, yoptotachinkoxapwu; yoptotachinepwu Goyakalunu; Kristoyma yoptotachinepwu. Waleyma salewnachinkoxapwu wixinri, Waleymapotuko pogirelwu wenezikolupa.

Pogirelwu ginachripa galuukaluru

¹⁸ Gi rixanu numatpotutlu wa tyegognekaka wsalewninri gi rumuknini pogirelwu ginachripa gipgujewnachripa wixaya. ¹⁹ Gi rixanu wa giyakotkaluru psolu galukleyako kagwakpotuta wa rupgujewniripna Goyakalu wgenene. ²⁰ Gi rixanu moyakatu rixkaklu ruyakotanru Goyakalu, gi wa giyakotkaluru gishinikanru chinanu, seyni wane rixkakjeru wa Goyakalu chinanu. Wane rixlu wa Goyakalu wa kigleru kagwakyapna wa ruyakotanrutka. ²¹ Wa waleko giyakotkaluru koshpaakalurupni moyaknuchi wayegretlewayawakaya. Rapkaplu gishpakikowaka katajiwaka Goyakalu wgenennu.

²² Gi rixanu wumatlu pejnuruko giyakotkaluru pagochgitkalune rixna, pakachinolu getkalunni xanigognenanu.

²³ Gi walepjeni, seyni wannanuko, wa Giwekikaluru gekamrure waneyalune, wixa koxa ga wa wanna gitokoyako wochgita, wkagwakanatinri wa Wale wugenene gitakpotutkolupa, walenwa wumane gishpakleyapa, wenutikolutka chinanu. ²⁴ Gi rixanu kagwakachinwu wognewatinri. Seyni wa kagwaakaluru getika, gi wa kagwaakalurni. Gi rixanu wa satu getkoklunu, ¿gi rixpoko kagwakletanru? ²⁵ Seyni wma metanutu wkagwakini, wakotanshikanreya wkagwakanru.

Wa Giwekikaluru gagjigognere

²⁶ Waneko pixka rixa gipxakletwu Giwekikaluru wumenoklunshinikanruya. Gi rixanu gi wumata kloneru kigleru wagjitinripa. Seyni wa Giwekikaluruko gagjita wixa chinanu rochgiyle mumkata chinkotu. ²⁷ Getjegajrewatachri gimatl Goyakalu gishinikanru. Gi rixanu wanepotuko Goyakalu gishinikyawaka, ragjita kpashirine chinanu.

Ptowrunanuka pakamrutkolutni kigleyapna Goyakalu galukache

²⁸ Wumatlu ptowrunanuka pakamrutkolutni kigleyapna Goyakalu galukache, wannanwa tomgakalune Wale galukiyawaka. ²⁹ Gi rixanu muchikawako rumatanune rutakagnaputa, Gituru yaglu pixka rixkakikolupna, Wale muchinanu gishpakachri rixinripa gixo gimolenetskalaya. ³⁰ Wa rutakagnaputanune wanna koxa tomga. Wa tomganune wanna koxa muklukanuwnnakaakone rixna. Wa muklukanuwnnakaakone rixanune wanna koxa royaknu reneka.

Wakagloklewpututa

³¹ Giyagni ḡgi wchinanu wa tyeya? Wixa yegi rixini Goyakalu, ḡkatu kamnixwu wixa? ³² Ga wa Wale gi chipetlu Giturpotuko, seyni samyoklu ptowruneko wixa chinanupa ḡgi rixpokotyawaka Gituruymamanuko ma meneekanupwu ptowrunanuka? ³³ ḡKatu jigyeginna Goyakalu tsomitannune? Goyakalni muklukanuwnakaakone gixkaklewatachri ḡKatni wa giklukanuwnayegjixlewatichri? ³⁴ Kristonwa gipnachri. Wanepnute Walenwa yotunkaakaluru. Walenwa Goyakalustsi potuklesreta gwachri. Wale koxa giykoyegitwu wixa. ³⁵ ḡGiru kotpalatinwu Kristo galuklewleya? ḡsale-wakchirge? ḡga wa kachinolege? ḡga wa kojwawakchirge? ḡga wa nachlege? ḡga wa mamkatutnuchlege? ḡga wa kyowikolege? ḡga wa yoglolewaprege? ³⁶ Wa chinyawaka yonchi:

Pixa chinanu psolgogneko gipnachinwu.

Kagwaakalunwu gowegane pixka giylatkalunepa.

³⁷ Seyni psoluyako tyekakaya wakaglokewpotuta walukjeruya. ³⁸ Giyagni nalixa gita, gi wa gipukchiko, gi wa giwekluko, gi wa kamchineko, gi wa tsrukakaluneko, gi wa kgiyaklewakleruneko, gi wa xanirutuko, gi wa ginachripako, ³⁹ gi wa tenolu, gi wa gitokpotuko, gike giyakotkaluru gimkata kotspaletyawu Goyakalu galuklewleya, wa Kristo Geso gwachri, Wutsrukate wixanu.

9

Kachingajgognenanru Pawlo Gisrayiline chinanu

¹ Galikakni wa nchinanru Kristoya. Gi nayroklewata. Giwekikaluru Kpashiriya nonshinikanu gipgijtatno muklukanuwnanshinikanutkatno. ² Wane nixa, tsru wamonchi nixa. Kachingajgognenanno. ³ Gi rixanu naluk-maklu gitakmaka kamakpiratko Kristoyegiya nomolene chinanu, nonerune nomaney. ⁴ Wannanwa Gisrayiline. Wannanni wa wgenchne gitakikolu, ga wa pogirelwu, ga wa tokanchi gipiratkaluru. Wannanwa Tokanchi Yakanatkaluru geneekalune, wa Goyakalu kamrurewyegitachine. Wannanni wa Goyakalu gipiratanru. ⁵ Wannanni wa gitsrukachinni. Wannanni wa Kristo gimaneya. Walenwa Goyakalu pejnurkakayako gimalwutkalur-gognenanu. Wane gixkalurupa.

Gipiratkaluru wugenetalune

⁶ Gi wane rixa magjeretmaka Goyakalu tokanu. Gi rixanu gi wa Gisrayiliklopishane pejnuruneko Gisrayilinni. ⁷ Gi wa Gawraklopishane rixinrina chinanu, pejnuruneko wale wugenetika. Seyni *giklopishane chinikolupna Gisaakaya*. ⁸ Wane chinyawaka, wa manchi wugenetalune, wanna gi wa Goyakalu wgenene chinkana, seyni wa tokanchi gipiratkaluru wugenetalune wannanwa kagwaaka Gawraklopishane. ⁹ Gi rixanu wa tokanchi gipiratkaluru wane china:

“Xani topapko gapokinipa, nunanu. Wanepatkalo Sara toturu.”

¹⁰ Gi wa walepjeni, seyni Riwika koxa mushiwata satu Gisaakaya, wutsrukati. ¹¹ Gi rixanu ma mushpaakanuwana, gi koxa kigleru kamrutawana, gi wa mugletuko, Goyakalu galukyawaka rawgognenatinripa, Wale tsomityawaka, gi wa kamrurchi chinanu, seyni tomgalewatachri chinanu, ¹² wane chinka wala, “Wa mturu wayegretanru wa tsru.” ¹³ Yonchi chinyawaka:

Gakowo naluka, ga wa Gisawo nayegixa.

Goyakalu getwamonrewle

¹⁴ ¿Gi wchinanu koxa? ¿Wanerge Goyakalu mpoyagkaklewle? Gike rixiniko. ¹⁵ Gi rixanu Moysissi wane china:

Nupxakanrupa nupxakanu,
ga wa netwamonutanrupa
netwamonutanu.

¹⁶ Giyagni wa Goyakalu tsomitinri gi wa wixa galuklewle chinanu, gi wa wmuchkowle chinanu, seyni Goyakalu getwamonrewle chinanu. ¹⁷ Gi rixanu wa yonchi wane chinru Gwarawo:

Waleko chinanu nutakyi
nekakgityaplu nuyaklewle pixaya,
runkakletikolupa ngiwaka psolchijneyako.

¹⁸ Giyagni koxa girukta raluka getwamonreta Goyakalu, retwamonutlu. Girukta raluka shikowkakleta, shikowkaklu.

Kamrurewakleru ga wa kajpa

¹⁹ Giyagni wane pchinanno, “¿Klu koxa kegemgiya?” Gi rixanu ¿katu satkakakanru Goyakalu gishinikanru? ²⁰ Ga wa ¿giryi pixa yineru pyoptopiratyaplu Goyakalu? ¿Kajpa kamrutikolu wanerge chinanru wa kamrutjeru? “¿Klu chinanu wane pixa kamruretno?” ²¹ ¿Gi ge rumkata kamrurewakleru walejpako kamrutyaplu pastono kigle getkolupa ga wa satu muglegetkotupa?

²² Goyakalu galuka gekakgiretinri jigekanu, rumatikolu raluka gixkakletlu ruyakle, wane rixa wa mapognanutu rixa gakotletlu jgekanchiyegkaka galpokotkaluru ramginripa. ²³ Wane rixa rumatikolupa wa ponikolkaka royaknuya retwamonutanune chinanupa. Wannanwa ralpokotanune gimalwuru chinanu. ²⁴ Wanna koxa tomga, ga wa wixa. Gi wanna Goteyonejeni, seyni koxa payinkaka. ²⁵ Wane koxa chinyawaka Goseyi tokanuya:

Nayinerutene nchinanna
nma gayinerutetanananune koxa.
Ga wa nma malukanatanro,

nalukanro nchinanro.

²⁶ Wane rixanu:
Wa chinikowakna:
Gi wa nayinerutengi gixa,
Waneya Goyakalu giwekachri wgenene
chinikolupna.

Gixetachinepje gognetkaako

²⁷ Wane koxa china sapleta Gisayiya Gisrayilinepirana: “Wane pejnumkana Gisrayiliklopishane tsru wenu ksatnepagi pixka pejnumkana, gixetachinepje gognetkaako.” ²⁸ Gi rixanu Gitsrukaachi kamrure nikatpotutanu, sustakanu tye chijiya.

²⁹ Muchikawa wane chinyawaka Gisayiya:
Gitsrukaachi ksolaloteru
gimka ruxetkaklopishatanunwu,
Sotoma gajenniko pixkamka wixanuna,
ga wa Komora gajenni
pixkapotukmaka wixanuna.

Sotlu gitspetkaluru

³⁰ ¿Gi wchinanu koxa? Wa payineko poyagkaklewlu momkagitkane rapkapluna poyagkaklewlu. Walenwa poyagkaklewlu galixluya. ³¹ Ga

wa Gisrayiline wa Tokanchi Yukanatkaluru poyagkaklewluwa gomkag-itachine, gi wa rapkapluna Tokanchi Yukanatkaluru poyagkaklewluwa.
³² ¿Klu chinanu? Gi rixanu gi wa galixluya romkagitluna, seyni Tokanchi Yukanatkaluru kamrureya pixka. Guyagni rutspetanna sotlu gitspetkaluruwa.
³³ Chinyongatyawaka:

*Siyo Magkate nutaku
 sotlu gitspetkaluru,
 sotlu gjirukikowaka,
 Tye sotlu galixachri gi wa patmenuwatanu.*

10

Tokanchi Yukanatkaluru poyagkakachri walena Kristo

¹ Nomolene, galikakni, naji gishinikyawaka, ga wa Goyakalu nagjire wanna chinanu walena rognnewatinripna. ² Gi rixanu gita gipgujtata jmerpotna Goyakaluya, seyni gi wa gimatkalelwuya. ³ Gi rixanu gi rumatluna wa Goyakalu poyagkaklewle ga wa wannanuko retumga kamruretna. Gi wa yijnakotluna Goyakalu poyagkaklewle. ⁴ Gi rixanu Tokanchi Yukanatkaluru poyagkakachri walena Kristo, poyagkaklewluwa pejnu-ruko galixachri chinanupa.

Poyagkaklewlu wa galixlu chinanu

⁵ Moysisi yonpiranyegitlu poyagkaklewlu Tokanchi Yukanatkaluruya. Wane china: wa Tokanchi Yukanatkaluru kamrutachri walena poy-agkakachri, ga wa yineru tyekipa gixachripa ruwekanu waleya. ⁶ Wa ralixleya poyagkakachri wane china:

“Gi wane pchingajitanu, ‘¿Katu tengogne gatskotanu wa chiji rawapyaplu Kristo?’”

⁷ Gi koxa wane pchingajitanu: “¿Katu gjirukanu gitskata potu rawapyapatnaklu Kristo gipnachineteskalya?” ⁸ Gi. Wane china ralixleya poy-agkakachri, “Gi gowuklu Goyakalu tokanu. Punamaya rawa Wale tokanu, ga wa paji rawa.” Walenwa tokanchi galixluya, wunkakletanru. ⁹ Wa punamaya pupguitatinri Gitsrukaachi Geso, wa pajiya palixinri Goyakalu yotunkaklu gipnachineteskalya, pognetkaako. ¹⁰ Gi rixanu yineru rajiya ralixya waneyaplu poyagkaklewlu. Ga wa ginamaya rupguitalewata rognetskakikolupa.

¹¹ Gi rixanu wane china yonchi: “Pejnuruko Goyakalu galixachripa gi wa patmenuwatanu.” ¹² Gi rixanu pixkakakkani Goteylene ga wa Kriykone. Gi rixanu Waleknii pejnuruneko Gitsrukate ponikolni pejnuruneyako Wale tomgachine. ¹³ Gi rixanu pejnuruneko Gitsrukaachi giwaka koschekachine ragjirgognereyna rognetkaakona.

Kristo ginkakletikolu runya galixlewlu

¹⁴ Guyagni ¿gi rixpoko koschekletanruna ma malixanatanutna? ¿Gi rixpoko galixletanruna ma yijnakpiranyegitanruna? ¿Gi rixpoko yij-nakletanruna satu munkakletanuntu? ¹⁵ ¿Gi rixpoko ginkaklewletanna myokanatkoneko rixinna? Yonchi chinyawaka, “¿Gi pagiglenjixinanuktana wa Kiglerpotunau Tokanchi kigleruya ginkakletachine!”

¹⁶ Seyni gi wa pejnuruneko yijnakotlu Kiglerpotunau Tokanchi. Gi rixanu Gisayiya wane china,
“Gitsrukaachi, ¿katu galixlu wunkakle?”

¹⁷ Guyagni yijnaklu runya wa galixlu. Kristo tokanu runya yijnaklu.

Gisrayiline ma malixlena

¹⁸ Seyni wane nchina, ¿Gi ge yijnakyegitluna? Galikakni.
Psolchijneko pogiwatyana.

Yoptukyawakpotunanuko tye psolu chijiko
Pogiwatywa wanna tokanu.

¹⁹ Seyni wane nchina, ¿Gi ge rumatluna Gisrayiline? Muchinanu gapka Moysisi wane china:
Netsotankakangi yine migjeya,
ga wa payine manshinikanune numtuwnakakingi.

²⁰ Gisayiya mpiikotu wane china:
Nukshiika nma mujgajeneya.

Nekakgitnawa nma mepomgayegitjene yegi.

²¹ Wa wanna Gisrayilinepirana wane china: *Psolgogneko nomyokyegitna yine malixkane, majnakone.*

11

Wanena gixjetachine tsomitkalune gimutlewluya

¹ Giyagni wane nchina, ¿Ruknoknege Goyakalu rayinerutene? Gike rixiniko. Gi rixanu gitkoxni Gisrayili, Gawraklopishno, Migaminerno. ² Gi ruknokna Goyakalu wa rayinerutene, wa muchikawa rumatanune. ¿Gi ge gimata gixa Giliyapirana? Wa yonchi chinpiranyegityawaklu, wa Goyakalu runkaka Gisrayilinepirana. Wane china, ³ “Gitsrukaachi, wanna giylatna ptokanu geneklewatachine. Jijrolekluna penekashatikowakwakaka. Gitapje gitukatka. Retumga giylaletmknona.” ⁴ Seyni ¿gi china gigletlu Goyakalu? “Waneyawano payokgipre waragka jejine Waalistsi myoptsojtkane.” ⁵ Waneko pixka rixa xawakni koxa, wanena gixetachine tsomitkalune gimutlewluya. ⁶ Ga wa gimutlewluya chininri, gi wa kamrurchiyni. Wane ma mixkamka wa gimutlewluya chininri, gi wa kamrurchiyni. Wane ma mixkamka wa gimutlewluya chininri, gi wa kamrurchiyni.

Mshinikannuchi

⁷ Giyagni ¿klunerni? Gisrayiline gi gapkaplu rujganruna, ga wa tsomitkalune gapkaplu, ga wa pimrine shikpokwakatana.

⁸ Chinyongatyawaka:

Goyakalu genekna mshinikannuchi,
giyalna ma metinitipa,
gijnakna ma yijnakotinitipa
xanigognenanu.

⁹ Tawi wane chinpiranyegitanna:

Nikawaklekwna gitspekanunna;
gitseklutpo yanunna.

Wane rixa gapnugognenatkotanunna.

¹⁰ *Mapshagaygalepna ma metinitipa.*

Satpokgayijgapgognenatanna.

Gognewatikaluru payineko chinanu

¹¹ Giyagni wane nchina, ¿rutspetannage wa rujrukintipna? Gike rixiniko. Seyni wa rutspetinriyna wanna runya gognewatikaluru payineko chinanu, retsotankakikolupna Gisrayiline. ¹² Ga wa wanna mukochire chinanu ponikowatatinrina psolchijneko gajene yine, ga wa masawatatinrina chinanu ponikowatatinrina payineko, wanepnute potu ponikowatanna galikakni wa katsepa potu rixa jiglokletinpathakna Gisrayiline.

¹³ Gixa nuynumsata, payinekgi. Giyagni npoyagnutlu nkamrure, gi rixanu gita galikaka yokanatanruno payinuko chinanu. ¹⁴ Giktako nixpoko getsotankakletinna nomolene normaney, wanna pimrine gognetkaako gita chinanu. ¹⁵ Gi rixanu wa ramginrina wanna, rupoyikgayegtitikolna tye psolchijneko gajene, ¿klunerupni yoptotikolupna? Walepjepni wa ruwekipatkana gipnachinenanu. ¹⁶ Rejiwle kpashiri rixini, pejnuruko kpashiri koxa. Ga wa gitski kpashiri rixini koxa, giplukaka koxa kpashiri.

Goliwamunaplukaka

¹⁷ Wa pimriplukaka gistaakkoklunu, ga wa pixa goliwa mutaakotmuna pixkalutyi gipxaakaluryi wanna kashrigle. Walerutu goliwamunatskiya, goliwamuna ponikolewle yoptotachri pixinri, gi palixkotinwa waleplukaka pnute. ¹⁸ Wa palixkotinmakwa, gi wa pixa giweekaklu gitski, seyni gitski giweekakyi pixa.

¹⁹ Giyagni wane pchinanu pixa,
“Gistaakkaluru giplukaka, nupxakikolupa gita wanna kashrigle.”

²⁰ Gwu. Ma malixlenuya gistaakkalunni, seyni pixa galixlu chinanu wane pwa. Gi wa pixnanuko tsru pkagwakinwa, seyni piklewatanu. ²¹ Gi rixanu Goyakalu gi chipetinri rumaturewaplutanrukaka, pixa koxa gi wa chipetanu.

²² Giyagni petanu kshinikanurni Goyakalu ga wa kgokolni. Galikaka potu kgokolni gjirukachine chinanu, seyni pixa chinanu kshinikanru wa pixa kshinikanuru gomkagletinri. Ga wa pnuko pixininapa pixkoxapni gistaakkalurunapyi. ²³ Ga wa wannako gi wa romkagitinripna ma malixleyna rupxaakona. Gi rixanu kgiyaklewaklerni Goyakalu ruptaka gipxakletyapna. ²⁴ Gi rixanu pustaakkolu mutaakotu goliwamunapu mumturetanrumuna, ga wa pma mumturetanatu pupxaaka kigleru goliwmuna, ¿gi ge wanepnuteyaka rumumtureplutanrukaka gipxaakalurupni roliwattmunna?

Gisrayiline gognetkaako

²⁵ Gi rixanu gi naluklu, nomolene, gixa mumatanutu tye giyogimanatkaluru tokanchi, gma malixkotinitipnawa. Wa ptsotsotaji shikgaji rixna Gisrayiline katsepa potu rixa jiggokletinipna payinuko. ²⁶ Wane rixanna pejnuruneko Gisrayiline gognetkaako, chinyongatyawaka: Siyomriji ruyakaty

yostamyoyeglewatachri.

*Wale koshrapatinna Gakowokloplishane
ma kagwakpirnukleyna.*

²⁷ Nkonmukochiretinna walgogne.

Tyenwa nupiratyana.

²⁸ Giyagni wa Kiglerpotunanu Tokanchipirana kamnixachine rixna gixa chinanu, ga wa tsomitkoklunupirana galuukalune rixna rutsrukatenmina chinanu. ²⁹ Mkashrijetanshiniakanutktu Goyakalu genekashlekaka, tomglewle. ³⁰ Gi rixanu gixa pixka gma malixanatkanru Goyakalu, ga wa xani gapkaplu getwamonrewlu wanna ma malixlenu chinanuya. ³¹ Waneko pixka rixna xani. Gi ralixna. Rapkapyakoxapluna getwamonrewlu wanna, gixa getwamonutikoluya. ³² Gi rixanu Goyakalu gishyatna pejnuruneko ma malixlenuya, retwamonutayapna pejnuruneko.

Tsrupotunananu ponikolu Goyakalunu

³³ ḥTsrupotunaru ponikolu Goyakalunshinikanu, rumatkalewle! Mumata jemkotpotni rutakyagoklewle. Mukshikanshinikanutkotu ratnugapote.

³⁴ Gi rixanu

gike gimatashtinikanutlu Gitsrukaachi.

Gike giyakotlu.

³⁵ Ga wa ḥkatu gapka geneklu Wale,
Goyakalu gapnu genekletyaplu?

³⁶ Gi rixanu Waleya, ga wa Wale chinanu, ga wa Walenupa ptowruranuka. Walenupa rovaknu rixgognenatyawaka. Wane gixkalurupa.

12

Genekashlu giwekachri

¹ Giyagni, nomolene, nagjitgi Goyakalu getwamonrewle chinanu gylatkalurunepa pixkalungi geneke manetinwa genekeashlupa giwekachri, kpashiri, Goyakalu gigleretanu. Walenwa gkamrure potukalu potu Goyakalu yegi. ² Gi wa tyegogne gajene pixka gixanu, seyni pnuko gixinwa gerotewanshnikankaakalungi nchininri, gimatyaplu klnerni Goyakalu galukanru kigleru gigleretkaluru mmagatikatu.

Kristomanepsojistikka

³ Giyagni gimutlewlw nene kikolu ya, wane nchingi satkaka gixa yegi gwachri, gi wane rixinri pnu te ralixkotinwa, seyni kashnikanurupni yan-shinikanyegitinwa wa Goyakalu wane rixa yagotletyawaklu satkaka galixle.

⁴ Gi rixanu wane rixpokota. Satkakmane waneywu gixo manchipsojistikka, seyni gi wa pejnuruneko waneko pixka gixa kamrureta koxa. ⁵ Waneko pixka wixa pamanepjewu Kristoya, ga wa pejnurunekwu pamanepjepsojitu pimrinezmananuko.

⁶ Gi rixanu waneywu pnumnu gixachri genekashlu, rixywakni wa gimutlewlw wene kikolu. Wa tokanchi genekelewatachini wixinri wane rixa yagotletka galixlu wixanupa, wanepotuko wixanu. ⁷ Wa kamrurewatachri rixinri, wane rixa kamrurewletanu. Wa yimaklewatachri rixinri, wane rixa yimaklewletanu. ⁸ Wa kgiykolewakleru wane rixa giykolewletanu. Geneka salewatachri machipetupni. Girukotlewatachri jmererupni. Kgetwamon-ru ru muwleya renekashlewatanu.

Xirnanshnikanutachinepgi

⁹ Gi gixasha galuklewletanu. Gagnutanru mugletu. Kigleru gomkagananu. ¹⁰ Galuukakanu gixkakluko moletkakachine pixka. Satkaka gk-agwakpirkakanu gixkakluko. ¹¹ Gi wa immerenepgi. Xirnanshnikanutachinepgi. Gitsrukaachi wayegrenepgi. ¹² Gimjikachinepgi kagwaakaluru. Gakotanshnikanutachinepgi nsalewninriya. Gomkagananru gagijognere. ¹³ Gapikanna magatinrinwa kpashirine. Machipepjingogne-nanupgi.

Kigleruya paalixinri gektutu

¹⁴ Giglenshnikanyegjixanna gkojwakjene. Giglenshnikanyegjixle-watanu. Gi gkamakpiirewatanu. ¹⁵ Gimuwatanu wa gimuwatachineyma. Nchiyagatanu chiyagatachineyma. ¹⁶ Panshnikanurunepgi. Gi galixkotinwa. Mpogireneymapgi. Gi wa kgimatkalewaklerune kgagwakanshnikanutinwa.

¹⁷ Gi wa gapnutanru gektutu gixjeru gektutuya. Gkamrutanru kigleru pejnuruneko yine getanu. ¹⁸ Rumkata wane gixkota, wa gixa gimkata wane

gixletyawaka, kigle gwalepgi pejnuruneko yineyma. ¹⁹ Nalukanune, gi gixananuko gapnuyegitinha, seyni getashlewatanu jgekanchi waneyapa. Gi rixanu kayongalutkani,

Gitanne gapnuuchipa.

Gita gapnurewatanu, china wa Gitsrukaachi.

²⁰ *Giyagni, wa nachichinipa wa pkamnxjeru peneka nikletanru. Ronunngatewatinipa peneka giiretanru. Wane pixini chichmero pmoljiutanru.* ²¹ Gi wa gektutu gaalixanyi seyni wa kigleruya paalixinri gektutu.

13

Pejnuruneko yijnakotanna tsrukakalune gitaaikalune

¹ Pejnuruneko yijnakotanna tsrukakalune gitaaikalune. Gi rixanu maleshlu gitaaikaluru, seyni Goyakalu gitakanrupjeni. Wanerune Goyakalu gitakna. ² Giyagni gitaaikaluru yagotachri, Goyakalu gitakanru yagota. Ga wa yagotachine giklukanuwnayegkaknawa. ³ Gi rixanu wa gitsrukaachine gi piikaklu kigleru kamrutachri, seyni gektutu kamrutachri galikaka. ¿Gi ge paluklu pma pikyanuplu tsru gitaaikaluru? Kigleru pkamrutanu. Ralixkotanyi wale. ⁴ Gi rixanu Goyakalu kamrurewyegitachrini kigleyyi pixinripa, seyni wa gektutu pkamrutini, pikau. Gi rixanu gi wa maleshawaka raniklu yoglolewapi. Gi rixanu Goyakalu yegi kamrurewyatyrachrini. Wa gektutu kamrutachri kapnuklerni, saletikolupa gektutu kamrutachri. ⁵ Giyagni gimkata yijnakletna gi wa jgekanchiyapje, seyni koxa muklukanuwnanshinikanutkane gixinripa.

⁶ Gi rixanu waleyko koxa gwenutlu girukotlewatachri gitakanru. Gi rixanu Goyakalu kamrurewyegitachine. Goyakalu koxa chinanu kamrurewata wanna. ⁷ Gapnutanna pejnuruneko gma mapnutanunnewa. Wa girukotlewatachine priwishkatini chiji chinanu, chiji gwenutinri, ga wa marnewlu chinanu, marnewlu gwenutinri. Katukta gmaga pikleta mpiakanru. Katukta gmaga kagwakpireta, gkagwakpiratanru.

Galuklewlu poyagkaklu Tokanchi Yukanatkaluru

⁸ Gikeko griwishkatanu, seyni griwishka galuukakletanu gixkakluko. Gi rixanu rumwastsitanru galukachri poyagkaklu Tokanchi Yukanatkaluru.

⁹ Gi rixanu: *Gi pumopatlewanru, gi puylalewanru, gi pchowguwanru, gi ksotanugopyi*, ga wa wane chininipa satu yokanru koxa, tye tokanchi wanerutu rawa: *Palukanru pumwastsitanru pixnanuko pixka.* ¹⁰ Wa galuklewlu gi wa gektutu rixlu rumwastsitanru. Giyagni galuklewlu poyagkaklu Tokanchi Yukanatkaluru.

Gogitkani

¹¹ Wane gixanu gi rixanu gimatlu wa gogi, wa rapokatka gipapko wuyokinripa wumkinriya. Gi rixanu gi gowukatkalu xani wognewatinripa, walixinrigognepapko pnute. ¹² Goyechno giknogatka. Gogistsitkani. Giyagni koxa mapshagawaka kamrure wuknokanutka. Walpokotinwa pokamaluu kamrure chinanu. ¹³ Gogi yanachine pixkawu wixa yanretanutka; kshinikanurunepwu; gi wa tsru niklu yegi gayanu, gi wa gimruyegiko, gi wa gapoklewlyuyempotunanuko, gi wa mpogijpatnuchyegiko, gi wa yangakakluyegiko, gi wa sotanugnuchiyelegiko. ¹⁴ Seyni Gitsrukaachi Geso Kristo gwanu. Gi wa galpokognaputanru gimane getsotanutyawakapa.

14

Gigroka galixletachine

¹ Gyoptotanru gigroka galixletachri, seyni gi wa yoptopirkaklu chinanu wale getlepirana. ² Gi rixanu satu galixlu pejnurkakako niikaluru. Satu gigrokachri sana gitaaikalurupje nika. ³ Ga wa nikachri gi geyikanru wa mniikatu. Ga wa mniikatu gi wa ruklukanuwnayegjixanru nikachri, gi rixanu Goyakalu yoptotanru.

⁴ ¿Gi gixachriyi pixa wa pjigyegeityawaklu satu yegi gipxaklewatachri? Waleko rutsrukate chinanu romkagi kamrurewletanu waka ruknooko. Gi rixanu kgiyaklewakleru rutsrukate romkagikakyaplu.

Gitsrukaachinunwu

⁵ Satu pnuko gixgogneyegita. Satu pagongerutu kagwakyalu. Satkaka wane gixanshinikanutanru. ⁶ Gogi yanshinikanutachri, Gitsrukaachi chinanu yanshinikanutanru. Gogi myanshinikanutku Gitsrukaachi chinanu gi yanshinikanutanru. Nikachri Gitsrukaachi chinanu nika gi rixanu poyagnutlu Goyakalu. Ga wa mniikatu Gitsrukaachi chinanu gi nikanu. Poyagnutlu Goyakalu.

⁷ Gi satuna wixaya ruweka waleyako. Gi satuna waleyako rupna. ⁸ Gi rixanu wuwekini, Gitsrukaachi chinanu wuweka. Ga wa wupnini Gitsrukaachi chinanu wupnana. Giyagni wuwekinipa waka wupniniipa Gitsrukaachin-unepwu.

⁹ Gi rixanu wale chinanukni rupna ga wa yotunota Kristo, ga wa ruwekat-naka, gipnachine ga wa giwekachine Gitsrukate rixinripa.

Satkakwu wixa ginkakyeginwa Goyakalu yegi

¹⁰ Ga wa pixa, ¿klu chinanu puklukanuwnayegjixlu pumole? Ga wa pixa koxa ¿klu chinanu peyiklu pumole? Gi rixanu pejnurunekwu wane tunwatanu Kristo gitakyagoklewatyawakapa. ¹¹ Gi rixanu wane chinayon-gatyawakatkani:

Wane china Gitsrukaachi,

Nuwekinri Gita,

Gita yegi yoptsojitanne

pejnurunpotunanuko.

Pejnuruko yineru gippujtayegitanru Goyakalu.

¹² Giyagni satkakwu wixa ginkakyeginwa Goyakalu yegi.

Womkagitanru kiglenshinikanmenu

¹³ Giyagni gi wanepnuteko wuklukanuwnayegjixkakjetanu, seyni get-jetinwa galikaka gi wa gitspetaluku, gitseklu gitakyegitanru gimole.

¹⁴ Numata gita, nalixlu Gitsrukaachi gikeenani niikaluru walenanuko gimuteru, seyni girukokta waleko gishinikanru pagixanu gimuteru rixinri waleyni wa gimuteru. ¹⁵ Gi rixanu niikaluru chinanu wamontaako pumole, gi wa galuklewatachri pixka pixa. Gi wa pnijituya pamgakakanru satu yineru wale yineru chinankoxni rupna Kristo. ¹⁶ Gi koxa mupashichkotupni kigleru gixanu. ¹⁷ Gi rixanu Goyakalu pogirewatyawaka gi wa nijichini, gi wa giiruni, seyni poyakkaklewlni, kiglenshinikanrewlni, ga wa gimuwluni Giwekikaluru Kpashiriya. ¹⁸ Gi rixanu Kristo wayegreru tyeya ruglenshinikanutlu Goyakalu. Gigleretkaluru yineya.

¹⁹ Giyagni womkagitanru kiglenshinikanmenu. Womkagitanru klunerukta wa waleya wtseruwakanshinikan kakinripa wixkakluko.

²⁰ Gi nsaletanru satu yineru Goyakalu kamrutanru nijiichi chinanu. Ptowrunanuka galikaka powralkakni, seyni gektutni yineruya wa rutspekaklewatinri nikanruya. ²¹ Kigleru galikaka gi pnikanru gylatkalurgitu, gi puranro winga, gikena klunerukta gimkata

gitspeekakyaplu pumole, ga wa gikena gitseklu yakakanru, gike gigrokakanru.

²² ¿Palixge? Pixnanuko palixanu Goyakalu getanu. Giglenshinikanyegitkaluru muklukanuwnayegjixnachriwa rugleretanshinikanutanruya. ²³ Wa nutanshinikanutachriko nikinri ruklukanuwna, gi rixanu gi wa ralixleya niklu. Klunerukokta galixlewlu mkamrutikotu mukochrini wale.

15

Gichkolune ga wa gigrokachine

¹ Giyagni gichkolunwu wumkata gipxakletna rugrokinriyna wa mumkatkane. Gi wumkata gimutletnawa. ² Satkakwu wixa gimutanru wumwastositru kigleruya tseruwakanshinikanutkalurupa. ³ Gi rixanu Kristo gi wa rumutnawa. Seyni wane china yongatyawaka:

"Yangalna tokanu pyangajene gapyegitno."

⁴ Gi rixanu wixa chinanu yonatkaluru muchikawa yonatkalurpirankaka wyimakikolupa kashnantakgogneruya, giykolelwuya yonchi giyakatyachri waneywu wixinripa wkagwaklepa.

⁵ Ga wa Goyakalu kashnantakgogneru, ruykolewle waneyalutu, genekangi pashinikanurungi gixinripa Kristo Gesoya.

⁶ Pashinikanurungi patokanurunepgi gimalwutiyaplu Goyakalu Ruru Wutsrukate wixanu Geso Kristo.

Wale chinanupa waneyapna kagwaklewlen payineko

⁷ Giyagni Kristo yoptötigi pixkapotuko, gixa yoptokakletanu, rumalwutikolupa Goyakalu. ⁸ Gi rixanu wane nchina, kamrurewakleru rixka Kristo Geso sajruka gistiklewluya, tokanchi galikakpotunaru Goyakalupiranu chinanu, poyegityaplu gitsrukaachinni gipiratikaluru. ⁹ Payineko gimalwutiyaplu Goyakalu retwamonrewle chinanu. Chinyongatyawaka:

*Giyagni nupgijtatanyi
payinetyegiyako.*

Nshikaletgiwakatanyi.

¹⁰ Wane chinatnaka:

Gimuwananu, payinekgi, gineruneyma.

¹¹ Rumepeatatnaka:

*Gimalwutanru Gitsrukaachi
pejnuruneko payinekgi.*

Galixkotanru, payinemnnunanuka.

¹² Gisayiya gimepetatnaka:

*Waneplu Gesetski, payine Gitsrukate
yotunomtachripa.*

Wale chinanupa waneyapna kagwaklewlen payineko.

¹³ Wa kagwaklewlu Goyakalute genekpoutangi pejnuruko gimuwlugiglenshinikanrewlu galixinri. Tsru potu kagwaklewlu waneyapgi Giweikaluru Kpashiri giyaklewleya.

Pawlo Goyakalu kamrurewyegitachri payine chinanu

¹⁴ Naponshinikanyegitgi, nomolene gitanune, wa gixa koxa kshinikanurunpotgi, psolpotukopiranu gimatachtepgi, gimkata giykokakletinripa gixkakluko. ¹⁵ Psoji mkagwakpiratkatno nyonyegitgi, nomolene, wane nixa gishinkapkakletgi, gimutlewluya chinanu nenekikolu Goyakaluya. ¹⁶ Kristo Geso kamrurewyegitachripno payineyegiyako chinanu, Kiglerpotunaru Tokanchi Goyakalunu nkamruretinri. Payineko

genekashatikolu gigleretkaluru rixinripa, kpashiri rixkaklewatinripa Giwekilaluru Kpashirya.

¹⁷ Giyagni waneyno nalixkotpiranatalyu Kristo Gesoya Goyakalupirana. ¹⁸ Gi rixanu nkagwakpiratmaka yanumsayegletlu pagixanu pirana wa Kristo gi kamruta gitaya yijnakotinripna payineko tokanuyna, kamrureyna, ruyaklewleyma giglajrukakaya, getkalurkakaya, ruyaklewle Giwekilaluru Goyakalunu. ¹⁹ Wane rixa wa Gerosale ga wa psolsajrulkleko Girirkpotunanco nunkakletananumthu psolchijneko Kiglerpotunano Tokanchi Kristopirana. ²⁰ Wane nixa muchkotletnawa nunkakletyaplu Kiglerpotunano Tokanchi, ma koschekgiwakatikowakaya Kristo, gi wa satuna galpokotyawaka nkamrupjitinripa. ²¹ Seyni chinyongatyawaka:

*Munkaklewyegitkonewa retanna.
Mjemkanewa rumata jemanruna.*

Pawlo ginkakletlu wa Roma rushinikinri

²² Giyagni gixo kata numaletka gixa yegi nyinripa.

²³ Ga wa xani gike nixatka tyesretkaka. Gixo walapu nalukpotutmaklu nyayegityagi. ²⁴ Giyagni Gispanya nyinpatka, nyayegitangi. Gi rixanu nkagwaka getlemtgi nuknogamtinipa, ganikyapno waneya, nali getlemtinpatkagi. ²⁵ Ga wa xani Gerosale nyanutka nupxakyapna kpashirine. ²⁶ Gi rixanu Masetonya gajene, Gakayi gajene kigle getle rixluna genekashlu gitaklu kwamonurune kpashirine chinanu wa Gerosale gwachine. ²⁷ Gi rixanu kigle getle rixluna nyi payineko. Ga wa galikaka rumkata gipekooyegletna Gerosale gajene, rapikonna chinanu kiglerkaka wannanu Giwekilalurya. Payineko gimkata gipxaklekoxna gimaneyna. ²⁸ Giyagni nnikatinpatkalu wa tye ga wa npoyegitinpakalu tye kamruchi, Gispanya nyinpatka, netamtangi xako. ²⁹ Numatlu wa napoyegitinpigi, Kristo giglenshinikanyeple potu numapokanu.

Pawlo gagjitna Roma gajene Kristonune ragjigognetinripna

³⁰ Nkegemgayegitgi, nomolene, Wutsukate Geso Kristoya, ga wa galuklewlu Giwekilalurya, gipxakanno. Goyakalu gagjiyegitanno, ³¹ nushpakinripa malixkane Goteya gwachinyegiya; wa genekashlu kpashirine chinanu Gerosale gwachine, walenwa nkamruyegitanru, yoptotikolupa. ³² Gimuwatachripno napokyegitinpigi wa Goyakalu galukyawaka, gixayamananuko napnanutinripa. ³³ Pejnurunekgi gixaymaplu giglenshinikanrewlu Goyakalute. Wane gixkalurupa.

16

Pawlo gimatkakyegitlo Gwewe giminola

¹ Gwewe numatkakgi gixa, wumole, Senkre gapatjetikowaka kamrure-watyachroni, ² gyroptotyaplo Gitsrukaachi chinanu, kpashirine kgimuka; gipxakyaplo klunerukcta talukyagi. Gi rixanu gi gepika tupxaka wala, ga wa gitputoko tupxaka.

Galukgiwaklewlu

³ Galukanna Presura, ga wa Gakila nukamrurewatanune Kristo Gesoya. ⁴ Wannamka geneka giwekleta nuwekinripa. Gi wa gitapje payognutna, seyni pejnuruneko gapatjetachine payinemnnunanukaya. ⁵ Galukgiwakatanna gapatjetachine koxa gipjiyna. Galukanru Gipinito, nalukanru. Walenwa muchi galixletachritka Kristo Gasyaya. ⁶ Galukanro Mariya, kamrurewputotachro gixyegiya. ⁷ Galukanna Ganroniko ga

wa Gonya, nomolene, gitayma gostujenatkalune gimatkalune potu yokananunye yegi. Wanna koxa muchi gwayegletachine Kristo gitaya.

⁸ Galukanru Gampli, nalukanru Gitsrukaachiya. ⁹ Galukanru Gorwano, wupxakjeru Kristoya, ga wa Stachi, nalukanru. ¹⁰ Galukanru Gapple, getum-gakalune Kristo yegi rixinri. Galukanna wanna Garistowolo. ¹¹ Galukanru Gerotyo nomole. Galukanna Narsisopji gajene, Gitsrukaachi gwachine. ¹² Galukanna Trigena ga wa Trigosa, Gitsrukaachi kamrurewyegitachrone. Galukanro Persita galuukaluro, Gitsrukaachi kamrurewyempotutachro. ¹³ Galukanru Rogwo, Gitsrukaachi tsomitanru, ga wa runro, ga wa gitanu. ¹⁴ Galukanna Gasinkrito, ga wa Glekonte, ga wa Germa, ga wa Patropga wa Germi, ga wa moletkakachine wannaymalune. ¹⁵ Galukanna Giroroko, ga wa Golya, ga wa Nereyo, ga wa yegwaklo, ga wa Golimpa, ga wa pejnruneke kpashirine wannaymalune. ¹⁶ Galuuukakanu kpashiri gamluruyuma. Ralukangina pejnruneke gapatjetyawaka gajene Kristonune.

Ruykotna kyokwirewakleruneya

¹⁷ Nagjitgi, nomolene, getanna gkotspalkakjenemka wa ginkaklewlu gixa ginkakyegitkaluryegiya, ga wa gitspetkaluru gitakachine yimaklewlu. Gitspalatinna wanna. ¹⁸ Gi rixanu wanna pixkalune gi wa Wutsrukate Geso Kristo wayegrenni, seyni ginanwakna galukanru wayegretna. Kigle tokanunya, ga wa wane chinrena giglenshnikanyegitikolupa, wanna yokwigajitna myokwirewaklene. ¹⁹ Gi rixanu gixa yijnakle gimatpiranatka pejnruneyako. Giyagni numjikyegitgi. Naluklu kgimatkale gixinripa kigleruya, ga wa mtsaklanepgi gektutuya.

²⁰ Giglenshnikanrewlu Goyakalute giyampotu rumlokanunru Satanasy-opni gixa jixi rapukoteya. Wutsrukate Geso Kristo gimatlelewle gixaymapa.

Pawlo gipxakjene galukle

²¹ Ralukangina Timotyeo nukamrurewatanru, ga wa Losyo, ga wa Gaso, ga wa Sosupate, nomolene.

²² Gitni, Tersyo, kiruka yonatachrino, galukangi Gitsrukaachiya.

²³ Ralukangi, Kayo numwapjitanru, pejnruneke gapatjetachine gapat-jepijetanru. ²⁴ Ralukangina Gerasto, sroschi gapatjetachri pokchiya, ga wa gimole Kwarto.

Ralipre ginalwuretlu Goyakalu

²⁵ Gimalwutkalurupni Goyakalu, gimkata gmuchkotjerupa gixa, wane chinyawaka Kiglerpotunanu Tokanchi gitanu. Walenwa Geso Kristopiranu nunkakletanru. Wane china tokanchi yogimanatkaluru muchikaw-gognenanuko. ²⁶ Ga wa xani gipgugjetkalurutkani tokanchi geneklewata-chine chinyawaka. Wane rixa yokanreta wa gike rixiniko mnikawnakotu Goyakalu, wa runkakikolupna pejnruneke payinemnunanuka yijnakotin-ripna; ralixinripna. ²⁷ Satupjerutu Goyakalu kgimatkaleru gimalwutkalu-rupni Gesokristo chinanu rixgognenatyawakpatka. Wane gixkalurupa.

1 Tixinri Kpashiri Pawlo Kirukate Korintyone Chinanu

Galuklewlü

¹ Gitni Pawlono, Kristo Geso tomganruno yokanatanrupno nixinripa. Wane nixa Goyakalu gishinikyawaka. Gita kirukatni ga wa Sostennu koxa, wumole.

² Gapatjetachine Goyakalunune chinanupni. Wannanwa Korinto gajene, Kristo Geso chinanu kpashirine gixkalune. Ga wa pejnuruneko Wutsrukate Geso Kristo giwaka koschekachine chinanupa, pasretamnunanuka gajene. Wanna Gitsrukati ga wa wixankoxni. ³ Gimutkalunepgi. Kiglen-shinikanupgi Wuru Goyakalu chinanu, ga wa Gitsrukaachi Geso Kristo chinanu.

Genekashatkalurkaka Giwekikaluruya poyagnuta Pawlo

⁴ Psolgogneko npoyagnutlu Goyakalu gixa chinanu, gi rixanu Goyakalu gimitutanungi gixa Kristo Geso chinanu. ⁵ Ga wa gixa mponikowkaaka psoluyako Wale chinanu, ptowruko tokanchiya ga wa ptowruko gitmatkalelwuya. ⁶ Wane rixa poyegitkota gixa yegi wa Kristopirana gipgij-talelwlu. ⁷ Giyagni gi satuna gkaptotya genekashatkaluru. Gixa kagwakgognenatlu Wutsrukate Geso Kristo gipgujewninripa. ⁸ Walenwa poyegitangi yoptukyawakpotunanuko, muklukanuwakanepgi wa Wutsrukate Geso Kristogognepa. ⁹ Goyakalu poyagkakachri. Wale chinanu ntomgaka wa Gituruyma gitmatkakinripa, Geso Kristo Wutsrukate.

¿Kotspaltatkege Kristo?

¹⁰ Giyagni nuykotgi, nomolene, Wutsrukate Geso Kristo giwakaya, pansiñikanurune nchintokanutanu. Gi wa gkotspalanshinikankakanu gixkakluko. Psolpotuyako pansiñikanurunepgi. Pagitakyagookalunepgi. ¹¹ Gi rixanu nunkaka gixapirana, nomolene, wa wanna Klowe ginkakwu wa gixkakluko yagotkakinri. ¹² Giyagni wane nchingi, satkakgi gixa wane china, "Gitni wa Pawloymalutno." "Gitni wa Gapoloymalutno." Ga wa "Gitni Sotluymalutno." "Gitni wa Kristoymalutno."

¹³ ¿Kotspaltatkege Kristo? ¿Koroshishkitlege rutaaka Pawlo gixa chinanu? ¿Waka Pawlo giwakaylege gkatika? ¹⁴ Npoyagnutlu Goyakalu gi satuna gixa nkata, ga wa Krispopie ga wa Kayo nkata, ¹⁵ gi satuna wane chininripa wa gita giwaka gkatika. ¹⁶ Ga wa Gishtugwapji gajene koxa nkata. Ga wa pimrine gi satuna numata wa nkatinri. ¹⁷ Gi rixanu Kristo gi yokanatno nkatilewatinripa, seyni Kiglerpotunanu Tokanchi nunkakletinripa, gi wa gitmatkalelwlu tokanchiya maleshawaka ma mixinitipa Kristo koroshishkitate.

Kristo, Walenwa Goyakalu giyakle ga wa Goyakalu gitmatkalewle

¹⁸ Gi rixanu koroshishkitpirana walenwa manshiñikanutu wa gamgachine chinanu. Seyni Goyakalu giyakleni wa wixa chinanu gognetkaakalunwu. ¹⁹ Gi rixanu yonatkalurutkani:

*Gita nikatanru kgimatkalerune gitmatkalewle,
ga wa nuknokanru kanshiñikanurunenshinikannu.*

²⁰ ¿Ginaklu kgimatkaleru? ¿Ginaklu yonchikgapri? ¿Ginaklu kyoptopirakleru tyegogne gajeru? ¿Gi ge Goyakalu manshiñikanutu rixlu tye psolchijneko

gimatkalelew? ²¹ Gi rixanu Goyakalu gimatkalewle chinanu wa tye psolchijne gajeneko gimatkalewleya gi rumataluna Goyakalu. Giyagni rugleretlu Goyakalu, ginkaklewlu manshinikannuya rognetskakinni galixachine.

²² Gi rixanu wa Goteyone gagijjetu getkalurkaka. Ga wa Kriykone gjigalu gimatkalewlu. ²³ Ga wa wixa ginkakletlu Kristo koroshishkita gitaakaluru, wa Goteyone galikakni gitspeekakachri, ga wa payine getanu manshinikanrewluni. ²⁴ Ga wa tomgakalune chinanu, Goteyone ga wa Kriykone koxa, Kristonwa Goyakalu giyakle ga wa Goyakalu gimatkalewle. ²⁵ Gi rixanu Goyakalu manshinikannumka yine pnuate kashinikanurni. Ga wa Goyakalu gigroklemka yine pnuate gichkolni.

Goyakalu tsomitantu

²⁶ Gi rixanu gixa, nomolene, getlu ntomsatikolu. Gi wa gixo kgimatkalerune manchiya wane, gi wa gixo gimkatachine, gi wa gixo wanna potu tomsatka. ²⁷ Seyni wa manshinikanune tyechijne gajene Goyakalu tsomita wa patewkakyapna kgimatkalerune. Ga wa gigrokachine tyechijne gajene Goyakalu tsomita patewkakyapna gichkolune. ²⁸ Ga wa mpogirene tyechijne gajene, ga wa geyiikalune Goyakalu tsomita, ga wa mwakatu, maleshawaka rixkakyaplu wa waneretu, ²⁹ gi satuna kamaneru galixkotnachripwa Goyakalu getanu. ³⁰ Wale giyakaty a gixa Kristo Gesoya. Walenwa wixa gimatkalewle Goyakaluya, ga wa wixa poyagkaklewle, ga wa Walenwa kpashiri wixikolu ga wa Walenwa wkoshpkajixikolu, ³¹ wa yonchi chinyawaka:

Wa galixkotlewatachri Gitsrukaachi ralixkotanu.

2

Geso Kristo, ga wa Wale koroshishkita gitaakaluru

¹ Ga wa gita, nomolene, wa gixa yegi napokinitka, gi wa tokanchi giglenuya nunkakyagi gipguitalewlu Goyakalupirana, gi wa gimatkalewlu yako. ² Gi rixanu giike nushinika gimatleta gixatskalaya, seyni Geso Kristopje, ga wa Tye koroshishkita gitaakaluru. ³ Ga wa gigrokachrino, ga wa pikachrino, ga wa gitatatachripotno gixa yegi nya. ⁴ Ga wa ntokanu ga wa nunkaklewle gi wa gimatkalewlu tokanchi gishinikanutlewatachrino, seyni Giwekkalurupirana gekakgirewatachrino ga wa guyaklupirana. ⁵ Wa gixa galixle gi wa yine gimatkalewle chinanu rixinripa, seyni Goyakalu giyaklewle chinanni.

Goyakalu gipgujewnakakyegitwu wixa Giwekkaluruya

⁶ Wa mmagatikaneyegiya wuynumsatlu gimatkalelwuya, seyni tyenwa gitmatkalewlu gi wa tyegogne gajerni, gi wa tsrukakalunenu tyegogne gajene. Wannanwa nikawnachinepa. ⁷ Seyni Goyakalu gimatkalewle wyanumsatya giyogimanatkaluru, wa gishyatkaluru. Tyenwa, Goyakalu gitmatkalewle wa rutakagnaputanru mawakanuwa tye psolchijneko, wixa pogirewatinripa. ⁸ Gi satuna tyegogne gajeru tsrukakalune gitmatlu. Gi rixanu rumatkamkaluna, gimka koroshishkita rutakanruna goyaknuchi Gitsrukate.

⁹ Seyni yonchi chinyawaka:

Gi paygalena getjejetlu,

Gi pajnakona jemjejetlu,

gi waleko yanshnikangaajejeta yineru,

Wa Goyakalu galpokotyana rushinikjene.

¹⁰ Gi rixanu Goyakalu gipgujewnakakyegitwu wixa Giwekkaluruya.

Gi rixanu Giwekikaluru ptowrunanuka retjeta, wa tsrupotunanu Goyakalunu. ¹¹ Gi rixanu *¿giru yineru gimatlu wa yinerunu, seyni giwekikaluru yinerunupje, wa yineru gitokote gwachri?* Waneko pixka rixa. Wa Goyakalunu gike gimatlu, seyni Giwekikalurupje Goyakalunu gimatlu. ¹² Ga wa wixa gi wa tyegogne gajeru giwekikaluru wyoptota, seyni Giwekikaluru Goyakalunu wyoptota, wa wumatyaplu wa Goyakalu genekashlekaka, wa wixa genekashhatkaluru. ¹³ Wa wixa yanumatinri, gi wa tyegogne gajene tokanuya, wa chinyawakna gimatkalewlupiran, seyni wa Giwekikaluru gekakgirewata. Wa Giwekikaluru giyakatyachri wumapnu getletanru Giwekikalurunuya.

Getjetikolu Giwekikaluruya

¹⁴ Wa yinerunshinikanupje gi yoptokaklu Giwekikalurunu wa Giwekikaluru Goyakalunu, gi rixanu manshinikanutni wale chinanu. Gi rumkata gimate jemletlu, gi rixanu Giwekikaluruya retjetka. ¹⁵ Wa Giwekikaluru waneyalutu psoluko rumata getlu wale. ¹⁶ Gi rixanu *¿katu gimatanshinikanutlu Gitsrukaachi, wayimakyaplu Wale?* Seyni wixa waneya Kristonshinikannu.

3

Manchine, yine pixka gixjetachine

¹ Ga wa gita, nomolene, gi numkata giynumsaletgi wa Giwekikaluru waneyalune pixkalune, seyni manchi pixka gixachingi, mturune Kristoya pixkalune. ² Tnuchga nutgi. Gi wa niikaluru nenekgi. Gi rixanu gixa gi gimkatawalu. Gi koxa xani gimkatlu. ³ Gi rixanu manchinewagi. Gi rixanu gixa yegi rawini wa ganxalu ga wa yagotkaklu, *¿gi ge manchingi, ga wa yine pixka gixjetachingi?* ⁴ Gi rixanu satu wane chininipa, “Gitni wa Pawloymaltno,” ga wa satu, “Gitni wa Gapoloymaltno,” *¿gi ge manchinenpotgi?*

Goyakalu gikamrurewatanune

⁵ Gi rixanu *¿klunerni Gapolo? ¿klunerni Pawlo?* Kamrurewaklerunni, wa wanna chinanu galixinri, wa Gitsrukaachi genekyawaklu satkaka. ⁶ Gita gitaklewata. Gapolo giyogata. Ga wa Goyakalu tseruwnakaklu. ⁷ Giyagni gi wa gitakachri chinanu, gi koxa wa giyogatachri chinanu, seyni wa tseruwnakakachri chinanupje galikaka Goyakalu. ⁸ Wa gitakachri ga wa giyogatachri satupjerutu pixka rixkakna. Seyni satkaka yoptotanru rapnutikolu rixa kamruretyawakapa. ⁹ Gi rixanu Goyakalu gikamrurewatanunwu. Gixni wa Goyakalu gisanate, ga wa gixni wa Goyakalupji Wale kamrupjitanru.

Satkaka kamrure retumgiko

¹⁰ Goyakalu gimulewleya nenekikolu kgimatkaleru kamrupijixachri pixkalutno, gita galpokotu panchi gwiyawakapa. Satu wane gogo kamrupjita. Ga wa satkaka girukotinwa wa rixpoko kamruretyawakapluna. ¹¹ Gi rixanu gi satuna panchi gwiyawakapa rumkata gali pokletikolupa, seyni walepje gali galpokletkalurutka. Walenwa Geso Kristo. ¹² Satumka wa tye galpokotikowaka panawatini, koripji, sroschipji, sotlu kwenurpotupji, gagmunapji, kochkawalepji, kshanaksupji kamrutikolu, ¹³ satkaka kamrure pgujetanurupni. Gi rixanu walegognepa gekakgitanru. Gi rixanu xirnachri rupgujewnakakiko. Wa satkaka kamrure xirnachri retumgiko

gi pixkaktalu. ¹⁴ Ga wa satu kamrurepjí rawinipa wa wale kamrupjítanru, wale yoptotanru rapnutikolupa. ¹⁵ Ga wa satu kamrurepjí galginina, rapnutikolupmaka ramginina, seyni wale gognetkaako. Seyni xirnachri rognetskakiko pixka rixanu.

Kpashiwakpotugruko wa Goyakalugrukotkani wa gixa

¹⁶ ¿Gi ge gimata gixa wa Goyakalunu kpashiwakpotugruko gixinri ga wa Giwekkaluru Goyakalunu gixa rawinri? Girukokta gimtukinri kpashiwakpotugruko Goyakalunu, Goyakalu gimtukanru wale. ¹⁷ Gi rixanu kpashirni kpashiwakpotugruko Goyakalunu. Tyeyegrerkotkani wa gixa.

Tyechijne gimatkalewle

¹⁸ Gi satuna yokwitinwa. Walenanuko kgimatkaleru kagwaknachriwa tyegogneya, manshinikanutu rixinwa wa kgimatkaleru rixinripa. ¹⁹ Gi rixanu tyechijne gimatkalewle wa Goyakalu getanu seprolunshinikanru rixa. Gi rixanu yonatkalurni:

*Wale kashichna kgimatkalerune
rixasha gimatkalewleya.*

²⁰ Wane chinatnaka:

*Gitsrukaachi gimatanshnikanutna
kgimatkalerune,
wa magijerunshnikanutache.*

²¹ Giyagni gi satuna galixkowyegitanru yineru. Gi rixanu ptowrunanuka gixanni. ²² Pawloko, ga wa Gapoloko, ga wa Sotluko, ga wa psolchijneko, ga wa giwelkluo, ga wa gipukchiko, ga wa wanerutuko, ga wa ginachripako, ptowrunanuka gixanni. ²³ Ga wa Kristonungi gixa. Ga wa Kristo Goyakalunni.

4

Goyakalu giyogimanatanru girukotachine

¹ Wane rixa getletanwuna yine Kristo kamrurewyegitachinwu, ga wa Goyakalu giyogimanatanrukaka girukotachinwu. ² Ga wa wanepnute wa girukotachineya galuukalurni wa satkaka poyagkakachri retikolupa. ³ Ga wa gita gi wa tsru netyalu wa gixa gitakyagokyawakno, ga wa yinegogneya nutakyagokika. Ga wa gi gitako gitakyagoknawa. ⁴ Gi rixanu gikena nushinika giklukanuwnaletnawa, seyni gi wale chinanu muklukanunakaakotno. Gi rixanu Gitsrukaachinwa nutakyagokjeru. ⁵ Giyagni gike giklukanuwnayegjixanu ma mapoakanuwa gipapko, wa Gitsrukaachi gininpotonanuko. Wale pokamlatanru mapshagawaka yogimatikaluru. Rupgujetanru yine gishinikanru raijyna. Waneklu satkaka galixkotko Goyakalu chinanu.

⁶ Giyagni, nomolene, tye yaglukaka nutaknawa ga wa Gapo wa gixa chinanu, wa gixa yimakikolupa wixaya gi wa yonatkaluru pnute gyijnakotanu wa gixa ma malixkotyanuplu satu yineru pimri pnute. ⁷ Gi rixanu ¿katu kotnukgi? ¿Klu waneyyi wa pma yoptotanutyua? ¿Ga wa pyoptoshatinitalku, klu chinanu palixkotnawa wa pmayoptotanutu pixka?

Seprolunwu Kristo chinanu

⁸ ¿Gike mmagatikanetkagi? ¿Ponikolunetkagi? ¿Mpogirewatatka wixamigjeya? Mpogirewatanmaka galikaka wa wixkoxamka gixayma pogirewatanu. ⁹ Gi rixanu nkagwaklu Goyakalu pogijetwu wa wixa yokanatkalunwu wa gapkatatachinpotwu, giylajixkalunepwu gekakgitkalunepwu wa tyechijneya,

ga wa Goyakalutowrerunyegiya, ga wa yinyegiya. ¹⁰ Wixni seprolunwu Kristo chinanu, ga wa gixni kanshinikanurungi Kristoya. Wixni gigrokachinwu ga wa gixni gichkolungi. Gixni wa kagwakpiratkalungi, ga wa wixni mikagwakpiratkonwu. ¹¹ Xanigognenanu nachwu, ga wa wonunnagatewata, ga wa mamkanwu, giylaakalunwu, ga wa yashalunwu. ¹² Ga wa wkamrurewpotuta. Wumyoja wkamrurewatyata. Yangakalunwu ga wa wuglenshnikanyeglewata. Wkojwakjetka ga wa wakotanshnikanutlu. ¹³ Gektupirana yegi wixka ga wa wuykolewata. Kapcholu giknoocaluru tyechijneya pixka wixka. Wa kapcholu pejnurkakakoya sheyitkaluru pixka wixka xanigognenanu.

Goyakalu pogirewatyawaka giyaklu chinanu

¹⁴ Gi nyonyegitgi tyekaka npatewkakyapgi, seyni nwugenene nalukanune pixka nuykotgi. ¹⁵ Gi rixanu pamole waragkamka waneygi ggirukotjene Kristoya, seyni gi wa gixo girune waneygi. Gi rixanu Geso Kristonu wa Kiglerpotunanu Tokanchi chinanu nwugenetgi. ¹⁶ Giyagni nagjitgi wa gyimyapno.

¹⁷ Wale chinanu Timotiyo nyokanyegetgi. Walenwa noturu nalukanru ga wa poyakkakachri Gitsrukaachiya. Wale gishinkapkakangi gitgapoya Kristo Gesoya. Wane nixa ginkaklewleta psolusretako ga wa pejnuruko gapatjetikowaka.

¹⁸ Ga wa pimrine galixkotnawa wa gixa yegi nma yakanumka. ¹⁹ Seyni gyampotu gixa yegi nyanu, wa Gitsrukaachi gishinikiniplu. Numatanru gi wa tokanna wa galixkotnachinwa, seyni wa ruyaklewlena. ²⁰ Gi rixanu Goyakalu pogirewatyawaka gi wa tokanchi chinanu, seyni giyaklu chinanu. ²¹ ¿Giru xani galuka? ¿Kochipjerewapi nuyayegitangi, waka galuklewlw ga wa mayogotu shinikanchiyma?

5

Satu gapoklewlu

¹ Pejnuruneko pogitlu wa gixa yegi rawinri gapoklewlu, wane pixkalutu gapoklewlu wa maleshpotlu payineyegiya. Wa satu ruru gnunroko waneya rixinri. ² Ga wa gixa galixkotnawa. Gi wa gwamonuwatanu gonuka wa gixyegiya koniko wa wane gixachri.

Gapoklewatachri saletko

³ Gi rixanu gita galikakni wa pnu nwamanetini, seyni nonshnikanu gixa yegi rawinri, wanerutu pixkano nixa giklukanuwnayegjixletlu wa wane gixachri. ⁴ Geso Gitsrukaachi giwakaya, wa gixa gapatjetini ga wa nonshnikanuyma, wa Wutsrukate Geso giyakleyma. ⁵ Wa Satanasyo yegi samyokikolupa wa wale, saletmanetikolupa, wa gognetkaakalurupni ga wa ruwekinripa wa Gitsrukaachi Gesogognepa.

Kristo, Walenwa gowega Wgene wixanu wa Tsru Giknoglushgogne chinanu

⁶ Gi kigleru wa gixa galixkotnwa. ¿Gi ge gimata gixa wa ptsotsotaji gisekachri psolujpako ruseekaka? ⁷ Giknokanutkalu kapokotu gisekachri, wa gerotujpa gixinripa. Gi rixanu gixa gisekachri myapjetkangi. Gi rixanu gowega wgene Tsru Giknoglushgogne genekashatikaluru. Wixa chinanu giylatkalurutka. Walenwa Kristo. ⁸ Giyagni wa Tsrugogne gapatin, gi waneyapgi jimapro kapokotu gisekachri yapjetkaluru. Gi wa gektutu gisekachri waneyapgi. Walenwa mugletkaka ga wa gektutu pixkalutu.

Seyni myokwirmenuyma ga wa galikakpotunanu tokanchiyma gapatanu. Walenwa galikakni jimapro gisekachri myapjetkotu pixkalutu.

Ruykotkana wa kapoklewakleryegiya kotnukinwana

⁹ Nkirukate wane nchina yonyegletgi gi wa kapoklewakleruneko gipxalet-jetanu. ¹⁰ Seyni gi wa psolpotuyako wa tye psolchijneko kapoklewakleruneyma, ga wa ksotanugoluneyma, ga wa kachowguruneyma, ga wa yagluchisha kyongiklewakleruneyma. Gi rixanu wane gixinipa, tye psolchijneko gimkata gishpakletya. ¹¹ Ga wa xawakni nyonyeigitgi gi wa gipxaletanru girukokta molchi chinkaluru wa kapoklewakleru rixinri, ga wa ksotanugolu rixinri, ga wa yagluchisha kyongyegikleru rixinri, ga wa kgejnugimakleru rixinri, ga wa kgimekleru rixinri, ga wa kachowguru rixinri. Wa wane gixachriyma gi giminikanu.

¹² Gi rixanu *¿klu chinanu gita gitakyagokyapna wa maleka gajene?* *¿Gi ge wannanwa gapatjetikowaka gajene wa gixa gitakyagokanu?* ¹³ Ga wa maleka gajene Goyakalu gitakyagokanu. *Gixa konanru wa tye mugletu gixyegiya.*

6

Gapatjetachine wannakakluko gilepokotanru giklukanuwnalkaka

¹ Gixatskalaya wa pnu gixkoklunu satu, *¿tserpiranawatewge* wa mpoyagkaakanyegiya rutakyaplu wa ruklukanuwnayegjixyaplu, gi wa kpashirine yegi? ² *¿Gi ge gimatlus gixa wa kpashirine gitaakalunepa kgitakyagoklewaklerune tye psolchijne gajene chinanu?* Ga wa tye psolchijne gajeneko chinanu gixa gitaako, pgujru gimkata gitakyagokletu wa mtserutpotkaka. ³ *¿Gi ge gimata gixa wa wixa gitaako kgitakyagoklewaklerunwu towrechine chinanu?* *¿Gi ge wanepnute wutakyagokanna tyegogne gajerkaka?* ⁴ Giyagni tyegogne gajerkaka waneygi gitakyagookalurupa, gitakkanna giyagoka kiglepiranyegirune gapatjetyawaka gajene. ⁵ Wane nchinanu wa gixa patewatinripa: *¿Maleshluge satu gixa yegi kgimatkaleru wa gimkata gitakyagoklewatachri gixleta wa gimolenyegiyako?* ⁶ Seyni molchi gijgalu wa gimole giklukanuwnayegjixikolu. Ga wa wale gkamruta wa malixkanyegiya.

⁷ Giyagni pnuterututkani wale wa gixkakluko giklukanuwnayegjixlelewle gijga. *¿Klu chinanu gi petashatini gonuka wa pnu gixkota?* *¿Klu chinanu gi nchowgushatiko?* ⁸ Seyni gixa pnu gixlewata, ga wa nchowguwata, ga wa moletkakachineko wane gixa.

Mpoagkaakane gi yoptotanru Goyakalu pogirewatyawaka

⁹ *¿Gi ge gimata gixa wa mpoyagkaakane gi yoptotanruna Goyakalu pogirewatyawaka?* Gi wa yokwitkalunepgi. Gi wa kapoklewakleruneko, gi wa yagluchisha kyongyegikleruneko, gi wa kgimopatakleruneko, gi wa suxo pixkalutuko, gi wa jeji gapokachriko. ¹⁰ Gi wa kachowguruneko, gi wa ksotanugoluneko, gi wa kgimekleruneko, gi wa kgejnugimakleruneko, gi wa kchowguwakleruneko yoptotanruna Goyakalu pogirewatyawaka. ¹¹ Ga wa pimringi gixa wane gixachinenangi. Seyni gixa gerakakalunetkagi. Seyni gixa kpashirine gitaakalunetkagi. Seyni muklukanuwnakaakonetkagi, Git-srukaachi Geso Kristo giwakaya, ga wa Woyakalutenu Giwekkaluruya.

Gimaneya gimalwutkaluru gixkakinri Goyakalu

¹² Pejnurunanuko munanshichkotni gitaya. Seyni gi wa pejnuruko gipx-aklewata. Pejnurunanuko munanshichkotni gitaya, seyni gi satuna git-srukatiyegitanno gita. ¹³ Niikaluru nanwakachinupa, ga wa nanwakchi

niikalurunupa. Ga wa Goyakalu nikatanru wale ga wa pimri koxa. Seyni wa manchi gi wa gapoklewlenupni, seyni Gitsrukaachinupni. Ga wa Git-srukaachi manchi Gitsrukati. ¹⁴ Ga wa Goyakalu yotunkaklu Gitsrukaachi, ga wa wixa koxa ruyakleya yotunkakanu.

¹⁵ ¿Gi ge gimata gixa wa gixmanni wa Kristo psojite? Giyagni *gnwanruge* Kristo psojite, ga wa sato kapoklewaklero psojite nixkakanru? Gike rixiniko. ¹⁶ ¿Gi ge gimatkoxlu wa girukokta kapoklewaklero gipxaletachri, pamanepeje rixatka walayma? Gi rixanu kapiranyegirutkani:

Wa gepinanna pamanepeje rixanutkana. ¹⁷ Seyni girukokta Gitsrukaachi gipxaletachri, satupje giwekikalurutkani.

¹⁸ Gasukinri gapoklewlu. Pejnuruko mukochri wa yineru kamrutanru, manchi malekate gwachrini. Seyni wa gapoklewatachri waleko gimanre mukochirewatya. ¹⁹ ¿Gi ge gimatlü gixa wa gimanre kpashiwakpotugruko rixinri wa Giwekikaluru Kpashirinu? Gixa gitokote gwachrini Wale. Wa Wale waneygi Goyakalu chinanu. Gi wa gixanukni gixa. ²⁰ Gi rixanu kwenuru gagjitikalungi. Giyagni gimaneya gimalwtukaluru gixkakinri Goyakalu.

7

Wa gnurchi ga wa gnunrochi gimkata kamrurekakleta

¹ Wa gyonyegityanopirana, kigleru wa jeji gi kamrukanro suxo. ² Seyni gapnokawlu chinanu satkaka waleko ganunro waneyapa. Ga wa satkaka suxo walako tganuru waneyapa. ³ Gnurchi genekanro ganunro galuukaluru. Waneko pixka tixanru suxo tganuru. ⁴ Wa suxo gi wa tutaka walako tomane chinanu, seyni tganuru galikaka gitaaka. Waneko pixka koxa rixa gnurchi. Gi rutaaka waleko gimanre chinanu, seyni ganunro galikaka gitaaka. ⁵ Gi gaalikakanu, seyni walepje chinanu wa mumaletkonepgi gagjigognetinripa wa gepi gigkakinitka gipshinkakaya wane gixinripa. Waneklu gipxaletkakanutnaka, wa Satanasyo ma yantaletyanupgi gmakotnachinwa chinanu. ⁶ Seyni wane nchinre walenwa gichichkaluru. Gi wa towutkalurni. ⁷ Nalukmaklu wa pejnuruneko jejine gita pixkamka rixanna. Seyni satkaka wane rixa wa Goyakalu genekyalu. Satu wane gixa. Satu pnu gixa.

Mganunrone ga wa gipnagnurutachrone giykolka

⁸ Wane nchinna wa mkashimyotkane ga wa gipnagnurutachrone, kiglemkalu gita pixka rixgognenatanmakna. ⁹ Gakotnachinwa mumkata gixletkane kashimyotanna. Gi rixanu kigleru galikaka kashimyotinripna ma makchakinitipna.

Gitsrukaachi yokanre giknoka gnunrowluya

¹⁰ Ga wa kashimyotachinetka ntowutna, gi wa gita towuwata seyni Gitsrukaachi galikakni towuwata, wa suxo tma mutspalatyutanplu tganuru. ¹¹ Ga wa tutspalatinipa, mganuruto tixgognenatanutka, waka rupoyik-gayegkakinna tganuruyma. Ga wa jeji koxa gi ruknokanro ganunro.

Kashimyokaklu wa galixachine ga wa malixkaneyma

¹² Ga wa wanepnute gita wane china, gi wa Gitsrukaachi wane china: wa satu molchi ma malixagnunrotkanu wa wala galuka waleyma gwaletini, gi wa ruknokanro. ¹³ Ga wa suxo tma malixagnurutkanu, wale galuka gimwaletinro, gi tuknokanru tganuru. ¹⁴ Gi rixanu wa gnurchi malixkatu kpashiri rixka ganunro chinanu. Ga wa gnunrochi malixkato kpashiro tixka

galixachri tganuru chinanu. Wane ma mixkoklunu gwugenenna mpowrane rixinmakna. Seyni kpashirinni wa xani.

¹⁵ Wa malixkutu wa rutspalatini, rutspalashatanu. Wumole ga wa wumolero gi wa wayegretka wane rixini. Kigle gwashle chinanupa tomgiyawu Goyakalu. ¹⁶ Gi rixanu ḡgi pumatge, suxo, gikta pixa gognetkakanru pganuru? Waka ḡgi pumatge, jeji, gikta pixa gognetkakanro pganunro?

Wa Goyakalu tomgiyawakgi satkaka, wane gixanu

¹⁷ Seyni satkaka wa Gitsrukaachi geneksatyawakgi, wa Goyakalu tomgiyawakgi satkaka, wane gixanu. Wane nixa towutletna pejnjuruneko gapatjetachinkaka. ¹⁸ ḡWa satu sajraka gistaakotachri tomgikolu? Gi wa msajruka gistaakotu rixashatinwa. ḡGa wa satu msajruka gistaakotu tomgikolu? Gi wa sajraka gistaakotanu. ¹⁹ Gike rixa sajraka gistiknuchi. Gike rixa msajruka gistiknuchi, seyni Goyakalu yokanatanru kamrutikolupa galikaka. ²⁰ Gikta rixpokonata tomgakoklunu, waneko rixjetanu. ²¹ ḡWayegrechri pixanatini ptomgakoklunuge? Gike pixanu, seyni pumkata gishpakletinipa wane pixanu galikaka. ²² Gi rixanu wayegrechri tomgakoklunu Gitsrukaachiya, gishpakachri Gitsrukaachinu rixatka. Waneko pixka rixa wa gishpakachri tomgakoklunu. Kristo wayegrerni wale. ²³ Kwenuru gagjitikalungi. Gi wa yine wayegretanunepgi. ²⁴ Nomolene, gikta gixpokonatini satkakgi ntomgakoklunu, waneko gixjetanu Goyakalu getanu.

Pawlo wane gixa getletlu kashimyolu

²⁵ Maklojine jejine metkanewapirana, maleshayno wa Gitsrukaachi tokanu yokanatkalluru, seyni gitgoya nunkakgi wa Goyakalu getwamon-rewle chinanu moyagkakachringo. ²⁶ Giyagni gitgoya kigleru wa tye kegek-nanuwlu chinanu wa xawakni waneretu wa jeji rixanatyawaka waneko rixanu. ²⁷ ḡSuxo gipxaletanruyge? Gi pujanru pkaspukikolupa. ḡMganunrotu pixinrege? Gi wa pujanro suxo. ²⁸ Seyni pkashimyotini, gi wa pmukochirewata. Ga wa makloji kashimyotini gi tmukochirewata. Seyni wa wane gixachine salewnamanetanna. Ga wa waleyne nyopnuginmakgi.

²⁹ Ga wa wane nchina, nomolene. Gi gogognoru. Wa wanerutuwagogne kganunrolune wa mganunrone pixka rixanna. ³⁰ Wa chiyagatachine wa mchiyagatkane pixka rixanna. Ga wa gimuwatachine wa mumuwatkane pixka rixanna. Ga wa gagjitachine maleshayalune pixka rixanna. ³¹ Wa tyechijne gajerkaka wane gixletachine, gi wa wane gixletpotutachine pixka rixanna. Gi rixanu tyegognepoga giknogantu.

Kashimyokakachine girukotlewle ga wa kojwakanshinikanrewlena

³² Giyagni nalukmaklu mkojwakanshinikanutkanepmakgi. Wa mkashimyotkutu yanshinikanegitlu Gitsrukaachipiranaya, gi rixpoko gigletanshinikanretanu Gitsrukaachi. ³³ Ga wa kashimyotachri yanshinikanegitlu tyechijne gajerkakapirana, gi rixpoko gigletanshinikanretanro ganunro. ³⁴ Wane rixa kotspaltanshinikanreyegitka. Wa suxo mkashimyotkato ga wa makloji jeji metkatowa Gitsrukaachipiranaya tyanshinikanuta, wa kpashiro tixinripa tomaneya ga wa tonshinikanuya. Ga wa kashimyotachro yanshinikanutlu tyechijne gajerkakapirana, gi tixpoko gigletanshinikanretanru tganuru.

³⁵ Giyagni tyepirana nunkakgi gipxakikolupa, gi wa gitseklutpo nutakye-gityapgi. Giyagni tyepirana nunkakgi, wanepotuko gixachinepgi ga wa mumaletkonepgi Gitsrukaachi gipxaletinri gishiniklewleya.

Makloji jeji metkatorowpirana wa Pawlogoya

³⁶ Wa satu kagwakinri wa gi kigle tixka makloji walenu, ga wa tuknog-walaputetinitka, ga wa tumkata wane gixletini, ralukyawaka rixanu. Gi wa mukochirewata. Kashimyokakanna. ³⁷ Seyni wa muchkowanshinikanuwatini rajiya, ga wa gike magatya, ga wa rumkata girukotanshinikanretnawa, ga wa rajiya wane rixanshinikanutinri wa mganuruto rumretiyaplo maklojite, kigle rixa. ³⁸ Giyagni girukokta kashimyojixlo maklojite kigleru kamruta. Ga wa girukokta maklojite mkashimyojixkatu kigleru potu kamruta.

Gipnagnurutachronepirana wa Pawlogoya

³⁹ Wa suxo ginanshichkalurni ruwekinikopshini tganuru. Ga wa tupnagrurutinitka tkaspuukatka tkashimyotyaplu talukanru, seyni Gitsrukaach-inupje. ⁴⁰ Ga wa gitgoya wanepnute tumuwatanu wane tixgognenatini. Nkagwaklu Giwekikaluru Goyakalunu koxa waneyno.

8

Yagluchisha genekashatkalurupirana

¹ Ga wa yagluchisha genekashatkalurupirana, wumatlu wa pejnurunekwu kgimatkalerunwu. Wa gimatkalelwu galixkotnachriwa rixkaklu yineru. Ga wa gishiniklelwu tseruwnakaklu. ² Ga wa satu kagwakinri pagix-anu rumatinri, giketsotaji rumatawa wa rumkata gimatleyawakamka. ³ Ga wa satu Goyakaluu gishinikini, Wale gimatanruni.

⁴ Giyagni wa niikaluru yagluchisha genekashatkalurupirana, wumatlu wa yagluchisha gikenanni wa tye psolchijneyako. Waneru wa satup-jerutu Goyakalu. Maleshu satu. ⁵ Gi rixanu wanemkana gixo goyakalune chinkalunemka tengogneko ga wa chijiko. Wane rixmaka gixo goyakalune ga wa gixo gitsrukaachine. ⁶ Seyni wixa chinanu waneru satupjerutu Goyakalu, wa Girchi. Ga wa Wale ruyakatyta ptowruko, ga wa wixa Wale chinanu. Satupjerutni Gitsrukaachi Geso Kristo, ga wa ptowruko Wale giyakatyta, ga wa wixa koxa Wale giyakatyta.

Giklukanuwnalupirana

⁷ Seyni gi pejnuruneko gimatpiranatlu wa tye. Xanigognenanu pimrine wa yagluchisha yonogyegjetachine, yagluchisha chinanu nikluna wa nikchi yagluchisha genekashatkaluru. Giyagni wanna gigrokanshinikanutachine puchotanshinikanutkana. ⁸ Gi wa niikaluru chinanu wkayegiklu Goyakalu. Wma niikanu, gi wmagatya. Ga wa wniki gi wa wanepnute wixanu.

⁹ Ggirukotinwa. Gi wa gitspekakanna gigrokachine gixa gimkatyawakaya. ¹⁰ Gi rixanu wa satu getinipmakyi wa pixa kgimatkaleryi wa nikjetikowaka ptuplatinipmaka wa yagluchipijiya, ¹¹ gi ge tseruwnanshinikankaakalurupni gigrokachri wa nikyaplu wa yagluchisha genekashatkaluru, ¹¹ ga wa pumatkalewleya ramganu gigrokachri pumole, wa wale chinanu rupnana Kristo? ¹² Wane pixa mukochirewleyegitinna moletkakachine, ga wa pumtukanshinikanutfinri wa gigrokanshinikanutachri wa giklukanuwnalupirana yanshinikanutinri, pmukochirewyeigitlu Kristoko. ¹³ Giyagni wa niikaluru gitspeekakiniplu nomole, gi pagogneko nnikanutkalu gigitu nma mutspekakyuanuplu nomole.

9

Pawlo yokanatikolu gimaxikoletikolu

¹ ¿Gi ge gishpakachrino? ¿Gi ge yokanatkalurno? ¿Gi ge netlu Geso Wutsrukate? ¿Gi ge nkamrurgi gixa Gitsrukaachiya? ² Gimka pimrine

chinanu yokanatkalurno, seyni gixa chinanu galikakakni. Gi rixanu wa nyokanatikolu gimaxikoletikolgi gixa Gitsrukaachi chinanu.

Wa yokanatkaluru gimkatyawaka

³ Walenwa nuykoye gitnawa wa nepomsatjene yegi. ⁴ ¿Gi ge wumkata nikleta ga wa wuuire? ⁵ ¿Gi ge wumkata wixa ganiklenanumtanro wganunro sato galixachro, wa pimrime yokanatkalune pixka, ga wa Gitsrukaachi gepurune pixka, ga wa Sotlu pixka? ⁶ ¿Waka gitapje ga wa Wirnawisi gi ge wumkata mkamruurewatkanwu gixleta?

⁷ ¿Katu pagogne solalarpa ga wa walenanuko wenutnawa? ¿Katu gitaklewata sana gowasha ga wa gi niklu toji? ¿Katu girukotna gowegane ga wa gi ruratnugatio gowega?

Kristo kamrurewyegitachri wa Kiglerpotunanan Tokanchi giwekyachri rixinripa

⁸ Gi yine ruyakatya wane nchinre. ¿Gi ge waneko pixka china Tokanchi? ⁹ Wa Moysisi Tokanu Yukanatkaluru wane china yongatyawakanatkaluru, "Gi pushyanamatanru wa waka wajiruitachri." Gi wa waka yanshnikanyegita Goyakalu. ¹⁰ ¿Gi ge psoluyako wane china wixa chinanu? Wixa chinanu yonatkalurni, wa jitlolotachri kagwakachri jitlolotinripa. Ga wa jirujitachri walenupa kagwaka yoptoletachri, jirujitinripa. ¹¹ Ga wa wixa gixa yegi wanikinri Goyakalu tokanu wa Giwekilalurya, ¿tsru potu getlu wa pagixanu gixanu wyoptota wumane chinanu? ¹² Wa pimrinemka gimkata wane gixlethu gixanu, ¿gi ge wanepnute wumkata wiña? Seyni gi wa wane wixa wa wumkatyawaka. Seyni wakotlu pejnuruko wma mumaletyanuplu Kiglerpotunanan Tokanchi Kristopiranra.

¹³ ¿Gi ge gimata? Wa kpashiwakapji kamrurewatyachine nikjetluna wa kpashiwakapji gajeru. Ga wa genekashlu giylatikowakakwa girukotachine psoji yoptojetna genekashatikowakakwaya. ¹⁴ Waneko pixka rixa gitakletna Gitsrukaachi wa Kiglerpotunanan Tokanchi ginkakletachine, wa Kiglerpotunanan Tokanchi giwekyachine rixinripa.

Gi walenuko rujginri Pawlo

¹⁵ Seyni gi pagogneko wane nixa gita. Gi wa tyepirana nyonata wa wane nixikolupa. Gi rixanu kiglemkano wa nupniripa, ga wa gi satuna maleshawaka gixlu ntserpiranawatinri. ¹⁶ Gi rixanu gita ginkakletinri Kiglerpotunanan Tokanchi, gi wa tye chinanu ntserpiranawata. Gi rixanu psolmucchonuko nerutka wane nixinripa. ¡Gi waneni gita wa nma munkakletkanru Kiglerpotunanan Tokanchi! ¹⁷ Gi rixanu wa gitako nushinikanu nkamrutinri, napnutikolupa. Seyni nma malukyawakanupmaka, naponshinikanutika ngirukotyawakapa. ¹⁸ Giyagni ¿girni wa napnutikolupa? Wa Kiglerpotunanan Tokanchi nunkakletinri nma mupekotikotu, gi wa gixo potu wane nixleyataplwa numkatyawaka Kiglerpotunanan Tokanchi chinanu.

Pejnurune wayegreru rixinri, gixolune rukshikinripa

¹⁹ Pejnuruyako gishpakyachritkano. Seyni pejnuruneko wayegrerno nixnawa, wa gixolune nukshikinripa. ²⁰ Goteyone chinanu, Goteyo pixka nixnawa, Goteyone naluka gikshikletkalu chinanu. Ga wa Tokanchi Yukanatkaluru waneyalune chinanu, Tokanchi Yukanatkaluru waneyalutu pixka nixnawa, gimka waneyno Tokanchi Yukanatkaluru, wa Tokanchi Yukanatkaluru waneyalune naluka gikshikletkalu chinanu. ²¹ Wa Tokanchi Yukanatkaluru waneyamigjene chinanu, Tokanchi Yukanatkaluru waneyamigjetu pixka nixnawa, wa Tokanchi Yukanatkaluru

waneyamigjene naluka gikshikletkalchinanu. Gimka Goyakalu Tokanu Yukanatkaluru waneyamigjetno, seyni Kristo Tokanu Yukanatkaluru waneyalutno. ²² Gigrokachine chinanu gigrokachri pixka nixnawa wa gigrokachine naluka gikshikletkalchinanu. Pejnuruneko chinanu, pejnurukakao nixnawa, wa pejnuruneyako pimrine nognetkajixinripa. ²³ Kiglerpotunanu Tokanchi chinanu pejnuruko nkamruta, wannayma yoptotachripno nixinripa waleya.

Psolpotuyako girukotmanetnawa

²⁴ ¿Gi ge gimata wa gomkamtakakachine yantaletyawakaya pejnuruneko gomkamtakakachine gasukamta, seyni satupje yoptotolu wa gapokgap-katachri genekikolupa? Wane gixa gasuklepotutanu wa gyoptotyaplu. ²⁵ Pejnuruneko yantaleta gasukletachine girukotmanetnawa. Wa wanna galikakni wane rixna wa satu sageyta yoptotinripna pomtutewakalo. Seyni wixa yoptotanro mpomtutewakato. ²⁶ Ga wa gita wa xani wane nixa gasuklemta gi wa yoxigikachri pixka. Ga wa yantalu giylakakleyawaka wane nixya, gi wa kannipgyalu giylakachri pixka nixa. ²⁷ Seyni nsaletmanetnawa. Nwayegretmanetnawa. Wa pimrine nunkaklewyeigitinitka, gitako mumkatkatno wane nma mutakikotupa.

10

Gisrayiline genekikolu

¹ Gi rixanu gi naluklu gma mumatyanyuplu, nomolene, wa pejnurunniko wutsrukatteni kyachgapererumkochikle rawananumtnina, ga wa pejnurunniko tsru wenu yapamtnina. ² Ga wa pejnurunniko yaglu rixikna wa kyachgapererumko ga wa tsru wenu Moysisi chinanu katikna. ³ Ga wa pejnurunniko niklu waleko niikaluru Giwekikalurunu. ⁴ Ga wa pejnurunniko giiru waleko girkaluru Giwekikalurunu. Gi rixanu sotlu Giwekikalurunu ruryana, wa sotlu romkagitjerna. Walenwa Kristo. ⁵ Seyni gixo wanna gi wa rugletanshinikanatluna Goyakalu. Giyagni yineru mwiyawakanu ruylatikanna wannani.

Gisrayiline mukochirepirana yonatkaluru, wuykotikolupa wixa

⁶ Tyekaka yaglu rixa wixa chinanupa wa wma metsotanutyaplu gek-tutkaka, wannani pimrinni pixka wane rixa getsotanretnina. ⁷ Gi koxa yagluchisha kyonogyegiklerunepgi, wannani pimrinni pixka. Wane chinyongatyawaka, "Tuplatnina yinni. Niknina ga wa rurnina. Palnanina. Yenewatnina." ⁸ Gi koxa wapoklewatanu wannani pimrinni pixka rapoklewatanina. Ga wa pagogne rupnana gepimole mapa waragkane. ⁹ Gi koxa wyantaletanru Gitsrukaachi wannani pimrinni pixka wane rixa yantaletletluna. Ga wa gimnu nikatanna. ¹⁰ Gi koxa gkegemganu gixa wannani pimrinni pixka kegemganina, ga wa knikatlewakleru nikatanna.

¹¹ Tyekaka giognogina yaglu rixinripa. Wa yonatka wa wuykotikolupa wixa, wa tyegogne yoptukyawaka gapokyegitkalunetkawu. ¹² Giyagni kag-waka tunwaletachri girukotinwa ma mupgatinitipa.

Gyantaletikolupirana

¹³ Wa gixa kashichka gyantaletikoluya gimkata gakotanshinikanretilu, gi rixanu walepje gyantaletikoya, wa yine gixa yantaljetikowaka. Ga wa Goyakalni wa poyakkachri. Wale gi getashatangi gyantaletikolupa wa gimkattyawaka pnute. Gimkata gishpakleta gi rixanu wa gyantaletikoluyamananuko, kamrutankoxlu gishpakyawakapa, wa gimkata gakotanshinikanretyaplu.

Gasukinriyagluchisha yonogyegitikowaka

¹⁴ Giyagni, nalukanune, gasukinri yagluchisha yonogyegitikowaka.
¹⁵ Nunkaklewyegitgi kanshinikanurune pixka. Gixako gitakyagokanru wa nchinyawaka. ¹⁶ Wa girapi giglenshinkanyegjixlewatachri, wa wixa giglenshinkanyegjixanru, ¿gi ge walenwa Kristograga wumapiika? Wa jimapro wjiknajrotanru, ¿gi ge walenwa wumapiika Kristomane? ¹⁷ Gi rixanu satupje jimaproni, wixni gixolunwu pamanepjerunwu. Gi rixanu pejnurunekwu pagapiikolunwu wa satupjerutu jimaproya.

¹⁸ Getanna gimaneyna Gisrayiline. Wa genekashatkaluru giylatkaluru nikachine, ¿gi ge rumapiikakna wa genekashatikowakakwaya? ¹⁹ ¿Giyagni gi nchina? ¿Wa yagluchisha geneekaluru pa gixanrege? ¿Ga wa yagluchisha pagixanrege? ²⁰ Seyni wane nchina, wa payine genekashatranu giylatkaluru, kamchine chinanu giylatkaluru. Gi wa Goyakalu chinanu giylatkalurni. Gi naluklu wa gixa kamchinezma gimapiikalungi gixinripa. ²¹ Gi gimkata giretyalu Gitsrukaachi girapre ga wa kamchine girapre koxa. Gi gimkata Gitsrukaachi nikyawaka gapiikota ga wa kamchine nikyawaka koxa. ²² ¿Wanxakakanruge Gitsrukaachi? ¿Wale pnuute muchkonurunrawge wixa?

Gishpaktelewlu

²³ Pejnurunanuko munanshichkotni, seyni gi wa pejnuruko gipxaklewata. Pejnurunanuko munanshichkotni, seyni gi wa pejnuruko tseruwnakaklewata. ²⁴ Gi satuna gijganru walenuko, seyni satunu galikaka. ²⁵ Wa pejnuruko nikchi gishankajetikowaka gagjitirri, gnikanru. Gi wa giklukanuwnalu gishinikyawaka chinanu gepomlewanatu. ²⁶ Gi rixanu *Gitsrukaachinni tye psolchijneko ga wa ptowrunanuka chiji gajeru Walenni*.

²⁷ Wa satu malixkatu chanixinipgi ga wa galukiniplu, wane gyanu. Wa pejnuruko rutspakyegityapgina, gnikanru. Wa giklukanuwnalu gishinikyawaka chinanu gike gepomganu. ²⁸ Ga wa satu wane chininipgi, "Tyenwa yagluchisha genekashatkaluru," gi wa gnikanru wale chinanu wa ginkaklewatachri, ga wa giklukanuwnalu gishinikyawaka. ²⁹ Gi gixanshinkanni giklukanuwnaluya, wane nchniya, seyni walenni. Gi rixanu ¿klu chinanu nushpakinri giklukanuwnayegjixko yinerushinikannu chinanu? ³⁰ Ga wa gita gapiika npoyagnutinri, ¿klu chinanu napatka tye chinanu wa npoyagnutanrutka?

Pejnuruko gkamrutanu wa Goyakalu gimalwutkaluru rixinripa

³¹ Giyagni wa gnikini, ga wa girini, ga wa girukokta gkamrutini, pejnuruko gkamrutanu wa Goyakalu gimalwutkaluru rixinripa. ³² Gi wa gitspekakanna Goteyone, gi wa Kriykoneko, gi wa Goyakalu gapatanuneko. ³³ Wa gitako pixka psoluyako nugletanshinkananutna pejnuruneko. Gi wa gitako nupxakikolupa nujga, seyni gixolune gipxakikolupa wa rognetskakikolupna.

11

¹ Gita yimjetachinepgi, gita pixka Kristo yimjetachrino.

Suxone kigle getikolu

² Numalwutgi wa pejnuruko gishinikyano, ga wa gimretlu wa gita samyokyagi giykolu.

³ Naluklu wa gimatyalu wa pejnuruneko jejijiwu rixinri Kristo. Ga wa jeji suxjiwni. Ga wa Goyakalu Kristojiwni. ⁴ Girukta jeji gagjigognetini

ga wa Goyakalu tokanu reneklewatini gishyajiwutachri patewkaklu gi-jiwu. ⁵ Girokta suxo gagjigognetini ga wa Goyakalu tokanu teneklewatini mushyajiwutkatopni, tpatewkaklu tojiwu. Gi rixanu waneko pixka tixa tshishyachotatkoklumaka. ⁶ Ga wa suxo tma mushyajiwutkonu, waneklu tyochotagitko koxa. Wa gektu getko tixini wa suxo yochotagruru ga wa shishyachotluro waneklu tushyajiwutko. ⁷ Gi rixanu wa jeji galikaka gi gimkata gishyajiwleta gi rixanu Goyakalu yagluni ga wa Wale pogirewleni. Ga wa suxo jeji pogirewleni. ⁸ Gi rixanu wa jeji gi wa suxo ruyakaty, seyni jeji tuyakaty wa suxo. ⁹ Gi rixanu koxa wa jeji gi wa suxo chinanu kamrutka. Seyni wa suxo jeji chinanu tkamrutka. ¹⁰ Giyagni wa suxo waneyaplo tsru gitaaikaluru yaglu tojiwu chinanu Goyakalutowrerune chinanu.

¹¹ Seyni gi rawa jeji suxomigjeya, ga wa gi koxa suxo wa jejimigjeya Gitsrukaachiya. ¹² Gi rixanu wa suxo pixka jeji tuyakaty, waneko pixka rixa jeji. Suxo runya. Ga wa pejnuruko Goyakalu ruyakaty. ¹³ Gixkakluko gitaka yagoookakanru. ¿Kigle getkolu wa Goyakalu tagjigognetini suxo mushyajiwutkatopni? ¹⁴ ¿Gi ge wumumturetanruko gimatkakgi wa jeji rojiuwatini, mkagwakpiratkotu rixlu? ¹⁵ Ga wa suxo tpogirewlenwa tojiwutsa. Gi rixanu tojiwutsa tushyatikolupa teneeka. ¹⁶ Seyni girukoktagputa galuka yoptopirkakleta, gi wa tyekaka pixkalutu wixjetyawaka. Gi koxa gapatjetikowaakaka gajene Goyakalunu.

Wa Gitsrukaachmanepirana nikikowakaya gi kigle rixjetna

¹⁷ Tyekaka nyokanegetingi, gi wa numalwutgi rixanu gi wa gipxakikolu chinanu, seyni pnute rixinripa gapatjetinri. ¹⁸ Gi rixanu muchinanu gapka nyijnakota wa gapatjetkwaka gapatjetini, waneru kotspaltakaku gixkakluko. Psoji nalixlu. ¹⁹ Gi rixanu gixkakluko gkotspalkaka. Pimrime pnuko gixa galixleta. Gimkata wane gixletko rupgujewni ripna galixachine potu. ²⁰ Gixa gi gapatjeta gnikyaplu Gitsrukaachi gipnale yaglu. ²¹ Gi rixanu satkaka muchinanu gapka koscheklu nikanrupa. Ga wa satu galikaka nachi, ga wa satu gimetachri. ²² ¿Gi ge kapjigi gixa wa gimkata nikletyawaka ga wa gimkata giiretyawaka? ¿Waka geyikluge gapatjetikowaka Goyakalunu ga wa mpatewkakannage wa waneyamigjene? ¿Gi nchinangi? ¿Numalwuteege? Wale chinanu gi wa numalwutangi.

Nachnewlu Gitsrukaachimane chinanu gitaaikaluru

²³ Gi rixanu Gitsrukaachi nyoptotyalu wa nenekyakoxgi gixa, wa Gitrukaachi Geso, wa samyokikolyechno, rawlu jimapro. ²⁴ Rali poyagnutletinitkalu, jiknajrotlu. Wane china, “Tyenwa nomane, gixa chinanu jiknagkaluru. Tye pixkalutu gkamrujetanu nushinikikolupa Gita.”

²⁵ Waneko pixka rixlo girapistono, rali nikletinitkana. Wane china, “Twu girapistono walanwa gerotu gipiratkaluru nogragaya. Girini pejnunanuka, gkamrujetanru nushinikikolupa Gita.”

²⁶ Gi rixanu tye jimapro gnikini pejnunanuka, ga wa twu girapistono girini pejnunanuka, ginkakletanru Gitsrukaachi gipnale runinpotunanuko.

Girukokta nikiniplu gi wa rumukluni giklukanuwnachripni

²⁷ Giyagokni girukokta gimirteru pixka rixa nikletiniplu tye jimapro, ga wa giriniplo twu girapistonoya Gitsrukaachinu, gi wa rumukluni, giklukanuwnachripni wa Gitsrukaachimane chinanu, ga wa gigraga chinanu.

²⁸ Giyagni gitakyagokinwa satkaka walenanuko. Wane gixachingi nikanru tye jimapro, ga wa girano twu girapistonoya. ²⁹ Gi rixanu wa rumuknu migje nikachri ga wa girachri ruklukanuwnayegjixikolupa nika ga wa rura

walenanuko. Gi rumata getlu wa Gitsrukaachimane.³⁰ Tye chinanu wanena gixo gigrokachine, gixo yayixachine. Gixo gapnanuta.³¹ Wa wutakyagok-inwa wixnanuko, gi wa giklukanuwnayegjixkalunepwu.

³² Giyagni giklukanuwnachinepwu, Gitsrukaachiya wsaletko gi wa tye psolchijne gajeneymako giklukanuwnayegjixkalunepwu.

³³ Giyagni, nomolene, wa gapatjetinipa gnikinipa, gkagwaakakanu.³⁴ Wa satu nachi chininipa, gipji nikini gma muklukanuwnayegjixikotupa gapat-jetini. Ga wa magatinri wa napokinipa gita nuglepokotanu.

12

Genekashatkalurkaka Giwekikaluruya

¹ Wa Giwekikalurunupirana gi naluklu nomolene gma mumatyuanplu.
² Gimatl lu wa payine gixanatini, myanumatkatu yagluchisha gomkagi-natachinengangi wane gixa kosektota.³ Giyagni numatkakgi gikena Gi-wekikaluru Goyakalu yanumatini wane china, "Kamakpiratkalurupa Geso." Ga wa gikena gimkata wane chinreta, "Gitsrukaachi Geso," seyni wa Giwekikaluru Kpashiri chinanupje.

⁴ Waneru pnumnu gixachri genekashatkalurkaka Giwekikaluruya, seyni Waleko satupjeretu Giwekikaluru.⁵ Waneru pnumnu gixachri kamrurchi, seyni Waleko satupjeretu Gitsrukaachi.⁶ Waneru pnumnu gixachri kam-ruretikowaka, seyni Waleko satupjeretu Goyakalu psoluyako kamrure-watya pejnuruneko chinanu.

⁷ Giyagni rupxakikolupna pejnuruneko, wale chinanu Giwekikaluru genekna satkaka gi rixpoko gipxaklewatnripa⁸ Gi rixanu satu galikaka wa Giwekikaluruya geneeka tokanchi kanshinikanuru, ga wa satu gitmatkalelwu tokanu Waleko Giwekikaluruya.⁹ Satu Waleko Giwekikaluru ya geneeka galixlu. Ga wa satu Waleko satupjeretu Giwekikaluruya genekashatkaluru rutskalaklewatnripa.¹⁰ Wa satu geneeka giyaklewlu kamrutinripa. Ga wa satu geneeka Goyakalu tokanu reneklewatnripa. Ga wa satu geneeka pnumnu gixachine giwekiklurune rumata getlewatnripa. Ga wa satu geneeka patokanu pnuko gixachrikaka. Ga wa satu geneeka wale tokankaka yokakinripa.¹¹ Pejnuruko tyekaka kamruta Waleko satupjeretu Giwekikaluru. Satkaka reneka Wale gishinikyawaka.

Gi gepikapsojitu satupje manchi

¹² Wa manchi pixka satupjeretu rixa, ga wa gi gepikapsojitu. Pejnuruko manchi psojikakka, gi gepika rixinri, pamanepjeru. Waneko pixka rixa Kristo.¹³ Gi rixanu koxa satupjeretu Giwekikaluru wkatika pejnurunekwu wa pamanepje wixinripa, ga wa Goteyone, ga wa Kriykone, ga wa wayegre-chine, ga wa gishpakachine. Pejnurunekwu wixa satupjeretu Giwekikaluru wyoptota.

¹⁴ Gi rixanu wa manchi gi wa papsojitejeru, seyni gixopsojitu manchi.¹⁵ Wane chininipmaka jichi, "Gi rixanu gi wa myochno, gi wa manchi gajerno," gi wa wale chinanu manchi gajeru ma mixyanutka.¹⁶ Wane chininipmaka wa jepchi, "Gi rixanu gi wa ygalchino, gi wa manchi gajerno," gi wa wale chinanu manchi gajeru ma mixyanutka.¹⁷ Psolmanekmaka ygalchi rixin, ¿ginakapmaklu yijnaklewlu? Ga wa psoluko yijnaklewlu rix-inmaka, ¿ginakapmaklu gamluru?¹⁸ Ga wa xani Goyakalu manchi gitaku psojikakka satkaka Wale galukyawaka.¹⁹ Wa pejnurukmaka papsojipje rixkamka, ¿ginakapmaklu manchi?²⁰ Ga wa xani galikakni gixo psojite wane, ga wa satupje manchi.

²¹ Giyagni wa ygalchi gi rumkata wane chinretlu myochi, "Gi nalukyi." Gi koxa wa jiwchi gimkata wane chinretlu wa jiichi, "Gi nalukgi."

²² Seyni wa manchi psojite muchkotu kagwakikaluru wanepnute galuukalurpotni. ²³ Ga wa manchi psojite mkgagwakpiratkotu kagwakikaluru walepni wkagwakpirakpotuta. Ga wa gipatkaluru walepni girukotko. ²⁴ Wa kagwakpiratkaluru wixanu, gike magatya. Seyni Goyakalu giglepkotlu wa manchi, wa magatachri wanepnute kagwakpiratkolupa. ²⁵ Wa ma kotspaltatikotupa manchi, seyni wannananuko psojitzka girukotkakinripna. ²⁶ Ga wa satupje wumane psojite salewninipa, pejnurkakako wumane psojikaka waleymananuko salewna. Ga wa satu wumane psojite gimalwutikolupa, pejnurkakako wumane psojikaka waleymananuko gimuwata.

Pnuko gixachri gitakikolkaka wa gapatjetachine yegi

²⁷ Giyagni gixni wa Kristomangi, ga wa satkaka gimane psojitzgi.

²⁸ Pnumnu gixachrikaka galikaka Goyakalu gitaka gapatjetachine yegi: Muchinanu gapka yokanatanune. Gapkatatachne Goyakalu tokanu geneklewatachine. Mapa chinirri yimaklewatachine. Wanepnute giyaklewlu kamrutachine Wanepnute genekashatkalurkaka waneyalune: gitskalaklewlu, ga wa gipxaklewlu, ga wa girukotlewlu, ga wa pnumnu gixachri tokanchikaka. ²⁹ ¿Pejnuruneklege yokanatkallunni? ¿Pejnuruneklege Goyakalu tokanu geneklewatachinni? ¿Pejnuruneklege yimaklewatachinni? ¿Pejnuruneklege kgiyaklewaklerunni? ³⁰ ¿Pejnuruneklege waneya genekashatkalurkaka gitskalaklewlu? ¿Pejnuruneklege patokanchikaka yanumaty? ¿Pejnuruneklege yokaka? ³¹ Jmerpotupgi wa tsru potu genekashatkalurkakaya.

Ga wa wanepnute kigleru gixjetyawakapa nekagitangi.

13

Tsru potu rixinri gishiniklewlu

¹ Wa yine tokanu ga wa Goyakalutowrene tokanumka nyanumatnimka seyni gi wa kgishiniklewaklerno, sintawoshpata sejrewatachri pixka nixa, ga wa latamta gitlotkaluro pixka, tsne tsne gixachro pixka nixa. ² Ga wa numkata Goyakalu tokanu geneklewatinripmaka, ga wa numatanmaklu pejnuruko giyogimanatkalluru ga wa pejnuruko gimatkalluru, ga wa psolpotuyako kalixaklerupmakno, wa magkamka numkata gajrikjixleta seyni gi wa kgishiniklewaklerno, gike gaprijno. ³ Ga wa pejnurukmaka neneksatanu wane nixle, ga wa nenekmanetinimkawa wa yochpiikaluru rixinripmaka, ga wa gi wa kgishiniklewaklerupmakno, gike gaprijno.

Gi pixka gixachrinwa gishiniklewlu

⁴ Gishiniklewlnunwa ma pognanuchni ga wa yiglepoto gixlewlu. Gishiniklewlnunwa gi ganxafeleta. Gishiniklewlu gi tserpiranatnawa, gi koxa ralixkotnawa. ⁵ Gi wa kamrulut gektutu. Gi wa walenuko rujga. Gi ramewna. Gi wa gektutu kagwaka. ⁶ Gi wa rumuwata mpoyagkaknuchiya, seyni rumuwata wa galikakpotunanu tokanchiya. ⁷ Pejnuruko rakota. Pejnuruko ralixa. Pejnuruko kagwaka. Pejnuruko kashnantakanshinikanuta.

Tsrupotni gishiniklewlu

⁸ Gishiniklewlu gike rixiniko nikawna. Wane chinini tokanchi geneklewlu, giknoookalurupni. Wane chinini patokankaka, nikawnachripni.

Wane chinini gimatkalewlu, giknookalurupni. ⁹ Gi rixanu psoji wumata, psoji wenecklu Goyakalu tokanu. ¹⁰ Seyni wa mmagatkatu gininipa, wa psojipje chinirri giknookalurupni. ¹¹ Wa mturno nixanatini, mturu tokanu pixka nixa, mturu pixka nixa gimatle jemleta. Mturu pixka nixa gishinikanuwleta. Wa tsru jeji nixinitka, wa mturu wane gixlekaka nuknoka. ¹² Gi rixanu kmapagiriko weta wa ganigapi pixka. Ga wa walegognepa wetgojkakanu. Wa xani psojkaka numaty, ga wa walegognepa numatpotutanu wa numatkoluko pixka.

¹³ Ga wa xani wanewalu galixlewlu, ga wa kagwaklewlu, ga wa gishiniklewlu. Tyekaka wa mapa. Ga wa wale tsrupotuya gishiniklewlu.

14

Tsrunwa Goyakalu tokanu geneklewatachri wa patokankaka yanumatyachri pnute

¹ Gishiniklewlu gomkampotutanu. Jmererunepgi wa Giwekkalurunuuya, ga wa jmererunpotupgi Goyakalu tokanu geneklewlu. ² Gi rixanu pnuko gixachri tokanu yanumatyachri gi wa yine ruynumata, seyni Goyakalu ruynumata. Gi rixanu gike gimata jemu. Ga wa giwekkaluru ya yogimanatkulu yanumaty. ³ Ga wa yine ruynumsata Goyakalu tokanu geneklewatachri, wa tseruwakanshinikanutkalunepni, ga wa rumnanukikolupna, ga wa ruykotikolupna. ⁴ Wa patokanu yanumatyachri walenanuko tseruwakanshinikanutnawa. Ga wa Goyakalu tokanu geneklewatachri tseruwakanshinikanutna gapatjetachine. ⁵ Giyagni nalukmaklu wa pejnurunekgi gixa yanumatirri pnuko gixachri tokanumunkaka. Seyni wanepnute naluklu Goyakalu tokanu geneklewatachine gixinripa. Gi rixanu wa yokakachri mwakanmaka tsrunwa Goyakalu tokanu geneklewatachri wa pnuko gixachri tokankaka yanumatyachri pnute, wa gapatjetachine tseruwakanshinikanutkolupa.

⁶ Giyagni xani, nomolene, gixa yegi nyakamka ga wa pnuko gixachri tokanchimka nyanumyegitingi, Ɂklu rupxakingi nma yanumyegitkangi satu gipgugjetkaluru, ga wa gimatkaluru, ga wa Goyakalu tokanu geneekaluru, ga wa ginkaklewlu?

Patokanu yanumsalu gi tseruwakanshinikanrewata

⁷ Giyagkoxi wa muwekletkaka pogimewatini wa tumleji ga wa gitpetsatkaluro, tma kashrijewnagimjetkanu Ɂgi rixpoko gimatkotanu girgima tumlejitkalurgimni ga wa gitpetsatkalurgimni? ⁸ Ga wa tpogimewatini kowi tma pogimewatkanu potu Ɂkatu galpokotinwa wa giylalu chinanupa? ⁹ Waneko pixka gixa koxa gixa. Wa pnuko gixachri tokanchiya gi wa pgujetanu yanumsalpotgi gixini, Ɂgi rixpoko gimatkotanu wa nchinyawaka? Gi rixanu kannipgyalu giynumsatachingi. ¹⁰ ɁGi pejnugimanauktalu pnumnu gixachrigima tye psolchijneko gwachri! Ga wa maleshlu satu wane mchinkatu. ¹¹ Seyni wa gita nma mumatkanumkalu gikta raluka chinreta, patokanu yanumatyachri nixa wa yanumanatachrigoya, ga wa wale patokanu yanumatyachri rixa gitagoya. ¹² Waneko pixka gixa koxa gixa. Gi rixanu jmererunpotgi Giwekkalurunkakaya, gjiga wane gixletanru kigleru potu wa tseruwakanshinikanutkolupna gapatjetachine.

Giwekkaluru gitanu nagjigognetini, ga wa nonshinikanu koxa nagjigognetini

¹³ Giyagni wa pnuko gixachri tokanu yanumatyachri ragjigognetanu wa rumkata yokakletyaplu. ¹⁴ Gi rixanu wa gitamka patokanu nagjigognetini, wa giwekikaluru gitanu nagjigognetya, seyni wa nonshinikanu gike kamruta. ¹⁵ Giyagni ¿klunerni? Giwekikaluru gitanu nagjigognetini, ga wa nonshinikanu koxa nagjigognetini. Giwekikaluru gitanu nshikalewatin, ga wa nonshinikanu koxa nshikalewatin. ¹⁶ Ga wa giwekikaluru pixanu pumalwutinri, wa munkaakonewa yegi gwachri ¿gi rixpoko wane chinretanu, "Wane gixkalurupa," wa poyagnutinri? Gi rixanu gi rumatlu pchinyawaka. ¹⁷ Gi rixanu pixa galikaka kigle poyagnutle gixa, seyni wa satu gi wa tseruwakanshikanutkalurni.

¹⁸ Npoyagnutlu Goyakalu wa gita pnuko gixachri tokankaka nyanumaty gixa pejnurune pnuute. ¹⁹ Seyni wa gapatjetikowakaya nalukmaklu pamyo tokanchi nchininripa nonshinikannuya wa pimrine nunkaklewyegitinripmaka, pamole waragka tokanchi pnuute paneru tokanuya nchininripmaka.

Klu chinanni wa patokanu yanumsalu genekashatkaluru

²⁰ Nomolene, gi wa mturune gixanu ginshinikanuya, seyni mturune gixinwa gektutuya. Ga wa ginshinikanuya mmagatikanepgi. ²¹ Wane chinyongatyawaka Tokanchi Yakanatkaluru:

Patokankakaya ga wa paneruspuya,

Nunkakjixinna nyi yine.

Gi waleyako yijnakotannona,

China wa Gitsrukaachi.

²² Giyagni wa pnuko gixachri tokankaka walenwa getkaluru rixa gi wa galixachine chinanu seyni malixkane chinanu. Ga wa Goyakalu tokanu geneklewlu gi wa malixkane chinanni, seyni wa galixachine chinanni.

²³ Giyagni wa pejnuruneko gapatjetachine gapatini tyekaka chinanu, ga wa pejnuruneko pnuko gixachri tokankaka yanumatnipna, wa jiglokinipna munkaakone waka malixkane, ¿gi ge seprolokachine chinangina? ²⁴ Ga wa pejnuruneko Goyakalu tokanu geneklewatin, ga wa jigloka satu malixkattu waka munkaakotu, pejnuruneko chinanu giykotkaluru. Pejnuruneko chinanu gepomsatkaluru. ²⁵ Raji yogimatkalu rupgujetko. Ga wa wale yoptsojitanu, yonogyegitanru Goyakalu. Runkakletanru galikakni gixa yegi rawa Goyakalu.

²⁶ Giyagni, nomolene, ¿klunerni? Wa gapatjetini gixa, satkaka waneya shikalchi. Ga wa satu waneya ginkaklewlu. Ga wa satu waneya gipguketkaluru. Ga wa satu waneya patokanu. Ga wa satu waneya yokaku. Pejnuruko kamrutikolupa ntseruwakanshikanutkolupa. ²⁷ Wa satu pnuko gixachri tokanu yanumatini, gepipje ga wa gi wa mapa pnuute yanumatani. Satupje gapkakaka. Ga wa satu yokakachripa. ²⁸ Ga wa malesha rixini yokakachri pochkeplu gapatjetikowakaya. Walenanukopa yanumatini, ga wa Goyakalu ruynumatanu.

²⁹ Ga wa Goyakalu tokanu geneklewatachne gepi, mapa yanumsatanu. Ga wa pimrine gimata getanu. ³⁰ Ga wa satu tuplanatachri tokanchi gipgutyegitkalurupmaka, wa muchichachri pochkepatka. ³¹ Gi rixanu pejnurunekgi gixa gimkata Goyakalu tokanu geneklewleta, satkakgi, wa pejnuruneko ginkaakalunepni, ga wa pejnuruneko giykotkalunepni. ³² Goyakalu tokanu geneklewatachne giwekinri yijnakotna wanna Goyakalu tokanu geneklewatachne. ³³ Gi rixanu Goyakalu gi wa sejrewkakachrini, seyni kigle gwashle gixkakachrini. Wane rixa pejnuruko wa kpashirine gapatjetyawaka.

³⁴ Suxone pochkepa gapatjetikowaakakaya. Gi rixanu gi ruchichka yanumatinripna, seyni yijnakotanna, wa Tokanchi Yukanatkaluru koxa chinyawaka. ³⁵ Ga wa raluka gimatletinipluna pagixanu, gipjina wannako ganurna repomginna. Gi rixanu gektu getko gapatjetikowaka tyanusatini suxo. ³⁶ ¿Gixyege ruyakatyia Goyakalu tokanu, waka rapyegishatgi?

Giykolu wa gapatjetiyawakapirana

³⁷ Wa satu kagwakinwa Goyakalu tokanu geneklewatachri ga wa Giweikaluru waneyalutu rixini, wale gimatpotutanru wa nyonyegityawakgi tyenwa Gitsrukaachi yokanatanru. ³⁸ Ga wa satu jemashatinri, wale koxa jemashatko.

³⁹ Giyagni, nomolene, jmererunpotupgi Goyakalu tokanu geneklewluya. Gi gjretanru wa pnuko gixachri tokankaka yanumatikolu. ⁴⁰ Ga wa psolpotuyako kigle getikolupa, ga wa giglepokotkalurupa.

15

Wa Kiglerpotunanu Tokanchi wa Pawlo ginkakletanru

¹ Nomolene, numatkakgi Kiglerpotunanu Tokanchi wa nunkakletyegityagi, wa gixa yoportanru, wa wale tunwatyachingi. ² Wa wale chinanu gognetkaaka, wa gimretinri Kiglerpotunanu Tokanchi wa gita ginkakletyegityagi, gma malixashatinitipmaka.

³ Gi rixanu muchinanu gapka nsamyokatkagi gixa wa gita samyookaluu koxa: Wa Kristo gipnana wixa mukochire chinanu, wa yonchi chinyawaka; ⁴ wa kapnatkaluru, ga wa mapgogne chininri yotunomtatk, wa yonchi chinyawaka. ⁵ Ga wa retka. Sotlu getlu. Wanepnute pamole gepi getlu. ⁶ Wanepnute pamyo pacha pnute moletkakachine pagetkolatu rixluna. Xanigognenanu rawawana gixa wanna, ga wa pimrine gapnanutatka. ⁷ Wanepnute Santiyako getlu. Wanepnute pejnuruneko yokanatkalune getlu. ⁸ Ga wa gita yegi rupgujewniya. Pejnuruneko pnute gapkatatachrima, ma mapookanuwa gipapko gishpakkachri pixka nixa gipgujewnayegitkota.

⁹ Gi rixanu mturu nutaaka gita pejnuruneko yokanatkalune pnute. Gi wa numukluni yokanatkaluru nchinikolu, gi rixanu gita kojwakna Goyakalu gapatjetanune. ¹⁰ Ga wa Goyakalu gimatlelewle chinanu, wa nixyawaka nixatka. Gi wa maleshawaka; rumutlelewleyegitno. Seyni pejnuruneko pnute nkamrurewpotuta gita. Gi wa gita, seyni Goyakalu gimatlelewle gitaymalutu galikakni kamrurewata. ¹¹ Giyagni wa gita chinimi waka wanna chinini wane wixa ginkaklewleta. Ga wa wane gixa galixleta.

Gipnachine yotunrepa

¹² Ga wa Kristo ginkakletko wa gipnachinetskalaya yotunomtinri, ¿gi nchinkoxge pimringi gixa wa maleshlu yotunru gipnachinetskalaya? ¹³ Wa malesha rixkamka yotunru gipnachinetskalaya, Kristokoxamka gi yotunutanu. ¹⁴ Ga wa Kristo ma yotunotkamka, waneklu maleshawakapmakni wunkaklewle. Ga wa gixa galixlewlekoxmaka maleshawakapmakni. ¹⁵ Ga wa wixa Goyakalupirana maleshawaka gipgujtatachinepmakwu wetikomka, gi rixanu wupgujtatlwa Goyakalu yotunkakanru Kristo. Ga wa ma yotunkaakamkalu wa galikakmakni gi yotunotmaka gipnachine. ¹⁶ Gi rixanu gipnachinmaka gi yotunotmaka, Kristokoxmaka

gi yotunotanu. ¹⁷ Ga wa Kristo ma yotunotkamka, galixle maleshawakapmakni. Kmukochirerungu gixmakawa. ¹⁸ Giyagkoxmakni wa Kristo gapnanutyachine gamgachinmakni. ¹⁹ Wa tye gwashlepjemka waneywu wkagwakanru Kristoya, pejnurunniko yinni pnute kwamonurunepmakwu.

Kristonwa muchichachri

²⁰ Seyni wa xani Kristo yotunomta gipnachinetskalaya. Walenwa gapnanutachine gegwikalutka, wa sana gitakikaluru pixka gegwikalutka. ²¹ Gi rixanu wa yineru chinanu waneru gipukchi, yineru chinanu koxa waneru yotunru gipnachinetskalaya. ²² Gi rixanu Gatako pixka wa wale chinanu pejnurunniko gipnana, waneko pixka rixna, Kristo chinanu pejnuruneko giweekaako. ²³ Seyni satkaka ruglepokotikowakaya. Kristonwa gegwikalu. Wanepnute wa Kristonune wa runinipa Wale. ²⁴ Wanepnutepe yoptukyawakpni. Waneklu Goyakalu, Girchi yegi samyokiniplu pogirewatyawaka, wa nikatinpatkalu pejnurkakako girukotikowaka ga wa pejnurkakako tsru gitakikowaka, ga wa pejnurkakako muchkowatikowaka. ²⁵ Gi rixanu Wale gimkata pogirewleta wa pejnuruneko kamnixjene gjixipta rapukote rutakinpotunanuko. ²⁶ Gapkatatachri potu kamnixlewatachri nikatkaluepni walenwa gipukchi. ²⁷ Gi rixanu *gjixipta rapukote Wale gaaliyanru pejnurkakako*. Wa wane chinini, “pejnurkakako gaalixkalurupni,” pgujetanurni gi wa gaalixkalurni Goyakalu wa pejnurkakako gaalixachri Kristo chinanu. ²⁸ Wa pejnurkakako gakaglookalurni chininitka, waneklu Gituruko yijnakotanru wa pejnurkakako gakaglookachri Wale chinanu, wa psoluko rixinripa Goyakalu pejnurkakoyegiya.

Mayotunkoklunupmakna gipnachine

²⁹ Wane ma mixkoklunupmaka *¿gi rixanna wa katkalune gipnachine chinanu?* Wa gipnachine gi yotunputinipmaka, *¿klu chinanu katkana wanna chinanu?* ³⁰ *¿Klu chinanu koxa wixa psolgogneko kyowikwaka gwagognenata?* ³¹ Wa nalixkowle chinanu wane nchina, nomolene, pagognemnunanuka nupnana. Wa Kristo Geso Wutsrukate chinanu nalixkowyegityagi. ³² Wa yine gixjetyawaka Gigwisoya kmatsurune nyagotini, *¿klu kigleylu?* Wa gipnachine ma yotunotkamka, waneklu *wnikanu, wuranu. Gi rixanu yechikawa wupnanu.* ³³ Gi wa yokwitkalunepgi. Gektutu gimatkaklewlu gimatkulu kigleru gixjetikowaka. ³⁴ Giponkanutka. Poyagkakachineepgi. Gi gmukochirewatanutka. Gi rixanu pimrine gi gimatlu Goyakalu. Wane nchina mpatewatinripa.

Yotunotachrimanepa

³⁵ Seyni satu wane chinanu, “*¿Gi rixpoko yotunretanna gipnachine? ¿Gi gixachripni gimanepna?*”

³⁶ Manshinikanutyi. Wa putakajitanru ma mupnakanmaka gimka giewakaako. ³⁷ Ga wa putakajitanru gi wa gimanwa waneya rixinripa putaka, seyni kajiruji mamkajitni, triko getko ga wa satni. ³⁸ Ga wa Goyakalu genekmanetlu gikta rixpoko galukletlu. Ga wa pajkaka waleko gimanereneka. ³⁹ Pejnurugituko gi wa pagitutni, seyni pnuko rixgituta wa yineru. Ga wa pagitukni wa nikchine. Ga wa pagitukni koshichine. Ga wa pagitukni shiman. ⁴⁰ Waneru tengogne gajermane, ga wa chiji gajermane. Seyni pnuko rixa tengogne gajeru pogirewle, ga wa pnuko rixa tyechijne gajeru pogirewle. ⁴¹ Pnuko rixa tkachi pogirewle, ga wa ksuru pogirewle pnuko gixa. Ga wa katagiri pogirewle pnuko gixa. Gi rixanu satu katagirkaka pnuko rixa pogirewleta.

⁴² Waneko pixka rixa wa gipnachine yotunre. Pojpakalu rutaaka. Mpojpakatupa yotunkaaka. ⁴³ Mkagwakpiratkatu gitaka. Kpogireru yotunkaako. Muchkotu gitaka. Kgiyakleru yotunkaako. ⁴⁴ Tyegogne gajermane rutaaka. Giwekikalurmaneya yotunkakikotka.

Waneru tyegogne gajermane, ga wa waneru giwekikalurmane. ⁴⁵ Wane chinyongatyawaka: Wa muchichachri yineru Gata manchi *giwekachri rixa*. Ga wa ralipre Gata, Walenwa giwekikaluru giweekaklewatachri. ⁴⁶ Seyni gi wa muchinangapkanwa Giwekikalurunu, seyni tyegogne gajerunu. Wanep-nute Giwekikalurunu. ⁴⁷ Muchichachri yineru walenwa chiji gajeru, ga wa chiji kamrutikaluru. Ga wa gepi chininri yineru tengogne gajerni. ⁴⁸ Chiji kamrutikaluru pixka rixna chiji kamrutikalurune. Ga wa tengogne gajeru pixka rixna tengogne gajene. ⁴⁹ Wa chiji gajeru yaglu pixka wixa, waneko pixka wixanu, tengogne gajeru yaglu pixka wixanu.

⁵⁰ Ga wa tyenwa nchina, nomolene, wa giichi ga wa granchi gi gimkata yoptoletanru Goyakalu pogirewatayawaka. Gi wa pojpakaluko gimkata yoptoletlu mpojpaknuchi.

Gipukchi gakaglooka

⁵¹ Giyagni giyogimanatkalu nunkakgi. Gi wa pejnurunekwu gipnanu, seyni pejnurunekwu kashrijetkalunepwu. ⁵² Pshinitsonpotuji, gjipukgalu pshiniji, wa ralipre kowgima. Gi rixanu tpogimewatanu kowi. Ga wa gipnachine yotunkaako mpojpakanepa. Ga wa wixa kashrijetkalunepwu. ⁵³ Gi rixanu rumkata tye pojpakalu yoshmaakota mpojpaknuchi. Ga wa tye gipnachripa gimkata yoshmaakota mupnaknuchi. ⁵⁴ Giyagni tye pojpakalu mpojpaknuchi yoshmaakoklunutka, ga wa tye gipnachripa mupnaknuchi yoshmaakoklunutka, wanepatkalu wa yonchi chinyawaka:

⁵⁵ *Gaalirewlu nikatanatkalu gipukchini.*

Giyagni wa xani

gipukchi gi gakagloklewatatka.

Maleshayatkawu gipukchichino.

⁵⁶ Gipukchichinonwa mukochri. Ga wa Tokanchi Yukanatkalu walenwa mukochri muchkonu. ⁵⁷ Poyagnutkalurupni Goyakalu. Wa Wale gakaglo-lewkakjetwu wa Wutsrukate Geso Kristo chinanu.

Makglokognenatkonepgi. Muxriikanepgi

⁵⁸ Giyagni, nomolene, nalukanune, makglokognenatkonepgi. Muxriikanepgi. Gkamrurewgognepotutanu Gitsrukaachi kamrureya, gi rixanu gixa gimatlu gi wa maleshawakni gkamrure Gitsrukaachi chinanu.

16

Genekashlukaka kpashirine chinanu

¹ Ga wa genekashlukaka kpashirinenupapirana. Wa Kalatasreta gap-atjetikowaakaka gajene nuglepoktapiniko pixka, waneko pixka gixanu gixa. ² Muchinangogne simankakaya, satkaka gixa gignantakyawaka gitakanru gikta gixpoko yoptoleta. Wa napokinipa maleshapluchi genekash-lewlu. ³ Wa napokinipa wa gixa kigle getle gixanune, wanna nyokanatanu kirukayma, wa Gerosale ranikyapluna wa genekashle. ⁴ Ga wa kigle getle rixkoklunupa wa gitaka koxa wane yinripa, gitaymammupna.

Wane china Pawlo wa Korinto raluka yaleta

⁵ Wa Masetoni nyapamtinpatka, gixa yegi nyanutka. Gi rixanu Masetoni nyapamtanu. ⁶ Gikta gixayma gixgogne nwanu. Galukta wane nuknokak-inri ginapuklu wa gipxaletyapno wa nyinripa. ⁷ Gi rixanu gi naluka getle-shamtgi xani. Gi rixanu nkagwaka gimwaletgi gixgogne wa Gitsrukaachi gichichinipno. ⁸ Gigwiso nwanu Jirgikolpatkagognepotunanuko. ⁹ Gi rixanu njiglokpotutatka nkamrure yegi. Tsru kamruchi yegi nuchi jiglokletatka. Ga wa gixna kamnixlewatachine.

Timotiyo ga wa Gapolo salwatinri

¹⁰ Ga wa rapokinipa Timotiyo, getanru mpiikatupni gixa yegi rawanu. Gi rixanu wale kamrutlu Gitsrukaachi kamrure gita pixka. ¹¹ Giyagni gike geikanru. Wa kiglenshinikanuru gipxaka yaletanru gita yegi runinripa. Gi rixanu nkagwaklu moletkakachineyma.

¹² Wa wumole Gapopolpirana, nagjipotutlu gixa yegi yinripa wa moletkakachineyma. Gi raluka yalpotuta wa xani, seyni wane yanu ruglepok-tapinipa.

Mpojeginwa galixleya

¹³ Getpotutanu. Mpojeginwa galixleya. Jejinpatkalagika. Gichkol-unepgi. ¹⁴ Gishiniklewleya gkamrutanru psoluko.

Gishtugwa ga wa pimrine gikamrurewatachine

¹⁵ Nagitgi, nomolene. Gixa gimatanna Gishtugwapji gajene. Wan-nanwa muchinanu gapka galixachine Gakayi gajene. Wannananuko gitaknawa kpashirine yegi kamrurewatachine. ¹⁶ Gyijnakotanna wanna pixkalune, ga wa pejnuruneko gikamrurewkakachine, ga wa kamrurew-potutachine. ¹⁷ Numuwyegitlu Gishtugwa gapokinritka, ga wa Gortanato, ga wa Gachayiko. Gi rixanu wa nyi gipekotlu gixa magatinri. ¹⁸ Gi rixanu rapnanunshinikankaknona gita ga wa gixa koxa. Gimatpotutanna wanna nyi pixkalune.

Gasya gapatjetyachinkaka galuklewle

¹⁹ Gasya gapatjetyachinkaka galukgi. Gitsrukaachiya ralukpotutgina Gakila ga wa Presura, ga wa wannapji gapatjetyachine. ²⁰ Ralukjixgina pejnuruneko moletkakachine. Galuukakanu kpashiri gamluruya.

Giglenshinikanyeglewlu

²¹ Naluklewle gitako nomyoya, Pawlo.

²² Gitsrukaachi maluukatu kamakpiratkalurupa. Gitsrukaachi ginanu.

²³ Gimutkaluneppgi Gitsrukaachi Gesoya. ²⁴ Nushinikgognenatgi pejnu-runekgi gixa Kristo Gesoya.

2 Tixinri Kpashiri Pawlo Kirukate Korintyone Chinanu

Galuklewlu

¹ Pawlo kirukate. Walenwa Geso Kristo yokanatanru Goyakalu gishinikyawaka. Ga wa Timotiyo, gimole, kirukate koxa. Goyakalu gapatanune chinanni, wa Korinto gajene, ga wa pejnuruneko kpashirine, psolusretako Gakayi gajene chinanu koxa.

² Gimutkalunepgi Wuru Goyakaluya ga wa Wutsrukate Geso Kristoya. Wale giglewanshinikankakangi.

Kgimnanuklewaklerni Goyakalu

³ Gimalwutkalurupa Goyakalu, Wutsrukate Geso Kristo Giru. Kgetwanmonrewaklerni Girchi, ga wa pejnuruko kgimnanuklewaklerni Goyakalu.

⁴ Wale gimnanukwu pejnuruyako wsalewninri, wumkata wixa koxa gimnanukleyapna pejnurkakako salewakchi getachine. Wa wumnanukikolu wa Goyakalu gimnanukyawu wale koxa wumnanukinna wanna. ⁵ Wane rixa gixolewnaletinri Kristo salewnale wa Waleyma wsalewninri, waneko pixka rixa gixolewnaleta wumnanukikolu Kristo chinanu. ⁶ Wixa salewnini, gixa gimnanukikolu chinanni ga wa gognetkakikolu chinanni. Ga wa wumnanuukolunupa walenwa gixa gimnanukikolu chinanni. Wa gixa gimnanukikolu chinanu gimkata gixa gakotanshinikanretlu waleko salewakchi koxa wsalewniya wixa. ⁷ Poyegi kagwaklelle wixyegityagi gi rixanu wumata wa wane gixa salewnakakletikolu, waneko pixka gixa gimnanuuakkletikolkoxapa gixa.

Kyowikolkaka Pawlo getanru Gasyaya

⁸ Gi rixanu, wumolene, gi waluklu gma mumatyaplu wa wsalewninripi-rankaka, wa Gasya wsalewninri. Wa wumkatinri pnuute, kyapreru weta. Wane wixa mkagwagiwekletkanetkawu. ⁹ Seyni wixa gitakanshinikanutnawa wupninripa, wma maponshinikanutinitipnawa, seyni Goyakalu waponshinikanutinripa, gi rixanu Walenwa gipnachine yotunkakachri. ¹⁰ Walenwa gipsolutunanukta gipukchi rushatkapyawu. Ga wa rushatkapanwu. Walenwa wkagwakanru wa wanepnutechi rushatkapanwu. ¹¹ Gixa koxa gipxakanwu gagjigognereya, wixa chinanu gixolune moyagnutuyaplu wa wenekikolutka gixolune chinanu.

Myokwiretni Pawlo

¹² Gi rixanu tyenwa walixkowle: wa wupgjutanshinikanyegitnawa wa kpashirinwu ga wa myokwirenwu Goyakalu chinanu. Tyechijne wane wixjetya, ga wa wanepnute wane wixa gixyegi. Gi wane wixa gi rixanu tyegogone gajeruya kgimatkalerunwu, seyni Goyakalu gimutlewle chinanu wane wixa. ¹³ Gi wa papirana wyonyegiti, seyni wa tyepjeni gixa getyongatanru ga wa gimata jemanru potu. Ga wa nkagwaklu oyoptukyawakpotunanuko gimata jempotutyapa. ¹⁴ Wane gixa psoji gimatyawu wa gixa galixkowyegitanunwu. Waneko pixka gixkoxni walixkowyegitanunepgi Wutsrukate Gesogognepa.

Pawlo gishinika Korintyo yaleta

¹⁵ Tye gaponshinikanru chinanu, naluka muchinanu yayegletgi wa gepi kata gkomjikikolupa. ¹⁶ Ga wa gixa yezi nyinipa, Masetoni nyinripa, ga

wa Masetoniya numepe ginretinitnaka gixa yegi. Ga wa gixa gipxaletanno Gote nyinripa. ¹⁷ Giyagni wane nixanshinikanutini, ¿wane nchinashata? ¿Waka wane nixanshinikanutini, tyegogne gajeru pixka nixanshinikanutlu, wa nkoschekashatanmaklu gigi, gigi; gike, gike?

¹⁸ Poyagkakachrini Goyakalu. Giyagni wtokanu wa wchinyagi gi wa gigi ga wa gike. ¹⁹ Gi rixanu Goyakalu Wgene Kristo Geso, wa gixa yegi wunkakletinri gita ga wa Surwano ga wa Timotyo, gi wa Walenwa gigi ga wa gike gixachrini. Seyni gigi gixachrinwa Wale. ²⁰ Gi rixanu pejnurkakako Goyakalu gipiratanru gigi rixka Gesoya. Giyagni Wale chinanu, Wane gixkalurupa wchinru Goyakalu, wixa chinanu gimalwutkalurupni. ²¹ Wa gixayma wpoyegitjeru Kristo chinanu ga wa wtsomitjeru Walenwa Goyakalu. ²² Wale koxa gimaxikoletwu. Giwekikaluru genekikolupa psojite renekagnaputwu wajiya.

Klu chinanu gi wane yawa Pawlo

²³ Gita koschekgiwakatlu Goyakalu rupgujtatyapno, wa nkaspukyapgi gi wa Korinto nyawa. ²⁴ Gi wa wutsrukatepiranyegitanmakgi gixa galixlewleya, seyni gikamrurewkakachinwu gimuwlleya. Gi rixanu galixle ntunwatya gixa.

2

¹ Wane nchinanshinikanutatka, gi wa wamonuwatachrino nyayegitanutnakgi. ² Gi rixanu gita wamontakinmakgi, ¿katni wa nkomjikjeru seyni nwamontakanruko? ³ Tyepiranako nyonata, wa gixa yegi nyinipa, nma wamonuwatinitipa numkata komjikjene chinanu. Gi rixanu naponshinikanye gitgi pejnurunekgi gixa, wa gita gimuwlle walenna pejnuruneko gixa gimuwlle. ⁴ Gi rixanu tsru salewakchiya ga wa nwamonnupoga nyonyegitgi ga wa gixo noktegaya, gi wa gwamontakikolupni, seyni wa gimatyaplu wa tsru nushiniklelewle potu nixyegitgi.

Yiglepotuko retlu satu jeji wamontaklelewatachrimka

⁵ Satu jeji wamontaklewatinimka, gi wa gita wamontaaka seyni psojipje, seyni pejnurunekgi gixa wamontaaka. Gi wa ntserutpiranatyaplu. ⁶ Poyagotyawakatkani wane gixachri wa gixolune saleytawakatkalu. ⁷ Giyagni pruko gixanutka, wa gkaspukinittkalu. Ga wa gimnanukanutkalu. Gi wa tsru wamonchi gakaglokanutkalu. ⁸ Giyagni nagjitgi, wa gishinikpotutanutnaklu. ⁹ Giyagni wale chinanukni nyonyegitgi wa gyantaletikoluya numatyapgi wa psoluyako gyijnakotinripa. ¹⁰ Ga wa gixa kaspukinri, gita koxa kaspukiyal. Gi rixanu girukokta gita kaspukinri wa pagixanu nkaspukini wa gixa chinanu Kristo getanu nkaspukiyal, ¹¹ ma mumkata gaaliretyanupwu Satanasyo. Gi rixanu gi wa mumatkanwu wale gishinikyawakapirana.

Wamonuwnanshinikanuta Pawlo Trowaya

¹² Wa Trowa nyapini wa Kiglerpotunanu Tokanchi Kristopirana chinanu, gipgyapto kotpuukaluru gita chinanu Gitsrukaachiya. ¹³ Gi napnanunshinikanuta gi rixanu gi nukshiklu nomole Tito. Seyni nungamtatkana Trowa gajjene; Masetoni nyatka.

Goyakalu gakaglokyegitwu Kristo chinanu

¹⁴ Poyagnutkaluru Goyakalu wa Wale psolgogneko gakaglokyegitwu Kristo chinanu. Rekagtitlu rumatikolu Kristo pogamlunu wixaya pasretamnunanukaya. ¹⁵ Gi rixanu wa Goyakalu chinanu Kristo pogamlunwu

wixa, gognetkaakaluneyegitka ga wa gamgachine yegi koxa. ¹⁶ Wa nyi gamgachine yegi galikakni gipukchi pogamlunu pixka wixa gipukchi chinanupa. Ga wa gognetkaakalune yegi giweklu pogamlunu wixa giweklu chinanupa. ¿Katupni tye kamrurchi gimuknuni? ¹⁷ Seyni wixa gi wa gixolune pixka wixa, wa Goyakalu tokanu gishankachine sroschi chinanu, seyni mayroklenе wixinи, Goyakalunune wa Goyakalu getanu gwachine wixinи wixa yanumsaleta Kristo chinanu.

3

Kristo kirukatkaka

¹ ¿Gipguta wyinuwakatnakerge wixnanuko kiglepirana yegi wchinyeginwa? ¿Wa pimrine pixka wmagatyage wa kiruka wixapirana wenekyapgi ga wa wmagatyage wa gixa koxa yonpiranyegityapwu? ² Gixni wa tokanchi yonatkaluru wixaya. Wajiya yonatikalungi. Gixni wa gimatkalurungi ga wa getyongatkalurungi pejinuruneko yineya. ³ Getkalurungi Kristo kirukate gixinri, wixaya kamrutkaluru. Gi wa ksajgalu yonatika, seyni Giwekikaluru Goyakalunu giwekachri yonatika. Gi wa sotluspata yonatka, seyni yonatkalurumta kagiturumta gajiya.

Gerotu gipiratkaluru kamrurewatyachine

⁴ Wane wixa gaponshinikanretlu Goyakalu Kristo chinanu. ⁵ Gi wa wixnanuko poyagotyachinwu, wkagwakyalu wixnanuko giyakatyachri pagixanu, seyni Goyakalu ruyakaty wpoyagotinri. ⁶ Wale poyagotyachine rixkakwu, gerotu gipiratkaluruya kamruklerune wixinripa, gi wa yonatkaluruya seyni Giwekikaluruya. Gi rixanu wa yonchi giylalewata, seyni wa Giwekikaluru giweekaklewata.

Wanepnute kiglepotlu wa Giwekikaluru kamrurewyeglu

⁷ Ga wa gipnalu kamrurewyeglu sotlu susawjeyongatkaluru pogirelwu rixapa. Wa wane rixa Gisrayilineklopishane gi gimkata getlepotutlu Moysisgoji, gigoji pogirewle chinanu, wa nikawnachripa pogirelwu. ⁸ ¿Gi ge wanepnute pogirewlupni wa Giwekikaluru kamrurewyeglu? ⁹ Gi rixanu giklukanuwnayegjixlu kamrurewyeglu pogirelwu rixkamka, wanepnute galikakni pogirelwu rixpotuta poyagkaklewlu kamrurewyeglu. ¹⁰ Gi rixanu wa kapokotu pogirewlunanupiranaya gi wa pogirelwu pixka rixatka wa tsru potu pogirelwu chinanutka. ¹¹ Gi rixanu wa kpogirewle rixini wa nikawnananumtachri kapokotkaka, pnute kpogirewle potu rixa wa gwag-ognenatachripatka.

Ginakaka rawa Giwekikaluru Gitsrukaachinu waneru gishpaklu

¹² Giyagni tye pixkalutu wkagwakini, pgujetanuwaka wchina yanumsaleta. ¹³ Gi wa Moysisi pixka wixa. Rushyagojresama gigoji rutaka wa Gisrayilini ma metgojityanpotuplu wa nikawnananumtachri pogirewle. ¹⁴ Seyni shikowanshinikanutna wanna. Gi rixanu xanigognenanu wa kapokotu gipiratkaluru getyongatkoklunu, waleko gishyagojrusama wane mkonkotu. Walenwa Kristo chinanu konkalurni. ¹⁵ Seyni xanigognenanu wa Moysisi tokanu getyongatkoklunu wa gishyagojrusama rajna rawawa. ¹⁶ Ga wa xani Gisrayiline satokyegitiniplu Gitsrukaachi, konkalurupni wa gishyagojru sama. ¹⁷ Ga wa Gitsrukaachi Walenwa Giwekikaluru. Ginakaka rawa Giwekikaluru Gitsrukaachinu waneru gishpaklu. ¹⁸ Pejnurunekwu wixa wa mushyagojkitkanwu wetlu Gitsrukaachi goyaknu. Ganigapi pixka wixa getletyalu. Kashrijetananumtkalunwu

Waleko yaglu wixinri pogirewlu kakananumnu. Waneko pixka wixka wa Giwekikaluru chinanu Gitsrukaachinu.

4

Kiglerpotunanan Tokanchi pokamiale

¹ Giyagni waneywu wchinini tye kamruchi, wane wixa getwamonutkota, gi wugroka. ² Seyni wuknokatkalu patmenutlewatachri yogimatkaluru. Gi wa yokwiri wixjeta. Gi wa wyapjetlu Goyakalu tokanu. Seyni galikakpotunanan tokanchi wupgujetini, kiglepiranyegirunwu wixnawa pejnuruneko yinenshinikanuya Goyakalu getanu. ³ Wa kiglerpotunanan Tokanchi wunkakletanru yogimatkaluru rixkamka, wa gamgachine chinanu galikakni yogimatkalurni. ⁴ Wannani tyegogne goyakalute maygalen-shinikanune rixkakanna wa malixkanena, ma matajiwnayegityapna Kiglerpotunanan Tokanchi, Kristo goyaknupirana pokamiale. Walenwa Goyakalu yaglu. ⁵ Gi rixanu gi wa wixnanuko ginkakletnawa, seyni Kristo Geso Gitsrukaachi rixinri wunkakleta ga wa wixni wa gixa wayegrenwu Geso chinanu. ⁶ Gi rixanu Goyakalu wa wane chinachri, “Pokamlalu mapshagawaka gatajawnini,” Walenwa gatajitolu waji, pokamlawyegityapwu rumatikolu Goyakalu goyaknu wa Kristogojiya.

Kajpa kamrutikolu pixka wixmaneta

⁷ Ga wa tye ponikolewlu waneywu kajpa kamrutikolustonoya, Goyakalunupni wa tsru potu guyaku giglenu, gi wa wixanni. ⁸ Pejnuruko salewakchi weta, seyni gi wa gerutkalunwu. Mumatanshnikanutkanwu seyni gi wa mkagwaakanwu. ⁹ Kojwaakalunwu, seyni gi wa giknockalunwu. Yotkaakalunwu seyni gi wa gamgachinwu. ¹⁰ Psolgogneko wumane wanikananumtyalu Geso gipnale, wa Geso giwekle koxa wumaneya gipgujetkalurupni. ¹¹ Gi rixanu wa wixa giwekachinwu samyokgognenatkalunwu gipnalu yegi Geso chinanu, Geso giwekle koxa gipgujetkalurupni wumane gipnachriya. ¹² Giyagni wixa giylakananumtkalunwu, ga wa gixa giwekakananumtkalungi.

Tsru pogirewlu potu

¹³ Wane chinyongatyawaka:
Nalixa. Giyagni nyansata.

Waneko pixka wixanshnikanuta. Wixa koxa galixa. Giyagni koxa wyanumsata. ¹⁴ Wumatlu wa Gitsrukaachi Geso yotunkakachri, wixa koxa yotunkakanu Gesoyma. Gixayma tunwakakanwu. ¹⁵ Gi rixanu pejnurkakako gixa chinanni, ruxolewinrinripa gimutlewlu gixolune chinanu, wa poyagnutlewlu koxa gixolewinrinripa, gimalwutkaluru rixinripa Goyakalu.

¹⁶ Giyagni gi wa wugroka. Seynimka wumane waalinanumtyamka, seyni wutokote gajeru werotewanumtya pagognemnunanuka. ¹⁷ Gi rixanu tye salewakchikaka wa xani wsalewinri myapretni. Pshinitsonu gwachrini. Xani giknogachripni. Ga wa wale chinanu waneyapwu tsru pogirewlu kiglerpotunanan gike rixiniko mnikawnakatupa. ¹⁸ Gi wa wyopukgajetlu wa getkalurkaka, seyni metkotkaka galikaka wyopukgata. Gi rixanu wa getkalurkaka pshinitsonu gwachrini. Seyni wa metkotkaka gike rixiniko mnikawnakatupni.

5

Panchi myochi mkamrutikotu

¹ Gi rixanu wumathlu wa wumane tyechijne gajeru, gawyawaka, gimatechri pixka rixa. Nikawnachripni. Giyagni wa nikawnini, waneywu wa Goyakalu kamrupjitanru. Gi wa myochi kamrutikalurni, gike rixiniko mnikawnakatupa tengogne gajerupji, wumanepa. ² Gi rixanu wa tye gawini wochgita. Walukpotutlu wyoshmakikolu tengogne gajeru gawyawakapa. ³ Galikakni wumane gerotu wyoshmaako Gerotu wumkalu ga wa gerotu gawyawakapji pixka rixanu. Waneklu gi wa wetko mamkane wixinri. ⁴ Gi rixanu gimajechri gwachine wixinri, wochgita. Kyapregolunwu. Gi rixanu gi waluka komkagkota, seyni gemkatkalunepwu wa wuweklepa nikatyaplu tye gipnachripa wumane. ⁵ Goyakalni wa wane gixwu wa tye ko chinanupa. Wa Giwekkaluru genekikolupa psojite renekagnaputwu Wale.

Kristo gitakyagoklewayawaka

⁶ Giyagni kiglenshnikangognenanwu. Wumathlu wa manchi gawanta-tiniwa, Gitsrukaachyegiya wamganatywa. ⁷ Gi rixanu walixpiranatanrukaka wuyanini. Gi wa wetanrukaka wuyanini ⁸ Kiglenshnikikanwu. Ga wa kigle getle wixlu galikakni wumane wamginripa, ga wa Gitsrukaachi yegi gawinripa. ⁹ Giyagni wane wixa muchkotletinwa, waka gewi gawinipa waka wamginipa, wuglenshnikananutyaplu. ¹⁰ Gi rixanu wumkata pejnurunekwu wixa gipgujewnaletanu Kristo gitakyagoklewayawaka, wa satkaka yoptotyaplu wa giman gixjetyawaka, waka kigleru waka mugletu.

Kristo gishiniklewe gerutwu

¹¹ Wumatkalchinanru Gitsrukaachi pikikolu, wushinikanutna yine. Pguperunwu Goyakalu getanu. Nkagwaakoxlu gixa getanu koxa pguperunwu gimata getanshnikanretyaplu. ¹² Gi wa wixnanuko kiglepirana yegi wchinyegitnatnakwa. Seyni shinikanchi nenekgi ntserpiranyegityaplu wannayegiya, goschiya tserpiranyegitachine, gi wa gaschiya. ¹³ Gi rixanu wseprolokini walenwa Goyakalu chinanu. Ga wa kanshnikanurunwu wixini walenwa gixa chinanu. ¹⁴ Gi rixanu Kristo gishiniklewe gerutwu. Wane wixa gishinikanuwleta, wa satupje gipnini pejnuruneko chinanu, waneklu pejnuruneko gipnanatka. ¹⁵ Kristo gipnana pejnuruneko chinanu, wa giwekachine gi wannako chinanu ruwekinripatkana, seyni Kristo chinanu ruwekanutkana. Walenwa wanna chinanu gipnachri ga wa wanna chinanu yotunotachri.

Wkamrure gipoyikgayeglewluya

¹⁶ Giyagni xaniyakawa gikena wumata wixa giman gixyawaka. Wa Kristomka wumata giman gixyawaka, seyni wa xani gi wane wixa gimatletanutkalu. ¹⁷ Giyagni wa Kristo gwachritka, walenwa gerotu giyakotkalurutka. Ruknogashamtatka kapokotu. Giyagni gerotutkani. ¹⁸ Ga wa pejnuruko Goyakalu giyakatyachrini. Walenwa gipoyikgayegittakawu Waleyegiko Kristo chinanu. Wale genekwu wkamrure gipoyikgayeglewluya. ¹⁹ Wane rixa, wa Kristo rawa Goyakalu. Psolchijne gajeneko rupoyikgayegitinri Waleyegiko. Gi rutakyegetna mukochirna. Wixa yegi rutaklu tokanchi gipoyikgayeglewlupiranu. ²⁰ Giyagni Kristo gitakanunwu. Waneko pixka wixa wa Goyakalu gagityagi wixaya. Kristo chinanu wagjiti, Goyakalu yegi gipoyikgayegitikolupa gixa. ²¹ Wa Kristo mukochri mmattaku wixa chinanu mukochri rixka, wa wixa Goyakalu poyagkaklewle wixikolupa Waleya.

¹ Rukamrurewatanune wixini, wagjiti wa Goyakalu gimutlewle gi wa maleshawaka yoptotikolupa gixaya. ² Gi rixanu wane china:

Gogi galuukaluru nyijnakotyi.

Gognewatikalurgogne, nupxakyi.

Giyagni xawaknina gogi galuukaluru. Xawaknina gognewatikalurgogne.

³ Gi satuna wutspekaka, ma muklukikotupa wkamrure. ⁴ Seyni pejnuruyako kiglepiranyegirunwu wekagkitawa Goyakalu kamrurewyegitachine wixinri, kashnantakgognenatachinpotwu salewakchiya, wmagatinriya, kachinolkakaya. ⁵ Giylakluya, yoshmakikowakaykaka, yawroptajruya, kamrurewputluya, kojipgewluya, nachlukakaya.

⁶ Kiglepiranyegirunwu powrawlu chinanu, gimatkalelwu koxa, mapognanrewlu, getwamonrewlu, Giwekkaluru Kpashiri, gishiniklewlu mixashatku, ⁷ galikakpotunaru tokanchi; Goyakalu giyaklewle koxa chinanu; poyagkaklewlu giylalewapre chinanu wpotuklesretateya ga wa wkegnetesretateya. Kashnantakgognenatachinpotwu, ⁸ gimalwuru chinanu ga wa mkagwakpiiru chinanu, gektupiranyeglu chinanu ga wa kiglepiranyeglu chinanu. Ksanowaklerune pixkalunwu ga wa galikakanwu; ⁹ mumatkone pixkalunwu ga wa gimatkalunpotwu; wupnakastsikakni ga wa getanu giwekachinwu, saletkalune pixkalunwu ga wa muylatkonwu. ¹⁰ Wamonuwatachine pixkalunwu ga wa gimuwgognenatachinwu. Kwamonurune pixkalunwu ga wa gixolune wponikowkaka. Wa maleshayalune pixkalunwu, ga wa pejnurukakako wane wixleta.

¹¹ Wunkakpotutgi gixa, Korinto gajengi. Tsru gishiniklewlu wixgi. ¹² Gi wa wixa chipetgajityagi, seyni gixako chipetanshinikangajitwu. ¹³ Gapnu gishinikletanno gixa koxa. Mpogwakatanno. Nwugenene pixka nixa yanumsayegletgi.

Wixni wa kpashiwaka potu giwekachri Goyakalununwu

¹⁴ Wa gixa pixka mixkane, gi wa satupje gitjipijeya gimutjitanna, wa malixkane. Gi rixanu ¿klu gipxaletlewlu wane wa poyagkaklu ga wa mpoyagkaknuchi? ¿Klu gimatkaklewlu waneylu pokamlalu ga wa mapshagal? ¹⁵ ¿Klu pixkakaklu getle rixna Kristoyma Weriya, wa Satanasyo? ¿Klu waneylu wa galixachriyma wa malixkatu? ¹⁶ ¿Klu gipxaletkaklu wane kpashiwaka potu Goyakalunu ga wa yagluchisha? Gi rixanu gixni wa kpashiwaka potu giwekachri Goyakalunu. Goyakalu chinyawaka:

Wanna gitokote nwanu nyananu.

Royakalutepnona.

Wannapni wa nayinerutene.

¹⁷ *Giyagni, "Wannayegiya gishpakanu.*

Gkotnukinwa."

Wane china Gitsrukaachi:

"Gi wa gkanrukanru wa kapcholu

ga wa kigle yoptole nixangi."

¹⁸ *"Gixa Girupno.*

Gixapni wa nwugenene ga wa nwugenerone."

Wane china Gitsrukaachi,

pejnuruko Girukotachri.

7

¹ Nushinikanune, tye gipiratkakurukaka waneywu wixiniyakawa. Giyagni wpowratinwa ptowruyako wpuchotmanetjeru ga wa wunshinikanu pu-chotachri. Goyakalu wpikinri, kpashirine potu wixinripa.

Pawlo gishinikyawakna Korintyone

² Mpogwakatanwu. Gi satuna wyeneta. Gi satuna wumtuka. Gi satuna wumkapnugya. ³ Gi wane nchnina nuklukyapgi. Gi rixanu muchikawa wane nchinatka, wushinikgognenatgi. Gixaymananuko wupnanmaka ga wa wuwekgognenatanmaka. ⁴ Pgujetanwaka potu nchnina yanumsayegletgi. Ntsiperanawyempotutgi. Numnanukpotutka. Tsru potu gimuwlu wixa psoluyako wsalewinnri.

Rumuwata wanna genshinikanrewle chinanu

⁵ Gi rixanu wa Masetoni wapokinitka gi wapnanmanpotuta waneya. Seyni psoluyako wsaletika. Ruwaka waneru yagotkaklukaka. Wutokote waneru piklukaka. ⁶ Seyni wa Goyakalu wa mturu gitaknachinwa giminanukachri, Tito gapokle chinanu rumnanukwu. ⁷ Gi wa rapokinri chinanupjeni, seyni koxa wa gimnanuklu chinanu wa gixa giminanukyalu. Runkakwu tsru gogalukle gixinri, ga wa gichingajiya, ga wa muchkopiranawatachingi gitaya. Giyagni galikaka numuwatatkta.

⁸ Wa kirukaya nwamontakingi, gi nenshinikanuta. Nenshinikanutmaka. Netlo wa twuko kiruka pshinitsonuji wamontakgi. ⁹ Xawakni numuwatatkta, gi wa gwamontakikolu chinanu, seyni gi rixanu genshinikanutinripa gwamontakikolu. Gi rixanu Goyakalu chinanu gwamonuwata. Giyagni giketsotaji gimgtukika wixaya. ¹⁰ Gi rixanu wa wamonchi Goyakalu chinanu genshirukanrewlu gognewatikaluru chinanupa. Gi wa renshinikanye-gitikolupa. Ga wa wamonchi tyegogne chinanu gipnalu kamruta. ¹¹ Gi rixanu tye wamonchiko Goyakalu chinanu, iji pa muchkonunshinikanunanru rixgi! Ga wa giykoyeglewluko, ga wa jgekanchiko, ga wa pikluko, ga wa gogaluklewluko, ga wa muchkopiranawluko, ga wa gapnuruko. Psoluyako gekakgitnawa powratkalunetkagi wane gixkaluruya. ¹² Giyagni wa nyonye-gitingi, gi wa yenetlewatachri chinanu, gi koxa wa yenetkaluru chinanu. Seyni pgije rixinripa gmuchkonunshinikanu wa wixa chinanu Goyakalu getanu.

Rumuwata Tito gimuwle chinanu

¹³ Giyagni giminanuukalunetkawu. Ga wa wumnanukikolu pnu te wumwpututa wa Tito gimuwle chinanu. Gi rixanu rapnanunshinikanuta pejnurunekgi gixa chinanu. ¹⁴ Giyagni wa wale yegi ntserpiranawyegitingi gi wa nupafewatu. Seyni wane wixa ginkakjerezgi pejnuruko galikaka, waneko pixka wixa tserpiranawyegletyagi Titoyegiya. Galikaka rixka. ¹⁵ Pnu te rixa gishiniklepotutgi wa gyijnaklewle rushinkapini, wa mpikle gitatleya gyroptotlu. ¹⁶ Numuwata wa psolotuyako naponshinikanyeigitgi.

8*Masetonisreta gapatjetachinkakniwa pimrine yimanrupa*

¹ Giyagni, wumolene, wunkakgi Goyakalu gimatlepirana, Masetonisreta gajene gapatjetachinkaka geneekaluru. ² Wa tsru salewakchi yantaletikna, tsru gimuwlu rixinrina ga wa wanna tsru wamonnupogaya, ponikowpotutya renekashlewatirrina. ³ Gita gippguitatlu wa rumkatyawakna, ga wa rumkatyawakna pnu te, renekashlewatna wannako ginshinikanuyna. ⁴ Gixo ragijipotutwuna wuchichyapna wanna

koxa wa kpashirine psoji rupxakinripna. ⁵ Gi wa wkagwakyawaka pixka rixna, seyni muchinanu gapka wannako reneknawana Gitsrukaachinupna. Ga wa wixa koxa, reneknawana Goyakalu gishinikyawaka. ⁶ Giyagni Tito wagjita wa gi rixanu walenwa muchichachri, waneko pixka rixa poyagkaklejixyapgi tye kamrurchiko gimutlewluya. ⁷ Seyni psolpotuyako wane gixa kosekleta galixleya, ga wa tokanchiya, ga wa gimatkalewleya, ga wa gmuchkopiranawleya, ga wa gishiniklewleya wixa chinanu. Giyagni tye gimutlewluya koxa gkosekini.

Pawlo giykotna Korintyone wa waneyna rixyawakna wane rixa genekeleshatanna

⁸ Gi wane nchina towutletgi, seyni pimrine muchkopiranawleya, nutakyagookaklu gixa gishiniklewle gikta galikakni. ⁹ Gi rixanu gixa gimatlu Wutsrukate Geso Kristo gimutlewlle, wa ponikolu rixanatini, seyni gixa chinanu kwamonuru rixatka wa gixa ponikowatinripa Wale wamonnupoga chinanu.

¹⁰ Gita gishinikanru tyepirana nunkakangi. Gi rixanu tye gipxakangi. Gi rixanu gixa gapka muchinanu satu walaputkani gi wa gyinuwaka kamruretyapjeru, seyni galuukoxlu. ¹¹ Giyagni xani mpoyagkakanru gkamrutanru. Wane gixa jmererungi gishinikyalu, waneko pixka gixanu mpoyagkakyaplu wa waneygi gixyawaka. ¹² Gi rixanu wa muchinanu gapka jmererungi gixini, wane rixa yoptotkaluru wa waneygi gixyawaka, gi wa waneygi migje pixka.

¹³ Gi wa pimrine gapnanutinripni ga wa gixa salewninripa seyni pixkakakane gixinripa. ¹⁴ Wa tyegogne gixa gixetanru gipxakinna magatinriyna. Wa wanna gixetinri gixa magatinri rupxakingina. Pixkakakane gixinripa. ¹⁵ Wane chinyongatyawaka:

*Wa gixo gwachri gi wa ruxetya,
ga wa ptsotsotaji gwachri
gi wa magatya.*

Pawlo yokanatanune kamruchi chinanu

¹⁶ Poyagnutkaluru Goyakalu. Wale gitakgajitlu Tito, waneko pixka rixa muchkopiranawayegleyapgi. ¹⁷ Gi rixanu galikakni Tito yijnakotwu wagjityal gixa yegi yinripa. Ga wa wanepnute muchkopiranawpotuta waleko ginshinikanuaya yayegitgi. ¹⁸ Waleyma wyokanatalu wumole, kiglepiranyeegiru Kiglerpotunaru Tokanchi chinanu, pejnuruneko gapatjetachinyegkaka. ¹⁹ Gi wa wanepiranapjeni, seyni koxa wa gapatjetachinkaka tsomitlu wa rupxaletgapotyapwu wa tye genekashlu gimutlewluya chinanu. Wenekashatlu rumalwutikolupa Gitsrukaachi, ga wa gi rixanu waluka genekashletlu. ²⁰ Wgirukotinwa gi satuna jigyegityapwu wupxaklewatinri tye genekashluya. ²¹ Gi rixanu walpokotlu kigleru gi wa Gitsrukaachi getanupje seyni koxa yine getanu.

²² Giyagni wannayma wyokanatalu wumole. Gixopirana ga wa gixo kata wetanshinikanutlu jmereru potu rixinri. Ga wa xani wanepnute jmereru potu rixa gi rixanu gixo raponshinikanyempotutgi. ²³ Waka Titopirana wumatanrupotni ga wa wukamrurewatanru gixyegiya, waka wumolenepirana gapatjetachinyegkaka yokanatkalune, wa Kristo gimalwutikolupa. ²⁴ Giyagni gekakgitanna gapatjetachinkaka gi gixpoko gishiniklewleta, ga wa klu chinanu gixapirana wtserpiranawatinri wannayegiya.

9*Kpashirine gipxakikolu*

¹ Giyagni wa kpashirine gipxakikolupirana galikaka gi magata nyonyegityagi. ² Gi rixanu numatlu gixa mernu. Wa tye nutserpiranawatgi Masetoni gajeneyegiya, wa Gakayi gajene satu walaputkani ralpokotinriyna. Ga wa gixa muchkopiranawle komyeckanshikanutna gixo. ³ Giyagni nyokanatna wumolene wa maleshawaka ma mixinitipa wtserpiranawyegityagi tyepiranaya, wa wchinyawaka galpokotachine gixinripa. ⁴ Wa gitayma rapokinipna Masetoni gajene, wa wanna ma metyanupgi malpokotkanuwagi, wma patewatinitipa wa waponshinikanrewpotutinri, gixaya wane nma chininitipa. ⁵ Giyagni gita kagwaklu galuuikalurni nagjityapna wumolene wa muchinanu gapka gixa yegi yinripna ralpokognapjixyapluna genekashle wa gipiratanru, galpokotkalurpatkani giglenshinikanyegitkaluru pixka rixinripa, gi wa sotanugnuchi pixka rixinripa.

Goyakalu gishiniklu geneklewatachri gimuwatachri

⁶ Seyni tyepirana. Wa ptsotsotaji gitakajitachri ptsotsotaji koxa jirga. Ga wa ruglenshnikanyegitikolupa gitakachri, ruglenshnikanyegitikolu koxa jirga. ⁷ Satkaka raji rushinikywaka geneklewatanu. Gi wa wamonuwat-achri. Gi koxa rerutko. Gi rixanu Goyakalu gishiniklu geneklewatachri gimuwatachri. ⁸ Goyakalu gimkatachhrini ruxolewnakakyaplu psoluko gimutlelu gimatkalunepgi. Wane rixa psolgogneko psolpotuyako pejnurkakayako mmagatikanepgi, wa pejnuruko kigleru kamrurchi chinanu mponikowatinripa. ⁹ Wane chinyongatyawaka:

Poshalu genekashleyana kwamonurune.

Poyagkaklewle wane rixgognenata.

¹⁰ Goyakalu, wa gitakachri genekajitachri, ga wa nikachri geneke niklere-watachri, Walenwa genekpotutanru gixa gitakle ga wa ruxolewnakananru. Wale tseruwnakakanru wa mpoyagkaklewleya wane gixikolupa. ¹¹ Wa pejnuruyako mponikowkaakikolupa psoluyako genekashlewpotutinripa. Wane gixikolu gixa, wa wixaya Goyakalu poyagnutikolupa.

¹² Giyagni wa tye kamrurchi gipxaklewlui chinanu, gi wa kpashirine magatinripjeni poyagotini, seyni tseruwninrikoxapa gixolune poyagnure, wa Goyakalu poyagnutinripna. ¹³ Gixa genekashle chinanu pimrime gimatangi Goyakalu yijnakotachingi. Gixa chinanu rumalwutanruna Goyakalu. Gi rixanu gixa yijnakotu Kiglerpotunanu Tokanchi Kristopirana wa gipgujtatanru, ga wa machipengi gitaklu genekashlukaka wannanupa ga wa pejnurunenupa. ¹⁴ Ga wa gixa ragjigogneyegitinrina gogalklewlui rixyegingina, gi rixanu gimuwatachinpotgi rixkakgi Goyakalu. ¹⁵ Poyagnutkalurni Goyakalu renekashleya, mumkata chinkotni renekashle.

10*Giylapi wuylalewatinri*

¹ Gitakni Pawlo gagjitgi, Kristo mayognuteya ga wa shinikannuya. Wa gixastsi galikakni giyagolutno. Seyni pnu nwini ntseruwanshnikanyegitgi. ² Giyagni nagjitgi wa napokinipa gi wa tseruwanshikanutachri nixkaako, wa pimrime yegi pixka nkagwaka tseruwanshnikanreta. Wannanwa wkagwakjene wa manchi pixka gixjetachinwu. ³ Gi rixanu wa manchi wixanatini, gi wa manchi galukyawaka wyagotlewaty. ⁴ Gi rixanu giylapi wuylalewatinri gi wa manchinu, seyni gichkolu Goyakalu chinanu yawnakakikolupa

tsru prijeru. Wnikatlu shinikanchi galikaka migje. ⁵ Wnikatkoxlu pejnuruko tsru potu gixachri wa tsru rutaknawa kamnixyaplu Goyakalu gimatikolu. Waalixlu pejnuruko shinikanchi galikaka migje Kristo yij-nakotikolupa. ⁶ Ga wa galpokotachinepwu wapnutyaplu pejnuruko myij-naknuchi wa gyijnakotinri mpoyagkakinripatka.

Pawlo gitakikolu

⁷ Gista gwachripje getanu. Wa satu gaponshinikanyegitnawa Kristonu rix-inri, tye koxa yanshinikanutnatnakwa, wa Kristonu rixinri wale, waneko pixka wixa koxa wixa. ⁸ Gi rixanu gimka pnu nixa gitserpiranawletlu wutakikolu, wa Gitsrukaachi gitakyawu wa gixa tseruwakanshinikanutikolu, gi wa gnikitikolupa. Gi wa npatewkaako gita. ⁹ Nma kagwakikotupa wa npuiikakyapmakgi kirukaya. ¹⁰ Gi rixanu wane chinna, “Kirukatkaka galikakni kyapreru ga wa gichkolu, seyni gimane gewi rixini muchkotu, ga wa tokanu geyikalurkakni.”

¹¹ Tye yanshinikanutanna wane gixachine: Wa wchinatokanutyawaka kirukaka wane wmaawakuwa, waneko pixka wixa kamrurewletanu wane wapokinipa. ¹² Gi rixanu gi wtseruwanshikanuta wixnanuko wkagwak-nawa wannayma wixinri. Gi koxa wumata getletinwa gikta wanna pixka wixinri, wa pimrine kiglepiranyegirune chinnachinwa. Seyni wanna wan-nakluko yantaletkakna ga wa rumata getlekakna gikta pixkakakane. Gi wa rumata jemna.

Girukta tserpiranawata, Gitsrukaachi rutserpiranawatanu

¹³ Wixa gi wa myagotu wtserpiranawatya, seyni wanepotuko wa wutakikowaka yaglu, wa Goyakalu gitakyaglutyawakwu, wa gixyempotuko wapokinripa. ¹⁴ Gi rixanu gi wa gotsgachinetkawu wma mapkapyapgi pixka, gi rixanu gixyempotuko wapkapa Kiglerpotunanan Tokanchi chinanu Kristopirana. ¹⁵ Gi wa myagotu wtserpiranawatya wa pimrine yaprewatinri chinanu. Seyni wkagwaklu wa gixa galixe tseruwninripatka, gixa yegi wtseruwnakakiko wutakikowakpotuko, ruxolewninripa wkamrure, ¹⁶ gixa tukasretkaka potu runkakletikolupa Kiglerpotunanan Tokanchi. Gi wa pim-rine gitakikowaka galpokotkalurutka wtserpiranawatinripa. ¹⁷ *Girukta tserpiranawata, Gitsrukaachi rutserpiranawatanu.* ¹⁸ Gi rixanu wa kiglepiranyegiru chinnachriwa, gi wa walenwa kigle getle gixkaluru, seyni wa Gitsrukaachi chinyegitanru kiglepiranyegiru.

11

Goyakalu giyakatyachri gokowlu

¹ Nalukmaku gixa kashnantakyano ptsotsotaji mshinikanutu nixinri. Galikakni gkashnantakanno. ² Gi rixanu ngokowyegitgi. Goyakalu giyakatyachri gokowlu nixyegitgi. Gi rixanu nupiratyagi satu jeji gnurutjixletgi sato makloji kpashiro pixka. Kristo nenekangi. ³ Seyni npikyegitgi wa gyokwitikolupa. Npiklu wa gimnu yokwitanro Gewni ruglenu tokanuya, waneko pixka gixa gimtuklenshikanutkomka. Npiklu gma yokwirnuya ga wa mpashirnuya gimtuuko Kristo giyakatyachri ma yokwirnu ga wa pashirnu. ⁴ Gi rixanu satu yineru gegapoklu ginkakletmaklu satu Geso wixa munkakletanu, ga wa gyoptotmaklu satu giwekikaluru wa gma yoptotanu, ga wa gyoptotmaklu satu kiglerpotunanan tokanchi gma yoptotanu, kigle kashnantakle gixmaklu. ⁵ Gi rixanu nkagwaklu gi wa wanna potu yokanatkalune giyagolutno gita. ⁶ Gimka masrugatokanuwnaletkatno,

seyni gi wa masruukotno gimatkalelwuya. Seyni psoluyako gipgujewnach-inwu gixyegiya pejnurukopirana.

Pawlo gi galuka kojwakletna Korintyone

⁷ ¿Nmukochirewatge wa gitnanuko mturu gitaknawa wa gixa tsrune potu gixinripa? Gi rixanu gixa yegi mwenutu nunkakletlu Kiglerpotununu Tokanchi Goyakalupirana. ⁸ Pimrine gapatjetachinkaka nchowgutyana. Wanna nyoptowenutya wa gixa yegi nkamrurewatinripa. ⁹ Wa gixa yegi napokinitka wa nmagatinina, gi satuna nayapretaa kaka. Gi rixanu wa wumolene Masetoni giyakatyachine getlu nmagatinri. Psoluyako ngirukot-nawa mkojwaakatno nixinripa, ga wa ngirukotinwa. ¹⁰ Tyenwa Kristo galikakate gitaya, wa tye ntserpiranawle gi wa Gakayisretatkakaya numaletiko. ¹¹ ¿Klu chinanu? ¿Gi rixanu gi nushinikgige? Goyakalu gimata wa nushinikyagi.

Yokanatkalune gixashatachine

¹² Seyni wane nixa, ga wa wane nixanu wa nsustakyaplu ruglepoktapi-riyna wa ruglepoktapinri galukachine tserpiranawatinripna wixa pixka gixachine retikolupmakna.

¹³ Gi rixanu wane gixachinni wa yokanatkalune gixashatachine, gixasha kamruretachine. Kristo yokanatanune pixkalune kogetkogna. ¹⁴ Gi wa koglajruni. Gi rixanu Satanasyoko satu Goyakalutowreru pokamlatachri kogetkogna. ¹⁵ Giyagni gi wa tsruni wa koglajru wa waletowrerune kogetkogna kamrurewaklerune poyagkakachine. Yoptukyawakapna kam-rurna pixkapotuko rixanu.

Pawlo salewnale yokanatkaluru rixinri

¹⁶ Wane nchinatnaka, gi satuna kagwakanno mshinikanutu nixinri. Seyni wane gixinipa, mshinikanutu pixka gixa yoptoletanno, ptsotsotaji ntserpiranawatinripa. ¹⁷ Wa nchinyawaka gi wa Gitsrukaachi chinyawaka pixka nixa, seyni mshinikanutu pixka, tye gaponshinikanrewluya ntserpiranawatinri. ¹⁸ Gi gepika tserpiranawata manchi gixyawaka. Giyagni gita koxa tserpiranawata. ¹⁹ Gi rixanu galuka kashnantakletna mshinikanune gi rixanu gixa kanshinikanurungi. ²⁰ Gi rixanu gixa kashnantaklu wa satu wayegretinipgi, ga wa satu nikatinipgi, ga wa satu kashichinipgi, ga wa satu tsru rutakinwa, ga wa satu giylakgojinipgi. ²¹ Mkagwakpiiru pixka nchinpiranana, wa wane wixa gigrokletmaka.

Klunerukokta tseruwanshikanuta satu, gita koxa tseruwanshikanutu. Mshinikanuchi pixka nchina. ²² ¿Gewreyonrege? Gewreykoxno gita. ¿Gisrayilitanrege? Gisrayilitkoxno gita. ¿Gawraklopishanrege? Gita koxa Gawraklopisha. ²³ ¿Kristo kamrurewyegitachinrege? Seprolu nchina. Pnuto nixa yaprewlepotuta. Gixa kata wanna pnute nyoshmaaka. Tsrupotu giylaklukaka nixka. Gixo kata gipukchiyegno. ²⁴ Goteyoneya pamyo kata nkochipjetka. Satupje magata gepkoxamkojmole katpotuko giylaklukaka. ²⁵ Mapa kata gagajeya nuylaaka. Pakatapje nsotlujetka. Mapa kata nupkata. Goyechno ga wa gogi tsru wenga nwa. ²⁶ Gixo kata potu yagaplu nixa, rapga yowiknuya, kachowgurune yowiknuya, nomolene yowiknuya, payineko yowiknuya, tsru pokchi yowiknuya, gike mwiyawakanu yowiknuya, tsru wenu yowiknuya, gixashatachine molchine yowiknuya. ²⁷ Tsru kamrurchipotuya, ga wa kyapreruya, ga wa gixo kata kojipgewluya, ga wa nachiya, ga wa gonunnagatewluya, ga wa gixo kata gogajirewluya, ga wa kachikleruya, ga wa magamkaluya. ²⁸ Ga wa pejnuruko pnuteya wa pagognemnunanuka

nutakikolu pejnuruneko gapatjetachinkaka ngirukotyapa. ²⁹ ¿Katu gigroka ga wa gi ge nugroka gita? ¿Katu gitspeekaaka, ga wa gita gi ge namewna?

Tamasko rasukya Pawlo

³⁰ Numkata tserpiranawletinipa, nugrokleya ntserpiranawatanu. ³¹ Goyakalu wa Gitsrukaachi Geso Kristo Giru gimalwugognenatkaluru gimatlú gi wa nayroklewata. ³² Tamasko gajene girukotachri Gareta solaloneyma giruktatlu Tamasko Pokchiya kashichyapno. ³³ Pokchi prijere mturu gipgyaptote kojitaya njirukika. Wannamyoya nasukya.

12

Pawlomane yoglotachri

¹ Numkata tserpiranawletini; galikakni gike gaprini. Kaygawlukaka ga wa gipgujetkalurkaka Gitsrukaachipirana gayanutnaka. ² Numatlu satu jeji Kristonu. Pamole gepkoxamkoje walaputkani gishatkakalurutkani. Mapa chiniri tengogne raniika walekta. Manchi rawinri gi numata ga wa manchi mwakatu gi numata. Goyakalu gimata. ³ Numatlu tye jejikta. Waka kamaneplu waka mamanetupni gi numata. Goyakalu gimatlú. ⁴ Rushatkapka. Gigletikowaka raniika. Yijnakotlu tokanchi mumkata chinkotu. Ginanshichkalurni wa yineru koschekyaplu. ⁵ Tyepiranakta nutserpiranawatanu, seyni gitnanuko gi nutserpiranatnawa, seyni nma muchkonkakapjeya nutserpiranatnawa. ⁶ Giyagni naluka tserpiranawletinipmaka gi wa mshinikanutupno, gi rixanu galikaka nchina. Ga wa nujretnawa gi wa satuna kagwakyapno wa retyano pnute ga wa jemyano pnute.

⁷ Ga wa gipgujetkalurkaka giglenu chinanu nma malixkotinipnawa, waleyma renekno yoglolewatachri nogitya. Walenwa Satanasyotowreru yotmutyapno nma malixkotinitipnawa. ⁸ Wale chinanu mapa kata nagitlu Gitsrukaachi gita yegi ruxrikakyaplu. ⁹ Ga wa Wale wane chinno, “Numelewle poyagotyayí, gi rixanu ma muchkonnuchi yegi psolutkani giyaklewlu.” Giyagni nugleretlu wa nma muchkonkakaya galikaka ntserpiranawatinri, Kristo giyakle gita yegi rawinripa. ¹⁰ Giyagni nugleretlu ma muchkonnuchkaka, gogimtuklukaka, ga wa magatikalurkaka, ga wa kojwawakchikaka, ga wa salewakchikaka potu Kristo chinanu. Gi rixanu muchkotu nixini, waneklu kgiyaklewaklerno.

Getkalurkaka yokanatkaluru kamrure

¹¹ Mshinikanututkano. Gixa gerutno. Gi rixanu gixa gimkata chinretma-kno kiglepiranyegiru. Gi rixanu gi wa wanna potu yokanatkalune giyagoltno gita, gike gapri mijemkano. ¹² Getkalurkaka yokanatkaluru kamrure galikakni gixa yegi kamrutika psoluko kashn tantakgogneruya: getkalurkaka ga wa koglajrukaka, ga wa giyaklewukaka. ¹³ Gi rixanu ¿kluneru gkaptotya gixa wa pimrine gapatjetachinkaka pnute? Seyni ¿gi ge tyepjeni gita gi wa gayapretaakakgi? Gkaspukinno tye mpoyagkaknuchi.

Pawlo giykoyegitlu rushinikanru

¹⁴ Nupruka mapa kata chiniri gixa yegi nyinripa. Gi wa nayapretaakak-lewatanu. Gi rixanu gi wa gixanu naluka seyni gixako naluka. Gi rixanu wa wgenchine gi wa rurunna chinanu rumkata gimretletra, seyni gircchine galikaka gimkata gimretleta wugenenna chinanu. ¹⁵ Giyagni nugleretlu nsafetyaplu wane nixle ga wa gitnanuko saletikolupa gixa giwekinri chinanu. Wa tsru potu gishiniklewlü nixingi ¿ptsotsotajrege nushiniiko? ¹⁶ Ga

wa wane rixin, gi wa nyaprewkakgi. Ga wa kgimatkaleru nixini, ḡnyok-wirege nkashichyagi? ¹⁷ ḡPatako satu nyokanyegityagi walerge naalikakyagi? ¹⁸ Nagjitlu Tito wa gixa yegi yinripa, ga wa waleyma nyokanatlu wumole. ḡPatako raalixgige Tito? ḡGi ge walerutu Giwekikaluru gayiya? ḡGi ge walerutugapo gaya?

Pawlo yanshinikanyegitna Korinto gajene

¹⁹ ḡMuchikawyakawlege gkagwaklu wixnanuko giykoyegitnawa gixyegiya? Gike, nalukanune; Kristoya nyanumsata ga wa Goyakalu getanu. Pejnuruko nkamruta gixa tseruwakanshikanutikolu chinanupa. ²⁰ Gi rixanu nkag-wakpirata wa wane nyinipa gi wa netangi wa nalukyawakgi, ga wa gita getko gixa malukyawakanu gixachripno. Gimka waneplu gejnugima, ganx-alu, gamewnalu, gimkapnuglu, gektutelu, gapatlu, galixkotnawlu, yawrolu. ²¹ Wa napokinpatnaka Noyakalute mturumka gitakanno gixyegiya, ga wa gimka nwamonuwnayegittanna gixolone muchikawa mukochirewatachine menshikanutkanewa mpowrannuchiya, ga wa gapoklewluya, ga wa mpogijpatnuchi wa wanna kamrutanru.

13

Kmukochirerune giykotka

¹ Tyenwa mapa kata chininri gixa yegi nyinripa. Gepi ga wa mapa giypguitatachinenamaya pejnuruko tokanchi poyegitkalurupni. ² Xani gepi kata chininri wa gixa yegi nwanatanu, muchinanu nunkakagnaputna wa muchikawa mukochirewatachine, ga wa pejnuruneko pimrine xani pnu nwini nunkakagnaputna wa numepe gapokletinpatnaka, gi wa netashlewatanu. ³ Gi rixanu gixa gjigalu rumatikolu wa gitnamaya yanumsatini Kristo. Wa Wale gi wa muchkotni gixatskalaya, seyni kgiyaklewaklerni gixatskalaya. ⁴ Gi rixanu koroshishkita rutaaka ma muchkonuya, seyni Goyakalu giyaklewle ruwekyra. Gi rixanu wixa koxa muchkonwu Waleya, seyni Waleyma wuwekanu Goyakalu giyakleya gixa chinanu.

Wetjetinwa wixnanuko

⁵ Getjetinwa gixnanuko gikta kalixaklerungi. Gimata getanshikanutinwa. ḡGi ge gimata gixa wa gixa rawinri wa Geso Kristo, galikakmigjengi gma mixinitipa? ⁶ Ga wa nkagwaklu gixa gimatanru wa wixa gi wa galikakamijenwu. ⁷ Goyakalu wagjita wa gike gektutu gkamrutanu gixa, gi wale chinanni wa wixa giypgujewinripa kiglepiranyegirunwu, seyni wa gixa kigleru gkamrutanripa galikakni, ga wa wixa gi wa galikakmigjene pixkalune wixinripa. ⁸ Gi rixanu gike wumkata kamrureta wa wkamnixyaplu galikakpotunanu tokanchi, seyni galikakpotunanu tokanchi chinanu wkamrurewatya. ⁹ Gi rixanu wumuwata wa wixa muchkonwu wixinri ga wa gixa gichkopa. Wa tye wagjita wa gixa mmagatikane gixinripa. ¹⁰ Giyagni pnu nwanatini tyepirankaka nyonata, wa napokinipa gi wa yigleko metkatupno wa Gitsrukaachi gitakyawakno, wa ntseruwakanshikanutikolupa gixa. Gi wa gnikatikolupa.

Ralipre giykoretna

¹¹ Wanepnute, nomolene, gimuwatanu. Mmagatikanepgi. Gyijnakotanru giykolu. Panshikanurunepgi. Kigle gwashlepgi. Gixa yegi rawinripa gishiniklewlua ga wa giglewanshikanrewlu Goyakalute.

¹² Galuuukakanu kpashiri gamluruya. Pejnuruneko kpashirine galukgi.

Giglenshinikanyeglelewlu

¹³⁻¹⁴Wa pejnurunekgi gixa yegi rawinripa Gitsrukaachi Geso Kristo gimut-lewle, ga wa Goyakalu gishinklelewle, ga wa Giwekikaluru Kpashiri gi-matkaklewle.

Kpashiri Pawlo Kirukate Kalatane Chinanu

Galuklewlu

¹ Pawlo kirukate, wa yokanatkalu, gi wa yineya gi koxa yineru chinanu, seyni Geso Kristo chinanu ga wa Goyakalu Girchi chinanu. Goyakalunwa Geso yotunkakjeru gipnachinetskalaya. ² Ga wa pejnuruneko moletkakachine wa gitaymalune kirukate. Kalasi gajene gapatjetachinkaka chinanupi.

³ Gimutkalunepgi. Gidlewanshinikankaakalunepgi Goyakalu Wuru chinanu ga wa Wutsrukate Geso Kristo chinanu. ⁴ Walenanuko geneknawa wmukochire chinanu, rushatkapyapwu tye mugletgogneya, Goyakalu Wuru gishinikyawaka. ⁵ Gimbalwugognenatkaluru rixgognenatinripa. Wane gixkalurupa.

Maleshu satu pnuko gixachri Kiglerpotunanu Tokanchi

⁶ Nuglajita tyeya wa giyampotu wane gixa gixrikeakaaka ntomga jeruyegiya, Kristo gimutlewleya ntomgajeru. Pnuko gixachri tokanchi, gi wa Kiglerpotunanu Tokanchiye gitkagi. ⁷ Walenwa gi wa pnuko gixachri. Seyni wanena pimrine gkojwakjenemka. Wanna galuka kashrijetletlu Kiglerpotunanu Tokanchi Kristopirana. ⁸ Seyni ginnakokta wixako ga wa tengogne giyakatyachriko towrechri ginkaklewyegitiniipmakgi satu Kiglerpotunanu Tokanchi wa wixa ginkakletanru pnuute, kamakpiratkalurunepni. ⁹ Wa muchikawa wchinayawaka, ga wa wane nchinatnaka, wa satu ginkaklewyegitiniipmakgi satu Kiglerpotunanu Tokanchi wa gyoptotanru pnuute, kamakpiratkalurupni.

¹⁰ Gi rixanu የxanigognenanu yinrege nushinikanuta waka Goyakalu? Waka የinrege naluka giglenshinikanreta? Yinemka nuglenshinikanutini, gi wa Kristo wayegererupmakno.

Kiglerpotunanu Tokanchi Pawlo ginkakletanru

¹¹ Gi rixanu nunkakgi, nomolene, wa Kiglerpotunanu Tokanchi wa nunkakletanru gita, gi wa yineru gishinikyawakni. ¹² Gi rixanu gi wa yineru nyoptotyalu. Gi koxa nunkaaka seyni gipgujetkalurni Geso Kristoya.

¹³ Gi rixanu gixa jemu gita gixjenatyawakpirana, wa Goteyone gixjetyawaka nixanatini. Wa tsru potu kojwaklu nixjenatna Goyakalu gapatjetanune. Numtukpotutna. ¹⁴ Wa Goteyone gixjetyawaka nkosekya gixo pnuute wa gita pixkalune nomolene. Muchkowanshinikanutachripotno nutrukateni giykole chinanu.

¹⁵ Wa nunronanwakayakawa ntsomitjeru, ga wa rumutlewleya ntomgajeru Goyakalu kigle getle rixlu ¹⁶ rekakgyiyaplu Gituru gitaya, wa nunkakletayaplu Kiglerpotunanu Tokanchi Walepirana payineyegiya. Waneklu gi wa nyayegitlu kamaneru ga wa kagragalu. ¹⁷ Gi wa Gerosaleko nkanika wanna yegi wa muchi yokanatkalu gitaya, seyni Garawichijne nya. Nsatoka. Tamasko nyatnaka.

Pawlo salwayegitlu Petro

¹⁸ Wanepnute, wa mapa walapu giknoginitka, Gerosale nkanika, Sotlu numatinripa. Pamole pamyogogne wale yegi nwa. ¹⁹ Ga wa pimrine yokanatkalu gi neta, seyni Santiyakopje wa Gitsrukaachi gepuru. ²⁰ Wa nyonatanru, Goyakalu getanu, gi nayroklewata.

²¹ Wanepnute Surisreta nya ga wa Surisisreta. ²² Mumatgojikotno Gote gapatjetyachinkaka yegi, wa Kristonune. ²³ Jempiranyegishatnona wane nchinikolu, "Wa muchikawa wkojwakjejenatjeru, xani runkakletlu Kiglerpotunanu Tokanchi galixlewlpiprana wa muchinanu rumtukpotunataanru." ²⁴ Ga wa gita chinanu rumalwtulna Goyakalu.

2

Pawlo ga wa Wirnawisi gapo nshinikanyegetkalune payine yegi yokanatkalune rixinripna

¹ Wanepnute, pamole gepkoxamkoje walapu giknoginitka, numepe Gerosale kanikletatnaka Wirnawisiyama. Naniikoxlu Tito rupxaletyapno. ² Wa nupgujetikowaka nkanika, wa payine yegi nunkakletanru Kiglerpotunanu Tokanchi, wanna mkoje nunkaka wa kigle getle gixkalune, gimka maleshawaka nkamrurewatintiri ga wa nkamrurewatintitka. ³ Seyni wa nupxalu Tito, Kriykomkani gi wa sajraka gistaakota wale. ⁴ Wa moletkakachine sanowashatachine chinanni yoshmaknachinwa pochkeruneko. Wanna jiglokyegitwu giruktatyapluna wushpakyawaka Kristo Geso chinanu, wayegretyapmawkuna. ⁵ Gi wa pshinitsoniji wuyagolewna wannaya wa wyijnakotyapna, gixa yegi rawgognenatinripa galikakpotunanu tokanchi wa Kiglerpotunanu Tokanchipirana.

⁶ Wanna kiglepiranyegirune kagwaakalune, gi pixkalunekokta rixna gike rixno (Gi wa manewle giglenu chinanu yoptotyaplu yineru wa Goyakalu), gi rixanu wanna kiglepiranyegirune kagwaakalune gike yognikyanona. ⁷ Seyni pnuko rixka. Wa retinitkanona gaponshinikanyegetkalurno wa Kiglerpotunanu Tokanchi nunkakyapna msajruka gistaakotkone, Petroko pixka runkakna sajraka gistaakotachine. ⁸ Gi rixanu Goyakalu wa Petroya kamrurewatyachri wa sajraka gistaakotachinyegiya wa yokanatkaluru rixinripa, Waleko gitkoxaya kamrurewatyawake chinanu. ⁹ Rumatluna wa gimatlewlw wa nenezikolu. Giyagni wanna Santiyako ga wa Sotlu ga wa Gwa, wa yoptowaka gajerustsigi pixkalunni kagwakikalune, romyokyegiwuna gita ga wa Wirnawisi potuklemyotna, wumatkaakalu chinanu. Wane rixna, wa payine yegi nyinipa gita, ga wa wanna sajraka gistaakotachine yegi yinripna. ¹⁰ Walepje wa kwamonurune rushinikjixwuna. Jmererunpotwu wkamrutyaplu waleko.

Gantiyokiya Pawlo ginkakyalu ruklukanuwninriya Petro

¹¹ Wa Sotlu Gantiyokiya yinitka gigojipotuko nsatkaklu gi rixanu ruklukanuwenna. ¹² Gi rixanu ma mapookanuwana Santiyako yegi giyakatyachine, wale payine gimnika. Wa rapokinikana rixashata. Ruxrikamtatka. Gi rixanu sajraka gistaakotachine pika. ¹³ Waleyma koxa rixashatna pimrine Goteyone. Wane rixatka Wirnawisiko pupjekaaka wanna gixashle chinanu.

¹⁴ Seyni wa netinitkana gi wa potukyaletkana; gi wa Kiglerpotunanu Tokanchi galikakate chinyawaka pixka rixna, wane nchinru Sotlu pejnrune getanu, "Wa pixa Goteyokyti wa payineko gixjetyawaka pixka pixini; gi wanna Goteyone gixjetyawaka pixka pixini, q'klu chinanu perutna payineko wa Goteyone gixjetyawaka pixka rixinripna?

¹⁵ "Wixni wa Goteyonwu wumumturetanru wixinri, gi wa payine kmukochirerunwu. ¹⁶ Wumatlu wa yineru gi wa muklukanuwnakaakotni wa Tokanchi Yukanatkaluru kamrutikolu chinanu, seyni Kristo Geso galixikolu chinanu muklukanuwnakaakotni. Ga wa wixa galixlu Kristo Geso wa muklukanuwnakaakonepwu Kristo galixikolu chinanu, gi wa Tokanchi

Yokanatkalu kamrutikolu chinanu. Giyagni Tokanchi Yokanatkalu kamrutikolu chinanu gi pamanena muklukanuwakaakotupni.

¹⁷ “Ga wa wixa gjiginri muklukanuwakaakonwu wixinripa Kristoya, ga wa wixako kmukochirerunwu getikolunwu, ḡwale chinanrege mukochri kamrurewatyachri Kristo? Gike rixiniko. ¹⁸ Gi rixanu wa nnikatanrukaka nkamrutinitnaka, nekakgitnawa ginanshichkaluru kamrutachrino. ¹⁹ Gi rixanu gita Tokanchi Yokanatkalu chinanu nupnanatka Tokanchi Yokanatkaluuya, Goyakalu chinanu nuwekinripa. Kristoyma koroshishkita nutaaka. ²⁰ Giyagni gi wa gita giwekatka, seyni gita ruwekyatka Kristo. Ga wa xawakni nomaneya nuwekinritka, Goyakalu Wgene galixikolu chinanu nuweka. Walenwa nushinikjeru. Walenanuko geneknawa gita chinanu. ²¹ Gi wa maleshawaka nixkaklu Goyakalu gimutlewie. Gi rixanu wa Tokanchi Yokanatkalu chinanupmakni wa poyakkaklewlu, waneklu maleshawakmaka rupnana Kristo.”

3

Giwekikaluru galixluya yoptotikolu

¹ Kalatane mshinikanungi, ḡatku yokshatgi? Gixaygale getanu rupgu-jewnakaka Geso Kristo koroshishkita gitaaikaluru. ² Walepjé naluka gimatleyagi: ḡWaka Tokanchi Yokanatkalu kamrurewle chinanu gy-optotluge Giwekikaluru, waka gyijnakotinri galixluya chinanu? ḡGi pamshinikanunangige? ³ Wa Giwekikaluru gyinuwakinikta, ga wa xani ḡmanchi chinanrege mmagatikanepgige? ⁴ ḡWane pejnurge maleshawaakaka nsalewniya gixa wa galikaka maleshawaka rixinipmaka? ⁵ Giyagni wa Goyakalu wa Giwekikaluru genekpotutyagi ga wa gixa yegi giyaklewlu kamrurewatyachri ḡwaka Tokanchi Yokanatkalu kamrurewleje chinanu waka gyijnakotinri galixluya chinanu?

Galixachine wannanwa Gawraklopishane

⁶ Waneko pixka rixa Gawa. Goyakalu ralixa, ga wa wale chinanu rutakyegitka poyakkakachri rixinripa. ⁷ Giyagni gixa gimata kalix-aklerune wannanwa Gawraklopishane. ⁸ Wa yonatkaluru tokanchi rumatagnaputika wa galixlu chinanu Goyakalu muklukanuwakaakone gitakyapna payine. Giyagni Kiglerpotunanu Tokanchi runkakagnaputu Gawa. Wane china, “Pixaya giglenshnikanyegitkalunepni pejnuruneko payinemnunanuka.” ⁹ Giyagni kalixaklerune giglenshnikanutkalunepni wa kalixakleru Gawaymananuko.

Kristo wenutlu wushpakinripa wa Tokanchi Yokanatkalu kamakpi-ireyegiya

¹⁰ Gi rixanu pejnuruneko Tokanchi Yokanatkalu kamrureyegirune, wannanwa kamakpiratkalune. Gi rixanu wane chinyongata, “Kamakpiratkalunni pejnuruneko ginnakokta gi gomkagi kamruretyalu pejnuruko yonatika Tokanchi Yokanatkaluuya.”

¹¹ Giyagni pgujerni wa Tokanchi Yokanatkalu chinanu gi pamanena muklukanuwakaakotupni Goyakalu getanu. Gi rixanu: *Wa poyakkakachri giwekanu ralixleya chinanu.* ¹² Ga wa Tokanchi Yokanatkalu gi wa galixluyni, seyni wa wale kamrutachri ruwekanu waleya chinanu. ¹³ Kristo wenutlu wushpakinripa wa Tokanchi Yokanatkalu kamakpiryegiya. Wixa chinanu kamakpiratkalurni Wale. Gi rixanu wane china yongatyawaka, “Kamakpiratkalurni girukokta gagmunashkita gixrip-kaakaluru.”

¹⁴ Payineko rapyegitinripa wa Gawra giglenshinikanyegitimolu Geso Kristo chinanu, wa galixlu chinanu wyoptotyaplu Giwekikaluru gipiratkaluru.

Goyakalu gipiratyalu Gawra

¹⁵ Nomolene, yineru gixjetyawakapirana nunkakangi: Wa gipiratkaluru kirukate gike rixa yinerunupmakni, wa poyegitkalurni pejnurune getanu, gike giknoktokanuthu. Gike wanepnute yognikinri. ¹⁶ Ga wa gipiratkaluru tokanchi wane china, "Gawranupa ga wa giklopishanupa." Gi wa wane china, "Wa giklopishanupa," wa gixolurunenupa pixka, seyni satupjenupa pixka, "Wa giklopishanupa," china. Walenwa Kristo. ¹⁷ Goyakalu gipiryegitlu Gawra renekyawakaplu. Wanepnute, ruknoginitka gepkoxamkoje pacha mapmole walapu, Goyakalu genekna Gisrayiline Tokanchi Yukanatkaluru. Giyagni tyenwa nichina, wa Goyakalu gipiratanru gi rumkata giknoktokanreta wa Tokanchi Yukanatkaluru. ¹⁸ Gi rixanu wa Tokanchi Yukanatkaluru chinanupmakni wa yoptotikalurupa, waneklu gi wa gipiratkaluru tokanchi chinanupmakni. Ga wa Goyakalu wa gipiratkaluru tokanchi chinanu genekashayalu Gawra.

¿Klu chinanu wa Tokanchi Yukanatkaluru?

¹⁹ Giyagni ¿klu chinanu wa Tokanchi Yukanatkaluru? Wa mukochri chinanu yogniika rapokinpotunanuko giklopisha gipiryegitkaluru. Towrechinea rutaaka. Kgiykoylegewaklerumyo rawanata. ²⁰ Ga wa kgiykoylegewakleru gi wa satupje chinanni. Seyni wa satupjerutni wa Goyakalu.

²¹ ¿Giyagine wa Tokanchi Yukanatkaluru kamnixlu wa Goyakalu gipiratanru? Gike rixiniko. Gi rixanu Tokanchi Yukanatkaluru gimkata giweekaklewatachripmaka, waneklumka poyagkaklewlu galikaka Tokanchi Yukanatkaluru ruyakatinmaka. ²² Seyni Tokanchi Yonatkaluru chinanu kmukochrirerunwu pejnurunekwu, wa gipiratkaluru galixachine renekkolupa Geso Kristo galixikolu chinanu.

Satupjerunetkawu Kristo Gesoya

²³ Wa ma mapookanuwa galixlelu, gi wumkata gishpakleta kmukochrirerune wixinriya wa Tokanchi Yukanatkaluru chinanu wa wunkaakoklunpotunanuko galixlewlupirana. ²⁴ Giyagni wyimakjerni wa Tokanchi Yukanatkaluru, wa Kristo yegi ranikyapwu, muklukanuwnnakaakone wixikolupa galixlu chinanu. ²⁵ Ga wa rapokinikta galixlelu, gi wa yimaklewatachri wyijnakotatka.

²⁶ Gi rixanu pejnurunekgi gixa Goyakalu wgenenetkagi Kristo Geso galixikolu chinanu. ²⁷ Gi rixanu pejnurunekgi gixa Kristo chinanu katkalungi, Kristo gmakatnawa. ²⁸ Maleshlu Goteyo, gi wa Kriykoko. Maleshlu wayegrechri, gi wa gishpakachriko. Maleshlu jeji, gi wa suxoko. Gi rixanu pejnurunekgi gixa satupjerunetkagi Kristo Gesoya. ²⁹ Ga wa gixa Kristonune nchininitka, waneklu Gavraklopishanetkagi, wa gipiratkaluru tokanchi chinyawakpotuko wa yoptotachinepa gixinri.

4

Gi wa wayegrechinetkawu, seyni wgenchinetkawu

¹ Xani yoptotachinepapirana nunkakangi. Galukta satu yineru gitaaikaluru ruru wane gixle yoptotachripa, seyni mturu rixiniliwa. Wa mturu rixinikopshini, satu wayegrechri pixka gixkalurni. Gike rixa pejnuruko gitsrukmatmakni. ² Mturune girukotachine yijnakota wale ga wa panchi

girukotachine, wa ruru gitakanrugogne rapokinpotunanuko. ³ Waneko pixka wixanatini. Wa mturune pixka wixiní tyegogne gajerkaka wayegretanatwu. ⁴ Ga wa poyagkakgognepotutinitka, Goyakalu yokanatlu Gituru, suxo giyakatyachri, Tokanchi Yukanatkaluru yijnakotachritkani, ⁵ wa kosh-pakyapna Tokanchi Yukanatkaluru yijnakonatachinen, Wale wgenene wutakikolupa. ⁶ Ga wa gi rixanu Goyakalu wgennetkawu, Wale yokanatlu Giwekkaluru Giturunu waji sablewatiripa, "Gawwa." (Nuru.) ⁷ Giyagni gi wa wayegrechritkayi, seyni Goyakalu wgenetkayi. Ga wa Wale wgene pixinri yoptotachrikoxapyi Goyakalu chinanu.

Wuykotka wma wayegretikotpatnaka Tokanchi Yukanatkaluryua

⁸ Seyni muchikawa wa Goyakalu gma mumatkanuwa, wayegrechinen-nangi wanna yegi wa goyakalunemigjene rumumturetanruna. ⁹ Ga wa xawakni gimataktalu Goyakalu, ga wa galikakni Goyakalu gimata-nungi. ¹⁰ Gi gixpoko satokleyeganutnaklu tyegogne gajerkaka? Walenwa muchkotkaka ga wa magatachrikaka. Wa wale wayegrene galuka gixle-tatnaka. ¹¹ Gimretpotutlu gogkaka, ga wa ksurkaka, ga wa gipapkokaka, ga wa walapkaka. ¹² Nkagwakpirata gixa chinanu gimka maleshawaka nyaprewanatinri gixyegiya.

Pawlo chanixna Kalata gajene

¹² Nomolene, nagjitgi gita pixka gixanu gi rixanu gixa pixkalutkoxno gita. Gi satuna gimtukyano. ¹³ Ga wa gixa gimata wa nugrokmanetinri muchinanu Kiglerpotunanu Tokanchi nunkaklewyegitgi. ¹⁴ Wa gyantaletikolu nomaney, gi wa geyikyano. Gi wa gagnanutyakoxno. Seyni gyoptotno satu Goyakalutowreru pixka, Kristo Geso pixka. ¹⁵ Giyagni ḡginakatkalu wa giglenshinikanyegitikolu? Gi rixanu nupgjutatgi wa gimkatiniplu giygalejiko gkoshpakyapmaka genekyapno. ¹⁶ Giyagni ḡgkamnixjerutkange gita gi rixanu tokanchi galikakpotunanu nunkakgi?

¹⁷ Wa wanna muchkowanshnikanyegityagi gi kigleru. Seyni raluka gishayegletgina gma jiglokinitipa, wa wannako gmuchkowanshnikanyegitinripa. ¹⁸ Kigleru wa gmuchkowanshnikangognenatinripa wa kigleruya. Gi wa gixa yegi nwinikopshinipje wane gixanu. ¹⁹ Nwugenene, nchinowyegitatnakgi wa gixa gaji kamgikolpotunanuko Kristo. ²⁰ Nalukmaklu gixa yegi nwinripmaka wa xani wa nkashrijetokanutinripa, gi rixanu gi numatanshnikanyegitgi.

Yapkaklu Sara ga wa Gakarapiranaya

²¹ Ginkakanno, gixa Tokanchi Yokanatkaluru galuka yijnakletachingi, ḡgi ge gjemu Tokanchi Yokanatkaluru? ²² Gi rixanu yonatkalurni wa Gawra waneylu gepi wgenene. Satu wa wayegrechroya, ga wa satu wa mwayegretkotoya. ²³ Seyni wa wayegrechroya giyakatyachri manchi pixka gixachri rushpaky. Ga wa mwayegretkoto giyakatyachri gipiratkaluru tokanchi chinanu rushpaky.

²⁴ Tyekakaktanwa yaglu. Gi rixanu wanna suxonni wa gepi gipiratkaluru tokanchikaka yaglu. Satni wa Sina Magkate giyakatyachro. Wala wugenetna wayegrechinepa. Walanwa Gakara. ²⁵ Ga wa Gakara walanwa Sina Magkate yaglu. Garawichijne gajeru magka. Wa xawakni Gerosaletka pixkalutni, twugeneneyma wayegrechroni. ²⁶ Ga wa teno gajeru Gerosale gishpakachroni. walanwa wunro. ²⁷ Gi rixanu vonatkalurutkani:

Pumuwatatu, migato, wa pixa mwugenetonanyi.

Pupsheka siplewletanu,

*pixa wa ma chinyegityi.
Gi rixanu kganururo pnute
gixo wgenro wa gapalushanatachro.*

²⁸ Ga wa gixa, nomolene, Gisaaka pixka gixa gipiryegitkalungi wgenchingi. ²⁹ Seyni walegogne pixka wa manchi pixka gixa gishpakletachri kojwaklu wa Giwekikaluru pixka gixa gishpakletachri, waneko pixka rixa wa xani. ³⁰ Seyni ¿gi china wa tokanchi yonatkaluru? “Puknokanro wayegrechro ga wa toturiyuma. Gi rixanu wa wayegrechro wgene gi wa yoptotachripni wa mwayegretkoto wgeneyma.” ³¹ Giyagni, nomolene, gi wa wayegrechro wgenenwu, seyni mwayegretkoto wgenenwu.

5

Gishpakyawaka ntunwatanu

¹ Giyagni wa gishpaklewluya wa Kristo koshpakyawu, ntunwatanu. Gi gkashichkotnaka wa wayegrechne gixinripa, wa gitjipije ganikachine pixka gixinripa.

Gimutlewlu yegi gitskikyachine

² Seyni gita Pawlono wane nchingi, wa nsajruka gistaakkolunupa gike rupxakingi Kristo. ³ Numepe gipgjitalyegitnaklu satkaka yineru wa sajruka gistaakkolunupa, wa wale gimkata kamruretu pejnuruko Tokanchi Yukanatkalu. ⁴ Kristo kaspukachinetkagi ginnakokta wa Tokanchi Yukanatkalu ruya muklukanuwnakaonepmakgi. Gimutlewlu yegi git-skikyana. ⁵ Ga wa wixa Giwekikaluru chinanu ga wa walixle chinanu wkagwakpotutlu wa poyagkakachine wutaako. ⁶ Gi rixanu wa Kristoya gike gimkatachrini wa sajruka gistaaklewlu, gi wa msajruka gistaaknuchiko, seyni galixlu galikakni wa gishiniklewluya kamrurewatayachri.

⁷ Kigle gixjenata. ¿Katu gimaletgi wa gma malixyanuplu tokanchi galikakpotunanu? ⁸ Tye gishinikanutikolu gi wa ntomgajeru ruyakaty. ⁹ Ptsotsotaji gisekachri psolujpako ruseekaka. ¹⁰ Gitsrukaachi napon-shinikanyegitgi, gi wa pnuko gyanshinikanutanu. Ga wa gkojwakjeru girukokta rixinri waneyaplu ruklukanuwnayegjixikolupa.

¹¹ Ga wa gita, nomolene, wa nunkakletinmakawalu sajruka gistaaklewlu, ¿klu chinanu nkøjwaakawa? Gi rixanu wane nixinipmaka koroshishkita gitspekaklewtinriya nkaspukikmaka. ¹² Nalukmaklu wa gkojwakan-shinikanutjene rustakinwana.

Tokanchi Yukanatkalu poyagkakikolu walenwa gishiniklewluya

¹³ Gi rixanu gixa, nomolene, tomgakalungi gishpakikolu chinanu. Seyni wa tyepje, wa Tokanchi Yukanatkalu gishpakinriya gi wane gixikolupa ruglepoktapinri gimane galukyawaka chinanu. Seyni gishiniklewlue chinanu wayegretkaakalunepgi gixkakluko. ¹⁴ Gi rixanu pejnuruko Tokanchi Yukanatkalu patokanchipje poyagkakikolu. Tyenwa wale: *Pushinikanru pumwastsitanru pixnanuko pixka.* ¹⁵ Gi rixanu gixkakluko gashkakakanmaka ga wa gniikakanmaka, xakoka gnikatpotkakapa.

Wa manchi kamrure

¹⁶ Giyagni wane nchina, Giwekikaluru gyanini, ga wa manchi getsotanrewle gi wa mpoyagkakanu. ¹⁷ Gi rixanu wa manchi getsotanrewata, kamnixyalu Giwekikaluru. Ga wa Giwekikaluru getsotanrewata, kamnixyalu manchi. Gi rixanu manchi ga wa Giwekikaluru kamnixkaka, gixa gma

kamrutyanyuplu galukanrukaka.¹⁸ Ga wa Giwekikaluru kosekanungi gixini, waneklu gi wa Tokanchi Yukanatkaluryegirungi.

¹⁹ Gi rixanu pgujerni manchi kamrurkaka. Walenwa gapoklewlu, mpowrannuchi, mpogijpatnuchi,²⁰ yagluchisha yonogyegru, kagonchiflu, kamnnixlewlw, yagotkaklu, ganxalelwlu, gimgtuwakchi, gimgkapnuglu, kotspalanshinikanrewlu, pnuko gixachri ginkaklewlu,²¹ sotanugnuchi, gimgru, tsru niklu, ga wa wane pixkalutkaka. Wale nunkakagnaputatnakgi, wa muchikawa pixka nixa ginkaklegnaputgi, wa kwangixaklerune gi yop-totanruna Goyakalu pogirewatyawaka.

Wa Giwekikaluru kamrure

²² Ga wa Giwekikaluru kamrure walenwa gishiniklewlw, ga wa gimuwlu, ga wa giglewanshinikanrewlu, ga wa ma pognanrewlu, ga wa shinikanuchi, ga wa giglewlu, ga wa galixlewlu.²³ Ga wa mayognuchi, ga wa girukotmanrewlu. Maleshlu tokanchi yukanatkaluru walekaka gjretikolupa.²⁴ Ga wa Kristo Gesonune koroshishkiti rutakmanewletna gimanane galuklewlekakaymana ga wa retsotanrewleymana.²⁵ Wa Giwekikaluruuya wuwekini, Giwekikalurkoxaya wyanini.

²⁶ Gi wa wujganru maleshawaka walixkotikolupa. Gi wa wayookakanu. Gi wa wanxakakini.

6

Gimutjikakanu

¹ Nomolene, wa satu yineru gakajipgaka satu mukochriya, gixa wa Giwekikaluru waneyalungi gigletanru wane gixachri, mayogonshinikanurunepgi. Pixnanuko petinwa wa pma yantaletkotupa pixa.² Gimutjikakanu. Wane gixini mpoyagkakanru Kristotokanu yukanatkaluru.

³ Gi rixanu walenanuko kagwaknachriwa pagixanu rixinri, ga wa gikenanni, waleko ginshinikanu yokwitnawa.⁴ Giyagni satkaka gitakyagoka kamruretinwa. Waneklu ralixkotko wa walepjchinanu, gi wa satu chinanni.⁵ Gi rixanu satkaka waleko wunnu rutjitanu.

⁶ Ga wa yimaakalurune pejnurkakako kigleru gapikanna wa tokanchi yimaklewatachine.

Wa yineru gitakanru wale koxa jirganu

⁷ Gi wa yokwitkalunepgi. Gi wa gapnokatkalurni Goyakalu. Gi rixanu wa yineru gitakanru wale koxa jirganu.⁸ Giyagni wa gimaneychinanu gitakachri, gimaneyajirganu gamgikowaka. Ga wa Giwekikaluru chinanu gitakachri, Giwekikaluru chinanu jirganu giweklu gike rixiniko mnikawanakatu.⁹ Gi wamanutanu kigleru wkamrutinri. Gi rixanu gipapko wjir-galewatanu wma mugrokanupa.¹⁰ Giyagni wa ruglepoktapini wchinini, kigleru wkamrutinna pejnuruneko, ga wa muchinanu gapka galixlewluuya moletkakyachine.

Kristo koroshishkiteya ralixkowata Pawlo

¹¹ Getanru. Tsru yonga potu gitako nomyo nyonatinri.

¹² Ginnakokta galuka kigle getikolupa gimaneya, wanna gerutgi wa nsajruka gistikolupa. Walepjchinanni wa ma kojwakikonepni Kristo koroshishkitate chinanu.¹³ Gi rixanu gi wannako sajruka gistaakatachine kamrutlu Tokanchi Yukanatkaluru. Seyni ralukluna gixa sajruka

gistakikolupmaka, ralixkowatinripmakna gixmaneya.¹⁴ Ga wa gita gike rixiniko nalixkowatanutka, seyni walepje Wutsrukate Geso Kristo koroshishkitateya. Wale koroshishkitate tye psolchijneko koroshishkitita gitaaikalurno tye gitanshinkanuya. Ga wa gita Kristo koroshishkitate gitaaikalurno tye psolchijneko chinanu.¹⁵ Gi rixanu gike gaprini wa sajruka gistaklewlu. Gi wa msajruka gistaklewlu, seyni gerotu giyakotkaluru galikakni.¹⁶ Ga wa ginnakokta tye nuykolewle kosekyachine, gglewanshinkanutachinepni, ga wa getwamonutkalunepni. Ga wa Goyakalu Gisrayilitene koxa waneko pixka rixa gglewanshinkanutachinepni ga wa getwamonutkalunepni.

¹⁷ Xaniyakawa gikena yaprewkakanutkano, gi rixanu nomane nanikyalu Geso gimaxikolkaka.

Giglenshinkanyeglewl

¹⁸ Nomolene, gixaymaplu Wutsrukate Geso Kristo. Wale gimusangi. Wane gixkalurupa.

Kpashiri Pawlo Kirukate Gigwisone Chinanu

Galuklewlwlu

¹ Pawlo kirukate, Kristo Geso yokanatanru Goyakalu gishinikyawaka.

Wa kpashirine chinanu, Kristo Geso galixachine, Gigwiso gajene.

² Gimutkalunepgi. Giglewanshinikanutachinepgi Goyakalu Wuru chinanu ga wa Wutsrukate Geso Kristo chinanu.

Giglenshnikanyeglewlu Giwekikaluruya Kristo chinanu

³ Gimalwutkalurni Goyakalu wa Wutsrukate Geso Kristo Giru. Walenwa giglenshnikanyegitwu psoluko giglenshnikanyeglewlu Giwekikaluruya tengogneyakawa Kristo chinanu. ⁴ Wane rixa tsomletwu Wale chinanu ma kamrutkonuwa tye psolchijneko, wa kpashirine wixinripa ga wa muklukanuwnakanepwu Wale getanu. ⁵ Muchikawako rushinikagnapyegitwu gishiniklewluya Wale wgenene wutakikolupa, Walenunepwu Geso Kristo chinanu. Wane rixa rugleretyawaka wa Wale gishinikanruya. ⁶ Wane rixa wugenetyawu, rumalwutikolupa rumutlewle giglenu. Wale chinanu rumutyawu ralukanru potu Gituru chinanu. ⁷ Waleyia wenutikolutka wushpakinriya gigraga chinanu. Wkaspukmukochiretika Goyakalu gimutlewle ponikowleya. ⁸ Rumutpotutanwu psoluko gimatkalelwuya ga wa psoluko gimata jemluya. ⁹ Rumatkakwu giyogimanatkaluru rushinikan-rupiranaya; rixa gigleretyawaklu rushinikanru Kristo chinanu. ¹⁰ Rixa giglepokletyawaklu gogikaka, wa poyagkakgognepotutinpatka, gapatkota Kristo chinanupni ptowrupotunanuka, tengogne gajerkaka ga wa chiji gajerkaka. Pamanepje pixka rixanutka. Ga wa Kristo, gijiwu pixka rixanu.

¹¹ Ga wa wixa tsomitkalunwu Kristonune wixinripa. Muchikawako Goyakalu gitakyawakpotuko tsomitkalunwu. Gi rixpokotko tyekaka Goyakalu gitaka rugleretyawaka. ¹² Wa wixa chinanu gimalwutkalurupni Wale goyaknu. Wixni wa muchinanu gapka Kristo kagwakyachinwu. ¹³ Wale chinanu gixa koxa wa galikakpotunaru tokanchi yijnakotachingi, wa Kiglerpotunaru Tokanchi gixa gognetkakikoluwa, Wale galixachinetkagi. Wale chinanu gimaxikoletkalungi Giwekikaluru Kpashiriya gipiratkaluru. ¹⁴ Tyenwa Giwekikaluru Kpashiri psojite xani wene kagnaputikolutka, rumatikolupa wa wixanpatka psoluko wa Goyakalu koshpakkognepotunanukwu. Wane rixa gimalwutkalurupni Wale goyaknu.

Pawlo gagjitlu wa Giwekikaluruwaneyapna Gigwisone

¹⁵ Giyagni gita koxa wa nyijnakpiranyegitlu wa Gitsrukaachi Geso galixinri gixa, ga wa pejnuruneko kpashirine gishinikinri, ¹⁶ gi nutuka poyag-nutleyegitgi. Wa nagjigognetini nushinika gagjigogneyegletgi. ¹⁷ Wa Wutsrukate Geso Kristo Goyakalute, wa goyaknu Giru genekyapgi Giwekikaluru gimatkalewatachri ga wa gipgugjetkaklewatachri, rumatikolupa Wale. ¹⁸ Tye nagjitlu Goyakalu: Wa mpokamlatyegitkolupa psoluko getinripa, waneko pixka rixangi Goyakalu. Kotpukanru ginshinikanu gimatpotuyaplu psoluko Goyakalu chanixgi gyoptotinripa. Walenwa wkag-wakanru potu, wa rovaknu ponikowle. Walenwa kpashirine yoptotanrupa Waleyia. ¹⁹ Nagjitkoxlu gimatyaplu klunerni wa tsrupotunaru ruyakle wa wixa chinanupa, wa galixachinwu. Wane rixa kamrurewatwyawaka wa muchkonu ruyakleya. ²⁰ Wale giyakle Kristoya kamrurewatwyawaka, wa gipnachinetskalaya yotunkakinitkalu ga wa potuklesretate tuplakakinitkalu

tengogneya. ²¹ Tengajerni. Wa pejnuruneko tsrukakalune pnuute, ga wa tsru gitaakalurkaka pnuute, ga wa gichkolkaka pnuute, ga wa girukotlewlpuute, ga wa pejnuru giwakako koscheekaluru pnuute, tsrupotni Wale. Gi wa tyegogneshlupjeya, seyni koxa wa ginachripa. ²² Ptowropotunanuko Kristo-jixipta rapukote rutaka Goyakalu. Reneklu pejnuruneko gapatjetachinjiwu rixinripa. ²³ Wannanwa Kristomane. Walenwa psolpotuyako chiji ga wa tengogne koxa gike mmagatikatu.

2

Gimutlelwuya gognetkaaka

¹ Ga wa gixa gipnachine gixanata gektutu gkamrureya ga wa gmukochireya. ² Muchikawa tyekaka mukochri gimuyananatini tyegognegixjetyawaka pixkapotuko, ga wa tye psolchijne gajene gitaakalurune gitsrukate gixjetyawaka pixka. Walenwa Kamchi wa malixkane kamrurewatyachri xawakni. ³ Wannatskala muchikawa pejnurunekwu wixa koxa gawanata. Wumane sotanugnu wumwanatini. Wumane galukyawaka wkamrujenata ga wa wunshinikanu galukyawaka. Wixjetyawakananu wumumturetanruya chinanu Goyakalu jigeakanuwneyigitwu pimrime pixka. ⁴ Ga wa Goyakalu, wa getwamonrewlu ponikowatyachri, rushinikwu tsru potu rushiniklewe chinanu. ⁵ Giyagni wixa gipnachinwu wixanatini mukochriya, Kristoyma ruweekakwu. Gimutlelwu chinanu gognetkaakalurungi. ⁶ Waleyma yotunkakwu. Waleyma tengogne tuplakakwu Kristo Gesoya. ⁷ Wane rixa ginachrigogneshkakapa rekakgityaplu tsrupotunanu rumutledle ponikolewle retwamonutkalchinanwu Kristo Gesoya. ⁸ Gi rixanu gimutlelwuya gognetkaaka galixlewlu chinanu. Tyenwa gi wa gixa ruyakatya. Goyakalu geneakashleni wale. ⁹ Gi wa kamrurchiyni gi satuna ma malixkotinitipnawa. ¹⁰ Gi rixanu wixni wa Goyakalu kamrure. Kristo Gesoya giyakotkalurunwu wa kigleru kamrurchikaka wkamrutinripa. Wa Goyakalu galpokognaputanrutka tyekaka wuyaninripa.

Gipoyikgayegkaaka koroshishkitaya

¹¹ Giyagni gishinkapanru wa muchikawa gixa payine gixanatini gimaneya. Msajruka gistaakone chinkalungi wa sajruka gistaakotachineya wa myochi sajruka gistikakalune manchiya. ¹² Wa walegogneklu male-shayanangi Kristo. Maleka gajene gixanatini Gisrayilineruneyegiya. Wajra gwanatyalu gipiratkaluru tokanchi. Maleshayanangi gkagwakle. Ga wa moyakalutenenangi tye psolchijneyako. ¹³ Ga wa xani Kristo Gesoya wa gixa wajra gwanatachingi gi gowukatkagi Kristogragra chinanu.

¹⁴ Gi rixanu Walekni wa wuglewanshinikanrewle. Wa gepinanu satup- jerutu rixkaka. Wa gepinerunaru satupjerutuneru rixkaka. Muchinanu wkamnixkaklewle kotspalatyawu prijeru pixka. Ga wa wale gerutlu prijeru, panerupje wixinripatka Gisrayilineyema. ¹⁵ Waleko gimaneya nikatlu Tokanchi Yukanatkaluru wa gitaakalurkaka. Waleya gepiko ruyakotyaplu satupje gerotu yineru. Kiglenshinikanrewlu rixkaka. ¹⁶ Koroshishkitateya Goyakalu rupoyikgakaka. Wa gepineru pamanepje rixinritkana rupoyik-gayegkaka. Walaya nikatlu kamnixkaklewlu.

¹⁷ Rapoka. Runkakletlu giglewanshinikanrewlupirana gixa yegi wa wajra gwanatachingi, ga wa runkakletlu giglewanshinikanrewlupirana wanna yegi koxa gowuka mwakane. ¹⁸ Gi rixanu Wale chinanu wixa ga wa pimrime koxa kigle gapokle wixa Girchi yegi satupje Giwekkikaluruya.

¹⁹ Giyagni wa xani gi wa maleka gajenetkagi. Gi koxa wajra gajenetkagi, seyni kpashirinenerunetkagi, ga wa Goyakalumolenetkagi. ²⁰ Panchi kamrupjittkaluru pixkalungi. Kristo yokanatanune ga wa Goyakalu tokanu geneklewatachine wannanwa gistsigi pixkalune. Ga wa Kristo Gesoko sotlu yoptowaka gwachri pixkalutu. ²¹⁻²² Wale gogo pejnuruko kamrupjittkaluru rupxaakakpotutka. Tseruwna kpashiripji potu rixinripa Gitsrukaachi chinanu. Wale gogo gixa gipxaakaakalungi papjipje gixinripa Goyakalu gwiyawakapa Giwekkikaluruya.

3

Goteeyoneymayoptotachinepni payine Kristoya

¹ Tye chinanu gita Pawlono, gostukalurno Kristo Gesonu gixa payingi chinanu.

² Wa gyijnakpiranyegitiniplu wa gitni geneekalurno nuglepokowakatyaplu Goyakalu gimutlelepirana gixa chinanupa. ³ Wa gipgijetikoluya numatkaaka wa yogimanatkalurupirana. Wane potuko nixa yonyegletgi, wa muchikawako nyonyegityagi ptsotsotaji tokanchi, ⁴ wa getyongatiniplu gimata jemanru wa Kristopirana giyogimanatkaluru numatinri. ⁵ Wa pimri gwashlukakni gi wa rumatpirankaakana wa xani gwachine pixka. Xani Giwekkikaluru gipgijewnakaku wa Kristo yokanatanune kpashirine yegi ga wa tokanu geneklewatachine yegi. ⁶ Rumatkakanna wa Goteeyoneymananuko yoptotachinepna payine wa pamanepje rixinripatkana. Goteeyoneymananuko Kristo Geso genekanna Goyakalu gipiratanru Kiglerpotunanu Tokanchiya.

Kamrurewatachri rutaaka Pawlo payine chinanu

⁷ Tye Kiglerpotunanu Tokanchipirana kamrurewatyachrino nutaaka, wane nixa geneekota Goyakalu gimutlewle genekashatkaluru. Wale giyakle pixka rixa kamrurewleta. ⁸ Gitni wa pejnuruneko kpashirine pnute mturpotno, tye gimutlewie neneeka nunkakleyaplu payine yegi wa Kiglerpotunanu Tokanchi Kristo ponikolewle mukshikanshinikanutkotupiranu. ⁹ Ga wa nutaaka nekakgyityaplu gi pixka giglepkole rixa wa giyogimanatkaluru wa muchikawgognepotuyakawa yogimanatkaluru Goyakalu yegi. Walenwa ptowrunanuka giyakotachri. ¹⁰ Wa xani gapatjetachine chinanu rumatika Goyakalu gimatkalewlepirana, wa pnunnu gixachri rumatkalewle. Tsrukakalune ga wa tsru gitaakalune tengogneya gimatlu gapatjetachine chinanu. ¹¹ Wa muchikawgognepotuyakawa Goyakalu gishinikyawakpotuko, wane rixa kamrureta Wutsrukate Kristo Gesoya. ¹² Wale chinanu mpiikanwu. Ga wa Wale chinanu kigle gapokle wixa gaponshinikanutachinwu wa Wale walixle chinanu. ¹³ Giyagni nagjitgi gi wa gigrokanu wa gixa chinanu nsalewninriya. Walenwa gixa galixkolewle.

Pawlo gagjitu wa Kristo gishiniklelewle rumatinripna Gigwisone

¹⁴ Tye chinanu nyoptsojityegitlu Girchi. ¹⁵ Wale chinanu panerumnunanuka tengogneya ga wa chijiya giwakatka. ¹⁶ Goyakalu nagjita royaknu ponikolewle gixyawaka renkyapgi giyaklewlu. Nagjitlu gajiyako gmuchkotanshinikanutiko wa Giwekkikaluru Walenu chinanu, ¹⁷ gaji rawinripa Kristo, galixlu chinanu, gishiniklelwu muchkotikalunepgi, ga wa gishiniklelwu poyegitkalunepgi. ¹⁸ Pejnuruneko kpashirineymananuko gixa gimkata potu gimatletlu gipsogishiniklewlenanuktalu Kristo gishiniklelewle. ¹⁹ Wa gimkata gimatletkaluru pnute gimatayaplu Kristo gishiniklelewle. Wa psoluko Goyakalunu mmagatikanepgi.

²⁰ Walenwa gixo potu gimkata kamruretachri, ptowruko wagjitanru pnuute ga wa ptowruko wushinikanru pnuute rixyawakpotuko giyaklu, wixa kamrurewatyachri giyaklu. ²¹ Gimalwutkalurupni Goyakalu gapatjetachineya Kristo Geso chinanu pejnuruko gwashlukakayapa rixgognenatyawakapa. Wane gixkalurupa.

4

Panshinikanrewlu Giwekikaluruya

¹ Giyagni gitni, gestutkalurno Gitsrukaachi chinanu, nagjitgi gimuknu yanre gixanu ntomgikowaka. ² Psoluyako malixkotnachinepgi. Psoluyako mayogonepgi. Mapognanunepgi gkashnantakyegkakanu gishinklelewleya. ³ Jmererunpotupgi pagishiniklelewlerunepgi gixjegognenatinripa Giwekikaluruya. Gestutkalunepgi giglewanshinikanrewluya. ⁴ Pamanepje wane ga wa satupje Giwekikaluru. Wane gixa tomgaletka satupje kagwakluya ntomgikolu. ⁵ Satupjeru Gitsrukaachi. Satupjeru galixlewlu. Satupjeru katlewlu. ⁶ Satupjeru Goyakalu pejnuruneko Giru. Walenwa pejnuruneko chinanu, ga wa pejnuruneko yegi, ga wa pejnuruneko gitokote.

⁷ Ga wa rumutwu satkakwu gipejnukta wumkata geneekota Kristo genekashle. ⁸ Giyagni wane china:

Teno ya. Koshpakna gixolune kashichkalune.

Genekashlukaka renekna yine.

⁹ Ga wa wane chininri, “Teno ya Geso,” raluka chinreta wa muchinanu rujrukinritka. Wa chiji ya. ¹⁰ Wa gjirukachri Walekni wa teno yachri, psoltengogneko gogote yachri, pnummunanuka mmagatikatu rixinripa. ¹¹ Waleko genekna pimrime wa yokanananune rixinripna, ga wa pimrime Wale tokanu geneklewatachine rixinripna, ga wa pimrime Kiglerputunanu Tokanchi ginkakletachine rixinripna, ga wa pimrime girukotapratchine gapatjetachine yegi rixinripna, ga wa yimaklewatachine rixinripna. ¹² Galpokotkalunepni kpashirine Goyakalu kamrure kamrutikolupa, rapatjetanune, wannanwa Kristomane, tseruwakikolupa. ¹³ Wapkaapotutiniplu panshinikanurune wixinripa galixluya ga wa Goyakalu Wgene gimatikolu. Mmagatikatu yineru wixinripa, tsru yineru yaglu gixachinepwu wa Kristo pixkapotuko, wixinripa.

¹⁴ Gi wa mturunpatkawu. Gi wa yawjewjekaakalunpatkawu. Gi wa pnummu ganiikalunepwu pejnurkakakonnipgya pixkalutu ginkaklelewlu chinanu, yine gapnokawle chinanu, ksanowashaklerunni yokwireyna, pupjekaklewatachri yokwirni. ¹⁵ Seyni kaluklewaklerunepwu tokanchi galikakpotunanu wyanumatini. Psoluyako Wale gwachinepwu wtseruwninripa. Walenwa Jiwchi, Kristo. ¹⁶ Kristomaneya psojittkaka gipxaakakpotutanu. Yoxtaakakatka pejnurkakako yokele gapikanru chinanu. Wa manchi psojittkaka wa rutakikowaakaka rixa kamrurewletini, waneklu manchi tseruwna. Waneko pixka wixa. Wa gapatjetachine satkaka rutakikowaka rixa kamrurewletini gapatjetachine gixolewnanu. Gishinklelewleya tseruwakinwa.

Gixa gerotewkakiko Kristoya

¹⁷ Giyagni tyenwa nchinna, ga wa Gitsrukaachi chinanu nupguitatlu: Gi wa payine yanre pixka gixa yaletanutka wa wanna gishinikanru gike gapri mijekakaya. ¹⁸ Mapshaganshinikanurunetkani. Pnu gajenni Goyakalu giwekleya mumatkalmuchi chinanu waneyna, gi rixanu shikgajirunni.

¹⁹ Mumata wamonuwatkanni. Samyoknawana mpogijpatene rixinripna. Kgetsonrewakleruneko kamrutyapluna pejnuruko mpowranuchkaka.

²⁰ Seyni gi wa tye pixka gixa gimamatalku Kristo. ²¹ Wa galikaka gyij-nakotinitkalu ga wa Waleya yimaakalune gixinri, wa wane rixini wa galilikapotunanu tokanchi Gesoya. ²² Muchinanu kapokone yine gixanatinri gimițukolunenangi nsotanuwnaleya. Guyagni xani gishpakpotutanutka. Giknokpotutanru wa muchikawa gixjenatyawaka. ²³ Ginshinikanu giwekinri gerotewkakiko. ²⁴ Gerotu yinerpatkayi giyakotkaluru Goyakalu gixjetyawaka poyagkaklewlu ga wa galikakpotunanu gipashirewleya.

Gi gwamontakanru Giwekikaluru Kpashiri

²⁵ Guyagni giknokanru yokwiri. Pejnurunekgi gixa galikaka nchinjetanru gimwasttsitanru. Gi rixanu pamanepje psojistikkwu. ²⁶ Gjigekanuwatatinipagi wanepnute gmukochirewatanu. Gi wa gimtuwnachinekgi rumxikini tkachi.

²⁷ Gi wa kaswaji gixyegitanru kamchi gitrukate.

²⁸ Wa kachowgurunaru, gi wanepnuteko chowguwatanutka. Seyni kamrurewpotutanu, waleko gimonyoya kigleru kamrutinri, waneya rixinripa pagixanu waneyaplu rapikyaplu magatyachri.

²⁹ Gi satuna tokanchi gektutu gyanumatini, seyni kigleru tokanchi galuuikaluru, tseruwakanshinikanrewatachripa tokanchi, rumutikolupna yijnakotachinne. ³⁰ Gi gwamontakanru Giwekikaluru Kpashiri Goyakalunu. Waleya gimaxikoletikalungi pagogne chinanupa wa gishpakinri gognepotunukopa.

³¹ Pejnuruko muglenshnikannuchi ga wa gimtuwnalu, ga wa jgekanchi, ga wa sablechkaka, ga wa mupashiregnuchi gkonikolpatka, pejnuruko gektutuymananuko. ³² Gishinikanuwyyegkakanu. Kgetwamonrerunepgi. Gixkakluko gkaspukyegkakini, wa Goyakalu pixka kaspukmukochiretgi Kristoya.

5

Gishinikleklele gimuyananu

¹ Guyagni Goyakalu yimjetachinepgi rushinikanune wugenene pixka. ² Gishinikleklele gimuyananu Kristo pixka rushinikwu, ga wa samyoknawa wixa chinanu genekashlu ga wa giylatkalurupa genekashlu rixinripa Goyakalu chinanu, pogamluwtinripa.

Pokamlalu wgenene pixka gixa yanretanutka

³ Ga wa gapoklewlu, ga wa pejnuruko mpowragnuchkaka, ga wa gimkap-nuglu, gi wa koscheeko gonuka gixyegkakaya. Wa kpashirine gimkata gixleyyawaka gixanu. ⁴ Maleshpatalku kapatmenuru, gi wa seprolu tokanchiko, gi wa gixpiranchikakako. Walenwa gi rumuknuni. Seyni moyagnutlewlu galikaka. ⁵ Gi rixanu tye gimatpotuta: Gi satuna kapok-lalunetkagi Gitsrukaachi chinanu. Pokamlalu wgenene pixka gixa yanretanutka. ⁶ Gi satuna yokwitangi tokanchi maleshawakaya. Gi rixanu tyekaka chinanu Goyakalu jigeukanuwyyegitna malixaklene. ⁷ Guyagni gi wa wannayma yoptotachinepgi.

⁸ Gi rixanu muchikawa gixni wa mapshagalunenangi. Ga wa xani pokamlalunetkagi Gitsrukaachi chinanu. Pokamlalu wgenene pixka gixa yanretanutka. ⁹ Gi rixanu pejnuruyako pokamlalu kamrurni wa giglenchi ga wa poyagkaklewlu ga wa galikaka potu. ¹⁰ Gijganru klnerni wa Gitsrukaachi

gigleretanru. ¹¹ Gi wa pimrineymannupgi mapshagalu kamrurkaka kamrutachine, gike capri migje kamrureyna. Seyni galikaka pekagitanru gek-tutu rixinri. ¹² Gi rixanu kapatmenurni koschekpiranatikolupa wa wanna kamrutanru yogimatkaluru. ¹³ Ga wa pejnurkakako gektutu gekakgitkaluru pokamlalu chinanu gipgujetkalurni. Gi rixanu pejnuruko gipgujetkalurni pokamlalu. ¹⁴ Giyagni wane china:
Puyokanu pixa gimkanatachriyi.
Ga wa pyotunotanu gipnachineyegiya.
Ga wa Kristo pokamlatyegitanyi.

Giwekkaluru gwagajpotutanunepgi

¹⁵ Giyagni xakoka. Getjepotutanu gi gixpoko yanretanu gi wa seprol-unne pixka, seyni kgimatkalerune pixka. ¹⁶ Pchipetgognetanru ruglepok-tapinrigogne, gi rixanu muglegognetkakni. ¹⁷ Giyagni gi wa manshinikan-unepgi, seyni Gitsrukaachi gishinikanru gimatachinenepgi. ¹⁸ Gi wa winga gimetachinenepgi. Wa wale runya pachwatjeru. Seyni Giwekkaluru gwagajpotutanunepgi. ¹⁹ Gynumsakakanu Goyakalu tokanu shikaleya, ga wa gimalwuru shikaleya, ga wa pimrikaka shikalchiya Giwekkaluruya. Nshikaletanru Gitsrukaachi ga wa gimalwujetanru gajiya. ²⁰ Psolgogneko pejnuruyako mpoyagnutanru Goyakalu Girchi. Wutsrukate Geso Kristo giwakaya mpoyagnutanru.

Giykolu gnurchine chinanu ga wa gnunrochine chinanu

²¹ Kristo pikikolu chinanu gyijnaakakanu. ²² Gnunrochine yijnakotanna wannako gnuru Gitsrukaachi pixka. ²³ Gi rixanu suxojiwni wa gnurchi, Kristo pixka Walenwa gapatjetachinmanjiwu. Walenwa manchi gognetkakachri. ²⁴ Wa gapatjetachine pixka Kristo yijnakotna, waneko pixka rixanna wa gnunrochine yijnakotanna ganurunna psolpotuyako.

²⁵ Ga wa gixa jejine, gishinkanna ganunrone Kristo pixka rushiniku gapatjetachine. Reneknawa gapatjetachine chinanu. ²⁶ Gnunrochi pixka kpashiro rutakyaplo, powraluya gonu terkikolu tokanchiya. ²⁷ Gapatjetachine rawapyapa Kristo ganunropa pixka. Kagwakpirpotutko. Walenupa tixinripa, mapcholetpotupni, mumtuukotopni, gike pixka tixinripa, kpashiro tixinripa, ga wa gike muklukanutopa. ²⁸ Waneko pixka rixanna gnurchine. Rumkata gishinkletna ganunronna gimannako pixka. Wa gishinikagnunrotachri walenanuko gishiniknawa. ²⁹ Gi rixanu gi pagogneko satu gayegixmanetnawa, seyni girukotmanetnawa. Retwamonmanetnawa Kristo pixka wane rixlu gapatjetachinemane. ³⁰ Gi rixanu Walemanepsojitu. ³¹ Giyagni jeji giknokanna ruru, runro. Rupxaletanrotkani ganunro. ³² Wa gepinanna pamanepje rixanutkana. Tsrunnanni tye guyogimanatkaluru, seyni gita wane china Kristopirana ga wa gapatjetachinepirana. ³³ Seyni satkaka gixa gishinikagnunrota, gixnanuko gishinikinwako pixka. Ga wa suxo kagwakpiratanru tganuru.

6

Giykolu girchine chinanu ga wa wgenchine chinanu

¹ Wgenchine, gyijnakotanna girune ga wa gindrone Gitsrukaachiya. Gi rixanu tyenwa moyagkaklewlni.
² Pkagwakpiratanna puru ga wa punro. Tyenwa muchinanu yokanatkaluru gipiryegitkaluru.
³ Kigle pixinripa, ga wa gogiwekle pixinripa tyechijneya.

⁴ Ga wa gixa girchingi, gi wa gimtuwnakakanna gwugene, seyni ntseruwakanna Gitsrukaachi tseruwakanshinikanrewleya ga wa ruykoleya.

Giykolu gitsrukaachine chinanu ga wa kamrurewyegitjenna chinanu

⁵ Ga wa gixa wayegrechingi gyijnakotanna gitsrukaten gimaneya mpikleyma ga wa gitatleyma. Wanepotuko gixachinepgi gajiya. Kristo yegi kamrurewatyachine gixanu. ⁶ Gi wa gwayegretjeru getle chinanu gkmrurewatanu, wa yineru gigleretanu kamrutachine gixyawaka. Seyni Kristo wayegrene pixka gixanu. Ginshinikanu Goyakalu gishinikanru kamrurewatachinepgi. ⁷ Gulglenshinikanrewatachinepgi, gkmrurewatanu Gitsrukaachi chinanu pixka, gi wa yine chinanu. ⁸ Gimatlwa girukokta kigleru wa satkaka kamrutinri, tyeya yoptotanu Gitsrukaachiya, waka wayegrechriko waka gishpakkachriko.

⁹ Ga wa gixa gitsrukaachine, waneko pixka gixanna gwayegrene. Gi kawgutanutkana. Gi rixanu gixa gimatlwa Rutrukatanwa ga wa gixanu tengogneru. Ga wa gi wa manewle giglenu chinanu yoptotyapl Goyakalu wa yineru.

Kashri yoptopi Goyakalu giyakatyachri

¹⁰ Wanepnute gichkolunepgi Gitsrukaachiya ga wa Wale muchkonu giyakleya. ¹¹ Psoluko kashri yostayegipi Goyakalu giyakatyachri gitakinwa. Gimkata moyentunwale gixletinripa kamchi gitsrukate yokwireya chinanu. ¹² Gi rixanu wixa yagotkakinri gi wa kagragaluyma, gi wa kamaneruy-mako. Seyni tsrukakaluyma, ga wa tsru gitaakaluyma, ga wa tyegogne mapshagawaka gitsrukateneyma, ga wa kamchinneyma tenowaakakaya. ¹³ Giyagni gkoschekanru pejnuruko kashri ga wa kashri yostayegipi Goyakalu giyakatyachrikaka, gimkata moyentunwale gixinripa wa muglet-gognepa. Ga wa pejnuruko wane gixinpatka moyentunwale gixinripa.

¹⁴ Giyagni moyentunwalepgi. Gishrikapchijitanu galikakpotunanuya. Gistatletanru poyagkaklewlu. ¹⁵ Ga wa Kiglerpotunanu Tokanchi gigletanshinikanrewatachri galpokotikolu gyoshmakjixitinwa. ¹⁶ Ga wa pejnuruko pnute, gkashichanru yostayegipishpata. Walenwa galixlewlu. Waleya gimkata giwakletinri pejnuruko mugletu kashrekaka yochpiikaluru. ¹⁷ Ga wa gyoptotanru yowumatpu. Walenwa gognewatikaluru. Ga wa Giwekkaluru yoglelewpre gyoptotanu. Walenwa Goyakalu tokanu. ¹⁸ Psoluyako gagjigognetanu. Gagjipotutanu. Psolgogneko Giwekkaluruya gagjigognetini. Waleko gomkagjepututanu guyokachinepgi. Gagjigogneyegjetanna pejnuruneko kpashirine.

¹⁹ Ga wa gita chinanu gagjitanu, neneftukanutikolupa nyanumatinripa, pgujetanuwaka nunkakletyapluy giyogimanatkaluru wa Kiglerpotunanu Tokanchipirana. ²⁰ Wale chinanukni gitaakalurno, gostutkalurno nixinri, pgujetanuwaka nunkakletyapluy, wa numkata ginkaklewletinripa.

Galuklewlu

²¹ Ga wa gimatpiranyegityapno, Tichiko ginkakangi psoluko gi nixpokota. Walenwa wumole wushinikanru, ga wa Gitsrukaachi kamrurewyegitachri poyagkakachri. ²² Wale chinanukni wale nyokanyegetgi, wa gimatpiranyegityapnu, ga wa wale gimnanukgajityapgi.

²³ Gilewanshinikanutachinepgi moletkakachine. Gishniklewlu waneyapna ga wa galixlewlu Goyakalu Girchi chinanu ga wa Gitsrukaachi Geso Kristo chinanu. ²⁴ Gimutkalunepni pejnuruneko Wutsrukate Geso Kristo gishinikgognenatachine.

Kpashiri Pawlo Kirukate Wilipone Chinanu

Galuklewlu

¹ Pawlo ga wa Timotiyo, Kristo Geso wayegrene, kirukate.

Wa pejnuruneko kpashirine chinanu Kristo Gesonune, Wilipo gwachine, ga wa girukotjenna ga wa wanna yegi kamrurewatyachine.

² Gimutkalunepgi ga wa giglewanshinikanutachinepgi Goyakalu Wuru chinanu ga wa Wutsrukate Geso Kristo chinanu.

Pawlo gagjiyegitna Kristonune Wilipo gajene

³ Npoyagnutlu Noyakalute nushinikingi pejnunanuka, ⁴ psolgogneko pejnuruko nagjigognere pejnurunekgi gixa chinanu, numuwleya nagjiyegitgi, ⁵ wumatkaklewle chinanu Kiglerpotunatu Tokanchiya, muchinan-gogneyakawa ga wa xanigognenanu. ⁶ Tyeko naponshinikanyegitlu wa tye, Goyakalu wa kigleru kamrurchi yinuwakachri gixyegiya, poyagkakpotutanru rapokinpotunanuko Kristo Gesogognepa.

⁷ Kigleru nixa wa tye nyanshinikanyegityagi pejnurunekgi gixa. Gi rixanu naji nushinikgognenatyagi. Ga wa gostutkalurno nixinri, kiglekoxlu wa gitaymananuko gimutkalungi pejnurunekgi, wa nekakgityapna yine galikakpotunantu rixinri Kiglerpotunatu Tokanchi, ga wa nuykoyegitinri.

⁸ Gi rixanu Goyakalnu nupgujtajeru gi nixpoko gogaluklewle nixyagi pejnurunekgi gixa Kristo Geso gishiniklewleyma.

⁹ Ga wa tye nagjitlu Goyaku wa gixa gishiniklewle gixolewnananumtiripa gimatkalelwuya ga wa psoloko gimata getlewlyua. ¹⁰ Gimata getyaplu girni wa kiglerpotu. Ga wa mixashatkanepgi, ga wa mchinanuwatkanepgi Kristogognepa. ¹¹ Wa poyagkakachine kamrure gixo potu waneyapgi Geso Kristo chinanu, ralixkotikolupa ga wa rumalwutikolupa Goyakalu.

Pawlo gostutkaluru Kristo chinanu

¹² Naluklu, nomolene, wa gixa gimatyaplu wa nuknogjerkaka gapyegitno kosekinripa Kiglerpotunantu Tokanchi. ¹³ Wane rixatka nostutikolu Kristo chinanu rupguyetka psolupjiyako tsrupji, ga wa pejnuruneko yegi. ¹⁴ Ga wa gixo potu moletkakachine Gitsrukaachinune gaponshinikanutlu Goyakalu gitia gostutikolu chinanu. Tseruwanshinikanutna runkakletyapatkaluna Goyakalu tokanu mpiokane.

Pawlo gimuwyegitlu wa Kristo ginkakletpiranatikolu

¹⁵ Pimrine galikakni ranxaleyne ga wa yoтопиркаклеяна, runkakletluna Kristopirana. Ga wa pimrine ruglenshinikanrewleyne wane rixa ginkakletluna. ¹⁶ Wanna nyi rushiniklewleyne runkakletluna, gi rixanu rumatna wa gitni gitaakalurno nuykoyegityaplu Kiglerpotunantu Tokanchi.

¹⁷ Ga wa pimrine rumkapnugleyne runkakletluna Kristopirana. Wanepotuko mixkane. Wanna gishinika salewnakakletyapno nostutikoluyapa.

¹⁸ Giyagni ɿklunerni? Tyepjeni. Pnumnu gixikolmaka, waka gixashluya waka galikakaya, Kristo ginkakletpiranatikolu. Tye chinanu numuwata ga wa numuwatanu. ¹⁹ Gi rixanu numatlu tyenwa nognewatinri chinanupni gixa gagjigognere chinanu, ga wa Giwekilaluru Geso Kristonu gapikikolupa chinanu.

Gita getanu giwekunwa Kristo

²⁰ Nalukyawakpotuko ga wa nkagwakanshinikanutyawakpotuko, wa gikena nupatewatanu, gi wa popiklerukno wa psolgogneko pixka ga wa xani koxa. Wane nixa wa Kristo tsru potu rixinripa nomaney, ga wa nuwekinriyapa ga wa nupninriyapa. ²¹ Gi rixanu gitu getanu giweklunwa Kristo, ga wa wupnale walenu kigleru wukshikinripa. ²² Ga wa nomane nuwekinriwa tyenwa nkamrure gwinripa. Gi numata giru ntsomitanu. ²³ Gi rixanu wa psolpotuyako gepikmaka naluka. Nalukpotutmaklu nupnale ga wa Kristo yegi nwinripatka gi rixanu walenu kigleru potu. ²⁴ Seyni nomane nwinriwa galuukalurpotni gixa chinanu. ²⁵ Ga wa tye napon-shinikanutinri, numatlu wa gewi nutukinripa. Ga wa pejnurunekgi gixa yegi nwinripa. Wa gixa kosekinripa galixleya ga wa gimuwatinripa galixleya, ²⁶ ruxolewninripa galixkowle Kristo Gesoya gitu chinanu wa nyayegit-initnakgi.

Giyagotakanu galixlewlu chinanu

²⁷ Tyepjeni. Wa gixjetyawaka Kiglerpotunanu Tokanchi Kristopirana kgimuka gixinwa, wa netapinipgi waka pnu nwini, gixapirana nyijnakot-inripa moyentunwale gixinri. Ga wa nyijnakotanu pagiweklepje gixinri, ga wa pashinikanurunepgi, gikamrurewkakanu galixlewlu chinanu Kiglerpotunanu Tokanchiya. ²⁸ Giketsotaji mpiikaako gkamnijeneya. Walenwa gamgikolu gimaxikole wanna chinanupa ga wa gixa chinanupa gognewatikaluru gimaxikole. Ga wa tyenwa Goyakalu giyakatyachri, ²⁹ Gi rixanu gixa geneeka Kristo chinanupa gi wa Wale galixinripjeni seyni koxa wa nsalewninripa Wale chinanu. ³⁰ Gixa koxa waneya walerutu yagotkaklu, wa getyegityano, ga wa xawakni gyijnakyegitno wa waneyno.

2

Kristo mturu rixka; wanepnute tsru potu rutaaka

¹ Wane rixa. Waneru gimnanuklu Kristoya, ga wa waneru gishiniklewlu wa ruglenshinikanyegeityagi, ga wa waneru gimatkaklewlu Giwekikaluru, ga wa waneru shinikanuwlu ga wa getwamonrewlu. ² Giyagni mpoyankakanru numuwle, walerutu gyanshinikanutinri, ga wa walerutu gishiniklewlu waneyalunepgi, ga wa pashinikanurunepgi gixinri. Sat-upjerutu shinikanchi waneyapgi. ³ Gike gkamrutanu gimkapnugluya. Gike gkamrutanu maleshawaka galixkotnachinewa gixinripa. Seyni mal-ixkotnachinewagi gixinri satkaka kagwakanna pimrine wale pnu te tsrune. ⁴ Satkaka gi wa gixanuko getanu, seyni pimrine koxa getanu.

⁵ Waneyapgi walerutu shinikanchi wa Kristo Geso waneya. ⁶ Walenwa Goyakalu gixyawakpotuko rixinri, gi wa rushinika gitakletnawa wa Goyakalu pixka rixinripa. ⁷ Seyni Walenanuko maleru rixnawa. Wayegrechri-poga yoptotapa. Yineru yaglu rixnawa. ⁸ Ga wa yineru pixka retikolu, mturu rixnawa yijnaklewatinri rupnalpotunanukopa, koroshishkita rupnirriya. ⁹ Giyagkoxni Goyakalu tsru potu rutaklu. Ga wa renekgiwakatu pejnuruneko giwaka pnu te tsru. ¹⁰ Wa Geso giwaka yoptsojityegitnripna pejnuruneko tengogne gajerkaka, ga wa tyechijne gajerkaka, ga wa chiji gitokote gajerkaka. ¹¹ Ga wa pejnurune gipgujtatanu wa Gitsrukaachi rixinri Geso Kristo, rumalwutikolupa Goyakalu Girchi.

Gapkapanru gognewatikaluru

¹² Giyagni, nushinikanune, wa psolgogneko pixka gixa yijnakletyawaka, gi wa gixa yegi nwiniko pshinipje, seyni wanepnute xawakni wa namgini, pikachinepgi ga wa gitatatachinepgi gapkapanru gognewatikaluru. ¹³ Gi

rixanu Goyakalni wa gixa gitokote kamrurewatyachri galukyawakaplu ga wa gkamrutyaplu Wale gigleretyawaka.

Katalkaka pixka gixanu tye psolchijneyako

¹⁴ Pejnuruko gkamrutanu mkegemgakanepgi ga wa mnutan-shinikanutkanepgi. ¹⁵ Poyagkakpotutachinepgi ga wa powralunepgi. Goyakalu wgenenepgi muklukanuwnakanepgi gimuweekakgognenatachime mpotukane ga wa pupjetachinetskalaya. Wannatskala mpokamlawatya katalkaka pixka tye psolchijneyako. ¹⁶ Giweklupirana gomkagitchinepgi, nalixkowatinripa Kristogognepa, gi wa maleshawaka nyagotlewatini, gi wa maleshawaka nyaprewatini. ¹⁷ Wane rixa, wa Goyakalu yegi ganikinri geneakashle, ga wa wale gogo rupkaaka winga, waneko pixka nixanu. Gixa galixle gogo, walenna gixa geneakashle ga wa gipxaklewle gogo, rupkaako nuwekinri. Waleywa numuwata ga wa numumuwatgi. ¹⁸ Waneko pixka gixanu gixa. Gimuwatanu ga wa gimumuwatanno.

Pawlo gimatkakpiranyegitlu Timotiyo

¹⁹ Gitsrukaachi Geso chinanu nkagwaka gixa yegi yokanretlu Timotiyo pshinitsonu, gixapirana numatinripa, kiglenshinikanupno gita koxa. ²⁰ Gi rixanu gikena waneyno wale pixka gixanshinikanutachri wa girukotyegityapgi galikaka potu. ²¹ Gi rixanu pimrine pejnuruneko gjigalu wannanuko. Gi wa Kristo Gesonu rushinikna, Timotiyo pixka. ²² Seyni gixa gimatlu wale yantaletkalurutkani, wa satu gituru ruruyma pixka rixa gikamrurewletno Kiglerpotunaru Tokanchiya. ²³ Giyagni tye nkagwaka yokanreta wa net-inwachi gita gikta nixpokotanu. ²⁴ Ga wa Gitsrukaachi naponshinikanuta gita koxa yayegitangi pshinitsonu.

Gepagrotitopiran

²⁵ Nushiniklu galuukalurni nomole Gepagrotito koxa nyokanyegityapgi. Walenna nukamrurewantru ga wa nusolaltapanru Geso chinanu ga wa gixa yokanatanru wa nmagatinri nupxakjetjeru. ²⁶ Gi rixanu rogaluk-lewletgi pejnurunekgi gixa. Kojwakanshinikanuta gi rixanu gixa jem-piranyegitlu yayixapinritka. ²⁷ Gi rixanu walexpootapa. Rupnakastsini. Seyni Goyakalu getwamonutlu, ga wa gi walepjeni seyni gitni koxa. Gi wa wamonchi wanepnute wamonchi waneyapmakno. ²⁸ Giyagni giyampotu nyokanatatkalu wa getyapatnaklu gixa, gimuwatinripa, ga wa nma wamonuwatinitipa. ²⁹ Giyagni Gitsrukaachi chinanu gyoptotanru psolu gimuwleyako. Gkagwakpiratanna wale pixkalune. ³⁰ Gi rixanu Kristo kamrure chinanu rupnakastsini. Kyowikowaka rutaknawa poyagkakyaplu wa magatinri gixa gipxakyano.

3

Ramgiyno pejnuruko wane nixlu, wa waneyapno Kristo

¹ Wanepnute, nomolene, gimuwatanu Gitsrukaachiya. Galikakni gi nayoklu wa tye numepe yonreyegityatnakgi ga wa wale poyegitgi.

² Ggirukotinwa wanna kewenyegiya. Ggirukotinwa gektutu kamrutchinyegiya. Ggirukotinwa gistaakmanetachinyegiya. ³ Gi rixanu wixakni wa sajruka gistaakotachinwu, wa Goyakalu kamrurewyegitachinwu Gi-wekikalurya, wa Kristo Geso galixkowatyachinwu, ga wa manchi maponshinikanutkanwu.

⁴ Seynimka gita koxa waneya naponshinikanutyaplu nomane. Pimrinemka kagwaka gaponshinikanremanetnawa, ga wa gita galikakni.

⁵ Yokgipgogne chininri, sajruka gistaakalurno. Gisrayiliklopishno. Ga wa Migaminerno. Gewreyopotno Gewreyoneyegiya. Wa Tokanchi Yakanatkalurupiranaya Gwariseyno. ⁶ Ga wa muchkowanshikanrewlupiranaya gapatjetachine kojwakjetachrinamo. Ga wa Tokanchi Yakanatkaluru poyagkaklewlepiranaya, mukluukatunanno.

⁷ Seyni klunerkakakokta wane nixlepmaka, walenna gamgikaluru nushinika Kristo chinanu. ⁸ Seyni galikakakni nushiniklu psoloko gamgikaluru rixinri wale chinanu wa kiglerpotumanu rumatikolu Kristo Geso Nutsrukate. Wale chinanu ramgiyno pejnuruko, ga wa nushiniklu giknokashatkalurupa rixinri waneyapno nixinripa Kristo. ⁹ Nushinika Waleyia netikolupa, gi wa gitanuko poyagkaklewle waneyalutupno. Walenwa Tokanchi Yakanatkaluru chinanu. Seyni Kristo galixikolu chinanni, Goyakalu poyagkaklewle waneyalutupno galixlewlu chinanu. ¹⁰ Nushinika gimatletyaplu Wale, ga wa Wale yotunre guyakle, ga wa Wale salewnale. Ga wa Wale gipnale pixkapotuko nixikolupa. ¹¹ Gikta nixpoko gapkapletanru gipnachinetskalaya yotunru.

Nkosekananumta potukatkaluru napkapinripa

¹² Gi wa nyoptotawa. Gi koxa mmagatikatuwano. Seyni nkosekananumta gikta nushatkapanru, ga wa gishatkapkalurupno Kristo Gesoya. ¹³ Nomolene, gi nkagwaklu wa nushatkapyatkalu. Seyni satupje nkamruta. Wa giknogachritka galikaka numuslawatata, ga wa nmuchkowamta nyoptotyaplu wa kanashkatachri geneekikolupa. ¹⁴ Nkosekananumta potukatkaluru gimaxklechi napkapinripa, waneyapno kanashkatachri geneekalurupa. Walenwa Goyakalu chanixle tengogneya Kristo Geso chinanu.

¹⁵ Giyagni pejnuruneko mmagatikane tye yanshinikanutanna. Ga wa pnuko gyanshinikanutini, tye koxa Goyakalu gipgujetyegitangi. ¹⁶ Seyni wapkapanruyatka wanepotuko wixjetanu.

Wkagwakpotutlu Wognetkakjeru

¹⁷ Nomolene, gixa mkoje gyimanno. Getanna wanna wane gixachine wa wane wixini gixa yimanunwu pixka. ¹⁸ Gi rixanu wane rixna pimrine wa gixo kata nchinyawakgi ga wa xawakni nchinyawakgi nchiyagleyma, wa Kristo koroshishkitate kamnixjene pixka gixa yanretachine. ¹⁹ Wanna yoptukyawaknpi wa gamgikowaka. Ga wa royakalutnanwa ginanwakna. Ga wa ralixkowlenninwa patmennuna. Wannanwa tyechijne gajeruko gishinikachine. ²⁰ Gi rixanu wixni wa tengognechijne gajenwu. Waneya wkagwakpotutyu Gitsrukaachi Geso Kristo Gognetkaklewatachri. ²¹ Wale kashrijetanru wumane gimupatewatkaluru Wale goyaknumane pixka rixinripa. Waneko rixa kamruretyawaka ruyaklelyea, wa rumkata yijnaakaklewatinripa ptowropotunanuko yijnakotyaplu.

4

Poyentunwalepgi Gitsrukaachi chinanu

¹ Giyagni nomolene nushinikanune ga wa nogalukletanune, gixni wa numuwle ga wa gixni wa nsagyeta. Poyentunwalepgi Gitsrukaachi chinanu, nushinikanune.

Ruykotkana pashinikanurone rixinripa

² Nagjitgi Geyotyana ga wa Suntiche pashinikanuronepgi Gitsrukaachi chinanu. ³ Nagjitkoxyi, nukamrurewatjeru mixashatkatyi, pyoptotyapna wanna nupxakjerone Kiglerpotunanu Tokanchiya, ga wa Klemente koxa,

ga wa pimrine nukamrurewatanune, wanna wa giweklu kirukate gitakgi-wakatkalune.

Gimuwgognenatanu Gitsrukaachiya

⁴ Gimuwgognenatanu Gitsrukaachiya. Numepe wane chinretatnaka, Gimuwatanu. ⁵ Pejnuruneko yine yegi rumatikolupa gmayognu. Gi gowukatkalu Gitsrukaachi. ⁶ Gikeko gkojwakanshinikanutinwa. Seyni psoluyako gagjigognereya ga wa gagjireya mpoyagnutlewleyma, ginkakanru Goyakalu gagjitanrukakaya. ⁷ Ga wa Goyakalu giglewanshinikanrewle pejnuruko shinikanchi pnuterutu gimretgajitangi ga wa rumretanshinikanutangi Kristo Gesoya.

Tyepirankaka gyanshinikanutanu

⁸ Wanepnute, nomolene, tyepirankaka gyanshinikanutanu: girkakakokta galikakni, girkakakokta kagwakpiratkaluru, girkakakokta wanepotuko gixachri, girkakakokta powralu, girkakakokta gigleretkaluru, girkakakokta kiglepiranyegiru, wane chinini wa shinikanrewlu ga wa wane chinini gimalwuru, tyepirankaka gyanshinikanutanu. ⁹ Wa gitaya gasruukakinri, ga wa gitaya gyoptotanrukaka, ga wa gitaya gyijnakotinrikaka, ga wa gitaya getinrikaka, tyekaka gkamrutanu. Gixaymaplu giglewanshinikanrewlu Goyakalute.

Wa nmuchkotjeru chinanu, ptowrunanuka numkata

¹⁰ Tsru potu numuwle nixa Gitsrukaachiya wa xanitka rupgujewnatnaka gishinikyatinakno. Wane gixa gishiniklejetyano, seyni gi giglepoktapanana gixni. ¹¹ Gi wa magatikoluya wane nchinia. Gi rixanu nasrugatkalu npoyagnutyalu klunerukokta netinri. ¹² Numata mturu nixletkotinri, ga wa numatlu nponikowatinri. Pejnurkakayako ga wa psoluyako nasrukikolu, waka jinanru waka nachlu, waka gioxoylu waka magatinriya. ¹³ Wa nmuchkotjeru chinanu, ptowrunanuka numkata.

Wilipone genekashlekaka

¹⁴ Seyni kigleru gkamruta wa gipxakyawakno nsalewninriya. ¹⁵ Gixa koxa gimatlu, Wilipongi, wa reginkakletkoklunu Kiglerpotunanu Tokanchi, wa Masetoni nyinitka, gi wa pimrineko gapatjetachinkaka seyni gixapje gipxakno wa genekikoluya ga wa yoottikoluya. ¹⁶ Gi rixanu wa Tesalonika nwanatini pakatkaka gyokanyeigitno wa nmagatinrikaka chinanu. ¹⁷ Gi wa nujgalu nenekekikolu, seyni, nujgalu gixa kamrure gwinripa, wa ruxolewninripa gixa geneakashle chinanupa. ¹⁸ Ga wa pejnuruko waneyno. Nponikowata. Gepagrotito nyoptotyalu wa gixa yokanatanru. Walenwa pgamluru potu pixkalutni. Geneakashlu galuukalurnu, wa Goyakalu giglertanru. ¹⁹ Ga wa Noyakalute genekpolutangi pejnuruko gixa magatinri Wale ponikowle, royaknu yegi gajeru gixyawakpotuko Kristo Geso chinanu.

²⁰ Goyakalu Wuru gimalwugognenatkalarupa psolgogneputunanukopa. Wane gixkalurupa.

Galuklewluwa ralipretya

²¹ Galukanna pejnuruneko kpashirine Kristo Gesoya. Wumolene gitaymalune galukjixgi. ²² Pejnuruneko kpashirine galukjixgi, ga wa Susapji gjajene kpashirine galukjixpotutgi.

²³ Pejnurunekgi gixaymaplu Gitsrukaachi Geso Kristo gimutlelewle.

Kpashiri Pawlo Kirukate Kolosane Chinanu

Galuklewlu

¹ Pawlo, Kristo Geso yokanatanru, Goyakalu gishinikyawaka, ga wa wumole Timotiyo kirukate.

² Wumolene kpashirine ga wa kalixaklerune Kristoya, Kolosa gajene chinanupa.

Gimutkalunepgi ga wa giglewanshnikankaakalunepgi Goyakalu Wuru chinanu.

Pawlo poyagnutlu Goyakalu

³ Psolgogneko wagjigogneyeegognenatinkakgi, gixa chinanu wpoyagnutlu Goyakalu, Wutsrukate Geso Kristo Giru. ⁴ Gi rixanu wyijnakpiranye-gitgi galixyalu Kristo Geso, ga wa pejnuruneko kpashirine gishinikinri.

⁵ Wpoyagnutlu gkagwakanru chinanu wa tengogne gimretkaluru gixanupa, wa muchikawa gyijnakpiranatanru galikakpotunanu Kiglerputunanu Tokanchiya. ⁶ Tyeni wa gixa yegi gapokachritka tokanchitka. Waneko pixka rixa psolchijnekoyako. Kigleru kamrurchi kamrurewata ga wa tseruwna. Waneko pixka rixa gixyegiya wa geyijnaklepirangognetinyakawlu ga wa gimatpotutinyakawlu Goyakalu gimutlewle galikakni. ⁷ Wa Gepapra wane gixa ginkakletyawakgi. Wixje wayegrechri walukanru. Walenwa poyakkakachri ga wa Kristo kamrurewyegitachri wixa chinanu. ⁸ Wale koxa ginkakwu gishiniklelepirana Giwekikaluruya.

Pawlo gagjitlu Goyakalu renekyapna rumata jemyapluna Giwekikaluruya

⁹ Giyagni weyijnaklepiranyegitinitkagi gi wutuka gagjigogneyegletgi. Wagjiyegitgi kgimatkalerunpotupgi Wale gishinikyawakapirana, psoluko gimatkalewleya ga wa gimata jemlewluya. Wagjitlu wa Giwekikaluru gimatkakpotutgi ga wa gimata jemkakangi. ¹⁰ Wagjitlu wa Gitsrukaachi gimusknunepgi gixa yanretinripa psoluko rugleretanruya, pejnuruko kigleru kamrurchi gomkagitinripa, ga wa ntseruwninripa Goyakalu gimatkoluya. ¹¹ Wagjitkoxlu gixa muchkotikolupa psoluko giyaklewlu yako, rixyawakpotuko royaknu muchkonu, psolpotuyako kashnanta kgognenatachinepgi ga wa mapognanunepgi gimuyleymako.

¹² Wagjigogneta wa Girchi mpoyagnutinripa. Walenwa gimusklu gixkakjeru kiglerkaka gyoptotinripa wa kpashirineyamananuko pokamlawaka gajene. ¹³ Wale koshpakwu mapshagawaka gitakikalunyegiya, ga wa rushinikanru potu Gituru pogirewatayawaka rutakwu. ¹⁴ Wale chinanukni koshpaakalunwu. Kaspukmukochiretkalunwu.

Kristonwa Goyakalu yaglu

¹⁵ Kristonwa metkotu Goyakalu yaglu. Walenwa muchinanu wugenekaluru pejnuruko giyakotkaluru pnute. ¹⁶ Gi rixanu Waleya ruyakotika pejnurkakako tengogne gajeru, ga wa chiji gajeru, getkalurkaka ga wa metkotkaka, wa pogirchine, ga wa gitsrukatakowaakaka, ga wa tsrukakalune, ga wa tsru gitaakalune. Pejnurkakako Waleya giyakotka ga wa Wale chinanupa. ¹⁷ Ga wa Walenwa muchikawluru potu pejnurkakako pnute. Ga wa Wale chinanukni wane rixa pejnurkakako.

¹⁸ Walenwa manchijiwu; Walenwa gapatjetachinejiwu. Walenwa yinuwakikolu. Walenwa muchinanu gishpkachri gipnachinyegiya, muchinanu rixinripa ptowrupotunanukoya. ¹⁹ Gi rixanu Goyakalu

gigleretyawaka Kristo rawinripa psolpotunanuyako. ²⁰ Wane rixa Kristo chinanu rupoyikgayegitlu Goyakalu pejnurkakako Wale yegi rixinripa. Gilewanshinikanrewlu rixa koroshishkitategraga chinanu. Wale chinanukni rupoyikgayegitka chiji gajerkaka ga wa tengogne gajerkaka.

Gipoyikgayeglewlü Kristo gipnale chinanu

²¹ Ga wa gixa muchinanu maleka gajenenangi. Ginshinikanuya kamnixlewanatyachingi mugletu gkmrure chinanuya. ²² Wane rixanu wa gixa gipoyikgayegitka Gesomaneya rupnale chinanu, kpashirinetkagi. Rupnana ranikyapgi powralunepgi ga wa muklukanuwnakanepgi Goyakaluyegiya. ²³ Wane rixanu wa gixa gomkagi galixlewleta poyegitkalunepgi ga wa muchkowanxinikanutachinepgi. Gi koxa gituka kagwakletanru wa psolukopiranra giyinakota Kiglerpotunanu Tokanchiyegiya. Tye tokanchi ginkakletkalurupa pejnuruko giyakotkaluru yegi, tengogne rapukote gajeru yegi. Tye tokanchi kamrurewatyachrino gitni Pawlo.

Kristo gixa gitokote gwachri Walenwa goyaknu kagwakikolu

²⁴ Wa xani numuwata wa nsalewinriya gixa chinanu, ga wa npoaygakakanru nomaneya magatinriya wa Kristo salewnale gimane chinanu. Gapatjetachine wannanwa Kristomane. ²⁵ Wane nixa kamrurewleta gapatjetachine yegi. Girukotjerna Goyakalu gitakyawakno psoluyako numatkakyapgi Goyakalu tokanupiranaya. ²⁶ Walenwa giyogimanatkaluru gishyatkalurunanu muchikawgognepotunanuyakawa ga wa gimuweekakgognekluskakananniyegiya. Ga wa xawakni gipgujetkalurutkani kpashiritenyegiya. ²⁷ Wanna kpashirine, panenetskala gwiyachine, raluka gimatkakleta Goyakalu wa giyogimanatkaluru ponikolewlepiranaya. Tye kgoynuru ponikolewlunwa Kristo, gixa gitokote gwachri. Walenwa goyaknu kagwakikolu.

²⁸ Wale wunkakleta wixa. Pejnuruneko yine wuykota, ga wa pejnuruneko yine wunkaka psoluko gimatkalewluya, Goyakalu yegi wanikyapna pejnuruneko yine mmagatikane Kristoya. ²⁹ Wale chinanu koxa nyaprewata. Nmuchtowata, rixa kamruretyawaka gitaya Goyakalu giyakle.

2

Ponikolewlü, wa gimata jemlewlü ga wa gimatkalewlü

¹ Gi rixanu naluklu gixa gimatnripa gipsonanru yagotanshinikanru nixa gixa chinanu ga wa Lawtise gajene chinanu koxa, ga wa gin-nakokta nma metgoijetjene nomaneya. ² Nagitlu Goyakalu wanna gaji gimnanukikolupa, ga wa wanna gipxaakakinripa rushiniklewleyna. Nagitlu wa psoluko gaponshinikanrewlu ponikolewle waneyapna rumata jemyapfun, ga wa rumatpotutyapluna Goyakalu giyogimanatanru Kristopirana. ³ Kristonshinikanu rawa pejnuruko gimata jemlewlü ga wa gimatkalewlü yogimatkaluru. Walenwa ponikolewlü gignantaakaluru. ⁴ Tyenwa nchina, gi satuna ma yokwityanupgi kigleru tokanchiya. ⁵ Gi rixanu gimka wanemanepno, seyni wa nonshinikanuya gixyegno numuwleyma. Netanatlu giglepoklewle ga wa netanatlu poyeggalixle gixyalu Kristo.

⁶ Giyagni wane gixa yoptoletlu Gitsrukaachi Geso Kristo, waneko pixka gixa Waleya yanretanu. ⁷ Waleya poyegirunepgi. Wale gogo kamrutekalunepgi ga wa muchkotgalixletkalunepgi, wane gixa ginkaakotatka. Poyagnutachinpotpupgi.

Ponikpotlu rixinri giweklu Kristoya

⁸ Getpotutinwa gi satuna koshripatangi Goyakalu tokanuyegiya, gitmatlelu galukalchinangi. Xakoka gi wa gike gapri migje yokwiri gomkagitanu wa yine giykole gixyawaka. Walenwa tyechijne gajerkaka gixyawaka, gi wa Kristo gixyawaka.

⁹ Gi rixanu Kristomane rawa psolpotuko Goyakalpoga mmagatikatu. ¹⁰ Ga wa gixni mmagatikangi Waleya. Walenwa pejnuruneko tsrukakalunjiwu ga wa pejnuruneko tsru gitaaikalunjiwu. ¹¹ Kristoya sajruka gistaakolungi gixa, sajruka gistiklewluya myochi mkmrutikotu. Guyagni Kristoya sajruka gistikolchinangi gixa gitspalatyalu gimane gixjetyawaka. ¹² Waleyma kapnatkalungi katlewluya. Katlewlukoxaya Waleyma yotunkaakalungi, Goyakalu kamrure galixikolu chinanu. Goyakalni Wale yotunkakachri gipnachinetskalaya.

¹³ Ga wa gixa gipnanatachingi gmukochireya ga wa gma sajruka gistikmannuya, seyni Kristoyma giweekaakalungi. Ga wa kaspukmukochiretgi pejnuruko gmukochire. ¹⁴ Sheyitlu wa myochi yonatikaluru wixapirana wa tokanchi gitaaikaluru wuklukanuwnakanatjeru. Potuklewakayà koshpakyalu. Koroshishkitu ruxpatlu mukochri klawoyma. ¹⁵ Pejnurunniko jjirükanna tsrukakalunni ga wa tsru gitakalunni. Rakaglokna koroshishkitateya. Wane gixkalunni rekagitna pejnuruneko getanu.

Niikaluru ga wa girkaluru

¹⁶ Guyagni gi satuna gixpiranatangi niikaluruya, ga wa girkaluruya, ga wa meiywlupiranaya ga wa regonotle ksurkakapiranaya, ga wa gapnanutikalurgognekakapiranaya. ¹⁷ Tyekakni wa ginachripa mayawlepje, seyni wa ginachripotupa Walenwa Kristonu. ¹⁸ Gi satuna kegekangi raluukalchinanru mturu gitakinwa ga wa towrechine gyonyegitinripa, ga wa kaygawlupirankaka gyoshmakinripa. Tyekaka galukachri walenwa maleshawaka galixkotnachriwa, gi rixanu yanshinikeyegitlu yinerumane. ¹⁹ Ga wa gi wa Jiwchi yegi rawini. Wa Jiwchiya psolmaneko gapiikaluru ga wa yoxtaakaakaluru yoklekakaya ga wa gipetskakaya. Tseruwna wa Goyakalu tseruwnakakleya.

Gike gapri migje wa tyechijne gajerkakaya towutikalungi

²⁰ Wa Kristoyma gipnachine gixini tyechijne gajerkakaya, gi wa tyechijne giwekanatychine pixka towutkalunepgi. ²¹ Gi satuna yineru towutangi, "Gi gkashichanru. Gi getumganru. Gi wa gkamrukanru." ²² Tye yokanrukaka walenwa yineru ginanshichanrukaka, ga wa yineru ginkakletpiranatanrukaka. Ga wa kashichanrukaka, ga wa getumganrukaka, ga wa kamrukanrukaka pejnuruko nikawnachripni. ²³ Tye yokanrekaka galikaka kagwaakaluru kgimatkalerune tokanu, gi rixanu yineruko gishiniklu gi rixpoko yonogyeglewatanu ga wa yineru mturu rixasha gitakletnawa, ga wa psolmukhonuko girukotmanetnawa. Tye yokanrukaka gi gipxaklu yineru, seyni walepje, wa manchi gishinikachri gigleretlu.

3

Teno gajerkaka gjiganu

¹ Guyagni Kristoyma yotunkaakalune gixini, teno gajerkaka gjiganu, Kristo yegi, Goyakalu potuklesretate tuplatchri. ² Teno gajerkaka gyanshinikanutanu. Gi wa tyechijne gajeru gyanshinikanutanu. ³ Gi rixanu gipnachinetagi ga wa Goyakalu yogimagiwekletanunetkagi Kristoyma. ⁴ Wa Kristo gippgujewnipatka, Walenwa gixa giwekle, waneklupa gixa koxa gipgujewnanu Waleyma royaknu yegi.

Giknokanutkalu wa kapokotu yineru gixanatini

⁵ Giyagni gkamakatanru gimane gajerkaka wa tyechijne gajeruya; gapoklewlu, mpowrannuchi, sotanugnuchi, gektutu galuklewlu, ga wa gimkapnuglu. Walenwa yagluchisha yonogyegitikolu. ⁶ Wale chinankaka Goyakalu jigekanuwyegitna malixaklene. ⁷ Tyekaka gixa koxa gimuyananatini muchikawa, wa tyekaka gimwanatini. ⁸ Ga wa xani giknokanru pejnuruko tyekaka wa gixyegiya: jgekanchi, gimtuwakchi, gektutkaka, mupashiregnuchi, ga wa kapatmenuru tokanchi. ⁹ Gi wa gyokwikakanu. Giknokanutkalu wa kapokotu yineru gixanatini wa kamrureymananuko. ¹⁰ Gerotewanutanuka. Walenwa gerotewkaakaluru gimatkalelwu chinanu, giyakotjeru yaglu pixka. ¹¹ Wane galikakni maleshlu Kriyko, gi Goteyoko, gi sajraka gistiklewluko, gi wa msajraka gistiklewluko, gi wa patokanu yanumatyachriko, gi wa Sitya gajeruko, gi wa wayegrechriko, gi wa gishpachriko. Seyni Kristonwa psolpotuko, ga wa pejnuruneko rawa.

Kpashirineppgi ga wa kaluklewaklerunepgi

¹² Giyagni Goyakalu tsomitanune gixinri kpashiringi ga wa gishinikalungi, kgetwamonrerunepgi, ga wa gishinikanrewluya getinna pimrine. Ga wa mturu gixlewlu, ga wa mayognuchi, ga wa mapognanuchi waneyapgi. ¹³ Gkashnantaakakanu ga wa gkaspukakini waneygi nchininipa wa satu kojwakingi. Gitsrukaachi pixka kaspukyagi gixa, waneko pixka gixanu gixa. ¹⁴ Ga wa tyekaka pnute kgishiniklewaklerunpotupgi. Gishiniklewlu chinanu panshinikanurune mmagatikanepgi.

¹⁵ Kristo gilewanshikanrewle gixa gaji girukotlewatychripni. Tye chinanu koxa tomgakalungi pamanepjerungi. Ga wa poyagnutlewachinepgi. ¹⁶ Kristo tokanu gixa rawanu. Wane ponikowatinripa psoluko gimatkalelwuya. Ginkakakanu ga wa giykokakanu Goyakalu tokanu shikaleya, ga wa gimalwuru shikaleya, ga wa pimrikaka shikalchiya Giwekikaluru. Mpoyagnutinri nshikaletanru Goyakalu gixa gajija. ¹⁷ Ga wa pejnuruko wane gixanru wa ntokanu ga wa gkamrure pejnuruko Gitsrukaachi Geso giwakaya gixanru. Mpoyagnutanru Goyakalu Girchi wale chinanu.

Gerotu giweku

¹⁸ Gnunrochine, gyijnakotanru gganurune wa Gitsrukaachinune gimuknu gixyawaka.

¹⁹ Gnurchine, gishinikagnunrotanu. Gi wa gimtuwnayegitanna ganunrone.

²⁰ Wgenchine, gyijnakotanna girune ga wa ginrone psoluyako, gi rixanu tyenwa Gitsrukaachi gigleretanru.

²¹ Girchine, gi wa gimtuwnakakkanna gwugenene, wa ma mernuwatintipna.

²² Wayegrechine, psoluyako gyijnakotanna gitsrukatene gimaneya. Gi wa gwayegretjeru getle chinanu gkamrurewatatu, wa yineru giglerestanru kamrutachine gixyawaka. Seyni wane potuko gixgajitachineppgi, Gitsrukaachi pikachineppgi. ²³ Ga wa pejnuruko gkamrutanru, ponshinikanurunepgi gkamrurewatini, Gitsrukaachi gkamrurewyegitini gixinri. Gi wa yineru gkamrurewyegitini pixka. ²⁴ Gimatl uwa Gitsrukaachiya gyop totanru gapnutikolupa gixanupa. Gi rixanu Gitsrukaachi Kristo wayegrengi. ²⁵ Gi rixanu mpoyagkaknuchi kamrutachri, mpoyagkaklewle rapnutiko. Gi wa manewlu giglenu chinanu yoptotko yineru.

4

¹ Gitsrukaachine, mpoyagkaka getletanna gwayegrene, ga wa wanepotuko gixa getletanna. Gimata gixa koxa waneya Gitsrukate tengogne.

Gomkagi gagjigogneretanu

² Gomkaagagjigogneretanu. Giyokanu wale chinanu. Mpoyagnuwjetanu. ³ Wane gixinu wixa koxa gagjigogneyegitanu, Goyakalu kotpukgipgyapto-tyegitanwu wa tokanchi chinanupa wunkakletyapluyi giyogimanatkaluru Kristopirana. Wale chinanukni gostutkalurno. ⁴ Gagjitanru Goyakalu pgujetanuwaka nixa ginkakletyapluyi tokanchi.

Nchipetgognenatanru ruglepotkapinrigogne

⁵ Gimatkalewleya gyananu maleka gajenyegiya. Gimuprekinwa ruglepotkapinrigogne. ⁶ Ntokanu psolgogneko gimutlewlu tokanchi gyanum-gognenatini, tuwu morotikaluru pixka, giminatinripa gi gixpoko gimkata giyletanna satkaka.

Rixje kamrurewatachine Pawlo

⁷ Pejnuruko gitapirana runkakangi Tichiko. Walenwa wumole wushinikanru. Kamrurewaklerni poyagkakachrini. Wixje wayegrechri Gitsrukaachi chinanu. ⁸ Wale chinanukni nyokanatl u gixa yegi, wa gixa gimatpiranyegityapwu ga wa giminanukgajitkalunepgi. ⁹ Waleyimalu Gonesimo wumole, galixachri ga wa gishiniikaluru. Gixayegiya giyakatyachrini. Wanna ginkakangi pejnurukopiran gewi gajeru.

¹⁰ Ralukjixgina Garistarcho, wa gitayma gostutkaluru, ga wa Marko wa Wirnawisi palikleru. Walepirana gyoptotlu yokanrukaka. Wale yayegetinipgi, gyoptotanru. ¹¹ Ga wa Geso koxa, wa Poyagkakachri chinkaluru, galukjixgi. Wannanwa sajraka gistaakotachinemkojeyeginanna. Nyipjenwa nukamrurewatjene Goyakalu pogirewatyawaka chinanu. Nyinwa numnanukjene. ¹² Ralukjixgi Gepaprwa gixa yegi giyakatyachri. Walenwa Kristo Geso wayegreru. Ragjigognereya yagotgognenata gixa chinanu, moyentunwale gixinripa, mmagatikanepgi ga wa gishinikanutkalunpotupgi wa psoluko Goyakalu galukyawaka. ¹³ Gi rixanu nupgjutatlu wa tsru potu yaprewlu rixyegitgi gixa ga wa Lawtise gajene, ga wa Girapoli gajene. ¹⁴ Ralukjixgi Lokasu, kpinrewakleru gishiniikaluru ga wa Ntema koxa. ¹⁵ Galukanna wumolene Lawtise gwachine, ga wa Nimga, ga wa topji gapatjetyachine.

¹⁶ Ga wa gixa yegi tali getyongatkoklunpatka twu kiruka, waneklu wa Lawtise gapatjetyachine yegi koxa getyongajixanro. Ga wa kiruka Lawtise gajene koxa chinanu, gixa koxa getyongatanro.

¹⁷ Wane nchinanru Garchipo, “Pgirukotpotutanru pkamrure wa Git-srukaachi putakika, poyagkakyapluyi.”

Galuklewuya ralipretya

¹⁸ Gitni Pawlo galukgi. Nomyoya nyonatya. Gishinikinno nostutikolutsa. Gimutikalunepgi.

1 Tixinri Kpashiri Pawlo Kirukate Tesalonikane Chinanu

Galuklewlu

¹ Pawlo ga wa Surwano ga wa Timotiyo kirukate, Tesalonika gapatjetychine chinanupa. Wannanwa Goyakaifu Girchinune ga wa Gitsrukaachi Geso Kristonune.

Pawlo poyagnutlu Tesalonikane galixle

² Gimutkalunepgi ga wa gilewanshnikankakaalunepgi. Wpoyagnutgognenatu Goyakalu wa pejnurunekgi gixa chinanu. Wushinikgognenatgi wa gixa wagjigogneyegigognenatgi. ³ Wa Goyakalu Wuru yegi gi wutuka gishinklegognenatlu gkamrurewatinri galixle chinanu, ga wa gyaprewatinri gishinklelewle chinanu, ga wa gkashnantaklewlgognenatinri wa Wutsrukate Geso Kristo gkagwakinri chinanu.

⁴ Wumatlu, wumolene, wa Goyakalu gishinikanungi, gi rixpoko tsomitletgi Wale. ⁵ Wa Kiglerpotunanu Tokanchi wixa ginkakletanru, gi wa tokanchipjeya rapyegitgi, seyni giyaklukoxaya, ga wa Giwekikaluru Kpashiriya, ga wa gishinikanutikoluya. Wa gimatyawaka gi pixka gixachinektawu wa gixyegiya wa gixa chinanu. ⁶ Ga wa wixa yimachingi gixatka, ga wa Gitsrukaachi yimachingi gixatka. Tsru salewakchiya gyoptotyalu tokanchi gimuwleyma Giwekikaluru Kpashiriya. ⁷ Wane gixatka pejnuruneko galixachine, yimananunetkagi, Masetoni gajene ga wa Gakayi gajene. ⁸ Gixyegiya pogitamtka Gitsrukaachi tokanu gi wa Masetonipjeni, gi wa Gakayipjeni, seyni pnumnunanuko koxa Goyakalu galixinripirana gapokatka. Giyagni gi magata pagixanu wunkakletinri wixa. ⁹ Gi rixanu wannako ginkakletlu gi pixka gapokle wixyegitgi, ga wa gi gixpoko kashrijetkota yaqluchishyeegiya wa Goyakalu yegi gixinripa, wa giwekachri ga wa galikakpotunanu Goyakalu wayegrene gixinripa, ¹⁰ ga wa gkagwakyapiu Gituru tengogne giyakatyachripa, gipnachine tskala yotunomtyachritka. Walenwa Geso. Wale gishatkapwu jgekanchi ginachripyegiya.

2

Pawlo gishiniklelewle wannaya

¹ Gi rixanu gixako gimatl, nomolene, gi wixpoko gapokleta gixa yegi. Gi wa maleshawakni. ² Seyni muchikawa wsalewnnanatin Wilipoya ga wa wyenekta, wa gixa gimatyawaka. Gi wa popiklerunetkawu Goyakalu chinanu wa gixa yegi wunkakletyaplu Kiglerpotunanu Tokanchi Goyakalunu, tsru yagotluya. ³ Gi rixanu wuykole gi wa pupjerni. Gi wa mpowranuchiya koxa. Gi wa yokwirkoxni. ⁴ Seyni wane wixa kigle getle rixwu Goyakalu wixa yegi raponshinikanutikolni Kiglerpotunanu Tokanchi. Wane wixa ginkaklewleta. Gi wa yineru gigleretanru kamrutachine pixka wixa, seyni Goyakalu gigleretanru. Walenwa wetjegaajetjeru. ⁵ Gi rixanu gi pagogneko wtokanuya maleshawaka walixkotlewata wa gixa gimatyawaka. Gi wuyogimatlu gimkapnuglu. Goyakalu wupgijtatjerni. ⁶ Gi wujgalu yine gimalwutyawu, gi wa gixyegiko, gi wa pimrinyegiko. ⁷ Gixa yegi mayogonwu wixa. Wumkata gayapretaakkaklewletmaka wa Kristo yokananunwu wixinri. Seyni gixa yegi mayogonwu wixa mturune girukotachro pixka

tetwamonutna tmaturene. ⁸ Giyagni gi rixanu gogaluklelu potu wixgi, wumjika gapikletgi gi wa Kiglerpotunanu Tokanchijjeni Goyakalunu, seyni koxa wuwekinriko wapikmakgi, gi rixanu gixni wushinikanungi.

Girchi pixka wugeneneyma

⁹ Gi rixanu gixa, wumolengi, gishiniklu wyaprewatinri ga wa wsalewn-inri. Goyechno ga wa gogi wkamrurewata, gi satuna gixa wkojwakinripa, wa wunkaklewyeginatgi Kiglerpotunanu Tokanchi Goyakalunu.

¹⁰ Gixa gimkata gipgujtaletwu ga wa Goyakalu koxa gi wixpoko getletgi gixa galixachingi. Wa kgipashiregolunwu, ga wa poyagkakachinwu, ga wa muklukanuwnakanwu wixa gixyegiya. ¹¹ Wa gixa gimatyawaka, wa girchi pixka wugeneneyma waneko pixka wixgi gixa satkakgi. ¹² Wumnanukgi ga wa wuykotgi. Ga wa gixa wupgujtayegita, Goyakalu gimuknune gixa yanretinripa. Walenwa tomgagi Wale pogirewatyawaka ga wa royaknu yegi gixinripa.

Tokanchiyoptotinrina wanna

¹³ Wale chinanu koxa wixa gi gituka poyagnutlegognenatu Goyakalu gi rixanu wa gixa yoptotinitkalu Goyakalu tokanu wa wixa gyijnakotinriya, gi wa yine tokanu pixka gixa yoptoletlu, seyni Goyakalu tokanu pixka. Wa walenwa galikaka. Walenwa gixa galixachingi kamrurewetachir. ¹⁴ Gi rixanu gixa, wumolene, Gotesreta gajene Goyakalu gapatjetanukaka Kristo Geso gwachine yimachinetkagi. Gi rixanu wanna salewnale pixkalutu nsalewniya gixa. Wa gixa gimolene chinanu nsalewna, waneko pixka rixna wanna: wa Goteyone chinanu salewnana. ¹⁵ Wa wanna Goteyone Gitsrukaachi Gesoko ruylatna, ga wa tokanchi geneklewatachinni koxa ruylatna, ga wa wixa koxa kojwakna. Gi rugletanshinikanutluna Goyakalu, ga wa pejnuruneko yine kamnixna. ¹⁶ Rumaleta ginkaklewlejixwuna payinyegiya ma mognetkakikotupna payine. Wane rixa poyagkaklegognegnatluna mukochirna. Jgekanchi gapyegitna yoptukyawakpotunanuko.

Gixni wa walixkowle ga wa wumuwlle

¹⁷ Ga wa wixa, wumolene, gixyegiya wkonika gi gowukshini wumaneya seyni gi wa waijiya, wanepnute tsru walukleyma wmuchkotnawa wetgo-jtapyapgi. ¹⁸ Giyagni pakatkaka waluka yayegletgi, ga wa gitni Pawlono galikaka, ga wa Satanasyo yopnugwu. ¹⁹ Gi rixanu ¿girni wa wkagwakanrupa ga wa wumuwlepa, ga wa walixkowle sagyetapa? ¿Gi ge gixapni, Wutsrukate Geso getanu Wale gininipa? ²⁰ Gi rixanu gixni wa walixkowle ga wa wumuwlle.

3

Pawlo yanshinikanyegitna gapatjetachine

¹ Giyagni gi rixanu gi wumkata gakotanshinikanretatka, kigle getle wixa gitapjemka Gatena giknooko. ² Ga wa wyokanatlu wumole Timotiyo. Walenwa Goyakalu kamrurewyegitachri Kiglerpotunanu Tokanchi Kristopiranaya, muchkotanshinikanutyapgi ga wa ruykotyapgi galixleya.

³ Gi satuna kojwakanshinikanutko tye salewakchikakaya. Gi rixanu gixa gimate tye chinanukni wutaaka. ⁴ Gi rixanu gixa yegi gawanatini, wunkakagnaputatkagi wa waneyapwu salewakchi, xani gwachritka pixka, wa gixa gimateanrutka. ⁵ Giyagxoxti gita gi nakotanshinikanutinitkalu. Nyokanye-gitatkagi numatpiranyegityaplu galixle, gikta xani wa kyantaletwakleru yantaletatkagi, ga wa maleshawakatkani wyaprewatinri.

Rumnanuuka Pawlo wa Timotiyo jeminitka

⁶ Ga wa xani gixyegiya runinitka ga wa wixa yegi rapokatka Timotiyo. Runkakwu galixlewleya ga wa gishiniklewleya. Wa kigle gishinikle gixgognenatu. Ga wa gogaluklewlw gixwu getyapwu, wixako pixka gogaluklewlw wixgi. ⁷ Giyagni gixa chinanu gimmanuukalunwu pejnuruko wmagatinriya ga wa pejnuruko wsalewninriya, gixa galixle chinanu. ⁸ Gi rixanu wa xani wuweka wixa wa gixa moyentunwale gixini Gitsrukaachiya. ⁹ Gi rixanu *egi* wchina moyagnutletanukalu Goyakalu gixa chinanu, wupekotyaplu psoloko wumuwlle gixaya wa wumuwyegityagi Woyakalute getanu? ¹⁰ Goyechno ga wa gogi wagipotognenata wetgojityapgi, wpoyagkakyaplu gmaga galixletinri.

Tseruwnanu gishiniklewlw ga wa ruxolewnanu

¹¹ Waleko Goyakalu Wuru, ga wa Wutsrukate Geso kosekgapotanwu, gixa yegi wapokinripa. ¹² Gitsrukaachi tseruwnakakanru gishiniklewlw ga wa ruxolewnakananru, gixkakluko gishiniikakpotutinripa ga wa pejnuruneko koxa gishinikinripotupa, wa wixa gishinikiniko pixkagi. ¹³ Muchkotanshinikanajityapgi kpashirine gixinri, muklukanuwnakanepgi gixinripa Goyakalu Wuru getanu, wa Wutsrukate Geso gininipa pejnuruneko kpashiriteneyamananuko.

4

Tyenwa Goyakalu gishinikanru: kpashirine gixinripa

¹ Giyagni wanepnute, nomolene, wagijitgi ga wa wuykotgi Gitsrukaachi Gesoya, wa wane gixa giyotikowaka wixaya gi gixpoko gimkata yanretanu wa Goyakalu gigleretyawaka, wana gixa yanretanu wa pnuute gixa tseruwnaletinripa. ² Gi rixanu gimatlwa yokenrukaka wa wenekyagi wa Gitsrukaachi Geso chinanu.

³ Gi rixanu tyenwa Goyakalu gishinikanru kpashirine gixinripa, gitspalatyaplu gapoklewlu. ⁴ Satkakgi gixa gimata kpashi gnunrowletanu ga wa kagwakpiratikolu. ⁵ Gi wa tsru getsutanrewlu galuklewlw gixanu, wa payine pixka Goyakalu mumatkane pixka. ⁶ Gi wa pnu gixachinepgi, ga wa gi wa ginkapnuginri gimore. Gi rixanu Gitsrukaachi saletlewata tyekaka pejnuruko chinanu, wa wchinagnaputyawakgi, ga wa xani gixa yegi wupguitapotutyalu. ⁷ Gi rixanu gi wa mpowrannuchiya tomgagi Goyakalu, seyni kpashirine gixinripa. ⁸ Giyagni girukokta giknoklu tye tokanchi, gi wa yineru ruknoka seyni Goyakalu ruknoka, wa Giwekikaluru Kpashiri wenekjeru.

Gi rixpoko getletanna pimrine wa Kristonune

⁹ Seyni wa gishinikmolkkaklewlpuriran, gi wa gmagatya nyonyegityagi. Gi rixanu gixako Goyakaluya yimaakalungi gishiniikakinripa. ¹⁰ Gi rixanu wane gixna wa pejnuruneko moletkakachine psolusretako Masetoni gajene. Seyni wagijitgi wanepnute nomolene, wanepnute gixpotutanu.

¹¹ Ga wa gyagota pochke gixletinripa. Ga wa gixanuko gimpurukanu. Ga wa wtowutwyawakpotukgi gixako gimyoya gkamrurewatini. ¹² Kigle geta yanretikolupa maleka gajene getanu. Gi satuna gkagkwakanshinikanutanu gmagatinriya chinanu.

Gitsrukaachi gininripa

¹³ Gi wa waluklu, wumolene, wa gixa ma mumatanuplu wa gapnanutachinepiranaya, gma wamonuwatinitipa pimrine pixka, kagwaklena

waneyna mixkane. ¹⁴ Gi rixanu walixiniplu wa Geso gipna ga wa yotunota, waneko pixka Goyakalu gixa gwapletanna Gesoyma wa Gesoya gapnanutachine. ¹⁵ Giyagni wane wchingi Gitsrukaachi tokanuya wa giwekachinwu, gitukachinwu Gitsrukaachi gininpotonanuko, wixa gi wa muchinanu gapka gi wkosekinna gapnanutachine. ¹⁶ Gi rixanu waleko Gitsrukaachi, wa tengogne rujrukini, wa sablechi, ga wa gitowrerune gitsrukateplaji, ga wa Goyakalu kownegima, rumujrukano. Kristoya gipnachine muchinanu yotutanu. ¹⁷ Wanepnute wixa wa giwekachinwu wa gitukachinwu, wannaymananuko gwapkalinewpu kyachgapererumko yegi. Wane tengogneya wyoptotapyaplu Gitsrukaachi. ¹⁸ Giyagni wumwagognenatanutkalu Gitsrukaachi. Giyagni gimnanuukakanu tye tokanchiya.

5

Gitsrukaachigognepa

¹ Seyni, nomolene, gi gmagatya wa nyonyegityagi gigognepirana ga wa gipapkopirana. ² Gi rixanu gixako gimatpotutlu wa Gitsrukaachigognepa kachowguru goyechno gapokachri pixka rixa ginretanu. ³ Wane chinachinepni, “Kigle gwashluktani ga wa kiglepokolutkani,” waneklu mkgawaakotu nikawakchi gapyegitanna, wa kamshirochinowle pixka. Ma mayixawninitipa.

⁴ Seyni gixa, nomolene, mapshagawaka mwakanetkagi, wa walegognepatka ma kashichyanupgi kachowguru pixkalutu. ⁵ Gi rixanu pejnrunekegi gixa pokamlalu gwachinetkagi ga wa gogi gwachinetkagi. Gi wa goyechno gajenetkagi. Gi wa mapshagawakako gajenetkagi. ⁶ Giyagni wa xani gi wumkanu pimrine pixka, seyni wuyokanu gonuka. Kanshinikanurunepwu. ⁷ Gi rixanu wa gimkachine goyechno rumkanatna. Ga wa gimetachine goyechno rumetna. ⁸ Ga wa wixa gogi gajenwu wixinri, kanshinikanurunepwu. Wustatletanru galixlewlu ga wa gishiniklewl. Ga wa yowumatpu wutakinwa. Walenwa gognewatikaluru kagwakikolu. ⁹ Gi rixanu Goyakalu gi gitakwu wa jgekanchi chinanu, seyni wumretikolupa gognewatikaluruya Wutsrukate Geso Kristo chinanu. ¹⁰ Wale gipnana wixa chinanu, waka wuyokinipa waka wapnanutinipa, Waleyma wuwekinripa. ¹¹ Giyagni giykokakanu ga wa ntseruwakanshinikankakanu wa gixanatyawaka.

Pawlo giyktotna moletkakachine

¹² Wagjitgi, wumolene, gimatyapna gixa yegi yaprewatyachine Gitsrukachiya, wa ggirukotjene Gitsrukaachiya, ga wa giyktotjene. ¹³ Gkagwakpirpotutanna gishinikleylema kamrurna chinanu. Kigle gimwashkaklepgi. ¹⁴ Wagjitgi, wumolene, giyktotna mmerene. Gimnanukanna mmuchkotanshinikanutkane. Gipxakanna gigrokachine. Ma pognanunepgi pejnrunekegi yegi. ¹⁵ Getinwa gi satuna gipekotinri gektutwa gektutuya, seyni psolgogneko kigleru gomkagi kamruregogneyegkakanu, ga wa pejnrunekegi yegi.

¹⁶ Psolgogneko gimuwgognenatanu. ¹⁷ Gi gituka gagjigognnergognenatanu. ¹⁸ Pejnurkakako mpoyagnutanu. Gi rixanu tyenwa Goyakalu gimushinikyagi Kristo Gesoya.

¹⁹ Gi wa giwakanru Giwekkaluru. ²⁰ Gi wa geyikanru tokanchi genekikolu. ²¹ Getjetanru pejnuruko. Kigleru gimretanu. ²² Gitspalatinri pejnuruko mugletpoga.

Giglewanshinikanrewlu Goyakalute psolpotuyako kpashirine gixkakangi

²³ Waleko giglewanshinikanrewlu Goyakalute psolpotuyako kpashirine gixkakangi. Mmagatikanepgi ga wa muklukanuwnakanepgi gimretkalunepgi giwekikaluru gixanuya, ga wa ginshinikanuya, ga wa gimaneya, Wutsrukate Geso Kristo gininpotunanuko. ²⁴ Poyagkakachrinwa ntomgajeru, ga wa Wale kamrutanru.

Ralipre galuklewleta ga wa ruglenshinikanyegitna

²⁵ Wumolene, gagjigogneyegitanwu. ²⁶ Galukanna pejnuruneko moletkakachine kpashiri gamluruya. ²⁷ Nagjipotutgi Gitsrukaachiya twu kiruka getyongatanu pejnuruneko moletkakachine yegi.

²⁸ Gimutkalunepgi Wutsrukate Geso Kristo gimutlewleya.

2 Tixinri Kpashiri Pawlo Kirukate Tesalonikane Chinanu

Galuklewlü

¹ Pawlo ga wa Surwano ga wa Timotyo kirukate, Tesalonika gapatjetya-chine chinanupa, Goyakalu Wurunune ga wa Wutsrukate Geso Kristonune.

² Gimutkalunepgi ga wa gigurewanshinikanakaalunepgi Goyakalu Girchi chinanu ga wa Gitsrukaachi Geso Kristo chinanu.

Pawlo gimjika Tesalonika gapatjetyachine chinanu

³ Wumkata poyagnutlegognenatlu Goyakalu psolgogneko gixa chinanu, wumolene, rixa gimukatyawaka, gi rixanu galixle tseruwnapotunanumta. Ga wa satkakgi gixa gishiniklewle gixolewnananumta, pejnurunekgi gixkakluko gishiniikakinri. ⁴ Giyagni wixako galixkotpiranyegitgi Goyakalu gapatjetanunkakayegiya, gkashnaktakgognere chinanu, ga wa galixle chinanu psoluyako gkojwawninri ga wa nsalewninri wa gakotanrukaka nsalewninri.

⁵ Walenwa rumatikolu Goyakalu gitakyagoklewele wanepotuko rixinri. Wale koxa gimatifika Goyakalu pogirewatyawaka gimuknu gixinri. Wale chinanu nsalewna gixa. ⁶ Gi rixanu poyagkakachrini Goyakalu sale-wakchiya rupekotinna wa gixa saletjene. ⁷ Ga wa gixa saletkalungi gap-nanru rupekotingi wixayma wa rupgujewnnipa Gitsrukaachi Geso, tengogne ruyakatinipa gitowrene gichkoluneyma ga wa xirnachrimeroyma koxa. ⁸ Wale saletyapna Goyakalu mumatkane, ga wa Kiglerpotunanu Tokanchi Wutsrukate Gesopirana mjemkane. ⁹ Wannapni saletkonna gipukchi gike rixiniko mnikawnakatuya, Gitsrukaachi yegi mwakangog-nenanupni, ga wa Wale muchkonu goyaknu yegi mwakangognenanupni. ¹⁰ Walegognepa wa Wale gininipa kpashirine gimalwutanru ga wa pejnuruneko galixachine giglajyegitanru. Ga wa gixa koxa gimalwutanru gi rixanu gixa galixlu tokanchi wa gixa yegi wupguitatinri.

¹¹ Wale chinanukni gixa wagjigogneyeegognenata psolgogneko, wa Woyakalute tomgiyagi gimuknunepgl, ga wa poyagkakikolupa pejnuruko kigleru gishiniikaluru ga wa pejnuruko galixlewlü kamrure ruyakleya. ¹² Wagjitkoxlü rumalwutikolupa Wutsrukate Geso giwaka gixyegiya, ga wa pogirewlü geneeko gixa Waley, rixa gimutlewletyawaka Woyakalute ga wa Wutsrukate Geso Kristo.

2

Gipgujetkalurupni jeji kmukochireru

¹ Wagjigti, wumolene, Wutsrukate Geso Kristo gininripapirana, ga wa wapatjetikolupa Waleyegipirana: ² Gi wa pshinitsonu pnu gyanshinikanutanu. Gi koxa gimyeekaako, gi wa giwekilakuruyako, gi wa tokanchiyako, gi wa kiruka yonatkaluoyako, wa wixanu pixkamka, wane gixachro wa gewipgutatkalu Gitsrukaachigogne. ³ Gi satunna yokwitangi gike pixkalutuyako. Gi rixanu ma mapookanuwa Gesogogne, gixolune potu gitspalatinri Goyakaluyegiya, ga wa gipgujetkalurupni jeji kmukochireru, gamgikowaka gajeru. Gi rumkata gapokleta walegogne ma muknoonanuwa tyekaka. ⁴ Jeji kmukochireru kamniixlu pejnuruko goyakalu chinkaluru ga wa pejnuruko

yonogyegitkaluru. Wale pnute tsru rutaknamkawa. Wane rixa wa kpashiwakpotugrukoko Goyakalunu tuplata. Walenanuko rekaka gipgutatnawa Goyakalu rixinrimka.

⁵ *¿Gi ge gishiniklu wa gixa yegi gawanatiniwa tyekaka nunkakgi?* ⁶ Ga wa xani gixa gimatl wa gimaletachri, wa wale chinanu walegogneklupa ma mupgujewnakanuwa. ⁷ Gi rixanu xawakni kamrurewanatatkana yokanru myijnakotkane. Giyogimatkaluru wanna kamrure. Seyni wa gimaletachri gomkagi gimaletanru, ganikaji konikoklunpotunanukopa. ⁸ Waneklu gipgujetkalurupni kmukochireru. Gitsrukaachi Geso ginamannipgyaya ruylatinri. Rumtukpotutanru rapokle gipgujewnaleyapa. ⁹ Wane rixa gapokletanu wa kmukochireru wa Satanasyo gixa kamrurewletyawaka. Psolu giyakleyako gixashatachri, ga wa gixashatachri getkalurkakaya, ga wa gixashatachri koglajrukakaya rumapokanu. ¹⁰ Ga wa psoluko mpoyagkaknuchi yokwireya rumapokanu kmukochireru wa gamgachine ma mushinikiyapluna galikakpotunanu tokanchi, ma mognetkakikotpatkana. ¹¹ Giyagni Goyakalu yokaneyegitina tsru gixachri yokwiri, ralixyapluna weychi, ¹² wa ruklukanuwnayegijixikolupna pejnruneke wa galikakpotunanu tokanchi malixkane, seyni mpoyagkaknuchi gigleretachine.

Tsomitkalune gognetkaakalunepni

¹³ Seyni wixa gimkata poyagnutlegognenatlu Goyakalu psolgogneko gixa chinanu, wumolene. Gixa Gitsrukaachi gishinikanungi. Gi rixanu yinuwakyawakaya Goyakalu tsomitigognetkaakalunepgi, kpashirine gixkalunepgi Giwekkikaluruya, ga wa galixyapluna galikakpotunanu tokanchi. ¹⁴ Tye chinanu koxa tomgakalungi Kiglerpotunanu Tokanchi wunkakletanruya, waneya nchininripa Wutsrukate Geso Kristo pogirewle. ¹⁵ Giyagni wa xani, nomolene, poyentunwalepgi. Ga wa gimretanru giykolkaka ginkakikolu, waka tokanchiya waka wkirukateya.

¹⁶ Waleko Wutsrukate Geso Kristo ga wa Goyakalu Wuru wa wushinikjeru, ga wa gimnanuklu gike rixiniko mnikawnakatu wenekjeru, ga wa kigle kagwaklu wenekjeru rumutlewleya, ¹⁷ Waleko gimnanukgajitangi ga wa Waleko poyentunwalkakangi pejnruko kigleru kamrurchiya ga wa kigleru tokanchiya.

3

Pawlo gagjitna gapatjetachine ragjigognetinripna wa koseklewananumt-inripa Goyakalu tokanu

¹ Wanepnute, nomolene, gagjigogneyegitanwu wa Gitsrukaachi tokanu teyakawamtinripa, ga wa rumalwutikolupa gixa yegi pixka. ² Ga wa wkosh-pakikolupa gimbuklewatachine ga wa muglene yineyegiya. Gi rixanu gi wa pejnruneke kalixaklerunni. ³ Seyni poyagkakachrini Gitsrukaachi; Wale muchkotanshinikanutangi, ga wa girukottingi mugletuya. ⁴ Gixa chinanu waponshinikanutlu Gitsrukaachi, wa gixa kamrutyalu wtowutwagi, ga wa gkamrutanru. ⁵ Ga wa Gitsrukaachi potukatgajitangi Goyakalu gishiniklewlle waneyapgi, ga wa Kristo kashnantakgognewle waneyapgi.

Gijretkalurni wa mmernuchi

⁶ Giyagni wtowutgi, wumolene, Gitsrukaachi Geso Kristo giwakaya, gitspalatinri girukokta galixachri mkanmrurewatkatu ga wa wuykole pixka mixkata wixaya giykitikolu. ⁷ Gi rixanu gixako gimatl gi gixpoko gimkata yimletanwu, gi rixanu gixa yegi gi wa pnu wixya. ⁸ Gi satuna yegi wnikashatyalu niikaluru. Seyni wyaprewleyma ga wa tsru kamrurchiya,

goyechno gogi wkamrurewata gi satuna gixa wma kojwakinitipa. ⁹ Gi wma mutakikotumka chinanni, seyni, wenekyapgi gi gixpoko yimletyawakapwu. ¹⁰ Gi rixanu gixa yegi gawanatinawa, wa tye wtowutyagi, wa satu maluka kamrurewlektatu gi koxa nikanu.

¹¹ Gi rixanu wyijnakpiranyegitgi wa pimrine pnu gixjeta wa gixyegiya. Gi kamrurewatna, seyni gixasha kamrurewletachinni. ¹² Ga wa wane gixachine wtowuta ga wa wagjitna Gitsrukaachi Geso Kristoya wa pochkeruneko kamrurewatanna. Wane rixa nikletanruna nikanrupna. ¹³ Ga wa gixa, wumolengi, gi gamanutanu kigleru gkamrutinri.

¹⁴ Ga wa satu ma yijnakotkanru wtokanu wkirukateya, gimatyegkakanru wale. Gi wa gipxaletanru patewtatinripa.

¹⁵ Gi wa gkamnixjeru pixka gixa getletanru, seyni gimole pixka gixa giykoletanru.

Giglenshnikanyeglewlu

¹⁶ Giglewanshinikanrewlu Gitsrukateko genekangi giglewanshinikanrewle waneygognenanupgi pejnurpotunanuyako. Pejnurunekgi gixaymaplu Gitsrukaachi.

¹⁷ Nomyoya nyonyegityagi: Nalukgi. Pawlono. Tyenwa numaxikle pejnuroko nkirkatkaka. Wane nixa yonretlu.

¹⁸ Gimutkalunepgi pejnurunekgi Wutsrukate Geso Kristoya.

1 Tixinri Kpashiri Pawlo Kirukate Timotiyo Chinanu

Galuklewlu

¹ Tyenwa Pawlo kirukate. Walenwa Kristo Geso yokanatanru, wa Wognetkakjeru Goyakalu china towutyawaka, ga wa Kristo Geso china towutyawaka. Kristo chinanu waneywu wkagwakle.

² Timotiyo chinanupni, noturpotunanni galixluya.

Gimutkalurupyи ga wa getwamonutkalurupyи, ga wa ginglewan-shinikankaakalurupyи Goyakalu Girchiya ga wa Wutsrukate Kristo Gesoya. Rujretna pnumnu gixachri ginkaklewluya

³ Wane nixa gagjiretyawakyi Gigwiso putukinripa wa Masetoni nyin-patka gita, ptowutyapna pimrline gi wa pnuko china ginkaklewletinripna.

⁴ Ga wa ma koschekyanupluna ginkakluskaka ga wa mnikawnakatu git-srukaachinni giwaakkapirana. Tye chinankaka waneplu gepomsalkaka. Gi rupxaklu Goyakalu kamrure galikakpotutanu tokanchiya. ⁵ Ga ga tye chinanupni Goyakalu yokanrekaka: wa powrawlu gaschiya wushiniikkakan-ripa ga wa muklukanuwnanshinikanutkanepwu, ga wa kalixaklerune mix-ashatkanepwu. ⁶ Pimrline pupjetachinni pnu yiyluna tyekaka. Gike gapri migje yanumsayegitachinni. ⁷ Tokanchi Yokanatkaluru yimaklewatachine raluka gixletnawana. Gi wannako gimata jemlu wa chinanruna. Gi wa muchkowtokanyegitanrukna rumata jemna wanna.

Klu gaprini Tokanchi Yokanatkaluru

⁸ Wumatlu wa Tokanchi Yokanatkaluru kiglerni, wa satu koschekini-plu Tokanchi Yokanatkaluru chinyawakpotuko. ⁹ Tye wumatini, wa poy-agkakachri chinanu gi wa rutaaka wa Tokanchi Yokanatkaluru, seyni mpoy-agkaakane chinanu, ga wa kaalirerune chinanu, ga wa mupashiregolune ga wa kmukochirerune chinanu, ga wa muglene ga wa gimiterune chinanu, ga wa kgiylagiruklerune ga wa kgiylaginroklerune chinanu, ga wa yineru kgiyaklerune chinanu. ¹⁰ Ga wa kapoklewaklerune chinanni, ga wa rixje jejine gapokletachine chinanu, ga wa yineru kgishanpiklerune chinanu, ga wa kayloklerune chinanu, ga wa Goyakalu kawchinanu chinachine yokwireyna, ga wa satu wanepnute rixinri kigleru ginkaklewlu kamnixinri wane gixachine chinanu. ¹¹ Wane chinyawaka Kiglerpotunanu Tokanchi gimalwutkaluru Goyakalu goyaknupirana. Tye tokanchi numaponshinikanu-tika gita. Kmukochirerune pnuterutu.

¹² Npoyagnutlu nmuchkotanshinikanutjeru Wutsrukate Kristo Geso. Gi rixanu poyakakachri rutakyagkyano. Rutakno kamrure yegi.

¹³ Muchinanu mupashiregolutno nixanatini, ga wa kojwakaklerunanno, ga wa kgektutetaklerunanno. Seyni netwamonutka gi rixanu mumatkutunanno wane nixa nma malixlenuya. ¹⁴ Ga wa Wutsrukate gimatlewlle tseruwnapotuta galixlewluyma, ga wa gishiniklewluyma Kristo Gesoya.

¹⁵ Tyenwa potukalu tokanchi ga wa rumuknu psoluyako yoptotikolupa, wa tyechijne runapa Kristo Geso rognetskakyapna kmukochirerune. Wan-naya pnuterutno gita. ¹⁶ Seyni tye chinanuko netwamonutka, wa pnuterutu

nixanatini, gitaya Geso Kristo gekakgityaplu mmagatikatu mapognanre, yimanru nixinripa Wale galixachinepa, ruwekinripna gike rixiniko mnikawnakatupa. ¹⁷ Wa pogirchigognenanu gike rixiniko mnikawnakatup, mupnakatup, metkotu, satupjerutu Goyakalu kagwakpirgognenatkalurupni ga wa gimalwugognenatkalurupni psolgognepotunanukopa. Wane gixkalrupa.

Kigle yagotle

¹⁸ Tye yokanru nutakyi, noturu Timotiyo, wa tokanchi geneklewatachri muchinanu wane chinpiranyegityawakyi, tye chinanu kigle yagotle pixa yagotletanu. ¹⁹ Kalixaklergognenanupyi. Muklukanuwnanshinikanutkat-gognenanupyi. Pimrine gituka muklukanuwnane gixleta, ga wa rujrukputtna ralixleyna. ²⁰ Wannanwa Gimeno ga wa Galegantro. Satanasyo yegi nsamyokna rumatkakikolupna wa mupashiregolune ma mixinitipna.

2

Goyakalu galukyawaka wa pejnuruneko yine gognetkaakalunepni

¹ Giyagni muchinanu potu gapka nagjirewata, wa gagjigogneyeglet-watanu ga wa mpoyagnutlewatana pejnuruneko yine chinanu; ² pogirchine chinanu, ga wa pejnuruneko tsrukakalune chinanu, kigle gimwashkak-lepwi ga wa pochke gawashatanu, psoluyako kgipashiregolunepwu ga wa kiglepiranyegirunepwu. ³ Tyenwa kigleru ga wa gigleretkaluru Wognetkakjeru Goyakalu getanu. ⁴ Wale galukyawaka wa pejnuruneko yine gognetkaakalunepni, ga wa pejnuruneko gimpapyaplu galikakpotunanu tokanchi. ⁵ Gi rixanu waneru satupje Goyakalu, ga wa satupje kgiglepokye-glewakleru Goyakalu ga wa yine ganikajite gwachri. Walenwa yineru Geso Kristo. ⁶ Walenanuko geneknachriwa pejnuruneko koshpakikolu wenru chinanupa, rupgijtakalupa gipapkopotuko. ⁷ Wale chinanukni nutaaka, ginkaklewatachripno ga wa yokanatkalurupno. Galikaka potu nchina. Gi nayloklewata. Payne yimakachrino galixlewluuya ga wa galikakpotunanu tokanchiya.

Suxone giykotka

⁸ Giyagni naluklu wa jejine psolusretako ragjigognetinripna, kpashirinemyo yotukamyotachinepa. Mjigekanunepa ga wa minutanshinikanutkanepa.

⁹ Waneko pixka rixanna suxone. Gi wa gektu getkomkalunepni, gitama patewtachronepni, kshinikanuronepni makatinwana. Gi wa kamapiji-wutsluma rugletinwana, gi wa koriyamako, gi wa katajirojiyamako, gi wa kwenuru mkachriyamako, ¹⁰ seyni kigleru kamrurchiyma rugletinwana, kyonogyegiklerone gipgijtatnachronewa kgimuka.

¹¹ Pochkeplo tyijnakpotutanu suxo. Psoluyako yijnakotachropni. ¹² Gi wa nuchichlo suxo tunkaklewatinripa, gi tsro tutakinwa wa gnurchi pnute. Seyni pochkeplo. ¹³ Gi rixanu Gata muchinanu kamrutkalurni. Wanepnute Gewa. ¹⁴ Ga wa Gata gi wa yokwitkalurni, seyni wa suxo yokwitkalurni pnu tixatka. ¹⁵ Ga wa suxo tushpakawgenetini tognetaako, wa tomkagi galixletini ga wa tomkaa gishiniklewletini, ga wa kpashiro tixini, kanshinikanuro.

3

Gi gipixkalunepni wa girukotlewatachine

¹ Tyenwa potukalu tokanchi. Girukokta galuka gapkatletlu girukotlewatachri gitakikolu, kigleru kamruchi raluka. ² Giyagni wa girukotlewatachri gimbata muklukanuwakanatu gixleta, satopje suxo gnurupni, wa mumetkatupni, kshinikanurupni, ksuslagaklerupni, gimata yimaklewatachripni. ³ Gi wa kgejnugimaklerupni. Gi wa kjigekanurupni, seyni mayogotupni, myagotkakakletupni. Gi wa sroschi gerupni. ⁴ Gimata girukotapjatichripni. Wugenene yijnakjixachripni. Psoluyako kiglepiranyegirunepni wugenene. ⁵ Wa mumata girukotapjitatku, ¿gi rixpoko girukotletanna Goyakalu gapatjetanune? ⁶ Gi wa gerotu jiglokachripni, wa galixkotnachripwa rixinipmaka, giklukanuwnayegixikolu ma yinitipa kamchi gitsrukate chinanu. ⁷ Kigle gipgujtapiranyegitikalurupni maleka gwachineya, ma muklpiranyegitikotupa, kamchi gitsrukate gitsekletpo ma yinitipa.

Gi gixachinepni Goyakalu kamrurewyegitachine

⁸ Waneko pixka rixanna kamrurewatachine. Kiglepiranyegirunepni. Gi wa kashrijtatokanutachinepni. Gi wa gixo winga gishinikachinepni. Gi wa kgimkapnugaklerunepni. ⁹ Waneyaplu giyogimanatkaluru galixlewlpiranana, powra getanshinikanutnachriwa. ¹⁰ Ga wa nyi muchinanu gimata getanshinikanutkalunepni. Ga wa muklukanuwnakane rixinipna, waneklu kamrurewatachinepni.

¹¹ Ganunronna waneko pixka rixanna. Kiglepiranyegironepni. Mapatak-lenenepni. Mumetkanepni. Psoluyako poyagkakachronepni.

¹² Jeji kamrurewatachri sato suxopje gnurupni. Gimkata girukotawgene-tachinepni ga wa gipjina. ¹³ Gi rixanu kigle kamrurewlerune kiglerupi-ranyegirunni. Ga wa gi wa popikleruneko rixna wa Kristo Geso galixikoluya.

Giyogimanatkaluru walixlewleya

¹⁴ Tyekakapirana nyonawanatini, nkagwaka pshinitsonu yayegletyi. ¹⁵ Seyni namginipa, nyonyegityi pumatinripa gi pixka gwale pumkata gixleta Goyakalupji gajeneyegiya. Wannanwa Goyakalu giwekachri gapatjetanune. Wannanwa galikakpotunanu tokanchi yoptowaka gwastsigita-chri ga wa yostale. ¹⁶ Wupgjutatlwa tsrupotunanni giyogimanatkaluru gipashichkakalurupirana:

Manewatachri retika Kristo.

Poyagkakachri gekakgitkalurni Giwekikaluruya.
Goyakalutowreruneya retika.

Payine yegi ginkakletikaluru.
Galixkalurni tyechijneya.

Yoptotkalurni goyaknuchygi.

4

Runkakletagnaputlu wa pimrine gitspalatinripa galixlewlu

¹ Wa Giwekikaluru wanepotuko chintokanuta, wa gapkatatachri-gognekakapa, pimrine gitspalatinri galixlewlu. Pupjekaklewatachine ga wa kamchine yimaklewle jemanna. ² Gipnanshinikanutachine pixka rixna, gi rixanu yijnakotna sanowashatachine gayroklewle.

³ Runanshi kashimyokaklewletanna. Rujretlewtna niikalurukakaya, wa Goyakalu giyakotanrukaka poyagnutlewluyma yoptotikolupa wa galixchineya ga wa tokanchi galikaka gimatachineya. ⁴ Gi rixanu pejnuruko Goyakalu giyakotanrukaka kiglerni. Gi satuna giknookalurupni, wa poyagnutlewluyma yoptotikolupa. ⁵ Gi rixanu kpashiri rixka Goyakalu tokanuya ga wa gagjiruya.

Kigleru kamrurewatachri Kristo Geso kamrure

⁶ Tyekaka pushiniikakinna moletkakachine, waneklu kigleru kamrurewatachriyi Kristo Geso kamrure. Ga wa tseruwakanshinikanutkaluryi pixiri galixlewlw tokanuya ga wa kigleru yimaklewluwa. Walepni wa pomkampotutanru. ⁷ Ga wa gimiteru ginkakleshkaka ga wa tsrotsolejine ginkakleshkaka, gi wa pajnakokyegitanru. Pasrukina wa kgipashiregolu pixinripa. ⁸ Gi rixanu wumane gasrukewle psotsotaji rupxaklewata. Ga wa gipashiregnuchi psoluyako rupxaklewata. Gi rixanu gipashiregnuchi gipiratika tyegogne giwekle chinanu ga wa ginachripa giweklu koxa chinanu.

⁹ Tyenwa potukalu tokanchi ga wa rumuknu psoluyako yoptotikolupa. ¹⁰ Gi rixanu tye chinanukni wyaprewata ga wa wyagotlewata, gi rixanu wkagwakyulu Goyakalu giwekachri. Walenwa pejnuruneko yine Gognetkakachri, ga wa galixachine galikakni.

Galixachine yimanrupni Timotiyo

¹¹ Tyekaka puykolewjetini ga wa tyekakapirana punkaklewjetini. ¹² Gi satuna geyikanru pmaklutinri. Seyni galixachine yimanrupyi tokanchiya, ga wa gixjetikowakaya, ga wa gishiniklewluya, ga wa galixlewluya, ga wa powranuya. ¹³ Nma mapookanukopshini, pkamrurewpotutanu: petyongayegitanna, ga wa puykolewatanu, ga wa punkaklewatanu. ¹⁴ Gi petashatanru genekashatkaluru pixa gwachri, wa penekikolu tokanchi geneklewatachri wane chinreya, wa tsrune gitakamyoegitinyi.

¹⁵ Pgirukotpotutanru tyekaka. Wane pixjetanu, wa pejnuruneko yegi rupgujewinripa pkosekinri. ¹⁶ Pgirukotinwa pixnanuko ga wa punkaklewleya. Pomkagitanru. Gi rixanu wa tye pkamrutini pognewatanu ga wa pyijnakotjene koxa pognetkajixanu.

5

Tsrune kagwakpiratkalunepa

¹ Gi pchigetjetanru tsru, seyni pukotanru puru pixka, ga wa maklujine pepurune pixka. ² Ga wa tsrone punrone pixka pixa giykoletanna, ga wa maklojine pepurone pixka psolu powranuyako.

Gipnagnurutachrone girukotikolupa

³ Pkgwakpiratanna gipnagnurutachrone wa galikakakni gipnagnurutachrone. ⁴ Ga wa sato gipnagnurutachro kwugenero tixinripa, ga wa waneya tixinipa tomekagine wannapni muchinanu gapka rasrukina wana wannako gipjiyakna kgipashiregolune rixinripna, ga wa tsrutenna rapnutyapna. Gi rixanu tyenwa Goyakalu getanu gigleretkalurni. ⁵ Ga wa galikaka gipnagnurutachro gapalushatachro Goyakalu tkagwakya. Goyechno, gogi tomkagi gagjigogneterini. ⁶ Tugleretashatyawaka kamruretachro tuwekinimkawa seyni gipnachrotkani. ⁷ Tyekaka pujretlewatini, muklukanuwnakane rixinripa. ⁸ Girukokta gi gislagyana gimozeneko, ga wa muchinanu gapka gipji gajene, galixlewlw nutata. Malixkatus pnuote mugletu rixa.

⁹ Twu pixkaloto putakanu wa gipnagnurutachro tixini: gi wa patsrujiremole walapu magatyachropni, satupje jejni gnunroni. ¹⁰ Kiglekamrurpiranyegiroppni, gikta mturune tseruwaka, ga wa gikta ksuslagaklero tixa, ga wa gikta kpashirinjixi terka, ga wa gikta salewnachine tupxaka, ga wa gikta psoluko kigleru kamrurchi tomkampotuta.

¹¹ Ga wa gipnagnurotachrone maklojine gi putakanu. Gi rixanu wa ralukanuwatinrinha chinanu Kristo rutspalatinna, raluka kashimyoletna.

¹² Ga wa ruklukanuwnayegjixkona ruknokalchinanruna muchinanu rupi-ratanruna. ¹³ Rasrugkoxna mmerene gixleta. Papjimnu yapashatna. Gi walepje wa ma mernuwashatna, seyni koxa royanumsaleshatna ga wa gike gapri migje kamrutna. Wa mumkata koscheekotu chinna. ¹⁴ Giyagni naluklu gipnagnurutachrone maklojine kashimyotanna, kwu-genepna, girukotapjitanna, ma menekyanupluna ruglepotkatinri wkam-nixjeru gektutu ma chinpiranyegityapwu. ¹⁵ Gi rixanu pimrone pupjetatka. Satanasyo gajxigi rawanatkana.

¹⁶ Wa sato galixachro waneya tixinipa tomolene gipnagnurutachrone walako gipxakanna. Gi wa wanna rupxakanna gapatjetachire, wa galikaka gipnagnurutachrone rupxakinripna gapatjetachine.

Gapatjetachine tsrutene

¹⁷ Wa tsrune kigle girukotlewlle gixachine, kagwaakalunepni rumuk-nuna kagwakpiratkalunpotupni, ga wa wanna galikakni yaprewatachine tokanchi chinanu ga wa yimaklewlu chinanu. ¹⁸ Gi rixanu wane china wa yonchi: *Gi pushyanamatantu wa waka wa jiruitachri.* Ga wa wane chinatnaka, “Wa kamrurewakleru rumkata yoptoletlu kamrure giukeole.”

¹⁹ Gi wa jigyegitikolu pjempiranyegitanru tsru, seyni gepi ga wa mapa gipgujtatachine chinanu galikaka pjemanu. ²⁰ Ga wa galikaka mukochire-watachine, pejnuruneko getanu puklukanuwnayegkakanna, wa pimrine koxa pikinripa.

²¹ Goyakalu getanu, ga wa Kristo Geso getanu, ga wa Goyakalutowrerune tsomitkalune getanu, ntowutpotutyi tyekaka pkamritinripa; gi wa muchinanu gapka putakanru pugleretashatanru seyni pejnuruneko pixkakakane getjetachripyi.

²² Gi satuna giyampotu putakamyogogotseptagitanu. Gi pupxalet-mukochiretanru satu. Pumretinwa kpashiri pixgognenatinripa.

Pawlo giykotlu Timotiyo gichkopiranatluya

²³ Gi wa gonupje puranutka, seyni ptsotsotaji winga pniklokanu punan-waka chinanu, ga wa gixo kata pyayixjetinri chinanu.

Mukochri ga wa kigleru kamrurchi

²⁴ Pimrine yine mukochirna gipgujetkalurutkani. Ga wa giklukanuwnalu ma yakanuwana; mukochirna kosekawana. Ga wa pimrine mukochire gomkagitna. ²⁵ Waneko pixka rixa kigleru kamrurchikaka. Pimrinenu gipgujetka. Ga wa pimrinenu gi gimkata yogimletka.

6

Wayegrechne gimkata kamruretanru

¹ Wayegrechne wane gixa getletanna gwayegretjene: Rumuknuna kag-waakana psoluyako kagwakpiratkolupna, wa Goykalu giwaka ga wa ginkaklewlu ma mapatikotupa. ² Ga wa wayegretjenna galixachine waneyalune, gi wa reyiikona moletkakachinni chinanu, seyni pnute kam-rurewatanna gi rixanu galixachinni ga wa gishiniikalunni wa kigleru kam-ruchi yoptotachinepa. Tyekaka punkakanna ga wa puykotanna.

Tsru wane gixlunwa gipashiregnuchi mmaganshnikannuchiyma

³ Ga wa satu pnu china ginkaklewletini ga wa gi yanshinikanutinri kigleru tokanchi wa Wutsrukate Geso Kristo tokanu, ga wa gi yanshinikanutinri gipashiregnuchi ginkaklewle pixka, ⁴ galixkotnachrinwa wale. Gi rumata jema, seyni seprolu pixka rixa gigleretletlu gepomsalkaka ga wa

maleshawaka gigjekaklu. Tye ruyakatyga ganxalu, ga wa yoptopirkaklu, ga wa mupashiregnuchi, ga wa mugletu gimatgojrewluskaka,⁵ rejnugimogneyegkaklena yine gimtukanshinikanutkalune, ga wa konikalune galikakpotunanu tokanchi. Wanna kagwaklu gipashiregnuchi chinanu waneyapna wane rixlena.

⁶ Ga wa galikakni tsru wane gixlunwa gipashiregnuchi mmaganshinikanuchiyma. ⁷ Gi rixanu giike wanika wa kangini tyechijne, ga wa giike wumkata ganikletanu tyechijneya. ⁸ Giyagni wnikanru ga wa wumkalu waneywu wchinini, waleko kiglenshinikanuyapwu. ⁹ Gi rixanu galuka ponikowletachine yantaletikowaka yana, ga wa gitseklutpo yana, ga wa gixo seprolokchi ga wa gimtuklewatachri getso tanrewlukaka yegi yana. Tyekaka gimxiikakna yine salewakchiya ga wa gamgikowakaya. ¹⁰ Gi rixanu sroschi galukikolu walenwa pejnuruko gektututski. Pimrine sroschi galuka gapkatletachine pupjetyaluna galixlewlu. Gixo kachinoluya yoswaknawana.

Kigleru yagotlewlugalixlewlu

¹¹ Ga wa pixa, Goyakalu gayinerutyi, pasukinri tyekaka. Ga wa pomkagitanru poyagkaklewlu, ga wa gipashiregnuchi, ga wa galixlewlu, ga wa gishiniklewlu, ga wa kashnantakgognelu, ga wa mayognuchi. ¹² Kigleru yagotlewlugalixlewlu pyagotinri. Pkashichanru giweklu giike rixiniko mnikawnakatu. Tye chinanuko tomgakaluryi. Ga wa tye kigleru gipguitalelwu pupguitata gixolune getachinyegiya. ¹³ Pixa ntowuta Goyakalu getanu wa ptowrunanuka giweekakachri, ga wa Kristo Geso getanu. Walenwa kigleru gipguitalelwu gipguitatachri Ponsyo Pilato getanu. ¹⁴ Pkamrutantu yakanru. Powrapotupyi. Muklukanuwnakatupyi rupgujewninpotunanuko Wutsrukate Geso Kristo. ¹⁵ Rupgujewninripakpoka gekakgitkalurupni satupjerutu Gitsrukaachiya gimalwutkaluru. Walenwa pogirchine Pogire, ga wa gitsrukaachine Gitsrukate. ¹⁶ Walepjenwa mupnakatu. Mokaygiikowakanu yochigatyawaka gwachri. Walenwa yineru metanatu ga wa yineru mumkata getletanatu. Walepni kagwakpirgognenatkalurupa ga wa kgiyakleroggennenanu. Wane gixkalurupa.

Kigleru kamrurna ponikowatinripna

¹⁷ Tyegogne ponikowatyachine ptowutanu gi wa galixkotnachinepniwa. Gi koxa kagwakanshinikanyegitirina ponikowlu mumatpiranyegitkotu potu, seyni Goyakalu galikakni. Walenwa ptowrunanuka ponikolu wenekjeru wumjikyegityaplu. ¹⁸ Kigleru kamrutanna. Kigleru kamrurna ponikowatinripna. Kgenekaklerunepni. Kapikaklerunepni. ¹⁹ Rapotanruna wannanupa waneyapna kigleru ralpokotyawakapna, kashichyapluna galikaka giweklu.

Ralipre giykoretlu Timotiyo

²⁰ Timotiyo, pumretanru wa pixa gaponshinikanutikolu. Putspalatinri gimirteru maleshawaakaka yanumsalu, ga wa gixasha gimatkalelwu kamnixleya. ²¹ Walekni pimrine gipguitatnamkawa, galixlewlu pupjetyana.

Gimutkalurupyi pixa.

2 Tixinri Kpashiri Pawlo Kirukate Timotiyo Chinanu

Galuklewlu

¹ Pawlo kirukate. Walenwa Kristo Geso yokanatanru Goyakalu gishinikyawaka, chinyawaka gipiratkaluru tokanchi giweklupirana Kristo Gesoya.

² Timotiyo chinanupa, noturu nushinikanru. Gimutkalurupyi ga wa getwamonutkalurupyi, ga wa giglewanshinikankaakalurupyi Goyakalu Girchiya, ga wa Kristo Geso Wutsrukateya.

Timotiyo galixlewie mixashatkatu

³ Npoyagnutlu Goyakalu, wa nyonyogyegetanru powra getanshinikanut-nachriwano ntsrutene pixka, goyecho ga wa gogi gi nutuka gishinikletingi naguireya. ⁴ Nushinikaktegatinyi, gogaluklewlu nixa getletmakyi tsru gimuwlu nixinripa. ⁵ Nushinkapjetlu palixlewie mixashatkatu. Tye galixlewluna muchikawa pajiro Lowita gwachri. Ga wa punro Yonisi gwachri. Ga wa gishinikanutkalurno wa pixa koxa gwachritka. ⁶ Tye chinanukni nushinkapkakyi pmuchkotanutnaku Goyakalu genekashle wa pixa gwachri nutakamyogogotseptagitinyi chinanu. ⁷ Gi rixanu Goyakalu gi genekwu kpiklegolunshinikanu, seyni Giwekkaluru muchkotanshinikan-rewatachri ga wa gishiniklewlewtachri ga wa kanshinikanurune gixkak-lewatachri renekwu.

Numatlu wa nalixanru

⁸ Giyagni gi wa pupatewatanru Wutsrukate gipgijtatikolu. Gi koxa pupatewatanno gita gostutkalurno Walenu. Seyni pusalewnanno Kiglerpotunaru Tokanchi chinanu, rixyawaka Goyakalu giyakle. ⁹ Goyakalu wa Wognetkakjeru ga wa wtomgajeru kpashirine wixinripa, gi wa wkamrure chinanu, seyni Wale gishinikanru chinanu, ga wa rumutlewie gixywaka. Wane rixa gimutletwu Kristo Geso chinanu mawakanuru muchinan-gognepotunanuko. ¹⁰ Ga wa xani Goyakalu gishinikanru ga wa rumutlewie gipgijetkalurutkani Wognetkakjeru Kristo Geso gipgijewnaleya. Wale nik-taplu gipukchi ga wa pokamlatyegitlu giweklu ga wa mupnaknuchi Kigler-potunaru Tokanchiya. ¹¹ Wa wale chinanu nutaaka gita, kginkaklewakleru nixinripa, ga wa yokanatkaluru, ga wa yimaklewatachri nixinripa. ¹² Wale chinankoxni tyekaka nsalewniya. Seyni gi npatewata. Gi rixanu numatlu wa nalixanru. Gishinikanutkalurno wa Wale gimkata gimretletlu wa Wale naponshinikanutinri Kristogognepotunanuko.

¹³ Pyimanrupni wa kigleru tokanchikaka wa gita pjeminri galixlewuya ga wa gishiniklewuya wa Kristo Gesoya. ¹⁴ Wa paponshinikanyegitimkolu kigleru pumretanu Giwekkaluru Kpashiriya, wixa gwachri.

Gonesigoro gipxakle

¹⁵ Wa tye pumatanu. Pejnuruneko Gasya gajene satokyano. Wannaymana Wigeyo ga wa Germogene.

¹⁶ Gitsrukaachi getwamonutanna Gonesigoropji gajene. Gi rixanu gixo kata rapnanunshinikankakno. Gi rupatewatlu nostutikolu. ¹⁷ Seyni Roma rapokinitka rujgapotnu ga wa rukshikno. ¹⁸ Gitsrukaachi genekanru wa walegognepa getwamonrewlu rukshikinripa Gitsrukaachi yegi. Ga wa gi pejnunanukta rupxakyano Gigwisoya, pixa gimatputa.

2*Geso Kristo solalote kigleru*

¹ Giyagni pixa, noturu, pmuchkotinwa Kristo Geso gimutlewleya. ² Gixo wane gitā pýijnakotinrikaka gixo getachine yegi. Tyekakapirana putakanru jejine poyagkakachine yegi. Wane pixini pimrine koxa gimkata yimakletachinepə. ³ Gakota salewnaletachripyi Kristo Geso solalote kigleru kgimuka. ⁴ Gi satuna kyagotkakakleru kotsaklunshinikanutnawa tye giweklu kamrureya, ruglenshinikanutyaplu solalotjixjeru. ⁵ Kyenewakleru wanepotuko ma mixa yenewletkanu, gi rumkata kanashkaletu sagyeta. ⁶ Wa kgisanateru yaprewatachri muchinanu gapka getumganru sana gwiyachri. ⁷ Pumata jemanru wa nchinyawakyi. Gi rixanu Gitsrukaachi genekanshinikanutanyi psoluyako.

Pawlo salewninri tsomitkalune chinanu

⁸ Pushinikanru Geso Kristo, wa Tawiklopisha, wa gipnachinetskalaya yotunkakikaluru, chinyawakpotuko Kiglerpotunanu Tokanchi gitā tokanuya. ⁹ Tye chinanu nsalewna nostutikolpotunanuko, satu gektutu kamrutachri pixka. Seyni Goyakalu tokanu gi wa gostutkalurni. ¹⁰ Giyagni pejnuruko nkashnantakanshinikanuta tsomitkalune chinanu, wanna koxa gapkapyaplu gognewatikaluru Kristo Gesoya, pogirewluymananuko gi keixiniko mnikawnakatu.

¹¹ Tyenwa potukalu tokanchi:
Gi rixanu Waleyma wupnini,
Waleyma koxa wuwekanu.

¹² Wkashnantakanshinikanutini,
Waleyma koxa wpogirewatanu.
Wale wunutatini,
Wale koxa ginutatanunwu.

¹³ Wma malixinipmaka,
poyagkakachri rixgognenata.
Gi rixanu gi rumkata ginutleshatnawa.

Kamrurewatachri mpatewatkatupa

¹⁴ Tyekakapirana pushinkapkakanna ga wa ptowutpotutanna Goyakalu getanu gi wa maleshawaka yoottopirkakashatanna gi ke gapri migie yoottopirkakluya, wa yijnakotachine gimtukachri. ¹⁵ Pmuchtinwa pekakgitinwa Goyakalu getanu kiglepiranyegirupyi. Kamrurewatachri mpatewatkatupyi. Galikakpotunanu tokanchi wane potuko koschekachripyi. ¹⁶ Gimuteru maleshawaka yanumsalu pkatjitanu, gi rixanu pnute rixa kosekletanna ma kagwakpirnukleyna. ¹⁷ Ga wa wanna tokanu poshalpiranamtanu kakshiri yomawlu pixka. Waneko pixka gixachinni Gimeneyo ga wa Wileto. ¹⁸ Wanna pupjetyaluna galikakpotunanu tokanchi. Wanna wane china wa yotunru giknoogimatatka. Ga wa pimrine rumtuka galixletna. ¹⁹ Seyni gichko tunwale rixa Goyakalu poyegityawaka. Tyeya rumaxikoletka: *Gitsrukaachi gimatna Walenune*. Ga wa pejnuruneko Gitsrukaachi giwaka koschekachine gitspalatinri mpoyagkaknuchi.

Gi pixka getle rixka pastonkaka

²⁰ Ga wa tsrupji wanero pastonkaka, gi wa koristonopjeni ga wa sroschi, seyni wanekoxlu gagmuna kamrutikalurstonkaka ga wa kajpa kamrutikalurstonkaka. Ga wa pimrikaka kagwakpiratkalurupa, ga wa pimrikaka mkagwakpiratkatupa. ²¹ Giyagni girukokta tyekaka powratinwa, walepni wa kastonolu kigle getkalurupa, kpashiri gixkaluru, ga wa kigleru gapi

Gitsrukaachinupa rixanu, galpokotachri pejnuruko kigleru kamruchi chinanu.

²² Pasukinkoxlu wa maklujine getsotanrewle. Pomkagitanru poyagkaklewlu, galixlewlu, gishiniklewlu, giglewanshinikanrewlu, wa Gitsrukaachi koschekachineyma powralu rajiyna. ²³ Ga wa gepomsalkaka manshinikanutu ga wa myimaakotu putspalatinri. Pumatlu tye ruyakatya yagotkaklukaka. ²⁴ Ga wa Gitsrukaachi wayegreru gi gimkata yagotkakleta, seyni pejnuruneko yiglepotuko getachripni. Gimata yimaklewletachripni. Gakotanshinikanutachripni. ²⁵ Mayogotuko tseruwakanshinikanutanna kamnixlewatACHINE, gikta Goyakalu genekanna genshinikanrewlu wa rumatyapluna galikakpotunanu Tokanchi, ²⁶ ga wa tsru kamchi gitseklepo rushparkinripna wa kashichanune wale gishinikyawaka.

3

Ralipregognekaka wanepna muglenshinikanunepa

¹ Wa tye pumatanu. Wa ralipregognekaka waneplu kyowikolgognekakapa. ² Gi rixanu wanepna yine wannananuko galuknachinewa, sroschi galukachine potu, tsru gixashatnachinewa, galixkotnachinewa, mupashiregolune, kaaligiruklerune, poyagnu mchinkane, Goyakalu mkagwakpiraklene, ³ rumumturetna galuklewie mixkane, mumkata gipoyikgaletkane, kapataklerune, makotmanetnachinwa kmatsurune, kigleru gayegixachine, ⁴ gitokoko gayegixlewatyachine, mgirukowjetkane, wannananuko getpotnachinewa. Goyakalu pnute gigleretashatkaluru rushinikna. ⁵ Gipashiregowlu pixkalulu waneyna, seyni gipashiregowlu gyakle nutatna. Nyi putspalatini pixa.

⁶ Gi rixanu wannayegirune panchikaka yoshmakjetnachinewa. Kashichanshinikanutkalurone pixka rixkana suxone mshinikanune molemukochiretachrone, gixo getsotanrewlukaka koseekanune.

⁷ Psolgogneko rujga gimatlegognenatna. Gi pagogneko rumkata gapkapletluna galikakpotunanu tokanchi gimatikolu. ⁸ Gane ga wa Gampre kamnixini pixkalu wa Mosisi, waneko pixka wa nyi gixa kamnixletlu galikakpotunanu tokanchi. Jejinni gimbukanshinikanutkalune. Gi kiglepiranyegirunni galixlewluya. ⁹ Seyni wannapni gi wa kosekpotutanunna. Gi rixanu wa seproloklena gipgugjetkalurupni pejnuruneko yegi, wannani pixka.

Goyakalu gitakanshinikanutlu pejnuruko Wale tokanchi yonatkaluru

¹⁰ Ga wa pixa getjenatlu nunkaklewle, ga wa nixjetyawaka, ga wa nushinikjetyawaka, ga wa nalixlewle, ga wa nmapognanre ga wa nushiniklewle, ga wa nkashnantakgognewle, ¹¹ ga wa nkoywakikolkaka, ga wa nsalewninrikaka, wa Gantiyokiya nuknogjeru, ga wa Gikonyoya, ga wa Listraya, gi pixkalulu kojwawakchikaka nakota. Ga wa pejnuruyako Gitsrukaachi koshpakno. ¹² Ga wa pejnuruneko kgipashiregolune galuka gixletachine Kristo Gesoya kojwaakalunepni. ¹³ Ga wa muglene jejine ga wa kyokwirewaklerune pnute rixa kosekletanna. Yokwirewatanna ga wa yokwitkona. ¹⁴ Seyni pomkagitanru pixa wa pyimakikolu ga wa palixpotutanru, pumatlinri ginnanwa pyimakjene. ¹⁵ Ga wa pmatureyakawa pumatlu kpashiri yonchi. Walenwa kgimatkaleru pumkata gixjeru gognewatikaluru chinanu, Kristo Geso galixikolu chinanu. ¹⁶ Goyakalu gitakanshinikanutlu pejnuruko Wale Tokanu Yonatkaluru. Giyagni pejnuruko Goyakalu yonjixanrukaka walenwa yimaklewle gapi, ga wa chigetjeru gapi, ga wa potukatlewlu gapi, ga wa

tseruwakanshinikanrewlu gapi poyagkaklewlu yapa, ¹⁷ galpokotachripni Goyakalu gayinerute. Mmagatikatupa pejnuruko kigleru kamrurchi chinanu.

4

¹ Ntowutpotutyi Goyakalu getanu, ga wa Kristo Geso getanu, wa giwekachine ga wa gipnachine gitakyagokachripa, ga wa rupgujewna lepa chinanu, ga wa pogirewatyawaka chinanu, ² punkakletanru tokanchi. Gi wa malpokotkatupyi ruglepo klapinpi ga wa ma muglepoktapini koxa. Pekakgi giklukanuwnalere watanu, pchigetjerewatanu, puykolewatanu psoluyako mapognanutupyi ga wa psoluko yimaklewlu yapa. ³ Gi rixanu pagogne wanepa wa kigleru ginkaklewlu gi rakotanshinikanutanna. Seyni rixa getsutanretyawakna, ruxolewnakakanna ginkaklewatachane rajepikpotin-rinchinanna. ⁴ Rushyajnakyegitluna galikakpotunanu tokanchi. Ginkaklusha ruprotakyegitna. ⁵ Ga wa pixa psoluko kanshinikanuruyapyi. Pakota salewnaletanu. Kiglerpotunanu Tokanchi kginkakletakleru kamrure pkamrutanu. Poyagkakanru pkamrure putakikolu.

Poyagkaklewlu savyeta

⁶ Gi rixanu nuwekinu gipkaakoklunpatka. Rapokatka nyinripapkopatka. ⁷ Kigleru yagotlewlu nyagotlewatyatka. Nasuktale nnikatatka. Numretlu galixlewlu. ⁸ Xaniyakawa waneru poyagkaklewlu savyeta pixkalutu gimretkaluru gita chinanupa, wa Gitsrukaachi genekyapno walegognepa. Gitsrukaachinwa kgitakyagoklewakleru poyagkakachri. Gi wa gitapje reneksagyeta tanu, seyni pejnuruneko Geso gininri gishinikachinkoxapa.

Timotiyo giykotka walenanukoya

⁹ Pyagota ginyegletanno giyampotu. ¹⁰ Gi rixanu Tema giknokamtatkano. Tyegogne gajeru gishinikachrinwa wale. Tesalonika yatka. Ga wa Kresente Kalata yatka. Ga wa Tito Talmasi yatka. ¹¹ Lokasupje gitaymatka. Pwapanru Marko. Pixaymaplu. Gi rixanu wale gimkata gipxakletno kamruchiya. ¹² Gigwiso nyokanatu Tichiko. ¹³ Trowa pokchi Karpo yegi nuknokamtanru nopata. Panikanru xako puninipa. Ga wa Kiruka koxa, ga wa yonatkaluromta galikaka panikanu.

¹⁴ Galegantro sintawo kamrurewatyachri gixo kata gektutu nixjeru. Wa Gitsrukaachi gapnutanru rixpoko kamruretyawaka. ¹⁵ Pgirukotinwa pixa koxa waleya. Gi rixanu wale kamnixpotutlu wtokanu.

¹⁶ Wa muchinanu nuykoyegitnawa gi satuna gimwastositno. Seyni ruknokamtnona pejnuruneko. ¹⁷ Seyni Gitsrukaachi gimwastositno, ga wa muchkotno wa poyagkakikolupa ginkaklewlu gitaya, wa payinem-nunanuka yijnakotyapa. Ga wa tsru mgenoklunama nkoshpakika. ¹⁸ Ga wa Gitsrukaachi koshpakanno pejnuruko mugletu kamruchiya. Ga wa rognetskakanno tengogne gajeru pogirewatyawaka chinanu. Gimbalwugog-nenatkalurupni gike rixiniko mnikawnakatu. Wane gixkalurupa.

Ralipre galukleta

¹⁹ Palukanna Presura ga wa Gakila, ga wa Gonesigoropji gajene. ²⁰ Korinto rutuka Gerasto. Ga wa Mireto Pokchi nuknokamtlu Trogimo yayixachri. ²¹ Ginapuklu gnaru pyagota gapokletanu. Ralukyina Gewolo, ga wa Potene, ga wa Lino, ga wa Klawtya, ga wa pejnuruneko moletkakachine.

²² Gitsrukaachi pixaymapa. Gimutkalunepgi.

Kpashiri Pawlo Kirukate Tito Chinanu

Galuklewlu

¹ Pawlo Goyakalu wayegreru kirukatni. Geso Kristo yokanatanruno Goyakalu tsomitanune galixlelew chinanu. Yokanatno rumatyapluna galikakpotunaru tokanchi gipashiregnuchipiranaya, ² kagwakikolupa giweklu gike rixiniko mnikawnakatupa. Walenwa Goyakalu mayrokletu gipiratanru. Rupiratanru mawakanuwa muchinangognepotunananuko. ³ Ga wa gipapkoya rupgujetlu tokanu nunkaklewleya. Wale chinanu gaponshinikanutkalurno, wa Wognetkakjeru Goyakalu gixa yokanretyawakno.

⁴ Giyagni twu kiruka Tito chinanupa, noturpotunanni galixluya, wa galixlu pejnrurunenupa.

Gimutkalurupyi ga wa giglewanshinikankaakalurupyi Goyakalu Girchi chinanu ga wa Kristo Geso Wognetkakjeru chinanu.

Gi gixachinepni tsrune ga wa girukotlewatachine

⁵ Wale chinanukni Kreta nutakamtyi wa puglepokotyaplu wa magat-achri. Ga wa satkaka pokchi tsrune putakyapa nchina towutleyawakyi.

⁶ Girukokta muklukanuwnakatu, satopje suxo gnuru, ga wa wugenene galixachine, pachwatjerewlu ga wa gaalirewelu muklukanune. Ga ga wale putakanu. ⁷ Gi rixanu girukotlewatachri gimkata muklukanuwnakatu gixleta, wa Goyakalunu girukotachri rixinri. Gi wa waleko gishinikanru kamrujetachripni. Gi wa pomtuwakalupni. Gi wa kgimelerupni. Myagotkakakletupni. Gi wa kgimkapnugaklerupni. ⁸ Seyni ksuslagaklerupni. Kiglerkaka galukachripni. Kshinikanurupni. Poy-agkakachripni. Goyakalu kagwakpiratachripni. Girukotnachripni ⁹ Wa potukalu tokanchi wa ginkaklewlu chinyawakpotuko kashgogneñatachripni. Rumkata giy kolewletinripa kigleru yimaklewlu. Ga wa rumkata gik-lukanuwnakakletyapna kyoptopiraklerune.

¹⁰ Gi rixanu wanene gixo kaalirewaklerune maleshawaka kyanumsaklerune ga wa kyokshalewaklerune. Ga wa wane rixna galikaka wa sajraka gistaakotachine. ¹¹ Wanna gimkata kochrookota. Gi rixanu wanna gimtukanshinikanutna papjikaka gajene pejnruruneko. Runkakletluna mumkata ginkakletkotu gektutu rawapinripna. ¹² Satu tokanchi genelewatachri Kreta gajeru wane china, “Kayroklerunni Kreta gajene, gek-tunni kmatsurunni, tsru nikalune, mmerene.” ¹³ Galikakni tye gipguitalu. Wale chinanu gichko tokanu puklukanuwnakakanna, gichko galixle rixinripna. ¹⁴ Gi rushinikanutletanruna Goteyone ginkakleshkaka, ga wa yine yokanrekaka wa galikakpotunaru tokanchi gitspalatyachine. ¹⁵ Powralune getanu pejnruruko powralni. Seyni wa kapcholuñe ga wa malixkane getanu maleshlu powralu. Seyni ginshinikanna ga wa rumata getlewlena puchotkalurutkani. ¹⁶ Wa Goyakalu gimatachine chinashatnawana. Seyni kamrureyna nutatluna. Gagnanutkalunni ga wa kaalirerune. Ga wa pejnu-ruko kigleru kamruchiya muglepiranyegirune.

¹ Ga wa pixa yanumsalepni kigleru yimaklewlu rumuknu. ² Ga wa tsrune mumetkanepni, kagwakpiratkaluru kgimuka rixanna. Kshinikanurunepni. Gichko galfixlewlerunepni ga wa rushinikleweleyna ga wa kashnantaatkognewleyna.

³ Waneko pixka rixanna tsrone. Kpashirone kgimukapnina. Gi wa kapatakleronepnina. Gi koxa gixo winga wayegretanunepni. Kigleru yimaklewatachronepni, ⁴ ruykotikolupna maklojine gishinikagnurutachronepni ga wa gishinikawgenetachronepni. ⁵ Kshinikanuronepni. Powralonepni. Girukotapjitarachronepni. Kigleronepni. Wannako ganurunna yijnakotachronepni ma mapatikotupa Goyakalu tokanu.

⁶ Waneko pixka pixa giykoletanna maklujine kshinikanurunepni rixinripna. ⁷ Psoluyako pekakgitinwa yimkalurupa kigleru kamruchiya, wa yimakleluya ga wa powraluya ga wa kigle getikoluya, ⁸ ga wa kigleru tokanchi muklukpiranyegitkotuya. Wane rixanna patewatinripa wkamnixjerupa, gi rixanu maleshayaplu mugletu chinpiraneyapwu.

⁹ Wayegrechne yijnakotanna wannako rutsrukattenna. Psoluyako ruglen-shinikanutikolupna rutsrukattenna. Maalirerunepni wayegrechne. ¹⁰ Gi wa gitsrukaachinu kotnukinna, seyni psoluyako kigle poyakkakle rekakgitinwana, giglewlu pixka rixyapluna psoluyako Wognetkakjeru Goyakalu ginkaklelew.

Kgipashiregolunepwu wixjetinripa tyegogneya

¹¹ Wane rixa Goyakalu gimutlewie gognewatikaluru chinanupa pejnjuruneko yine rupgujewnayegitatta. ¹² Wale yimakwu wa mupashiregnuchi waalixyeginwa, ga wa tyechijne getsutanrewle koxa. Kshinikanurunepwu ga wa poyakkakachinepwu ga wa kgipashiregolunepwu wixjetinripa tyegogneya. ¹³ Wkagwakgognenatanru gimalwutachinepwu wa rupgujewniripa yochigleyma tsru potu Woyakalute wa Wognetkakjeru Kristo Geso. ¹⁴ Walenanuko geneknawa wixa chinanu koshpakyapwu psoluyako wmuchoire, ga wa powratyapwu Walenunepwu, rayinerutenepwu. Jmererunepwu kigleru kamruchiya.

¹⁵ Tyekaka pchinjetanu, ga wa tyekakapiranaya puykolewatini ga wa puklukanuwnakaklewatanu psoluko towtlewluyapa. Gi satuna geyikanyi.

3

Wa muklukanuwnakaakonwu wixinri rumutlewie chinanu

¹ Pushinkapkakanna yijnakotkona tsrukakalune ga wa tsru gitaaikalune. Kalixaklerunepni. Galpokotachinepri pejnjuruko kigleru kamruchiya. ² Gi satuna rapataanha. Myagotkaklenepni. Yiglepotuko getlewatachinepni. Psoluyako mayogonepni pejnjuruneko yine yegi rekakgitinwana.

³ Gi rixanu wixa koxa muchikawa mumatkanenanwu, ga wa kaalire-waklerunenanwu, ga wa pupjetachinenanwu. Wetsotanrewlekaka ga wa pnumnu gixachri gigleretashatkalurkaka wayegretapwu. Gektutu ga wa ganxalelwu wuknokakashgognenaty. Gagnanutkalunenanwu ga wa gayegixkakanatachinchwu. ⁴ Ga wa rupgujewninitka Wognetkakjeru Goyakalu shinikanrewle ga wa yine rushiniklewe, ⁵ rognetskakwu gi wa poyakkaklelwu kamrure wa wixa kamrutanrukaka chinanu, seyni rixa getwamonrewletyawaka chinanu. Wa wumepe gishpakletini wkatikolu Wale chinanupa, ga wa Giwekkaluru Kpashiri gerotewkale chinanupa, rognetskakwu. ⁶ Wale Giwekkaluru Kpashiri renekpotutwu Geso Kristo chinanu Wognetkakjeru. ⁷ Wale renekwu wa muklukanuwnakaakonwu

wixinri rumutlelewle chinanu, Walenu yoptotachinwu wixinripa, wa wkag-wakanru wyoptotinripa. Walenwa giweklu gike rixiniko mnikawnakatupa.

Manshinikannuchi gepomsalkaka pkatjitanu

⁸ Tyenwa potukalu tokanchi. Naluklu pixa muchkowtokanyegitanru tyekaka, wa Goyakalu galixachine gishinika gipxaklepoutuyapl kigleru kamrurchi. Tyekakni kigleru ga wa rupxakyapna yine.

⁹ Seyni manshinikannuchi gepomsalkaka ga wa gitsrukaachinni gi-waakakapirana, ga wa yoptopirkaklu ga wa yagotkaklukaka Tokanchi Yukanatkaluruya pkatjitanu. Gi rixanu maleshawakni ga wa gike gaprimigeni. ¹⁰ Ga wa jeji kotspaltanshinikankaklewatachri pakatapje ga wa gepi kata ruykotikolmakatkani, waneklu putspalatinri. ¹¹ Pumatlu gitutewnachrifka rixinritka tye pixkalutu. Kmukochirewakleru. Waleananuko giklukanuwneyegjinxawa.

Tito giykotka walenanukoya

¹² Wa Gartemo nyokanyegitiniipyi ga wa Tichiko, pyagota ginreyegitanno. Nikopoli punyeginno. Gi rixanu wane nushinika giknokakletyalu gina-puklu. ¹³ Pyagota gipxakle yagapletanna Sena, yonchikgapri, ga wa Gapolo. Gike magatyachinepni. ¹⁴ Wixanune gasrukinwa girukotletlu kigleru kamrurchikaka wa maglewlupotuya, kamrurchi mwikane ma mixinitipna.

Giglenshini kanyeglewlu

¹⁵ Pejnuruneko gitaymalune galukyi. Palukanna walukjene galixlelewuya. Gimutkalunepgi pejnurunekgi.

Kpashiri Pawlo Kirukate Wilimo Chinanu

Galuklewlu

¹ Pawlo kirukatni, Kristo Geso chinanu gostutkalurno, ga wa wumole Timotiyo.

Wilimonupni wushinikanruyi wukamrurewatanruyi. ² Ga wa wepuronupa Gapyä, ga wa Garchiponupa wusolalotanru, ga wa pixapji gapatjetyachinenupa.

³ Gimutkalunepgi ga wa giglewanshinikankaakalunepgi Goyakalu Wuruuya ga wa Wutsrukate Geso Kristoya.

Wilimo galuklewle ga wa ralixle

⁴ Wa nushinikinyi nagjigognereya npoyagnutgognenatlu Noyakalute, ⁵ nyijnakpiranyegitinri wa Gitsrukaachi Geso palixinri ga wa pushinikinri, ga wa pejnuruneko kpashirine koxa. ⁶ Nagjitlu Goyakalu wa palixle papikyapna pimrime koxa. Wane pixanu pumatyaplu pejnuruko kigleru waneywu wchininri Kristo chinanu. ⁷ Gi rixanu tsru gimuwlu ga wa tsru gimnanuklu nixa pushinklewlé chinanu. Rapnanunshinikankaakana kpashirine pixa chinanu, nomole.

Pawlo giplepokyegitlu Gonesimo

⁸ Giyagni Kristo chinanu ntseruwanshinikanuta ntowutyapmakyi wa pumkata wane gixleta. ⁹ Seyni gishiniklewlu chinanu nagjityi galikaka. Wane gixachrino Pawlono, tsrutzsoleji, ga wa xani gostutkalurno Kristo Geso chinanu. ¹⁰ Nagjityi noturu chinanu, Gonesimo, wa nostutikowakako nwugenetrinri. ¹¹ Muchikawa gike gapri migje rixanatyi. Ga wa xani rupxakyi ga wa gita koxa rupxaka.

¹² Wale nsatkakyegitatnakyi. Walenwa gitanuko nonshinikanu. ¹³ Naluka chipetletmaklu, wa pixa chinanu rupxakyapno nostutikoluya Kiglerpotunaru Tokanchi chinanu. ¹⁴ Seyni pixa tokanu migje gike naluka kamrureta. Gi wa psolmuchkonuko ntowutanyi, pupxakyapno, seyni pixako pushinikanupni. ¹⁵ Patako xani tye chinanu pshinitson rutspalatyayi, wa waneygognenanyi rixinripa. ¹⁶ Gi wa wayegrechri pixka gixachritkani, seyni wayegrechri pnutefkani, wumole nushinikanru galikaka, ga wa gi pagishiniikolutunanuktu pixaya manchiya ga wa Gitsrukaachiya.

¹⁷ Giyagni petyawakno wushiniikaka Gesoya, gita pixkapotuko pixa yop-toletanru, Gonesimo. ¹⁸ Ga wa pagixanu rumtukamtinipyi ga wa riwishkamtinipyi gita chinanu putakanru. ¹⁹ Gitni Pawlo nomyooya nyonatyia, Gita gapnutyapni. Wane nma chinkanupyi pixnanuko puwekinri potu pri-wishkatyano. ²⁰ Gigi, nomole. Nupxakikolupmaka pixaya Gitsrukaachi chinanu. Papnanunshinikankakanno Kristoya. ²¹ Nyonyegityi gi rixanu naponshinikanutyi yijnakotachriyi. Numatlu wa nchinyawaka pnute pkamrutana.

²² Waneklu koxa palpokjixinno nwiyawakapa. Gi rixanu gixa gagjigognere chinanu nkagwaka geneekota gixa yegi.

Ralipre galukleta

²³ Ralukyi Gepaprä nixje gostutkaluru Kristo Geso chinanu. ²⁴ Ralukyina Marko, Garistarcho, Ntema, ga wa Lokasu, nukamrurewatanune.

²⁵ Gitsrukaachi Geso Kristo gimusangi. Wane gixkalurupa.

Gewreyone Chinanu

Goyakalu goyaknu gatajiwniyachri

¹ Muchikawa Goyakalu gixo kata ga wa pnumnu rixa giynumsaletna wut-srukatenni tokanchi geneklewatachinni. ² Tye ralipregognekaka, Gituya ruynumsatyawu. Walenwa rutakanru ptowruranuka yoptotachripa. Waleya koxa psolchijnemnunanukaaka kamruta. ³ Psolpotuyako Ruru goyaknu ratajiwniya. Wale pixkapotuko rixa, ga wa ptowrupotunanuka yostatachri ruyakle tokanuya. Wa powratmukochiretinitkawu, teno Gajeru kgyagknuru potuklesretate tuplata. ⁴ Goyakalutowrerune pnuterutu rix-potutatka, gi rixanu yoptogiwakatachri kiglepotlu wanna giwaka pnute.

Tsrunwa Geso Goyakalutowrerune pnute

⁵ Gi rixanu gi pagogneko gi satu gitowreru wane china Goyakalu:
“Noturyi Pixa; tyegogne nwugenetyi.”

Ga wa wanepnute:

“Rurupno Gita ga wa Walepni Noturu.”

⁶ Ga wa wanepnute wa tyechijne ranikinitkalu muchinanu tsru Gituru, wane china:

“Pejnuruneko Goyakalutowrerune yoptsojityegitanru.”

⁷ Ga wa gitowrene wane chinpiranyegita:

*Giwekikalurune kamrutna gitowrene
ga wa kamrurewyegitjene katmerolkaka rixkaka.*

⁸ Seyni wa Gituru wane china:

*“Pogirewle tuplapijere, Goyakalu,
gwagognenatachripni gike rixiniko mnikawnakatupni.*

*Ga wa pogirewatyawaka kanojere,
poyagkaklewlu kanojerni.*

⁹ Pushiniklu poyagkaklewlu,
ga wa payegixlu mukochri.

*Giyagni Goyakalu, Poyakalute,
giyokgogotyi tsru gimjiklungi
pupxalune pnute.*

¹⁰ Ga wa
yinuwakikowakaya Pixa, Gitsrukaachi,
peksamruretu psolchijneko.

Ga wa tengogne pumyo kamrutikalurni.

¹¹ Tyekakapni nikawanana,
seyni Pixa gwagognenatanu.
Pejnurkakako mkachri pixka rutsrugananumtanu.

¹² Ga wa sapwaklu pixka psaprurukanru.
Ga wa mkachri pixka kashrijetikolupa.

Seyni Pixa pixyawakakni Pixa.

Ga wa pwalaputkaka gi nikawanana.”

¹³ Gi rixanu gi pagogneko gi wane chinru satu gitowreru:
“Npotuklesretate ptuplatanu,

*pkamnixjene nutakinpotunanuko
pujixi gitspangaprepa.”*

¹⁴ Ga wa pejnuruneko giwekikalurune kamrurewaklerunni Goyakalu yokanata rupxakjetyapna gognewatikaluru yoptoachinepa.

2

jGi psonananru gognewatikaluru!

¹ Giyagni wumkata wanepnute yanshnikanyempotletlu wjemanrupi-rankakaya ma muknogamtyanupwu. ² Gi rixanu wa tokanchi Goyakalutowrene ginkakletanrukaka poyegi rixinri, ga wa pejnuruko ma mumret-nuchi ga wa ma yijnaknuchi wanepotuko rixa saletkota, ³ ¿gi wixpoko may-ixawnaletanuna wa wma girukoñkanuplu gipsonanru gognewatikaluru? Tyenwa muchinanu Gitsrukaachi ginkakletanru. Ga wa wixa yegi poyegitkalurni Wale yijnakotachineya. ⁴ Ga wa Goyakalu gimupguitatyana getkalurkakayma ga wa koglajrakakayma, ga wa gixo guyaklukakayma, ga wa Giwekikaluru Kpashiri gapiksatanrukakayma rixanshinikanutyawaka Wale.

Ptsotsotaji Goyakalutowrerune giyagokolutni rutaaka Geso

⁵ Gi rixanu gi wa gitowreneko chinanu Goyakalu yijnaakakna ginachrigognepa gajene. Walenwa wunkakletpiranatanru. ⁶ Satu pasretaya wane china gipguitaletlu:

¿Klunerni wa yineru

wa Pixa gishiniwyawaklu,

ga wa yineru w'gene petyawaklu?

⁷ *Pshinitsonu putowrerune giyagokolutni putakinitkalu.*

Waneklu psagyetatatnaklu pogirewluya

ga wa kagwakpiiruya.

⁸ *Ptowrunanuka putaka gjixipta rapukote.*

Gi rixanu ptowrunanuka yijnaakakini, gi satuna gixeta myijnaakaakotu. Ga wa xani gi wetlu ptowrunanuka Wale chinanu yijnaakaakaluru. ⁹ Seyni wetlu Geso gitowrenre psotsotaji giyagokololu gitaakaluru, sagyetatkaluru pogirewluya ga wa kagwakpiiruya gipukchi salewniyachri chinanu, wa Goyakalu gimutlewle chinanu Wale getumgiyaplu gipukchi pejnurune chinanu. Salewnalu chinanu mmagatikatu rixka

¹⁰ Gi rixanu Goyakalu, wa Wale chinanu ptowrunanuka wane, ga wa Walenupni ptowrunanuka, wa gixo wugenene ranikini royaknu yegi, kigle getle rixlu salewnalu chinanu mmagatikatu rixkaklu rognetskakikolna Gitsrukate. ¹¹ Gi rixanu kpashiri gixkaklewatachri ga wa kpashirine gixaakalunetka satupjerutu ruyakatyana pejnuruneko. Giyagni tye chinanu gi rupatewa Geso chinretna gimolene. ¹² Wane china:

Pgiwaka nunkakanna nomolene.

Gapatjetachine tskalaya nshikaletinyi.

¹³ *Ga wa wanepnute:*

Gita gaponshinikanutanru Wale.

Ga wa wanepnute:

Getanno Gita, ga wa nwugenene

Goyakalu genekyano.

Gimolene pixka rixka

¹⁴ Giyagni gi rixanu wgenchime granchi ga wa giichi gapsatkalunni, waneko pixka rixa Geso. Manewata gipukchiya nikatyaplu wa gipukchi muchkonu waneyalutu. Walenwa kamchi gitsrukate. ¹⁵ Ga wa manewata koshpakyapna wanna yine, wa psoluko ruwekinriyna gostutkalune pixka

rixna, gi rixanu gipukchi pikachine rixanatna. ¹⁶ Gi rixanu gi wa Goyakalutowrerune rushatkapa galikaka, seyni Gawraklopishane rushatkapa. ¹⁷ Wale chinanu psolpotuyako gimolene pixka rumkata gixkota Geso, kgetwamonreru ga wa poyagkakachri Sasertote Gitsrukate potu rixinripa Goyakalunkakaya, mukochri rupekotinripa, wa yine mukochire. ¹⁸ Gi rixanu Gesoko yantaletlewluya salewniya, rumkata gipxakletna wa yanataletkalune.

3

Tsrunwa Geso Moysisi pnute

¹ Giyagni, nomolene, kpashiringi, patomgakolungi tengogneya, gyanshinikanyegitanru wa yokanatkaluru ga wa sasertotene Gitsrukate potu wupgujtapiroanyegitanruya. Walenwa Geso. ² Walenwa poyagkakachri wa rutakjeryegiya, Moysisi pixka psolupjiko walepijiya. ³ Gi rixanu rumknu kagwaakalurni Geso Moysisi pnute rumalwutikolupa, wa panchi kamrutachri pixka kagwakpiratkalurupa panchi pnute. ⁴ Gi rixanu pejnurukopji kamrutkalurni pimrineya. Seyni wa pejnurukakako kamrutachri Walenwa Goyakalu. ⁵ Ga wa Moysisi galikakni poyagkakachri rixa psoluyako gipji, wane kamrurewatyachri pixka, rupgujtatyaplu ginkakletpiranatkalurkakapa. ⁶ Seyni Kristo wgenchi rixa gipjiyako. Walepiju wixa wa gaponshinikanrewlu ga wa galixkowlu kagwaklewluwa wpoyegita gimretletini yoptukyawakpotunanuko.

Malixgajitkutu ma mixinitipa satu wa gixa

⁷ Giyagni wa Giwekkaluru Kpashiri chinyawaka:

“Xawakni gyijnaktokanutinri,

⁸ Gi nshikpokwakgajitanu

*wa wanna jigeakanuwkaklewatinrini pixka
 yantaletlegogne yine mwiyawakaya.*

⁹ Wa gitsrukatenri yantaletyawakno

rumata getanshinikanutyapnona.

Reta kamruretnona.

¹⁰ Gepkoxamkojemole walapu

*njigeakanuwyeigitna nyi
 gimuweekakgognenatachinni.*

Wane nchina,

‘Pupjegajgognenatna. Gi rumatluna nogapkaka.’

¹¹ Gita kawchinanu nchinyawaka njigeakanuya,

‘Gi jiglokanruna napnanutyawaka.’”

¹² Getinwa, nomolene, muglegajitu ga wa malixgajitkutu, wa Goyakalu giwekachri gitspalatyachri ma mixinitipa satu wa gixa. ¹³ Seyni giykokakanu pagognemnunanuka xawakni chinikowakawa. Gi satuna gixa shikpokwakanshinikanutinripa mukochri yokwireya. ¹⁴ Gi rixanu wixa koxa Kristo waneyalunwu wa galikakni poyegi gimretle wixiniplu wegaponshinikanrewle yoptukyawakpotunanuko. ¹⁵ Wane chinkopshini:

“Xawakni gyijnaktokanutinri,

gi nshikpokwakgajitanu

*wa jigeakanuwkakikowaka pixka
 yantaletlegogne pochkewakaya.”*

¹⁶ Gi rixanu ḡginna wa jemachinemka jigeakanuwkaklu? ḡGi ge pejnuruneko wa Gigipto gishpakamtyachine Moysisiyma? ¹⁷ ḡGinna wa

Wale jigekanuwnayegitanune gepkoxamkojemole walapu? ¹ Gi ge wan-nakni wa mukochirewatachinni, wa gimannina yineru mwiyawakaya gi-knookalurni? ¹⁸ Ga wa ²ginnanwa Wale kawchinanu wane china gi wa rapnanutyawaka jiglokanunna? ³ Gi ge malixaklenni? ¹⁹ Wetlu gi rumkata jiglokletanunna ma malixlenna chinanu.

4

Galikakpotunanu gapnanru Goyakalu gayinerutene chinanupa

¹ Giyagni waneyawawu wixa gipiratkaluru tokanchi wa rapnanjixyawaka wjiglokinripa. Giyagni wpikanu wa satu gixate gi gimkata jiglokleta, maga-tachri getikolu chinanupa. ² Gi rixanu Kiglerpotunanu Tokanchi wunkaaka wutsrukatenni pixka. Seyni tokanchi wanna jemanru gi wa rupxakna, gi rixanu gi wa galixlewlu ruyoptotka. ³ Gi rixanu wjigloklu gapnanjixikowaka wa wixa galixachinwu, wa chinyawaka:

*Gita kawchinanu nchinyawaka njigekanuya,
Gi jiglokanruna napnajixyawaka.*

Seyni nikatkalurutkani kamrure rekamruretinitkalu tye psolchijneko. ⁴ Gi rixanu pnusreta wane china, *payokgipregogne chininripiranaya, wa rapnanuta Goyakalu pejnuruyako kamrure payokgipregogne chininri.*

⁵ Ga wa gewi wane chinatnaka: *Gi jiglokanruna napnanutyawaka.* ⁶ Giyagni gi rixanu kagwaakaluru pimrine jjiglokyaplu ga wa Kiglerpotu-nanu Tokanchi muchinanu ginkaakalune gi jiglokanna ma malixlenuya, ⁷ pagognetnakni Goyakalu gitaka. *Xawakni* gi pomshinigognenanukotkani wane china Wale, Tawi tokanuya, wa muchinanu chinikowakpotuko:

*Xawakni gyijnaktokanutinri,
gi nshikpokwakgajitanu.*

⁸ Gi rixanu Goswumka gapnankakanna gimka pagognetnaka runkakat-nakna gapnanutikowakpirana, wa walegognekaka giknoginitka. ⁹ Giyagni wanewalu wa gapnanru Goyakalu gayinerutene chinanupa. ¹⁰ Gi rix-anu girukokta jiglokinri wale gapnanutyawaka, wale koxa gapnanuta kamrureya, wa Goyakalu rapnanutinri pixka kamrureya. ¹¹ Giyagni wmuchkowa jiglokletanru tye gapnanutikowaka, gi satuna ma mujrukini-tipa tye malixkannuchi yaglu pixkalutuya.

Goyakalu tokanu giwekachrini ga wa kamrurewpotutachrini

¹² Gi rixanu Goyakalu tokanu giwekachrini. Kamrurewpotutachri. Pe-jnuruko gepnokaka gwasputachri yoglolewapi pnute gepragaspurpotni. Yoswaklewputa rutspatgapotutikolupa shinikanchi ga wà giweku ga wa yoklechi ga wa rashichgapu. Ga wa rumata getlu wa gaschi yanshinikan-rewle ga wa rushinikanru. ¹³ Maleshlu giyakotkaluru mupgujewnakatu Goyakalu getanu. Seyni pejnurkakako mushyatktu ga wa pgujeru potu wetjeruygale getanu. Ga wa Walenwa wugitanrupa.

Gesonwa sasertote Gitsrukate potu

¹⁴ Giyagni waneywu tsru sasertote Gitsrukate potu tengogne yachritka. Walenwa Geso Goyakalu Wgene. Giyagni wumretgognenatanru wupguj-talewle. ¹⁵ Gi rixanu gi waneywu sasertote Gitsrukate potu wugroklekaka mumkata getwamonretktatu. Seyni psoluyako yantaleтика wixa pixka seyni mmukochiretpotni Wale. ¹⁶ Giyagni gi wa popiklerunekwu gaayegitanru rumutlewayawaka pogirewle tuplapijere, getwamonutkalunepwu ga wa wukshikyaplu gimutlewlu rupxakyapwu wmagatinripapkopa.

5*Sasertote Gitsrukate potu gitakikolu*

¹ Gi rixanu yinerni pejnuruko sasertote gitsrukate potu. Yinetskala tsomitikaluru ga wa gitaakaluru yine chinanu yayegityaplu Goyakalu. Rutaaka ranikjetyaplu genekashlukaka ga wa genekashlu giylatkalurkaka mukochri chinanu. ² Rumkata yiglepotuko getletna mumatkane ga wa pupjetachine, gi rixanu wale koxa gigroklukaka rumata. ³ Giyagni yineko pixka waleko chinanu koxa rumkata ganikletlu giylatkaluru mukochri chinanu.

⁴ Gi wa satu waleko ginshinikanuya rutaknawa tye pixka kagwakpiratkalurupa, seyni Goyakalu tomganrupa, Gaaro pixka. ⁵ Waneko pixka rixa koxa Kristo. Gi Walenanuko galixkofnawa wa sasertote Gitsrukate potu rixinri. Seyni rutaklu Goyakalu, wane chinjeru:

Noturyi Pixa. Tyegogne nwugenetyi.

⁶ Satu tokanchi wane chinyawakatnaka:

Pixni Sasertote Gitsrukatpotyi.

Gwagognenatachriyi Marchisite gitakikolu pixka.

Geso salewninrikaka chinanu yijnaklu rasruga

⁷ Gimanecklu gichko chiyagleyma ga wa giktegayma Geso gagjigogneyegjetlu rumkata gognetkakjeru gipukchiya. Ga wa gigitkalurni gi rixanu kagwakpiraklerni. ⁸ Wgenchimkani, seyni salewninrikaka chinanu yijnaklu rasruga. ⁹ Ga wa mmagatikatu rixinitka Geso, pejnuruneko yijnakotachine gognetkakachri rixa gognewatikaluru gike rixiniko mnikawnakatu. ¹⁰ Sasertote Gitsrukate potu giwakatikolu Geso Goyakalu chinanu, Marchisite gitakikolu pixka.

Galixachine tsrune pixkalune mixkane

¹¹ Tye tokanchipirana waneywu gixo kgimalu wunkakletanrupmaka, seyni majnakongi. ¹² Gi rixanu gi pomshingognenanukotkani gimkata ginkaklewlemtmakatka, seyni gmaga gimepe ginkaakanatkawa muchinanu gimatkaluru Goyakalu tokanupirana. Tnuchga galukanatawa. Gi wa shikolu niikaluruko galukawa. ¹³ Gi rixanu pejnuruneko tnuchga gapsatkalune, masruntokanutkanni poyagkaklewlu tokanu. Gi rixanu mturunpotni. ¹⁴ Gi rixanu wa shikolu niikaluru tsrunenupni. Wa gasruga kamrurewlenshinikanutachine chinanni rumata getletluna kigleru ga wa gektutu.

6*Kristopirana romkagitinripa*

¹ Giyagni wa Kristopirana muchichachri wuknogamtanuchi. Wkosekanuchi mmagatikatu shinikanchi yegi. Gi walpokotanutnaklu tokanchi genshinikanutinripa, kamrurchi muweekatu gma kamrutinitpatka. Gi wa Goyakalu galixikolupirana koxa walpokotanutnaka. ² Gi wa ginkakikolupa koxa katlupiranaya, ga wa gitakamyogogolupiranaya, ga wa gipnachine yotunrepriranaya, ga wa giklukanuwnayegjixikolu gike rixiniko mnikawnakatupiranaya. ³ Ga wa wane wixa kosekletanu galikaka wa Goyakalu gichichiniplu.

⁴ Gi rixanu rujrukinipna wa Giwekkaluru Kpashiri gapsatkalune gi rumkata gerotewkakletkona. Mumkatkotni wa muchinanu pokamlatyeginatkalune, ga wa tengogne genekashle getumganatachine, ga wa Giwekkaluru Kpashiri gapsatkalune, ⁵ ga wa Goyakalu tokanu ga wa ginachrigogneshapa giyakle getumganatachine wa kigleru rixinri, ⁶ wa rujrukinikana, gi rumkata gerotewkakletkona renshinikanutinripna. Gi rixanu wannanshinikanuya koroshishkita rutakatnakluna Goyakalu Wgene. Pejnurune getanu kapatmenuru rixpiranyegitluna.

⁷ Chiji pixka rixna. Gi rixanu wa chiji wa gina gapokjetachri rachikchijita ga wa tseruwnakaklu gitaklu rupxakyapna wanna chinanu gitaakaluru. Tye chiji giglenshinkanyegitkaluru Goyakaluya. ⁸ Seyni wa chiji kona ga wa kawshiri gwanru, muglegetkotni. Psotsotaji magata kamakpiratkalurupni. Yoptukyawakapni wa ralginripa.

Kiglerpirankaka ga wa gognewatikalurupirana gipxaklewatachrikaka

⁹ Wanemka wchina yanumsayegletgi, seyni, wushinikanune, kiglerpirankaka tye pnupe ga wa gognewatikalurupirana wumaponshinikanutgi. ¹⁰ Gi rixanu Goyakalu gi wa mpoyagkaakatni wa rumuslawatyaplu gkamrure ga wa gishiniklewle, Wale giwaka chinanu gishiniklewleya gixa gipxakjeretna kpashirine, ga wa xanigognenanu gipxakna. ¹¹ Ga wa walukpotutlu wa satkakgi gixa waneko pixka gixanu jmererpotupyi, psolpotuyako pkagwakpotutinripa yoptukyawakpotunanuko. ¹² Giyagni gi wa gma mernuwatanu gonuka, seyni gipiratkalurkaka yoptotachine gyimanu galixlewluya ga wa gakotanshinikanrewluya.

Goyakalu gipiratyalu Gawra

¹³ Wane rixa Gawrani rupiratini Goyakalu. Gi rixanu maleshlu satu Wale pnupe tsru "Wale kawchinanu" chinyegitanrupmaka, *Walenanuko, "Gita kawchinanu," chinnawa.* ¹⁴ Wale wane china, "*Galikakni nuglen-shinikanyempotutanyi. Nuxolewnakakyempotutanyi.*"

¹⁵ Giyagni wane rixa kashnантаканшиниканregognenatinri yoptotlu Gawra gipiratkaluru.

¹⁶ Gi rixanu wa yine wanna pnuuterutu kawchinanu chinna. Ga wa pejnruko yoptopirkaklu wa nikatkolkunutka poyegitpiranatkaluru wale kawchinanu chinruya. ¹⁷ Mkashrijetkotu Goyakalu. Wa tye Goyakalu galuka gekakgityapna wanna Gawra wa gipiratkalurkaka yoptotachinepa. Giyagni Walenanuyako poyegitpiranatanru Wale kawchinanu chinruya. ¹⁸ Giyagni gepi shinikanchi mkashrijetkotkaka chinanu wkagwakpotutlu psoluko Goyakalu gipiratyawu. Walepiranaya gi rumkata weyawleta Goyakalu. Wale chinanu psolmukchonuko wumnanuukaka. Gi rixanu wixa gasukamta wkashichiyaplu wkagwaklewle rupiratyawupirana. ¹⁹ Tye wkagwaklewle muchkotanshinikanutwu. Poyegitkakanshinikanutwu. Ga wa gitokosretate potu wanetkalu wkagwakanatanru, wa Goyakaluyempotuko, ga wa gimaletachrichratche gitokosretate potu jiglokachri. ²⁰ Wixa chinanu wane jiglokatkwa wkosekjero Geso. Walenwa Sasertote Gitsrukapatgog-nenanuko, Marchisite gitakikolu pixka.

7

Marchisite, Sale pogirewatyachri

¹ Gi rixanu tye *Marchisite, Sale pogirewatyachri, teno gajeru potu Goyakalu sasertotete rixa, wale yoptotaplu Gawrani, ruylatikowakanna pogirchinni satokyachritka. Wale giglenshinkanyegitlu Gawra.* ² *Gawra* kotspalatyalu

pejnurkakako pamolete. Walenwa Marchisite muchinanu yokakikalurni poyagkaklewlu pogire. Wanepnute *Sale pogire.* Walenwa giglewan-shinikanrewlu pogire.³ Gike ruruta. Gike runrota. Rutsrukattenni mapiranyegitni. Gi yinuwakgognetya. Gi koxa nikawnagiwekletyawakako. Goyakalu Wgene pixka gixkaluru. Mutuka sasertotetlegognenatkatu.

Tsrunwa Marchisite wa Rewiklopishane sasertotene pnuute

⁴ Getanru. *Gi* psopiranyeginanuktalu wale Marchisite! Wa tsrupotni git-srukaachiini Gawrani wa muchinanu giylalu rawinri pamoletkaka reneklu. ⁵ Galikakni Rewiklopishane, sasertote gitaaikalune towutka yoptotyaplona yine wane gixle pamolete, Tokanchi Yukanatkaluru chinyawaka. Gimolenna potu yoptotyalona. Gawramannimka ruyakatyanna. ⁶ Ga wa Rewinane gitsrukattenni maleshayalutu, walenwa Marchisite, yoptotlu Gawra wane gixle pamolete, ga wa wale giglenshnikanyegitlu Grawra, wa gipiryegitkaluru. ⁷ Gi rugjetka wa tye: Wa tsru potu giglenshnikanyegitlu kayagokolatu. ⁸ Ga wa gewi pamoletkaka yoptotna yine gipnachinepa. Ga wa wane yoptotyachri Marchisite gipgujtatkalurni ruwekinriwa. ⁹ Ga wa wumkata wane chinreta wa Rewi koxa wa pamoletkaka yoptojetachri, Grawraya reneklo pamoletkaka. ¹⁰ Gi rixanu ratjirumane rawanatiniwa wa Marchisite yoptotapinri.

Magatyachinni wa Rewiklopishane sasertotene

¹¹ Giyagni wa mmagatikane rixanmakna sasertotene Rewinane kamrure chinanu, waneklu *klumka galuukaluru* wa satu Sasertote gipgujewnakaakomka Marchisite gitakikolu pixka? Gi wa Gaaro gitakikolu pixka chinkalurni. Gi rixanu wa sasertotene Rewinane kamrure chinanu gitaaikaluru Tokanchi Yukanatkaluru, wa yine gitakyegitkaluru. ¹² Giyagni kashrijetkoklunmaka sasertotene gitakikolu, waneklu koxa rumkata kashrijetkota Tokanchi Yukanatkaluru. ¹³ Gi rixanu tyekaka chinpiranyegitkaluru, panerni. Wanna gi satuna genekashlu yochpikikowakakwa getlewaytachrin. ¹⁴ Gi rixanu gimatpotutkalurni wa Gotaklopishni wa Wutsrukate. Ga wa Moysisi gi wa sasertoteneppirana chinaajitna nyinerune.

Satu Sasertote Marchisite pixkalutu

¹⁵ Ga wa pgujetanurpotni wa Marchisite pixkalutu rupgujewninri satu Sasertote. ¹⁶ Gi wa Tokanchi Yukanatkaluru chinanu gitaaikaluru Geso, gi rixanu manchipiranni Tokanchi Yukanatkaluru. Seyni giweklu mnikawanakatu giyakle chinanu gitaaikaluru. ¹⁷ Gi rixanu Walenwa gipgujtatkaluru: *Pixni wa Sasertotoggnenanyi,*
Marchisite gitakikolu pixka.

¹⁸ Gi rixanu muchinanu yakanru galikakni giknookalurni muchkotu ga wa mumkattku rixinri chinanu. ¹⁹ Gi rixanu Tokanchi Yukanatkaluru gi satuna mmagatikatu rixkaka. Seyni wanepnute kigleru kagwaklewle galikakni wane rixkaku, wa kigleru kagwaklewle Goyakalu gitakyegitwu. Wale chinanu wkayegiklu Goyakalu.

Gaponshinikanutkaluru wa kigleru potu gipiratkaluru tokanchi

²⁰ Gi wa Wale kawchinanu chinrumigjetni Wale. Gi rixanu pimrine sasertotene gi wa Wale kawchinanu chinyegitna Goyakalu. ²¹ Seyni Wale kawchinanu chinru rumutakika Wale, wane chinjeru chinanu:
Wale kawchinanu koschekatka Gitsrukaachi.
Gi kashrijetanshinikanutanu.

“Pixni wa Sasertotgognenanyi,” chinru.

²² Gi rixanu Waleko kawchinanu wane chinyawaka Goyakalu, pnuteyaka kiglepotlu wa gipiratkaluru tokanchi Geso giglepokyegitanru.

Sasertote gwagognenatachrinwa Geso

²³ Wannani gixo sasertotenni galikaka rixinna, gi rixanu gipukchi gimale-tanna ma momkaagognenatinitipna. ²⁴ Ga wa Geso gwagognenatachrini rixinri, mka shrijewnakatu sasertote rutakikolu. ²⁵ Wale chinankoxni psolpotunanuyako rumkata gognetkakletna wa Wale chinanu Goyakalu yegi yachine. Gi rixanu ruwekgognenata wanna chinanu ragjigogneyegit-inripa.

Gesni wa Sasertote mmukochiretu

²⁶ Gi rixanu tye pixkalutu rumkata gixleta sasertote gitsrukate potu wixanupa: kpashiri, muklukanuwnakatu, powralu, kmukochirerune kotspalatikaluru, ga wa tengogne pnu te teno gajeru potu. ²⁷ Gi wa wannani sasertote gitsrukatenpotni pixka rixa magjeretya Wale, wa pagogremnunananuka ranika genekashletnina giylatkalurkakapa muchinanu gapka wannako mukochirna chinanu, ga wa wanepnute yine mukochire chinanu. Gi rixanu Tye pakatapje Walenanuko genekashatnawa giylatkalurupa rixinri. ²⁸ Gi rixanu Tokanchi Yakanatkaluru gitakna yine gigrokachine sasertote gitsrukaten potu rixinripna. Seyni wa tokanchi Wale kawchinanu chinruya, wa Tokanchi Yakanatkaluru gapkatatachri. Ga wa tye tokanchi Wale kawchinanu gitaklu Gituru mmagatikatgognenanu, sasertotene Gitsrukate potu rixinripa.

8

Tengogne gajeru kpashiwakapiji Sasertotete

¹ Tyepirana gonra wane chinkalurkaka: Tye pixkalutu sasertote Git-srukate potu waneywu. Walenwa tsru potu tengogne gajeru tuplapijere potuklesretate tuplatachri. ² Kpashiwaka ga wa Goyakalupji potu kamrure-watyachrini, wa Gitsrukaachi panatanrungi. Gi wa yineru panatanrungi.

³ Gi rixanu pejnuruneko sasertote gitsrukaten potu gitaaka ranikyapluna genekashlukaka ga wa giylatkalurkaka. Giyagni galuukalurni waneya rixinripa tye Sasertote koxa pagixanu ranikinripa. ⁴ Giyagni tyechijne gwachri rixkamka, gimka sasertotepni, gi rixanu wanena genekashlukaka ganikachine wa Tokanchi Yakanatkaluru chinyawaka. ⁵ Tengogne gajerkaka yaagli ga wa mayawle kamrurewatyana wanna, wa Goyakalu gixa yokan-retyawaklu Moysisi, wa wale kamrutinripatka Goyakalupji. Wane chinru: “*Petpotutanru, wanepotuko pkamrutinripa yaagli pixka, magka pekagitikolu pixka.*”

⁶ Ga wa xani Kristo gapkapatkalu wanepnute kigleru potu kamrurchi, wane rixa kigleru potu Gipiratkaluru Tokanchi chinanu kgiglepokyegik-lerni. Wanepnute kigleru gipiratkalurkakapiranaya gitaakaluru.

⁷ Gi rixanu wa muchinanu Tokanchi Gipiratkaluru ma magatkanumka, gimka galuukalurni wa gepi chininri. ⁸ Gi rixanu ruklukanuwnakakinna, Goyakalu wane china:

“*Getanu. Gigogne ginanu,*”

china wa Gitsrukaachi,

“*Gerotu gipiratkaluru tokanchi nupiratinna*

Gisrayiliklokishane ga wa Gotaklopishane.”

⁹ “*Gi wa gipiratkaluru tokanchi pixka*

*Wa nupiratyana wa rutsrukatenina
 Walegogneni wa nkosemyomtna
 wa Gigitochijne nkoshpakyapna.
 Gi rixanu wannani gi gomkagitolu
 nupiratanru tokanchi.
 Ga wa Gita gi wa nuslagyana,”
 wane china Gitsrukaachi.
 10 “Wanepnute ruknoogonetinitka walegognekaka,
 tyepni wa gipiratkaluru tokanchi,
 wa Gisrayiliklopishane nupiratinri,”
 china wa Gitsrukaachi.
 “Ginshinikanna nutakinna ntokankaka
 yokanatkaluru.
 Wale nyongajitanna.
 Gitapni wa Royakalutna.
 Wannapni wa nayinerutene.”
 11 “Gi wa satkaka yimakanru gipokchi gajeru,
 Gi wa satkaka gimoleneko,
 wane chinachrimka,
 ‘Pumatanru Gitsrukaachi’.
 Gi rixanu pejnuruneko gimatanutkano,
 mturu potu ga wa tsrupotuymananuko.
 12 Gi rixanu kgetwamonuklerupno
 ma poyagkaklewleyna.
 Gi wa nushinikanutkalu mukochirna.”
 13 Wa gerotu chininri, kapokotu rixkaklu muchinanu chininri. Wa
 kapokotu ga wa tsrutsotleji gixachrinatka psotsotaji magata ramgamtinripa.*

9

Chiji gajeru kpashiwakapji

¹ Giyagni waleko muchinanu Gipiratkaluru Tokanchi waneylu kam-
 ruchipirana gitakikolu. Ga wa waneylu kpashiwaka tyechijne gajeru.
² Gi rixanu kamrutkaluru panchi. Muchinanugruko wanerwa katalgapo ga
 wa jimapro gwiyawakakwa, ga wa jimaprokaka gekakgitkaluru. Tyenwa
 Kpashiwaka chinkaluru. ³ Ga wa gepi chininri gimaletachrichrata tukasreta
 waneru pagruko, Kpashiwaka potu chinikowaka. ⁴ Wanenanro pgamlu-
 pagiri yochpikikowakakwa kori kamrutikalurokwa, ga wa topaji gipi-
 ratkaluru tokanchi gwanro, psolusretako kori makatikaluro. Topaji wanero
 kolpeto koripro mana gwanro, ga wa Gaaro kanojere gipweretachri, ga
 wa yonatkalurushpata gipiratkaluru tokanchi yegi. ⁵ Wala gompajji rawna
 giwekachine kpashirine yochigatyawaka gajene yaglu, gipoyikgikowaka
 chikletyegitachine. Ga wa xani gi wa tyepirankaka pnumnu gixachri
 rumkata ginkakletpotuta.

Genekashlukaka giylatkaluru magatyachri

⁶ Wane rixa kamrutkota tyekaka, muchinanugruko jiglokjetyawakna
 sasertotene wa poyagkaka kamruretinripna. ⁷ Ga wa gepi chininrigruko
 pakatapje pawalapkaka jiglokjeta sasertote gitsrukate potu walepje.
 Gi wa granchimigyea jigloka. Wale ranikgenekashleta waleko
 chinanu ga wa yme mukochire chinanu wa ma mumatanutkuna
 mukochirewatintriyna. ⁸ Tyeya rekakgitwu wa Giwekikaluru Kpashiri,

wa mupgujetgapotkotuwa kpashiwakpotgapo, rawinikopshiniwa muchinanupji. ⁹ Walenwa tyegogneshaklupa yaglu. Wane gixjetikowaka ranikjetluna genekashlukaka ga wa giylatkalurkaka. Tyekaka gi gimpata muklukanuwnanshinkanutkane gixkaklepotutna wane gixa kamruretachine. ¹⁰ Tyepjepiranayni wa niikalurkakaya, ga wa girkalurkakaya, ga wa pnumnu gixachri gerkalewlukakaya. Walenwa manchipirana gitakikalurkaka, potukatpotutkoklunpotunanuko gitaaikaluru.

Koshpaklewlu gike rixiniko mnikawnakatu Gesograga chinanu

¹¹ Ga wa kayegika Kristo. Walenwa sasertote Gitsrukate potu kiglerkaka ginachripa chinanu, wa tsrupotupji chinanu ga wa mmagatikatupji, gi wa myochi kamrutikaluru. Walepijnwa gi wa tye giyakotikowaka gajerni. ¹² Kristo jigloklu kpashiwaka potu. Pakatapje jiglokatkalu. Gi wa chiwogragayma, gi wa waka wgenekogragayma, seyni Waleko gigragayma jigloklu. Wane rixa gapkapletlu yine koshpakikolu gike rixiniko mnikawnakatu. ¹³ Gi rixanu chiwograga, ga wa jeji wakagrada gitslaptagatikolu, ga wa waka yochpiikaleuropagi jipolotkaluru gimuterune yegi kpashirine rixkolupna powratmanetikolupna. ¹⁴ Giyagni iji papowrananukta rixkakna Kris-togra! Walenwa Giwekikaluru gike rixiniko mnikawnakatuya Wale-nanuko geneknawa. Muklukanuwnanshinkanutinri, Geso powratyauw kamrurchi muweekatuya, Goyakalu giwekachri wkamrurewyeginripa.

Gerotu Gipiratkaluru Tokanchi chinanu wuglepokyegitka

¹⁵ Giyagni kiglepokyegikleru rixa Geso wa gerotu Gipiratkaluru Tokanchi chinanu. Ga wa Wale gipnale chinanu kaspukyegitatkana wa ma mum-retkalchinanruna muchinanu gipiratkaluru. Wale chinanu wa tom-gakalune yoptotanruna wa gipiratkaluru gike rixiniko mnikawnakatupa.

¹⁶ Gi rixanu gipiratkaluru yoptotachripa gimkata gippujtaletu wa gipi-ratachri gipnale. ¹⁷ Gi rixanu yineru giparatanru wa ruprinrigogne yoptotikolupa gike gaprini ruwekiniwa wale yineru. ¹⁸ Giyagni gi wa muchinanu gipiratkaluruko granchi mijie gitaka. ¹⁹ Gi rixanu pejnurukro Tokanchi Yakanatkaluru yokanrekaka, wa pejnuruneko yine runkaakok-lunutka Moysisiya, waneklu wale koscheklu chiwograga ga wa waka wgene-graga, gonuyma ga wa gowegapixi seroluyma, ga wa gisoposhegi. Waleya rutslaptagatlo kiruka, ga wa pejnuruneko yine rutslaptagata. ²⁰ Wane china: Tyenwa *Gesograga Tokanchi gipiratkalurya, wa Goyakalu yokanyegityagi*.

²¹ Waneko pixka granchiyma panchi rutslaptagata, ga wa pejnurostonkaka Goyakalu kamrure chinanu. ²² Ga wa pe-jnurunshinkankakako, granchiya powratka, wa chinyawaka Tokanchi Yakanatkaluru. Ga wa granchi ma muyookanu, maleshlu kaspukmukochirewlu.

Kristo pakatapje reneknatkawa gixolune mukochire ranikinripa chinanu

²³ Gi rixanu tengogne gajerkaka yaglu wane rixa gimkata powratkota, seyni walepotuko tengogne gajerkaka, tyekaka pnute kigleru giylatkaluruya powratka. ²⁴ Gi rixanu gi wa myochi kamrutikaluru kpashiwaka jigloka Kristo, wa galikakpotunanu kpashiwaka yaglupje, seyni tengogne gajeru kpashiwakpotuko jigloka, wa xawakni Goyakalu getanu rupgujewninripa wixa chinanu. ²⁵ Gi wa gixo kata renekinipwa wa sasertote gitsrukate potu pixka, pawalapkaka kpashiwaka jiglokna nikchinegragayma. ²⁶ Wane rixkamka rekamruretkoklunuyakawamka tye psolchijneko, gixkatmaka

rumkata salewnaleta. Ga wa xani moyagkakgogneshletinitka, pakatapje rupgujewna ruknoka mukochirelewatinripa, reneknawa giylatkaluru rix-inripa. ²⁷ Wane rixa gitakikotna yine pakatapje rupniripna, wanepnute rutakyagokikolupna. ²⁸ Waneko pixka rixa Kristo. Pakatapje reneknatkawa gixolune mukochire ranikinripa chinanu. Ga wa gepi kata chininri mukochri migje, kagwakpotutjene rupgujewnayegitanu rognetskakyapna.

10

Jeji wakagrada ga wa chiwograda

¹ Gi rixanu Tokanchi Yukanatkaluruya gi wetpotutawalu psoluko kiglerkaka wa waneyapwu. Mayawle pixka wetyalu wa kamrutkalurkakatka. Gi wetawalu gi pixka rixpotuta. Giyagni waleko giylatkalurkaka pawalapumnunanuka mutuka genekjetkofu, gi pagogoneko rumkata mmagatikane gixkakletna kayegikachine. ² Wane rixkamka ḡgi ge rutuka ganika genekashletmakna? Gi rixanu pakatapje powratkoklunmakna kyonogiklerune, gi wa kmukochirerune rumata getletinmakwana. ³ Seyni tyekakaya pawalapumnunanuka rushinkapka mukochri. ⁴ Gi rixanu jeji wakagrada ga wa chiwograda gi gimkata kaspukletlu mukochri.

Genekashlu giylatkalurni wa Gesomane

⁵ Giyagni tyechijne rakanginitka Geso, wane china:

*Genekashlu giylatkalurkaka
ga wa ganika genekashletkalurkaka
gi paluka.*

Seyni manchi puglepokotyano.

⁶ *Genekashlukaka psoluyako yochpiikalurupa
ga wa genekashlukaka mukochri chinanu,
gi puglereta.*

⁷ *Giyagni wane nchina, "Petanu. Gewno Gita.
Kirukamtapoyi nyonpiranyegitim,
Wa pushinikyawaka nkamrutinripa,
Goyakalu."*

⁸ Wa rogawaka chinyawaka, "Genekashlu giylatkalurkaka ga wa ganika genekashletkalurkaka, ga wa genekashlukaka psoluyako yochpiikalurupa, ga wa genekashlukaka mukochri chinanu, gi paluka. Gi koxa pugleretu. Tyekaka Tokanchi Yukanatkaluru chinyawaka ganikjetkaluru."

⁹ Wanepnute wane china, "Petanu. Gewno Gita, wa pushinikyawaka nkamrutinripa." Wa muchinanu genekashlukaka konatka, gepi chiniri rutakyapa. ¹⁰ Wane rixa gishinikletyawaka chinanu kpashirine gixaakalunwu, Geso Kristomane pakatapje ganika genekashletkaluru chinanu.

Satupje ganika genekashlewlu giylatkaluru

¹¹ Ga wa pejnuruneko sasertotene pagognemnunanuka tunwa kamurewlenata. Ga wa gixo kata rumepe ganiklejetluna walekotnaka giylatkalurkaka. Tyekaka gi gimkata konretlu mukochri. ¹² Seyni Geso pakatapje ganiklu giylatkalurupa mukochri chinanu. Wanekluyakawa Goyakalu potuklesretate tuplagognenatka, ¹³ wanepnute kagwakinripa kamnixjene gjixipta rapukote gitaakoklunpotunanuko. ¹⁴ Gi rixanu satupje ganika

genekashlelwu chinanu mmagatikane rixkakgognenatna wa kpashirine gitaaikalune.

¹⁵ Ga wa Giwekaluru Kpashiri koxa gipgujtatu. Gi rixanu wane chirinitka:

¹⁶ “*Tyenwa gipiratkalu tokanchi
nupiryegityapna runknoginpatka walegognekaka,
china wa Gitsrukaachi:*

“*Rajyna nenekinna Ntokanu Yukanatkalu.*

Ga wa ginshinikanna nyonatinna.

¹⁷ *Ga wa mukochirna ga wa pnu rixlena
gi nushinkapinitkana.*”

¹⁸ Gi rixanu wa tyekaka kaspukikowaka, waneklu maleshatkalu ganika genekashlu mukochri chinanu.

Gerotu gatnugapo ga wa gatnugapo giwekachri

¹⁹ Giyagni, nomolene, gi wa popiklerunekwu kpashiwaka wjigloka Gesograda chinanu, ²⁰ gerotu gatnugapoya ga wa gatnugapo giwekachriya. Walenwa wjigloka Wale kamrutanru gerotu wixa chinanu wa gimatechrichrataya. Tyenwa Gesomane. ²¹ Ga wa gi rixanu tsru potu sasertote Gitsrukapatu waneywu wchinini Goyakalupji chinanu, wkayegikanru. ²² Wkayegikanru potukgajirunepwu ga wa kgaponshinikanuklerunpotupwu walixlele chinanu. Gitslaptaagajitkalunepwu Gesogragaya giklukanuwnanshinikanutnchinwa muglenchiya wma mixinitipa. Ga wa gerkamanetkalunepwu gonu powragaluma. ²³ Poyegirunwu womkagi gipguitaletlu wkagwakanrupirana. Gi rixanu poyakkachrinwa gipiratachri. ²⁴ Wyanshnikanyegkakpotutanu, wkomyekanshnikankakinripa wushiniklewtinripa ga wa kigleru kamrurchi wkamrutinripa. ²⁵ Gi wa wkaspuka gapatjeretanu wa pimrine gixjetyawaka pixka. Ga wa wanepnute gixa gapatjeretanu ga wa giykokakanu wa geta kayegik-gogneretinpatkalu, wa Gitsrukachigognepa.

Giklukanuwnayegjixlewlupa wa wixako wushinikanuya wmukochirewatnipa

²⁶ Gi rixanu wali yoptoretinitkalu wa galikakpotunanu tokanchi ga wa wumatinitkalu, wixako wushinikanuya wmukochirewatnipa, wanepnute gi wa rawatka genekashlu giylatkalurupa mukochri chinanu, ²⁷ seyni giklukanuwnayegjixlelwu kagwakikolu tsru pikluyma, ga wa xirnachri pixkalutu jgekanchi wa kamnixlewatachine kamakatachripa. ²⁸ Moysisi tokanu yukanatkalu giknokachri gepi, mapa gipguitatachine chinanu rupnanu metwamonutkotu. ²⁹ Giyagni ḡgi pixkalutunanukta salewakchi gkagwakyal rumuknu retikolupa wa Goyakalu Wgene gektutetachri, ga wa Giwekaluru gimutlewatachri geyikachri? Walenwa granchi gimuteru kagwakachri, wa gipiratkalu tokanchi chinpiranyegitanru granchi. Walenwa kpashiri rutakjeru gipiratkalu tokanchi. ³⁰ Gi rixanu wumatlu wa wane chinachri:

“*Gitanni gapnuuchipa. Gita gapnurewatanu.*”

Wanepnute wanechinatnaka:

“*Gitsrukaachi gitakyagokanuktana rayinerutene.*”

³¹ Piikalurpotupni wa yineru gjrukini, wa Goyakalu giwekachrimyo rapokinri.

Wumkata kashnataklegognenata walixgognenatinri

³² Seyni gishinkapanru muchinanugognekaka, gepokamlatyegitkoklunu, wa gkashnantakgognenatyawaklu tsru yagotlu nsalewninrikakaya. ³³ Psoji wa gixa yangikolu ga wa pejnurune getanu nsaletikolu. Ga wa psoji waneko pixka pnuminu gixkoklunu gixa gimatanune. ³⁴ Gi rixanu gimata getwamon-retna gostutkalune. Ga wa gimuwatchingi wane gixle getasha konretka. Gi rixanu gixa gimatlwa wanepnute kigleru ga wa gwagognenatachrikaka waneygi.

³⁵ Giyagni gi giknokanru gaponshinikanrewle wa wale chinanu waneplu tsru gapnutikolu. ³⁶ Gi rixanu gixa gimkata kashnanta legognenata. Wa Goyakalu gishinikanru gkamrutinpatka, gyoptotanru wa gipiratkaluru.

³⁷ Gi rixanu pshinitsonuiji magatawa

Ga wa ginachripa gapokanu.

Gi wa ramganatanu.

³⁸ *Ga wa poyakkakachri Gitanu*

giwekanu ralixleya chinanu.

Seyni wa yoxigikini

gi wa ruglenshinikanutanno.

³⁹ Seyni wixa gi wa yoxigikachinwu wamginripmaka, seyni galixachinwu waneya wixinripa wuwekinri.

11

Gi gixachrinwa galixlewlu

¹ Galixlewlu wa galikapotunanu waneyatkawu wkagwakanrukaka. Ga wa galixlewlu wa rumatpotutikolu wa wane rawinri metkotkaka. ² Gi rixanu ralixlena chinanu kiglepiranyegirunni gitsrukaachinni.

³ Walixlewleya wumata jemuwa katagirsaggaka ga wa tye psolchijne koxa gilepokotkaluru Goyakalu tokanu chinanu. Wane rixa wa mupgujew-nakatkaka ruyakatywa getkalurkaka.

Gawili, ga wa Genochi, ga wa Nowe galixle

⁴ Galixlewlu chinanu Gawili ganikyegitlu Goyakalu kigleru genekashlu giylatkalurupa Kayinu pnute. Galixlewlu chinanu gipgujtatkurni poy-agkakachri rixinrini. Gi rixanu Goyakalu gipgujtatu renekashlekakni. Galixlewlu chinanu gipnachrinimkatkani seyni yanumsatachri pixka rixawa.

⁵ Galixlewlu chinanu raniikatka Genochi gipukchi ma metinitipa. *Gi warukshiika gi rixanu Goyakalu ganikatku.* Gi rixanu ma maniikonuwa wane rixa gipguitaletka wa wale giglenshinikanutlu Goyakalu. ⁶ Gi rixanu wa yineru galixlewlu migje gi gimkata giglenshinikanretlu Goyakalu. Gi rixanu Wale yegi yachri gimkata galixleta wa wane rixinri Goyakalu ga wa rujgapotutjene gapnutachrini Wale.

⁷ Goyakalu ginkakagnaputlu Nowe ma metanutuwapiwana. Kagwakpiratachri Nowe, ralixle chinanu kamrutlo tsro pumfe wa gipji gajene gognetkakikolupa. Wane rixinri ruklukanuwnakakna tye psolchijneko gajene. Poyakkaklewatachri rixka ralixlewle chinanu.

Gawra ga wa Sara galixle

⁸ Tomgakalurni Gawra, galixlewlu chinanu yijnakota. Wane yiyatka. Yop-tochijnetyawakapa yatka. Rushpakamtaka mummatkni wa yiyawakapa.

⁹ Galixlewlu chinanu gipiratikowaka chiji rawananumta wajra gajeru pixka. Mkachripjikaka rawananumta Gisaakayma ga wa Gakowoyma. Wannanwa waleyimalune waleko gipiratkaluru yoptoatachinepa. ¹⁰ Gi rixanu kagwaklu

pokchi gichko poyegitkaluru. Wa pokowatachri ga wa kamrujixachri walena Goyakalu.

¹¹ Galixlewlu chinanu walako Sara wugenewata wa tsrotsleji tixinuitka ga wa topapko giknogyatkalo. Goyakalu giyakleya tyoptota toklopishanepta tkoshpakinripa, gi rixanu ttagwaklu poyankakachri wa tupiryegitjeru. ¹² Giyagni satupje yineru, ga wa wale gipnachri pixkalutu, ruxolewniyna gixolune potu. Wa tengogne gajeru katagirkaka pixka, ga wa tsru wenus-puwnaga gajeru ksatupagi, mumkata yantaletkotupagi, ruxolewniyna.

Wajra gajenni tyechijne gwanatachinni

¹³ Kalixaklerunni gipnana pejnurunni wanna nyi, wa gipiratkaluru myoptotkanniko. Seyni gowukayako retyaluna. Rumuwyegitluna. Wan-nananuko gipgjutatnawa wajra gajenni ga wa maleka giyakatyachinni rixna tyechijneya. ¹⁴ Gi rixanu wane gixachine gimatkakwu wa gichi-jnepotupna rujgana. ¹⁵ Ga wa rushpakchijnetyawakna galikaka rushinikin-makna, kagognepmakna satokinripmakna. ¹⁶ Ga wa xani wanepnute kigle-wakchijne raluka gapkapletna. Walenwa tengogne gajerchijne. Giyagni Goyakalu gi patewata wane chinikolu Royakalutna. Gi rixanu Wale galpokotyana pokchi.

Gawra, ga wa Gisaaka, ga wa Gakowo, ga wa Gosi

¹⁷ Yantaletkoklunu Gawra, galixlewlu chinanu ranika genekleshatyaplu Gisaaka. Gipiratkalurkaka yoptotachri ranika genekleshatyaplu satup- jerutu gituru. ¹⁸ Wa wane chinpiranegitkaluru, *Gisaakaya puklopishanepta chinkalunepa*. ¹⁹ Wale kagwaklu wa gipnachinetskalaya rumkata yotunkak- letlu Goyakalu. Ga wa galikakni gipnachrinanni pixkalutni Gisaakni. Seyni giwekachri yoptotatnaklu Gawra.

²⁰ Galixlewlu chinanu Gisaaka giglenshinikanyegitna Gakowo ga wa Gisawo wa ginachrikakapapiranaya.

²¹ Wa rupnakasti rixinitka Gakowni, galixlewlu chinanu satkaka Gosi wgenene ruglenshinikanyegita. *Kanojereptostsi gitspanotachri Goyakalu yonogyegita*.

²² Wa rupnakasti rixinitka Gosni, galixlewlu chinanu gimbolene rushini- ikaka Gisrayiliklopishane gishpakinripa. Ga wa gigapupa towyegimta.

Moysisi galixlewle

²³ Wa Moysisi gishpakininitka, galixlewlu chinanu mapa ksru yogi- matkaluru ruruneya. Gi rixanu retluna kigleru mturu. Gi wa pikluna pogirchi yokanre.

²⁴ Wa tsru rixinitka Moysisi, galixlewlu chinanu rujretyalu wa Gwarawo nshicho wgene chinkolupa. ²⁵ Wale tsomitgonuklu Goyakalu gayineruteneyma saletikolupa, mukochri gimeyiwatkalurkaka pnute wa pschinitsonu waneyapmaklu. ²⁶ Gigiptochijne ponikolewle gignantaakaluru pnute tsru kagwaklu Kristo yangapiranyegitikolu ponikolewle. Gi rixanu gapnuru yegi yigata. ²⁷ Galixlewlu chinanu ruknokamtatkalu Gigipto. Gi piklu pogirchi gamewninri. Gi rixanu metkotu getachri pixka moyentunwale rixgognenata. ²⁸ Galixlewlu chinanu Tsru Giknoglushgogne kamrujixa ga wa granchi gitsslaptaglewlu, wa muchinanu wgenchime giylatachri ma mujtukyapna.

Wa Gisrayiline ga wa Raawi

²⁹ Galixlewlu chinanu koprutmuna Sergalu Wenu wa popriri chiji pixka. Wa Gigipsyone yagota wane gixletini, ruylatkanna. Ragyekanna.

³⁰ Wa payokgipregogne sajrurutkalurni Geriko Pokchi prijere galixlelu chinanu rupkolikamtana.

³¹ Galixlelu chinanu wa kapnokawaklero Raawi gi tupna malixak-leneyma gi rixanu kigle yoptole tixna getjehijnetachine.

Galixlelu gakagloklewatinri

³² Ga wa ḡklu wanepnute nchinanu? Gi rixanu gogi nmagatya nunkakpiranyempotutyapna Getyo, ga wa Waraka, ga wa Sansoni, ga wa Gepite, ga wa Tawi, ga wa Samoyro, ga wa tokanchi geneklewatachinni.

³³ Wannanwa galixlelu chinanu rakagloklamluna pogirewatyawaakaka, poyagkaklelu kamrutna, rapkatluna gipiratkalurkaka, tsru mgenoklunni rushyanamamtna. ³⁴ Gichkoxirnalerni ruwakamtna. Yoglolewapispu mayxawniyna. Gigrokachine muchkowkaakana. Gichkolune rixkaakana giylalu yegi. Pnu gajene solalone gwanananumtachine satkakna. ³⁵ Suxone wannanune gipnachine yotunkaakalune yoptotatnakna. Pimrinni saletpotutkalunni. Gi raluka gishpakletinripna, wa rapkapyapluna kigleru potu yotunru. ³⁶ Pimrine yantaletika ruxpiranatikolna ga wa kochipjetikolna, ga wa wanepnute rostutikolna ga wa yoshmakikolna.

³⁷ Sotlujetkalunenni. Yantaletkana. Yosokotkana. Yoglolewapi giylalewatyawaka rupniyna. Gowegamta, chiwomta gitakachine ruyaglotatna. Magatyachinni. Salewnachinni. Yenetkalunena. ³⁸ Gi wa tyechijne gajenni gimukanni wanna. Yineru mwiyawakankaka pupjetyana, ga wa magkakakaya, ga wa gitawakapnakakaya ga wa chijipnakakaya.

³⁹ Ga wa pejnurunni wanna nyi kiglepiranyegirunni galixlelu chinanu. Gi yoptotluna gipiratkalurkaka. ⁴⁰ Gi rixanu Goyakalu galpokotatkalu kigleru potu wixanupa, wa wixa mwaknu gi wa mmagatikane rixkaakona wanna.

12

jGi pejnunanukta getachine!

¹ Giyagni wixa koxa gi rixanu sajruukalunwu gi pejnunanukta getachineya kyachgaperu pixka, wuwshokanru pejnuruko wmukochire ginnu, wa wsajrukjeru wmukochire. Ga wa kashnantakgognenatachinpwu, wunaple gajeru yagotikowaka wasukamtini. ² Geso yegi yigatachinpwu, walixlelewle muchichachri ga wa poyagkakachri. Gimuwlu chinanu Wale ginaple gitaaikaluru, Wale kashnantaku koroshishkita. Gike rixanu patewluni. Ga wa tuplatatka. Goyakalu tuplapijere potuklesretate tuplatatka. ³ Giyagni gyanshinikanpotutanru Geso gma mamanutinitipi ga wa gma mugrokanshinikanutinitipi: Wale kashnantaku gi pixkalutunanukta kmukochirerune yoptopirkakle Waleyako.

⁴ Gixa gi wa granchipotunanuko gixa yagotletawalu mukochri wa nsatkakyaplu. ⁵ Ga wa gixa gamtakatkalu giykolu, wa wgenchime pixka gixa gynumsatikolu:

Noturu, gi wa gike migje pixka pixa getletanru

Gitsrukaachi saletlewle.

Gi koxa pugrokanshinikanutanu wa Wale chigetjetinipyi.

⁶ *Gi rixanu Gitsrukaachi rushinikanru saleta.*

Ga wa rachichotna pejnuruneko wugenene yoptotanune.

⁷ Gkashnantakgognenatanru nsaletkilupa. Wugenene pixka rixgi Goyakalu. Gi satu mturu ruru ma saletanatu. ⁸ Ga wa gma saletkoklunu

wa pejnuruneko salewnaletini pixka, waneklu pakochingi. Gi wa Goyakalu wgenengi. ⁹ Gi rixanu waneywu galikaka wurune wumaneya. Saletawakletwuna, ga wa wkagwakpiratna. ¿Gi ge wanepnute galikaka wyijnakotanru giweikalurune Giru, ga wa wuwekanu? ¹⁰ Gi rixanu pshinitsonu saletawakletwuna gitka rixpoko getleyawuna. Seyni Goyakalu saletwu rupxakyapwu ga wa rupashiregну rapikyapwu. ¹¹ Galikakni pejnu-ruko saletlewlu xawakni gi wa gimuwlу kagwakika, seyni wamonchi. Seyni wanepnute kigleru kamrutanna wa saletlewlu gasrukanune, kpojankaklewaklerunetka, kigle gwashle rixinripa.

Wuykotka kpashirinewu wixinripa

¹² Giyagni mpotukatinwa gimyo gigrokachri ga wa gitskeri muchkotu. ¹³ Ga wa potukgapolu gkamrutanu gijixi chinanu, pnu mayinitipa yokmatachri, seyni rutskalakikolupa galikaka.

¹⁴ Giggapotutanru kigle gwakaklesha gixyapna pejnuruneko. Ga wa gjigapotutanru kpashirine gixikolupa. Wane gma mixkakoklunu, gi gimkata getletlu Gitsrukaachi. ¹⁵ Ggirukotinwa satu ma maga gapkaplyapl Goyakalu gimutlewie. Gi satuna pachikgajitachritski ma tseruwnintipa kojwaklewatachripmaka, ga wa gixolune puchotachripmaka. ¹⁶ Gi waneplu kapnokawakleru, gi wa gimuteru gixachriko Gisawо pixka, wa paniklupje chinanu rushagkalu muchinanu wgenchi gitakikolu. ¹⁷ Gi rixanu gixa gimatlu wa wanepnute wa giglenshinkanyeglewlu yoottotikolupapiranaya ralukinitka giknockalurutkani. Gi rixanu gi ruksikatkalu renshinikanutyawakapmaka, rujgalewpututnimka giktegayma.

Gepi magkakaka

¹⁸ Gi rixanu gixa gi wa kamruukaluru magka gapyegita, xirnachri galgachri yegi, ga wa yachnewlu ga wa mapshagalу, ga wa kawlenekalu, ¹⁹ ga wa kowgima, ga wa tokanchigima, wa jemachine gagipotyegitanru gi wanepnuteko wanna yegi yogniko tokanchi. ²⁰ Gi rixanu gi rumkata gakotletatkaluna Tokanchi Yokananatkaluru: *Ga wa nikchine rakatsrek-magkatetiniplu sotlujetkomkana.* ²¹ Wane rixa piikaklewleta wa getkaluru, wa Moysisi wane china, “*Npikpotuta. Nutatata.*”

²² Seyni gixa gapyegitlu Siyo Magkate, ga wa Goyakalu giwekachri pokchi, wa Gerosale tengogne gajeru, ga wa gixolurune potu Goyakalutowrerune meiyilu yegi gapatachine, gapyegitlu. ²³ Ga wa gapyegitlu muchinanu wgenchne gapatjetachine tengogne gitakgiwakatkalue yegi. Ga wa Goyakalu yegi wa pejnuruneko Gitayagokachri, ga wa giwekikaalurune poy-agkakachinene yegi, wa mmagatikane gixaakalune. ²⁴ Ga wa Gesoyegitkagi wa gerotu Gipiratkaluru Tokanchi chinanu kgiglepokyegikleru, ga wa granchi gitslaptagluyegi, Gawiligraga pnute kiglerkaka ginkakletachri.

Pogirewatikowaka mkomyemyetkotu

²⁵ Ggirukotinwa gi wa giknokanru wa Yanumatachri. Gi rixanu tyechijne giykolewatyachri, Moysisi, giknokachine ma mayxawninitipa, wanepnuptowu wixa wa tengogne Giykolewatyachri wkatjtitini, wma mayxawnintipa. ²⁶ Tye tokanchigima muchinanu komyemyetanru psolchijneko. Ga wa xani rupiirewata. Wane china, “*Pakatapje nkomyemyetanukalu chiji.* Gi wa chijipjepni seyni *tengogne* koxa.” ²⁷ Wa tye tokanchi “pakatapjechi” gimatkakwu wa koshpaakalurupni wa komyemyetkalurkaka, kamrutkalurkaka pixka, rawgognenatinripa wa mkomyemyetkotaka.

²⁸ Giyagni wumuwatanu pogirewatikowaka mkomyemyetkotu yoptotachine wixinripa. Giyagni kcipashiregolunepwu ga wa kagwakpiraklerunepwu, Goyakalu yegi wkamrurewatini wuglenshinikanutyaplu Wale.
²⁹ Gi rixanu Woyakalutni xirnachri nikatlewatachri.

13

Kristonune gimkata kamruretanru

¹ Gishinikmolkakgognenatachinepgi. ² Gi gimuslawatanru machipepjigi gixinripa. Gi rixanu wane rixinna pimrine, Goyakalutwrerune wannapji rawkaakana. ³ Gishinikanna gostutkalune wannayma gostutkalunepgi pixka, ga wa yenetkalune gishinikanu gi rixanu wanna pixka gixa koxa gixa kamanerungi.

⁴ Pejnuruneko yegi kagwakpiratkalarupni kashimyokaklu. Ga wa kashimyokakchine gapnokawle kpashiripni. Gi rixanu gapoklewatachine ga wa gimopatlewatachine Goyakalu giklukanuwnayegjixanna. ⁵ Gi wa sroschi gerune gixjetachinepgi. Wa waneygi gixinri kiglenshinikanuyapgi. Gi rixanu Goyakalu wane china:

“Gi pagogneko gi nkaspukanunyi. Gi koxa nuknokanyi.”

⁶ Giyagni kiglenshinikanwu wane wchininripa:

“Gitsrukaachinwa nupxakjeru.

Gi npikanu. ¿Klu kamrutinno yineru?”

Gimalwurni wa genekashlu Goyakalu gigneretanru

⁷ Gishinikanna ggirukotjene, wa Goyakalu tokanu ginkakjene. Getjetpututanru rixjetyawakna wa wanna chinanu yoptotkalurupa. Ralixlena yimachinepgi. ⁸ Rixyawakgognenanukni Geso Kristo kapetgogneni ga wa xani, ga wa psolu gwashlepotonanukopa giike rixiniko mnikawnakatupa.

⁹ Pnumnu gixachri ga wa pnu giyakatyachri ginkaklewukaka gi wa pupjekakangi. Gi rixanu kiglerni wa moyegitikolu wa gaschi gimutlewlu chinanu, gi wa niikaluru chinanu. Tyekaka gi wa gipxakna wa wane gixa-chine. ¹⁰ Waneywu genekashatikowakakwa. Wa mkachripji kamrureweye-gitachine gi wa rutaakana nikyapluna walekwaya.

¹¹ Gi rixanu sasertote gitsrukate potu kpashiwaka ganiklu nikchinen-graga mukochri chinanu. Ga wa pokchi malekate yoxikmanetikna nikchinen-

¹² Giyagkoxi Geso, wa kpashirine rixkakyapna yine Waleko gigragaya, pokchi gipgyaptote malekate salewniya. ¹³ Giyagni pokchi gayinitka. Wale yegi gayanu. Wkashnantakanru Wale yenetpiranyegitikolu. ¹⁴ Gi rixanu gewi maleshaywu pokchi gwagognenatachripa. Seyni wujgalu papokchi wane gixachripa.

¹⁵ Giyagni tye chinanu genekashlu wanikyegjegognenatanru Goyakalu, wa moyagnutlewlu genekashatkaluru. Tyenwa wtokanu, giwaka gipguit-tachrikaka. ¹⁶ Giyagni kigleru kamrurchikaka ga wa gapsakaklu gi wa gimuslawatanu. Gi rixanu tye pixkalutu genekashlukaka ruglereta Goyakalu.

Galixanna ggirukotjene

¹⁷ Galixanna ggirukotjene ga wa gyijnakotanna. Gi rixanu wanna giruktatanshinikanutgi gyigglewatachine rixinna. Gyijnakotanna wa gimuwat-achinepa rixinripna, gi wa gochgitachinepni, gi rixanu gi wa rochgirmakna gipxakgi.

Gagjigogneyegitanwu

¹⁸ Wixa chinanu gagjigognetanu. Gi rixanu waponshinikanyegitlu muklukanuwanshinikanutkanepwu. Psoluyako waluklu kigleru gixjetachinepwu. ¹⁹ Ga wa gixo nagjipotutgi wane gixa gagjigogneyegitanno, wa giyampotu gixa yegi nsatkakikofupa.

Giglenshnikanyeglewlu

²⁰ Wutsrukate Gesonwa tsru potu gowegane girukotachri, wa tokanchi gipiratkaluru gike rixiniko mnikawnakatugraga chinanu. Wale yotunkakjeru gipnachinetskalaya Walenwa gglewanshinikanrewlu Goyakalute. ²¹ Ralpokotangi pejnuruko kigleruya wa rushinikyawaka gkamrutinripa, Geso Kristoya gkamrutinri wa Goyakalu gigleretanru, wa Geso gimalwugognenatkalurupni gike rixiniko mnikawnakatupu. Wane gixkalurupa.

Ralipre galukleta

²² Nagjitgi, nomolene, gakotanru nuykole, gi rixanu psotsotaji nyonye-gitgi.

²³ Nunkakgi gimatrinripa wa wumole Timotiyo kaspuukalurutkani. Giyampotu runinipa, waleyma netapangi.

²⁴ Galukanna pejnuruneko ggirukotjene ga wa pejnuruneko kpashirine. Gitalya gajene galukgi.

²⁵ Gimutkalunepgi pejnurunekgi gixa. Wane gixkalurupa.

Kpashiri Santiyako Kirukate

Galuklewlu

¹ Santiyako kirukate. Walenwa Goyakalu ga wa Gitsrukaachi Geso Kristo wayegrerni.
Pamole gepinerune gipalatachine chinanupni. Nalukgiwakatgi.

Gimuwlu gkagwakinri wa yantaletlewlugapyeginipgi

² Nomolene, pejnuruko gimuwlu gkagwakinri wa pnumnu gixachri yantaletlewlugapyeginipgi. ³ Gimatlwa galixlewlu yantaletkoklunu, wale kamrutlu kashnantakgogneru. ⁴ Giyagni kashnantakgogneru gixaya poyagkaka kamrurpotutanuchi, wa gixa mmagatikane gixinripa, ga wa poyam-potutachinepgi. Gike gmagatinripa.

Galixlewleyma gagjitanru gimatkalelewlepa

⁵ Ga wa gimatkalelwlu magatinwa satu wa gixa, Goyakalu gagjitanu. Walenwa pejnuruneko genekashatachri, ga wa myangaletni. Ga wa geneeko. ⁶ Seyni galixlewleyma gagjitanru. Gi wa gnutanshinikanutanu. Gi rixanu wa nutanshinikanutachri tsru wenushpurga pixka rixa, kan-nipgyalu ganikashpurgatanru ga wa pnumnu yakqgafkalurni pixka rixa. ⁷ Giyagni wale jeji gi kagwakanru Gitsrukaachiya yoptotyaplu pagixanu. ⁸ Wa jeji kashrijtanshinikanukleru momkaagapotkatpotni.

Kwamonurune ga wa ponikolune

⁹ Wa wumole gimirteru galixkowatanu wa tsru rixinripa. ¹⁰ Ga wa ponikolu galixkowatanu wa gimirteru rixinrinapa. Gi rixanu wa wale gipnini kshanagwu pixka. ¹¹ Gi rixanu remnuyma rushpkinitka tkachi, kshana gipriga ga wa gigwu gjirkhana, ga wa ruglenugwu salewna. Waneko pixka rixa nikawnalétanu ponikolupni raluka kamruretanru yegkakaya.

Wajeji yantaletlewlukashnantakgognenatachri

¹² Giglenshinikanyegitkalurni wa jeji yantaletlewlukashnantakgognenatachri. Gi rixanu wa kigle gettanshinikanutkoklunu waneklu yoptotanru giweku sagyeta, wa Goyakalu gipiratyana rushinikjene.

¹³ Wa satu yantaletkoklunu, gi wane chinanu, "Goyakalu nyantaletika." Gi rixanu Goyakalu gi wa geuktukaka yantaletika. Ga wa gi satuuna yantaleta koxa Wale. ¹⁴ Seyni satkaka yantaletkalurni wa walenuko retsotanrewleya rutsekletkoklunu ga wa yokshatkoklunu. ¹⁵ Giyagni wa getsotanrewlu wugenetini, waneklu wugenetlu mukochri. Ga wa mukochri galixinitka, rawkaklu gipukchi.

Kigleru genekashlu

¹⁶ Nushinikanune nomolene, gi mpupjekaako. ¹⁷ Pejnuruko kigleru genekashlu, ga wa pejnuruko mmagatikatu genekashlu tengogne giyakaty-achrini. Pokamlatachrikaka Giru yegi ginyachrini. Wale maleshaylu kashrijewnalu, gi wa giprojtaluyawaleko. ¹⁸ Waleko rushinikanuya Wale wugenetwu galikakpotunanu tokanchiya. Muchinanu potu wutakikolupa ruyakotanrukakaya. Yiglepotuko jigekeanuwatachinepgi ¹⁹ Gimatanru gixa, nushinikanune nomolene. Pejnuruneko yine giyampotu yijnakotachinepa, ga wa yiglepotuko yanumsatachinepa, ga wa yiglepotuko jigekeanuwatachinepa. ²⁰ Gi rixanu wa yine jgekanu gi wa Goyakalu poyagkaklelewle kamrata. ²¹ Giyagni giknokanru pejnuruko kapcholu ga wa gixo potu gektutu.

Ga wa gmayognuyma gyoptotanru tokanchi gitakanshinikanutkaluru. Wa wale gimkata gognetkakletyapgi.

Tokanchi kamruklerunepgi

²² Tokanchi kamruklerunepgi. Gi wa yijnakoshatachinelgixnanuko yokwitnawa. ²³ Gi rixanu girukokta tokanchi yijnakotachrini, ga wa gi wa kamrutlu, walena jeji pixka rumumturetanrugoji retpotutnawa ganigapiya. ²⁴ Gi rixanu wale getpotutnawa. Ralimta. Waneklu ramtaklu gi pixka gixachrini. ²⁵ Mmagitikatni gishpaklewlu gixpokotyawakapiranaya. Giyagni girukokta yojrige getlepotutlu gishpaklewlu gixpokotyawakapiranaya, ga wa romkagitlu, walena gi wa yijnakoshatachrini kamtakakleru, seyni kamrurchikaka kamrutachri. Giglenshinikanegitkalurupni kamrureya.

Yonogyeglelu powralu ga wa mumtuukotu

²⁶ Wa satu kagwakinipwa Goyakalu gomkagitatichri rixinri ga wa gi wa chipetannutinipwa seyni yokwigajitnawa, gi wa galikakni Goyakalu romkagittirina. ²⁷ Wa yonogyeglelu powralu ga wa mumtuukotu Goyakalu Girchi getanu, walena wsalwayegityapna murune ga wa gipnagnurutachrone salewninriyna, ga wa wumretinwa powrapotupwu tyechijne gajeruya.

2

Gi wa manewle giglenu chinanu wyoptojetanru yineru

¹ Nomolene, wa kgoyaknuru Wutsrukate Geso Kristo galixachine gixini, gi wa manewle giglenu chinanu gyoptojetanru yineru. ² Gi rixanu wa gapatjetyawaka jiglokinipa satu jeji, kori yoshmakamyojrechi gitakachri ga wa mkachri katajimtaluma, ga wa kwamonuru jiglokinipa kapcholu mkachriyima, ³ ga wa gixa getpotutiniplu wa katajimtalu gitakachri, ga wa wane nchininiplu, “Gewi kiglewaka ptuplatanu.”

“Ga wa kwamonuru wane nchininiipa, “Wane ptunwatanu.”

Waka, “Nutspanjixgapre ptuplatanu,” nchininiipa, ⁴ ¿gi ge gixakonshinikanuya gitakyagoklewata, ga wa giklukanuwnayegjixlewatachinetkagi mugletu shinikanchiya?

⁵ Nushinikanune nomolene, gyijnakotanu. ¿Gi ge Goyakalu tsomitna wa kwamonurune tyechijne gajeruya, galixlewlu ponikowatyachinni? Wanana wa rupiratanru pogirewatwaka yoptotachinelgix, wa rushinikjene rupiratinri. ⁶ Ga wa gixa mkagwakpiratkone gixna kwamonurune. ¿Gi ge ponikolune kapsakletgi, ga wa gitakyagookikowaakaka gi gekosemtgina? ⁷ ¿Gi ge ponikolune mupashiregnuchi chinyegitluna wa kigle giwakalu wa gixa koschekikolu giwaka?

Pogirchi tokanu yokanatkalu

⁸ Wa pogirchi tokanu yokanatkalu mpoyagkakinipa galikaka kigleru gkamruta wane chinyongatyawaka, “Pushinikanru pumwastsitanru pixnanuko pixka.” Wane gixini, kigleru gkamruta. ⁹ Seyni manewle giglenu chinanu gyoptojetiniplu yineru, mukochri gkamruta. Ga wa Tokanchi Yokanatkalu gekakgitgi kgiklukanurune gixinri. ¹⁰ Gi rixanu girukokta kamrutlu pejnuruko Tokanchi Yokanatkalu, ga wa satupje yokanru pupjetini, pejnuruko rukluka Tokanchi Yokanatkalu. ¹¹ Gi rixanu wa wane chinachri: *Gi wa pumopatlewatanu*, wane china koxa: *Gi puylalewatanu*. Giyagni pma mumopatlewatanu seyni puylalewatinipa, Tokanchi Yokanatkalu kaspukachritkayi.

¹² Wanepotuko nchintokanutanu ga wa wanepotuko gixa kamruretanu gitakyagoonkalunepa pixkalunepgi chinyawaka wa tokanchi gishpaklu gix-pokotyawkapiranaya. ¹³ Ga wa metwamonrene giklukanuwnayegjixko metwamonutkonepni. Gi rixanu getwamonrewlu gaalixlu giklukanuwnayegjixlewl.

Kamruchi ga wa galixlewlu

¹⁴ Nomolene, *¿klu rupxaklewatya wa satumka wane chinnawa, "Kalix-aklerno," ga wa maleshaylu kamruchi? ¿Rumkatge gognetkakletlu ralixlewlemka?* ¹⁵ Gi rixanu wumole mamkatu ga wa mamkato gixinipa ga wa maga nikletini walegogne, ¹⁶ ga wa satu gixa wane chinashatinipna, "Gajewa. Kiglenshinkanupgi. Gi wa kachiklepatkagi. Jinanupgi." Seyni gi wa genekinipna gimanna galukyawaka, *¿klu rupxaklewatya?* ¹⁷ Waneko pixka rixa galixlewlu. Mkamruretmaka gipnachrini wa galixlewluumka walepje chininri. ¹⁸ Seyni satu wane chinanu, "Pixa waneya galixlewlu. Ga wa gita waneya kamruchi." Mkamruretyi pixini pekagtitano palixlewle, ga wa gita koxa gekakgitanyi nalixlewle nkamrureyma. ¹⁹ Pixa galixlu wa satupjerutu Goyakalu. Kigleru pixa. Ga wa kamchine koxa galixlu ga wa ruyipiypiyegitluna.

²⁰ Ga wa pixa yineru gike gaprimijeyi, *¿gi ge paluka gimatletlu wa galixlewlu ma kamrurnumka gike gaprini?* ²¹ *¿Gi ge kamruchi chinanu muklukanuwnakaakotu rutaaka wutsrukati Gawrani?* Wa gituru Gisaaka giylatikowakakwa ranika geneakashleta. ²² *¿Gi ge getlu wa rukamrurewkaka ralixlewle ga wa kamrure?* Kamruchi chinanu mmagatikatni galixlewlu. ²³ Giyagni poyagkaakalurutkani wa yonatkaluru chinyawaka:

Gawrani galixlu Goyakalu. Ga wa rutakyegitka poyagkaklewle rixinri. Ga wa wane chinka Goyakalu gimatanru.

²⁴ Getanru. Kamruchi chinanu muklukanuwnakaakotni yineru. Gi wa galixlewlu chinanupjeni.

²⁵ Waneko pixka tixa Raawi kapnokawaklero. *¿Gi ge kamruchi chinanu muklukanuwnakaakoto tixinri, wa tyoptotinna towrechine ga wa pagapoko tkoshpakyana?* ²⁶ Gi rixanu wa manchi muwekletu pixka rixini gipnachrini, waneko pixka rixa galixlewlu. Ma kamrurnu rixini, gipnachrini.

3

Wunnu tsrupotkaka tserpiranawata

¹ Nomolene, gi wa gixolunepgi yimaklewatachinepa. Gixa gimata wanep-nute giklukanuwnayegjixpotutko yimaklewatachine. ² Gi rixanu pejnurunekwu wixa gixo wpupjetya. Satumka gi pupjetini tokanuya, tyemka jeji mmagatikatupmakni. Rumkata gaalirmanetnawa psolpotuyako.

³ Kawalyonenama chipetapi wutakini wyijnaakakyapna, psolmaneko wpotukatyana. ⁴ Getankoxlo kanawa. Tsropotmakni, ga wa gichkon-nipgyalu tanikika. Seyni mturu potu potukatapi tpotukatika ginakakta potukatachri gishinika gitakletlo, wane tyinripa. ⁵ Waneko pixka rixa wa wunnu. Walenwa mturu wumane psojite, ga wa tsrupotkaka tserpiranawata. Mturpotumero gipsomxiginanuktalu yochpikanru. ⁶ Ga wa wunnu xirnachrimerni. Psolchijne gajeruko mpoyagkakleni wa wunnu. Wane rixa wunnu wumane psojikakatskalaya. Wale puchotlu psoluko wumane. Xirnakaklu psoluko wixjetyawaka. Ga wa waleko xirnakaaka Gigena xirnachriya.

⁷ Gi rixanu pejnuruko tyegogne gajeru, gepkoxamkojejixirune, ga wa kamejirune, ga wa yosrolotachine, ga wa tsru wenga gajerkaka pejnuruko gimkata puratkota ga wa puratkalurutkani yineya. ⁸ Seyni wunnu gi satuuna yineru gimkata puratletlu. Walenwa gektutu giyoljegognenatachri. Katseplu kamakalu gipnamenu.

⁹ Waleya wumalwutlu Gitsruaachi Girchi. Ga wa waleya wkamakpiratna yine, Goyakalu pixka kamrutikalune. ¹⁰ Wale namchiyako rushpakyu gimalwuru ga wa kamakpiiri. Nomolene, wane gixachrikaka gi galuukalurni. ¹¹ Satu gishpagatyawaknapjeya gi jidlemllegata mushgalu ga wa mrogaluu. ¹² Nomolene, gi tumkata gikermuna gwaletlo goliwaji. Gi wa gowatsa koxa gimkata gwaletlo gikersagi. Gi koxa mrogaluu gishpagatyawaka gimkata mushgalu gwaleta.

Gimatkalelwu teno giyakatyachri

¹³ ¿Wanerge satu kgimatkaleru ga wa kanshinikanuru gixa yegi? Kigleru rixjetyawakaya kamrure rekakgitanu gimatkalelwu mayognuuma. ¹⁴ Ga wa ganxalu pachikgajitinpigi ga wa waneygi nchinini pagajya gimkapnuglu, gi wa galixkotinwa. Gi wa gweyawyejitanru galikakpotunanan tokanchi. ¹⁵ Wane gixinipa gimatkalelew gi wa teno giyakatyachri, seyni tyechijne gajerukni. Manchi giyakatyachri, kamchi wane gixle pixka. ¹⁶ Gi rixanu ganxalu yegi ga wa gimkapnuglu yegi, wanekoxlu mumatanshinikanutikowakanu, ga wa pejnuruko gektutu kamrurchi.

¹⁷ Seyni teno giyakatyachri gimatkalelwu muchinanu gapka kpashirni. Wanepnute giglewanshnikankaklewatachrini. Ga wa mayogotni, ga wa powixkowatachrini, ga wa kgetwamonreru potu, ga wa kigleru kamrurewleru potu, ga wa mnutanshinikanutkatu, ga wa mixashatkatu. ¹⁸ Ga wa poyagaklewatachrini kiglewanshnikanrewakleru kamrurewata. Wane rixna giglewanshnikanyegkakachine.

4

Goyakalu gkmnixinri

¹ ¿Ginaka ruyakatya giylalkaka? ¿Ginaka ruyakatya yagotkaklukaka gixkakkalu? ¿Gi ge wane ruyakatya wa gigleretashatanruyakaka gimanu psojikaka yagotkakyachri? ² Getsutanrewata ga wa gi waneygi. Giylalewata. Ganxalewatya. Ga wa gi gimkata waneygi gixleta. Gyagotkaka ga wa giylalewata ga wa gi waneygi, gi rixanu gi gagjirewata. ³ Gagjiita ga wa gi gyoptota, gi rixanu gektu gagjire gixa, gigleretashatanrukaka gnikatyaplu.

⁴ Kgimopataklerungi. ¿Gi ge gimata gixa tyechijne gajene gimatniru walenwa Goyakalu gkmnixinri? Goyagni girukokta galuka tyechijne gajene gimatnru gixletnawa, Goyakalu kamnixjeru rixkaaka. ⁵ ¿Waka gkagwakluge wa yonchi maleshawaklege chinyawaka: “Ganxaluyma gogaluklelwu rixa wa Giwekkaluru wixa gwachri?” ⁶ Seyni tsru potu gimatlelwu rixwu. Goyagni wane china:

*Goyakalu satkakna galixkotnachinwa,
ga wa rumutna mturune gitaknachinwa.*

⁷ Goyagni Goyakalu yijnakotachinepgi. Nsatkakanru kamchi gitsrukate ga wa gixa yegi rasukini. ⁸ Gkayegikanru Goyakalu, ga wa Wale kayegikangi gixa. Kmukochirerune, geromyoginwa. Kashrijtanshnikanuklerune, mpowratgajitinha. ⁹ Salewnachinepgi. Gwamonuwatanu, ga wa nchiyaganatu. Gitsolguwle nsalewnale gkashrijetiko. Ga wa gimuwlle gichpkogojre

kashrijetiko. ¹⁰ Mturune gitakinwa Gitsrukaachi getanu, ga wa Wale tsru gitakangi.

Gi wa gjigyelekakanu gixkakluko

¹¹ Nomolene, gi wa gjigyelekakanu gixkakluko. Girukokta jigyegitlu gimole ga wa ruklukanuwnayegjixlu gimole, wa wale jigyegitlu Tokanchi Yukanatkaluru, ga wa ruklukanuwnayegjixlu Tokanchi Yukanatkaluru. Ga wa pixa giklukanuwnayegjixiniplu Tokanchi Yukanatkaluru, gi wa Tokanchi Yukanatkaluru kamruklerutkayi seyni gitakyagoklewatachriyi. ¹² Satupjerutni wa kyokanrewakleru ga wa kgitakyagoklewakleru. Walenwa gimkata gognetkaklewletachri ga wa gimkata gamgakaklewletachri. ¿Katyi pixa wa pumwastsitanru gitakyagoklewachripmakyi?

Yechikawapirana

¹³ Wuya gixa, wane chinachingi, "Xawakni ga wa yechikawa tye pokchiko gayanu. Satu walapu wane wuknokakini. Wmarnewatanu ga wa waneyapwu wane wixlepa." ¹⁴ Wa wane gixachingi gi gimatlu wa yechikawapirana, ga wa gi pixkalutni giwekinri. Gi rixanu kapgyalu pixkalungi gixa, pshinitsonu gipgujewnachingi. Waneklu gamgamtanu. ¹⁵ Seyni gimkata wane chinretgonuka, "Wa Gitsrukaachi gishinikiniplu, wuwekanu ga wa tye wkamrutanu ga wa wale wkamrutanu."

¹⁶ Ga wa xani gixa galixkowyegitlu nsanowashle. Mugletni pejnuruko tye pixkalutu galixkowlu. ¹⁷ Giyagni kigleru gimata kamrutachri, ga wa gi kamrutlu, wale chinanu mukochrini.

5

Ponikolune kapsakletachine saletko

¹ Wuya, ponikolune, nchiyagatanu. Nsaplewjetanu nsalewninrikakayapa wa gixa yegi gapokachripa. ² Mponikolewle gjipagiynina. Gimkalu kochopatewata. ³ Gkorite ga wa nsroschite tuchkatnanatkawa. Tpuchowle gipguitatangi ga wa xirnachri pixka tixa nikatlegitutangi. ⁴ Ralipregognekaka chinanupa, gapotlo. Gjemanu: Tsaplewata wa kamrurewaklerune wenutikolupmaka, wa gixa gwiyna gisanate jirgiyachine. Ga wa ksolaloteru Gitsrukaachi yijnakotlu tsaple. ⁵ Mponikowashata tyechijneya. Gmeyiwashgognenata. Jinanunshinikangi, nikchi giylatikolgogne pixka. ⁶ Gixa giklukanuwnayegjixlu poyagkakachri, ga wa giylatlu. Gi wa rujga satkakleyegiti wale.

Mapognanunepgi

⁷ Giyagni, nomolene, mapognanunepgi Gitsrukaachi gapokinpotunanuko. Getanu kgisanatewakleru. Kagwakgognenatalu kigleru potu chiji gwakakanru. Mapognanutni wa yoptotinpotunanuklu muchinanu gina ga wa ralipre gina. ⁸ Gixa koxa mapognanunepgi. Gmucktotanshinikanutinwa. Gi rixanu Gitsrukaachi gapoklepa kayegika. ⁹ Nomolene, gi gkegemgayekakanu gma muklukanuwnayegjixikotupa. Kgitakyagoklewakleru gipgyaptostsi tunwanatatka.

¹⁰ Nomolene, gyimanru waneyapgi wa tokanchi geneklewatachine salewnalkaka ga wa rakotanshinikanuwlena. Wannani Gitsrukaachi giwaka ginkaklewatyachinni. ¹¹ Giyagni giglenshinikanyegitkalunni wchinyegitna kashnantakanshinikanutachine. Gyijnakyegitlu Gopo kashnantakanshinikanrewle. Getkoxl gi rixpokotlu Gitsrukaachi ralipregognekaka gi rixanu kgetwamonrerpotni Gitsrukaachi ga wa kshinikanurpotni.

Gi wa Wale kawchinanu gkoschekanu

¹² Ga wa pejnuruko pnuute, nomolene, gi wa Wale kawchinanu gkoschekanu, gi wa tengogne kawchinanuko, gi wa chiji kawchinanuko, gi wa kluneru kawchinanukokta. Seyni gigi wane chinko gigi. Ga wa gike chinko gike, gma muklukanuwnayegjixikotupa.

Gagjigogneru gimkatanru

¹³ ¿Salewnege gixa yegi satu? Rumkata gagjigognereta. ¿Satu wane kiglenshinikanuru? Rumkata gimalwuru shikaletleta. ¹⁴ ¿Yayixge satu gixa yegi? Repuukona gapatjetachine tsrutene, ga wa ragjigognetanna wale chinanu. Ringi ruyokanruna Gitsrukaachi giwakaya. ¹⁵ Ga wa gagjigogneru galixlewluyma gitskalakanu yayixachri. Wa Gitsrukaachi yotunkakanru. Ga wa mukochri kamrutinitka, kaspukmukochiretko. ¹⁶ Giyagni gipguitamukochiretyegkakanu, ga wa gagjigogneyegkakanu gitskalginripa. Gichko ragjigognetini poyagkakachri, gixo gimkatachrinwa ragjigognere.

¹⁷ Giliya yinerni wixa pixka geta salewnaletachrini. Ragjigognepotuta gina ma mixinitipa. Ga wa psolchijneko mapa walapu patsrujire ksuru gi ginni. ¹⁸ Rumepe gagjigogneretatkana, ga wa tengogne runyatka gina. Ga wa chiji rupchekyatkka gitaklukaka.

Rognetkakanru ruwekinri gipukchiyegiya

¹⁹ Nomolene, wa satu gixa yegi wa galikakpotunanu tokanchi pupjetini, ga wa satu satkakinri, ²⁰ wa tye nunkakgi gimintripa: Wa girukokta satkakanru kmukochireru pupjetyawakaya, wale satkakachri gognetkakanru ruwekinri gipukchiyegiya, ga wa gixo potu mukochri rushyatanu.

1 Chininri Kpashiri Petro Kirukate

Galuklewlu

¹ Petro, Geso Kristo yokanatanru kirukatni. Tsomitkalune, pnu gajene chinanupni, gipalatachine Pontochijneya, Kalasichijneya, Kapatosichijneya, Gasyaya, ga wa Witiniya. ² Tsomitkalungi wa muchikawako rumatagnaputyawaka Goyakalu Girchi. Giwekikaluru chinanu kpashirine gixkaakalungi, yijnakotachine gixinripa ga wa Geso Kristograga gitsslaptagatkalue gixinripa. Gixa chinanu ruxolewnanu gimitlewlu ga wa giglewanshinikanrewlu.

Wkagwaklewle giwekachrini

³ Gimawlutkalurni Goyakalu, Wutsrukate Geso Kristo Giru. Wa tsru potu retwamonrewle chinanu, rumepe gishpaakakletnakwu. Kagwaklewlu giwekachri waneywu wixinripa Geso Kristo yotunre chinanu gipnachinetskalaya. ⁴ Gyoptotanrupa waneyapgi mpojpakatupni ga wa mumbutewnakatupni ga wa mpochipukatupni, tengogne gimretikaluru gixanupa. ⁵ Gixni wa Goyakalu giyaklewle gimretikalungi galixlewluya gognewatikaluru chinanupa. Walenwa galpokotkalurutkani gipgujetkalurupa ralipregognepa. ⁶ Wale chinanu gimuwpotuta. Pshinitsonuji nsalewnamka pnumnu gixachri gyantaletikolkakaya, wa galuukalurupmakni wane gixa salewnaletinri, seyni gimuwpotutachingi. ⁷ Kiglerpotni yantaletikolu galixlewle kori pnute. Xirnachrimka tetumgikni korni, seyni tsalewnana. Wanepnute kiglepotu yantaletikolu galixlewle, retikolupa gimalwuru chinanupa ga wa galixkowlu chinanupa ga wa kagwakpiiru chinanupa wa Geso Kristo gipgujewninipa. ⁸ Gma metanutu Wale gixa gishinika. Ga wa xawakni gi getawalu, seyni galixinri, gimuwpotuta, gimuwlurma mumkata chinkotu ga wa gatajiwnachri. ⁹ Galixle yop-tukyawaka yoptotachingi. Tyenwa giwekinri gognetkakikolu.

Tokanchi geneklewatachine gipgujtalewle

¹⁰ Tye gognewatikaluru repomsapiranyempotutna tokanchi geneklewatachine, ga wa rujga gimatleyempotutluna. Wannanwa tokanchi geneklew-jeta wa gixa gimusikolupapirana. ¹¹ Ruojapiranyegitluna klunerupni ga wa gi pixkagogneplu runkakletpiranatanru Giwekikaluru Kristonu wanna gwachri. Wa ma mapookanuwa rupgujtagnaputanru Kristo salewnale-pirana ga wa royaknupirana gomkagitachripi. ¹² Wanna gipgujetye-gitka gi wannako chinanukni seyni gixa chinanupni tyepirankaka kam-rurewatayana. Ga wa xani tyepirankaka ginkaaka gixa wa Kiglerpotu-nanu Tokanchi ginkakjeneya, wa Giwekikaluru Kpashiri tengogne yokanatikaluru ginkaklewatyachinni. Tyepirankaka gogaluklewlu rixna Goy-akalutowrerune tengogneya retyapluna.

Kpashirinepgi galpokonshinikanutinwa

¹³ Giyagni galpokonshinikanutinwa. Kanshinkanurunepgi. Psolpo-tuyako gkagwaklewatanu gimitlewlu chinanu wa gixa gimusikolupa wa Geso Kristo gipgujewninipa. ¹⁴ Wgenchine kajnakolune pixkalunepgi. Gi wa muchinanu getsotanrewle wa gma mumafkanuwa gixanatini, gixach-inpatkagi. ¹⁵ Seyni kpashirni ntomgajeru pixka, gixa koxa kpashirinepgi psoluyako gixjetyawakaya. ¹⁶ Wane chinyongatyawaka:

Kpashirinepgi gi rixanu kpashirno Gita.

¹⁷ Ga wa Girchi gi wa manewle giglenu chinanu yoptotlu yineru, seyni satkaka yineru rutakyagoka rixpoko kamruretyawaka. Giyagni gixa wa Girchi koschekgiwakatachingi, pikachinepgi gewi gwanatkakopshini, gi rix-anu payinechijne gwanatachingi galikaka. ¹⁸ Gike gapri migje gixjetyawaka gishpkanya, wa gitsrukateni gike gapri migje giykole chinyawaka. Gimata, gixa gi wa pojpakalkakaya sroschi ga wa kori pixka wenutkalurni gish-pakinri. ¹⁹ Seyni Kristograga kwenuru potu wenutika, mapchotu powralu potu Gowega wgenegrara pixka. ²⁰ Goyakalu gimatagnapunatatkalu Kristogragnarana ma kamrutkonuwa tye psolchijneko, seyni ralipregognekaka rupgjetatatkalu gixa chinanu. ²¹ Kristo chinanu gixa galixlu wa gipnachinet-skalaya yotunkakjeru, wa royaknu renekjeru, Goyakalu, wa Goyakalu galix-inripa ga wa Wale chinanu gkagwaklewatrinripa.

Gimepe gishpaketachinetkagi Goyakalu tokanuya

²² Xani kpashirinshikanune gixatka wa galikakpotunanu tokanchi gal-ixkalchinanu. Giyagni mixashatkanepgi gixa gishinikletyapna moletkakachine. Gishiniikakpotutanu gajija. ²³ Gixa gimepe gishpaketachinetkagi Goyakalu tokanuya, wa kigleru kajiruji pixkalutuya. Gi wa pojpakalu kajirujiya gimepe gishpaka, seyni mpojpakajituya, Goyakalu tokanuya, wa giwekgognenatachri Tokanchiya ga wa gwagognenatachri Tokanchi. ²⁴ Gi rixanu:

Pejnurmaneko kshana pixkalutni,

Rupriga kshana ga wa gigwu gjiruka.

²⁵ *Seyni Gitsrukaachi tokanu gwagognenatachrini.*

Tyenwa kiglerpotunanu tokanchi gixyegiya ginkakletikaluru.

2

Gajerya gishpakkachine pixka

¹ Giyagni giknokanru pejnuruko gektutu, ga wa pejnuruko yokwiri, ga wa gixashlewlu, ga wa ganxalu, ga wa pejnuruko gapatlewlu kaka. ² Gajerya gishpakkachine pixka galukpotutanru tnuchga makojetu. Walenwa tokanchi. Waleyta ntseruwninripa gognewatikaluru chinanu, ³ wa gixa gimatininitkalu kshinikanuru rixinri Gitsrukaachi.

Sotlu giwekachri

⁴ Walenwa gyayegitanru. Sotlu giwekachri pixka rixa Wale, giknookaluru galikaka yineya, seyni Goyakalu tsomitanruni. Kiglepotni. ⁵ Ga wa gixa sotlu giwekachrikaka pixkalungi kamrutikaluru panchi, Giwekikalurupi gixinripa. Sasertotene kpashirinemkojepgi, ganika genekashletinripa Giwekikaluruya wa Goyakalu gigleretyawaka Geso Kristo chinanu. ⁶ Giyagni Walepirana chinyongatyawaka:

Syo Magkate nutaklu yoptowaka gwachri sotlu,

Tsomitkaluru ga wa kigleru potu.

Wale galixachripa gi wa patetko.

⁷ Giyagni gixa galixachingi chinanu kagwakpiratkalurni. Ga wa malixkane chinanu Walenwa:

Wa sotlu myoptotkotu kamrupitachineya,

Wale gitaaaka yoptowaka gitsejita.

⁸ *Sotlu gitspetkaluru, sotlu gjirukikwaka.*

*Rutakikowakna rutspetyana
ma malixkalchinanruna tokanchi.*

Goyakalu gayinerutenetkagi

⁹ Seyni gixa tsominerutkalungi. Sasertotenemkojgi. Pogirewatyachingi. Yine kpashiringi, Goyakalu gayineruteneko, ruglenu ginkakletinripa. Walenwa mapshagwakayegiya ntomgajeru, Wale pokamale koglajru gwinripa. ¹⁰ Gixa muchikawa gi wa yinenangi. Ga wa xawakni Goyakalu gayinerutenetkagi. Metwamonunatkongi, ga wa xawakni getwamonutkalunetkagi.

Gitspalatinri manchi getsotanrewlekaka

¹¹ Nushinikanune, gita gagjiti pnu gwachine gixinri ga wa payinetskala gwakopshini, gitspalatinri manchi getsotanrewlekaka. Tyenwa gimaletlu gixa giwekle geruto. ¹² Kigleru gixjetanu payineyegiya wa jigyeginipgina gektutu kamruklerune pixkamka, Goyakalu gimalwtukalurupni kigleru gkamrure retkalna chinanupni wa Goyakalu kayegikinrigognepa.

Goyakalu wayegrenepgi

¹³ Pejnuruko yine tsru gitakanru gyijnakotanu Gitsrukaachi chinanu, ¹⁴ waka pogirchiko, wa tsru potu rixinri, waka girukotlewatachine wa pogirchi yokanatanune gektutu kamrutachine saletachinape, ga wa kigleru kamrutachine galixkotachinape. ¹⁵ Gi rixanu tyenwa Goyakalu gishinikanru, wa kigleru gkamrutinriya, gkochrokyapl manshinikanune yine mumatkalene. ¹⁶ Gishpakachine pixkaluneppi, seyni wa gishpaklu gi wa gektutkaka gishyale gitakanru. Seyni Goyakalu wayegrenepgi. ¹⁷ Pejnuruneko gkagwakpiratanu. Gishinikanna moletkakachine. Mpikanru Goyakalu. Gkagwakpiratanru pogirchi.

Kristo salewnale gyimanrupa

¹⁸ Gipxaklewatachine, psolpikleyako gyijnakotanna gitsrukatene. Gi wa kiglerunepjepni ga wa mayogone, seyni koxa mpotukane gyijnakotanu. ¹⁹ Gi rixanu tyenwa poyagnutikolu, wa satu muklukanuwannanshikanutktu rixinripa Goyakalu getanuya, salewakchi rakotanshikanutinipa, gi wa salewakchi gimuknu rixinri. ²⁰ Gi rixanu žklunerya galixkotko wa gmukochirewatinipa ga wa gichko getikoklunu, gakotanshikanutiniplu? Seyni kigleru gkamrutinipa ga wa nsalewninri, wa gakotanshikanutiniplu, tyenwa poyagnutikolu Goyakalu getanuya. ²¹ Gi rixanu tye chinanukni ntomgaka. Gi rixanu Kristo koxa salewna gixa chinanu. Gyimanru ruknokamtyagi, wa gixa gomkaagapotyaplui.

²² Gi wa mukochri kamruta Wale.

Gi koxa yokwiri tokanu rukshikiko Wale.

²³ Wa yangakoklunu, gi wa rugje yangalewleta. Wa salewnanatini gi wa kawgurewata. Seyni kgitakyagoklewakleru poyagkakachri yegi Wale-nanuko samyoknawa. ²⁴ Koroshishkitaya Waleko ganikmukochiretwu gimaneya, wa wixa gipnachine pixka wixatka, wma mukochirewatinitpatka, poyagkakachinepwu wuwekinriya. Walepchole chinanu gixa gitskalaaka. ²⁵ Gi rixanu gixni wa gowegane pixka gixa pupjerenatachingi. Seyni wa xani girukotapratachri yegi nsatkaaka, wa girukotanshikanutjeru yegi.

3

Kashimyokakachine gimkata kamruretanru

¹ Ga wa gixa gnunrochine waneko pixka gixanu. Gyijnakotanna gnurune. Wa tokanchi ma malixinipna pimrine, Geso yegi raniikon tokanchimigjeya wa ganunro gixjetyawaka chinanu. ² Retjettingina gixjetyawaka powralu gkagwakpiireymananuko. ³ Gi wa gixa giglewleppni

wa rogo gwachri giglewle, gi wa kamaprujiwutsaya, gi wa kori giglewleyako, gi wa kigleru makatlewluyako. ⁴ Seyni gixa gaji yogimatachri yineru giglewle, giglewlu mpojpakatupa. Walenwa shinikanchi mayogotu ga wa pochkeru. Kwenurpotni Goyakalu getanuya. ⁵ Gi rixanu muchikawa wane rixa gigletnawana wa kpashirone suxone, Goyakalu kagwakan-shinikanutyachrone. Wannako ganurna yijnakotachinni. ⁶ Sarni pixka tyijnakotu Gawrani. Wane chinru gitsrukaachi. Gixni wa toklopishangi, wa kigleru gixinia ga wa gi satuna pikikolu gimeyekini.

⁷ Ga wa gixa gnurchine waneko pixka gixanu. Ganunrone gwayegitanu gimatkalewleya. Gkagwakpiratanna ganunrone mshikostonoto potu pixka, giweklu genekashluru giyoptotkakachingi pixka. Wa gagjigognerepa ma mumalekitotupa.

Gkatjitanru gektutu. Kigleru gkamrutana.

⁸ Ga wa raliprepatka, pejnrurunekgi gixa pashinikanurunepgi. Kgetwanmonrerunepgi. Gishinikmoletachinepgi. Kshinikanurunepgi. Mturune gitaknawachinepgi. ⁹ Gi wa gapnutanru gektutu gixjeru gektutuya. Gi koxa yangalu gapnutinri yangaluya, seyni gagjiyegitangonukna ruglen-shinikanegitikolupna. Wale chinanuko ntomgaka, wa gixa yoptotyaplu giglenshnikanyeglewlw. ¹⁰ Gi rixanu

Girukokta gishiniklu ruwekinri

ga wa kigleru gogi retle,
rutuuukanru gektutu yanumsale,
yokwiri ma koschekinitipa.

¹¹ *Katjitanru gektutu. Kigleru kamrutanu.*

Rujganru giglewanshnikanrewlu
ga wa romkagitanru.

¹² *Gi rixanu Gitsrukaachiygale*
getjetna poyagkakachine,
ga wa gijnakopna yijnako gagjigogneretna.
Seyni Gitsrukaachi satkakna gektutu kamruklerune.

Poyagkaklewlw chinanu nsalewnanu

¹³ ¿Katu gektutetangi wa kigleru jmererune potu gixinipa? ¹⁴ Seyni poyagkaklewlw chinanu nsalewninipa, giglenshnikanyegitkalungi. Gi wa mpikanna nsaletjene. Gi wa kojwakanshnikanutkalunepgi.

¹⁵ Seyni gajiya gipashichanru Gitsrukaachi Kristo. Galpokgognenat-achinepgi ginkakyapna pejnruruneko gepomgajenepa gkagwaklepiana, wa klu chinanu waneygi gkagwaklewlw. ¹⁶ Gi wa kayogolunepgi, seyni mpikleyma wane gixanu, muklukanuwanshnikanutkanepgi, wa gjigyegitkoklunupa patetkona, kigleru gixjetyawaka Kristoya jigyeglewashatachine. ¹⁷ Gi rixanu Goyakalu gishinikiniplu gixa salewninripa, kigleru kamruklerune nsalewninipa galuukalurni wa gektutu kamruklerune nsalewninipmaka pnuute. ¹⁸ Gi rixanu pakatapje salewnapa Kristo mukochri chinanu. Poyagkakachri salewna mpoyagkaakane chinanu, Goyakalu yegi ranikyapwu. Gimane ruylatika, ga wa Giwekkaluru ruweekakika. ¹⁹ Giwekkalurkoxaya Kristo yayegitna giwekkalurune yoshaakalune. Runkaklewyentapna. ²⁰ Muchikawa nyi giwekkalurune malixkanenanni Noweklu, Goyakalu gakotanshnikanrewata kagwakinikopshini, wa tsro pumlu kamrutkakopshini. Walaya gi gixna, walenwa yokgipi yinerupje, gognetkaaka gonuya. ²¹ Gixa chinanu kattlewluni wa gognewatikolu yaagli.

Gi wa gimanepcho giknokikolu gognetkakgi, seyni ginshinikanuyna kigle gibile gixinri Goyakalu, Geso yotunotinri chinanu wa gipnachinetksalaya.
²² Wa Wale tengogne yachritka. Goyakalu potuklesretate rawa. Goyakalutowrene ga wa tsru gitaaikalune, ga wa gichkolune yijnakotlu.

4

Goyakalu gixyawaka pixka giwekaluruya

¹ Giyagni gi rixanu Kristo salewna gimaneya, gixa koxa galpokotinwa waleko shinikanchiya. Gi rixanu salewnamanetachri gituka mukochirewleta. ² Giyagni xaniyakawa gipejnupta walapu giwekinripachi, gi wa yine getsutanrewlekaka kamrutachinepgi, seyni Goyakalu gishinikywaka kamrutachinepatkagi. ³ Gi rixanu gigiyatka giknogachrigogneni payine galukyawaakaka wane gixinripa, ga wa mpogijpatnuchkaka gyinripa, ga wa getsutanrewlukakaya, ga wa gimruya, ga wa tsru nikluyegiya, ga wa gogiarewluya, ga wa ginanshichkaluru yagluchisha yonogyegitikoluya. ⁴ Ruglajityaluna wa gixa gi wannayma gasukjeta waleko seprolokchi potu yegi. Kapataklerunni. ⁵ Seyni runkakyegitinwana wanna Goyakalu yegi. Galpokotachri Wale rutakyagokyapna giwekachine ga wa gipnachine. ⁶ Gi rixanu tye chinanukni wa gipnachinni yegi runkakletika Kiglerpotunanan Tokanchi. Yine gixjetyawaka pixka ruklukanuwnayegjixikolupna manchiya, seyni Goyakalu gixyawaka pixka ruwekinripna Giwekaluruya.

Goyakalu gimutlewle girukotache kiglerune pixkalunepgi

⁷ Ptowrunanuka yoptukyawakapa kayegikatka. Giyagni kanshinikanurunepgi. Ggirukotinwa gagjigognetinripa. ⁸ Pejnuru pnuute gishini-ikakpotufanu. Gi rixanu gishiniklewlu gishyatlu gixoluru potu mukochri. ⁹ Gislakakini mkegemgakanepgi. ¹⁰ Satkakgi gixa gixa yoptoletyawaklu Goyakalu genekashatyagi, waleya gipxakinna pimrime. Goyakalu gimutlewle pnummu gixachrikaka girukotache pixkalunepgi. ¹¹ Wa satu yanumsatini, Goyakalu tokanu pixka rixa yanumsaletanu. Ga wa satu kamrurewatini, wane rixanu muchkonuyma pixka wa Goyakalu genekpoutanru. Psoluyako rumalwutikolupa Goyakalu, Geso Kristo chinanu. Walenni goyaknu gwagognenatachri ga wa muchkonu gwagognenatachri gike rixiniko mnikawnakatupa. Wane gixkalurupa.

Kristonune pixkalune nsalewninri

¹² Nushinikanune, gi giglajyegitanru wa xirnachri pixkalutu gyanataletikolu, wa pagixanu metjejetkotu giknogiermaka pixka. ¹³ Seyni gimuwanatanu wa wane gixa gimusamatletu Kristo salewninri. Wa rupgu-jewininipa Wale goyaknu, gixa gimuwatiripa gimpikachinpotpungi. ¹⁴ Wa Kristo giwaka chinanu gyangikolunupa giglenshinikanyegitkalungi. Gi rixanu gixa yegi rawa Goyakalu goyaknu ga wa Giwekaluru Walenu. ¹⁵ Wale chinanu gi satuna gixa kgylalewakleru rixinri salewnachripni, gi wa kachowguruko rixinri, gi wa gektutu kamrukleruko rixinri, gi wa kyimaklewakleru yoshmakashnachriwako rixinri. ¹⁶ Seyni Kristonune gixkalchinanu nsalewnini, gi wa mpatewatanu, seyni tye giwakaya gimal-wukakinri Goyakalu. ¹⁷ Gi rixanu rapokatka gipapko wa Goyakalupjiya yinuwakinripa gitakyagolewlu. Ga wa wixa yegi yinuwakini ñgi rixpokotanu yoptukyawakapna wa Kiglerpotunanan Tokanchi Goyakalupirana malixaklene?

¹⁸ Ga wa ramgakastsimkatkani poyagkakachri

¿gi rixpokotanu mupashiregotu ga wa kmukochireru?

¹⁹ Goyakalni wa giyakotachri galixkalurupa. Giyagni Wale galukyawaka salewniyachine ruwekinrina raponshinikanyegitanruna, ga wa romkagi kigleru kamrujetinripna.

5

Goglupratanru Goyakalu rowegatene mkoje

¹ Giyagni nagjiti gixa tsrungi, gixje tsrutsolejkoxno gita ga wa Kristo salewninri gipgujtatachrim, ga wa gipgujetkalurupa royaknu gapiikalurupno. ² Goglupratanru Goyakalu rowegatene mkoje wa gixa yegi gwachine, gi wa gerutkalunepgi seyni gixako ginshinikanuya wa Goyakalu galukyawaka. Gi wa tyechijne gajerkaka gjigachinepgi, seyni jmererunepgi. ³ Wa gixa gitakyegitkalune chinanu, gi wa gitsrukateyegitanna, seyni gowegane yimanunepgi. ⁴ Ga wa rupgujewnnipa wa Girukotapratachri Gitsrukate potu, gixa yoptotanru pogirewlu sagyeta mpochipukatupni.

⁵ Waneko pixka gixanu gixa, makluingi. Gyijnakotanna tsrune. Pejnuruneko gixkakluko mturune gitakinwa. Gi rixanu
Goyakalu satkna galixkotnachinwa.

Rumutna mturune gitaknachinwa.

Goyakalu girukotna walenune

⁶ Giyagni mturune gitakinwa Goyakalumyompuko, wa gichkomyolu. Wa wale tsru gitakyapgi rapokinipa gipapko. ⁷ Pejnuruko gkojwakan-shinikanutjeru Goyakalu yegi gitakanutka, gi rixanu Wale gishinikyagi.

⁸ Kanshinikanurunepgi, ga wa giyokachinepgi. Wa gkamnixjerni kamchi gitsrukate, tsru mgenoklu gigrritchri pixkalutu yotaljeta. Rujgalu niklokan-rupna. ⁹ Wale nsatkakanu gichkolunepgi galixlewlu. Gimatl waleko salewakchi rutakyegitkana tyechijne gajene gimolene.

¹⁰ Wa pejnuruko gimutlewl Goyakalute, wa ntomgajeru royaknu gike rixiniko mnikawnakatu yegi gixinripa Kristo chinanu, wa pshinitsonu nsalewninitka mmagatikane rixkakangi. Poyegitangi. Muchkotanshinikanutangi. Shikowaka rutakangi. ¹¹ Walenni wa giyaklu gwagognenatachripa gike rixiniko mnikawnakatu. Wane gixkalurupa.

Ralipre galukleta

¹² Surwanoya ptsotsotaaji nyonyegitgi. Walenwa wumole poyagkakachri wa gita goya. Gita giykolewata ga wa nupgujtatlu tyenwa galikakpotunanu Goyakalu gimutlekle wa mpoyentunwaletyawaka.

¹³ Wawiloni gajero, wa gixaymananuko tsomitkaluro, galukgi. Ga wa noturu Marko galukgi. ¹⁴ Galuuakakanu gishiniklewlugamluruyma.

Giglewanshinikankaakalunepgi pejnurunekgi gixa Kristo gwachingi.

2 Chininri Kpashiri Petro Kirukate

Galuklewlu

¹ Simo Petro kirukate. Walenwa Geso Kristo wayegreru ga wa yokanatanru.

Twu kiruka gixa galixachingi chinanupni, gi rixanu Woyakalute ga wa Wognetkakjeru Geso Kristo poyagkaklewle chinanu kiglepotlu wa tokanchi gixa galixanru, wixa galixanru pixkapotuko.

² Goyakalu ga wa Geso Wutsrukate gimutpotutangi ga wa ruglewan-shinikankakpotutangi gi rixanu gimatlu Wale.

Goyakalu giwekle gixyawaka gapiikalunepwu

³ Wa Kgiyaklewakleru rixinri Goyakalu renekwu ptowrunanuka wuwekle chinanupa ga wa wupashiregnu chinanupa wtomgajeru gimatkalewleya. Wa Walenuko royaknu yegi ga wa ruglenu yegi tomgawu. ⁴ Wale chinanu renekwu kigleru potu ga wa tsru potu gipiratkalurkaka. Wa tyekaka chinanu Goyakalu gixpokotywaka gapiikalunetkawu. Pojpakalu wasukyatka, wa tyechijne gajeru pojpakalu getsutanrewlu chinanu.

⁵ Tye chinanuko psoluyako gmerewpotutanu gyogniyaplu galixleylema giglenchi, ga wa giglenchiyma gimatkalewlu, ⁶ Ga wa gimatkalelwuya girukotmanrewlu, ga wa girukotmanrewluya, kashnantakgogneru, ga wa kashnantakgogneruyma gipashiregnuchi. ⁷ Ga wa gipashiregnuchiyma molchi galuklewlu, ga wa molchi galuklewlu gishinklewluya. ⁸ Gi rixanu waneygi gixinipa tyekaka gixolewnachrikaka, waleko wane gixkakgi gi wa mmerenepgi, gi wa mkmrurenepgi wa gimatlinri Wutsrukate Geso Kristo. ⁹ Gi rixanu tyekaka waneya migetu walenwa maygaletu pixkalutu, ga wa kmapagiruko retya. Ramtakafkalu wa muchikawluru mukochire powratikalurutkani.

¹⁰ Giyagni, nomolene, gmerewpotutanu mpoyegityaplu ntomgikolu ga wa ntsomitikolu. Wa tyekaka gkamrutini, gi pagogneko gjrukana. ¹¹ Gi rixanu wane gixa geneekotan ponikojigloklemnupgi, wa Wutsrukate Wognetkakjeru Geso Kristo pogirewatywaka gike rixiniko mnikawnakatu gjiglokin-ripa.

Klipirana rushinika Petro kiruka yonreta

¹² Giyagni nushinkapkakjegognenatangi tyekakpirana. Gimatakatalu, ga wa moyentunwalemkatkagi galikakpotunanu tokanchi gapokachriyatka, seyni nushinkapkakjegognenatangi. ¹³ Nkagwaklu poyagkaklewlu, nomane nwinikopshini, nkomyekanshinikanutypagi, nushinkapkakyapgi. ¹⁴ Numatlu wa pshinitsonu ruknokikolupa nomane wa Wutsrukate Geso Kristo chinyawakno. ¹⁵ Ga wa nmuchkowatanu wa nushpakinpatka, tyekakpirana gishinkapjetanu.

Kristo goyaknu getachineko

¹⁶ Gi rixanu gi womkagitlu gimatkalewlu ginkakleshkaka wa Wutsrukate Geso Kristo giyakle wumatkakinikagi gixa ga wa runinripapirana. Seyni Wale tsru pogirewle potu wetpotutlu wixa. ¹⁷ Gi rixanu wa Goyakalu Girchiya yoptotinri kagwakpiiru ga wa royaknu, pogimewnayegitlu wane gixachri tokanchi tsrupotunanu goyaknuchyegiya: "Tyenwa Noturu nalukanru. Wale gigletanshinikanutno." ¹⁸ Ga wa wixa yijnakotlu tye

tokanchi, tengogne pogimewniyachri tokanchi, wa Waleyma gawanatini wa kpashiwaka magka.

¹⁹ Ga wa wanepnute poyegiru tokanchi, wa tokanchi geneklewatachinni tokanu, waneywu. Kigleru gkamrutantu wa gyanshinikanutanru wa tye, katalo pixka mapshagawaka gatajiwniyachro, gogi gimirerekamtinpotunuko, ga wa ginshinikanuya tushpakinpotunanuko gonsagi. ²⁰ Tye gapka gimatantu. Gi satuna tokanchi geneklewatachri tokanu, yonchi gajeru, satupje yineru ginkakpokowakatyawakapni. ²¹ Gi rixanu gi pagogne waleko rushinikanu yineru ruyakaty tokanchi geneklewatachine tokanu, seyni Gi-wekikaluru Kpashiri gixa ganiklenshinikanutyawakna, Goyakalu chinanu yanumatyana yine.

2

Wanepna gixasha yimaklewletachine

¹ Wanenankoxna Goyakalu tokanu gixasha geneklewletachine yinetskala, gixatskala pixka wanepna gixasha yimaklewletachine. Pochkeruneko yoshmakanruna pnuko gixachri yimaklewlu kaka gamgamenu. Wa Git-srukaachi potu nütatanna. Walenwa Geso ragjitjerna wenruyma. Wanna gamgamenu ganikachine giyampotu wannananukopa gamgakaknawa. ² Gixolune yimanru ma pogijpatnuna. Wanna chinanu galikakpotununu tokanchigapo gapatkalurupni. ³ Ga wa gimkapnugluya gixashlu tokanuyna pnumnu yokwireyna ponikowatinna gixa wane gixlenumkaya. Muchik-awayakawa wanna giklukanuwnayegjixikolu gi gamga. Ramgalepna gi wa malpokotkatni.

Giklukanuwnayegjixlewlugognepa

⁴ Gi rixanu wa gitowrenenanu wa mukochirewatininna gi kaspukyana Goyakalu, seyni kapnakaka mapshagawaka samyokanna, gamgikowaka rumretikolupna giklukanuwnalgogne chinanupa. ⁵ Ga wa muchinanu chiji gajenni gi wa kaspukya Goyakalu, wa ronnewkakininna psolchijne gajeneko mupashiregolunni. Seyni rumretlu Nowe, wa poyagkaklewlu kginkakletakleru, ga wa waleymana payokgipre pimrine. ⁶ Ga wa ruklukanuwnayegjixanna Sotoma Pokchi gajenni ga wa Komora Pokchi gajenni nikatikolunna. Chichipagi rixkakanna, yagliu rixinripna wa mupashiregolune ginachinepa chinanupa. ⁷ Ga wa koshpaku poyagkakachri Lote. Walenwa kojwakanshinikanutkaluru wa ginanshichkaluru kamrujetachine gixjetyawaka mpogijpatnuchi chinanu. ⁸ Gi rixanu wanna yegi rawini poyagkakachri, pagognemnunanuka saletkaluru ginshinikanu poyagkakachri retinri ga wa yijnakotinri wanna kamrutanru ginanshichkaluru. ⁹ Giyagni Gitsrukaachi gimata koshpakletna kgipashiregolune yantaletlewatikowakaya. Rumata gimirleltna mpoyagkaakane giklukanuwnalgognepotununo wa saletkolupna.

Gixasha yimaklewletachine yoptukyawakapni

¹⁰ Ga wa wanna galikakni wa manchi pixka gixachine, wa getsotanrewlu puchotlewatachri gixjetachine, wa gitsrukaachne geyikachine.

Tseruwanshinikanutachinni. Wannako gishinikanru kamrujetachinni. Wanna gi pikapogatletluna pogirewlukaka. ¹¹ Ga wa Goyakalutowreruneko wanna pnute muchkonurune ga wa gimkatachine potu gi wa giklukanuwnayegjixlu gapate ranikyana Gitsrukaachi yegi. ¹² Seyni wannanwa gep-koxamkojejixirune manshinikanune pixkalune. Rixa gishpakleyawaknina

kashichkalunepni ga wa nikatkalunepni. Rapatluna ma mumatanutkakna. Nikatikowakna wanna koxa nikatko.

¹³ Gektutu kamrutikna rupeketikolupa wanna gektutu kamrure. Wanna kagwaklu gigleretkaluru gogiko ponikowashatinrina. Wannanwa kapcholkaka ga wa kapatmenurunkaka. Yokwireyna meyiwatna wa tsru niklu rumnokyagina. ¹⁴ Gimopatlewlu ksofanugoygalegolunni. Gi rumkata kaspuka mukochirewletna. Mpoyeginshinikanune rumlukanutna. Gimkapnuglu gasrukajitachinni. Kamakpiiru wgenenni.

¹⁵ Ruknokamtatkaluna potukgapolu, ga wa pupjetatkana. Walaami Wosoro wgenegapo romkagitna. Walenwa mpoyagkaknuchi wenutikolu gishinikachri. ¹⁶ Chigetjetka waleko mukochire chinanu. Mtokanuto mporo, yineru tokanu yanumatyachro, gjretlu tokanchi geneklewatachri seprolokinri.

Pojpaku wayegrene

¹⁷ Wannanwa gonu gishpaktiyawakmaka magatu pixkalune. Ga wa kyachgapereru gichkonnipgyalu ganikanru pixkalune. Wanna chinanu gimretkalurni mapshagalsajnu. ¹⁸ Gi rixanu magijeru tokanushatna tsrupotunanu tokanchi wa manchi getsotanrewleya rumlukikolunapna gajeryako gasukachine wa pupjeru gixjetachinyegiya. ¹⁹ Rushpakinripna gipiratikalunni, seyni wa gipiratachineko pojpakalu wayegrene rixna. Gi rixanu klunerukokta gaalixlu yineru, wale chinanu wayegretika yineru. ²⁰ Gi rixanu wa Gitsrukaachi Gognetkaklewatachri Geso Kristo rumatkalchinnanna wanna, rasukinitkaluna tyechijne gajeru puchotlewatachri ga wa wanepnute yoshmaakana, ralipretinrina gektutu rixa yinuwakinrina pnuute. ²¹ Gi rixanu kiglemkalu wanna chinanu ma mumatkanumkaluna poyagkaklewlugapo, wanepnute rumatinmakluna ga wa satokyegitinmakluna kpashiri yokanrukaka, wa wanna geneekaluru. ²² Wane rixatkana galikakpotunanu yapkaklu:

Kewe satokyegitlu waleko raplire.

Ga wa kochi gerakakalurutka

satoka posujpalu yegi ruprurugatinripa.

3

Ralipregognekakapa runanna kgixpiranataklerune

¹ Nushinikanune, twunwa gepi chinirro kiruka nyonyegityagi. Twu kiuukakaya nkomyekanshikanutgi ginshinikanuya powralu, nushinkap-kakyapgi. ² Gishinikyaplu tokanchi muchinanu chinkaluru kpashirine tokanchi geneklewatachinniya, ga wa Gitsrukaachi Gognetkaklewatachri yokanre gixa yegi yokanatkaluneya.

³ Muchinanu gapka gimatanru tye, wa ralipregognekakapa runanna kgixpiranataklerune. Ruxpiranatlewatanna. Rixa getsotanretyawakna rixjetanna. ⁴ Wane chinanna, “Ginaklu gipiratkaluru Geso gininripapirana? Gi rixanu wa gitsrukaachinni gapnanutiniyakawa rixyawakakni ptowrunganuka reyinuwakleyakawa giyakotkalurkaka.”

⁵ Gi rixanu wannako ginshinikanuyna gi rumatluna wa muchikawako wanetkalu tengogne ga wa chiji, gonu gimlikyachri ga wa gonu gwachri. Goyakalu tokanu chinanu rixkakikowakni. ⁶ Giyagni tye gonu muchikawa gwachrini chiji gonnewatachrini nikawna. ⁷ Ga wa xawakni gwachri tengogne ga wa chiji Wale tokanuya gimretkalurni xirnachri chinanupa, tsru giklukanuwnalgognepotunanuko, yine mupashiregolune gamginri-gognepatka.

Gitsrukaachigognepa ginanu

⁸ Giyagni gixa, nushinikanune, gi wa mumatkanepgi tyepirana, wa Gitsrukaachi getanu satu waragka walapu pixka rixa pagognepje, ga wa pagognepje pixka rixa satu waragka walapu. ⁹ Wa Gitsrukaachi gi kaptotyalu rupiratanruya wa pimrine kagwakyaluna kaptotinri. Seyni mapognanatu rixyegitwu. Gi raluklu satuna gamginripa, seyni pejnuruneko yoptotanru genshinikanrewlu.

¹⁰ Ga wa Gitsrukaachigognepa kachowguru pixka rixa gapokletanu. Walegogne tsru sejrewakchiya nikawnanu tengogne. Ga wa tyegogne gajerkaka yochpiikalurupni nikawnanu. Ga wa chiji koxa ga wa chiji gajerkaka kamrurchi nikawnanu.

Gerotu tengogne ga wa gerotu chiji

¹¹ Gi rixanu pejnuruko tyekaka nikawnachripni, ¿gi pixkalune gimkata gixleta? Kpashirinepgi ga wa kagwakpiraklerunepgi. ¹² Kagwakachinepgi ga wa jmererunepgi Goyakalgogne gapokinipa. Gigogne gapokinri chinanu tengogne galgachripa nikawnanu, ga wa tyegogne gajerkaka yochpiikalurupna rupragkanu. ¹³ Seyni wkagwaklu gerotu tengogne ga wa gerotu chiji wa rixa gipiretyawaka, wa poyagkaklewlu gwiyawakapa.

Wuykotka galpokotachinepwu wixinripa

¹⁴ Giyagni, nushinikanune, tyekaka gkagwakanatini, gyagota mapchone gixleta Goyakalu getanu, ga wa muklukanuwnakanepgi Waleyawiglewanshinkanrewleymapa. ¹⁵ Ga wa gyanshinkanutanru wa Wutsrukate ma mapognannu gognewatikaluru rixinri, china yonyegletyawakgi wushinikanru wumole Pawlo, rixa genekashletikowaka rumatkalewle. ¹⁶ Wane rixyawaka, wa pejnuruko kirukatkakaya, tyepirankakaya runkaklewaty. Wa twukakaya waneru kgimalu tokanchikaka, wa myimaakone ga wa mpoyeginshinkanune katpa rixkakluna, pimri yonatkaluru koxa pixka, wannako ramginripna chinanu.

¹⁷ Giyagni gixa, nushinikanune, gimatagnaputinri, gimretinwa. Wa ginanshichkaluru kamrujetachine pupjere gma kositikotupa, gixanuko moyentunwaley gma mujrukinitipa. ¹⁸ Seyni ntseruwnanu gimutlewluya ga wa rumatikoluya Wutsrukate Wognetkakjeru Geso Kristo. Walenni wa goyaknuchi xawakni ga wa psolgogneshpotunanuko mnikawnakatupa.

1 Tixinri Kpashiri Gwa Kirukate

Giwekkaluru Tokanchi, Geso Kristo

¹ Wa yinuwakikoluyakawa wanetkalu wa wyijnakotanru ga wa wetanru wuygaleya, ga wa wyopukgatanru, ga wa wkamrukanru wumyoya wa giweekaklewatachri tokanchiya. ² Wa giweklu gipgujetkalurni ga wa wetlu. Ga wa wupguitatu ga wa wunkakletyegitgi Wale giweklu gike rixiniko mnikawnakatu. Walenwa Girchi yegi gwachri, ga wa wixa yegi gipgujetikaluru. ³ Wa wetanru ga wa wyijnakotanru, Wale wunkakletyegitgi wa gixa koxa wumumatanunepgi, ga wa wumumatkakle galikakni walenwa Girchi ga wa Gituruya Geso Kristo. ⁴ Tyekakapirana wyonyegitgi poyagkakikolupa wumuwlle.

Goyakalni wa pokamlalu

⁵ Tyenwa ginkaklu wyijnakotanru Waley, ga wa wunkakyagi, wa Goyakalni wa pokamlalu. Wale maleshaya mapshagal. ⁶ Ga wa wane wchininipa wa wumumatkaka Waleyma ga wa mapshagawaka kamrure womkigintiwa, wayroklewata. Gi wa galikaka wkamruta. ⁷ Ga wa pokamlawaka gayapini Wale pixka pokamlawaka rawa, wixkakluko wumamatkaka. Ga wa Gituru Gesograha psolpotuyako powratmukochiretwu.

⁸ Wa mmukochirenwu wchininmakwa wixnanniko wyokwitnanwa. Gi wa wixa rawa galikakpotunanu tokanchi. ⁹ Goyakalni wa gimkata galixletkalurni ga wa poyagkakachrini. Giyagni wupguitamukochiretini, Wale kaspukmukochiretanwu ga wa psoluko powratinanwu wma poyagkaklenuya. ¹⁰ Wane wchininipmaka gi wa wmukochirewata, kayroklewaklermaka wchinru Goyakalu ga wa Wale tokanu gi wa gwawu.

2

Kristonwa wuglepokyegitjeru

¹ Nwugenene tyepirankaka nyonyegitgi gma mukochirewatinitipa. Ga wa satu mukochirewatini waneywu wuglepokyegitjeru Girchiyejiya. Walenwa Geso Kristo poyagkakachri. ² Walenwa wmukochire gipekole. Gi wa wixanupjeni seyni koxa psolchijne gajenenni.

³ Wa tye chinanu wumatlu wa wumatranu Wale, wkamrutyokanretinri. ⁴ Wa wane chinachri, "Gita gimatl," ga wa gi kamrutm yokanrekaka, walenuw kaylokleru. Gi wa wale rawa galikakpotunanu tokanchi. ⁵ Ga wa girukokta gimretatokanutinri, wale galikakni, gishiniklewatachri potu rixkaklu Goyakalu. Tye wkamrutiini wumatlu Goyakalu gawinri. ⁶ Wa wane chinachri Wale rawinri, wa Wale gixa yanretyawaka pixka rumkata gixa yanreretanu.

Yokanru gerotu

⁷ Nushinikanune, gi wa gerotu yokanru nyonyegitgi, seyni muchikawluru yokanru yinuwakikowakayakawa waneyatkagi. Wa muchikawluru yokanrunwa wa gixa yijnakotanru tokanchi. ⁸ Numepe yonyegletatnakgi yokanru gerotu. Walenwa galikaka potu Waley, ga wa gixaya. Gi rixanu ruknogatka mapshagal ga wa galikaka pokamlalu pokamlatyegelewataatka.

⁹ Wa wane chinachri pokamlawaka gwachrini ga wa rayegixlu gimole, mapshagawaka rawgognenatawa. ¹⁰ Ga wa gishinikmoletachri pokamlawaka rawa. Maleshaylu mukochirewkaklewlu. ¹¹ Ga wa gayegixmole-tachri mapshagawaka gwachrini ga wa mapshagawaka yanachrini. Ga wa gi rumatlu ginaka yanu, gi rixanu mapshagalu maygaletu pixkalutu gixkaklu.

¹² Wiwine, nyonyegitgi
gi rixanu gkaspukmukochiretka
Geso giwaka chinanu.

¹³ Girchine, nyonyegitgi
gi rixanu gimatlu wa yinuwakikoluyakawa
gwagognenatachri.

Maklujine, gixa nyonyegita
gi rixanu gixa gakagloklu mugletu.

¹⁴ Nyonyegitgi gixa, mturune, gi rixanu gixa gimatatku Girchi. Girchine, nyonyegitgi gi rixanu gimatlu wa yinuwakikoluyakawa gwagognenatachri. Maklujine, nyonyegitgi gixa, gi rixanu gichkolungi gixa, ga wa Goyakalu tokanu gwagi, ga wa gixa gakagloklu mugletu.

Gi gishinikanru tye psolchijneko

¹⁵ Gi gishinikanru tye psolchijneko, gi wa tyechijne gajerkakako. Wa satu gishinikinri tyechijne, gi wa Girchi gishiniklewlle gwagajitlu. ¹⁶ Gi rixanu ptowruko tye psolchijneko gwachri, wa galuuukaluru potu manchi chinanu, ga wa getsofanutkalurkaka, ga wa galixkowlu ponikolelwu chinanu, gi wa Girchi giyakatyachrini, seyni tyechijne giyakatyachrini. ¹⁷ Ga wa tye psolchijneko gisuptaganu, ga wa psolchijneko sotanuwnale, seyni wa Goyakalu gishinikyawaka kamrutachri gwagognenatanu.

Gi gepikatkana Kristo kamnixachine

¹⁸ Mturune, raliprepapkotkani. Wa gixa yijnakpiranyegityawaklu Kristo kamnixachri gininripa, ga wa xani gi gepikatkana Kristo kamnixachine. Tye chinanu wumatatka wa raliprepapkotkani. ¹⁹ Wixa yegi rushpakamtyana. Seyni gi wa wixaymalunenanni, gi rixanu wixaymalune rixkamkana, wixyegikmaka rutukanmakna. Seyni rushpakamtna pgujetanuwaka rixin-ripa wa pejnruneke gi wa wixaymalunni.

²⁰ Seyni gixa waneygi giyokyegitikolu Kpashiriya. Ga wa psoluko gimata. Gi wa gma mumatkalchinanru galikakpotunanu tokanchi nyonyegitgi, ²¹ seyni gimatkalchinanru nyonyegitgi. Ga wa gixa gimata gi satuna gay-roklelwu giyakatyalu galikakpotunanu tokanchi. ²² Walenwa kayrokleru, wa Geso wa Kristo rixinri nutatachri. Walenwa Kristo kamnixachri ga wa Girchi nutatachri ga wa Gituru nutatachri. ²³ Girukokta nutatu Gituru, gi koxa Girchi waneylu. Wa Gituru gipgujtatachri waneykoxl Girchi.

²⁴ Wa yinuwakikoluyakawa gyijnakotanru tokanchi gwangi gixa. Wa gixa rawini yinuwakikoluyakawa gyijnakotanru, gixa koxa Gituru gwa ga wa Girchi gwa. ²⁵ Ga wa tyenwa rupiratanru wa wixa rupiratinri, giweklu gike rixiniko mnikawnakatupa.

Kristo gwanu gixa

²⁶ Tyekaka nyonyegitgi gyokwitjenmakapiranaya. ²⁷ Ga wa Geso Gi-wekikaluru Kpashiri giyokyegityagi gixa yegi rawa. Gi wa gmagatya satumka ginkakpokowakyegityapgi. Seyni giyokyegitikolu wane rixa ginkakpokowakyegityapgi pejnrukopirana, ga wa Walenwa galikaka. Gi wa gayroklni. Wa Wale ginkakpokowakako pixkagi, wane gixa gwaletanru Wale.

²⁸ Ga wa xani, wiwine, Geso gwanu gixa, wa rupgujewninipa kgapon-shinikanrerunepwu. Ga wa gi wpatewatanu Geso getanu wa runinipa.

²⁹ Wa gimatirni moyagkakachri rixinri Geso, gimatkoxlu wa girukokta moyagkaklewlu kamrutachri Wale wugenetika.

3

Goyakalu wgenene

¹ ¡Gi pagishiniklewenanukta rixwu Girchi, wa Goyakalu wgenene wchinikolu! Ga wa wane wixa. Wale chinanu tyechijne gajene gi gimatru gi rixanu gi rumatluna Wale. ² Nushinikanune, xawakni Goyakalu wgenenetkawu. Gi pgujewalu wa wixyawakapa, seyni wumatlu wa Wale gipgujewninipa Wale pixka wixanu. Gi rixanu wetanutkalu rixyawakpotuko Wale. ³ Tye kagwakachri, kpashiri rixinwa, Wale pixka kpashirni.

Wa mukochri ga wa moyagkaklewlu

⁴ Girukokta mukochirewata kaspukoxlu Tokanchi Yukanatkaluru. Ga wa mukochri walenwa kaspukikolu Tokanchi Yukanatkaluru. ⁵ Gimatlus Kristo gipgujewnapa mukochri koninripa. Ga wa maleshaylu mukochri Wale. ⁶ Girukokta wa Wale gwachri gi mukochirewata. Girukokta mukochirewati gi wa retlu Geso. Gi koxa rumatlu.

⁷ Wiwine, gi satuna yokwitangi. Wa moyagkaklewlu kamrutachri walenwa moyagkakachri, Wale pixka moyagkakachrini. ⁸ Wa mukochri kamrutachri Satanasyonni wale. Gi rixanu Satanasyo reyinuwakleyakawa mukochirewata. Wale chinanukni rupgujewnapa Goyakalu Wgene, maleshpotlu rixkakyaplu Satanasyo kamrure. ⁹ Girukokta Goyakalu wgene rixinritka, gi wa mukochirewata. Gi rixanu Wale gitakleji gwalu. Gi rumkata mukochirewleta, gi rixanu Goyakalu wugenetika. ¹⁰ Tye chinanu pgujru ginnanwa Goyakalu wgenene ga wa ginnanwa kamchi gitsrukate wgenene. Girukta gi wa moyagkaklewata ga wa girukta gi wa gishiniklu gimole, gi wa Goyakalu ruyakaty.

Wushiniikakinripa

¹¹ Gi rixanu tyenwa ginkaklewlu wa yinuwakikoluyakawa gyijnakotanru wane chinanchri wushiniikakinripa. ¹² Gi wa Kayni pixka gixachinepgi. Walenwa mugletu giyakatyachrini, ga wa ruylatanru repurni. ¿Ga wa klu chinanu ruylatanru? Gi rixanu waleko kamrurni mugletu, ga wa repurni kamrurni kpoymoyagkaklerni. ¹³ Nomolene, gi giglajitanu wa tye psolchijneko gajene gayegixyagi. ¹⁴ Wixa gimatlu gi gipnachinetkawu, seyni giwekachinetkawu, gi rixanu wushinikna wumolene. Ga wa mushiniklewatkatu gipnapotutachrini. ¹⁵ Girukokta gayegixmoleta walenwa kgiyalewakleru. Ga wa gixa gimata gi satuna kgiyalewakleru waneylu ruwekinri gike rixiniko mnikawnakatu.

¹⁶ Geso gitaklu ruwekinri wixa chinanu. Wale chinanu wumatatkalu klinerni gishiniklewl. Ga wa wixa gimkata gitakletlu wuwekinri wumole chinanu. ¹⁷ Girukokta waneya tyechijne gajeru wane rixle ga wa reta magletinri gimole ga wa rushyanshiniikanyegitlu ma metwamonutyaplu ðgi rixpoko gishiniklewl Goyakalu gishiniklewleya? ¹⁸ Wiwine, gi wa wtokanupjeya wushiniklewatini seyni wkamrureya ga wa galikakpotuya. ¹⁹ Tye chinanu wumatanru wa galikakpotunanu tokanchi gomkagitachinwu, ga wa Wale getanu wuglewanshinikanuta. ²⁰ Wa wajiko jigyeginiwu, Goyakalni wa tsru potu waji pnuterutu, ga wa ptowrunanuka gimatachri.

²¹ Nushinikanune, wajiko gi wa jigyeginiwu, kgaponshinikanuklerunwu Goyakalu yegi. ²² Ga wa klunerukokta wagjitini, Waleya wyoptotlu, gi rixanu wkamrutlu yokanrekaka, ga wa Wale gigleretanru wkamrujeta. ²³ Ga wa tyenwa Wale yokanre, wa walixinri Gituru giwaka Geso Kristo, ga wa wushiniikakinripa wa yokanatyawakwu. ²⁴ Ga wa yokanrekaka kamrutachri Goyakalu rawa. Ga wa Goyakalu wale gwa. Tye chinanu wumata Wale gwiywu, wa Giwekikaluru chinanu Wale genekyawu.

4

Giwekikaluru Goyakalunu ga wa giwekikaluru Kristo kamnixjeru giyakatyachri

¹ Nushinikanune, gi galixanna pejnuruneko giwekikalurune, seyni gitama getanna gikta Goyakalu giyakatyachinni. Gi rixanu gi gepikna gixashatachine Goyakalu tokanu geneklewatachine tyechijne gipgujewniyachine. ² Tye chinanu gimatanru Goyakalunu Giwekikaluru. Pejnuruneko giwekikalurune Geso Kristo gipgujtatachine wa manchi runyatka, walenna Goyakalu giyakatyachrini. ³ Ga wa pejnuruneko giwekikalurune wa Geso mupgjuttkatu, gi wa Goyakalu giyakatyachrini wale. Ga wa walenna Kristo kamnixachri, wa gixa yijnakpiranyegitanru wa ginachripni. Ga wa xawakni tyechijnetkalu.

⁴ Wiwine, gixni wa Goyakalu giyakatyachingi. Gixa gaalixatkana Kristo kamnixachine. Gi rixanu tsrupotni wa gixa gwachri Giwekikaluru Kpashiri wa tyechijne gwachri pnute. ⁵ Wannanwa tyechijne giyakatyachinni. Giyagni tyechijne gajene pixka rixa yanumsaletna, ga wa tyechijne gajene yijnakotna. ⁶ Wixni wa Goyakalu wgenenwu. Wa Goyakalu gimatachri yijnakotwu. Wa Goyakalu mwugenetanuntu gi wa yijnakotwu. Tye chinanu wumatlu Giwekikaluru galikakpotu, ga wa giwekikaluru kamchinu pupjekaklewatachri.

Goyakalni gishiniklewlwu

⁷ Nushinikanune, wushiniikakanu, gi rixanu gishiniklewlunwa Goyakalu giyakatyachri. Girukokta gishiniklewata Goyakalu wugenetika, ga wa rumatlu Goyakalu. ⁸ Mushiniklewatkatu gi gimatl Goyakalu. Gi rixanu Goyakalni kgishiniklewkleru. ⁹ Tyeya gipgujetkalurni Goyakalu gishiniklewlle wixa chinanu, gi rixanu Goyakalu tyechijne yokanatlu sat-upjeretu Wale Wugenetanru, Wale chinanu wuwekinripa. ¹⁰ Tye chinanu waneru gishiniklewl. Gi wa wixako wushinikalchinanru Goyakalu, seyni wa Wale gishinikalchinanru. Ga wa yokanatlu Gituru wmuköchire gipekole rixinripa. ¹¹ Nushinikanune, Goyakalu wane gixa gishinikletwu, wixa koxa gimkata gishiniikakleta. ¹² Gi pagogneko gi satuna getlu Goyakalu. Wa wushiniikakini, Goyakalu gwawu ga wa rushiniikakpotutwu.

Gishiniklewlwu mmagatikatu maleka giknoklu piklu

¹³ Tye chinanu wumata Wale gawinri, ga wa wixa rawinri Wale, gi rixanu renekwu Giwekikaluru Walenu. ¹⁴ Ga wa wixa getlu, ga wa wupgjutatl Girchi yokanatlu Gituru wa tye psolchijne gajeneko Gognetkakachri rixinripa. ¹⁵ Girukokta gipgujetatl Geso Goyakalu Wgene rixinri, Goyakalu gwalu ga wa wale Goyakalu gwa. ¹⁶ Ga wa wixa gimatakkalu ga wa walixatkalu rushiniklelew wa Goyakalu gishinikyawu.

Goyakalni kgishiniklewkleru, ga wa yineru gishiniklewgognenatachri Goyakalu rawa ga wa Goyakalu gwalu wale. ¹⁷ Tyeya mmagatikatu rixkaaka

gishiniklewlu wixa gajiya, kgaponshinikanuklerunepwu gitakyagokikol-gognepa. Gi rixanu Kristo gwiyawaka pixka waneko pixka wixa gwaleta tyechijneya. ¹⁸ Maleshu piklu gishiniklewlu yegi. Seyni gishiniklewlu mmagatikatu maleka giknöklu piklu. Gi rixanu piklu waneya salewnalu. Kpiklegolu magatyalu gishiniklewlu.

¹⁹ Wixa gishiniklu Goyakalu gi rixanu Wale gapka gishinikwu. ²⁰ Girukokta wane chinini, "Gita gishiniklu Goyakalu," ga wa rayegixlu gimole, kayroklderni. Gi rixanu mushinikmoletkata wa retanru, gi rumkata gishinikletlu Goyakalu wa ma metanu. ²¹ Ga wa wixa waneya tye yokanru Goyakalu yokanatyawu, wa Goyakalu gishinikachri rushinikankoxlu gimole.

5

Walixle gaalixlu tye psolchijneko

¹ Pejnuruneko Geso wa Kristo rixinri galixachine, wannanwa Goyakalu wugenetikna. Girukokta gishiniklu wugenetachri, wugenetkaluru koxa rushinika. ² Tye chinanu wumatlu wa wushinikna Goyakalu wgenene, wa Goyakalu wushinikini, ga wa wkamrutinri yokanrekaka. ³ Gi rixanu tyenwa Goyakalu gishinikikolu, wa wkamruretyaplu yokanrekaka. Ga wa Wale yokanrekaka gi wa kojwaklewatachrini. ⁴ Gi rixanu girukokta Goyakalu wugenetikaluru gaalixlu tye psolchijne gajerkakako. Ga wa gaalixlewatachri, tye psolchijne gajerkakako gaalixikolupa, walena wa walixle. ⁵ ¿Katni wa tye psolchijne gajerkakako gaalixachri? Walekni girukokta Geso wa Goyakalu Wgene rixinri galixachri.

Wa Giwekkaluru Walenwa gipguitatachri

⁶ Geso Kristonwa gonuya ga wa granchiya ginyachri. Gi wa gonupjeyni, seyni gonuya ga wa granchikoxaya. Ga wa Giwekkaluru Walenwa gipguitatachri, gi rixanu wa Giwekkaluru Walenwa galikakpotu. ⁷ Gi rixanu mapni wa gipguitatachrikaka. ⁸ Walenwa Giwekkaluru, ga wa gonu, ga wa granchi. Ga wa mapa satupjerutu rixa. ⁹ Wa yine gipguitalewle wyoptotini, wanepnute tsrunwa Goyakalu gipguitalewle. Gi rixanu tyenwa Goyakalu gipguitalewle wa Giturupirana rupguitatinri. ¹⁰ Goyakalu Wgene galixachri waneylu gipguitalewlu ginanwakaya. Goyakalu malixkata kayroklewaklermaka chinru, gi rixanu gi ralixatkata Goyakalu gipguitalewle wa Giturupirana rupguitatinri. ¹¹ Ga wa tyenwa gipguitalewlu: wa Goyakalu genekyawu wuwekinri gike rixiniko mnikawnakatu, ga wa Giturni wa kgiweekaklewakleru. ¹² Goyakalu Wgene waneyalutu waneylu ruwekinri. Ga wa Goyakalu Wgene waneyamigjetu maleshaylu ruwekinri.

Giwekinri gike rixiniko mnikawnakatu

¹³ Tyepirankaka nyonyegitgi wa gixa Goyakalu Wgene giwaka galixachine, wa gimatyalu waneygi giwekinri gike rixiniko mnikawnakatu. ¹⁴ Waponshinikanutyalu wa klunerukokta wagjitanri rixa gishinikletyawaka Wale, Wale yijnakotwu. ¹⁵ Ga wa wumatinri Wale yijnakotywau klunerukokta wagjityalu, wumatlu wa waneywu wagjitanrukaka wa Waleya wagjitanru.

¹⁶ Wa satu geta mukochirewletinri gimole, mukochri gi wa gipukchi chinanupa, ragjigogneyegitanru ga wa Goyakalu genekanru giweklu. Wane rixanna yine wa mukochirna gi wa gipnalu chinanu. Waneru mukochri gipukchi chinanu. Gi wa wane nchina wa ragjitinripa wale chinanu.

¹⁷ Pejnuruko mpoyagkaknuchi mukochrini. Waneru mukochri wa wane gixachri gi wa rupnapotutanu.

Tyenwa galikakpotunanu Goyakalu

¹⁸ Wumatlu wa girukokta Goyakalu wugenetikaluru gi wa mukochire-wata. Seyni wa Goyakalu Wugenetikaluru, Geso, gimretlu. Ga wa mugletu gi wa kamruklu. ¹⁹ Wumatlu wa Goyakalu wgenenwu wixinri, ga wa psolchi-jne gajenko mugletu rawinri. ²⁰ Ga wa wumatlu Goyakalu Wgene ginapinri, ga wa renekanshinikantapwu wumatyaplu galikakpotunanu Goyakalu. Ga wa galikakpotunanu Goyakalu gawinri, ga wa Gituru Geso Kristo gawinri, tyenwa galikakpotunanu Goyakalu, ga wa giweklu gike rixiniko mnikawanakatu.

²¹ Wiwine, gimretinwa yagluchishaya.

2 Tixinri Kpashiri Gwa Kirukate

¹ Tyenwa wa tsru kirukatni.

Tsronupa, tsomitkaluro ga wa twugenenenupa. Wannanwa nushinikane galikaka. Gi wa gitapjeni seyni koxa pejnuruneko galikakpotunanu tokanchi gimatachine gishinikna, ² wa galikakpotunanu tokanchi chinanu, wixa gwachri ga wa wixayma gwagognenatachripa.

Galuklewlu

³ Gimutkalunepgi ga wa getwamonutkalunepgi, ga wa giglewan-shinikankaakalunepgi Goyakalu chinanu Girchi, ga wa Geso Kristo chinanu Girchi Wgene galikakaya ga wa gishiniklewluya.

Kristo yimaklewle gwanu

⁴ Numuwpotuta wa pimrine pwugenene neta, tokanchi galikaka potu ruyanna, yokanru gixyawakpotuko wa Girchi wyoptotinri. ⁵ Ga wa xani nagjityi, tsro. Gi wa gerotu yokanru nyonyegitinikopixkayi, seyni yinuwakikoluyakawa waneywu, wa wushiniikakinripa. ⁶ Ga wa tyenwa gishiniklewlwu, wa wkamrujetanru Goyakalu yokanrekaka gixyawakpotuko. Tyenwa Goyakalu yokanre wa yinuwakikoluyakawa gixa jemletyawaka. Waneko pixka gksamrutantu.

⁷ Gi rixanu gixo kyokwirewaklerune gipgujewna tye psolchijneko. Wanna gi wa gipgjutatl wa Geso Kristo kamaneru rixa ginretinri. Tyenwa kyokwirewakleru ga wa Kristo kamnixachri. ⁸ Getinwa gixnanuko wa gixa kamruretanru gma mamginitipa, seyni gyoptotyaplu gapnutikolu potu. ⁹ Girukokta pnu yini ga wa Kristo ginaklewle gi wa rawini, wale gi wa Goyakalu waneylu. Kristo ginkaklewle gwachri, wale waneya Girchi ga wa Gituru. ¹⁰ Ga wa satu yayeginipgi ga wa tye ginkaklewlu gi ranika, gi wa gipji gyoptotinri. Gi wa galukanru. ¹¹ Gi rixanu wale galukachri mugletu kamrure rukamrutlu.

Nkagwaklu gixa yegi nyinripa

¹² Gixo waneyno nyonyegityapmakgi, seyni gi naluka yonyegletgi kirukaya ga wa ksajgaluya. Seyni nkagwaklu gixa yegi nyinripa, ga wa getgojkakachinepwu wuynumsakakanu, wa wumuwlle poyagkakikolupa.

¹³ Pumole tsomitkaluro wgenene galukyi.

3 Tixinri Kpashiri Gwa Kirukate

Galuklewlu

¹ Tyenwa tsru kirukatni.

Gishiniikaluru Kayo chinanupa, galikakni nushinikanru.

² Nushinikanru, nagjigogneyegityi waneyapyi kigle gwashle psoluyako ga wa gichkopyi, wa kigle pixanshinikanutyawaka pixka. ³ Gi rixanu numuw-potuta wa rapokinitkana wumolene, wanna gipgujtayegityi wa wanepotuko pixinri, wa wane pixa gomkagitinri galikakpotunananu tokanchi. ⁴ Gi wa tye pnute tsru gimuwlu waneyno, nyijnakpiranyegityapna nwugenene wa galikaka potu tokanchi romkagitna.

Kayo ruslaginri ralixkota

⁵ Nushinikanru, poyakkakachriyi pixa kamrutlu klunerukokta kamruruchi wa molchine chinanu ga wa pnu giyakatyachine chinanu koxa. ⁶ Wanna gipgujtatu pushiniklele gapatjetachinkaka getanu. Kigleru pkamrutanu wa pupxaka yaletanna Goyakalunu kgimuka. ⁷ Gi rixanu Geso giwaka chinanu rushpakna. Gikena rawyana payine. ⁸ Guyagni wixa gimkata yoptoretna wane gixachine, rukamrurewatanunepwuna galikakpotunananu tokanchiya.

Riyotrigi gimateyna

⁹ Satu tokanchi nyonyegitna gapatjetachine, seyni Riyotrigi galuka tsru gitakletnachriwa wanna yegi; gi wa yoptotwu. ¹⁰ Guyagni wale kamrure wa kamrutanru nupgujtatanu wa wane nyinipa. Mugletu tokanchiya male-shawaka jigyegishatwu. Ga wa tyekaka gi wa poyagotyawalu, seyni gi waleko yoptotna wumolene ga wa galukayoptoletachine rumaleta. Wale giknokna gapatjetachinyegiya.

Rimitri kiglepiranyegiru pejnuruneyako

¹¹ Nushinikanru, gi wa pyimanru gektutu seyni wa kigleru galikaka. Kigleru kamrutachri walenna Goyakalu giyakatyachri. Gektutu kamruttachri, gi wa Goyakalu reta. ¹² Rimitri kiglepiranyegiru pejnuruneyako, ga wa galikakaya koxa. Ga wa wixa gipgujtathlu. Ga wa gixa gimatlu wupgujtalele galikakpotunananu.

Ralipre galukleta

¹³ Gixo waneyno nyonyegityapmakyi, seyni gi naluka yonyegletyi ksaj-galuya ga wa yonawapiyma. ¹⁴ Seyni giyampotu nkagwaka getletyi. Ga wa getgojkakachine wuynumsakakanu.

¹⁵ Giglewanshinikankaakalurupyi. Pumatjene galukyi. Ga wa pixa palukgiwakatanna pumatanune satkaka.

Kpashiri Gota Kirukate

Galuklewlü

¹Tyenwa Gota Geso Kristo wayegreru kirukate, Santiyako gepuru. Goyakalu Girchi tomganune, rushinikanune chinanupa, Geso Kristo chi-nanu gimretkalune.

²Getwamonrewlu ga wa gigurewshinikanrewlu ga wa gishiniklewlu gixa chinanu gixolewnakaakalurupni.

Kyagtlewaklerunepgi tokanchi galixkaluru chinanu

³Nushinikanune, psoluyako nmerewata nyonyegitgi gixa gognewatikalulu-rupirana, pejnurunenupmaka gognewatikaluru. Numkata yonyegletgi nuykotyapgi kyagtlewaklerunepgi tokanchi galixkaluru chinanu, pakat-apje samyokyegitkana kpashirine. ⁴Gi rixanu pimrine yine pochkeruneko yoshmaknawa. Wanna-nwa muchikawako yonpiranyegitkalunni wa wan-nanupa tye giklukanuwnayegjixlu. Mupashiregolunni. Goyakalu gimut-lewle rupektoluna mpogijpatnuchi. Ga wa satupjerutu tsru potu Girukotle-watachri ga wa Wutsrukate Geso Kristo runutatna.

Goyakalu giklukanuwnayegjixanna malixkanni

⁵Muchinanu psoluyako gimatkatalu, seyni naluka gishinkapkak-letgi, wa Gitsrukaachi Gigiptyo rognetskakinitkana rayinerutene, wanep-nute malixkanni ruylata. ⁶Ga wa Goyakalutowrenenanu rutakolna mumretkanni, seyni ruknokamtluna rawyawakna, tsru giklukanuwnal-gogne chinanu Wale gimretanna gostutkalunni mapshagawaka gike rix-iniko mnikawnakatu rawinripna. ⁷Sotoma gajenni ga wa Komora gajenni pixka ga wa rumwastsipokchijetanrukakni pixka waneko pixka rixanna kapoklewaklerunni, ga wa pnumnu rixinina manchiya. Yaglu rixkanna xirnachri gike rixiniko muwnakatu saletikanna.

Gixashayimaklewletachine gikluuka

⁸Seyni waneko pixka rixkoxna wa nyi gipnawjetachine. Wanna galikaka puchotmanetna. Gi ijynakotluna tsru gitakalurkaka. Pogirelwukaka rapatna. ⁹Ga wa Mikili, Goyakalutowrerune gitsrukate, kamchi gitsrukate yagotini ga wa yo-topirkakini Moysisimane chinanu, waleko Mikili gi tseruwanshinikanuta giklukanuwnalu gapatle koschekinripa, seyni wane china, “Gitsrukaachi chigetjetanunyi.”

¹⁰Seyni wanna nyi ma mumatanutkakna rapatna. Ga wa rumumture-tanruna rumatanrukakna gepkoxamkojejixirune manshinikanune pixka, tyekakaya nikawniyna.

¹¹¡Gi waneni wanna! Gi rixanu Kaynigapo yachinen. Ga wa Walaami pupjetinri pixka, reneknawana yoptotyapluna gipekolu. Ga wa Kore yop-topiire ramgiyna.

¹²Wa gishiniikaklewle meyiwlü wannanwa gjirintakaka pixkalune. Mpikanne tsru niklu rumnikgina. Goglutchinwa. Kyachgapererumko magatu pixkalunni, kannipgyalu ganikanrukaka. Gagmuna maleplutski-giru, majitu, gepi kata gipnachrinatka, gopliikaluru pixkalunni. ¹³Tsru wenushpurga mgirukotkotu, waleko patmenuwleya gashlirikachrishpurga pixkalunni. Katagiri yaglotashatachrokaka pixkalunni. Wanna chinanu gimretkalurni mapshagalsajnu rixgognenatyawakapa. Tokanchi renekle-watinri Genocho

¹⁴ Wannapirana koxa runkakleta Genocho, wa Goyakalu tokanu renek-lewatini. Walenwa Gataklopisha payokgipre chininri. Wale wane china, "Gitsrukaachi gina gixolune potu kpashiriteneyma, ¹⁵ pejnuruneko ruk-lukanuwnayegjixyapa. Mukochirna rekagkitanna. Wane rixawanna mukochire: Mupashiregolunni. Pejnuruyako mupashiregnuchi kamrutna wanna. Mupashichlewatkanni. Giyagni pejnuruko tokanchi wanna mu-pashiregolune kmukochirerune chingajita ga wa pejnuruko mupashiregolu wanna chinyegitlu Goyakalu, ruklukanuwnayegjixanna."

¹⁶ Wannanwa kegemgaklerune ga wa getwamonutnachinwa. Romkaa getsotanrewletna. Tsrupotunanu tokanchi yanumsatokanushatyana. Ral-ixkotmanewlerewatna rupxakikolupna.

Ginkaklewlu ga wa giykolu

¹⁷ Seyni gixa, nushinikanune, gishinikanru Wutsrukate Geso Kristo yokanatanune tokanu muchinanu wane chinkalurutka. ¹⁸ Wa wane chinyagina, "Wa ralipregognepa wanepna kgixpiranataklerune. Wannako getsotanrewle mupashiregotu ruyanna." ¹⁹ Wanna kotspalkaklewata wa manchi galukyawaka. Giwekikaluru gi waneyna.

²⁰ Seyni gixa, nushinikanune, kpashiri potu galixlewleya ntseruwnanshinkanutini. Giwekikaluru Kpashiri gagjigognetini.

²¹ Gimretinwa Goyakalu gishiniklewleya. Wutsrukate Geso Kristo getwamonrewle gkagwakanu waneyapgi giwekinri gike rixiniko mnikawnakatu. ²² Getwamonutanna nutanshinkanutachine galikaka.

²³ Xirnachri gishatkapikaluru pixka gixa gognetkakletanna pimrine. Ga wa pimrine getwamonutanu mpikleymananuko. Gayegixanru mkachriko wa manchi puchotikaluru.

Giglenshnikanyeglewlu

²⁴ Gimalwutkalurupa wa gimkata gimretletjeru mujruukanepgi ga wa gimkata tunwakakletjeru royaknu yegi, muklukanuwnakanepgi gimjik-leyma. ²⁵ Satupjerutu Goyakalu Wognetkakjeru, Geso Kristo Wutsrukate chinanu, walenni goyaknuchi, ga wa tsru potu pogirewlu, ga wa muchkonu, ga wa girukotlewlu ma mapookanuwa muchinanpotgogne, ga wa xani, ga wa psolgogneshpotunanuko gike rixiniko mnikawnakatupa. Wane gixkalurupa.

Gipgujetkaluru Geso Kristopirana

¹ Tyenwa Gipgujetkaluru Geso Kristopirana wa Goyakalu genekanru, wayegrene rekakgitinripa pshinitsonu gimkata ginretachrikakapa, rumatkakpirantaplu. Yokanatlu gitowreruya. Wayegreru Gwa yegi yokanatlu. ² Wale Gwa gipgujitatlu Goyakalu tokanu ga wa Geso Kristopirana gipgujitatikolu, ga wa retanru pejnunanuka. ³ Giglenshnikanyegitkalunni wa tyepirankaka getyongatachine, wa tye tokanchi Goyakalu genekanru getyongatachine ga wa yijnakotachine. Giglenshnikanyegitkalunni wa gewi yonatikaluru gimretachine, gi rixanu gi gowukatkalu gigogone.

Payokgipre gapatjetachinkaka galuuka

⁴ Tyenwa Gwa kirukate.

Wa payokgipre gapatjetachinkaka Gasya gwachine chinanu. Gimutkalunepgi, ga wa giglewanshinikankaakalunepgi Waley, wa wanerutu, ga wa muchikawluru, ga wa ginachripa, ga wa payokgipre giwekkikaluruneya, tuplapijere ginaple gwachine. ⁵ Ga wa Geso Kristoya gipgujtalewatachri poyagkakachri, muchinanu potu wugenetika wa gipnachinyegi, tyechijne pogirene Gitsrukapatu, wushinikjeru, wkaspukmukochiretjeru Waleko gigragaya. ⁶ Goyakalu, Ruru, pogirewatywaka gajene rixkakwu, ga wa sasertotene rixkakwu Wale chinanu. Walenupni goyaknuchi ga wa muchkonchi gwagognenatachri gike rixiniko mnikáwnnakatupa. Wane gixkalurupa.

⁷ Getanru. Kyachgapererumko rumunaru,

ga wa yoglotjene koxa getanru.

Ga wa payinerumnunanuka psolchijneko gajene
wamonuwatanna Wale chinanu.

Gigi. Wane gixkalurupa.

⁸ “Gitni wa muchinanu gwachri yongano ga wa ralipre yongano.”

Wane china wa Gitsrukaachi Goyakalu, wa wanerutu, ga wa muchikawluru, ga wa ginachripa, pejnuruko Girukotachri.

Klu chinanu yonatkalurni twu kiruka

⁹ Gitni, Gwano, gimolno, ga wa gimusmatjerno wa salewakchiya ga wa pogirewatywawa kaya, ga wa kashnantakgogne newluya Geso chinanu. Patmoknipreka chinikowaka nwanatini Goyakalu tokanu chinanu ga wa Geso gipgujtatikolu chinanu. ¹⁰ Gitsrukaachigogne Giwekkaluru nwini. Notjimnesreta tsruplaji nyijnakota kowi pixka. Wane china, ¹¹ “Wa petanrukaka kiruka pyonatanru. Ga wa pyokanatanro payokgipre gapatjetachinyegkaka: Gigwiso, ga wa Smirna, ga wa Perkamo, ga wa Tiyatira, ga wa Sarti, ga wa Wilatelgi, ga wa Lawtise.”

Yineru Wgene kaygawlu retika

¹² Ga wa nuprotaka netyalu tye tokanchi nuynumsatjeru. ¹³ Ga wa nuprotakinitka netlu payokgipre kori katalo gapi. Ga wa katalgapkaka ganikajite netyalu Yineru Wgene pixkalutu, gopwalu gitakachri, gishrikajeputachri korimtaya. ¹⁴ Ga wa gjiju ga wa gjiju gowegapixi klatalu pixka rixa, giwrw klatalu pixka. Ga wa giygale xirnachrimero pixka rixa. ¹⁵ Ga wa gjixi sintawo xirnachripro gatajistikaluru pixkalutu rixjixita. Ga wa giplaji gixpotkaka gongima pixka rixplajgimata. ¹⁶ Payokgipre katagirkaka gwapotuklesretatemoytolu. Ginama rushpkaya yogolewapi

gepnokaka gwasputachri gepragaspuru. Ga wa gigoji tkachi pixka rixa, muchkonu yochigatyachri.

¹⁷ Ga wa gita getinitkalu gjixipta nyawnamtya gipnachri pixka. Giyagni Wale gitakamyogogotno potuklemyoteya. Wane chinno, ¹⁸ “Gi pikanu. Gitni wa muchichachrino ga wa ralipreno. Ga wa giwekachrino. Gipnachrinnano ga wa xani nuwekgognenata gike rixiniko mnikawnakatu. Ga wa waneyno gipukchi yoskekapre ga wa gipnachine gwiyawaka yoskekapre. ¹⁹ Giyagni pyonatanru petanrukaka, ga wa wanerutkaka, ga wa wanepnute gwachrikakapa. ²⁰ Wa giyogimanatkaluru tokanchi payokgipre katagiripirana, wa petinro npotuklesretatemyoya, ga wa payokgipre katalgapi kori, wa payokgipre katagirkaka, wannanwa Goyakalutowrene wa payokgipre gapatjetyachinkaka chinanu. Ga wa payokgipre katalgapi wannanwa payokgipre gapatjetyachinkaka.

2

Tokanchi wa Gigwiso gapatjetyachine chinanu

¹ “Wane pixa yonyegletanru Goyakalutowreru Gigwiso gapatjetyachine chinanu:

Tyepirankaka china wa payokgipre katagiri kashichachri potuklemyoya, wa payokgipre katalgapi kori ganikajite yapachri:

² Numatlu pkamrure ga wa pyaprewatinri ga wa pkashnantakgognere, ga wa pixa gi pumkata gakotletna muglene. Ga wa petumgana yokanatkalune chinnachinwa ga wa gi wane rixna. Ga wa petna kayroklewaklerunni. ³ Wa kashnantakgognekleryi, ga wa Gita giwaka chinanu pakotlewata. Gi wa pamanuta.

⁴ Seyni waneyno pagixanu gektutu pixayma. Wa pkaspukatkalu muchinanu pushinklewlle. ⁵ Giyagni pushinkapanru ginaka pujrukyana. Ga wa penshinikanutanutka. Muchinanu pkamrure pkamruretanutka. Wane pma mixkanu, pixa yegi nyanu. Ga wa nkoninyi pkatalotgapi twiyawakaya, pma menshinikanutkanupa. ⁶ Seyni tye galikaka waneyyi, wa payegixlu wa Nikolaytane kamrure wa Gita koxa gayegixanruni. ⁷ Wa kajnakopnalu yijnakotanru wa Giwiwekkaluru chinyawakna wa gapatjetachinkaka. Gaalirewatachri neneka nikletanru giweekaklewatachri gagmuna gwachri. Walenwa Goyakalu gigleyawaka ganikajite gwachri.

Tokanchi wa Smirna gapatjetachine chinanu

⁸ “Wane pixa yonyegletanru Goyakalutowreru Smirna gapatjetachine chinanu:

Tyepirankaka china wa muchichachri ga wa ralipre, wa gipnachrinanni ga wa giwekachritka.

⁹ Numatlu psalewnale ga wa pwamonnupoga, seyni ponikolyi. Numatkoxlua ma mupashiregnunna Goteyone chinachinwa ga wa gi wane rixa. Seyni Satanasyo ginkaklewawaklepji gajenni. ¹⁰ Gi pikanu psalewninripatka. Gixapni kamchi gitsrukate wa yoshmakikowaka rutakjixannungi pimringi, gyantaletikolupa. Pamolgogne salewnalu waneyagi. Pupninpotonanuko poyagkakachripyi ga wa giweklu sagyeta nenekanyi.

¹¹ Wa kajnakopnalu yijnakotanru wa Giwekkaluru chinyawakna wa gapatjetachinkaka. Gaalirewatachri gi gimtuko gepi chininri gipukchiya.

Tokanchi wa Perkamo gapatjetyachine chinanu

¹² “Wane pixa yonyegletanru Goyakalutowreru Perkamo gapatjetyachine chinanu:

Tyepirankaka china wa yoglolewapi gepnokaka gwasputachri gepraspuru waneyalutu.

¹³ Numatlu pwiywaka, wa Satanasyo tuplapijere yegi. Ga wa ngiwaka pumreta. Gi wa prnatatu nalixikolu, Gantipaklupotuko, nupguitatjeru poyagkakachri, wa gixa yegi giylatikaluru, wa Satanasyo gwiyawakaya.

¹⁴ Seyni psotsotaji waneyno gektutu pixayma. Gi rixanu waneyyi wane Walaami yimaklewle gomkagitchine. Wale yimaklu Walaka rutspetkakyapna Gisrayiliklopishane, wa nikyapluna yagluchisha geneekalurkaka, ga wa rapoklewatrinripna. ¹⁵ Waneko pixka pixa. Waneyyi Nikolaytane ginkaklewle gimretachine. ¹⁶ Giyagni penshinikanutanu. Wane pma mixkanupa, giyanpotu napyegitanyi, ga wa nyagotanna nonama gwachri yoglolewapiyema.

¹⁷ Wa kajnakopnalu yijnakotanru wa Giwekkaluru chinyawakna wa gapatjetachinkaka. Gaalirewatachri neneka nikletanru mana yogimatkaluru. Ga wa nenekanru klatsotlejirpotu, ga wa sotluji yonatkaluru gerotu giwakchi satuna mumatanatu. Seyni yoptotachripjea gimatanru.

Tokanchi wa Tiyatiri gapatjetyachine chinanu

¹⁸ “Wane pixa yonyegletanru Goyakalutowreru Tiyatira gapatjetyachine chinanu:

Tyepirankaka china Goyakalu Wgene, xirnachrimero pixka gixaygale-tachri, ga wa sintawo gatajitaluru pixka gixjxitachri.

¹⁹ Numatlu pkamrure ga wa pushiniklewle, ga wa palixlewle, ga wa pupxaklewle, ga wa pkashnantakgognewle, ga wa pkamrure, ga wa ralipre gixo potu muchichachri pnute.

²⁰ Seyni waneyno pagixanu gektutu pixayma. Gi rixanu wa suxo Gesawera wa Goyakalu tokanu geneklewtachro chinnachrowa puchi yimaklewleta ga wa tyokwitna nwayergrene, rapoklewatrinripna ga wa nikyapluna wa yagluchisha geneekalurkaka. ²¹ Neneklo gogi tenshinikanutinripa. Gi taluka genshinikanreta tapoklewatini. ²² Giyagni pajeko nuknokanro wala ga wa walayma gimopatlewatachine, tsru sale-wakchi yegi, ma menshinikanutkanupna kamrureyna. ²³ Gipukchi nuy-latinna twugenene. Ga wa pejnuruneko gapatjetachinkaka gimatanu wa Gitni wa shinikanchi ga wa gaschi getjetachrino. Ga wa nenekangi satkakgi gi gixpoko kamrurewatyawaka. ²⁴ Ga wa wane nchina, pimringi Tiyatira gwachingi ginnakokta tye ginkaklewlmigjeya, wa Satañasyo gitokpotu chinyawakna, mumatkangi. Wane nchingi, gi satuna kamrurchi nutakyegitangi wanepnute. ²⁵ Seyni wa waneygi gixinri gimretanru napokinpotunanuko.

²⁶ Wa gaalirewatachri ga wa nkamrurkaka gimretachripa yoptukyawakpotunanuko, wale nutakanu payine chinanu.

²⁷ Kanojerchi yowumaje rugirukotanna.

Kajpastono pixka rumlookona, ²⁸ nixa yoptoretyawaklu Nuryegiya. Ga wa gonsagi nenekanru. ²⁹ Wa kajnakopnalu yijnakotanru wa Giwekkaluru chinyawakna gapatjetachinkaka.

Tokanchi wa Sarti gapatjetyachine chinanu

¹ “Wane pixa yonyegletanru Goyakalutowreru Sarti gapatjetyachine chinanu:

Tyepirankaka china wa payokgipre giwekikalurune Goyakalunu ga wa payokgipre katagirkaka waneyalutu. Numatlu pkamrure. Wa kgiwakyi. Wa puwekinri, ga wa gipnachrinatkayi.

² Puyokanutka, ga wa gixetachrikaka pmuchkotanu wa galuka gipa-naletachrikakanatka. Gi rixanu gi nukshiklu pkamrure poyagkakikolu Noyakalute getanu. ³ Giyagni pushinkapanru pyoptotanrukaka ga wa pyijnakotanrukaka ga wa pumretanru. Ga wa penshinikanutanu. Giyagni pma myookenupa, kachowguru pixka nixa gapyegetanyi. Gi pumata gipapko napyegitanyi.

⁴ Seyni Sarti pimrine waneyyi, wa gimkalna mpuchotkane. Ga wa Gitayma yananna klatalu mkachri gitakachine, gi rixanu rumuknunina. ⁵ Gaalirewatachri klatalu mkachri makatkalurupni. Ga wa giweklu kirukateya gi nsheygiwakatinri. Ga wa Nuru getanu nupguitagi-wakatanyi, ga wa Nurutowrene getanu. ⁶ Wa kajnakopnalu yijnakotanru wa Giwekikaluru chinyawakna wa gapatjetachinkaka.

Tokanchi wa Wilatelgi gapatjetyachine chinanu

⁷ “Wane pixa yonyegletanru Goyakalutowreru Wilatelgi gapatjetyachine chinanu:

Tyepirankaka china wa kpashiri, wa galikakpotu, wa Tawi yoskekaprue waneyalutu, wa kotpukachri ga wa gi satuna gishyatl, ga wa gishyatachri ga wa gi satuna kotpuklu.

⁸ Numatlu pkamrurkaka. Petanu. Nenekyi kotpuukaluru gipgyapto pixa getanu. Gi ke gimbata gishaletu. Gi rixanu waneyyi ptsotsotaji pmuchkonu. Ga wa pumretlu ntokanu. Ga wa gi pnutatlugiwaka. ⁹ Giyagni pimrime Satanasyo ginkaklewaklepji gajene wa Goteyo chinnachinwa ga wa gi wane rixna, seyni rayroklewashatna, wane nixkakanna: runinripna ga wa pujixisti yoptsojitinripna. Ga wa rumatanruna nushinikyayi. ¹⁰ Gi rixanu pumretlu ntokanu nkashnanta-koggnewlepirana, Gita koxa gimretanyi gyantaletikolgogneklupa, wa psolchijne gajeneko yegi ginachripatka, yantaletikolupna psolchijneko gajene. Giyampotu nunanu.

¹¹ Pumretanru waneyyi pixinri. Gi satuna gwinyi psagyetapa. ¹² Wa gaalirewatachri kpashiwakpotugrukostsi nixkakanru Noyakaluteppija. Gi wa maleka rushpakanutka. Ga wa Noyakalute giwaka nyonatanru, ga wa Noyakalute pokchi giwaka. Walenwa gerotu Gerosale, tengogne Noyakaluteyegiya gjirukyachripa. Ga wa ngiwaka gerotu nyonatanru. ¹³ Wa kajnakopnalu yijnakotanru wa Giwekikaluru chinyawakna wa gapatjetachinkaka.

Tokanchi wa Lawtisi gapatjetyachine chinanu

¹⁴ “Wane pixa yonyegletanru Goyakalutowreru Lawtisi gapatjetyachine chinanu:

Tyepirankaka china wa Wane gixkalurupa, wa gipgugjalewatachri poyagkakachri ga wa galikakpotu, wa Goyakalu giyakotanrukaka yinuwakjixachri.

¹⁵ Numatlu pkamrurkaka, gi wa kachikleryi, gi koxa gemeryi. Naluk-maklu kachikleru pixinri waka gemeru. ¹⁶ Giyagni gi rixanu psotsotaji gemeryi. Gi wa gemeryi. Gi koxa kachikleryi. Giyagni nonama naplitinyi. ¹⁷ Gi rixanu wane pchina, ‘Ponikolno. Nponikowatatk. Gi ke nmagatya.’ Ga wa gi pumatnawa salewnachriyi, ga wa getwamonutkaluryi, ga wa kwamonuryi, ga wa maygaletyi, ga wa mamkatyi. ¹⁸ Nuykotyi Gita yegi pagjitiro kori xirnachri gatajitatikaluru ponikowatinripa, klatalu mkachri

pmakatko ma mupgujewninitipa pmamkatinri patewle. Ga wa ygalchip-inre pagjitanu psagaygaletinripa. Petinripa.

¹⁹ Gita chigetjetna pejnuruneko nalukanune, ga wa nsaletanna. Giyagni pmuchkowatanu ga wa penshinikanutanu. ²⁰ Gita gipgyapto nwa. Nuy-laylagipgyaptoteta. Satu jeminri ntokanu ga wa kotpukgipgyaptotetini, njiglokyegitanru wale. Nnikanu waleyma ga wa wale Gitayma.

²¹ Gaalirewatachri nenekanu wa ntuplapijere ruxiplatanno, wa Gita gaalirewatinri pixka ga wa Nuru tuplapijere nuxiplatlu Nuru. ²² Wa kajnakopnalu yijnakotanru wa Giwekkaluru chinyawakna wa gapatjetachinkaka.”

4

Kaygawlu getikaluru wa pogirchi tuplapije tengogne gajeru

¹ Wanepnute netatka wa tengogne gitpukgipgyaptoteta. Ga wa muchinanu plaschi kowi pixkagimalutu nyijnakotanru. Gita ruynumsata. Wane china, “Gewi teno punanu. Ga wa nekakgitanyi wa wanepnute gimkata ginretachrikaka.”

² Waneklu Giwekkaluru jiglokno. Wale chinanu netlu pogirchi tuplapijere tengogne gwachri. Ga wa tuplapije rawa tuplanatachri. ³ Wa tuplanatachri getikolu gaspe sotlejiru pixka ga wa sartiyo klatalsotlejiru pixka. Ga wa kshi tuplapije sajrukachro, gesmeralta katwergalu polersotlejiru pixka getikolu. ⁴ Ga wa tuplapije sajruka gepmole gepkoxamkoje tuplapijkaka. Ga wa tuplapijkaka tuplatna gepmole gepkoxamkoje tsrune klatalu mkachri gitakachine. Ga wa gijiwna waneyna kori sagyeta. ⁵ Ga wa pogirchi tuplapijere rushpakya rawrakle ga wa plaschigimkaka, ga wa rutfogle. Ga wa payokgipre katalo yochpikjetkaluro xirnachri tuplapije ginaple. Wannanwa payokgipre giwekkalurune Goyakalunu. ⁶ Ga wa tuplapije ginaple waneru tsru wenu potu wirtryo pixkalutu. Katwergalu pixkalutni.

Ga wa tuplapije ganikajiteswaji ga wa tuplapije sajrukle wanena gepkoxamkoje gepkoxamkoje giwekkachine, gixo potu ygalchi waneyalune gistas-reta ga wa gitjimnesretna.

Tengogne gajene gimalwure

⁷ Ga wa muchinanu giwekkachri, tsru mgenoklu pixka gixachrini. Ga wa gepi rixinri giwekkachri waka wgene pixkalutni. Ga wa mapa rixinri giwekkachri, yinerugoji pixka waneyalutu. Ga wa gepkoxamkoje rixinri giwekkachri walenwa tsru klatatalu galnachri pixkalutu. ⁸ Ga wa gepkoxamkoje giwekkachri satkaka waneya patsrujiremeji. Gixo potu ygalchi waneyna psolumtako ga wa gimejimpuko. Ga wa psolgogneko psolytechnoko gi rapnanu wane chinretna:

Kpashiri, kpashiri, kpashiri Gitsrukaachi Goyakalu,
pejnuruko Girukotachri,

wa muchikawluru ga wa wanerutu ga wa ginachripa.

⁹ Ga wa pogirchi tuplapijere tuplatachri, wa giwekgognenatachri gike rixiniko mnikawnakatu rumalwutna giwekkachine, ga wa kagwakpiratluna, ga wa moyagnutluna. ¹⁰ Waneklu wa gepimole gepkoxamkoje tsrune chiji rapokna wa tuplapije tuplatachri getanu. Yoptsojityegitluna wa giwekgognenatachri gike rixiniko mnikawnakatu. Ruknoklona sagyetna tuplapije ginaple. Wane chinna:

¹¹ Pumuknuni, Wutsrukate Woyakalute,

pyoptotyalu goyaknuchi ga wa kagwakpiiru, ga wa giyaklu
gi rixanu ptowrunanuka puyakota.

Ga wa pushinikyawaka chinanu

wanetkalu ga wa giyakotkalurutkani.

5

Kiruka payokgipre gipre kgimaxikolero gishyatikaluro

¹ Ga wa tuplapije tuplatachri potuklemyo netyalo kirukpoyi, gitoko yonatikaluro ga wa totji yonatikaluro. Ga wa payokgipre gipre kgimaxikolero gishyatkaluro. ² Ga wa netlu Goyakalutowrеру gichkolu gichkoplađi wane chinna sapletachri,

“Katni wa gimuknu kopralatyaplo kirukpoyi, ga wa kotpuka gipretyaplo?”

³ Ga wa gike gimkatlu, gi wa tengogne gajeruko, gi wa chiji gajeruko, gi wa chiji gitokote gajeruko. Gike gimkata kopraaletlo kirukpoyi. Gi koxa rumkata getletlona. ⁴ Ga wa nchiyampotuta, gi rixanu gike gikshiika rumuknu kopralatyaplo kirukpoyi ga wa retyaplo. ⁵ Ga wa satu wa tsru wane chinno, “Gi pchiyagatanu. Petanu. Rakagloklewata tsru mgenoklu Gotaklopishaneru, Tawitski. Wale gakagloklewata kotpukyaplo kiruka ga wa payokgipre tupre kgimaxikolero mananuko.”

Gowega Wgene gakagloklewatinri

⁶ Ga wa tuplapije ganikajiteswaji, ga wa gepkoxamkoje giwekachine ganikajite ga wa tsrune ganikajite, netyalu gowega Wgenni tunwanat-achri giylatkaluru pixka, payokgipregwalatu, ga wa payokgipreygalerutu. Payokgipreygalenwa payokgipre giwekalurune Goyakalunu psolchijneko yukanatkalune. ⁷ Gowega Wgene wane ya. Wa tuplapije tuplatachri potuklemyo yoptotyalo kirukapoyi. ⁸ Giyagni kiruka yoptotinitka, wa gepkoxamkoje giwekachine, ga wa gepimole gepkoxamkoje tsrune chiji rapokna gowega Wgene getanu. Satkuna waneya gitlotsatkaluro, ga wa koripro katsepu pgamlupagiri. Walenwa kpashirine gagjigognerkaka. ⁹ Ga wa shikaletluna geruto shikalchi. Wane chinna:

Pumuknuni kiruka pyoptotinri

ga wa pkotpukyaplu tupre kgimaxikolero.

Gi rixanu giylačkaluryi ga wa pugragaya
pupekottanna yine Goyakalu chinanu,

panerumnunanukaya, ga wa
patokanumnunanuka yanumatyachineyegiya,
ga wa payinerumnunanukaya,
ga wa pachijne gajenmnunanukaya.

¹⁰ Ga wa Goyakalu getanu
pogirchine ga wa sasertotene pixkakna.

Ga wa chiji pogirewatinn.

¹¹ Giyagni netatka. Ga wa gixolune Goyakalutowruneplaji njema, tuplapije sajrukachine, ga wa giwekachine ga wa tsrune. Ga wa wane pejnuna gixolune potu ga wa gixo waragka waragkane, ¹² gichkoplađi wane chinachine:

Rumuknuni gowega Wgene giylatkaluru
yoptotyaplu giyaklu ga wa ponikowlu,

ga wa gimatkalchi, ga wa muchkonchi,
ga wa kagwakpiiru, ga wa gimalwuru,

ga wa galixkowlu.

¹³ Ga wa pejnuruko giyakotkaluru tengogne gajeru ga wa chiji gajeru, ga wa chiji gitokote gajeru, ga wa tsru wenumta gwachine, ga wa pejnuruko wane gajerkaka, nyijnako wane chinreta:

Pogirchi tuplapijere tuplatachri,

Ga wa gowega Wgene

waneyapa gimalwuru ga wa kagwakpiiru,
ga wa goyaknuchi, ga wa muchkonchi,
rixgognenatanu gike rixiniko mnikawnakatu.

¹⁴ Ga wa gepkoxamkoje giwekachine wane china, “Wane gixkalurupa.”
Ga wa tsrune chiji rapokna ga wa yoptsojityegitluna.

6

Muchinanu gipre: Kawalyo gogo tuplatachri gakagloklewatachri

¹ Ga wa netlu gowega Wgene kotpukgipretayawaklo muchinanu gipre wa payokgipre gipre kgimaxikoleroya. Ga wa gepkoxamkoje giwekachine satute nyijnakoplajita rutogle pixka chinachri, ² “Punanu.”

Giyagni netatka. Ga wa netlo kawalyo klatalo. Ga wa wala gogo tuplatachri waneylu kashritwa. Ga wa sageyeta reneeka. Giyagni rushpaka gakagloklewatachri rakagloklewatinripa.

Gepi rixinri gipre

³ Ga wa gepi rixinri gipre kgimaxikolero kotpukinitka, nyijnakotlu gepi rixinri giwekachine wane chinachri, “Punanu.”

⁴ Tushpakatnaka sato kawalyo serolo. Ga wa wala gogo tuplatachri geneeka rawyaplu chijiya kigle gwashlu, ruylakinripna. Ga wa wale geneeka yoglolewapi gitsruka.

Mapa rixinri gipre

⁵ Ga wa mapa rixinri gipre kgimaxikolero kotpukinitka, nyijnakotlu mapa rixinri giwekachine wane chinachri, “Punanu.”

Ga wa netlo ksajiro kawalyo. Ga wa wala gogo tuplatachri waneylu yantapi gimyoya. ⁶ Ga wa nyijnakotlu plaschi pixkalutu wa giwekachine ganikajiteya wane chinachri, “Satu masu trikoji paproji wenroloto chinanu, ga wa mapa masu triko pixkalutuji paproji wenroloto chinanu. Ga wa goliwangi ga wa winga gi pumtukanu.”

Gipnalu

⁷ Ga wa gepkoxamkoje rixinri gipre kgimaxikolero kotpukinitka, nyijnakotlu gepkoxamkoje rixinri giwekachine wane chinachri, “Punanu.”

⁸ Giyagni netatka. Ga wa pwalolo kawalyo wanetka. Ga wa wala gogo tuplatachri Gipnalu giwaka waneyalutu. Ga wa gipnachine gwiyawaka gomkagitlu. Ga wa wanna gitaka satupje gepkoxamkojete chiji gajene chinanu, yoglolewapiyma ruylalewatinripna, ga wa nachluyma, ga wa gipnaluyma, ga wa kmatsuruneyma, chiji gajene.

Pamyo rixinri gipre: Giylatkalune Goyakalu tokanu chinanu

⁹ Ga wa pamyo rixinri gipre kgimaxikolero kotpukinitka, yochpikikowakakwa rapukote netyana giwekikalurune wannanu wa giylatkalune Goyakalu tokanu chinanu, ga wa rupguitalewlena chinanu, giylatkalunni. ¹⁰ Ga wa gichkoplaaji china sapletna, “Gitsrukaachi kpashiri ga wa galikakpotu, ¿giklunanu gi puklukanuwnayegjixawana psolchijneko gajene, ga wa gi papnuyegitawalu wugraga?”

¹¹ Ga wa satkaka geneeka klatalu gowukalu mkachri. Wane chinkana wa rapnanutanunnachi pshinitsonu pejnuruneko rixinripna rixje Geso wayegrene ga wa gimolenna wanna pixka gixa giylaletkalunepa.

Patsrujire rixinri gipre: Psolchijneko komyeeka

¹² Ga wa patsrujire rixinri gipre kgimaxikolero kotpukinitka, netatka. Ga wa wanetkalu tsru guyolikchijru. Ga wa tkachi ksaji rixa kawshistugalau mkachri kapixiru pixka. Ga wa psoluko ksuru granchi pixka rixa.

¹³ Tengogne gwachro katagirkaka chiji gjiruka, gikera tujirsagitini pixka totsotsagi, tsru kannipgyalu komyekshegitinro pixka. ¹⁴ Ga wa tengogne gixrikamtatka kirukpoyi pixka moyitkoklunu. Ga wa pejnuruko magka ga wa pejnuruko kanipreklikaka rawywakawa rajrikika.

¹⁵ Ga wa tyechijne pogirewatyachine, ga wa tsrukakalune, ga wa ksolaloterune, ga wa ponikolune, ga wa gichkolune, ga wa pejnuruneko wayegrechene, ga wa pejnuruneko gishpakkachine, gitawakapna ga wa tsru sotlu magka gajeru yogimatnawana. ¹⁶ Ga wa wane chinruna wa magkakaka ga wa tsru sotlu, “Pujrukanu wixa gogo. Pyogimatanwu pogirchi tuplapijere tuplatachrigojiya, ga wa gowega Wgene jgekanuya. ¹⁷ Gi rixanu rapokatka jigekanna tsrugogne. Ga wa ¿katu gimkata tunwaleta?”

7

Satu pacha gepkoxamkojmole gepkoxamkoje waragkane gimaxikoletkalune

¹ Wanepnute netna gepkoxamkoje Goyakalutowrene, gepkoxamkoje chjisretate tunwanatachine, wa gepkoxamkoje chjisretate giyakannipyatychi gimirretachine, ma majpopokannipyatinitipa chiji, gi wa tsru wenuko, gi wa satu gagmuniyegiko. ² Ga wa satu Goyakalutowreru netatnaka, tkachi gishpatyawakasreta gipgujewniyachri. Goyakalu giwekachri gimaxikole gipipre waneyalutu. Gichkoplaji china sapletna gepkoxamkoje Goyakalutowrene, geneekalune wa chiji rumtukyapna ga wa tsru wenu. Wane china sapleta, ³ “Gi gimtukanru chiji, gi wa tsru wenuko, gi wa gagmunkakako, wumaxikoletinpotukna Woyakalute wayegrene gjrotayna.”

⁴ Ga wa njemu gi pejnu gimaxikoletkalune: satu pacha gepkoxamkojmole gepkoxamkoje waragkane gimaxikoletkalune panerumnunanuka Gisrayiliklopishane.

⁵ Gotaklopishanerune pamole gepi waragkane gimaxikoletkalune. Ga wa Roweklopishanerune pamole gepi waragkane. Ga wa Kateklopishanerune pamole gepi waragkane.

⁶ Ga wa Gaseriklopishanerune pamole gepi waragkane. Ga wa Neptaliaklopishanerune pamole gepi waragkane. Ga wa Manaseklopishanerune pamole gepi waragkane.

⁷ Ga wa Simoklopishanerune pamole gepi waragkane. Ga wa Rewiklopishanerune pamole gepi waragkane. Ga wa Gisachaklopishanerune pamole gepi waragkane.

⁸ Ga wa Sapolonoklopishanerune pamole gepi waragkane. Ga wa Gosiklopishanerune pamole gepi waragkane. Ga wa Migamiklopishanerune pamole gepi waragkane gimaxikoletkalune.

Gixolune potu yine klatalu mkachri gitakachine

⁹ Wanepnute netatka. Wanena gixolune potu yine, gike mumkata yanataletanune, pachijne gajenemnunanukaya, ga wa panerumnunanukaya, ga wa payinemnunanukaya, ga wa patokanumnunanuka yanumatyachineya, pogirchi tuplapijere ginaple ga wa gowega Wgene getanu tunwatachine. Klatalu mkachri gopowalu gitakachine. Ga wa kasureru waneyna gimonyyna. ¹⁰ Ga wa gichkoplaji china sapletna:

Woyakalutenni gognetkaklewlu
wa pogirchi tuplapijere tuplatachri,

ga wa gowega Wgenenni.

¹¹ Giyagni tuplapije ga wa tsrune ga wa giwekachine sajruka tunwaletna pejnuruneko Goyakalutowrene. Tuplapije ginaple chiji gapokjiutachinni. Ga wa yoptosjityegitluna Goyakalu. Wane chinna:
“Wane gixkalurupa.”

¹² Goyakalunupni gimalwuru,
ga wa goyaknuchi,
ga wa gimatkalchi,
ga wa poyagnutikolu,
ga wa kagwakpiiru,
ga wa giyaklu,
ga wa muchkonchi rixgognenatanu gike rixiniko mnikawnakatupa.
Wane gixkalurupa.”

¹³ Ga wa rugita satu wanna tsrune. Wane chinno, “Wa nyi klatalu mkachri gopowalu gitakachine ¿gi gixachinni ga wa ginaka ruyakatyana?”

¹⁴ Giyagni wane nchinru, “Nutsrukate, pixa gimata.”
Wane chinno, “Nyinwa tsru salewakchi giyakatyachinni. Ga wa ropowalutna rerkana ga wa klata rixkakluna gowega Wgenegragaya. ¹⁵ Wale chinanu Goyakalu tuplapijere ginaple rawna.

Yonogyegitluna gogi ga wa goyechno kpashiwakategrukoya.
Ga wa pogirchi tuplapijere tuplatachri gipjiya gishyatna.

¹⁶ Gi nachpatkana.

Gi ronunnagatemutanutkana.

Ga wa tkachi gi gapyegitanutkana,
ga wa giketsotaaji gemeruko.

¹⁷ Gi rixanu gowega Wgene

wa pogirchi tuplapijere ganikajiteswaji gwachri girukotanna.
Gonu gishpakgatyawaakaka giwekgatachrigonu yegi kosekanna.
Ga wa Goyakalu sheiygaletanna pejnuruko ktechgaya.”

8

Payokgipre rixinri gipre

¹ Ga wa payokgipre rixinri gipre kgimaxikolero kotpuikitka, gowukshina pochkepotlu tengogne.

² Payokgipre Goyakalutowrene neta, Goyakalu ginaple tunwatachine. Payokgipre kowi geneekalune.

³ Ga wa satu Goyakalutowreru gina. Yochpikikowakakwastsi tunwata. Pgamlupagiri yochpikgapi kori kamrutikaluru waneylu. Ga wa gixo pgamlupagiri reneeka, pejnuruneko kpashirine gagjigognereyma rutakyaplu wa korikwa yochpikikowakakwaya pogirchi tuplapijere ginaple.

⁴ Ga wa pgamlu pagiripgya gatskota kpashirine gagjigognereyma Goyakalutowrerumyoya Goyakalu getanu. ⁵ Ga wa gitowrerupgamlupagiri yochpikgapi rawa. Ga wa tsepotlu xirnachrimero yochpikikowakakwaya. Ga wa chiji ruknoklu. Giyagni wanetkalu rutoggle, ga wa plaschi gimkaka, ga wa rawrakle, ga wa giyolikchijru.

Payokgipre kowi waneyalune

⁶ Ga wa payokgipre gitowrerune, wa payokgipre kowi waneyalune galpookwletachine.

Muchinanu kowi

⁷ Ga wa muchinanu gitowreru kowitatka. Ga wa wanetkalu giwruji ga wa xirnachri, granchi kojetachri. Chiji giknookalurni. Satupje mapate chiji

ga wa satupje mapate gagmuna galga. Ga wa pejturniko kshanni polerni galgana.

Gepi rixinri kowi

⁸ Ga wa gepi rixinri gitowreru kowita. Ga wa tsru magka pixkalutu xirnachri galgachri, tsru wenu ruknooka. Ga wa tsru wenu mapate granchi rixatka. ⁹ Ga wa satupje mapate guyakotkalune tsru wenu gajene giwekachine gipnana. Ga wa satupje mapate kanawkaka gimpantuuka.

Mapa rixinri kowi

¹⁰ Ga wa Goyakalutowreru mapa rixinri kowita. Ga wa tengogne tujrukya tsro katagiri xirnachri katalo pixka. Guyagni satupje mapate wenkaka tapoka, ga wa gonu gishpaktiyawaka tapoka. ¹¹ Ga wa katagiri giwaka wane chinka kapsagalu kshana. Ga wa satupje mapate gonkaka kapsagalu kshana pixka rixatka. Guyagni gixo yinerni gipnana gonu chinanu gi rixanu kapsagalutkani.

Gepkoxamkoje rixinri kowi

¹² Ga wa gepkoxamkoje rixinri gitowreru kowita. Ga wa rumtuuka satupje mapate tkachi, ga wa satupje mapate ksru, ga wa satupje mapate katagirkaka. Guyagni satupje mapate tyekaka ruchpokinripa. Ga wa satupje mapate gogi gi pokamlata. Ga wa goyechno waneko pixka rixa.

jGi waneni! wa ginachripa chinanu

¹³ Ga wa netatka. Ga wa nyijnakotlu tsru klatatalu tengogne ganikajite galnachri gichkoplaji wane chinachri, “jGi waneni, gi waneni, gi waneni tyechijne gwachine pimri kowigimkaka chinanu wa mapa gitowrene kowitachinpatkagima!”

9

Pamyo rixinri kowi

¹ Ga wa pamyo rixinri Goyakalutowreru kowita. Ga wa netlo sato katagiri tengogne gjirukyachro. Chiji gapokachro. Ga wa gopnalutskata potu yoskekapre geneekaluru. ² Ga wa kotpuklu gitskatpotupna. Gopnalu ratskopgyaty, xirnachripogya pixka. Ga wa tkachi ga wa kawlennipygalu mapshaga rixka gopnalu guyakatyachrinnipyaya. ³ Ga wa gipgya rushpakyana tsetsene. Chiji rapokna. Geklo pixka rumkata gixletatkta tsetse. Geklo kachingate pixka reneeka. ⁴ Ga wa tsetsene wane chinkalune ma mumtukyapluna kshana chiji gajeru, gi wa girukokta poleruko, gi wa girukokta gagmunko, seyni yinepje wa Goyakalu gimaxikle gjirrotyna waneyamigenepje. ⁵ Ga wa tsetsene geneeka ma muylatyapna yine seyni pamyo ksru saletpotutkona yine. Ga wa wanna saletlewle geklo saletlewle pixka wa yineru tashkatini pixka. ⁶ Ga wa walegognekakapa rujga gipnaletanunna yinepni, ga wa gi rukshikanruna. Ga wa raluka potu gipnaletaninkana. Ga wa rasukininna gipnalu.

⁷ Ga wa wane rixa gipgugjewnaletna tsetskaka. Kawalyo pixka rixna, giylalu galpokyegitachine. Ga wa gijiwna waneyna sagyeta pixkaluto, kori pixkaluto. Ga wa gigojna yingoji pixka. ⁸ Ga wa kajiwutsalune suxojiwutsa pixka. Ga wa giygina tsru mgenokluygi pixka. ⁹ Ga wa waneyna rustatlena yowuma gisstatlechishpata pixka. Ga wa gimejna pogimnu chiji yapachro kawalyo kosestanro gima pixka rixmejitna wa giylalu yegi gasukyegimtachine pixka. ¹⁰ Ga wa waneyna ginshina, geklonshi pixka, ga wa gisruna. Ga wa ginshina rawa muchkonna yine rumtukyapna pamyo ksru.

11 Kpogirna. Towrechri gitsrukate gitskata potu gajeru walenwa pogirna. Ga wa wale giwakni Gewreyone tokanuya Gawato. Ga wa Kriyko tokanuya Gapolyo.

12 Wa muchinanu wamonchi giknogatka. Wanewalu gepi wamonchi wanepnute.

Patsrujire rixinri kowi

13 Ga wa Goyakalutwreru patsrujire rixinri kowita. Ga wa nyij-nakotlu satu plaschi wa gepkoxamkoje gwacha yegi giyakatyachri, wa korikwa yopchikikowakakwa gwagwachatachri yegi giyakatyachri Goyakalu getanu. **14** Ga wa wane chinru wa patsrujire rixinri gitowreru kowi waneyalatu, “Pkaspukanna wa gepkoxamkoje towrechine wa gostukalune tsru Geyoprate Gapga.”

15 Giyagni kaspukatkana wa gepkoxamkoje towrechine wa galpokotkalune gipapko ga wa gogi ga wa ksru ga wa walapu chinanu wa satupje mapate yine ruylatinripna. **16** Ga wa wane pejnuna solalone kawalyo yapachine: Gepi kata wa pamole waragka kata pamole waragka. Nyijnakotlu gi pejnuna.

17 Ga wa wane nixa getletna kawalyone kaygawluya, ga wa wanna gogo tuplatchine. Waneyna gistatlechishpata xirnachri pixkalutu ga wa ksajser-nuru ga wa gasogre pixkalutu. Ga wa kawalyonejiwu tsru mgenoklujiwu pixka rixa. Ga wa tonama rushpkaya xirnachrimero ga wa kapgyaluu ga wa gasogre. **18** Tye mapa tsru salewakchikaka kamakatna satupje mapate yinni. Wa xirnachriya ga wa kapgyaluya, ga wa gasogreya, wannanama gishpakyachriya. **19** Gi rixanu kawalyone muchkonu ginamna rawa, ga wa ginshina rawa. Gi rixanu ginshina gimnu pixka rixa kajiwuru. Waleyra rumtuklewatayana.

Menshinikanutkane

20 Ga wa gixetachine yine tyekaka tsru salewakchiya mupnikatu, gi koxa renshinikanutna wa gimonya kamrurnaya, ma yoptsojityegityanupluna kamchikaka ga wa yagluchishkaka. Walenwa kori ga wa sroschi, ga wa sintawo, ga wa sotlu, ga wa gagmuna kamrutikaluru yagluchisha. Walekaka gi gimkata getleta. Gi rumkata yijnakleta. Gi rumkata yanreta. **21** Gi koxa renshinikanegitluna ruylalewlena, gi wa kagonchiwleynak, gi wa rapoklewleynak, gi wa gichowguynak.

10

Mturo kirukpoyi

1 Ga wa satu Goyakalutwreru neta, tengogne gjirukyachri. Kyachgapere-rumko sapowakamtachri. Ga wa kshitpo gijiwu gogo gwa. Ga wa gigoji tkachi pixka gixa. Ga wa gjixi xirnachristsigi pixka rixa. **2** Ga wa gimyo mturo kirukpoyi kopralatkaluro waneylu. Ga wa potuklejixi tsruwenu rutaka. Ga wa kegnetjixi chiji rutaka. **3** Ga wa gichkoplaji sable rixa, wa tsru mgenoklu gigritini pixka. Ga wa wale sablewatini, payokgipre rutlogle gimkaka yanumatatka.

4 Ga wa payokgipre rutlogle yanumatinitka nyonatmakatkalu. Ga wa tengogne giyakatyachri tokanchi njema, wane nchinjeru, “Pushyapotutanru wa payokgipre rutlogle chinyawaka. Gi wa pyonatanru.”

5 Giyagni wa Goyakalutwreru, wa tsru wenu ga wa chiji neta tunwale-tanru, teno yotunomyota potuklemyo. **6** Ga wa giwekgognenatachri gike rixiniko mnikawnakatu kawchinanu china. Tengogne ga wa tengogne gajerkaka giyakotachri, ga wa chiji ga wa chiji gajerkaka giyakotachri, ga wa

tsru wenu ga wa tsru wenu gajerkaka koxa giyakotachri Wale kawchinanu wane china wa maleshaplu gogi. ⁷ Seyni wa Goyakalutowreru payokgipre rixinri kowikle gimaklu, wa kowitinpakta, poyagkakpotutikolpatka Goyakalu giyogimatanru, chinyawaka Kiglerpotunaru Tôkanchi, wayegrene runkakyawaka, wa tokanu geneklewatachine.

Gwa niklo mturo kirukpoyi

⁸ Ga wa tengogne giyakatyachri tokanchi nyijnakotanru, numepe giynum-saletjeru. Wane china, “Gajewa. Pyoptotapanro wa kiruka kopralatkaluro, wa Goyakalutowrerumyo gwachro, wa tsru wenu ga wa chiji tunwatachri.”

⁹ Giyagni towrechri yegi nyatka. Wane nchinru, “Mturo kirukpoyi penekanno.”

Giyagni wane chinno, “Pyoptotanro ga wa pnikanro. Ga wa tkapsatnan-wakatanyi, seyni punama pochwaa rixnamatanyi wrolga pixka.”

¹⁰ Giyagni towrechimyoya nyoptotlo mturo kirukpoyi. Ga wa nniklo. Giyagni nonama pochwaa rixa wrolga pixka. Wa nnikinitkalu, kapsanan-wakataa nixa. ¹¹ Ga wa wane chinnona, “Goyakalu tokanu pumkata genek-lewletatnaka gixolune yinepirana, ga wa paynepirana, ga wa patokankaka yanumatyachinepirana, ga wa pogirchinezpirana.”

11

Towutkaluru wa kpashiwakpotugruko yantatinripa

¹ Ga wa neneeka yantapije kanojerchi pixkalutu. Wane china, “Palnanu. Pyantatanru kpashiwakpotugruko Goyakalunu, ga wa yochnipk-jetikowakwa ga wa wane yoptsojityachine. ² Ga wa kpashiwakpotupu maleka gajeru petashatanu. Gi wa pyantatanru. Gi rixanu payine ge-nekalurni. Ga wa gepkoxamkojmole gepi ksuru kpashiwaka pokchi raka-tokanna.

Wa gepi gipgujtalewatachine

³ “Ga wa gepi nupguitatjene nutakanu. Ga wa satu waragka gepi pacha patsrujiremolgogne tokanchi reneklewetanna, kawhistugalu mkachri gitakachine.”

⁴ Wannanwa gepi goliwamuna ga wa gepi katalgapi, tye psolchijneko Gitsrukate getanu tunwatachrikaka. ⁵ Ga wa satu galuka gimtukletinipna, xirnachrimero gishpaknamatanna ga wa kamnixjene ruylatanu. Ga wa satu galuka gimtukletinipna, rumkata wane gixa giylaettkota. ⁶ Wanna gitaka rushyatapluna tengogne, gina ma mixinitipa Goyakalu tokanu reneklewatinrinagogne. Ga wa rutaakana gonu chinanu, kashrijetyapluna gonu granchi rixinripa. Ga wa rutaakana chiji rumtukinripna pejnuruko tsru salewakchiya gi pejnu katananukta ralukyayawka.

⁷ Ga wa rali gipgujtalewletinitkana, kmatsru wa gitskata potu gishpaky-achri wannayma ruylakakanu. Ga wa raalixanunna, ga wa ruylatanunna.

⁸ Ga wa gimanepnina tsru potu pokchi gatnugapote rawanna. Tye tsru pokchinwa shinikanchiya Sotoma ga wa Gigipto chinkaluru. Wane koxa Rutsrukata koroshishkita gitakikowaka. ⁹ Ga wa pimrime yine, ga wa panerune, ga wa patokanu yanumatyachine, ga wa payine getmanetanna mapgogne ganikaji. Gi wa ruchi kapnatkomanetanna. ¹⁰ Ga wa tyechijne gwachine gimuwyegitanna, ga wa meyiwatanna, ga wa genekashlukaka yokanyegekakanna. Gi rixanu wanna nyi gepi gipgujtalewatachine saletpo-tuttana tyechijne gwachine.

¹¹ Mapgogne ganikajgogne chininri giknoginitka, giweklunnipgya Goyakalu giyakatyachri jiglokna. Ga wa tunwatna. Ga wa tsru piklu rixna wa

getachine. ¹² Ga wa yijnakotluna gichkotokanuru tengogne guyakatyachri. Wane chinna, "Gewi gatskotanu."

Ga wa tengogne ratskotatkana kyachgapererumkoya. Ga wa kamnix-jenna getna.

¹³ Ga wa walepapko wanetkalu tsru giyolikchijru. Ga wa satupje pamolete tsru potu pokchi yawnana. Ga wa rupnanna giyolikchijruya wane pejnunga: payokgipre waragka yinni. Ga wa gixetachinni pikpotutana. Rumalwutluna Goyakalu tengogne Gajeru.

¹⁴ Gepi chininri wamonchi giknogatka. Mapa chininri wamonchi giyam-potu gapokanu.

Payokgipre rixinri kowi

¹⁵ Ga wa payokgipre rixinri Goyakalutowreru kowita. Ga wa tengogne gichkolu plaschi wane, wane chinachri:

Tyechijne pogirewatayawaka Wutsrukatenutkani ga wa Kristotenutkani. Ga wa Wale pogirewgognenatanu
gike rixiniko mnikawnakatupa.

¹⁶ Ga wa gepmole gepkoxamkoje tsrune Goyakalu getanu tuplapijerkakna tuplatachine chiji yonogjiwutna. Ga wa yoptsojityegitluna Goyakalu. Wane chinna:

¹⁷ Wpoyagnutyi, Wutsrukate Goyakalu,
pejnuruko Girukotachri,

wa wanerutu ga wa muchikawluru,
gi rixanu pwatkalu tsru potu puyaklewle
ga wa pogirewatatka.

¹⁸ Ga wa payine jigekanuwata.
Ga wa pjigekanu gapokatka.

Wa gipnachine gitakyagokkolpapko gapoka gapnuru renekikolupna
pwayegrene ga wa ptokanu geneklewatachine
ga wa kpashirine, ga wa pgiwaka pikachine, mturune ga wa tsrune.
Ga wa rumtukikolupna tyechijne gimtukachine.

¹⁹ Ga wa tengogne kpashiwakpotugruko Goyakalunu kotpuuka. Ga
wa tetka rupiratanru tokanchi gwanropaji kpashiwakpotugruko Walenu
gwachropaji. Ga wa waneru rawrakle, ga wa plaschi gimkaka, ga wa
rutlogle, ga wa giyolikchijru, ga wa tsru potu giwrujkaka.

12

Wa suxo ga wa gimnu gitsruka

¹ Ga wa tsru getkaluru gipgujewna tengogneya, suxo tkachi makat-achro. Ga wa ksuru tojixi rapukote rawa. Ga wa tojiwu twa sagyeta pamole gepi katagiri gwanro. ² Ga wa kamshiro. Tsaplewjeta tochinoya. Ga wa chinowatatkta tushpakkawgenetinripa. ³ Ga wa satu getkaluru gipgujewna tengogneya. Ga wa wanetkalu serolu gimnu git-sruka. Waneylu payokgiprejiwu, ga wa pamolegwatalu. Ga wa gjiiwkaka waneru payokgipre pogirchi sagyetatkaka. ⁴ Ga wa ginshi kosetyalu satupje mapate katagirkaka tengogne gajerkaka. Tyechijne ruknooka. Ga wa gimnu gitsruka wa suxo gishpakkawgenetachropatka getanu tunwata nikaw-genetyaplo wa rushpakinipa. ⁵ Ga wa wala tushpakkawgeneta. Jejni. Wa Wale payinemnuna nuka girukotachripni kanojerchi yowumajeya. Ga wa rushatkapkatka Toturu. Goyakalu yegi ga wa tuplapijere yegi rutaaka. ⁶ Ga wa suxo yineru mwiyawakanu tya gasukleta. Wane waneylo twiyawaka, Goyakalu galpokotyawaka. Wane toglutikolupa satu waragka gepi pacha patlsrujirmolegogne.

Mikili tengogne giknokyalu gimnu gitsruka

⁷ Ga wa tsru giylalutkani tengogneya. Mikili ga wa waleymalune Goyakalutowrene yagotlu gimnu gitsruka. Ga wa gimnu gitsruka ga wa waley malune gitowrene yagotlewata. ⁸ Ga wa gi rumkatlewatna. Ga wa wanepnute maleshayatkana rawyawakakna tengogneya ⁹ Ga wa ruknooka tsru potu gimnu gitsruka wa kapokotu gimnu, wa kamchi gitsrukate chinkaluru, ga wa Satanasyo. Walenwa psolchijneko gwachine yokwitachri. Ruknooka. Tyechijne rapoka. Ga wa gitowrene waleymananuko giknooka.

¹⁰ Ga wa gichkoplajiru tengogne nyijnakota, wane chinachri: Xawakni wanetkalu gognewatikaluru ga wa giyaklu, ga wa Woyakalute pogirewatyawaka, ga wa Kristote girukotyawaka.

Gi rixanu giknookalurunatkani wumolene jigyegitachri.
Gogi, goyechno jigyegitna Goyakaluyegiya.

¹¹ Ga wa wanna gaalixlu jigyegitjerna gowega Wgenegragaya,
Ga wa rupguitalewlena tokanuya.
Ga wa gi chipetgiwekletra rupninpotonanukna.

¹² Wale chinanu gimuwanatu tengogne ga wa tengogne gwachingi.
Gi waneni tyechijne gajene ga wa tsru wenu gajene,
gi rixanu gixa yegi rujrukatka kamchi gitsrukate!
Tsru gmittuwnalu rixa.
Gi rixanu rumatlu pshinitsongognepje waneylu.

Wa gimnu gitsruka kojwaklo suxo

¹³ Ga wa gimnu gonru gitsruka getnatkawa giknookalurutka ga wa tyechijnetkalu. Waneklu kojwaklo suxo jeji wugenetachro. ¹⁴ Ga wa suxo geneeka gepmeji tsru klatatalumeji pixkalutu yineru mwiyawakanu talninripa, gimnu gonruyegiya talninripa, twiyawakapa tyinripa. Wane toglutikolupa gogi ga wa gogkaka ga wa ganikajgogne. ¹⁵ Ga wa suxo gajxigi raplikgatlu gonu gimnu, rapga pixka, rapogyegimtyaplo. ¹⁶ Ga wa chiji gipxaklo suxo. Chiji namata, ga wa rapga nikloka, gimnu gonru gitsruka gaplikgatanru. ¹⁷ Giyagni gimnu gonru gitsruka jigekeanuwpotuta suxo chinanu. Ralimta. Ruylalewatinripa gixetachine toklopishaneyma, wa Goyakalu yokanatanrukaka kamrutachine, ga wa gipguitalewlu Gesopirana waneyalune. ¹⁸ Ga wa tsru wenu ksate tunwata gimnu gonru gitsruka.

13

Kmatsuru tsru wenuitya kanikyachri

¹ Ga wa netlu kmatsuru tsru wenuitya kanikyachri. Ga wa waneyalutu pamolegwa ga wa payokgiprejiwuruta. Ga wa gigwakaka rawa pamole pogirchi sagyetate pixkalutu. Ga wa gijiwakaka rawa yonatkaluru mupashiregnuchi giwaakaka. ² Ga wa kmatsuru netanru mgenoklu pixka rixa. Ga wa gjixi magemjixi pixka rixa. Ga wa ginama tsru mgenoklunama pixka rixa. Ga wa gimnu gitsruka genecklu ruyakle ga wa tuplapijere. Ga wa tsru potu rutaklu. ³ Ga wa satu gijiwu gistikapgtatkaluru rupnininripmaka. Ga wa rustakikolu rupnininripmaka gituukaaka. Ga wa ruglajitna psolchijne gajeneko kmatsuru gajxigi rawinrina. ⁴ Ga wa yoptsojityegitluna gimnu gitsruka gi rixanu wale gitaklu kmatsuru. Ga wa yoptsojityegitluna kmatsuru. Wane chinna, “¿Girupni wa kmatsuru pixkalutu? ¿Katu gimkata giylakakleta waleyma?”

Kmatsuru gitaaaka psolchijne gajeneko chinanu

⁵ Ga wa kmatsuru geneeka namchiya yanumatyaplu tsrupirankaka ga wa mupashiregnuchkaka. Ga wa rutaaka gepkoxamkojmole gepi ksuru wane rixinripa. ⁶ Ga wa yanumata mupashiregnuchi chinpiranyegityaplu Goyakalu. Mupashiregnuchi chingiwakatyaplu ga wa gipji, ga wa tengogne gwachine. ⁷ Ga wa ruchichka yagotyapna kpashirine, ga wa raalixyapna. Ga wa rutaaka wale panerumnunuanuka yegi, ga wa pejnuruneko yine yegi, ga wa patokanumnunuanuka yanumatyachine yegi, ga wa payinem-nunanuka yegi. ⁸ Ga wa pejnuruneko tyechijne gwachine yoptsojityegitlu mapiranyegine giweklu kirukatyegiya wa gowega Wgene kirukatyegiya. Walenwa gilyatkaluru rekamrutkoyakawa tye psolchijneko.

⁹ Wa kajnakopnalu yijnakotanu:

¹⁰ Kashrewlu ganikachri, kashichkalurupni ralimtanu.

Girukokta yogolewapi giylalewatya, yogolewapi rumkata giylaletikolupa. Ga wa tyenwa kpashirine kashnantakgognewle ga wa ralixlewlena.

Kmatsuru chiji gishpakyachri

¹¹ Ga wa netlu satu kmatsurutnaka chiji gishpakyachri. Gepigwalutni gowega Wgene pixka. Ga wa gimnu gitsruka pixka rixa yanumsaleta. ¹² Ga wa muchinanu kmatsuru pixka rixa gitaaotku koxa wale psolpotuyako, wale getanu. Ga wa psolchijneko ga wa chiji gwachine yoptsojijixa, yoptsojityegityapluna wa muchinanu kmatsuru, wa gistaakaluru gipnirripmaka gitukachritka. ¹³ Ga wa tsru getkalurkaka kamruta. Tengogne rujruukakyalu xirnachri. Chiji rapoka yine getanu. ¹⁴ Giyagni yokwitna tyechijne gwachine getkalurkakaya wa renekikolu kamrutyaplu kmatsuru getanu. Wane chinna tyechijne gwachine kamrutyapluna kmatsuru yaglu. Walenwa yogolewapi gitsakikaluru ga wa ruweka. ¹⁵ Ga wa reneeeka ruweekakyaplu kmatsuru yaglu, wa kmatsuru yaglu yanumatinripa. Ga wa reneeeka ginnakokta ruylajixyapa wa kmatsuru yaglu myoptsjityegitkane. ¹⁶ Ga wa wane rixkakna pejnuruneko mturune ga wa tsrune, ponikolune ga wa kwamonurune, gishpakkachine ga wa wayegrechine, potuklemyona rutakagimaxikletikolupna waka gjrotna. ¹⁷ Ma mumkata gagjiretinitipna ga wa gishankalu mumaxikolenena kmatsuru giwaka waka giwakpejnu.

¹⁸ Ga wa tyenwa gimatkalelwlu. Kanshinikanuru yantatanaru kmatsuru pejnu. Gi rixanu yineru pejnuni. Ga wa wale pejnuni wa patsrujire pacha patsrujiremole patsrujire.

14

Wa satu pacha gepkoxamkojmole gepkoxamkoje waragkane shikalwat-inri

¹ Netatkalu Gowega Wgene Siyo Magkate tunwatachri. Ga wa Waley-malune satu pacha gepkoxamkojmole gepkoxamkoje waragkane, Wale gi-waka ga wa Ruru giwaka yonajrotatkalue. ² Ga wa nyijnakotlu pagima tengogne giyakatyachri, gixo gonugimkaka pixka. Ga wa tsru rutloglegima pixka rixa. Ga wa nyijnakotanrugima, kgitloklerune rutlotsaprena rutlotinrina pixka rixgimata. ³ Ga wa shikalchi gerotu shikaletna, pogirchi tuplapijere getanu ga wa gepkoxamkoje giwekachine getanu ga wa tsrune getanu. Ga wa giike gimkata gimatletlu shikalchi seyni wannapje, wa satu pacha gepkoxamkojmole gepkoxamkoje waragkane, gipekotikalune chiji gajeneyegiya. ⁴ Nyinwa suxoneyma mpuchotkone, gi rixanu suxo metkanewa. Nyinwa gowega Wgene gomkagitachine ginakakokta yinri. Nyinwa yinyegiya gipekotikalune. Nyinwa gegwikane Goyakalu chinanupa ga

wa gowega Wgene chinanupa. ⁵ Ga wa ginamayna gi rukshigayrokletkana. Muklukanuwnakane.

Kiglerpotunaru Tokanchi gike rixiniko mnikawnakatu

⁶ Ga wa satu Goyakalutowreru neta tengogne ganikajite yapa galnalenata. Kiglerpotunaru Tokanchi gike rixiniko mnikawnakatu waneyalutu, tyechijne gwachine runkakleyegitanrupa, ga wa payinemnnunanukyegi, ga wa panerumnunnanukyegi, ga wa patokanumnunnanuka yanumatyachinyegi, ga wa pejnruruneko yine yegi. ⁷ Gichkoplaji wane chinreru, “Mpikanru Goyakalu ga wa gimalwutanru. Gi rixanu rapokatka rutakyagoklewlepapko. Gyoptsojityegitanru tengogne kamrutachri, ga wa chiji, ga wa tsru wenu, ga wa gonu gishpaktiyawaakaka kamrutachri.”

Rujrukanatka tsrupotni Wawiloni

⁸ Ga wa romkagitlu satu Goyakalutowreru gepi chininri. Wane china, “Rujrukanatka. Rujrukanatka tsrupotni Wawiloni. Suxo pixka tapoklewle getsutanrewle wingate, payinemnnunanuka tutagata.”

Ruykotkana ma yonogyegityapluna wa kmatsuru

⁹ Ga wa satu Goyakalutowreru mapa chininri gomkagitna. Gichkoplajiya wane china, “Girukokta yoptsojityegitlu kmatsuru ga wa wale yaglu, ga wa girukokta gjrota ga wa gimyo gimaxikole yoptotachri, ¹⁰ wale koxa giranru Goyakalu gimtuwnale wingate, myapjetu giyookaluru. Wale jgekanu girikalurostono giyookalurupa. Ga wa walepni saletpotutkona xirnachriya ga wa gasogreya kpashirine towrechine getanu, ga wa gowega Wgene getanu. ¹¹ Ga wa wanna tsru salewnalepgya gatskogognenatanu gike rixiniko mnikawnakatupa. Gi rapnanutanunna gogi ga wa goyechno, wa kmatsuru ga wa wale yaglu yoptsojityegitachinepnu, ga wa girukokta yoptotolu giwaka gimaxikle.” ¹² Ga wa tyenwa kpashirine kashnantakgognerewle: Goyakalu yokanatanrukaka kamrutinripna ga wa Geso romkagi galixlet-inripna.

Giglenshinikeygitkalunni Gitsrukaachi gwachine gipnakane

¹³ Ga wa nyijnakotulu tokanchi tengogne giyakatyachri, wane chinachri, “Pyonatanru: Giglenshinikeygitkalunni gipnachine xanigognenanu, Git-srukaachi gwachine gipnakane.”

“Gigi,” china Giwekkaluru, “yaprewatinrina rapananutinripna. Gi rixanu kamrurna gomkagitanna.”

Tyechijne jirgika

¹⁴ Ga wa netatka. Ga wa waneru kyachgapererumko klatalu. Ga wa kyachgapererumko tuplata yineru Wgene pixkalutu, kori sagyeta wanejiwurutu. Ga wa satpokachri gistakapi gepragaspuru rawamyota.

¹⁵ Ga wa kpashiwakpotugruko rushpakya satu Goyakalutowreru. Gichkoplaji china saplewyegitlu kyachgapererumko tuplatachri. Wane chinru, “Pkashichanutkalu pustakapre. Pjirganutka. Gi rixanu rapokatka jirgikol-papko. Ga wa ruprigatka tyechijne jirgikolu.”

¹⁶ Giyagni kyachgapererumko tuplatachri chiji ranikatkalu rustakapre. Ga wa chiji jirgakatka.

Wa tapatgatyawaka Goyakalu gimtuwnalyegi

¹⁷ Ga wa tengogne gwachri kpashiwakpotugruko rushpakya satu Goyakalutowreru. Waneykoxl uale satpokachri gistakapi gepragaspuru. ¹⁸ Ga wa yochpikjetikowakwa ruyakatya satu Goyakalutowreru. Wale gitaka xirnachri chinanu. Gichkoplaji saplewyegitlu gistakapi gepragaspuru waneyalutu. Wane chinru, “Pkashichanru pustakapre gepragaspuru, ga

wa pjirganru gowapitsgawa chiji gajero. Gi rixanu ralixatka gowaji chiji gajero.”

¹⁹ Ga wa Goyaklalutowreru chiji raniklu rustakapre. Ga wa jirgalu chiji gajero gowaji. Ga wa tapatgatyawaka Goyakalu gimtuwnalu yegi, ruknoklu. ²⁰ Ga wa tapatgatyawaka gakatooka pokchi malekate. Ga wa tapatgatyawaka rushpakyra granchi, kawalyo chipetapre tennu gapokagragatachri, ga wa satu pacha waragkastsi rowuknu.

15

Payokgipre ralipre tsru salewakchikaka

1 Ga wa tengogne netyalu satu getkaluru, tsrupotu koglajrewatachri. Payokgipre Goyakalutowrene payokgipre ralipre tsru salewakchikaka waneyalune. Gi rixanu tyekakaya ralipreta Goyakalu gimtuwnale. ² Ga wa netlu tsru wenu witryoga pixkalutu xirnachrimero yapjetachri. Ga wa kmatsuru gaalixachine, ga wa yaglu, ga wa giwakpejnu gaalixachine, witryo pixkalutu tsru wenu gogomta tunwatachine. Ga wa gitlopitskaka Goyakalunu waneyalune. ³ Ga wa shikaletluna Goyakalu wayegreru Moysisi shikale ga wa gowega Wgene shikale. Wane china shikaletna: Tsrupotkakni ga wa koglajrewatachrikaka pkamrure,

Wutsrukate Goyakalu, pejnuruko Girukotachri.

Potuko potu ga wa galikakpotunanu pixjetyawaka.

Payinemnnunanuka Pogiryi.

⁴ ¿Girupni gi wa pikanyi Pixa, Wutsrukate?

¿Ga wa katupni gi gimalwugiwakatanyi?

Gi rixanu Pixapjeni wa kpashiryi.

Gi rixanu payinerumnunanuka ginanu
ga wa yoptsojityegitanyina.

Gi rixanu gipgujetkalurutkani kiglerkaka pkamrutinri.

Payokgipre koripro

5 Wanepnute neta. Ga wa kotpuukalurni kpashiwakpotugruko, gipgutatikowakapji gajerugruko tengogne gajeru. ⁶ Ga wa kpashiwakpotugruko rushpakyana payokgipre Goyakalutowrene, payokgipre tsru salewakchikaka waneyalune. Katajimtalu powralu mkachrichrata gitakachine. Ga wa gishrikakjeputachine korimtaya. ⁷ Ga wa satu wa gepkoxamkoje giwekachine genekna payokgipre Goyakalutowrene payokgipre koriproswaga katseplu rumtuwnale giwekgognenatachri gike rixiniko mnikawnakatu Goyakalu. ⁸ Ga wa kpashiwakpotugruko katseplu kappyalu Goyakalu goyaknu chinanu ga wa ruyakle chinanu. Ga wa gike gimpata jiglokletlu kpashiwakpotugruko nikawninpotunanuko payokgipre tsru salewakchikaka payokgipre Goyakalutowrerunenu.

16

Towutkana rupkakyapluna koriproswaga gwanru

¹ Ga wa kpashiwakpotugruko giyakatyachri gichkoplaji nyijnakota. Wane chinna payokgipre Goyakalutowrene, “Gajewa. Chiji gipkakanru payokgiprepro Goyakalu gimtuwnale yegi.”

Muchinanuproswaga

² Giyagni muchinanu ralimta. Chiji rupkakaproswagatu walenu. Ga wa geftutu mugletu trechi waneyatkana yine, wa kmatsuru gimaxikle waneyalune ga wa wale yaglu yoptsojityegitachine.

Gepi rixinriproswaga

³ Ga wa gepi rixininri tsru wenu gipkakaproswagatlu walenu. Ga wa gipnachrigraga pixka rixatka. Ga wa pejnuruneko giwekachine tsruwenu gajene gipnana.

Mapa rixinriproswaga

⁴ Ga wa mapa rixinri rapgakaka ga wa gonu gishpakgatyawaakaka rupkakaproswagatlu walenu. Ga wa granchitkani. ⁵ Ga wa nyijnakotlu Goyakalutowreru gonu gitakikaluru wane chinreta:

Pixni poyagkakachriyi, wa wanerutyi
ga wa muchikawluryi, kpashiryi,
gi rixanu tyekaka puklukanuwnayegjixa.

⁶ Gi rixanu wanna gipkaklu kpashirinegraga,
ga wa ptokanu geneklewatachinegraga,
ga wa granchi putna. Rumuknunina.

⁷ Ga wa yochpikikowakakwa njema wane chinreta:
Gigi, Nutsrukate Goyakalu, Pejnuruko Girukotachri.
Galikakpotunanu ga wa poyankaklewlni
puklukanuwnayegjixlewele.

Gepkoxamkoje rixinriproswaga

⁸ Ga wa gepkoxamkoje rixinri tkachi gipkakaproswagatlu walenu. Ga wa tkachi geneeka jimyapna yine xirnaleya. ⁹ Ga wa yine tsru gemeruya ralgakakikna. Ga wa mupashiregnuchi chingiwakatluna Goyakalu, tyekaka tsru salewakchikaka girukotachri. Gi renshinikautna rumalwutapluna.

Pamyo rixinriproswaga

¹⁰ Ga wa pamyo rixinri Goyakalutowreru kmatsuru tuplapijere rupkakaproswagatlu walenu. Ga wa mapshagalutkani wale pogirewatyawaka. Ga wa gichino chinanu rashkannutanna. ¹¹ Ga wa mupashiregnuchi chinpiranyegitluna Goyakalu tengogne Gajeru gichinyegna chinanu ga wa gitrena chinanu. Gi wa renshinikanutna kamrureyna.

Patsrujire rixinriproswaga

¹² Ga wa patsrujire rixinri Goyakalutowreru tsru Geyopreta Gapga rupkakaproswagata walenu. Ga wa walega gipriga ralpokgapotikolupa tkachi gishpatyawakasreta pogirene gatnugapotepa. ¹³ Ga wa neta gishpakletna mapa puchotlewatachine kamchine tolojrū pixkalutkaka, gimnu gitsruk-nama gishpakyachri, ga wa kmatsurnama gishpakyachri, ga wa gixashata-chine tokanchi geneklewatachinanama gishpakyachri. ¹⁴ Gi rixanu nyinwa kamchine getkalurkaka kamrutachine. Rushpkarna, psolchijne gajeneko pogirene yegi yachine, rapatkakikolupna giylasu yegi, Goyakalu pejnuruko Girukotachri tsrupotgogne giylale.

¹⁵ "Xakoka kachowguru pixka nixa ginretanu. Giglenshnikanyegitkalurni giyokachri ga wa girukotamkatachri, mamkutu ma yaninitipa. Ga wa ma metikotupa patewle."

¹⁶ Ga wa Gewreyo tokanu Garmaketo chinikowaka rapatkakikowakapna.

Payokgipre rixinriproswaga

¹⁷ Ga wa payokgipre rixinri Goyakalutowreru kawleru rupkakaproswagatlu walenu. Wa tengogne gajeru kpashiwakpotugruko pogirchi tuplapijeryegiya rushpkanya gichkopla, wane chinachri, "Wane gixkalurutkani."

¹⁸ Giyagni wanetkalu rawrakle ga wa plaschigimkaka ga wa rutlogle, ga wa tsru giyolchijru. Yine gapokchijitiniyakawlu mwajejetkatu tye

pixkalutu tsrupotu giyolikchijru. ¹⁹ Ga wa tsru pokchi mapasreta kotspal-tatikaluru. Ga wa payine pokchikaka gjrukana. Ga wa tsru Wawiloni gishiniika Goyakalu getanu, wa renekyaplu jigeakanu gimtuwnale wingate girikalurostono. ²⁰ Ga wa pejnuruko kanipreku galimta. Ga wa magkakaka gi rukshiika. ²¹ Ga wa tengogne rujrukya giwruji tsru potu pamyomole ginnu pixka, yine gogo gjrukachri. Ga wa yine mupashiregnuchi chin-piranyegitlu Goyakalu tengogne Gajeru, tsru salewakchi giwruji chinanu. Gi rixanu tsrupotni tye salewakchi.

17

Tuklukanuwnayegjixikowaka tsro kapoklewaklero

¹ Ga wa runa wa payokgipre Goyakalutowrene satute, wa payokgipreproswaga waneyalune satute, gita giynumsatachri. Wane chinno, “Punanu. Nekakgitanyi tuklukanuwnayegjixikowaka tsro kapoklewaklero gixo gonnaka tuplatachro. ² Walayma rapoklewatna tyechijne pogirene. Ga wa psolchijneko gwachine gimeta tapoklewle wingateya.”

³ Ga wa ranikno Giwekikaluruya. Yineru mwiyawakanu ranikno. Netlo suxo serolu kmatsuru gogo tuplatachro. Waneylu wale gixo mupashiregnuchi giwaakaka. Payokgiprejiwurutu ga wa pamolegwalutu. ⁴ Ga wa suxo pakniga yoshmookaluru pixkalutu ga wa serolumkachri gitakachro. Ga wa kori tugletika, ga wa kwenuru potu sotlejiruya, ga wa katajiroji perljakakaya. Ga wa tomyo waneylo kori girapiston. Gagnanutkalurkaka ga wa kapcholkaka tapoklewleya katsepostonoyal. ⁵ Ga wa tgiwaka tojrota tyonatika:

Giyogimanatkaluro, Tsro Wawiloni,

Kapoklewaklerone Ginro

ga wa Gagnanutkalurkaka Chiji Gajeru Ginro.

⁶ Ga wa netlo suxo, kpashirinegraga ga wa Geso gipgujtatachinegraga gimetachro. Ga wa netinitkalo nuglajita. Tsru giglajru nixa.

Giyogimanatkaluru tokanchi sxopiranaga wa kmatsurupirana

⁷ Ga wa Goyakalutowreru wane chinno, “¿Klu chinanu puglajita? Gita ginkakanyi giyogimanatkaluru tokanchi sxopiranaga, ga wa kmatsuru tutjiterupirana, payokgiprejiwurutu ga wa pamolegwalutu. ⁸ Wa kmatsuru wa petanru, wa muchinanu wanenanru ga wa gi wanetkalu, gitskata potu gishpakyachripni ga wa gamgikowaka yanu. Tyechijne gwachine wa giweku kirukate tye psolchijneko rekamrutkoklunuyakawa myongiwakatkone ruglajitanna retinipluna kmatsuru wa muchinanu wanenanru ga wa gi wanetkalu ga wa gapokachripa.

⁹ “Ga ga tyenwa shinikanchi kgimatkaleru. Payokgipre jiwhikaka walenwa payokgipre magka, wa suxo tuplatyawaka. ¹⁰ Ga wa walenwa payokgipre pogirchine. Pamyonne gjrukamatka. Satu wane. Ga wa satu gi gapokawa. Ga wa rapokinipa, pshinitsonu rumkata gwaleta. ¹¹ Ga wa kmatsuru muchinanu wanenanru ga wa gi wanetkalu, tyenwa pogirchi yokgipi rixinri. Ga wa payokgipreymalutni. Ga wa gamgikowaka yanuna.

¹² “Ga wa pamolegwakaka petanru wannanwa pamole pogirchine. Wan-nanwa gi yoptotawalu pogirewatayawakna, seyni kmatsuruyma pshinitsonu rutaakona. ¹³ Ga wa wanna waneya satupje shinikanchi. Ga wa muchkonna ga wa rutakikolna renekanruna kmatsuru. ¹⁴ Gowega Wgene yagotanna. Ga wa gowega Wgene gaalixanna. Gi rixanu Walenwa gitsrukaachine

Gitsrukate ga wa pogirchine Pogire. Ga wa Waleymalune tomgakalune ga wa tsomitkalunni ga wa poyagkakachinni.”

¹⁵ Ga wa Goyakalutowreru wane chinno, “Wa gonkaka petanru, kapoklewaklero tuplatyawaka, walenu yine ga wa gixolunkaka, ga wa payine, ga wa patokankaka yanumatyachine. ¹⁶ Ga wa pamolegwa wa petanru, wanna ga wa kmatsuru gayegixanro kapoklewaklero. Ga wa giknookaluro ga wa mammkato rixanunrona. Ga wa togitu nikanna. Ga wa xirnachrimerya yoxikininrona. ¹⁷ Gi rixanu Goyakalu gitakgajitna Wale gishinikanru kamrutinripna. Ga wa satupje shinikanchi rixanna. Ga wa pogirewatyawakna kmatsuru renekanna poyagkakikolpotunanuko Goyakalutokankaka. ¹⁸ Ga wa suxo petanro walanwa tsru pokchi, tyechijne pogirene chinanu pogirewatachri.”

18

Nikawnanatka tsro Wawiloni

¹ Wanepnute netlu satu Goyakalutowreru tengogne gjirukyachri. Tsru potu rutakikolu. Ratajiwnale pokamlatlu tye chiji. ² Ga wa gichkoplaji china sapleta. Wane china:

¡Nikawnanatka, nikawnanatka tsro Wawilonyani!

Kamchne gwiyawaka tixatka

ga wa pejnuruneko kamchne puchotlewatachine gishyatikowaka,
ga wa pejnuruneko koshichine kapcholune ga wa gayegixkalune.

³ Gi rixanu tapoklewle getsotanrewle wingate
payinemnunanuka gira.

Walayma rapoklewatna tyechijne pogirene.
Ga wa marnewatachine tyechijne gajene
ponikowata tshichponponikowleshatinriya.

⁴ Ga wa satu tokanchi tengogne giyakatyachri njema. Wane china:
Gishpkinitkalo, nayinerutene, gma mumukochirewatyanuplo,
ga wa gma yoptyotyanuplu tsru tsaelistikoluya.

⁵ Gi rixanu tengognepotuko rapokmoletinitka tmukochire.
Ga wa Goyakalu gishinikatkalu tma poyagkaklenu.

⁶ Papnutanro tixa gapnulewletyayaka.

Gepi kata psatkakyegitanro tkamrure pixka.

Wa girapistono tutakgatanru,
gepi kata putakgatinro.

⁷ Wane tixa galixkotletnawa ga wa tponikowashatinri wanekpejnu
penekanro tsalewnapotutinri ga wa twamonuwatinri.

Gi rixanu wane chingajita, “Gita pogirewatachrono tuplatachrono.

Gi wa mkapyalno.

Gike nixiniko wamonchi netanu.”

⁸ Wale chinanu pshinitsonuji rapokanu tsalewninripotu:
gipnalu, wamonchi, ga wa tsru nachlu.

Ga wa xirnachri tyoxikikolupa.

Gi rixanu gichkolni Gitsrukaachi
Goyakalu tuklukanuwnayegijxeru.

Wawiloni ruchiyyagatanna

⁹ Wala ruchiyyagatanna ga wa rukegeknanuwatanrona tyechijne pogirene,
walayma gapoklewatachine ga wa tixje ponikowashatachine, wa wanna
getiniplu tyoxikikolupgya. ¹⁰ Tsalewnapotutinri, piklena chinanu wajra
tunwatanna. Wane chinachinejni:

¡Gi wanen! Tsru potu pokchi Wawiloni, gichkolu pokchini.

Gi rixanu pshinitsonuji rapokatka puklukanuwnayegjixikolu.

¹¹ Ga wa sablewjeteyegitanrona tyechijne gajene kmarnewaklerune ga wa ruwanmonuwatanrona. Gi rixanu gike wanepnute gagjitanunna rej-nunkatna. ¹² Rejnunkatna walenwa kori, ga wa sroschi, ga wa kwenur-sotleru, ga wa katajiroji perlaji, ga wa wale potu mkachrichrata, ga wa pakniga yoshmookaluru pixkalutu mkachri, ga wa pgayamtalu, ga wa serolu mkachri, ga wa pejnuruko pgamlumunalu, ga wa pejnurukostono nikchi gitsruka gapkajere kamrutikalurustono, ga wa pejnuruko kwenuru potu gagmunastonkaka, ga wa sintawoshpata, ga wa yowuma, ga wa kigle-sotlerushpata. ¹³ Ga wa kanilata, ga wa pgamluru, ga wa pgamlugalo, ga wa pgamlupagiri yochpiikalurupa, murmunga, pgamlupagirpotu, ga wa winga, ga wa goliwangi, ga wa wale potu trikopagi, ga wa triko, ga wa prachine, ga wa gowegane, ga wa kawalyone, ga wa chiji yapachrokaka kawalyo kosetano, ga wa manchikaka, ga wa yine giwekinri.

¹⁴ Wa gejnuji punshinikanu getsutanutanru gitspalatinyi.

Ga wa pejnuruko ponikolu

ga wa pejnuruko gatajewnachri pamginina.

Gi pagognéko rukshiiko.

¹⁵ Ga wa tyekaka marnewatyachine, walaya ponikowatachine tsalewnapotutinri piklena chinanu wajra tunwatanna. Ruchiyagatanrona ga wa ruwan-monuwatanrona. Wane chinanna:

¹⁶ ¡Gi waneni! ¡Gi waneni, tsru pokchini!

Wale potu klatalu mkachri,

ga wa pakniga yoshmookaluru pixkalutu,

ga wa serolu mkachri gitakachro.

Ga wa kori tugletika, ga wa kwenuru potu sotlejiruya

ga wa katajiroji perlajkakaya.

Gi rixanu pshinitsonuji

giknookalurni gi pejnunanukta ponikolelwu.

¹⁷ Ga wa pejnuruneko kanawa ganikachine, ga wa pejnuruneko kya-gapgaklerune ga wa pejnuruneko kanawa kamrurewatyachine, ga wa pejnuruneko tsru wenu kamrurewatyachine, wajra tunwatanna. ¹⁸ Ga wa sablewjetetna retinrina tyoxikikolupgya. Wane chinna, “¿Girupni tye tsru pokchi pixkalutu?”

¹⁹ Chijipagi rupkajiwitna. Ga wa sablewjetanna. Chiyatattana ga wawan-monuwatananna. Wane chinna:

¡Gi waneni! ¡Gi waneni! Tsru potu pokchini.

Walaya ponikowatna

pejnuruneko kanawa waneyalune tsru wenu, tponikowleya.

Gi rixanu pshinitsonuji giknookalurotkani.

²⁰ Gimuwatanu wala chinanu,

tengogne gajene ga wa kpashirine,

ga wa yokanatkalue, ga wa Goyakalu tokanu geneklewatachine,

gi rixanu Goyakalu giklukanuwnayegjixlo gixa chinanu.

Gike rixiniko rukshikonatka Wawiloni

²¹ Ga wa satu Goyakalutowreru gichkolu gwalu sotlu, tsru ginripi sotle pixka. Tsru wenu ruknoklu. Wane china:

Tye pamuchkonu pixka tixa giknookota Wawiloni,

wa tsru potu pokchi.

Gi wa gike rixiniko rukshikonatka.

²² Ga wa kgitpetsaklerunegima

ga wa kgitloklerunegima

ga wa ktumlejiklerunegima,

ga wa kowiklerunegima
gike rixiniko jemkotka pixaya.

Ga wa pejnuruko kamruruchi gike rixiniko rukshiikotka pixaya.
Ga wa ginripsotlegima gike rixiniko jemkotka pixaya.

²³ Ga wa katalo pokamale gike rixiniko pokamlatyegityi.
Ga wa gnunrowatachriplaji ga wa gnuruwatachroplaji

gike rixiniko jemkotka pixaya.
Gi rixanu kmarnewakleru pixanu

wannanwa tsrukakalune tyechijneya.

Gi rixanu pkagonchiwle payinemnunanuka pyokwitinri.

²⁴ Ga wa walaya rukshikika Goyakalu tokanu geneklewatachinegraga,
ga wa kpashirinegraga,
pejnurunniko giylatkalurunena tyechijneya.

19

Gimuwlu tengogneya

¹ Wanepnute pagima nyijnakota tengogneya gixolune yineplajgima pixka-lutu. Wane chinna:

¡Gimalwutanru Goyakalu!

Woyakalutenupni gognetkaklewlu, ga wa goyaknuchi
ga wa giyaklu.

² Gi rixanu galikakpotunanni ga wa poyagkaklewlu
putakyagoklewle.

Gi rixanu Wale giklukanuwnayegjixlo tsro kapoklewaklero,
chiji gajene gimtukachro tapoklewleya.

Wayegrenegraga rapnuyegitna walamyoya.

³ Rumepe wane chinretna,

¡Gimalwutanru Goyakalu!

Tyoxikikolupgya gatskogognenatanu gike rixiniko
mnikawnakatupa.

⁴ Ga wa gepmole gepkoxamkoje tsrune ga wa gepkoxamkojene gepkoxamkojejixirune chiji gapoka. Yoptsojityegitluna Goyakalu, pogirchi tuplapijere tuplatachri. Wane chinna:

Wane gixkalurupa. ¡Gimalwutanru Goyakalu!

⁵ Ga wa pogirchi tuplapijere rushpakya satu tokanchi wane chinachri:
Nshikaletgimalwuretanru Woyakalute,

pejnurunekgi wayegrengi, ga wa pilkjengi,
mturune ga wa tsrune.

⁶ Ga wa pagima nyijnakota, gixolune yineplajgima pixka, ga wa gixo gonkakgima pixka, ga wa rutloglegima pixka, wane chinachri:

¡Gimalwutanru Goyakalu!

Gi rixanu pogirewata Wutsrukate

Woyakalute pejnuruko Girukotachri.

⁷ Wumuwatanu ga wa wumjikpotutanu.

Gi rixanu rapokatka gowega Wgene kashimyole.

Gi wa ganunropa galpokotachrotka.

⁸ Ga wa teneeka tyoshmakyaplu

wale potu klatalu mkachri katajimtalu ga wa powralu.

Gi rixanu wale potu klatalu mkachri
walenwa kpashirine poyagkaklewle.

Gowega Wgene kashimyole meyiwl nachnewlupa

⁹ Giyagni wane chinno, "Pyonatanru: Giglenshinikanyegitkalunni gowega Wgene kashimyo meyiwlü nachnewlupa chanixkalune."

Ga wa wane chinno, "Tyenwa Goyakalu tokanu galikakpotu."

¹⁰ Ga wa gjixipta napoka nyoptsojityegityaplu. Ga wa wale wane chinno, "Pigirkotinwa. Gi waneko pixanu. Pixje wayegrechrimo gita, satu wannatno gita, wa pumolene gipguitalelwu Gesopirana waneyalune. Goyakalu pyoptsojityegitanu. Gi rixanu wa gipguitalelwu Gesopirana walenna Goyakalu tokanu genekikolu pixka."

Goyakalu Tokanu gagagloklewatachri

¹¹ Ga wa netlu tengogne kotpuukaluru. Ga wa wane netyalu kawalyo klatalu. Ga wa wale gogo tuplatachri Walenwa Poyagkakachri chinkaluru, ga wa Galikakpotu. Poyagkaklewleya rutakyagoklewata ga wa yagotlewata.

¹² Ga wa giygale xirnachrimero pixka rixa. Ga wa gijiwu rawa gixo pogirchi sagyeta. Waneylu giwaka yonatkaluru, gi satuna gimatanru, seyni Walepje gimatu. ¹³ Ga wa mkachri granchi yoshmookaluru gitakachrini. Ga wa giwaka wane chinka Goyakalu Tokanu. ¹⁴ Ga wa solalone tengogne gajene gomkagitlu, klatalone Kawalyone yapachine, wale potu mkachri gitakachine klatalu ga wa powralu. ¹⁵ Ga wa ginama rushpakya yoglolewapi gepragaspuru, payinkaka ruylakinripa. Ga wa kanojerchi yowumaje rugirkotanna. Ga wa Wale gakatoklu tapatgatyawaka, Goyakalu pejnuruko Girukotachri jigezanu gimtuwnale wingate yegi. ¹⁶ Ga wa gimkalu ga wa gitpali yonatika giwaka: Pogirchine Pogire, ga wa gitsrukaachine Gitsrukate.

Kmatsuru ga wa gixashatachri Goyakalu tokanu geneklewatachri gipnale

¹⁷ Ga wa satu Goyakalutowreru neta tkachi tunwatachri. Tsruplaji rixa sablewleyegitna. Wane chinna pejnuruneko koshichine ga wa kamejirune tengogne ganikajite galnachine:

Ginanu. Gapatanu tsru nachnewlu yegi Goyakalunu.

¹⁸ Gnikyaplu pogirchinengitu, ga wa solalone gitsrukatenegitu, ga wa gichkolungitu, ga wa kawalyonegitu, ga wa wanna gogo tuplanatachinenegitu, ga wa pejnuruneko gishpakachinenegitu, ga wa wayegrechne ga wa mturune ga wa tsrunegitu.

¹⁹ Ga wa netlu kmatsuru, ga wa tyechijne pogirene, ga wa wanna solatene gapatachinni yagotyapluna kawalyo gogo tuplatachri ga wa Wale solateneyma. ²⁰ Ga wa kmatsuru kashichkaluru ga wa waleyimalu gixashatachri Goyakalu tokanu geneklewatachri, wa getkalurkaka kamrutachri wale getanu. Wa tyekakayma yokwitanna kmatsuru gimaxikle yoptotachine, ga wa yaglu yoptsojityegitachine. Wa nyi gepi giwekachinni xirnachripowga giknookana, wa gasogre xirnyachripowga. ²¹ Ga wa gixetachinni giylatkana kawalyo gogo tuplatachri yoglolewapreya ginama gishpakyachriya. Ga wa pejnuruneko koshichine jinanna wannanigituya.

20

Satu waragka walapu rostutikolu Satanasyo

¹ Ga wa netlu Goyakalutowreru tengogne gjirukyachri. Ga wa gitskata potu yoskekare ga wa tsru yowumatsa gimyo waneyalutu. ² Ga wa wale kashichlu gimnu gitsruka, kapokotu gimnu. Walenwa kamchi gitsrukate, wa Satanasyo. Rostutlu. Satu waragka walapu rostutikolupa. ³ Ga wa gitskata potu ruknoklu. Rushyayegitlu ga wa rogo rupityalu, ma yokwityapatkana payinkaka, satu waragka walapu poyagkakinpotunanuko. Wanepnutepa rumkata kaspauukota pshinitsonu.

Muchinanupa yotunru

⁴ Ga wa netlo pogirchi tuplapijerkaka, ga wa wala gogo tuplatachine. Ga wa rutaakanra rutakyagoklewatinripna. Ga wa netna giylatkalunemka, Geso gipgugjatikolu chinanu gistiknojifikalunni ga wa Goyakalu Tokanu chinanu. Wannanwa gi wa yoptsojityegitluna kmatsuru, gi wa yaglunu. Gi koxa yoptotluna rumaxikole gjirotnaya ga wa gimyoyna. Ga wa Kristoyma ruwekanna ga wa pogirewatanna satu waragka walapu. ⁵ Ga wa pimrine gipnachine gi giwekawa ma poyagkaakanupachi satu waragka walapu. Tyenwa muchinanupa yotunru. ⁶ Giglenshinikanyegitkalunni ga wa kpashirine wa muchinanu yotunrupa waneyalunemnupa. Wanna chinanu gi rutaaka wa gepi chininri gipnalu. Seyni wannapni wa Goyakalu ga wa Kristote sasertotetene. Waleyma pogirewgognenatanna satu waragka walapu.

Satanasyo gapatkakna Koki gajene ga wa Makoki gajene giylalu chinanu

⁷ Ga wa satu waragka walapu poyagkakinpatka, kaspuukotka Satanasyo yoshmakikowakaya. ⁸ Ga wa rushpanku yokwityapna payinkaka, gepkoxamkojesretate chijiya gajene, Koki ga wa Makoki, rapatkakikolupna giylalu chinanu. Tsru wenu ksatnepagi pejnupna. ⁹ Ga wa psolchijneko tsernu yanna. Ga wa kpashirine gwanatyawaka ga wa galuukaluru pokchi sajrukna. Ga wa tengogne rujrukya xirnachri ga wa ruylatanna. ¹⁰ Giyagni kamchi gitstrukate yokwitjerna, xirnachri ga wa gasogre xirnachripowga ruknooka. Wanekoxna kmatsuru ga wa gixashatachri Goyakalu Tokanu geneklewatachri. Saletpotgognenatkona gogi goyechno gike rixiniko mnikawnakatu.

Tsro klatalo tuplapije, ga wa gitakyagoklewlu

¹¹ Ga wa netlo tsro klatalo tuplapije, pogirchi tuplapijere. Wala gogo tuplatachri yegi rusuptagamtyatka chiji ga wa tengogne. Ga wa gi rukshika gwikowakatatkana. ¹² Ga wa netna gipnachine tsrune ga wa mturune tuplapije ginaple tunwatachine. Ga wa kiruukaka kopraakalurni. Ga wa sato kiruka kopraaka. Walanwa giweklu kirukate. Ga wa gipnachine gitakyagoonikolu kiruukaka yonatikaluruya, rixa kamruretyawakna. ¹³ Ga wa tsru wenga genekatkana gipnachine wane gwanatachine. Ga wa gipukchi ga wa gipnachine gwiyawaka geneknna wane gwanatachine rushpakinripna. Giyagni satkaka gitakyagooka rixa kamruretyawaka. ¹⁴ Ga wa gipukchi ga wa gipnachine gwiyawaka xirnachripowga ruknooka. Tyenwa gepi chininri gipnalu, wa xirnachripowga. ¹⁵ Ga wa giweklu kirukate mwagiwaakatku xirnachripowga ruknooka.

21

Gerotu tengogne ga wa gerotu chiji

¹ Ga wa netlu gerotu tengogne ga wa gerotu chiji. Gi rixanu wa muchinanu tengognenanu ga wa muchinanu chijinanu gisuptagamtatka. Ga wa maleshatkalu tsru wenu. ² Ga wa kpashiri pokchi gerotu Gerosale neta gi-jrukleta tengogneya Goyakaluyegiya, galpokotkaluru gnuruwatachro pixka gigletkaluro tganurupa chinanu. ³ Nyijnakotlu gichkotokanuru pogirchi tuplapijere giyakatyachri, wane chinachri, "Xaniyakawa Goyakalupji yineymatka. Rumwapjitanne. Wannapni rayinerutene. Ga wa Waleko Goyakalu wannaymapa. ⁴ Wale sheiyigaletanna pejnuruko giktegna. Ga wa gipukchi maleshpatkalu, gi wa wamonchiko, gi wa saplewjekteruko, gi kachinoluko. Maleshpatkalu. Gi rixanu muchinankaka gisuptagamtatka."

⁵ Ga wa pogirchi tuplapijere tuplatachri wane china, “Xani psoluko gerotu nkamruta.”

Ga wa wane china, “Pyonatanru. Gi rixanu tye tokanchikakni wa poy-agkakachri ga wa galikakpotunaru.”

⁶ Ga wa wane chinno, “Wane gixkalurutkani. Gitni wa muchinanu gwachri yongano ga wa ralipre yongano, wa yinuwakachrino ga wa ralipreno. Wa gonunnagatewatachripa Gita genekanru gonu gishpak-gatyawaka giwekgatachri gonu genekashatkaluru. ⁷ Wa gaalirewatachri tyekaka yoptotachripni. Gitapni Royakalutno. Walepni nwugene. ⁸ Ga wa kpikelegolune, ga wa malixkane, ga wa gagnanutkalurune, ga wa kgiy-lalewaklerune, ga wa kapoklewaklerune, ga wa kagonchiwatachine, ga wa yagluchisha kyonyegiklerune, ga wa pejnuruneko kayroklerune gi-knookona gipowgaya, xirnachri ga wa gemositeru gipragkachri galgikwaka. Tyepni wa gepi chininri gipukchi.”

Gerosale gerotu

⁹ Ga wa runa satu Goyakalutowreru, wa payokgiprepro katsepolu payokgipre ralipre tsru salewakchi waneyalune satute, gita giynumsat-achri. Wane chinno, “Punanu. Nekakgitanyi gnuruwatachro, wa gowega Wgene gnumropa.” ¹⁰ Ga wa Giwekkaluruya ranikno. Tsru magka tenolu rutakno. Ga wa rekakgitin kpashiri pokchi Gerosale, tengogne gjirukuyachri Goyakaluyegiya. Goyakalu goyaknu waneyalutu. ¹¹ Ga wa pokamlale kwensotlejiru pixka, gaspe sotleji pixka, katwergalu pixkalutu. ¹² Kaprijererni, tsru tenolu potu prijeru. Pamole gepi gipgyaptoteru. Ga wa gipgyaptokaka yegi pamole gepi Goyakalutowrene. Ga wa gi-wakchikaka yonatikalurni. Wannanwa pamole gepinerune Gisrayiline giwaka. ¹³ Tkachi gishpatyawakasreta wanero mapa gipgyapto. Ga wa tkachi potuklesretate wanero mapa gipgyapto. Ga wa tkachi kegnetesretate wanero mapa gipgyapto. Ga wa tkachi gimxityyawakasretate wanero mapa gipgyapto. ¹⁴ Ga wa pokchi prijere rapuko gwachri sotlukaka waneylu pamole gepi giwaka, wa gowega Wgene pamole gepi yokanatanune giwaka.

Wa pokchi gepkoxamkoje tsojriritu

¹⁵ Ga wa Goyakalutowreru gita giynumsatachri waneylu korije yantapije, yantatyaplu pokchi ga wa gipgyaptokaka ga wa prijere. ¹⁶ Ga wa pokchi gepkoxamkojetsojriritu. Rowuknu ga wa waneko pshinru tsernu. Ga wa yagotpokchitlu yantapijeya, payokgipre pacha gepkoxamkojmole gepkox-amkoje waragkasti. Rowuknu ga wa tsernu ga wa tennu patenkakluni. ¹⁷ Ga wa pokchi prijere yantata. Gepi waragka gepi pacha kilometro, yineru yantale pixka, wa towrechri yantale. ¹⁸ Ga wa gaspe sotle kamrutikaluru prijere. Ga wa pokchi kori makojni witryo pixka katwergalu. ¹⁹ Ga wa pokchi prijere tuplatyawaakaka pejnuruko kwenuro sotlu gigletikaluru. Wa muchinanu tuplatyawaaka gaspe sotleni. Ga wa gepi rixinri ksagiro pol-sotlerni. Ga wa mapa chininri kalsetoni klatsotlerni. Ga wa gepkoxamkoje rixinri gesmeralta poletwergasotlerni. ²⁰ Ga wa pamyo rixinri sartonika serotwergayongalmi. Ga wa patsrujire rixinri sartyo gasersotlerni. Ga wa payokgipre rixinri krisolito pwalpootwergasotlerni. Ga wa yokgipi rixinri weriro gamampolnursotlerni. Ga wa mturuji rixinri topasyo ksajipwal-nursotlerni. Ga wa pamole rixinri krisoprasopwaltwergasotlerni. Ga wa pamole satupje rixinri gasinto ksajpolnursotlerni. Ga wa pamole gepi rixinri gamatista pakni pixkalutu sotlerni. ²¹ Ga wa pamole gepi gipgyaptonwa pamole gepi katajiro perla. Satkaka gipgyaptonwa satu perla. Ga wa pokchiputni wa kori mkoje, witryo pixka katwergalu.

Wa gowega Wgene Walenwa pokchi katalote

²² Ga wa kpashiwaka potu gi wane netya. Gi rixanu Gitsrukaachi Goyakalu pejnuruko Girukotachri ga wa gowega Wgene Walenwa kpashiwaka potu tye pokchiya. ²³ Ga wa pokchi gi galuklu tkachi gi wa ksuruko pokamlatyegityapmaklu. Gi rixanu Goyakalu goyaknu pokamlatyegitlu. Ga wa gowega Wgene Walenwa pokchi katalote. ²⁴ Ga wa pokchi pokamlanu yananna payine. Ga wa tyechijne pogirene ganikyegitanru pogirewlena. ²⁵ Ga wa rupyaptotkaka gike rixiniko gishyatka gogi. Gi rixanu maleshaplu goyecho wane. ²⁶ Ga wa payinkaka ganikyegitanru pogirewlena ga wa kagwakpiirena. ²⁷ Ga wa gike rixiniko wane jiglokanu gi satuna gimuteru, gi wa gagnanutkaluru kamrutachriko, gi wa gayroklewatachriko, seyni wannapje giweklu kirukate gowega Wgenenu yonatkaluru.

22

Pagapga gonu giwekgatachri

¹ Rekakgitno pagapga gonu giwekgatachri, katajgalu ga wa katwergalu. Goyakalu tuplapijere ga wa gowega Wgene tuplapijere giyakgatyachri. ² Ga wa ganikajputu ga wa pasretaspawnagkaka waneru giweklu gagmunate, pamole gepi gejnuji gwajetyachri, paksurkaka satuko gejnujitnaka rawa. Ga wa gisure payine gitskalaakacakachripni. ³ Gi wa kamakpiiruko wanepatka. Ga wa wane rawa Goyakalu tuplapijere, ga wa gowega Wgene tuplapijere. ⁴ Ga wa wayegrene yonogyegitanru. Ga wa retgojitanruna. Ga wa gi-jrotna rawgiwakatanu. ⁵ Ga wa maleshpakalu goyecho wane. Ga wa gi galuukaluroopi yochpiikaluro pokamlanu. Gi wa tkachi pokamlanuko. Gi rixanu Gitsrukaachi Goyakalu pokamlatyegitanra. Ga wa wanna pogirewgognenatanuk gike rixiniko mnikawnakatu.

Pshinitsonu nunanu

⁶ Wane chinno, “Tyekakni wa poyakkakachri tokanchi ga wa galikakpotunamu tokanchi. Gitsrukaachi wa tokanu geneklewatachine giwekinrikaka Goyakalute, yokana towreta rekakgityapna wayegrene pshinitsonu gimkata wane gixkalurkakapa.

⁷ “Pshinitsonu nunanu. Giglenshinikanyegitkalurni wa tokanchi gimretachri twu tokanchi geneklewatachri kirukate gajeru tokanchi.”

⁸ Ga wa gitni Gwano tyekaka jemachrino ga wa getachrino, ga wa njeminitka ga wa netinitka, chiji napoka nyoptsojityegityaplu Goyakalutowreru-jixi ginaple, wa tyekaka nekakgitjeru. ⁹ Wale wane chinno, “Pgirukotinwa. Gi waneko pixanu. Pixje wayegrechrino gita. Satu wannatno gita, wa pumolene tokanchi geneklewatachine, ga wa twu kiruka tokanu gimretachine. Pyoptsojityegitanru Goyakalu.”

¹⁰ Ga wa wane chinno, “Gi wa gipre kgimaxikoleru pushyatiru twu kiruka gajeru tokanu, wa tokanchi geneklewatachri chinanru. Gi rixanu gi gowukatkalu gigogne. ¹¹ Wa mpoyagkaakatu mpoyagkaakatpatkani. Ga wa kapcholu kapcholpatkani. Ga wa poyakkakachri poyakkakpatkani. Ga wa kpashiri kpashirpatkani.”

¹² “Pshinitsonu nunanu. Ga wa napnure Gitaymaplu, satkaka nenekyapa rixa kamruretyawaka. ¹³ Gitni wa muchinanu yongano ga wa ralipre yongano, wa muchichachrino ga wa ralipreno, ga wa yinuwakachrino ga wa yoptukyawakno.

¹⁴ “Giglenshinikanyegitkalunni gerkamkatnachinwa, rutakikolupna giweklu gagmunate chinanu, ga wa pokchi gippyaptote jiglokinripna. ¹⁵ Malekna kewene, ga wa kagonchiwatachine, ga wa kapoklewaklerune,

ga wa kgiylalewaklerune, ga wa yagluchisha kyonogyegiklerune, ga wa pejnuruneko gayroklewlu galukachine ga wa gayroklewlu koschekachine.

¹⁶ “Gitni Geso nyokanatlu notowreru gixa yegi rupgujtatyaplu tyepirankaka gapatjetachinkaka chinanu. Tawitskino Gita, ga wa Tawiklopishño. Ga wa Gitni Gonsagno gatajiwnachrino.”

¹⁷ Ga wa Giwekikaluru ga wa gnuruwatachropa wane china, “Tekali.”

Ga wa yijnakotachri wane koxa chinanu, “Tekali.” Ga wa gonunnagatewatachri runanu. Ga wa girukokta galuklu gonu giwekgatachri genekashatkaluru yooptotanru.

¹⁸ Goyakalu tokanu geneklewatachine chinyawaka, wa twu kiruka gwachri, pejnuruneko yijnakotachine nupgujtayegita gita. Girukokta yognikyeginri tokanchi tye pnute, Goyakalu yognikinri wale tsru salewakchi, wa twu kiruka yonpiranyegitkaluru salewakchi. ¹⁹ Ga wa girukokta tye tokanchi geneekaluru kontokanutinri twu kiruka gajeru, Goyakalu koninri walenupmaka giweku gagmunateya wa kpashiri pokchi gajeruya, twu kiruka yonpiranyegitkaluru.

²⁰ Tyepirankaka gipgujtatachri Wutsrukate wane china, “Gigi. Pshinitsonu nunanu.”

Wane gixkalurupa. Punanu, Wutsrukate Geso.

²¹ Gitsrukaachi Geso gimusangi pejnurunekgi gixa. Wane gixkalurupa.